

Hoani Mutaka


Vault


BOOK AREA

M285.2

H99MA0

1917a





MAORI
NEW TESTAMENT AND PSALMS

MAORI

NEW TESTAMENT AND PSALMS

KO TE

KAWENATA HOU

A

TO TATOU ARIKI A TE KAI WHAKAORA

A IHU KARAITI

HE MEA WHAKAMAORI MAI NO TE REO
KARIKI

LONDON

BRITISH AND FOREIGN BIBLE SOCIETY

1912

KO NGA

I UKAPUKA O TE KAWENATA HOU.

	Nga Upoko.		Nga Upoko.
Matiu	28	1 Timoti	6
Maka	16	2 Timoti	4
Ruka	24	Taituha	3
Hoani	21	Pirimona	1
Nga Mahi a nga Apotoro	28	Nga Hiperu	13
Roma	16	Hemi	5
1 Koriniti	16	1 Pita	5
2 Koriniti	13	2 Pita	3
Karatia	6	1 Hoani	5
Epeha	6	2 Hoani	1
Piripai	4	3 Hoani	1
Korohe	4	Hura	1
1 Teharonika	5	Whakakitenga	22
2 Teharonika	3		

KO TE

RONGO PAI A MATIU.

UPOKO 1.

Nga tupuna i te taha ki a Hohepa. 18 Haputanga o Meri. 20 Ta te anahera.

KO te pukapuka o te whakatupuranga o Ihu Karaiti, tama a Rawiri tama a Aperahama.

2 Whanau ake ta Aperahama ko Ihaka; whanau ake ta Ihaka ko Hakopa; whanau ake ta Hakopa ko Hura ratou ko ona tuakana, ko ona teina;

3 Whanau ake ta Hura raua ko Tamara, ko Parete raua ko Hara; whanau ake ta Parete ko Heteromo; whanau ake ta Heteromo ko Arame;

4 Whanau ake ta Arame ko Aminarapa; whanau ake ta Aminarapa ko Nahona; whanau ake ta Nahona ko Haramono;

5 Whanau ake ta Haramono raua ko Rahapa, ko Poaha; whanau ake ta Poaha raua ko Rutu, ko Opere; whanau ake ta Opere ko Hehe;

6 Whanau ake ta Hehe ko Rawiri kingi; whanau ake ta Rawiri kingi raua ko te wahine a Uria, ko Horomona;

7 Whanau ake ta Horomona ko Ropoama; whanau

ake ta Ropoama ko Apia; whanau ake ta Apia ko Aha;

8 Whanau ake ta Aha ko Iohapata; whanau ake ta Iohapata ko Iorama; whanau ake ta Iorama ko Ohiaha;

9 Whanau ake ta Ohiaha ko Iotama; whanau ake ta Iotama ko Ahaha; whanau ake ta Ahaha ko Etekiaha;

10 Whanau ake ta Etekiaha ko Manahe; whanau ake ta Manahe ko Amono; whanau ake ta Amono ko Hohaia;

11 Whanau ake ta Hohaia ko Hekoniahia ratou ko ona teina, i te whakahekenga ki Papurona;

12 A, i muri i te whakahekenga atu ki Papurona, ka whanau ta Hekoniahia ko Haratiere; whanau ake ta Haratiere ko Toropapere;

13 Whanau ake ta Toropapere ko Apiuru; whanau ake ta Apiuru ko Eriakimi; whanau ake ta Eriakimi ko Atoro;

14 Whanau ake ta Atoro ko Haroko; whanau ake ta Haroko ko Akimi; whanau ake ta Akimi ko Eriuru;

15 Whanau ake ta Eriuru

MATIU 1, 2.

ko Ereataara; whanau ake ta Ereataara ko Matana; whanau ake ta Matana ko Hakopa;

16 Whanau ake ta Hakopa ko Hohepa, ko te tahu o Meri; whanau ake ta Meri ko Ihu, ko tona ingoa nei ko te Karaiti.

17 Heoi, nga whakatupuranga katoa o Aperahama tae noa ki a Rawiri, tekau ma wha nga whakatupuranga; o Rawiri tae noa ki te whakahekenga ki Papurona, tekau ma wha nga whakatupuranga; a no te whakahekenga ki Papurona tae noa ki a te Karaiti, tekau ma wha nga whakatupuranga.

18 ¶ Na, ko te whanautanga tenei o Ihu Karaiti: he mea taumau a Meri, tona whaea, ma Hohepa, a i te mea kiano raua i tata noa ki a raua, ka kitea kua hapū ia i te Wairua Tapu.

19 Otira he tangata tika a Hohepa, tona tahu, a kahore ona ngakau kia whakakitea nuitia ia, ka mea kia whakareerea pukutia.

20 ¶ Otiia i a ia e hurihuri anaieneimea, naka puta moe-moea mai tetahi anahera a te Ariki ki a ia, ka mea, E Hohepa, e te tama a Rawiri, kua e hopohopo ki te tango i a Meri, i tau wahine: na te Wairua Tapu hoki tona hapū.

21 A e whanau ia, he tama, me hua hoki e koe tona ingoa ko Ihu: no te mea, mana e whakaora tona iwi i o ratou hara.

22 Na, ka oti tenei katoa,

katahi ka rite ta te Ariki, i korerotia e te poropiti, i mea ai ia,

23 Na ka hapū te wahina, ka whanau hoki he tama, a ka huaina e ratou tona ingoa ko Emanuera, (ko tona whakamaoritanga tenei, Kei a tatou te Atua.)

24 A, te aranga ake o Hohepa i te moe, ka meatia e ia ta te anahera a te Ariki i whakahau ai ki a ia, a tango ana ia i tana wahine:

25 A kihai i mohio ki a ia whanau noa tana tama mā-tāmua: a huaina ana e ia tona ingoa ko IHU.

UPOKO 2.

Nga Maki. 13 Rerenga o Hohepa. 16 Patunga o nga tamariki. 19 Hokinga o Hohepa ma ki Nahareta.

NA, i te mea kua whanau nei a Ihu ki Peterehema o Huria, i nga ra o Kingi Herora, na ka haere mai etahi Maki i te rawhiti ki Hiruharama,

2 Ka mea, Kei hea tenei kua whanau nei hei kingi mo nga Hurai? i kite hoki matou i tona whetu i te rawhiti, a ka tae mai nei ki te koropiko ki a ia.

3 A, te rongonga o Kingi Herora, ka ohorere ratou ko Hiruharama katoa.

4 Na, whakaminea katoatia ana e ia nga tohunga nui, me nga karaipi o te iwi, a ka ui atu ki a ratou ki te wahi e whanau ai a te Karaiti.

5 Ka mea ratou ki a ia, Ki Peterehema o Huria: ko ta

MATIU 2.

te poropiti hoki tenei i tuhi-tuhi ai,

6 A ko koe, e Peterehema, whenua o Hura, ehara rawa i te iti rawa i roto i nga kawana o Hura: e puta mai hoki i a koe he kawana, hei hepara mo toku iwi, mo Ihairaira.

7 Na ka oti nga Maki te karanga puku e Herora, ka uia marietia ratou ki te wa i puta mai ai te whetu.

8 A unga ana ratou e ia ki Peterehema, i mea ia, Haere, rapua marietia te tamaiti; a ka kitea, ka whakahoki i te korero ki a au, kia haere ai hoki ahau ki te koropiko ki a ia.

9 Na ka rongo ratou i ta te kingi, ka haere; na, ko te whetu i kite ai ratou i te rawhiti, e haere ana i mua i a ratou, a tae noa, tu noa ki runga ake i te takotoranga o te tamaiti.

10 A, to ratou kitenga i te whetu, na, ko te tino haringa i hari ai.

11 A ka tae ki roto ki te whare, ka kite i te tamaiti raua ko tona whaea, ko Meri, na, tapapa ana ratou, koropiko ana ki a ia: ano ka mawhera o ratou taonga, ka hoatu etahi mea ki a ia, he koura, he parakihe, he maira.

12 A i whakatupatoria ratou e te Atua, he mea moemoea, kia kua e hoki ki a Herora, na, haere ana ki to ratou kainga he ara ke.

13 A ka riro ratou, na ka puta moemoea tetahi anahera a te Ariki ki a Hohepa, ka mea, E ara, tangohia te tamaiti raua ko tona whaea, e rere

ki Ihipa, a hei reira koe kia korero ra ano ahau ki a koe: meake hoki rapu a Herora i te tamaiti kia whakangaromia.

14 ¶ Na, ka ara ia, ka man ki te tamaiti raua ko tona whaea i te po, a haere ana ki Ihipa:

15 A noho ana i reira, mate noa a Herora: na ka rite ta te Ariki i korerotia e te poropiti, i mea ai ia, He mea karanga naku taku tamaiti i Ihipa.

16 ¶ A, te kitenga o Herora ka oti ia te tinihanga e nga Maki, rahi rawa tona riri, ka tono tangata, a patua iho nga tamariki katoa, nga mea e rua nei o ratou tau, me o muri iho, i Peterehema me nga wahi katoa o reira, he mea whakarite ki te taima i uia marietia e ia ki nga Maki.

17 Katahi ka rite ta Heremaia poropiti i korero ai, i mea ai,

18 I rangona he reo ki Rama, he uhunga, he tangi, he aue nui, ko Rahera e tangi ana ki ana tamariki, a kihai i pai kia whakamarietia, no te mea kua kahore ratou.

19 ¶ Ano ka mate a Herora, na ka puta moemoea te anahera a te Ariki ki a Hohepa, ki Ihipa,

20 Ka mea, Ara ake, tangohia te tamaiti raua ko tona whaea, a haere ki te whenua o Ihairaira: kua mate hoki te hunga i whai kia patua te tamaiti.

21 A tona aranga ake, ka mau ki te tamaiti raua ko tona whaea, ka haere ki te whenua o Ihairaira.

MATIU 2, 3.

22 Otira ka rongo ia ko Arakerauha te kingi o Huria i muri i tona matua, i a Herora, ka wehi ki te haere ki reira: otiia i whakamaharatia ia e te Atua, he mea moemoea, a haere ana ki nga wahi o Kariri;

23 A ka tae, ka noho ki tetahi pa, ko Nahareta te ingoa: i rite ai ta nga poropiti i mea ai, Me hua ia he tangata no Nahareta.

UPOKO 3.

Kauwhautanga a Hoani.

13 *Iriiringa o te Karaiti.*

NA, i aua ra ka puta mai a Hoani Kai iriiri, ka kauwhau i te koraha o Huria,

2 Ka mea, Ripeneta, kua tata hoki te rangatiratanga o te rangi.

3 Ko ta Ihaia poropiti hoki tenei i korero ai, i mea ai, he reo no tetahi i te koraha e karanga ana, whakapaia te huarahi o te Ariki, whakati-kaia ona ara.

4 A, te kakahu o taua Hoani he huruhuru kamera, he hiako hoki te whitiki o tona hope; a ko tana kai hemawhitiwhiti, he honi koraha.

5 Katahi ka haere atu ki a ia a Hirubarama, me Huria katoa, me nga kaininga katoa e tutata ana ki Horano,

6 A iriiria ana e ia ki Horano, me te whāki ano i o ratou hara.

7 A tona kitenga i te tini o nga Parihi o nga Haruki e haere mai ana ki tana iriiringa, ka mea ia ki a ratou, E te uri nakahi, na wai kou-

tou i whakamahara kia rere i te riri meake puta?

8 Na, whakaputaia he hua e rite ana ki o te ripeneta.

9 A kei anga koutou, kei mea i roto i a koutou, Ko Aperahama to tatou matua: ko taku kupu hoki tenei ki a koutou, E ahei ana ano i te Atua te whakaara tamariki ake ma Aperahama i enei kohatu.

10 Na, tenei ka pa te titaha ki te pakiaka o nga rakau: a ki te kahore tetahi rakau e hua i te hua pai, ka tuakina, ka makā ki te ahi.

11 Ko au nei, he iriiri taku i a koutou ki te wai, hei mea ripenetatanga: ko tenei ia e haere mai ana i muri i a au, nui atu tona mana i toku, e kore ahau e tau hei mau i ona hu: māna koutou e iriiri ki te Wairua Tapu, ki te kapura:

12 Ko tana mea tahi kei tona ringa, a e tino tahia e ia tana patunga witi, a e kohia ana witi ki roto ki te whare witi; tena ko te papapa, e tahuna ki te kapura e kore e tineia.

13 ¶ I reira ka haere mai a Ihu i Kariri ki Horano, ki a Hoani, kia iriiria e ia.

14 Otira ka whakakahore a Hoani ki a ia, ka mea, Ko te tikanga ra ko au kia iriiria e koe, a e haere mai ana koe ki a au?

15 Na ka whakahokia e Ihu, a ka mea ki a ia, Tukua ra aiane; ko te tikanga hoki tenei ma taua kia whakarite i nga mea tika katoa. Na tukua ana ia e ia.

16 Ano ka oti a Ihu te iriiri,

tika tonn ake ia i te wai: na, ko te rangi ka tuwhera ki a ia, a ka kite ia i te Wairua o te Atua e heke iho ana, me he kukupa, a tau ana ki runga ki a ia:

17 Na, ko tetahi reo no te rangi, e mea ana, Ko taku Tama tenei i aroha ai, ko taku i ahuaireka ai.

UPOKO 4.

*Whakamatauranga o te Karaiti. 13 Kei Kaperenau-
ma. 17 Ka kauwhau. 18
Ko Pita raua ko Anaru.
21 Ko Hemi raua ko Hoani.
23 Nga turoro.*

ME i reira ka arahina a Ihu e te Wairua ki te koraha, kia whakamatautauria e te rewera.

2 Ano ka wha tekau nga ra, ka wha tekau nga po i noho puku ai, muri iho ka hiakai.

3 Na ka tac mai te kai whakamatautau ki a ia, ka mea, Ki te mea ko te Tama koe a te Atua, kiia iho kia meinga enei kohatu hei taro.

4 Na ka whakahokia e ia, a ka mea, Kua oti te tuhituhi, E kore e ora te tangata i te taro kau, engari i nga kupu katoa e puta mai ana i te mangai o te Atua.

5 Me i reira ka kawe te rewera i a ia ki te pa tapu, a whakaturia ana ia ki runga ki te keokeonga o te temepara,

6 A ka mea ki a ia, Ki te mea ko te Tama koe a te Atua, rere atu ki raro: kua oti hoki te tuhituhi, ka kore-rotia iho koe e ia ki ana

anahera; ma ratou koe e hiki ake ki o ratou ringa, kei tū-tuki tou waewae ki te kohatu.

7 Mea atu ana a Ihu ki a ia, Ka oti ano hoki te tuhituhi, Kua e whakamatautau ki te Ariki, ki tou Atua.

8 Ka kawe ano te rewera i a ia ki runga ki tetahi maunga tiketike rawa, a whakakitea katoatia ana ki a ia nga rangatiratanga o te ao, me te kororia o aua mea;

9 A mea mai ana ki a ia, Ko enei mea katoa e hoatu e ahau ki a koe, ki te tapapa koe, ki te koropiko ki a au.

10 Na ka mea a Ihu ki a ia, Haere atu, e Hatana; kua oti hoki te tuhituhi. Me koropiko koe ki te Ariki, ki tou Atua; me mahi ano ki a ia anake.

11 Na ka mahue ia i te rewera, a ka haere mai nga anahera, ka mabi mea māna.

12 Ano ka rongo a Ihu kua tukua a Hoani ki te whare herehere, ka haere ia ki Kariri:

13 ¶ A ka mahue Nahareta i a ia, a haere ana, ka noho ki Kaperenaua, ki te taha o te moana, ki nga kaha o Hapurona, o Nepetarima:

14 I rite ai ta Ihaia poropiti i korero ai, i mea ai,

15 Te whenua o Hapurona, me te whenua o Nepetarima, i te ara o te moana, i tera taha o Horano, Kariri o nga tauwi,

16 Te hunga i noho i te pouri, kua kite ratou i te mārama nui; a ki te hunga i noho i te wahi me te ātārangi o te mate,

kua puta ake te māramatanga ki a ratou.

17 ¶ No reira ano a Ihu i timata ai te kauwhau, te mea, Ripeneta, kua tata hoki te rangatiratanga o te rangi.

18 ¶ A i a Ihu e haere ana i te taha o te moana o Kariri, ka kite ia i nga tāngata tokorua, he tuakana, he teina, i a Haimona, tona ingoa nei ko Pita, raua ko tona teina, ko Anaru, e maka ana i te kupenga ki te moana; he kai hao hoki raua.

19 Na ka mea ia ki a raua, Arumia mai au, a maku korua e mea hei kai hao tangata.

20 A mahue ake i a raua nga kupenga, a aru ana i a ia.

21 ¶ A, tona haerenga atu i reira, tokorua atu āna i kite ai, he tuakana, he teina, ko Hemi tama a Heperi, raua ko tona teina, ko Hoani, i te kaipuke, i a Heperi, i to raua matua, e ta ana i nga korenga o a ratou kupenga; a karangatia ana raua e ia.

22 Mahue tonu ake i a raua te kaipuke me to raua matua, a aru ana i a ia.

23 ¶ Na ka haereerea katoatia Kariri e Ihu, whakaako ana i roto i o ratou whare karakia, kauwhau ana i te rongo pai o te rangatiratanga, me te whakaora i nga mate katoa, i nga turorotanga katoa o te iwi.

24 A haere ana tona rongo puta noa i Hiria: a kawea mai ana e ratou ki a ia nga tāngata mate katoa e ngaua ana e te tini o nga mate, o nga mamae, me te hunga e

nohoia ana e te rewera, me te hunga haurangi, me nga pararutiki; a whakaorangia ake ratou e ia.

25 A he rahi te hui i aru i a ia i Kariri, i Rekaporihi, i Hiruharama, i Huria, i tera taha ano o Horano.

UPOKO 5.

Kauwhau i runga i te maunga.

A TONA kitenga i te wha-
kaminenga, ka haere ia ki runga ki te maunga: ano ka noho ia, ka haere mai ana akonga ki a ia:

2 Na ka puaki tona mangai, a ka whakaako ia i a ratou, ka mea,

3 Ka koa te hunga e rawakore ana te wairua: no ratou hoki te rangatiratanga o te rangi.

4 Ka koa te hunga e tangi ana: ka whakamarietia hoki ratou.

5 Ka koa te hunga ngakan māhaki: ka riro mai hoki i a ratou te whenua.

6 Ka koa te hunga e hiakai ana, e hiainu ana ki te tika: e makona hoki ratou.

7 Ka koa te hunga tohu tangata: e tohungia hoki ratou.

8 Ka koa te hunga ngakan ma: e kite hoki ratou i te Atua.

9 Ka koa te hunga hohou rongo: ka huaina hoki ratou he tamariki na te Atua.

10 Ka koa te hunga e whakatoia ana mo te tika: no ratou hoki te rangatiratanga o te rangi.

11 Ka koa koutou ina tawai ratou i a koutou, ina whaka-

toi, ina puaki i a ratou nga kupu kino katoa mo koutou, he mea teka, he whakaaro ki a au.

12 Kia hari, kia whakamana-mana : e rahi ana hoki te utu mo koutou i te rangi : he penei hoki ta ratou whakatoinga i nga poropiti i mua i a koutou.

13 Ko koutou te tote o te whenua : otira ki te hemo te ha o te tote, ma te aha e whai tikanga tote ai? heoi ano tona painga, na, ka akiritia ki waho, ka takahia e nga tangata.

14 Ko koutou te whakamārama o te ao. E kore e ngaro te pa e tu ana i runga i te maunga.

15 E kore ano e tahuna te rama, a e whakaturia ki raro o te mehua, engari ki runga ki te turanga; a ka tiaho ki nga tangata katoa i roto i te whare.

16 Waihoki kia tiaho to koutou maramatanga ki te aroaro o nga tangata, kia kite ai ratou i a koutou hanga pai, kia whakakororia ai i to koutou Matua i te rangi.

17 ¶ Kei mea koutou i haere mai ahau ki te whakakahore i te ture i nga poropiti ranei: kihai ahau i haere mai ki te whakakahore, engari ki te whakatutuki.

18 He pono nei hoki taku e mea nei ki a koutou, E kore tetahi tongi, tetahi tohu ranei o te ture e pahemo, a, te pahemotanga ra ano o te rangi, o te whenua, engari kia rite katoa ra ano.

19 Na, ki te whakakahore tetahi i tetahi mea iti rawa o enei kupu ako, a ka akona e ia nga tangata kia pera, ka kiia ia ko te iti rawa i te rangatiratanga o te rangi : a ki te whakaritea e tetahi, ki te whakaakona, ka kiia ia he nui i te rangatiratanga o te rangi.

20 Ko taku kupu hoki tenei ki a koutou, Ki te kore e nui ake ta koutou mahi tika i ta nga karaipi ratou ko nga Parihī, e kore rawa koutou e tapoko ki te rangatiratanga o te rangi.

21 ¶ Kua rongo koutou, i korerotia e nga tupuna, Kana e patu tangata; a ki te patu tangata tetahi, ka tau te he ki a ia.

22 Na, ko taku kupu tenei ki a koutou, Ki te riri noa tetahi ki tona teina, ka tau te he ki a ia : a ki te mea tetahi ki tona teina, Wairangi! ka tika kia komititia : na, ki te mea tetahi, Poauau ! ka tika mona te kapura o Kehena.

23 Na reira ki te mauria e koe to whakahere ki te ata, a ka mahara i reira i hara koe ki tou hoa;

24 Waiho to whakahere i reira i mua o te āta, a haere, matua houhia te rongo ki ton teina, ka haere ai, ka mau ai i to whakahere.

25 Kia hohoro te whakarite i ta korua korero ko ton hoa tauwhāinga, i a korua ano i te ara, kei tukua koe e te hoa tauwhāinga ki te kai whakawa, a ka tukua e te kai whakawa ki te katipa, a ka

MATIU 5.

makā koe ki te whare here-
here.

26 He pono taku e mea atu
nei ki a koe, E kore rawa koe
e puta mai i reira, kia utua
ra ano te patene whakamu-
tunga.

27 ¶ Kua rongo koutou, i
korerotia e nga tupuna, Kaua
e puremu :

28 Na, ko taku kupu tenei
ki a koutou, Ki te titiro atu
tetahi ki te wahine, he hiahia
ki a ia, kua puremu ke ki a ia
i roto i tona ngakau.

29 Ki te hē koe i tou kanohi
matau, hikarohia, makā atu :
he nui ke hoki te pai ki a koe
ki te ngaro tetahi wahi ou, a
ka kore e makā tou tinana
katoa ki roto ki Kehena.

30 Ki te hē ano hoki koe
i tou ringa matau, poutoa,
makā atu : he nui ke hoki te
pai ki a koe ki te mate tetahi
wahi ou, a ka kore e makā
tou tinana katoa ki Kehena.

31 I korerotia ano, Ki te
whakarere tetahi i tana wa-
hine, me hoatu ki a ia tetahi
pukapuka whakarere :

32 Na, ko taku kupu tenei
ki a koutou, Ki te whakarere
tetahi i tana wahine, a ehara
i te take puremu, e mea ana
ia i te wahine kia puremu : a
ki te marena tetahi i te
wahine i whakarērea, e pure-
mu ana ia.

33 ¶ Kua rongo ano koutou,
i korerotia e nga tupuna,
Kaua e oati teka, engari me
whakamana āu oati ki te
Ariki :

34 Na, ko taku kupu tenei
ki a koutou, Kaua rawa tetahi

mea e oatitia ; kaua te rangi,
ko to te Atua torona hoki ia :

35 Kaua hoki te whenua ;
no te mea nona ia turanga
waewae : kaua hoki a Hiru-
harama ; no te mea ko te pa
ia o te Kingi nui.

36 Kaua ano e oatitia tou
mātenga, e kore hoki e ahei
i a koe te mea kia ma tetahi
makawe, kia mangu ranei.

37 Erangi ko tenei hei kupu
ma koutou, Ae, ae ; Kahore,
kahore : no te mea ki te maha
atu i ena, no te kino.

38 ¶ Kua rongo koutou i
korerotia, He kanohi mo te
kanohi, he niho mo te niho :

39 Na, ko taku kupu tenei ki
a koutou, Kaua e whakauaua
atu ki te kino : erangi ki te
pakia tou pāpāringa matau e
tetahi, tahuri atu hoki tera ki
a ia.

40 A ki te mea tetahi kia
whakawakia koe, a kia tango-
hia tou kotī, tukua atu hoki
tou ngeri ki a ia.

41 A ki te tonoa koe e tetahi
kia haere kotahi te maero,
kia rua āu e haere tahi ai
me ia.

42 Hoatu ki te tangata e tono
mea ana i a koe, kaua ano e
whakahokia atu te tangata e
mea ana ki te taonga tarewa
i a koe.

43 ¶ Kua rongo koutou i
korerotia, Kia aroha atu ki
tou hoa tata, kia kino hoki ki
tou hoa whawhai :

44 Na, ko taku kupu tenei ki
a koutou, Arohaina o koutou
hoa whawhai, manaakitia te
hunga e kanga ana i a koutou,
kia pai te mahi ki te hunga e

MATIU 5, 6.

kino ana ki a koutou, a inoi atu mo te hunga e whakawhiu ana i a koutou, e whakato i ana i a koutou :

45 Kia whakatupu tamariki ai koutou ki to koutou Matua i te rangi : e mea nei hoki ia i toua ra kia whiti ki te hunga kino, ki te hunga pai, kia ua hoki te ua ki te hunga tika, ki te hunga he.

46 Ki te aroha hoki koutou ki te hunga e aroha ana ki a koutou, he aba te utu e riro i a koutou ? e kore ianei hoki nga pupirikana e pena ?

47 A ki te oha atu koutou ki o koutou teina anake, no hea te nui o ta koutou mahi ? e kore ianei hoki e pena nga pupirikana ?

48 Na, kia tika koutou, kia pera me to koutou Matua i te rangi e tika ana.

UPOKO 6.

Kauwhau ano.

KIA tupato kei atawhai koutou i te rawakore i te aroaro o nga tāngata, hei tirohanga ma ratou : penei kahore he utu ki a koutou a to koutou Matua i te rangi.

2 Na, ka atawhai koe i te rawakore, aua e whakatangihia te tētere i mua i a koe, kei pera me te hunga tinihanga i roto i nga whare karakia, i nga ara, kia whai kororia ai i nga tāngata. He pono taku e mea nei ki a koutou, Kei a ratou ano te utu mo ratou.

3 Erangi ka atawhaitia e koe te rawakore, kei mohio tou mau ki ta tou matau e mea ai ;

4 Kia ngaro ai tau atawhaiinga rawakore : a ko tou Matua e kite nei i te *wahi* ngaro, māna koe e utu nui.

5 ¶ Ka inoi hoki koe, kua e pera me te hunga tinihanga : ko ta ratou hoki e pai ai ko te inoi tu i roto i nga whare karakia, i nga kokinga o nga ara, kia kitea ai e nga tāngata. He pono taku e mea nei ki a koutou, Kei a ratou ano te utu mo ratou.

6 Na, ka inoi koe, tomo atu ki tou ruma i roto rawa, ano ka kati tou tatau, inoi ki tou Matua i te *wahi* ngaro ; a ko tou Matua e kite nei i te *wahi* ngaro, māna koe e utu nui.

7 Na, ka inoi koutou, aua e whakahuatia noatia ko aua kupu ano, kei pera me nga tauwi : ki ta ratou hoki, ma nga kupu maha e rangona ai ratou.

8 Na, kei rite koutou ki a ratou : e mātau ana hoki to koutou Matua ki nga mea e matea ana e koutou, i te mea kiano koutou i inoi noa ki a ia.

9 Na kia penei ta koutou inoi. E to matou Matua i te rangi, Kia tapu tou ingoa.

10 Kia tae mai tou rangatiratanga. Kia meatia tau e pai ai ki runga ki te whenua, kia rite ano ki to-te rangi.

11 Homai ki a matou aiane he taro ma matou mo tenei ra.

12 Murnu o matou hara, me matou hoki e muru nei i o te hunga e hara ana ki a matou.

13 Aua hoki matou e kawea kia whakawaia ; engari whakaorangia matou i te kino :

MATIU 6.

Nou hoki te rangatiratanga, te kaha, me te kororia, ake ake ake. Amine.

14 Ki te whakarerea noatia iho hoki e koutou nga he a nga tāngata, ka whakarerea noatia iho ano a koutou e to koutou Matua i te rangi.

15 A, ki te kore e whakarerea noatia iho e koutou nga he a nga tāngata, e kore ano e whakarerea noatia iho a koutou he e to koutou Matua.

16 ¶ Ka noho puku hoki koutou, kei rite ki te hunga tinihanga, kua e whakapoururu te kanohi; e whakaahua ke ana hoki ratou i o ratou kanohi, kia kitea ai e nga tāngata e noho puku ana. He pono taku e mea nei ki a koutou, Kei a ratou ano te utu mo ratou.

17 Engari, ka noho puku koe, kaukauria tou upoko, horoia hoki tou kanohi;

18 Kei kitea koe e nga tāngata e noho puku ana, erangi e tou Matua i te *wahi* ngaro; a ko tou Matua e kite nei i te *wahi* ngaro, māna koe e utu i te *wahi* marama.

19 ¶ Kua e purangatia he taonga mo koutou ki te whenua, ki te *wahi* e whakangaro ai te huhu, te waikura, ki te *wahi* hoki e keri ai nga tahae, tahae ai.

20 Erangi purangatia mo koutou he taonga ki te rangi, ki te *wahi* e kore ai e whakangaro te huhu, te waikura, ki te *wahi* hoki e kore ai e keri nga tahae, tahae ai:

21 Ko te *wahi* hoki i o koutou taonga, ko reira ano o koutou ngakau.

22 Ko te kanohi te rama o te tinana: na, ki te atea tou kanohi, e marama katoa tou tinana.

23 Tena ki te kino tou kanohi, ka pouri katoa tou tinana. Na, ki te pouri te maramatanga i roto i a koe, ano te nui o tena pouri!

24 ¶ Kahore he tangata e pono te mahi ki nga rangatira tokorua: ka kino hoki ki tetahi, ka aroha ki tetahi, ka uranei ki tetahi, a ka whakahawe ki tetahi. E kore e pono i a koutou te mahi ki te Atua, ki te taonga.

25 Koia ahau ka mea nei ki a koutou, Kua e manukanuka ki to koutou oranga, ki ta koutou e kai ai, ki ta koutou e inu ai; ki o koutou tinana ranei, ki ta koutou e kakahu ai. Ehara oti te oranga i te rahi atu i te kai, me te tinana i te kakahu?

26 Tirohia nga manu o te rangi: kahore hoki e rui, kahore e kokoti, e kohikohi ranei ki nga whare witi; heoi e whangainga ana ratou e to koutou Matua i te rangi. Ehara oti koutou i te mea pai ake i a ratou?

27 Ko wai o koutou e taea e ia te whakaaro iho te hono *tetahi wahi* ki tona roa, kia kotahi te whatianga?

28 A he aha koutou i manukanuka ai ki te kakahu? Maharatia nga rengarenga o te whenua, te tupu; e kore nei e mahi, e kore nei ano e miro:

29 Na, ko taku kupu tenei ki a koutou, Kihai a Horomona,

me tona kororia katoa, i rite ki tetahi o enei te whai kakahu.

30 Ha, ki te penei ta te Atua whakakakahuranga i te tarutaru o te whenua, e whakatarutaru nei inaianei, a apopo ka makā ki te oumu, e kore ianei tāna i a koutou e rahi ake, e te hunga whakapono iti?

31 Na, kua ra e manukanuka, e mea, He aha ta tatou e kai ai? He aha ta tatou e inu ai? Me whakakakahu tatou ki te aha?

32 (Ko enei mea katoa nei hoki ta nga tauwi e rapu ai:) e mātau ana hoki to koutou Matua i te rangi, e matea ana e koutou enei mea katoa.

33 Engari mātua rapua te rangatiratanga o te Atua, me ana mea tika; a ka tapiritia mai enei mea katoa ma koutou.

34 Na, kua ra e manukanuka ki o apopo: ma apopo hoki e manukanuka āna mea ake. Kāti ano i tona ra ano ko te kino ona ake ano.

UPOKO 7.

Kauwhau ano.

KAUA e whakahe, kei whakahehia koutou.

2 Na, ko te whakahenga e whakahe ai koutou, hei whakahenga ano tena mo koutou: a ko te mehua e mehua ai koutou, hei mehua mai ano tena ki a koutou.

3 He aha hoki tau e titiro ki te otaota i roto i te kanohi o tou teina, tē mahara ki te kurupae i roto i tou kanohi?

4 Me pehea ranei to kupu ki tou teina, Iana, kia kapea atu e ahan te otaota i tou kanohi; a he kurupae ano tena kei roto i tou kanohi?

5 E te tangata tinihanga, mātua kapea mai e koe te kurupae i tou kanohi; katahi koe ka marama ki te kape i te otaota i roto i te kanohi o tou teina.

6 Kua e hoatu te mea tapu ki nga kuri, kua ano e makā a koutou peara ki te aroaro o nga poaka, kei takatakahia e o ratou waewae, a ka tahuri mai, ka haehae i a koutou.

7 ¶ Inoia, a ka hoatu ki a koutou; rapua, a ka kitea e koutou; patukia, a ka uakina ki a koutou:

8 Ka whiwhi hoki nga tangata katoa ina inoi; ka kite ina rapu; ka uakina hoki ki te tangata e patuki ana.

9 Ko tehea tangata ranei o koutou, ki te inoi ki a ia tana tama ki tetahi taro, e hoatu ranei ki a ia he kohatu?

10 A ki te inoia he ika, e hoatu ranei ki a ia he nakahi?

11 Na e mātau na koutou, te hunga kino, ki te hoatu mea papai ki a koutou tamariki, a, tera noa ake te homaitanga o nga mea papai e to koutou Matua i te rangi ki te hunga e inoi ana ki a ia.

12 Na, nga mea katoa e pai ai koutou kia meatia e nga tangata ki a koutou, meatia ano e koutou ki a ratou: ko ta te ture me ta nga poropiti hoki tenei.

13 ¶ E tomo ma te kuwaha

MATIU 7, 8.

kuiti: he wharahi hoki te kuwaha, he nui noa atu te ara e tika ana ki te ngaromanga, a he tokomaha e haere ana ra reira :

14 E kuiti ana hoki te kuwaha, e kiki ana te ara e tika ana ki te ora, a he ruarua te hunga e kitea ai.

15 ¶ Kia tupato ki nga poropiti teka e haere mai nei ki a koutou, he hipi te kakahu, ko roto ia he wuruhi kai kino.

16 Ma o ratou hua ka mohiotia ai ratou e koutou. E whakiiia ana ranei te karepe i runga i te tataramoa, te piki ranei i te tumatakuru ?

17 Waihoki he hua ataahua nga hua o nga rakau pai katoa ; he hua kino ia nga hua o te rakau kino.

18 E kore te rakau pai e ahei te hua i te hua kino, e kore ano te rakau kino e hua i te hua ataahua.

19 Ka tuakina nga rakau katoa e kore e hua i te hua ataahua, ka makā ki te ahi.

20 Ina, ma o ratou hua ka mohiotia ai ratou e koutou.

21 ¶ E kore e tomo ki te rangatiratanga o te rangi nga tāngata katoa e mea mai ana ki a au, E te Ariki, e te Ariki ; engari ia e mea ana i ta toku Matua i te rangi i pai ai.

22 He tokomaha e mea mai ki a au a taua ra, E te Ariki, e te Ariki ; kihai koia matou i poropiti i runga i tou ingoa ? i pei rewera hoki i runga i tou ingoa ? he tini hoki nga mahi nui i meatia e matou i runga i tou ingoa ?

23 Ko reira ano ahau mea ai ki a ratou, Kahore rawa ahau i mohio ki a koutou ; mawehe atu i a au, e nga kai mahi i te tutū.

24 ¶ Na, nga tāngata katoa e rongo ana ki enei kupu aku, a e mahia ana e ratou, ka whakaritea e ahau ki te tāngata mahara i hanga i tona whare ki runga ki te kamaka :

25 A ka ua te ua, ka puta nga waipuke, ka pupuhi nga hau, te tino akinga ki taua whare ; kihai hoki i hinga : no te mea i hanga ki runga ki te kamaka.

26 Me nga tāngata katoa hoki e rongo ana ki enei kupu aku, a kahore e mahi, ka whakaritea ki te tangata whakaaro kore i hanga i tona whare ki runga ki te onepu :

27 Na, ka ua te ua, ka puta nga waipuke, ka pupuhi nga hau, a pa ana ki taua whare ; na, kua hinga : he rahi ano tona hinganga.

28 ¶ Ano ka mutu enei koreroro a Ihu, ka miharo te whakaminenga ki tana ako :

29 I rite hoki tana ako i a ratou ki ta te tangata whai mana, kihai hoki i rite ki ta nga karaipi.

UPOKO 8.

Repera. 5 Pononga a te kene-turio. 14 Hungawai wahine o Pita. 16 Era atu turoro. 18 Ko wai hei aru i a ia. 23 Tupuhi. 28 Rewera ka pcia. 31 Kei roto i nga poaka.

MATIU 8.

ANO ka heke iho ia i te maunga, he rahi te hui i aru i a ia.

2 Na ka haere mai tetahi repera, ka koropiko ki a ia, ka mea, E te Ariki, ki te pai koe, e taea ahau e koe te mea kia ma.

3 A ka totoro atu te ringa o Ihu, ka pa ki a ia, ka mea, E pai ana ahau; kia ma koe. A ma tonu iho tona repera.

4 Katahi ka mea a Ihu ki a ia, Kia mahara, kei korerotia ki te tangata; erangi haere, kia kite te tohunga i a koe, mauria atu hoki te whakahere i whakaritea e Mohi, hei mea whakaatu ki a ratou.

5 ¶ Ano ka tae a Ihu ki Kapernauma, ka haere mai ki a ia tetahi keneturio, ka inoi ki a ia,

6 Ka mea, E te Ariki, ko taku pononga kei te whare e takoto ana, he pararutiki, e ngaua kinotia ana.

7 A ka mea a Ihu ki a ia, Ka haere ahau ki te whakaora i a ia.

8 Na, ko te whakahokinga a te keneturio, te meatanga, E te Ariki, ehara ahau i te tikanga tangata e haere ake ai koe ki raro i toku tuauui: engari kia puaki kau to kupu, a ka ora taku pononga.

9 He tangata hoki ahau e whakahaua ana, he hoia ano aku hei whakahaunga maku: ka mea ahau ki tenei, Haere, na ka haere ia; ki tetahi, Haere mai, a ka haere mai; ki taku pononga hoki, Meatia tenei, a ka meatia e ia

10 A, te rongonga o Ihu, ka

miharo, a ka mea ki te hunga e aru ana, He pono taku e mea nei ki a koutou, Kahore ahau i kite noa i te whakapono hei rite mo tenei te nui i roto i a Ihairaira.

11 Ko taku kupu ano tenei ki a koutou, He tokomaha e haere mai i te rawhiti, i te hauauru, a e noho tahi i a Aperahama, i a Ihaka, i a Hakopa, ki te rangatiratanga o te rangi.

12 Ko nga tamariki ia o te rangatiratanga, ka makā ki te pouri i waho: ko te wahi tera o te tangihanga me te teteatanga o nga niho.

13 Na ka mea a Ihu ki te keneturio, Haere, kia rite ki tou whakapono te meatanga ki a koe. A ora ake tana pononga i taua wa pu ano.

14 ¶ Ano ka tae a Ihu ki te whare o Pita, ka kite ia i tona hungawai wahine, e takoto mate ana he kiri-ka.

15 Na ka pa tona ringaringa, mutu ake tona kiri-ka: a ara ake ana ia ki te taka mea ma ratou.

16 ¶ Na i te ahiahi he tokomaha te hunga e nohoia ana e nga rewera i mauria mai ki a ia: na ka peia e tana kupu nga wairua ki waho, a whakaorangia ake e ia te hunga mate katoa:

17 I rite ai ta Ihiaia poropiti i korero ai, i mea ai, Nana i tango o tatou ngoikoretanga, i waha o tatou mate.

18 ¶ A, te kitenga o Ihu he rahi te hui e mui ana ki a ia, ka whakahau ia kia whakawhiti ki tawahi.

MATIU 8, 9.

19 A ka haere mai tetahi karaipi, ka mea ki a ia, E te Kai whakaako, ka aru ahau i a koe ki nga wahi katoa e haere ai koe.

20 A, ka mea a Ihu ki a ia, He rua o nga pokiha, he ko-whanga o nga manu o te rangi; tena ko te Tama a te tangata, kahore ona wahi e takoto ai tona mātenga.

21 A i mea tetahi atu o ana akonga ki a ia, E te Ariki, tukua ahau kia mātua haere ki te tanu i toku pāpā.

22 Na ka mea a Ihu ki a ia, Arumia ahau: a waiho ma nga tupāpaku e tanu o ratou tupāpaku.

23 ¶ Ano, ka eke ia ki te kaupuke, ka aru ana akonga i a ia.

24 Na, tutū rawa te puehu o te moana, a ngaro iho te kaupuke i te ngaru: a i te moe ia.

25 A ka haere ana akonga, ka whakaara i a ia, ka mea, E te Ariki, whakaorangia tatou, ka ngaro tatou.

26 A ka mea ia ki a ratou, He aha ta koutou ē wehi, e te hunga whakapono iti? Me i reira ka ara ia, a riria iho e ia te hau me te moana; a marino noa iho.

27 A miharo noa nga tāngata, ka mea, He tangata aha tenei? ina, rongo rawa te hau me te moana ki a ia!

28 ¶ Ano ka whiti ia ki tara-wahi ki te whenua o nga Kere-kehini, ka tutaki ki a ia etahi tāngata tokorua e nohoia ana e te rewera, e haere mai ana i roto i nga urupa, he hunga

tutū rawa, tē taea taua ara te haere e te tangata.

29 Na ka karanga ake raua, ka mea, He aha maua nāu, e Ihu, e te Tama a te Atua? kua tae mai oti koe ki te whakamamae i a māua i te mea kahore ano i rite te taima?

30 A i tawhiti atu i a ratou tetahi kahui poaka, e kai ana, he tini.

31 A ka inoi nga rewera ki a ia, ka mea, Ki te pei koe i a matou, tukua matou kia haere ki roto ki te kahui poaka.

32 Na ka mea ia ki a ratou, Haere. A, to ratou putanga mai ki waho, haere ana ki roto ki te kahui poaka; na, ko te tino rerenga katoatanga o te kahui poaka ra te pari ki te moana, a mate iho ki roto ki te wai.

33 Na ka whati nga kai whangai, a haere ana ki te pa, korero ana i nga mea katoa, me te meatanga ki te hunga i nohoia e nga rewera.

34 Na, puta katoa mai ana te pa ki waho ki te whakatau i a Ihu; a ka kite i a ia, ka tohe kia haere atu ia i o ratou wahi.

UPOKO 9.

Pararutiki. 9 Ko Matiu. 10 Whakahoatanga o Ihu ki nga pupirikana. 14 Mo ana akonga kahore e noho puku. 20 Wahine mate. 23 Kotiro a Hairuha. 27 Nga matapo tokorua. 32 Wahangu.

NA ka eke ia ki te kaupuke, ka whiti ki tawahi, ka haere ki tona pa.

2 Na ka kawea mai e ratou

MATIU 9.

ki a ia tetahi pararutiki, e takoto ana i runga i te moenga; a, te kitenga o Ihu i to ratou whakapono, ka mea ia ki te pararutiki, E tama, kia maia; ka oti ou hara te muru.

3 Na, ka mea etahi o nga karaipi ki a ratou ano, E kohukohu ana tenei tangata.

4 A ka kite a Ihu i o ratou whakaaro, ka mea ia, He aha i kino ai nga whakaaro o roto o o koutou ngakau?

5 Ko tehea hoki te mea takoto noa, ko te mea, Ka oti ou hara te muru; ko te mea ranei, Whakatika, haere?

6 Otira kia mātau ai koutou, he mana muru hara to te Tama a te tangata i runga i te whenua, (katahi ia ka mea ki te pararutiki,) Whakatika, tangohia ake tou moenga, a haere ki tou whare.

7 Na, whakatika ana ia, haere ana ki tona whare.

8 A, te kitenga o te hui, ka miharo, ka whakakororia i te Atua i homai ai tenei mana ki nga tangata.

9 ¶ A, i a Ihu e haere ana i reira, ka kite ia i tetahi tangata, ko Matiu te ingoa, e noho ana i te wahi tango takoha; a ka mea ki a ia, Arumia mai au. Na, whakatika ana ia, aru ana i a ia.

10 A, i a ia e noho ana i roto i te whare, na, he tokomaha nga pupirikana me nga tangata hara i haere mai, i noho tahi ki a Ihu ratou ko ana akonga.

11 A, te kitenga o nga Parihi, ka mea ki ana akonga, He aha to koutou Kai whakaako

ka kai tahi ai me nga pupirikana, me nga tangata hara?

12 Otira ka rongo a Ihu, ka mea ki a ratou, Kahore he aha o nga tangata ora e meatia ai e te rata, engari o te hunga e mate ana.

13 Na, haere, akona te tikanga o tenei, Ko tāku e pai ai ko te tohu tangata, hāunga te patunga tapu: kihai hoki ahau i haere mai ki te karanga i te hunga tika, engari i te hunga hara, kia ripeneta.

14 ¶ Me i reira ka haere mai ki a ia nga akonga a Hoani, ka mea, He aha i maha ai o matou ko nga Parihi nohanga pukutanga, a kahore o akonga e noho puku?

15 Na ka mea a Ihu ki a ratou, E ahei ranei nga tamariiki o te whare marena te tangi, i te mea kei a ratou te tāne marena hou? Na, tera e tae mai nga ra, e tangohia ai te tāne marena hou i a ratou, a ko reira noho puku ai ratou.

16 E kore e makā e te tangata tetahi wahi o te kahu hou hei papaki mo te kahu tawhito, no te mea ka riro tetahi wahi o taua kakahu i te whakakapi, a ka nui rawa te pakaru.

17 E kore ano e ringihia te waina hou ki te ipu tawhito: kei pakaru nga ipu, a ka maringi te waina, kore ake nga ipu: erangi e ringihia ana te waina hou ki te ipu hou, a ka ora e rua, e rua.

18 ¶ I a ia e korero ana i enei mea ki a ratou, na kā haere mai tetahi rangatira, ka koro-

MATIU 9.

piko ki a ia, ka mea, Tenei kua marere taku tamahine: otira māu e haere ake, e whakapa tou ringa ki a ia, a ka ora.

19 Na ka whakatika a Ihu ratou ko ana akonga, a aru ana i a ia.

20 ¶ Na, ko te haerenga ki muri i a ia o tetahi wahine, tekau ma rua nga tau i mate ai i te pakaruhanga toto, a pa ana ki te taniko o tona kakahu:

21 I mea hoki i roto i a ia, Kia pa kau ahau ki tona kakahu, ka ora ahau.

22 Na ka tahuri a Ihu, a ka kite i a ia, ka mea, Kia maia, e ko; na tou whakapono koe i ora ai. A ora ake te wahine i taua wa ano.

23 ¶ A, te taenga o Ihu ki te whare o te rangatira, a ka kite i nga kai whakatangi putorino me te huihui e ngangau ana,

24 Ka mea ia ki a ratou, Whakaatea: kahore hoki i mate te kotiro, erangi e moe ana. A kaitaina iho ia e ratou.

25 Heoi ka oti te huihui te pei ki waho, ka tomo ia ki roto, ka mau ki tona ringa, a ara ake ana te kotiro.

26 A pakū ana tenei rongo puta noa i taua whenua.

27 ¶ A i a Ihu e haere atu ana i reira, tokorua nga matapo i aru i a ia, ka karanga ake, ka mea, E te Tama a Rawiri, kia aroha ki a maua.

28 A ka tapoko ia ki te whare, ka haere mai nga matapo ki a ia: na ka mea a Ihu ki a

raua, E whakapono ana ranei korua e taea tenei e ahau? Ka mea raua ki a ia, Ae, e te Ariki.

29 Me i reira ka pa ia ki o raua kanohi, ka mea, Kia rite ki to korua whakapono te meatanga ki a korua.

30 Na kua kite o raua kanohi; katahi ka whakatupato a Ihu i a raua, ka mea, Kia mahara kei rangona e te tangata.

31 Ko raua ia, te putanga ki waho, korerotia nuitia ana ia puta noa i taua whenua.

32 ¶ I to raua haerenga atu, na ka kawea mai ki a ia tetahi tangata wahangu, he rewera tona.

33 A ka oti te rewera te pei, ka whai reo te wahangu; a miharo ana te mano, ka mea, Kahore ano i kitea te penei i roto i a Ihairaira.

34 Otira ka mea nga Parihi, Na te rangatira o nga rewera tāna peinga rewera.

35 ¶ Na ka haereerea e Ihu nga pa katoa me nga kāinga koraha, a ka ako i roto i o ratou whare karakia, ka kauwhau i te rongo pai o te rangatiratanga, me te whakaora i te tini o nga mate, i te tini o nga turorotanga o te iwi.

36 A, tona kitenga i nga mano, ka toko ake tona ngakau aroha ki a ratou, e mauui ana hoki ratou, e marara ke ana, me he hipi hepara kore.

37 Katahi ia ka mea ki ana akonga, Ko te kotinga e nui ana, ko nga kai mahi e rua-rua ana;

38 Na, inoi atu ki te Ariki nāna te kotinga, kia tonoa e ia he kai mahi ki tana kotinga.

UPOKO 10.

Ngarenga o te Tekau ma rua.

A KA oti te karanga e ia ana akonga tekau ma rua, ka hoatu ki a ratou he mana hei pei i nga wairua poke, hei whakaora hoki i nga mate katoa me nga turorotanga katoa.

2 Na, ko nga ingoa enei o nga apotoro kotahi tekau ma rua; Te tuatahi, ko Haimona, he ingoa nei nona ko Pita, raua ko tona teina, ko Anaru; ko Hemi *tama* a Heperi, raua ko tona teina, ko Hoani;

3 Ko Piripi raua ko Patoromu; ko Tamati raua ko Matiu pupirikana; ko Hemi *tama* a Arapiu raua ko Repiu, he ingoa nei nona ko Tariu;

4 Ko Haimona Kananiti rana ko Hura Ikariote, nāna nei ia i tuku.

5 Ko tenei tekau ma rua i tonoa e Ihu, a i ako ia i a ratou, i mea, Kua e haere ki te ara o nga tauwiwi, kua ano hoki e tomo ki tetahi pa o nga Hamari:

6 Engari me haere ki nga hipi ngaro o te whare o Ihairaira.

7 A me ka whau haere, me ki, Kua tata te rangatiratanga o te rangi.

8 Whakaorangia nga turoro, whakamakia nga repera, whakaarahia nga tupāpaku, peia nga rewera; ka riro noa nei i a koutou, me hoatu noa e koutou.

9 Kua he koura ma koutou, kua he hiriwa, kua he parahi ki roto ki o koutou whitiki;

10 Kua ano he putea mo te ara; kua e takiruatia nga koti, kua he hu, kua ano he tokotoko; ka ea hoki i te kai mahi tana kai.

11 A, ka tomo koutou ki tetahi pa, ki tetahi kāinga koraha ranei, ui atu, Ko wai te tangata pai o reira? a hei reira noho ai, a haere noa.

12 Ano ka tomo ki tetahi whare, me oha atu.

13 A, ki te pai te whare, kia tau ta koutou rangimarie ki reira; a, ki te kahore e pai, kia hoki mai ta koutou rangimarie ki a koutou.

14 A, ki te kahore tetahi e manako ki a koutou, ki te kore e whakarongo ki ā koutou kupu, ka haere koutou ki waho o taua whare, o taua pa ranei, whakangahoroa te puehu o o koutou waewae.

15 He pono taku e mea nei ki a koutou, Erangi to te whenua o Horoma raua ko Komora i te ra whakawa e māmā i to taua pa.

16 ¶ Nana, ka tonoa nei koutou e ahau ano he hipi ki roto ki nga wuruhi: na, kia rite ki te nakahi te mahara, kia rite ki nga kukupa te kino kore.

17 Kia tupato ia ki nga tāngata: e tukua hoki koutou e ratou ki nga runanga, a e whiua koutou i roto i o ratou whare karakia;

18 A ka kawea koutou ki nga kawana, ki nga kingi, mo te

MATIU 10.

whakaaro ki a au, hei mea whakaatu ki a ratou, ki nga tauwiwi hoki.

19 Ano ka tukua koutou e ratou, kua e manukanuka ki te pehea, ki te aha, e korero ai koutou; ka hoatu hoki ki a koutou i taua wa ta koutou e korero ai.

20 Ehara hoki i a koutou nga korero, engari ko te Wairua o to koutou Matua te korero ana i roto i a koutou.

21 ¶ Na, ka tukua te tukana e te teina ki te mate, te tama hoki e te pāpā; ka whakatika nga tamariki ki nga mātua, ka mea kia whakamatea.

22 A ka kinongia koutou e nga tāngata katoa he mea hoki mo toku ingoa; ko te tāngata ia e u ana a taea noatia te mutunga, ka ora ia.

23 Na ka whakatoia koutou i tenei pa, rere atu ki tetahi atu: he pono hoki taku e mea nei ki a koutou, E kore e poto i a koutou nga pa o Ihairaira te haere, ko te Tama a te tāngata kua tae mai.

24 Kahore e nui ake te akonga i tona kai whakaako, kahore hoki te pononga e nui ake i tona rangatira.

25 Heoi ma te akonga, ko ia kia rite ki tona kai whakaako, ma te pononga hoki, kia rite ki tona rangatira. Ko te rangatira o te whare i karangatia e ratou ko Perehepura, tera noa ake ta ratou mo nga tāngata o tonā whare.

26 Na, kua e wehi i a ratou: kahore hoki he mea i hipokina e mahue te hura; ka-

hore hoki *he mea* i ngaro e mahue te mohio.

27 Ko taku e korero nei ki a koutou i te pouri, me korero e koutou i te maramatanga: ko ta o koutou taringa e rongo ai, me kauwhau ki runga ki nga whare.

28 Kua hoki e wehingia te hunga e whakamate nei i te tinana, a e kore e ahei te whakamate i te wairua: engari ko tenei ta koutou e wehi ai, ko ia e kaha nei ki te whakangaro i te wairua raua ko te tinana ki roto ki Kehena.

29 Kahore ianei e hokona nga pihoihi o rua ki te patene kotahi? a, ki te kahore to koutou Matua e mea, e kore tetahi o raua e marere ki te whenua.

30 Na, ko nga makawe o o koutou mātenga kua oti katoa te tatau.

31 Na, kua e wehi; erangi ra koutou i nga pihoihi maha.

32 ¶ Na, ki te whakaae tetahi ki a au ki te aroaro o nga tāngata, ka whakaaetia hoki ia e ahau ki te aroaro o toku Matua i te rangi.

33 A, ki te whakakahore tetahi ki a au ki te aroaro o nga tāngata, ka whakakahoretia hoki ia e ahau ki te aroaro o toku Matua i te rangi.

34 ¶ Kei mea i haere mai ahau ki te kawē mai i te rangimarie ki te whenua: kihai ahau i haere mai ki te kawē mai i te rangi marie, engari i te hoari.

35 I haere mai hoki ahau ki

te mea i te tangata kia wha-whai ki tona pāpā, i te tamahine ki tona whaea, i te hunahunga wahine ki tona hungawai wahine.

36 A ko nga hoa-riri o te tangata, ko nga tangata o tona whare ake.

37 Ki te nui ake te aroha o tetahi ki tona pāpā, whaea ranei, a ka iti ki a au, e kore ia e tikangatia maku; a ki te nui ake te aroha o tetahi ki tana tama, tamahine ranei, a ka iti ki a au, e kore ia e tikangatia maku.

38 A ki te kore tetahi e mau ki tona ripeka, e aru i muri i a au, e kore ia e tikangatia maku.

39 Te tangata i whiwhi ki te ora, e mate ano ia: a ki te mate tetahi, mona i whakaaro ki a au, ka whiwhi ano ia ki te ora.

40 ¶ Ki te manako tetahi ki a koutou, e manako ana ia ki a au, a ki te manako tetahi ki a au, e manako ana ia ki toku kai tono mai.

41 Ki te manako tetahi ki te poropiti i runga i te ingoa o te poropiti, ka riro i a ia te utu a te poropiti; a ki te manako tetahi ki te tangata tika i runga i te ingoa o te tangata tika, e riro i a ia te utu a te tangata tika.

42 A ki te whakainumia e tetahi tetahi o enei mea no-nohi, ahakoa kotahi ano te pāta wai matao, i runga i te ingoa o te akonga, he pono taku e mea nei ki a koutou, E kore rawa ia e hapa i tona utu.

UPOKO 11.

Nga akonga a Hoani ka ngareea ki a Ihu. 7 Ta Ihu mona. 20 Mo nga pa kihai i ripeneta. 25 Mo te Rongo pai ka whakapuakina nei ki nga kuare.

A KA mutu ta Ihu whakaurite korero ki ana akonga kotahi tekau ma rua, ka haere atu ia i reira ki te whakaako, ki te kauwhau ki o ratou pa.

2 A, te rongonga o Hoani i roto i te whare herehere ki nga mahi a te Karaiti, ka tonoa e ia etahi o ana akonga, tokorua,

3 Ka mea ki a ia, Ko koe ranei tera e haere mai ana, me tatari ranei tatou ki tetahi atu?

4 Na ka whakahokia e Ihu, a ka mea ki a raua, Haere, korerotia ki a Hoani nga mea e rongo nei, e kite nei korua:

5 Ko nga matapo e titiro ana, ko nga kopa e haereere ana, ko nga repera e meinga ana kia ma, ko nga turi e rongo ana, ko nga tupāpaku e whakaarahia ana, a e kauwhautia ana te rongo pai ki te hunga rawakore.

6 A ka koa te tangata e kore e he ki a au.

7 ¶ A ia raua e haere ana, ka timata a Ihu, a ka korerotia a Hoani ki te mano, I haere koutou ki te koraha kia kite i te aha? I te kakaho e whakanganeuetia ana e te hau?

8 Ano ra i haere koutou kia kite i te aha? I te tangata he kakahu maeneene ona?

na, kei nga whare o nga kingi te hunga i nga kakahu mae-neene.

9 Ano ra i haere koutou kia kite i te aha? I te poropiti? ae ra, ko taku kupu tenei ki a koutou, tera atu ano i te poropiti.

10 Ko ia hoki tenei, mona te mea i tuhituhia, na ka tonoa e ahau taku karere ki mua i tou aroaro, mana e whakapai tou ara ki mua i a koe.

11 He pono taku e mea nei ki a koutou, Kahore ano i whakatika noa i roto i nga whanau a te wahine he rahi ake i a Hoani Kai iriiri: heoi, rahi ake i a ia te iti rawa i te rangatiratanga o te rangi.

12 A e tauria ana te rangatiratanga o te rangi no nga ra iho ano o Hoani Kai iriiri a mohoa noa nei, a e riro ana i te hunga taikaha.

13 I poropiti hoki nga poropiti katoa me te ture taea noatia a Hoani.

14 A ki te pai koutou ki te tango, ko Iraia tenei i meinga e haere mai ana.

15 Ki te whai taringa tetahi hei whakarongo, kia rongo ia.

16 Otiia me whakarite e ahau tenei whakatupuranga ki te aha? E rite ana ki nga tamariki e noho ana i nga kainga hoko, a e karanga ana ki o ratou hoa,

17 E mea ana, Whakatangi noa matou i te putorino ki a koutou, a kahore koutou i kanikani mai; aue noa matou ki a koutou, a kahore koutou i tangi mai.

18 I haere mai hoki a Hoani, a kihai i kai, kihai i inu, heoi e mea ana ratou, He rewera tona.

19 I haere mai te Tama a te tangata me te kai, me te inu, ka mea ratou, Na, he tangata kakai, he tangata iinu waina, he hoa no nga pupirikana, no nga tångata hara. Otira e whakatikaia ana te whakaaro nui e ana tamariki.

20 ¶ Katahi ia ka anga, ka tawai ki nga pa i meinga ai te maha o ana merekara, mo ratou kihai i ripeneta:

21 Aue, te mate mou, e Korahina! aue, te mate mou, e Petahaira! me i meatia hoki ki Taira, ki Hairona nga merekara kua meatia nei ki a korua, kua ripeneta ke raua, he taratara hoki te kakahu, me te noho ano i te pungarehu.

22 Ko taku kupu ia tenei ki a koutou, Erangi to Taira, to Hairona e māmā a te ra whakawa i to korua.

23 Me koe hoki, e Kapere-nauma, e tiketike ake na, a tutuki noa ki te rangi, ka whakatakā koe ki te reinga: me i meatia hoki ki Horoma nga merekara kua meatia nei ki a koe, kua tu tonu, a taea noatia tenei ra.

24 Ko taku kupu ia tenei ki a koutou, Erangi to te whenua o Horoma e māmā i tou a te ra whakawa.

25 ¶ I taua wa ka oho a Ihu, ka mea, He whakawhetai atu taku ki a koe, e Pa, e te Ariki o te rangi, o te whenua, no te mea kua hunā e koe enei mea i te hunga mātau, i te hunga

mahara, a hurahia atu ana ki nga kohungahunga.

26 Ae ra, e Pa ; i pai hoki te penei ki tau titiro.

27 Kua tukua mai nga mea katoa ki a au e toku Matua : a kahore tetahi e mātau ki te Tama, ko te Matua anake ; kahore hoki tetahi e mātau ki te Matua, ko te Tama anake, me te tangata hoki e pai ai te Tama kia hurahia atu ki a ia.

28 ¶ Haere mai ki ahau, e koutou katoa e mauini ana, e taimaha ana, a maku koutou e whakaokioki.

29 Tangohia taku ioka ki runga ki a koutou, kia whakaakona koutou e ahau ; he ngakau māhaki hoki toku, he ngakau pāpaku : a e whiwhi koutou ki te okiokinga mo o koutou wairua.

30 He ngawari hoki taku ioka, he māmā taku pikaunga.

UPOKO 12.

Tikanga a nga Parihi mo te Hapatī. 22 Tangata i te rewera. 31 Kohukohu ki te Wairua Tapu. 38 Te hunga tono tohu. 46 Tona whaea, aha aha.

ITAUA wa i haere a Ihu i te hapatī ra waenga witi ; a e mate ana ana akonga i te hiakai, na ka anga ratou, ka kakato i nga witi, ka kai.

2 A, te kitenga o nga Parihi, ka mea ki a ia, Na, o akonga e mea na i te mea e kore e tika kia meatia i te hapatī.

3 Ka mea ia ki a ratou, Kahore koutou i kite i ta Rawiri

i mea ai i a ia e mate ana i te hiakai, ratou ko ona hoa ;

4 I tona tomokanga ki te whare o te Atua, i tana kaininga i nga taro aroaro, i nga mea kihai nei i tika kia kaininga e ia, e ona hoa ranei, engari ma nga tohunga anake ?

5 A kahore ano koutou i kite i roto i te ture, e whakanoatia ana te hapatī e nga tohunga i roto i te temepara i nga hapatī, a kahore he hē ?

6 Ko taku kupu ia tenei ki a koutou, Kei konei tetahi e rahi atu ana i te temepara.

7 Otiia me i mātau koutou ki tenei, Ko taku e pai ai, ko te tohu *tangata*, hāunga te patunga tapu, kahore koutou i whakahe i te hunga hara kore.

8 Ko te Tama nei hoki a te tangata te Ariki o te hapatī.

9 ¶ A, tona haerenga atu i reira, ka haere ia ki to ratou whare karakia :

10 Na, he tangata tera kua memenge tona ringa. A ka ui ratou ki a ia, ka mea, He mea tika ranei te whakaora i te hapatī ? he mea hoki kia whakapangia ai e ratou he hē ki a ia.

11 Na ka mea ia ki a ratou, Ko tehea tangata o koutou, ki te mea kotahi ana hipi, a ka taka ki roto ki te poka i te hapatī, e kore ranei ia e mau ki taua *hipi*, e hapai ake ?

12 Na, tera atu to te tangata pai i to te hipi. Ina, e tika ana ano te mahi pai i nga hapatī.

13 Me i reira ka mea ia ki taua tangata, Torona mai tou

ringa. A, te toronga kua ora ano, kua pera me tetahi.

14 Na ka haere nga Parihi ki waho, ka runanga mona ki te pehea e ngaro ai ia i a ratou.

15 Otira i mātau a Ihu, a haere atu ana i reira : a he rahi te hui i aru i a ia, a whakaorangia ana ratou katoa e ia ;

16 A i whakatupato ano ia i a ratou kei whakakitea ia :

17 Na ka rite ta Ihaia poropiti i korero ai, i mea ai,

18 Na, taku pononga, tāku i whiriwhiri ai, taku i aroha ai, ta toku Wairua i ahua reka ai ; ka waiho e ahau toku Wairua ki runga ki a ia, a māna e whakapuaki te whakawa ki nga tauwi.

19 E kore ia e totohe, e kore ia e hamama ; e kore ano e rangona tona reo i nga ara ;

20 E kore e whatiia porokeretia e ia te kakaho i mangungu, e kore e tineia te muka e whakapaoa ana ; kia puta ra ano i a ia te whakawa ki te wikitoria.

21 A ka tumanako nga tauwi ki tona ingoa.

22 ¶ Me i reira ka kawea mai ki a ia he tangata e nohoia ana e te rewera, he matapo, he wahangu : a whakaorangia ana e ia, no ka korero, ka kite taua matapo, *taua* wahangu.

23 A ka ohomauri te mano katoa, ka mea, Ehara ianei tenei i te Tama a Rawiri ?

24 A, te rongonga o nga Parihi, ka mea, Ehara i a ia nāna i pei nga rewera nei,

engari na Perehepura, na te rangatira o nga rewera.

25 A i mātau a Ihu ki ā ratou whakaaro, a ka mea ki a ratou, Ki te tahuri iho tetahi rangatiratanga ki a ia ano, ka kore ; a ki te tahuri iho ki a ia ano tetahi pa, tetahi whare ranei, e kore e tu :

26 Na, ki te pei a Hatana i a Hatana ano, e tahuri iho ana ki a ia ano ; me pehea e tu ai tona rangatiratanga ?

27 A ki te mea na Perehepura taku peinga rewera, na wai te peinga a a koutou tamariki ? na, ko ratou hei kai whakahe mo koutou.

28 Tena ki te mea na te Wairua o te Atua taku peinga rewera, ina, kua tae noa mai te rangatiratanga o te Atua ki a koutou.

29 Me pehea oti ka tomo ai te tangata ki te whare o te tangata kaba, ka pahua ai i ona taonga, ki te kore ia e mātua here i taua tangata kaha ? ko reira pahua ai i tona whare.

30 Te tangata chara i te hoa noku, he hoa riri ia ki a au ; te tangata kahore e kohikohi tahi māua, e titaritari ana.

31 ¶ Koia ahau ka mea nei ki a koutou, Ko nga hara katoa, me nga kohukohu a nga tāngata e murua : tena ko te kohukohu ki te Wairua *Tapu*, e kore e murua.

32 A, ki te korero whakahe tetahi mo te Tama a te tangata, e murua tāna : tena ki te korero whakahe tetahi mo te Wairua *Tapu*, e kore e mu-

rua tana i tenei ao, e kore ano i tera atu.

33 Meinga ranei te rakau kia pai, a pai iho ona hua; meinga ranei te rakau kia kino, a kino iho ona hua; ma nga hua hoki ka mohiotia ai te rakau.

34 E te uri nakahi, me pehea ka korero pai ai koutou te hunga kino? he purenatanga hoki no te ngakau nga kupu a te mangai.

35 Te tangata pai, he pai ana e whakaputa ai i roto i nga taonga pai o te ngakau: te tangata kino hoki, he kino ana e whakaputa ai i roto i nga taonga kino.

36 Na, ka taku kupu tenei ki a koutou, Me korero e nga tangata, a te ra whakawa, te tikaunga o nga kupu pokanoa katoa e puaki i a ratou.

37 Ma au kupu hoki koe ka whakatikaia ai, ma au kupu ano ka tau ai te he ki a koe.

38 ¶ Me i reira ka ki etahi o nga karaipi, o nga Parihi, ka mea, E te Kai whakaako, e mea ana matou kia kite i tetahi tohu i a koe.

39 Na ka whakahokia e ia, ka mea ki a ratou, E rapu ana te whakatupuranga kino, puremu, i tetahi tohu; a e kore tetahi tohu e hoatu, ko te tohu anake o Hona poropiti:

40 E toru hoki nga ra o Hona, e toru nga po i roto i te kopu o te tohora; waihoki ka toru nga ra, ka toru nga po o te Tama a te tangata ki te ngakau o te whenua.

41 E whakatika ngatahi nga

tangata o Ninewe me tenei whakatupuranga i te whakawakanga, a e whakatau i te he ki a ratou: i ripeneta hoki ratou i te kauwhantanga a Hona; a tenei tetahi e nui atu ana i a Hona

42 E whakatika ngatahi te kuini o te tonga me tenei whakatupuranga i te whakawakanga, a e whakatau i te he ki a ratou: i haere mai hoki ia i nga pito o te whenua ki te whakarongo ki nga whakaaro nui o Horomona; a tenei tetahi e nui atu ana i a Horomona.

43 Ka puta mai te wairua poke i roto i te tangata, ka haercere ra nga wahi maroke rapu okiokinga ai, a, te kitea,

44 Ka mea ia, Ka hoki ahau ki toku whare i puta mai ai ahau; a, te taenga atu, rokohanga atu e takoto kau ana, oti rawa te tahi, te whakapai.

45 Na ka haere ia, ka tango i etahi atu wairua tokowhitu, hei hoa mona, he kino noa atu i a ia ano, a ka tomo ratou, ka noho ki reira: a kino atu i te timatanga te whakamutunganga ki taua tangata. Tera ano e pera tenei whakatupuranga kino.

46 ¶ I a ia ano e korero ana ki te mano, na, ko tona whaea ratou ko ona teina e tu ana i waho, e whai ana kia korero ki a ia.

47 A ka mea tetahi ki a ia, Na, tou whaea me ou teina te tu mai nei i waho, e whai ana kia korero ki a koe.

48 Na, ko tana whakahokiinga, ka mea ki te tangata i

korero ki a ia, Ko wai toku whaea? ko wai hoki oku teina?

49 Na ka torona atu tona ringa ki ana akonga, a ka mea, Na, toku whaea, oku teina!

50 Ki te meatia hoki e tetahi ta toku Matua i te rangi e pai ai, hei teina ia ki a au, hei tuahine, hei whaea.

UPOKO 13.

Mo te kai rui; 24 Taru kino;

31 Pua nani. 33 Rewena;

44 Taonga ngaro; 45 Peara;

47 Kupenga. 53 Ta ratou mona.

ITAUA ra i haere atu a Ihu i te whare, a ka noho ki te taha o te moana.

2 Na, he rahi te hui i huihui ki a ia, a ka eke ia ki te kaupuke noho ai; i te takutai ano te hui katoa e tu ana.

3 A he maha ana korero ki a ratou, he mea whakarite; i mea ia, Na, i haere te kai rui ki te rui;

4 A i a ia e rui ana, ka ngahoro etahi o nga purapura ki te taha o te ara, a, te rerenga mai o nga manu, kainga ake:

5 Ko etahi i ngahoro ki nga wahi kamaka, ki nga wahi kihai i nui te oneone: na pihi tonu ake, kahore hoki i honu te oneone;

6 A, te whitinga o te ra, ngaua iho; a, no te mea kahore he putake, memenge noa iho:

7 Ko etahi i ngahoro ki roto ki nga tātaramoa; a, te tupunga ake o nga tātaramoa, koaoatia ana nga purapura:

8 Ko etahi i ngahoro ki te oneone pai, a ka hua, no etahi kotahi rau, no etahi e ono tekau, no etahi e toru tekau.

9 Ki te whai taringa tetahi hei whakarongo, kia rongo ia.

10 ¶ A ka haere mai nga akonga, ka mea ki a ia, Na te aha koe i korero whakarite tonu ai ki a ratou?

11 Na, ko tana whakahokinga ki a ratou, ka mea, No te mea kua hoatu ki a koutou te matauranga ki nga mea ngaro o te rangatiratanga o te rangi, ki a ratou ia, kahore i hoatu.

12 Ki te whai mea hoki tetahi, ka hoatu ano ki a ia, a ka maha atu ana: a ki te kahore he mea a tetahi, ko ana ake ka tangohia i a ia.

13 Na reira enei kupu whakarite aku ki a ratou; no te mea kite rawa ratou, a kahore e kite; rongo rawa, kahore hoki e mātau.

14 A ka rite i a ratou te poropititanga a Ihaia, e mea nei, rongo noa koutou, kahore e mātau; titiro noa koutou, kahore e kite:

15 Kua matotoru hoki te ngakau o tenei iwi, kua puhoi nga taringa ki te whakarongo, ko nga kanohi kua oti te whakamoe e ratou; kei kite o ratou kanohi, kei rongo nga taringa, a ka mātau te ngakau, na ka tahuri ratou, a ka whakaorangia e ahau.

16 Koa tonu ia o koutou kanohi, no te mea ka kite: o koutou taringa hoki, no te mea ka rongo.

17 He pono hoki taku e mea

nei ki a koutou, He tokomaha nga poropiti me nga tangata tika i hiahia kia kite i nga mea e kite nei koutou, a kahore i kite; kia rongo hoki i nga mea e rongo nei koutou, a kahore i rongo.

18 Na, whakarongo ki te kupu i whakaritea ki te kai rui.

19 Ki te rongo tetahi ki te kupu o te rangatiratanga, a e kore e mātau, na ka haere mai te *wairua* kino, ka kapo i te mea ka oti na te rui ki tona ngakau. Ko te tangata tenei i nga purapura i te taha o te ara.

20 Te tangata ia i nga purapura i nga *wahi* kohatu, ko te tangata i rongo ki te kupu, a hohoro tonu te tango mai, hari tonu;

21 Otiia kahore ona pakiaka, he mea nonaiane i kau nei: a, te pānga mai o te whakapawera, o te whakatoinga ranei, mo te kupu, na, hē tonu iho.

22 Te tangata ano i nga purapura i waenga tātaramoa, ko te tangata i rongo ki te kupu; a, ko te whakaaroaronga ki tenei ao, me te hangarau o nga taonga, hei whakakoaoao i te kupu, a kore ake he hua.

23 Te tangata ia i nga purapura i te oneone pai, ko te tangata e rongo ana ki te kupu, a e mātau ana; a ka whai hua, ea ake, no tetahi kotahi rau, no tetahi e ono tekau, no tetahi e toru tekau.

24 ¶ Tenei ake ano tetahi kupu whakarite i makā e ia ki a ratou, i mea ia, E rite ana te rangatiratanga o te rangi

ki tetahi tangata i rui i te purapura pai ki tana māra:

25 A i nga tangata e moe ana, ka haere mai toua hoariri, ruia iho he taru kino ki waenga witi, a haere ana.

26 Ano ka pihi ake te rau, a ka nua, katahi ka kitea hoki nga taru.

27 Na ka haere mai nga pononga o taua rangatira, ka mea ki a ia, E mara, kihai ianei koe i rui i te purapura pai ki to māra? No hea ra ona taru?

28 Na ka ki atu ia ki a ratou, Na te hoa-riri tenei i mea. Katahi ka mea nga pononga ki a ia, E pai ranei koe kia haere matou ki te huihui i aua taru?

29 A ka mea ia, Kahore; kei hutia ngatahitia ano nga witi ina huihuia nga taru.

30 Tukua kia tupu tahi, a taea noatia te kotinga: a i te wa o te kotinga ka mea ahau ki nga kai kokoti, Mātua huihuia nga taru, ka paihere ai hei paihere kia tahuna; ko te witi ia me kahi ki taku whare witi.

31 ¶ Tenei ake ano tetahi kupu whakarite i makā e ia ki a ratou, i mea ia, E rite ana te rangatiratanga o te rangi ki te pua nani, i kawea e te tangata, i ruia ki tana māra:

32 He iti rawa ia i nga purapura katoa: a ka tupu, ko te nui rawa o nga otaota, a whakarakau ana, no ka rere mai nga manu o te rangi, ka noho ki ona manga.

33 ¶ Tenei ake ano tetahi kupu whakarite i korerotia e

ia ki a ratou, E rite ana te rangatiratanga o te rangi ki te rewena i tangohia e tetahi wahine, a whaongia ana ki roto ki nga mehua paraoa e toru, no ka rewenatia katoatia.

34 Ko enei mea katoa i korerotia e Ihu ki te mano, he mea whakarite; a heoi ano āna kupu ki a ratou he kupu whakarite anake:

35 I rite ai ta te poropiti i korero ai, i mea ai, e puaki i toku mangai nga kupu whakarite; ka korerotia e ahau nga mea i ngaro no te timatanga ra ano o te ao.

36 ¶ Katahi ka tonoa e Ihu te mano, ka haere ia ki te whare: a ka haere mai ana akonga ki a ia, ka mea, Whakaaturina mai ki a matou te kupu i whakaritea ki nga taru i te mārā.

37 Na, ka whakahokia e ia, a ka mea ki a ratou, Te kai rui o te purapura pai, ko te Tama a te tangata;

38 Te mārā, ko te ao; te purapura pai, ko nga tamariki o te rangatiratanga; a, nga taru, ko nga tamariki a te kino;

39 Te hoa-riri i ruia ai, ko te rewera; te kotinga, ko te mutunga o te ao; nga kai kokoti, ko nga anahera.

40 Na, e huihuia ana nga taru, e tahuna ana ki te ahi; ka pera ano a te mutunga o tenei ao.

41 Ka tonono te Tama a te tangata i ana anahera ki te huihui i roto i tona rangatiratanga i nga mea katoa e

tūtuki ai te waewae me nga kai mahi i te kino;

42 A ka makā e ratou ki roto ki te oumu ahi; ko te wahi tera o te tangihanga me te teteatanga o nga niho.

43 Ko reira te hunga tika whiti ai me te ra, ki te rangatiratanga o to ratou Matua. Ki te whai taringa tetahi hei whakarongo, kia rongoa ia.

44 ¶ E rite ana ano te rangatiratanga o te rangi ki te taonga i hunā ki te mārā; a, te kitenga o tetahi tangata, na ka hunā e ia, a haere ana, he koa hoki nona, na hokona ana āna mea katoa, a hokona ana taua mārā māna.

45 ¶ E rite ana ano te rangatiratanga o te rangi ki te kai hokohoko, e rapu ana i nga peara papai:

46 A, tona kitenga i tetahi peara utu nui, haere ana, hokona ana āna mea katoa, a hokona ana taua peara māna.

47 ¶ E rite ana ano te rangatiratanga o te rangi ki te kupenga i tukua ki te moana, a haoa ana etahi o nga ika o ia ahua, o ia ahua:

48 A ka ki, ka kumea ki uta, a noho ana, kohikohia ana nga ika papai ki nga kete, ko nga mea kikino ia, i akiritia ki waho.

49 Ka pera ano a te mutunga o te ao: ka haere nga anahera, ka wehewehe i te hunga kino i roto i te hunga tika,

50 A ka maka i a ratou ki roto ki te oumu ahi: ko te wahi tera o te tangihanga, o te teteatanga o nga niho.

51 Ka mea a Ihu ki a ratou,

MATIU 13, 14.

Kua mātau ranei kontou ki enei mea katoa? Ka mea ratou ki a ia, Ae, e te Ariki.

52 Na ka mea ia ki a ratou, Koia nga karaipi katoa, i ako na ki te rangatiratanga o te rangi, i rite ai ki tetahi rangatira whare e whakaputa mai ana i nga mea hou, i nga mea tawhito, i roto i tana toa.

53 ¶ A ka mutu enei kupu whakarite a Ihu, ka haere atu ia i reira.

54 A ka tae ki tona kāinga tupu, ka ako i a ratou i roto i to ratou whare karakia, a miharo noa ratou, ka mea, No hea enei whakaaro nui me nga merekara a tenei tangata?

55 Ehara ianei tenei i te tama a te kamura? He teka ianei ko Meri te ingoa o tona whaea? A ko Hemi, ratou ko Hohi, ko Haimona, ko Hura, ona teina?

56 Me ona tuahine hoki, ka hore ianei ratou katoa i a tatou nei? No hea ra enei mea katoa a tenei tangata?

57 Heoi ka hē ratou ki a ia. Otira ka mea a Ihu ki a ratou, Kei tona kāinga, kei tona whare anake te poropiti hapa ai i te honore.

58 A kihai i maha nga merekara i meatia e ia ki reira, i to ratou whakapono-kore hoki.

UPOKO 14.

Ta Herora mo te Karaiti.

3 *Ta Heroriaha mo Hoani.*

13 *Nga mano e rima.* 22

Haere ana i runga wai.

34 *Whakaora mate.*

ITAUA wa ka rongo a Herora tetaraki ki te rongo o Ihu,

2 A ka mea ki ana pononga, Ko Hoani Kai iriiri tenei; kua ara mai ia i te hunga mate; a na reira i mabi ai nga merekara i roto i a ia.

3 ¶ I hopukia hoki a Hoani e Herora, a hereherea ana e ia, a makā ana ki te whare herehere, he mea hoki na Heroriaha, na te wahine a tona teina, a Piripi.

4 I mea hoki a Hoani ki a ia, E kore e tika kia riro ia i a koe.

5 A i a ia e mea ana ki te whakamate i a ia, ka wehi i te mano; ki ta ratou hoki he poropiti ia.

6 Otira i te haringa, i te ra whanautanga o Herora, ka kanikani te tamahine a Heroriaha i waenganui i a ratou, a ka ahuaureka a Herora.

7 Katahi ia ka mea ki a ia, oati rawa, kia hoatu ki a ia tana mea e tono ai.

8 Na, he mea whakakī ia na tona whaea, ka mea, Homai ki konei ki a au ki runga ano i te rihi te mātenga o Hoani Kai iriiri.

9 Heoi ka pouri te kingi: otiia i whakaaro ia ki te oati, ki te hunga hoki e noho tahi ana me ia, a ka mea kia hoatu.

10 Na ka tono tangata ia, a poutoa ana te mātenga o Hoani i roto i te whare herehere.

11 A i mauria mai tona mātenga i runga i te rihi, i hoatu ki te kotiro: a kawea atu ana e ia ki tona whaea.

12 Na ka haere mai ana akonga, ka tango i te tinana, a tanumia ana e ratou, a haere ana, korero ana ki a Ihu.

13 ¶ A, te rongonga o Ihu, ka haere atu ia i reira ra te kaipuke ki te koraha ki tetahi wahi motu ke: ano ka rongo te mano, ka aru i a ia ra uta i roto i nga pa.

14 A, ka puta atu a Ihu, ka kite i te huihuinga nui, na ka aroha ia ki a ratou, a whakaorangia ana e ia o ratou turoro.

15 Ano ka ahiahi, ka haere ana akonga ki a ia, ka mea, He wahi koraha tenei, kua heke noa atu ano te ra; to noa atu te mano, kia haere ai ratou ki nga kaininga, ki te hoko kai ma ratou.

16 Ano ra ko Ihu ki a ratou, Kahore he mea e haere ai ratou; ma koutou e hoatu he kai ma ratou.

17 A ka mea ratou ki a ia, Heoi ano a matou i konei, e rima nga taro, e rua hoki nga ika.

18 Na ka mea ia, Mauria mai ki konei, ki a au.

19 Na ka mea ia ki te mano kia noho ki runga ki te tarutaru, a ka mau ki nga taro e rima, ki nga ika hoki e rua, ka titiro ki runga ki te rangi, ka whakapai, ka whawhati, a hoatu ana e ia nga taro ki nga akonga, a na nga akonga ki te mano.

20 A kai katoa ana ratou, a ka makona: a kotahi tekau ma rua nga kete i kohia ake e ratou, ki tonu i nga whati-whatinga i toe.

21 A te hunga i kai, me te mea e rima mano nga tane haunga nga wahine me nga tamariki.

22 ¶ Na, akiaki tonu a Ihu i ana akonga kia eke ki te kaipuke, kia whakawhiti i mua i a ia ki tawahi, i a ia e tono ana i nga mano kia haere.

23 A, ka oti te mano te tono, ka kake ia ki runga ki te maunga, ki te wahi motu ke, ki te inoi: na, kua ahiahi, a ko ia anake i reira.

24 Na, tera te kaipuke te akina ra e te ngaru i waenga moana: i hē hoki te hau.

25 A, i te wha o nga mataaratanga o te po ka haere a Ihu ki a ratou, i haere maori i runga i te moana.

26 A, te kitenga o nga akonga i a ia e haere ana i runga i te moana, ka ihiihi, ka mea, He wairua; a ka aue i te wehi.

27 Na, kua hohoro te korero a Ihu ki a ratou, te mea, Kia manawanui, ko ahau tenei; aua e wehi.

28 Na ka whakahoki a Pita ki a ia, a ka mea, E te Ariki, ki te mea ko koe tena, kiia mai ahau kia haere atu ki a koe i runga i te wai.

29 Na ka mea ia, Haere mai. A ka marere atu a Pita i te kaipuke, ka haere i runga i te wai, kia tae ai ki a Ihu.

30 Otira ka kite ia i te hau e kaha ana, ka wehi; a ka timata te totohu, ka karanga ake, ka mea, Ahau, e te Ariki, whakaorangia.

31 A hohoro tonu te totoro mai o te ringa o Ihu, ka hopu

i a ia, a ka mea ki a ia, E te tangata whakapono iti, he aha koe i ngakau rua ia?

32 Ano ka eke raua ki te kaupuke, mutu pu te hau.

33 Na ka haere mai te hunga i runga i te kaupuke, ka koropiko ki a ia, ka mea, He pono, ko te Tama koe a te Atua.

34 ¶ A, to ratou whitinga atu, ka tae ki te whenua o Kenehareta.

35 A, ka mohio nga tāngata o taua wahi ki a ia, ka tono tangata puta noa i nga wahi tutata katoa o reira, hei kawē mai i nga turoro katoa ki a ia;

36 A ka inoi ki a ia kia pa kau ratou ki te taniko o tona kakahu: a ora ake nga tāngata katoa i pa.

UPOKO 15.

Mo to nga Parihi he ki ta te Atua kupu. 10 *Ko roto hei hoake i te he.* 21 *Wahine Kanaani.* 29 *Era atu whakaoranga.* 32 *Nga 4000 ka whangara.*

NA ka haere mai ki a Ihu etahi karaipi me etahi Parihi o Hiruharama, ka mea,

2 He aha āu akonga ka takahi ai i te whakarereanga iho a nga kaumatua? Kahore hoki ratou e horoi i o ratou ringa ina kai taro.

3 Na ka whakahokia e ia, ka mea ki a ratou, Na te aha hoki i waiho ai e koutou ta koutou whakarereanga iho hei takahi mo ta te Atua kupu ako?

4 I ki hoki te Atua, i mea, Whakahonoretia tou pāpā me

tou whaea: a, ki te kohukohua e tetahi tona pāpā, whaea ranei, kia mate ia, mate rawa.

5 Ko koutou ia hei mea, Ki te mea tetahi ki tona pāpā ki tona whaea ranei, Taku mea hei atawhainga mou kua whakahereā;

6 Na, kua ia e whakahonore i tona pāpā, i tona whaea. Heoi waiho ana e koutou ta koutou whakarereanga iho hei whakakahore i te kupu ako a te Atua.

7 E te hunga tinihanga, tika rawa ta Ihaia i poropiti ai mo koutou, i mea ai,

8 Te iwi nei, ko o ratou mangai hei awhi mai ki ahau, ko nga ngutu hei whakahonore moku; matara noa atu ia i a au o ratou ngakau.

9 Maumau karakia noa ratou ki a au, ko ta ratou nei hoki e whakaako ai ko nga whakahau a te tangata.

10 ¶ A karangatia ana e ia te mano, ka mea ki a ratou, Kia rongo, kia mātau:

11 E kore te tangata e poke i te mea e tapoko ana ki te mangai; engari te mea e puta mai ana i roto i te mangai, ma tena e poke ai te tangata.

12 Me i reira ka haere ana akonga, ka mea ki a ia, E mohio ana ranei koe i hē nga Parihi i to ratou rongonga ai i taua kupu?

13 Na ka whakahokia e ia, a ka mea, Ka hutia nga mahuri katoa kihai i whakatokia e toku Matua i te rangi.

14 Waiho atu ratou: he matapo ratou e arahi ana i te matapo. A ki te arahina te

matapo e te matapo, ka taka tokorua, tokorua, ki te waikeri.

15 Ka whakahokia e Pita, a ka mea ki a ia, Whakaaturia ki a matou tenei kupu whakarite.

16 A ka mea a Ihu, E kuare ana ano ranei koutou ?

17 Kiano koutou i mātau noa, ko nga mea katoa e tapoko ana ki te mangai ka riro ki roto ki te kopu, a e akiritia ana ki te poka ?

18 Tena ko nga mea e puta mai ana i te mangai, e haere ake ana i te ngakau ; a ma ena e poke ai te tangata.

19 No roto hoki no te ngakau te putanga ake o nga whakaaro kino, o nga kohuru, o nga puremu, o nga moepuku, o nga tahae, o nga whakapae teka, o nga kohukohu :

20 Ko nga mea enei e noa ai te tangata : tena ko te kai me nga ringa kihai i horoia, e kore te tangata e noa i tena.

21 ¶ A ka haere atu a Ihu i reira, ka anga ki nga wahi o Taira, o Hairona.

22 Na, ko te haerenga mai i aua wahi o tetahi wahine, he Kanaani, ka karanga ki a ia, ka mea, E te Ariki, e te Tama a Rawiri, kia aroha ki a au ; ko taku tamahine e ngaua ki-notia ana e te rewera.

23 A, kahore ana kupu i whakahoki ai ki a ia. Na ka haere mai ana akonga, ka ki ki a ia, ka mea, Tonoa kia haere ; e karanga ana hoki i muri i a tatou.

24 Otira ka whakahokia e ia, a ka mea, Heoi nga mea i tonoa mai ai ahau, ko nga

hipi ngaro o te whare o Ihairaira.

25 A ka haere mai tera, ka koropiko ki a ia, ka mea, E te Ariki, kia puta tou whakaaro ki a au.

26 Na ka whakahokia e ia, a ka mea, Ehara i te tika kia tangohia te taro a nga tamarihi, kia makā ma nga kuri.

27 A ka mea tera, Ae ra, e te Ariki : e kai ana ano nga kuri i nga kongakonga e ngahoro iho ana i te tepu a o ratou rangatira.

28 Katahi ka whakahokia e Ihu, a ka mea ki a ia, E tai, nui atu tou whakapono : waiho ano i tāu i pai ai. A ora ake tana tamahine i taua wapu ano.

29 ¶ Na, ka whakatika a Ihu i reira, ka haere ki te taha o te moana o Kariri : a kake ana ki te maunga, noho ana i reira.

30 A he rahi te hui i haere mai ki a ia, i a ratou ano nga kopa, nga matapo, nga wahangu, nga mutu, me te tini ke atu, a tukua iho e ratou ki nga waewae o Ihu ; a whakaorangia ana ratou e ia :

31 Miharo noa te mano i to ratou kitenga ai i nga wahangu e korero ana, i nga mutu e ora ana, i nga kopa e haere ana, i nga matapo e titiro ana : a whakakororiatia ana e ratou te Atua o Ihairaira.

32 ¶ Na ka karangatia e Ihu ana akonga, ka mea, E aroha ana ahau ki te huihui nei, ka toru nei hoki o ratou ra e noho ana ki a au, a kahore ā

ratou kai : a e kore ahau e pai
kia tonoa pukutia, kei hemo
ki te ara.

33 Na, ko te meatanga a ana
akonga ki a ia, No hea ā tatou
taro i te koraha, e makona ai
tenei ope nui ?

34 Na ka mea a Ihu ki a
ratou, E hia ā koutou taro ?
Ka mea ratou, E whitu, me
nga ika nonohi, torutoru nei.

35 Na ka mea ia ki te mano
kia nohoki raro ki te whenua.

36 A ka mau ia ki nga taro
e whitu, ki nga ika, ka whaka-
whetai, ka whawhati, a hoatu
ana e ia ki ana akonga, a na
nga akonga ki te mano.

37 A kai ana ratou katoa,
a ka makona : a e whitu nga
kete i kohia e ratou, ki tonu
i nga whatiwhatinga i toe.

38 A te hunga i kai e wha
mano nga tāne, hāunga nga
wāhine, nga tamariki.

39 A ka oti te mano te tono
atu e ia, ka eke ia ki te kai-
puke ; na kua u ki nga wahi
o Makarara.

UPOKO 16.

*Ta nga Parihi. 13 Ta te iwi
mona. 16 Ta Pita mona.*

*17 Tana mo Pita. 21 Mate
mona. 23 Tana ki a Pita.*

24 Kia maia ki te mate.

NA ka haere mai nga Pa-
rihi me nga Haruki, ka
whakamātautau, ka tono kia
whakakitea e ia ki a ratou
tetahi tohu i te rangi.

2 Na, ka whakahokia e ia, a
ka mea ki a ratou, Ka ahiahi,
ka mea koutou, He paki ; ina
e whero ana te rangi.

3 A i te ata, He āwhā aiane ;

e whero ana te rangi, e tuku
pu ana. E te hunga tinibanga,
e mātau ana koutou ki te
titiro ki te mata o te rangi ;
tē taea e koutou nga tohu
o nga taima ?

4 E rapu tohu ana te wha-
katupuranga kino, puremu ;
a heoi ano te tohu e hoatu
ki a ratou ko te tohu o Hona
poropiti. Na whakarerea ana
ratou e ia, a haere ana.

5 ¶ A, te unga o ana akonga
ki tera taha, kua wareware
ki te mau taro atu.

6 Na ka mea a Ihu ki a
ratou, Kia mahara, kia tupato
i te rewena a nga Parihi, a nga
Haruki.

7 A ka korororero ratou ki
a ratou ano, ka mea, No te
mea kahore tatou i mau taro
mai.

8 A ka mohio a Ihu, ka mea
ki a ratou, He aha koutou ka
korororero ai ki a koutou, e te
hunga whakapono iti, no te
mea kihai i maua mai he taro
e koutou ?

9 Kiano koutou i mātau noa,
kiano koutou i mahara ki nga
taro e rima i nga mano e
rima, ki te maha hoki o nga
kete i riro i a koutou ?

10 Ki nga taro hoki e whitu
i nga mano e wha, ki te maha
ano o nga kete i riro i a
koutou ?

11 He aha koutou tē mātau
ai, ehara i te mea mo te taro
taku i mea ai ki a koutou, kia
tupato i te rewena a nga
Parihi, a nga Haruki ?

12 Katahi ratou ka mātau
kihai ia i mea kia tupato i te
rewena o te taro, engari i te

MATIU 16.

ako a nga Parihi, a nga Haruki.

13 ¶ Ka tae a Ihu ki nga wahi o Hiharia Piripai, ka ui ia ki ana akonga, ka mea, Ko wai ra ahau, te Tama a te tangata, ki ta nga tangata ki?

14 Na, ka mea ratou, Ki ta etahi ko Hoani Kai iriiri: ki ta etahi ko Iraia; ki ta etahi, ko Heremaia, ko tetahi ranei o nga poropiti.

15 Ka mea ia ki a ratou, A ki ta koutou ko wai ahau?

16 Na ka whakahokia e Haimona Pita, a ka mea, Ko te Karaiti koe, ko te Tama a te Atua ora.

17 Na ka whakahokia e Ihu, a ka mea ki a ia, Ka koa koe, e Haimona Parahona: ehara hoki i te kikokiko, i te toto, nana tenei i hura ki a koe, engari na toku Matua i te rangi.

18 Na, ko taku kupu ano tenei ki a koe, Ko koe a Pita, a ka hangā e ahau taku hahi ki runga ki tenei kamaka; e kore ano e taea taua hahi e nga kuwaha o te reinga.

19 Ka hoatu ano e ahau ki a koe nga ki o te rangatiratanga o te rangi: a ko au e here ai i te whenua, e herea ano i te rangi: ko au hoki e wewete ai i te whenua e wete-kia ano i te rangi.

20 Me i reira ka whakatupato ia i ana akonga, kia kua e korerotia e ratou ki te tangata ko Ihu ia, ko te Karaiti.

21 ¶ No reira ake ano i timata ai a Ihu te whakaatu ki ana akonga, kua takoto te tikanga kia haere ia ki Hiruha-

rama, a he maha nga mamae e mamae ai ia i nga kaumatua, i nga tohunga nui, i nga karaipi, a ka whakamatea, a i te toru o nga ra ka ara.

22 Na ka mau a Pita ki a ia, ka anga, ka whakahe ki tana, ka mea, Aue! kauaka, e te Ariki! kauaka ra tenei e pa ki a koe.

23 Na ka tahuri ia, ka mea ki a Pita, Haere ki muri i a au, e Hatana: he tūtukitanga waewae koe ki ahau: kahore hoki ou ngakau ki nga mea a te Atua, engari ki a te tangata.

24 ¶ Katahi a Ihu ka mea ki ana akonga, Ki te mea tetahi kia haere mai ki te whai i a au, me whakakahore ia e ia ano, a me amo tona ripeka, ka aru ai i a au.

25 Ki te whai hoki tetahi kia ora, ka mate ano ia; a ki te mate tetahi, mona i whakaaro ki a au, ka kite ano ia i te ora.

26 He aha hoki te pai ki te tangata, ki te riro i a ia te ao katoa, a ka kore he ora mona? He aha hoki ta te tangata e hoatu ai hei utu mona kia ora?

27 Tenei ake hoki ka haere mai te Tama a te tangata, ratou ko ana anahera, i runga i te kororia o tona Matua; a ko reira hoatu ai e ia ki tenei, ki tenei te utu o tana mahi.

28 He pono taku e mea nei ki a koutou, Tenei ano etahi e tu nei e kore e pāngia e te mate, kia kite ra ano i te Tama a te tangata e haere mai ana i runga i tona rangatiratanga.

UPOKO 17.

*Tona whakaahuatanga kē-
tanga. 14 Tamaiti i te
rewera. 22 Mate mona.
24 Tana kohikohi mo te
temepara.*

A KA pahure nga ra e ono,
ka mau a Ihu ki a Pita,
ki a Hemi raua ko tona teina,
ko Hoani, na, kawea ana ra-
tou e ia ki runga ki tetahi
maunga tiketike, ki te wahi
motu ke,

2 A ka puta ke tona ahua i
to ratou aroaro: a whiti tonu
tona mata ano he ra, ma tonu
ano ona kakahu ano ko te
māramatanga.

3 Na ka kitea e ratou a Mohi
rauakō Iraia e korororero ana
ki a ia.

4 Katahi ka oho a Pita, ka
mea ki a Ihu, E te Ariki, he
pai kia noho tatou i konei: ki
te pai koe, ma matou e hanga
etahi wharau ki konei kia
toru; kia kotahi mou, kia
kotahi mo Mohi, kia kotahi
mo Iraia.

5 I a ia ano e korero ana,
na ka taumarumarua iho ra-
tou e te kapua marama: na,
he reo no te kapua e mea ana,
Ko taku Tama tenei i aroha
ai, ko taku i ahua eka ai;
whakarongo ki a ia.

6 Ano ka rongo nga akonga,
ka takoto tapapa ratou, a ra-
hi atu to ratou matakū.

7 Na ka haere mai a Ihu, ka
pa ki a ratou, ka mea, Wha-
katika, kaua e wehi.

8 Ano ka ara ake o ratou
kanohi, kahore he tangata i
kitea e ratou, ko Ihu anake.

9 Na, i a ratou e heke iho
ana i te maunga, ka whakatu-
pato a Ihu i a ratou, ka mea,
Kaua e korerotia ki te tangata
te mea i kitea nei, kia ara ake
ra ano te Tama a te tangata
i te hunga mate.

10 A ka ui ana akonga ki a
ia, ka mea, He aha nga karaipi
ka mea ai, ko Iraia kia mātua
puta mai?

11 Na, ka whakahokia e Ihu,
a ka mea ki a ratou, Ko Iraia
ano e mātua puta hei whaka-
tika i nga mea katoa.

12 Ko taku ia tenei ki a kou-
tou, Kua tae noa mai a Iraia,
a kihai ratou i mohio ki a ia,
heoi meatia ana e ratou ki a
ia ta ratou i pai ai. E pera
ano te Tama a te tangata te
mamae i a ratou.

13 Katahi ka mohio nga ako-
nga ko Hoani Kai iriiri tana
i korero ai ki a ratou.

14 ¶ Ano ka tae ratou ki te
mano, ka haere mai ki a ia
tetahi tangata, ka tūturi nga
turi ki a ia, ka mea,

15 E te Ariki, kia aroha ki
taku tama: he haurangi hoki
ia, he kino tona mamae: he
maha hoki ona hinganga ki te
kapura, he maha ki te wai.

16 A i kawea ia e ahau ki āu
akonga, heoi kihai ia i taea
te whakaora e ratou.

17 Na, ka oho a Ihu, ka mea,
E te uri whakaponokore, pa-
rori ke, kia pehea te roa o toku
nohoanga ki a koutou? Kia
pehea te roa o toku mana-
wanuitanga ki a koutou?
Kawea mai ia ki konei, ki
a au.

18 Na ka riria te rewera e

Ihu; a puta ana i roto i a ia; a ora ake te tamaiti i taua wa pu ano.

19 Me i reira ka haere puku nga akonga ki a Ihu, ka mea, He ahara tē ahei ai i a matou te pei i a ia ki waho?

20 Na ka mea a Ihu ki a ratou, Na to koutou whakapono-kore: he pono hoki taku e mea nei ki a koutou, Ki te mea he whakapono to koutou, pera me te pua nani *te rahi*, e mea koutou ki tenei maunga, Neke atu i konei ki tera wahi; a ka neke; kahore hoki he mea e kore e taea e koutou.

21 Otira e kore e puta noa te pena, ma te inoi anake, ma te noho puku.

22 ¶ A i a ratou e noho ana i Kariri, ka mea a Ihu ki a ratou, Meāke tukua te Tama a te tangata ki nga ringa o nga tāngata:

23 A ka whakamatea e ratou, a i te toru o nga ra ka ara. A nui atu to ratou pouri.

24 ¶ A, to ratou taenga ki Kaperenauma, ka haere mai ki a Pita nga kai kohikohi i te hawhe hekere, ka mea, E kore ianei tou Kai whakaako e homai i te hawhe hekere?

25 Ka mea ia, E hoatu ano. Ano ka tapoko ia ki te whare, ko Ihu kua korero ki a ia, kua mea, E pehea ana to whakaaro, e Haimona? E tango-hia ana e nga kingi o te ao nga takoha taonga me te takoha tangata i ā wai? i ā ratou ake tama, i ā nga tāngata ke ranei?

26 Ka mea a Pita ki a ia, I ā

nga tāngata ke. Na, ko te kiana a Ihu ki a ia, Ha, pena ka haere noa nga tamariki.

27 Ahakoa ra kei whai take hē mai ratou ki a tatou, haere ki te moana, pua tetahi matou, a ka eke te ika mātāmua, tangohia; na ka whakatu-whera i tona mangai, ka kite ai koe i tetahi moni: tangohia tena, ka hoatu ki a ratou, hei mea moku, mou.

UPOKO 18.

Ana akonga, kia mahaki te ngakau. 23 Te pononga i pakeke ki tona hoa.

ITAUA wa, ka haere mai nga akonga ki a Ihu, ka mea, Ko wai te nui rawa i te rangatiratanga o te rangi?

2 Na ka karangatia e Ihu tetahi tamaiti nohinohi, a whakaturia ana e ia ki wae-nganui i a ratou,

3 Ka mea, He pono taku e mea nei ki a koutou, Ki te kore koutou e whakatahuritia, a e penei me nga tamariki nonohi, e kore koutou e tomo ki te rangatiratanga o terangi.

4 Na, ki te whakaiti tetahi i a ia, a ka rite ki tenei tamaiti nohinohi, ko ia te nui rawa i te rangatiratanga o te rangi.

5 A ki te manako tetahi ki tetahi tamaiti nohinohi penei, he whakaaro hoki ki toku ingoa, e manako ana ki a au.

6 Tena ko tenei, ka hē i tetahi tangata tetahi o enei mea nonohi e whakapono nei ki a au, nui ke te pai ki a ia me i whakawerewerea ki tona kaki te kohatu mira kaihe, me

MATIU 18.

i pungaia ia ki te rire o te moana.

7 Aue, te mate mo te ao i nga take he! kua tino takoto rawa hoki he putanga mo nga take he; otiia aue, te mate mo tera tangata e puta ai te take he!

8 Ki te hē koe i tou ringa, i tou waewae ranei, poutoa, makā atu: he nui ke hoki te pai ki a koe kia kopa koe, kia ringa mutu, ina tomo ki te ora, a kia kore e makā ki te ahi kā tonu me nga ringa e rua, me nga waewae e rua.

9 Ki te hē hoki koe i tou kanohi, hikarohia, makā atu: he nui ke hoki te pai ki a koe kia kotahi tou kanohi ina tomo ki te ora, a kia kore koe e makā ki te kapura o Kehena me te mau ano nga kanohi e rua.

10 Kia mahara kei whakahawea ki tetahi o enei mea nohinohi; ko taku kupu hoki tenei ki a koutou, E titiro tonu ana o ratou anahera i te rangi ki te kanohi o toku Matua i te rangi.

11 I haere mai hoki te Tama a te tangata ki te whakaora i te mea i ngaro.

12 Ka pehea to koutou whakaaro? ki te mea he rau nga hipi a tetahi tangata, a ka kotiti ke tetahi o ratou, e kore ianei e waiho e ia nga tekau e iwa ma iwa, ka haere i runga i nga maunga, rapu ai i te mea i kotiti ke?

13 A ki te kitea, he pono taku e mea nei ki a koutou, tera atu tona hari ki taua hipi, i te hari ki nga tekau e iwa ma iwa kihai i kotiti ke.

14 Waihoki kahore he ngakau o to koutou Matua i te rangi, kia ngaro tetahi o enei mea nonohi.

15 ¶ A ki te hara tou teina ki a koe, haere, korerotia tona hara ki a ia, korua anake: ki te whakarongo ia ki a koe, ka riro i a koe tou teina.

16 A ki te kore ia e whakarongo, kawea atu hei hoa mou kia kotahi, kia tokorua ranei, kia mau ai nga kupu katoa i nga mangai o nga kai whakarongo tokorua, tokotoru ranei.

17 A ki te pake ia ki a raua, korerotia ki te hahi: a ki te pake ano ia ki te hahi, me waiho e koe hei tautangata, hei pupirikana.

18 He pono taku e mea nei ki a koutou, Ko a koutou e here ai i te whenua, e herea ano ki te rangi: a ko a koutou e wewete ai i te whenua, e wetekia ano ki te rangi.

19 Tenei ano taku kupu ki a koutou, Ki te mea ka tokorua o koutou e rite tahi ana nga whakaaro i te whenua mo tetahi mea e inoi ai raua, e meinga ano mo raua e toku Matua i te rangi.

20 Na, te wahi e whakaminea ai te hunga tokorua, tokotoru ranei, he whakaaro ki toku ingoa, kei reira ahau, kei wae-nganui i a ratou.

21 Kātahi ka haere mai a Pita ki a ia, ka mea, E te Ariki, kia hia nga haranga o toku teina ki a au, me taku whakarere noa iho i tona hara? kia whitu?

22 Ka mea a Ihu ki a ia, E kore ahau e mea ki a koe, Kia

whitu: engari, Kia whitu te-kau whitu.

23 ¶ Koia i whakaritea ai te rangatiratanga o te rangi ki tetahi kingi, i mea kia kore-rotia ki a ia ana moni e ana pononga.

24 A ka timata ia te ui, ka kawea ki a ia he tangata, te-kau nga mano taranata i a ia.

25 A tē whai rawa ia hei utu, ka mea tona ariki kia hokoa ia, tana wahine, me āna tamariki, me ana taonga katoa, hei whakautu.

26 Na ka tapapa iho taua pononga, ka koropiko ki a ia, ka mea, E te ariki, kia ata hanga ki a au, a ka utua katoatia e ahau ki a koe.

27 Na ka oho i te aroha te ariki o taua pononga, tuku ana i a ia, a whakarerea noatia iho e ia ana moni tarewa.

28 Heoi, te putanga o taua pononga ki waho, ka kite i tetahi o ona hoa pononga, kotahi rau ana pene i a ia: na, hopukia ana e ia, a notia iho te kaki, me te ki ano, Utua taku nama.

29 Heoi, tapapa ana tona hoa pononga ki ona waewae, ka inoi ki a ia, ka mea, Kia ata hanga ki a au, a ka utua katoatia e ahau ki a koe.

30 A kihai ia i pai: heoi haere ana, maka ana i a ia ki te whare herehere, kia utua katoatia ra ano te nama.

31 Na, te kitenga o ona hoa pononga i taua meatanga, nui atu to ratou pouri, a haere ana, whakaaturia ana ki to ratou ariki nga mea katoa i meatia.

32 Katahi ka karanga tona ariki i a ia, ka mea ki a ia, Pononga kino, i whakarerea noatia e ahau taua moni tarewa katoa i a koe, nāu hoki i inoi ki a au:

33 Ehara oti i te tika kia tohungia e koe tou hoa pononga, me ahau hoki i tohu i a koe?

34 Na ka riri tona ariki, a tukua ana ia ki nga kai whakamamae, kia utua katoatia ra ano tana nama.

35 Tera ano e pera toku Matua i te rangi ki a koutou, ki te kore e whakarerea noatia i roto i o koutou ngakau nga he a te teina o tenei, o tenei o koutou.

UPOKO 19.

Mo te whakarere wahine.

10 *Mo te kore e marena.*

13 *Mo nga tamariki.* 16

Nga ui a te tangata mo te ora, mo te tika. 23 *Me ta te Karaiti mo nga taonga.*

A KAMutu enei kupu a Ihu, ka turia atu e ia i Kariri, a ka tae ki nga wahi o Huria, ki tawahi atu o Horano;

2 A he rahi te hui i aru i a ia; a whakaorangia ana ratou e ia i reira.

3 Na ka haere mai nga Parihi ki a ia, ki te whakamatautau i a ia, ka mea ki a ia, He mea tika ranei kia whakarerea e te tangata tana wahine mo te tini o te mea?

4 Na ka whakahokia e ia, a ka mea ki a ratou, Kiano koutou i kite noa, i hangā raua e te Kai hanga i te timatanga he tāne, he wahine,

MATIU 19.

5 A i mea ano ia, Mo konei ka mahue i te tangata tona pāpā, tona whaea, a ka piri ki tana wahine: a hei kiko-kiko kotahi raua tokorua?

6 Na, heoi ano to raua tokoruatanga, engari kotahi ano kikokiko. Na, ko ā te Atua i hono ai, kaua e wehea e te tangata.

7 Ka mea ratou ki a ia, He aha ra a Mohi i ako ai kia hoatu he pukapuka whakarere, ka whakarere ai i a ia?

8 Ka mea ia ki a ratou, Na te pakeke o o koutou ngakau i tukua ai koutou e Mohi kia whakarere i ā koutou wāhine: i te timatanga iho ra ano ia kahore i pena.

9 A tenei taku kupu ki a koutou, Ki te whakarere tetahi i tana wahine, a ehara i te take puremu, a ka marenatia ki tetahi atu, e puremu ana ia: a ki te marena tetahi i te wahine i whakarerea, e puremu ana ia.

10 ¶ Ka mea ana akonga ki a ia, Ki te penei te tikanga mo te tangata raua ko tana wahine, ehara te marena.

11 Otira ka mea ia ki a ratou, E kore tenei kupu e rite i nga tangata katoa, engari i te hunga i hoatu ai.

12 He unaka hoki i pena i te whanautanga mai i te kopu o o ratou whaea: ko etahi unaka he mea whakaunaka na te tangata: ko etahi unaka he mea whakaunaka na ratou ano, he whakaaro hoki ki te rangatiratanga o te rangi. Ki te taea tenei te whakarite e tetahi, māna e whakarite.

13 ¶ I reira, ka kawea he tamariki nonohi ki a ia, kia whakapa ai ia i ona ringa ki a ratou, a kia inoi: a riria iho ratou e nga akonga.

14 Na, ko te kianga a Ihu, Tukua mai nga tamariki nonohi, aua hoki e araia atu to ratou haere mai ki a au: no nga penei hoki te rangatiratanga o te rangi.

15 A whakapākia iho e ia ona ringa ki a ratou, a haere atu ana i reira.

16 ¶ Na, ko te haerenga mai o tetahi, ka mea ki a ia, E te Kai whakaako pai, he aha te mahi pai maku, e whiwhi ai ahau ki te ora tonu?

17 Na, ko tana meatanga ki a ia, He aha ahau i kiia ai e koe he pai? kahore tetahi i pai, kotahi anake, ko te Atua: ki te mea koe kia tomo ki te ora, whakaritea nga ture.

18 Ka mea ia ki a ia, Ehea? Na, ka mea a Ihu, Kaua e patu tangata, Kaua e puremu, Kaua e tahae, Kaua e whakapae teka,

19 Whakahonoretia tou pāpā me tou whaea: me tenei, Kia aroha ki tou hoa tata anō ko koe.

20 Ka mea taua taitama ki a ia, Kua rite i a au enei mea katoa no toku tamarikitanga: tena hoki tetahi mea e hapa ana i a au?

21 Ka mea a Ihu ki a ia, Ki te mea koe kia tino tika, haere, hokoa ou taonga, ka hoatu ki nga rawa-kore, a e whai taonga koe ki te rangi: a haere mai i muri i a au.

22 Na ka rongo taua taita-

mariki i taua kupu, haere pouri ana ia: he maha hoki ona taonga.

23 ¶ Ka mea a Ihu ki ana akonga, He pono taku kupu ki a koutou, E tapoko whakauaua te tangata taonga ki te rangatiratanga o te rangi.

24 Tenei ano taku kupu ki a koutou, Erangi te haere o te kamera ra te kowhao o te ngira he mea takoto noa, he whakauaua rawa ia te haere o te tangata taonga ki roto ki te rangatiratanga o te Atua.

25 Ano ka rongo ana akonga, rahi rawa to ratou miharo, ka mea, Ko wai ra e ora?

26 Na ka titiro mai a Ihu, ka mea ki a ratou, Ki te tangata e kore tenei e taea; ki te Atua ia e taea nga mea katoa.

27 Katahi ka whakahokia e Pita, a ka mea ki a ia, Na, kua mahue nei i a matou nga mea katoa, kua aru nei i a koe; he aha ra ma matou?

28 Na ka ki a Ihu ki a ratou, He pono taku e mea nei ki a koutou, Ko koutou i aru nei i a au, ka taea te whanautanga houtanga, te wa e noho ai te Tama a te tangata ki runga ki te torona o tona kororia, ka noho ano koutou ki runga ki etahi torona kotahi tekau ma rua, ki te whakawa i nga iwi kotahi tekau ma rua o Iharaira.

29 A ki te mea kua mahue i tetahi he whare, he teina, he tuahine ranei, he pāpā, he whaea, he wahine, he tamariiki, he māra, he whakaaro hoki nāna ki toku ingoa, ka

tātaki rau nga mea e riro i a ia, a e whiwhi ano ia ki te oranga mutunga kore.

30 He tokomaha ia o mua e waiho ki muri; a ko o muri ki mua.

UPOKO 20.

Mana e hoatu tana e pai ai.

17 *Mate mona.* 20 *Patu i te whakakake o Hoani ma.*

29 *Nga matapo.*

TA te mea e rite ana te rangatiratanga o te rangi ki tetahi rangatira whare i haere i te atatu ki te korero kai mahi mo tana māra waina.

2 Ano ka oti te whakarite ki nga kai mahi, kia kotahi ra he pene, tonoa ana ratou e ia ki tana māra waina.

3 A, tona haerenga atu i te toru o nga haora, ka kite i etahi atu e tu mangere ana i te kāinga hoko,

4 A ka mea ki a ratou, Haere hoki koutou ki te māra waina, a ka hoatu e ahau ki a koutou te mea e tika ana. Na, haere ana ratou.

5 I haere ano ia i te ono, i te iwa o nga haora, a pera ana ano.

6 I te tekau ma tahi o nga haora ka haere atu ano ia, ka kite i etahi atu e tu mangere ana, a ka mea ki a ratou, He aha ta koutou e tu mangere i konei i te ra roa nei?

7 Ka mea ratou ki a ia, No te mea ra kahore he tangata i korero i a matou *ki te mahi*. Ka mea ia ki a ratou, Haere ano koutou ki te māra waina; a ka riro i a koutou te mea e tika ana.

MATIU 20.

8 Ano ka ahiahi, ka mea te rangatira o te māra waina ki tana kai whakahaubau, Karangatia nga kai mahi, utua hoki ratou, hei o muri timata ai puta noa ki o mua.

9 A, te taenga mai o te hunga i *korerotia* i te tekau ma tahi o nga haora, kotahi te pene i riro i tetahi, i tetahi.

10 Ka tae mai o mua, hua noa ratou tera atu te mea e riro i a ratou; heoi kotahi ano te pene i riro i tetahi, i tetahi.

11 Ano ka riro i a ratou, ka amuamu ki taua rangatira whare,

12 Ka mea, Kotahi te haora i mahi ai enei o muri, a ka oti ratou te whakarite ki a matou, ki te hunga i pehia nei e te taimaha, e te tikākātanga o te ra.

13 A ka whakahokia e ia, ka mea ki tetahi o ratou, E hoa, kahore aku hē ki a koe: kihai koe i whakarite ki a au me pene?

14 Tangohia tau, a haere: e pai ana ahau kia rite ki tau te mea e hoatu ki tenei o muri.

15 Ehara ianei i te tika kia meatia e ahau tāku e pai ai ki āku mea? E kino ana oti tou kanohi no te mea e pai ana ahau?

16 Heoi, ko o muri e meinga ki mua, ko o mua ki muri: he tokomaha hoki e karangatia ana, he ruarua ia e whiriwhiria.

17 ¶ A i a Ihu e haere ana ki Hiruharama, i a ratou i te ara, ka kawea e ia ana akonga

kotahi tekau ma rua ki tahaki, a ka mea ki a ratou,

18 Na, e haere ana tenei tatou ki Hiruharama; a ka tukua te Tama a te tangata ki nga tohunga nui, ki nga karaipi, a ka kiia ia e ratou kia mate,

19 A ka tukua ia ki nga tau-iwi kia tawaia, kia whiua, kia ripekatia: a i te toru o nga ra ka ara ake.

20 ¶ Me i reira ka tae ki a ia te whaea o nga tama a Heperi, ratou ko ana tamariki, a ka koropiko, ka inoi ki tetahi mea i a ia.

21 Na ka mea ia ki a ia, He hiahia aha tou? Ka mea ia ki a ia, Whakaaetia enei tamariki tokorua aku, kia noho, tetahi ki tou matau, tetahi ki tou mauui, i tou rangatiranga.

22 Na, ko te whakahokinga a Ihu, ka mea ia, Kahore korua e mohio ki ta korua e inoi nei. E ahei ranei korua te inu i te kapa meāke inumia e ahau, kia iriiria hoki ki te iriiringa ka iriiria nei ahau? Ka mea raua ki a ia, E ahei ano.

23 Ka mea ia ki a raua, E inu ano korua i taku kapa, e iriiria ki te iriiringa e iriiria ai ahau: ko te noho ia ki toku matau, ki toku mauui, ehara i ahau māna e hoatu, engari ka riro i te hunga i whakaritea nei e toku Matua mo ratou.

24 Ano ka rangona e te tekau, ka riri ki aua hoa tokorua.

25 Otira ka karangatia ratou e Ihu, a ka mea, E mātau

ana koutou, ko nga kawana o nga tauwi hei whakatupu rangatira ki a ratou, a ko nga tangata rarahi hei akiaki i a ratou.

26 E kore e pena i roto i a koutou: engari ki te mea tetahi kia whakatupu tangata rahi i roto i a koutou, me whakatupu kai mahi ia ma koutou;

27 A ki te mea tetahi kia whakatupu tino tangata i roto i a koutou, me whakatupu pononga ano ia ma koutou:

28 Me te Tama hoki a te tangata kihai nei i haere mai kia mahia he mea māna, engari kia mahi ia, a kia tuku i a ia kia mate hei whakautu mo nga tangata tokomaha.

29 ¶ A i a ratou e haere atu ana i Heriko, he rahi te hui i aru i a ia.

30 Na, tokorua nga matapo e noho ana i te taha o te ara: ka rongo raua ko Ihu tera e haere atu ana, ka karanga ake, ka mea, Kia aroha ki a maua, e te Ariki, e te Tama a Rawiri.

31 A i riria raua e te mano, kia noho puku: heoi rahi ake ta raua karanga, ka mea, Kia aroha ki a maua, e te Ariki, e te Tama a Rawiri.

32 Na, ka tu a Ihu, ka karanga ki a raua, ka mea, Kia ahatia korua e ahau?

33 Ka mea raua ki a ia, E te Ariki, kia kite o maua kanohi.

34 Na ka aroha a Ihu, ka pa ki o raua kanohi: a titiro tonu ake o raua kanohi, a aru ana raua i a ia.

UPOKO 21.

Kei Hiruharama. 12 Nga hokohoko i roto i te temepara. 18 Te piki. 23 Ui a nga tino tohunga. 24 Purua ake o ratou mangai. 28 Kupu mo ratou.

ANO ka tata ratou ki Hiruharama, a ka tae ki Petapaki, ki maunga Oriwa, na, tokorua nga akonga i tonoa e Ihu,

2 Ka mea ia ki a raua, Haere ki te kaininga e anga mai ana ki a korua; na ka kite tonu korua i tetahi kaihe e here ana, raua ko tana kuao: wete-kia, ka arahi mai ki a au.

3 A ki te ki tetahi tangata ki a korua; ka mea, E mea ana te Ariki ki a raua māna; na ka tukua tonutia raua e ia.

4 I meinga katoa tenei hei whakaritenga mo te kupu i korero ai te poropiti, i mea ai,

5 Mea atu ki te tamahine o Hiona, na, tou kingi e haere mai na ki a koe, he ngakau māhaki tona, e noho ana i runga i te kaihe, i te kuao hoki, i te tama a te kaihe.

6 Na, haere ana nga akonga, meatia ana ta Ihu i mea ai ki a raua,

7 Arahina mai ana te kaihe me te kuao, a, wharikitia ana o raua kakahu ki runga ki a raua, a whakanohoia ana ia ki runga.

8 A he nui rawa te hui ki te whariki i o ratou kakahu ki te ara; ko etahi i tapahi manga mai i nga rakau, a wharikitia ana ki te ara.

9 Ko nga mano i haere i

MATIU 21.

mua, me te hunga i haere i muri, kei te karanga, kei te mea, Ohana ki te Tama a Rawiri: Ka whakapaingia tenei e haere mai nei i runga i te ingoa o te Ariki; Ohana i runga rawa.

10 Ano ka tapoko ia ki Hiru-harama, ka oho katoa te pa, ka mea, Ko wai tenei?

11 Ka mea te mano, Ko Ihu tenei, ko te poropiti o Nahareta o Kariri.

12 ¶ A ka tomo a Ihu ki te temepara o te Atua, na, peia katoatia ana e ia te hunga e hoko mai ana, e hoko atu ana i roto i te temepara, a hurihia ake nga tepu a nga kai whakawhitiwhiti moni, me nga nohoanga o te hunga hoko kukupa,

13 A ka mea ki a ratou, Kua oti te tuhituhi, Ka karangatia toku whare, he whare inoi; heoi kua oti nei te mea e koutou hei ana mo nga kai pahua.

14 A i haere mai ki a ia, ki roto ki te temepara, nga matapo, me nga kopa; a whakaorangia ake ratou e ia.

15 A, te kitenga o nga tohunga nui me nga karaipi i nga mea whakamiharo i meatia e ia, me nga tamariki e karanga ana i te temepara, e mea ana, Ohana ki te Tama a Rawiri, ka riri,

16 A ka mea ki a ia, E rongorongo ana koe ki ta enei e mea nei? Ka mea a Ihu ki a ratou, Ae ra; kiano koutou i kite noa, Pumau tonu i a koe te whakamoemiti a te waha o nga kohungahunga me nga mea ngote u?

17 A ka mahue ratou i a ia, haere ana ia ki waho o te pa, ki Petani; a moe ana i reira.

18 ¶ Na, i te ata, i a ia e hoki ana ki te pa, ka hiakai ia.

19 A, tona kitenga i tetahi piki i te taha o te ara, ka haere ia ki taua *rakau*, heoi kihai i kitea tetahi mea i runga, he rau anake; ka mea ia ki te *rakau*, Kei whai hua koe a, ake ake. A maroke tonu ake te piki.

20 A, te kitenga o nga akonga, ka miharo, ka mea, Ano te hohoro o te maroke o te piki nei!

21 Na ka whakahokia e Ihu, a ka mea ki a ratou, He pono taku e mea nei ki a koutou, Me he whakapono to koutou, a e kore e ruarua, na, e kore e meatia e koutou ko te penei anake ki te piki nei, engari ahakoa mea noa koutou ki tenei maunga, Kia rangā atu koe, kia whakatakā ki te moana; ka meatia.

22 A, nga mea katoa e tono ai koutou ina inoi, ki te whakapono, kariro mai i a koutou.

23 ¶ A, ka tae ia ki roto ki te temepara, ka haere mai nga tohunga nui me nga kaumatua o te iwi, i a ia ano e ako ana, a ka mea, Tena koa te mana i meatia ai enei mea e koe? na wai hoki i hoatu tena mana ki a koe?

24 Na ka whakahokia e Ihu, a ka mea ki a ratou, Maku ano e ui ki a koutou kia kotahi kupu, ki te korerotia e koutou ki a au, maku hoki e korero ki a koutou te mana i mea ai ahau i enei mea.

MATIU 21.

25 Te iriiringa a Hoani, no hea koia? no te rangi, no nga tāngata ranei? A ka kororero ratou ki a ratou ano, ka mea, Ki te mea tatou, No te rangi; e mea mai ia ki a tatou, Ha, he aha koutou tē whakapono ai ki a ia?

26 A, ki te mea tatou, No nga tāngata; ka wehi tatou i te mano; ki ta ratou katoa hoki he poropiti a Hoani.

27 Na ka whakahokia e ratou ki a Ihu, a ka mea, Kahore matou e mohio. Na, ko tana meatanga ki a ratou, E kore ano e korerotia e ahau ki a koutou te mana i mea ai ahau i enei mea.

28 ¶ Na, e pehea ana ta koutou whakaaro? Tokorua nga tama a tetahi tangata; a ka haere ia ki to mua, ka mea, E tama, haere ki te mahi aia-nei ki taku māra waina.

29 Na ka whakahokia e ia, a ka mea, Kahore au e pai: otira i muri iho ka puta ke tona whakaaro, a haere ana.

30 A tona haerenga ki te tokorua, ka pera ano tana kupu. Na ka whakahokia mai e tera, a ka mea, E kara, *ka haere ahau*: a kihai i tae.

31 Ko wai o taua tokorua i mea i ta tona matua i pai ai? Ka mea ratou ki a ia, Ko to mua. Ka mea a Ihu ki a ratou, He pono taku e mea nei ki a koutou, Ko nga pupirikana me nga wāhine puremu e tika ana i mua i a koutou ki te rangatiratanga o te Atua.

32 I haere mai hoki a Hoani ki a koutou ra te ara o te tika, a kihai koutou i whaka-

pono ki a ia: tena ko nga pupirikana me nga wāhine puremu i whakapono ki a ia: ko koutou ia, i to koutou kitenga ai, kihai i puta ke o koutou whakaaro i muri, kihai i whakapono ki a ia.

33 Kia rongu ki tetahi atu kupu whakarite: Ki tetahi rangatira i whakato i te māra waina, a taiepatia ana, a taka noa, keria ana e ia te takahanga waina i roto, hangā ana tetahi whare tiketike, tukua ana e ia ki nga kai mahi, haere ano ia ki tawhiti:

34 Ano ka tata te po hua, ka tonoa e ia ana pononga ki nga kai mahi, ki te tiki i ona hua.

35 Na, ka mau nga kai mahi ki ana pononga, whiua ana tetahi, whakamatea ana tetahi, a akina ana tetahi ki te kohatu.

36 Na ka tonoa ano e ia etahi atu pononga, he tokomaha atu i o mua: heoi i peratia ano ratou.

37 Na, muri rawa iho, ka tonoa i tana tama ki a ratou, i mea ia, E hopohopo ratou ki taku tama.

38 A, te kitenga o nga kai mahi i te tama, ka mea ki a ratou ano, Ko te tangata tenei mona te kāinga; tena, tatou ka whakamate i a ia, ka tango i tona kāinga.

39 Na ka mau ratou ki a ia, makā ana ki waho o te māra waina, a whakamatea iho.

40 Na ka tae mai te rangatira o te māra waina, e aha ra ia ki ena kai mahi?

41 Ka mea ratou ki a ia, He nanakia rawa tana whakanga-

romanga i taua hunga nana-
kia; a ka tukua te m̄ara
waina ki etahi atu kai mahi,
ki te hunga e tukua mai ai
ki a ia nga hua i nga po hua.

42 Ka mea a Ihu ki a ratou,
Kiano koutou i kite noa i roto
i nga karaipiture, ko te kohatu
i kapea e nga kai hanga, kua
meinga tenei hei upoko mo te
kokonga: na te Ariki tenei,
he mea whakamiharo hoki ki
o tatou kanohi?

43 Koia ahau ka mea nei ki
a koutou, Ka tangohia te ra-
ngatiratanga o te Atua i a
koutou, a ka hoatu ki tetahi
iwi, no tana rangatiratanga
nei o ratou hua.

44 A ki te hinga te tangata
ki runga ki tenei kohatu, na,
mongamonga noa: ki te taka
ia tenei ki runga ki tetahi, na,
ngotangota noa ia me he pue-
hu.

45 A ka rongo nga tohunga
nui me nga Parihi ki ana
kupu whakarite, ka mohio mo
ratou ana korero.

46 Na, i a ratou e whai ana
kia hopukia ia, ka wehi i te
mano, ki ta ratou hoki he po-
ropiti ia.

UPOKO 22.

Kupu ano mo aua tohunga.

15 *Ta Hiha ma Hiha.* 23

Era atu kupu ana.

A KA oho ake a Ihu, ka
korero kupu whakarite
ano ki a ratou, ka mea,

2 Ka rite te rangatiratanga
o te rangi ki tetahi kingi, i
whakatakoto marena mo tana
tama,

3 A tonoa ana āna pononga,

hei karanga i te hunga i ko-
rerotia ki te marenatanga:
heoi, kihai ratou i pai ki te
haere.

4 Ka tonono ano ia i era atu
pononga, ka mea, Mea atu ki
te hunga i korerotia, Na, kua
rite taku tina; kua oti aku
puru, aku mea momona te
patu, a kua rite katoa nga
mea: haere mai ki te mare-
natanga.

5 Otira i paopaongia e ratou,
haere ana ko tetahi ki tana
māra, ko tetahi ki tana hoko-
hoko.

6 Na hopukina ana āna po-
nonga e nga mea i mahue,
whakatupukinotia iho ratou,
a whakamatea iho.

7 Na, te rongonga o taua
kingi, ka riri: a tonoa atu ana
āna taua, whakangaromia ana
taua hunga kohuru, a tahuna
ana to ratou pa.

8 Katahi ia ka mea ki ana
pononga, E rite ana te mare-
natanga, ko te hunga ia i ka-
rangatia kihai i pai.

9 Haere ra koutou ki nga
pekanga o nga ara, a tonoa
mai ki te marenatanga te
hunga katoa e kite ai koutou.

10 Na ka haere aua pononga
ki nga ara, a huihuia katoatia
mai ana te hunga i kitea e
ratou, te hunga kino, te hunga
pai: na ka kiki te marenata-
nga i nga manuhiri.

11 A, te tapokoranga o te
kingi kia kite i nga manuhiri,
ka kitea e ia i reira he tangata
kahore nei ona kakahu ma-
rena:

12 A ka mea ki a ia, E hoa,
he aha koe i tomo ai ki konei

kahore nei hoki ou kahu marena? Heoi kihai ia i kuihi.

13 Na ka mea te kingi ki nga kai mahi, Herea ona ringa, ona waewae, kawea atu, makā ki te pouri i waho rawa; ko te wahi tera o te tangi me te teteatanga o nga niho.

14 He tokomaha hoki e karangatia ana, he ruarua ia e whiriwhiria.

15 ¶ Me i reira ka haere nga Parihi, ka runanga ki te pehea e mau ai tetahi kupu āna.

16 A ka tonoa mai ki a ia ā ratou akonga, me nga tāngata whaka-Herora, hei mea, E te Kai whakaako, e mātau ana matou he kupu pono tau, a e whakaako ana koe i te ara o te Atua i runga i te pono, e kore ano ta te tangata e whakaaroa e koe: e kore nei hoki koe e titiro ki te kanohi tangata.

17 Tena, korerotia ki a matou, E pehea ana tou whakaro? He mea tika ranei te hoatu takoha ki a Hiha, auaka ranei?

18 Otiia i mohio a Ihu ki to ratou whakaro kino, a ka mea, He aha ta koutou e whakamatautau na i a au, e te hunga tinihanga?

19 Tena koa, kia kite ahau i te moni takoha. A mauria mai ana e ratou ki a ia he pene.

20 Na ka mea ia ki a ratou, No wai tenei ahua me te tuhihinga?

21 Ka mea ratou ki a ia, No Hiha. Katahi ia ka mea ki a ratou, Hoatu ki a Hiha nga

mea ā Hiha; ki te Atua ano nga mea ā te Atua.

22 A ka rongo ratou, ka miharo; a mahue ake ia i a ratou, a haere ana.

23 ¶ I taua ra ka haere mai ki a ia nga Haruki, e mea nei kahore he aranga, ka ui ki a ia,

24 Ka mea, E te Kai whakaako, i mea a Mohi, Ki te mate te tangata, a kahore āna tamariki, ma tona teina e marena tana wahine, e whakaputu ake he uri mo tona tuakana.

25 Na, tokowhitu taua whanau i a matou, he tuakana, he teina: te marenatanga o te tuatahi, ka mate, a hore ona uri, waiho iho tana wahine ma tona teina.

26 Me te tokorua ano, me te tokotoru, puta noa i te tokowhitu.

27 A, muri iho i a ratou katoa ka mate ano te wahine.

28 Na, i te aranga, ma wai o te tokowhitu te wahine? i a ratou katoa nei hoki ia.

29 Na, ka whakahokia e Ihu, a ka mea ki a ratou, E hē ana koutou, tē mohio ki nga karaipiture, ki te kaha ano o te Atua.

30 I te aranga hoki e kore ratou e marena, e kore ano e hoatu kia marenatia, engari ka rite ki nga anahera a te Atua i te rangi.

31 Na, te aranga o te hunga mate, kahore ano koutou i kite i ta te Atua i korero ai ki a koutou, i mea ai,

32 Ko ahau te Atua o Ape-rahama, te Atua o Ihaka, te

Atua o Hakopa? ehara te Atua i te Atua no te hunga mate, engari no te hunga ora.

33 Ano ka rongo te mano, ka miharo ki tana ako.

34 ¶ Na, te rongonga o nga Parihi, kua kopi i a ia te mangai o nga Haruki, ka whakamine tahi ratou.

35 Na ka ui tetahi o ratou, he kai ako i te ture, ka whakamatautau i a ia, ka mea,

36 E te Kai whakaako, ko tehea te kupu nui o te ture?

37 Ka mea a Ihu ki a ia, Kia whakapaua tou ngakau, tou wairua, tou hinengaro, ki te aroha ki te Ariki, ki tou Atua.

38 Ko te tuatahi tenei, ko te kupu nui.

39 E rite ana ano te tuarua ki tenei, Kia aroha koe ki tou hoa tata, ano ko koe.

40 Kei runga i enei kupu e rua e iri ana te ture katoa me nga poropiti.

41 ¶ A, i nga Parihi e noho huihui ana, ka ui a Ihu ki a ratou,

42 Ka mea, E pehea ana o koutou whakaaro ki a te Karaiti? Na wai ia tama? Ka mea ratou ki a ia, Na Rawiri.

43 Ka mea ia ki a ratou, Na te aha ra a Rawiri, i a ia e nohoia ana e te Wairua, i karanga ai i a ia, he Ariki? i ki hoki ia,

44 I mea te Ariki ki toku Ariki, hei toku matau koe noho ai, kia meinga ra ano e ahau ou hoa riri hei turanga waewae mou.

45 Na ka karangatia nei ia e Rawiri he Ariki, a na te aha i tama ai ki a ia?

46 A, hore he tangata i ahei te whakahoki kupu ki a ia, kihai rawa ano tetahi i maia ki te ui ki a ia i taua ra iho ano.

UPOKO 23.

Mo nga Parihi. 34 Ngaramanga mo Hiruharama.

ME i reira ka korero a Ihu ki te mano, ki āna akonga ano,

2 Ka mea, Kei te nohoanga o Mohi nga karaipi ratou ko nga Parihi e noho ana:

3 Nga mea katoa e mea ai ratou hei pupuri ma koutou, puritia, mahia; kei rite ia a koutou mahi ki ā ratou mahi: ta ratou hoki he korero, kahore he mahi.

4 E hereherea ana hoki e ratou nga wahanga taimaha, he nanakia me ka pikaua, a whakawahā iho ki runga ki nga pokohiwi o nga tāngata; heoi, kahore ratou e pai kia whakakorikoria ki tetahi o o ratou maihao.

5 Ko a ratou mahi katoa e meatia ana hei matakitakinga ma nga tāngata: e whakanuia ana e ratou a ratou pairakere, e whakanuia ana ano nga taniko o o ratou kakahu;

6 Ko ta ratou e rawe ai ko nga nohoanga rangatira i nga hakari, me nga nohoanga rangatira i nga whare karakia,

7 Me nga ohatanga i nga kāinga hoko, kia karangatia ano e nga tāngata, E rapi, E rapi.

8 Otiia aua koutou e karangatia, E rapi: kotahi hoki

MATIU 23.

to koutou kai arahi, ko te Karaiti; a he tuakana, he teina koutou katoa.

9 Kaua ano *tetahi* e karangatia hei matua mo koutou i runga i te whenua: kotahi hoki to koutou Matua, ko tera i te rangi.

10 Aua ano koutou e karangatia he kai arahi: kotahi ano to koutou kai arahi, ko te Karaiti.

11 Ko te nui rawa hoki o koutou, hei kai mahi ia ma koutou.

12 Ki te whakahira hoki tetahi i a ia, ka whakaititia; a ki te whakaiti tetahi i a ia, ka whakahirangia.

13 Aue, te mate mo koutou, e nga karaipi, e nga Parihi, e te hunga tinihanga! e paia ana hoki e koutou te rangatiratanga o te rangi ki te aroaro o nga tångata: kahore koutou e tomo, kahore ano e tukua te hunga e tomo ana kia tapoko atu.

14 Aue, te mate mo koutou, e nga karaipi, e nga Parihi, e te hunga tinihanga! no te mea ka pau i a koutou nga whare o nga pouaru, a e inoi roa ana, he ahua kau: mo reira he nui rawa te hē e tau ki a koutou.

15 Aue, te mate mo koutou, e nga karaipi, e nga Parihi, e te hunga tinihanga! e taia-whiotia ana hoki e koutou te moana me te whenua, whakaporohiraiti ai i tetahi, ano ka riro mai, ka meinga ia e koutou hei tamaiti mo Kehena *kino* noa atu i a koutou.

16 Aue, te mate mo koutou,

e nga kai arahi matapo, e mea nei, Ki te oatitia te whare tapu e tetahi, he mea noa ano; otira ki te oatitia e tetahi te koura o te whare tapu, ka mau tana!

17 E nga kuare, e nga matapo: ko tehea te mea nui, ko te koura, ko te whare tapu ranei i tapu ai te koura?

18 Me tenei, ki te oatitia e tetahi te āta, he mea noa ano: otira ki te oatitia te whakahere i runga i te āta, ka mau tana.

19 E nga kuare, e nga matapo, ko tehea te mea nui, ko te whakahere, ko te āta ranei i tapu ai te whakahere?

20 Na, ki te oatitia e tetahi te āta, e oatitia ana e ia tera mea, me nga mea katoa i runga.

21 Ki te oatitia e tetahi te whare tapu, e oatitia ana e ia tera mea, me te kai noho o roto.

22 Ki te oatitia hoki e tetahi te rangi, e oatitia ana e ia te tōrona o te Atua, me te kai noho o runga.

23 Aue, te mate mo koutou, e nga karaipi, e nga Parihi, e te hunga tinihanga! e hoatu ana hoki e koutou te wahi whakatekau o te miniti, o te anihi, o te kumine, a kapea ake nga mea nui o te ture, te whakawa, te tohu *tangata*, te whakapono: e tika ana ano kia meatia enci, a kia kaua era e kapea.

24 E nga kai arahi matapo, e tātari nei i te waeroa, a horongia ake te kamera.

25 Aue, te mate mo koutou, e nga karaipi, e nga Parihi, e

te hunga tinihanga! e horoi nei i waho o te kapa, o te pereti, ko roto ia e ki ana i te pahua, i te taikaha.

26 E te Parihi matapo, mātua horoia a roto o te kapa, o te pereti, kia ma ai hoki a waho o aua mea.

27 Aue, te mate mo koutou, e nga karaipi, e nga Parihi, e te hunga tinihanga! e rite ana hoki koutou ki nga urupa kua oti te pani ki te paru ma, he mea ataahua nei a waho ki te titiro atu, ko roto ia ki tonu i nga iwi tupāpaku me nga mea poke katoa.

28 Me koutou ano, ko waho te tika ana ki ta te tangata titiro, ko roto ia e ki ana i te tinihanga, i te kino.

29 Aue, te mate mo koutou, e nga karaipi, e nga Parihi, e te hunga tinihanga! ko koutou nei hoki hei hanga i nga tanumanga o nga poropiti, hei whakapaipai i nga urupa o nga tāngata tika,

30 Me te ki ano, Me i nga ratatou o o tatou mātua, kihai tatou i uru tahi me ratou ki te *whakaheke* i te toto o nga poropiti.

31 Na ka whakaatu nei koutou i a koutou ano, ko koutou nga tamariki a te hunga nana i patu nga poropiti.

32 Tena ra, kia ki i a koutou te mehua a o koutou mātua.

33 E nga neke, e te uri nakahi, me aha ka rere ai koutou i te ki tuku ki te reinga?

34 ¶ Na, tenei au te tono nei i nga poropiti ki a koutou, i nga tāngata mahara, me nga karaipi: a ko etahi o ratou e

whakamatea e koutou, e ripekatia; ko etahi o ratou e whiua i roto i o koutou whare karakia, e whāia hoki i tetahi pa ki tetahi pa:

35 A ka utaina ki a koutou nga toto katoa o te hunga tika i whakahekea ki te whenua, no te toto o Aperā, o te tāngata tika, a tae noa ki te toto o Hakaraia, o te tama a Parakaia, i kohurutia e koutou i te takiwa o te whare tapu, o te āta.

36 He pono taku e mea nei ki a koutou, Tera e pa enei mea katoa ki tenei whakaturanga.

37 E Hiruharama, e Hiruharama, e whakamate nei i nga poropiti, e aki nei ki te kamaka i te hunga e tonoa ana ki a koe, ano te tini o aku meatanga kia whakaminea o tamariki, kia peratia me te heihei e whakamine nei i ana pi ki raro i ona parirau, a kihai koutou i pai!

38 Na ka mahue ki a koutou to koutou whare kia takoto noa ana.

39 Ko taku kupu hoki tenei ki a koutou, E kore koutou e kite i a au a mua ake nei, kia mea ra ano koutou, Ka whakapaingia ia e haere mai ana i runga i te ingoa o te Ariki.

UPOKO 24.

Mo te temepara. 3 Tona haerenga mai, me nga tohu. 44 Kei rokohina kuaretia.

A TE putanga o Ihu ki, waho, ka haere atu i te temepara: a ka haere ana akonga kia whakakitea ki a ia

MATIU 24.

nga whare i hangā mo te temepara.

2 Na ka mea a Ihu ki a ratou, Kahore ianei koutou e kite i enei mea katoa? He pono taku e mea nei ki a koutou, E kore e toe ki konei tetahi kohatu ki runga ki tetahi kohatu, engari ka whakahoroa katoatia.

3 ¶ A, i a ia e noho ana i runga i maunga Oriwa, ka haere puku nga akonga ki a ia, ka mea, Korerotia ki a matou, ko a hea enei mea? he aha hoki te tohu o tou haerenga mai, o te mutunga hoki o te ao?

4 Na ka whakahokia e Ihu, a ka mea ki a ratou, Kia tupato kei mamingatia koutou e te tangata.

5 He tokomaha hoki e haere mai i runga i toku ingoa, e mea, Ko te Karaiti ahau, a he tokomaha e mamingatia.

6 A e rongo ano koutou ki nga pakanga, ki nga rongo pakanga: kia tupato kei ohore koutou: ta te mea kua takoto he putanga mo enei mea katoa, taihoa ia te mutunga.

7 E whakatika hoki tetahi iwi ki tetahi iwi, tetahi rangatiratanga hoki ki tetahi rangatiratanga: a e puta nga po mate kai, me nga mate uruta, me nga ru, ki te tini o te wahi.

8 Otia ko te timatanga enei katoa o nga mamae.

9 Ko reira koutou tukua ai kia tukinotia, a e whakamatea koutou; e whakakinongia e nga iwi katoa, he whakaaro hoki ki toku ingoa.

10 Ko reira ano he tokomaha e hē, a ka tuku etahi i etahi, ka kino ano etahi ki etahi.

11 He tokomaha ano nga poropiti teka e whakatika, a he tokomaha e mamingatia e ratou.

12 A, i te kino ka hua, ka matoke haere te aroha o te tokomaha.

13 Ko te tangata ia e u ana, a taea noatia te mutunga, ka ora ia.

14 A e kauwhautia tenei rongo pai o te rangatiratanga, puta noa i te ao, hei mea whakaatu ki nga iwi katoa; a ko reira puta ai te mutunga.

15 A e kite koutou i te mea whakarihariha, i te mea whakangaro, i ta Raniera poropiti i korero ai, e tu ana i te wahi tapu, (kia matau te kai titiro pukapuka:)

16 Ko reira kia rere te hunga i Huria ki nga maunga:

17 Te tangata i runga i te whare, kei heke iho ki te tiki mea i roto i tona whare:

18 Kauaka ano te tangata i te māra e hoki ki te tiki i ona kakahu.

19 Aue, te mate mo te hunga e hapū ana, mo nga mea hoki e whangai ana ki te u, i aua ra!

20 Me inoi koutou kei rokohanga koutou e te whati i te hotoke, i te hapati ranei:

21 No te mea ka nui te whakapawera o reira, he mea kahore ona rite o te timatanga ra ano o te ao, a mohoa noa nei, e kore ano e pera e takoto ake nei.

22 A, me i kahore aua ra i

MATIU 24.

poroa i waenga, hore he kiko-kiko e ora: otira ka whakaroa te hunga i whiriwhiria, a ka poroa aua ra.

23 Ki te mea tetahi ki a koutou i reira, Na, tenei a te Karaiti; na, tera; aua e whakaponohia.

24 E whakatika hoki nga Karaiti teka, me nga poropiti teka, a ka hoatu e ratou nga tohu nunui, me nga mea whakamiharo; a me he mea e taea, ka mamingatia ano te hunga i whiriwhiria.

25 Na kua korerotia wawetia nei e ahau ki a koutou.

26 Na, ahakoa mea ratou ki a koutou, Na, kei te korahia; aua e haere atu: Na, kei nga ruma o roto rawa; aua e whakaponohia.

27 Ka rite hoki ki te uira e puta mai nei i te rawhiti, a hiko tonu atu ki te uru, te haerenga mai o te Tama a te tangata.

28 Ko te wahi hoki i te tupāpaku, ko reira ano huihui ai nga kahu.

29 A, muri tonu iho i te whakapawera i aua ra ka whakapouritia te ra, e kore ano e titi te atarau, ka taka iho nga whetū i te rangi, a ka ngauene nga mea kaha o nga rangi:

30 Ko reira ano puta ai te tohu o te Tama a te tangata i te rangi: a ko reira nga iwi katoa o te whenua tangi ai, a e kite ratou i te Tama a te tangata e haere mai ana i runga i nga kapua o te rangi me te kaha, me te kororia nui.

31 A e tonoa e ia ana ana-

hera me te tētere tangi nui, a ka huihuia e ratou āna i whiriwhiri ai i nga hau e wha, i etahi pito o te rangi puta noa i etahi pito.

32 Na, kia akona koutou e te piki ki tetahi kupu whakarite; I tona manga e ngawari ana ano, a e puta ana nga rau, ka mohio koutou ka tata te raumati:

33 Waihoki ko koutou, ina kite i enei mea katoa, ka mātau ka tata, kei nga kuwaha.

34 He pono taku e mea nei ki a koutou, E kore rawa tenei whakatupuranga e pahemo, kia puta katoa ra ano enei mea.

35 Ko te rangi me te whenua e pahemo, ko aku kupu ia, e kore e pahemo.

36 Otira kahore tetahi tangata e mohio ki taua ra, ki taua haora, kahore nga anahera o te rangi, ko toku Matua anake.

37 Ka rite hoki ki nga ra i a Noa te haerenga mai o te Tama a te tangata.

38 Ka rite hoki ki ta ratou i nga ra i mua atu o te wai-puke; e kai ana, e inu ana, e marena ana, e hoatu ana kia marenatia, a tae noa ki te ra i tomo ai a Noa ki roto ki te āka,

39 A kahore ratou i mohio, a, pakaru noa te wai-puke, a kahakina katoatia ana ratou; e pera ano te haerenga mai o te Tama a te tangata.

40 I taua wa tokorua ki te mārā; kotahi e tangohia, kotahi e waiho.

41 Tokorua wāhine e huri

ana i te mira; kotahi e tangohia, kotahi e waiho.

42 Kia mataara rapea: e kore hoki koutou e mohio ki te haora e puta mai ai to koutou Ariki.

43 Kia mohio ki tenei, me i mātau te tangata o te whare ki te mataaratanga e puta mai ai te tahae, kua mataara ia, a kahore i tukua tona whare kia pokaia.

44 ¶ Na kia tatanga ano koutou: no te mea ka puta mai te Tama a te tangata i te haora e kore ai koutou e mahara.

45 Ko wai ra te pononga pono, mahara, i meinga e tona ariki hei rangatira mo ana tāngata, hei hoatu i te kai ma ratou i te wa e tika ai?

46 Ka koa taua pononga e rokohanga e tona ariki, ina haere mai, e pera ana.

47 He pono taku e mea nei ki a koutou, Ka meinga ia hei rangatira mo ona taonga katoa.

48 Otira ki te mea taua pononga kino i roto i tona ngakau, Ka roa te putanga mai o toku ariki;

49 A ka anga, ka patu i ona hoa pononga, ka kai, ka inu tahi me te hunga haurangi;

50 E tae mai te ariki o taua pononga i te ra e kore ai ia e mahara, i te haora e kore ai ia e mohio,

51 A ka hatepea putia ia, ka meinga mona wahi i roto i te hunga tinihanga: ko te wahi tera o te tangi me te teteatanga o nga niho.

UPOKO 25.

Kia mataara. 14 Kei mangere. 31 Ra whakawa.

NA ka rite te rangatira-tanga o te rangi ki nga wahina kotahi tekau, i mau i a ratou rama, a haere ana ki te whakatau i te tāne marena hou;

2 Tokorima o ratou he mahara, tokorima he kuare.

3 Nga kuare, i mau i a ratou rama, a kihai i mauria he hinu:

4 Te hunga mahara ia, i mau hinu atu i roto i a ratou ipu me a ratou rama.

5 Ka whakaroa te tāne marena hou, ka tunewha ratou katoa, ka moe.

6 A, i waenganui po, ka pa te karanga, E, ka puta te tāne marena hou! haere ki te whakatau i a ia.

7 Katahi ka ara katoa aua wahina, ka whakapai i a ratou rama.

8 Na ka mea te hunga kuare ki te hunga mahara, Homai ki a matou tetahi wahi o ta koutou hinu: kua pirau hoki a matou rama.

9 Na, ko te whakahokinga a te hunga mahara, ka mea, *Kahore*; kei kore e ranea ma matou ma koutou: engari me haere koutou ki nga kai hoko, hoko ai i *tetahi* ma koutou.

10 A, to ratou haerenga atu ki te hoko, ka tae mai te tāne marena hou; a tomo tahi ana me ia ki te marenatanga te hunga kua ata rite: a tuta-kina ana te tatau.

11 Muri iho ka tae mai era

wahina, ka mea, E te Ariki, e te Ariki, uakina ki a matou.

12 Na ka whakahokia e ia, a ka mea, He pono taku e mea nei ki a koutou, Kahore ahau e mohio ki a koutou.

13 Kia mataara rapea koutou, e kore hoki koutou e mohio ki te ra, ki te haora, e puta mai ai te Tama a te tangata.

14 ¶ E rite ana hoki ki te tangata e haere ana ki tawhiti, a karangatia ana e ia ana pononga ake, a hoatu ana ki a ratou ana taonga.

15 Ki tetahi i hoatu e ia e rima taranata, ki tetahi e rua, ki tetahi kotahi; ki ia tangata, ki ia tangata, he mea whakarite ki to ratou uaua; a haere tonu ana ia.

16 Na, ko te haerenga o te tangata i a ia nei nga taranata e rima, hokohokona ana aua mea e ia, a riro mai ana i a ia e rima atu nga taranata.

17 Pera tonu hoki te tangata i nga mea e rua; e rua atu i riro mai i a ia.

18 Te tangata ia i te mea kotahi, haere ana, kei te keri ki te whenua, a hunā ana e ia te moni a tona ariki.

19 A, roa rawa iho, ka puta te ariki o aua pononga, a ka korerotia ana moni e ratou ki a ia.

20 Na, te haerenga mai o te tangata i a ia nei nga taranata e rima, e rima atu nga taranata i mauria mai e ia, a ka mea, E te ariki, e rima au taranata i homai ai ki a au: na, e rima atu nga taranata

kua riro i a au hei tapiri mo era.

21 Ka mea tona ariki ki a ia, Pai rawa, e te pononga pai, e te pononga pono; pono tonu to mahi ki nga mea ruarua, maku koe e mea hei rangatira mo nga mea maha: uru mai koe ki te hari o tou ariki.

22 Me ia ano i a ia nei nga taranata e rua, na ka haere mai, ka mea, E te ariki, e rua au taranata i homai ai ki a au: na, e rua atu nga taranata kua riro i a au hei tapiri mo era.

23 Ka mea tona ariki ki a ia, Pai rawa, e te pononga pai, e te pononga pono; pono tonu to mahi ki nga mea ruarua, maku koe e mea hei rangatira mo nga mea maha: uru mai koe ki te hari o tou ariki.

24 Na, te haerenga mai o te tangata i a ia nei te taranata kotahi, ka mea, E te ariki, i mātau ahau ki a koe he tangata pakeke koe, e kokoti ana i te wahi kihai i ruia e koe, e kohikohi ana i te wahi kihai i whakatitaria e koe:

25 Na ka wehi ahau, a haere ana, huna ana i to taranata ki te whenua: na, tau na.

26 Na, ko te whakahokinga a tona ariki, ka mea ki a ia, Pononga kino, pononga mangere, i mātau koe e kokoti ana ahau i te wahi kihai i ruia e ahau, e kohikohi ana i te wahi kihai i whakatitaria e ahau:

27 I tika ano me i kawea e koe taku moni ki nga kai whakawhitiwhiti moni, a, ka tae

mai ahau, ka riro mai taku me *ona* hua ano.

28 Ko tenei, tangohia te taranata i a ia, hoatu ki tera i nga taranata kotahi tekau.

29 Ki te whai mea hoki tetahi, ka hoatu ano ki a ia, a ka maha atu ana: a ki te kahore he mea a tetahi, ko ana mea ake ka tangohia i a ia.

30 A makā te pononga hua kore ki te pouritanga i waho: ko te wahi tera o te tangi me te teteatanga o nga niho.

31 ¶ A te taenga mai o te Tama a te tangata me tona kororia, ratou tahi ko nga anahera tapu katoa, ko reira ia noho ai ki runga ki te torona o tona kororia:

32 A ka whakaminea ki tona aroaro nga iwi katoa: a e wehea ratou e ia etahi i etahi, ka peratia me te hepara e wehe nei i nga hipi, i nga koati:

33 A ka whakaturia e ia nga hipi ki tona matau, me nga koati ki mauī.

34 Katahi te Kingi ka mea ki te hunga i tona matau, Haere mai, e te hunga whakapai a toku Matua, nohoia te rangatiratanga kua rite noa ake mo koutou no te orokohanganga ra ano o te ao:

35 I mate hoki ahau i te hia-kai, a whangainga ana ahau e koutou: i mate wai ahau, a whakainumia ana e koutou: he manene ahau, a whakamanuhiritia ana e koutou:

36 I tu tahanga, a whakakahuria ana e koutou: he turoro, a tiroirohia ana ahau e koutou: i te whare herehere

ahau, a haere ake ana koutou ki a au.

37 Na, ko te whakahokinga a te hunga tika ki a ia, ka mea, E te Ariki, nonahea matou i kite ai i a koe e hiakai ana, a whangai ana i a koe? e mate ana ranei i te wai, a whakainu ana i a koe?

38 Nonahea matou i kite ai i a koe e manene ana, a whakamanuhiri ana i a koe? e tu tahanga ana ranei, a whakakahahu ana i a koe?

39 Nonahea hoki matou i kite ai i a koe e turoro ana, i te whare herehere ranei, a haere ana ki a koe?

40 Ko reira whakahokia ai e te Kingi, a ka mea ki a ratou, He pono taku e mea nei ki a koutou, Ko ta koutou i mea ai ki tetahi o oku teina iti rawa nei, he meatanga ia ki a au.

41 Ko reira ia ki atu ai ki te hunga i te taha ki mauī, Mawehe atu i a au, e te hunga ka oti nei te kanga, ki te ahi kā tonu, kua kā noa ake mo te rewera ratou ko ana anahera:

42 I mate hoki ahau i te hia-kai, a kihai i whangainga e koutou: i mate i te wai, a kihai i whakainumia e koutou:

43 He manene ahau, a kihai i whakamanuhiritia e koutou: i tu tahanga, a kihai i whakakahuria e koutou: he turoro ahau, i te whare herehere, a kihai koutou i tiroiro i a au.

44 Ko reira ano ratou whakahoki ai ki a ia, mea ai, E te Ariki, nonahea matou i kite

ai i a koe e mate hiakai ana, e mate wai ana, e manene ana, e tu tahanga ana, e turoro ana, i te whare herehere ranei, a kihai i mahia he mea māu?

45 Ko reira whakahokia ai e ia ki a ratou, a ka mea, He pono taku e mea nei ki a koutou. I te mea kihai nei i meatia e koutou ki tetahi o nga nonohi rawa nei, ina, kihai i meatia ki a au.

46 Na, ko enei e haere ki te utu-hara kahore nei e mutu: ko te hunga tika ia, ki te ora tonu.

UPOKO 26.

Te whakatakoto mona. 6 Te wahine i whakawahi i a ia. 17 Kapenga. 26 Hapa Tapu. 36 Kei te kari. 47 Ka whakaaturia e Hura. 57 Kei a Kaiapa. 69 Ta Pita.

A KA mutu enei kupu ka-toa a Ihu, ka mea ia ki ana akonga,

2 E matau ana koutou kia rua ake ra ko te kapenga, a ka tukua te Tama a te tangata kia ripekatia.

3 ¶ Na ka whakamine nga tohunga nui, nga karaipi, me nga kaumatua o te iwi, ki te whare o te tino tohunga, ko tona ingoa nei ko Kaiapa,

4 Ka whakatakoto korero ki tetahi tinihanga e mau ai a Ihu, e whakamatea ai.

5 I mea hoki ratou, Kanaka i te hakari, kei ngangau te iwi.

6 ¶ Na, i a Ihu i Petani, i te whare o Haimona repera,

7 Ka haere mai he wahine ki a ia me tetahi pouaka kohatu ki tonu i te hinu kakara, utu nui, a ringihia ana ki runga ki tona mātenga, i a ia e noho ana.

8 A, te kitenga o ana akonga, ka riri, ka mea, Hei aha tenei maumau?

9 He nui hoki te utu me i hokona tenei hinu kakara, na, ka hoatu ki te hunga rawakore.

10 A i mohio a Ihu, a ka mea ki a ratou, He aha ta koutou e whakapawerawera i te wahine nei? he mahi pai hoki tana i mea nei ki a au.

11 Kei a koutou tonu hoki te hunga rawakore i nga wa katoa; tena ko ahau, e kore e noho tonu i a koutou.

12 I ringihia ai hoki tenei hinu kakara ki toku tinana, he mea mo toku tanumanga.

13 He pono taku e mea nei ki a koutou, Ko nga wahi o te ao katoa e kauwhautia ai tenei rongo pai, ka korerotia ano ta tenei wahine i mea ai, hei whakamaharatanga ki a ia.

14 ¶ Katahi ka haere tetahi o te tekau ma rua, ko Hura Ikariote te ingoa, ki nga tohunga nui,

15 Ka mea, He aha ta koutou e pai ai kia homai ki a au, a maku ia e tuku ki a koutou? A e toru tekau hiriwa a ratou i whakarite ai ki a ia.

16 A no reira ake ano ia i rapu ai i te wa pai e tukua ai ia.

17 ¶ Na, i te ra tuatahi o te taro rewena-kore ka haere

MATIU 26.

mai nga akonga ki a Ihu, ka mea ki a ia, Ko hea tau e pai ai kia takā e matou te kapenga hei kai māu ?

18 Na ka mea ia, Haere ki te pa, ki ā mea, ka mea atu ki a ia, E mea ana te Kai whakaako, Ka tata toku taima ; hei a koe matou ko aku akonga mea ai i te kapenga.

19 A meatia ana e nga akonga ta Ihu i whakarite ai ki a ratou ; takā ana e ratou te kapenga.

20 A, ka ahiahi, ka noho ia me te tekau ma rua.

21 A, i a ratou e kai ana, ka mea ia, He pono taku e mea nei ki a koutou, ma tetahi o koutou ahau e tuku.

22 A pouri noa iho ratou, ka anga, ka korero takitahi ki a ia, Ko ahau ranei, e te Ariki ?

23 A ka whakahokia e ia, ka mea, Ko te tangata e toutou tahi nei o maua ringa ki te rihi, māna ahau e tuku.

24 E haere ana hoki te Tama a te tangata, e pera ana me temeai tuhituhia mona : otiia, aue, te mate mo te tangata e tukua ai te Tama a te tangata ! he pai mo taua tangata me i kaua ia e whanau.

25 Katahi a Hura, tona kai tuku, ka oho mai, ka mea, E te Kai whakaako, ko ahau ranei ? Ano ra ko ia ki a ia, Kua korerotia mai na e koe.

26 ¶ A, i a ratou e kai ana, ka mau a Ihu ki te taro, a ka mutu te whakapai, ka wha-whati, na ka homai ki nga akonga, ka mea, Tangohia, kainga ; ko toku tinana tenei.

27 Na ka mau ia ki te kapa,

a, ka mutu te whakawhetai, ka homai ki a ratou, ka mea, Inumia tetahi wahi o tenei e koutou katoa ;

28 Ko oku toto hoki tenei, ko o te kawenata hou, e whakahekea ana mo te tini, hei murunga hara.

29 Na, ko taku kupu tenei ki a koutou, E kore ahau e inu i tenei hua o te waina a mua ake nei, kia taea ra ano taua ra e inumia houtia ai e tatou i te rangatiratanga o toku Matua.

30 Ano ka mutu ta ratou himene, ka haere ki maunga Oriwa.

31 ¶ Katahi a Ihu ka mea ki a ratou, Ka hē katoa koutou ki a au i tenei po : kua oti hoki te tuhituhi, Ka patua e ahau te hepara, a ka whakamararatia nga hipi o te kahui.

32 Otira, muri iho i toku aranga mai, ka haere ahau i mua i a koutou ki Kariri.

33 Na ka whakahokia e Pita, a ka mea ki a ia, Ahakoa hē noa te katoa ki a koe, e kore rawa ahau e hē.

34 Ka mea a Ihu ki a ia, He pono taku e mea nei ki a koe, Ko tenei po ano, i te mea kahore ano i tangi noa te tikao-kao, ka toru āu whakakahoretanga ki a au.

35 Ka mea a Pita ki a ia, Ahakoa kua takoto te tikanga kia mate tahi taua, e kore ahau e whakakahore ki a koe. I pera ano te ki a nga akonga katoa.

36 ¶ Katahi ka haere ratou ko Ihu ki tetahi wahi, tona ingoa nei ko Kehemane, a ka mea

MATIU 26.

ia ki nga akonga, Hei konei koutou noho ai, kia haere ahau ki koina inoi ai.

37 Na ka mau ia ki a Pita ratou ko nga tamariki tokorua a Heperi, a ka timata te pouri, te tumatatenga.

38 Na ka mea ia ki a ratou, Karapotu pu toku wairua i te pouri, tata pu ki te mate: hei konei koutou noho ai, kia mataara tahi tatou.

39 A haere ana ia ki pahaki tata atu, takoto tapapa ana, ka inoi, ka mea, E toku Matua, ki te mea e ahei, kia pahemo atu tenei kapa i a au: otira kua e waiho i taku e pai ai, engari i tau.

40 A ka haere mai ia ki nga akonga, rokohanga mai e moe ana, na ka mea ia ki a Pita, Ha, ko ta koutou tenei? te mataara tahi tatou kia kotahi haora?

41 Kia mataara me te inoi, kei uru ki te whakamatautau-ranga. E hihiko ana te wairua, ko te kikokiko ia e ngoi-kore ana.

42 Ka haere atu ano ia, ko te rua o ona hokinga, ka inoi, ka mea, E toku Matua, ki te kore e ahei kia pahemo atu tenei kapa i a au, a me inu ano e ahau, waiho ano i tau i pai ai.

43 A, tona haerenga mai, na, rokohanga mai e moe ana ano ratou; i taimaha hoki o ratou kanohi.

44 Na ka waiho ano ratou e ia, a haere ana ano, ka inoi, ko te toru o nga inoinga, me te whakahua ano i taua kupu ano.

45 Katahi ia ka haere mai ki ana akonga, ka mea ki a ratou, Moe tonu, takoto marie: na, ka tata te haora, a ka tukua te Tama a te tangata ki nga ringa o te hunga hara.

46 Maranga, ka haere tatou: nana, ka tata te kai tuku i a au.

47 ¶ A, i a ia ano e korero ana, na ka tae mai a Hura, tetahi o te tekau ma rua, he tini hoki nga tangata i a ia, me nga hoari, me nga patu, he mea tonu mai na nga tohunga nui, na nga kaumatua o te iwi.

48 Kua oti hoki tetahi tohu te whakarite ki a ratou e tona kai tuku, i mea ia, Na, taku tangata e kihi ai, ko ia tena: hopukia.

49 Na, tika tonu ia ki a Ihu, ka mea, Tena koe, e te Kai whakaako; a kihi ana i a ia.

50 Na ka mea a Ihu ki a ia, E hoa, i haere mai koe ki te aha? Me i reira ka haere mairatou, ka pa o ratou ringa ki a Ihu, a hopukia ana ia.

51 Na ka totoro te ringa o tetahi o nga hoa o Ihu, a unuhia ana tana hoari, na hāua iho te pononga o te tino tohunga, tapahia ana tona taranga.

52 Katahi ka mea a Ihu ki a ia, Whakahokia iho to hoari ki tona pukoro: ka mate hoki i te hoari te hunga hapai hoari.

53 E hua koe e kore e ahei i a au aianei te inoi ki toku Matua, a maha atu i nga rihiona anahera kotahi tekau

MATIU 26.

ma rua āna e homai ai ki a au?

54 Nei ra, ma te aha ka rite ai ta nga karaipiture, ara, ko tenei kia meatia?

55 I taua wa ka mea a Ihu ki nga mano, He tahae *ahau* i haere mai ai koutou me nga hoari me nga patu ki te hopu i a au? i a koutou ahau e noho ana i te temepara, e ako ana i tena ra, i tena ra, a kihai koutou i hopu i a au.

56 Na, i meatia katoatia tenei hei whakaritenga mo nga karaipiture a nga poropiti. Na ka whakarere nga akonga katoa i a ia, a oma ana.

57 ¶ Katahi ka kawea a Ihu e nga kai hopu ki a Kaiapa, ki te tino tohunga, kei reira hoki nga karaipi me nga kau-mātua e huihui ana.

58 A i aru a Pita i a ia i tawhiti ki te whare o te tino tohunga, a tomo ana ki roto, noho tahi ana me nga kai mahi, kia kite i te mutunga.

59 Na ka rapu nga tohunga nui, me nga kau-mātua, me te runanga katoa, ki te whakapae teka mo Ihu, kia mate ai ia:

60 Heoi kihai i kitea: he tokomaha hoki nga kai whakapae teka i haere mai, a kihai i kitea. Muri iho ka puta mai nga kai whakapae teka tokorua,

61 A ka mea, I mea ia, E taea e ahau te whakahoro te whare tapu o te Atua, a kia toru nga ra ka oti i a au te hanga.

62 Na ka whakatika te tino tohunga, ka mea ki a ia, Ka-

hore āu kupu? he aha ta enei e whakaatu nei mou?

63 Heoi kihai a Ihu i kuihi. No ka ki mai ano te tino tohunga, ka mea ki a ia, Ko te Atua ora taku whakaoati mou, na, korero mai ki a matou, ko te Karaiti ranei koe, ko te Tama a te Atua?

64 Ka mea a Ihu ki a ia, Kua korerotia mai na e koe: tenei ano taku kupu ki a koutou, Tenei ake ka kite koutou i te Tama a te tangata e noho ana ki matau o te kaha, e haere mai ana i runga i nga kapua o te rangi.

65 Katahi ka haehae te tino tohunga i ona kakahu, ka mea, Kua kohukohu; hei aha atu ma tatou nga kai whakaatu? Na kua rongo nei koutou i tana kohukohu.

66 E pehea ana a koutou whakaaro? Na ka whakahokia e ratou, ka mea, Ka tika kia mate.

67 Na ka tuwhaina tona mata e ratou, ka kurua ia; a ko etahi i papaki i a ia,

68 I mea, Poropiti ki a matou, e te Karaiti, Na wai koe i papaki?

69 ¶ Na, i waho a Pita e noho ana, i te marae: a ka haere mai tetahi kotiro ki a ia, ka mea, Ko koe hoki i a Ihu o Kariri.

70 Otira ka whakakahore ia i te aroaro o ratou katoa, ka mea, Kahore ahau e mohio ki tāu e ki mai na.

71 A ka riro atu ia ki waho, ki te whakamahau, ka kite ano tetahi atu kotiro i a ia, a mea ana ki te hunga i rei-

MATIU 26, 27.

ra, I a Ihu o Nahareta ano tenei.

72 A ka whakakahore ano ia, me te oati ano, Kahore ahau e mohio ki tena tangata.

73 A, muri tata iho, ka haere mai te hunga e tu mai ana, ka mea ki a Pita, Koia ano, no ratou ano koe; na tou reo hoki koe i kitea ai.

74 Katahi ia ka timata te kanga, te oati, Kahore ra ahau e mohio ki tena tangata. A tangi tonu iho te tikaokao.

75 Na ka mahara a Pita ki ta Ihu kupu i mea ai ki a ia, E kore e tangi te tikaokao, ka toru āu whakakahoretanga ki a au. Na haere ana ia ki waho, a nui atu tana tangi.

UPOKO 27.

Kei a Pirato. 3 Taronatanga o Hura. 19 Ta te wahine a Pirato. 24 Ta Pirato mo te Karaiti. 26 Parapa. 29 Te karauna. 31 Ripekatanga. 57 Tanumanga.

A KA takiri te ata, ka runanga nga tohunga nui katoa me nga kaumātua o te iwi mo Ihu kia whakamatea:

2 Ano ka oti ia te here, ka arahina atu, a tukua ana ki a Ponotio Pirato, ki te kawana.

3 ¶ A, te kitenga o Hura, o te kai tuku i a ia, kua whakaetia ia kia whakamatea, ka puta ke tona whakaaro, a whakahokia ana e ia nga hiriwa e toru tekau ki nga tohunga nui, ratou ko nga kaumātua,

4 Ka mea, Kua hara ahau i taku tukunga i te toto hara-

kore. A ka mea ratou, Hei aha ma matou? māu tena e titiro.

5 Na, makā iho e ia nga hiriwa ki te whare tapu, a puta ana ki waho, haere ana, tarona ana i a ia.

6 Na ka tango nga tohunga nui i nga hiriwa, ka mea, E kore e tika kia pangā enei ki te takotoranga moni, he utu toto hoki.

7 Na ka runanga ratou, a hokoa ana ki aua mea te mārā a te kai hanga rihi, hei tanumanga mo nga manene.

8 Na reira hoki i huaina ai taua mārā, Ko te mārā o te toto, a mohoa noa nei,

9 Katahi ka rite ta Heremaia poropiti i korero ai, i mea ai, Tangohia ana e ratou nga hiriwa e toru tekau, te utu mo te tangata i whakaritea nei ona utu, i whakaritea nei nga utu e etahi o nga tama a Ihairaira;

10 A hoatu ana mo te mārā a te kai hanga rihi; i pera ano me ta te Ariki i whakarite ai ki a au.

11 ¶ Na, i te tu tera a Ihu i te aroaro o te kawana: a ka ui te kawana ki a ia, ka mea, Ko koe ranei te Kingi o nga Hurai? Ka mea a Ihu ki a ia, Kua korerotia mai na e koe.

12 A, ka whakapangia he hē ki a ia e nga tohunga nui, ratou ko nga kaumātua, kihai ia i whakahoki kupu atu.

13 Katahi ka mea a Pirato ki a ia, Kahore koe e rongo i te tini o nga mea e korerotia nei e ratou mou?

14 Heoi, kahore kia kotahi te kupu i whakahokia e ia kia ia; tino miharo noate kawana.

15 Na, ko ta te kawana tikanga i taua hakari, he tuku i tetahi herehere ki te iwi, i ta ratou e pai ai.

16 A i reira ano i a ratou tetahi herehere ingoa nui, ko Parapa te ingoa.

17 Ano ra ka mine mai ratou, ka mea a Pirato ki a ratou, Ko wai ta koutou e pai ai kia tukua e ahau ki a koutou? ko Parapa, ko Ihu ranei e karangatia nei ko te Karaiti?

18 I mahara hoki ia he hae no ratou i tukua ai ia.

19 ¶ A i a ia e noho ana i runga i te nohoanga whakawa, ka tono tangata tana wahine ki a ia, ka mea, Kei ahatia e koe taua tangata tika: he maha hoki nga mea i pa moemoea mai ki a au inaianei, he mea hoki mona.

20 Otiia i whakakiiia te mano e nga tohunga nui ratou ko nga kaumatua, kia inoia a Parapa, a kia whakangaromia a Ihu.

21 Na ka whakahokia e te kawana, ka mea ia ki a ratou, Ko tehea o nga tokorua ta koutou e pai ai kia tukua e ahau ki a koutou? Ka mea ratou, Ko Parapa.

22 Ka mea a Pirato ki a ratou, Me aha oti e ahau a Ihu e karangatia nei ko te Karaiti? Ka mea ratou katoa ki a ia, Ripekatia.

23 Na ka mea te kawana, He aha koia tana kino i mea ai? Heoi nui noa atu ta ratou hamama, ka mea, Ripekatia.

24 A, te kitenga o Pirato kahore ia i whai wahi, engari ka nui atu te ngangau, ka mau ia ki te wai, ka horoi i ona ringa ki te aroaro o te mano, ka mea, Kahore ahau e whai hara ki te toto o tenei tangata tika: ma koutou tena e titiro.

25 Na ko te whakahokinga a te iwi katoa, ka mea, Hei runga ona toto i a matou, me a matou tamariki.

26 ¶ Na ka tukua e ia a Parapa ki a ratou: a ka oti a Ihu te whiu, ka tukua kia ripekatia.

27 Katahi ka mauria a Ihu e nga hoia o te kawana ki te whare whakawa, a whakaminea mai ana ki a ia te hapu katoa.

28 Na ka tangohia e ratou ona kakahu, a whakakakahuria ana ia ki te kakahu whero.

29 Ano ka oti tetahi karauna tataramoa te whiri, ka potaea ki tona mātenga, me te kakaho ki tona matau: a ka tukua nga turi ki a ia, ka taunu ki a ia, ka mea, Tena koe, e te Kingi o nga Hurai!

30 A ka tuwhaina ia, ka mau ratou ki te kakaho, a patua iho tona mātenga.

31 ¶ Na ka mutu ta ratou tawai ki a ia, ka tangohia taua kakahu, whakakakahuria ana ona ki a ia, a arahina ana ia kia ripekatia.

32 A i a ratou e haere ana ki waho, ka kitea e ratou he tangata no Hairini, ko Hairi-mona te ingoa: a meinga ana ia e ratou kia amo i tona ripeka.

33 To ratou taenga ki te wahi e karangatia nei. ko Korokota, e karangatia nei, ko te wahi angaanga,

34 Ka homai e ratou he winika ki a ia kia inumia, he mea whakananu ki te au: a, tana whakamatauranga atu, kihai i pai ki te inu.

35 A ka oti ia te ripeka, ka wehewehea ona kakahu, he mea maka ki te rota: i rite ai te kupu i korerotia e te poropiti, I wehewehea oku kakahu mo ratou, i maka rota hoki mo toku kakahu.

36 Na noho ana ratou ki te tiaki i a ia i reira.

37 A i whakanohoia ano e ratou ki runga ake i tona mātenga te mea i whakawakia ia ia, he mea tuhituhi, KO IHU TENEI, KO TE KINGI O NGA HURAI.

38 Na, tokorua ano nga tahae i ripekatia ngatahitia me ia, kotahi ki matau, kotahi ki mau.

39 A ka kohukohu ki a ia te hunga e haere ana ra reira, me te oioi o ratou mātenga,

40 Ka mea, Ko koe hei whakahoro i te whare tapu, hei hanga ano i nga ra e toru, whakaorangia koe e koe ano. Ki te mea ko te Tama koe a te Atua, heke iho i te ripeka.

41 I pena ano te tawai a nga tohunga nui, ratou ko nga karaipi, ko nga kaumatua, i mea,

42 Ko era atu i whakaorangia e ia; tē taea a ia ake te whakaora e ia. Ki te mea ko te Kingi ia o Ihairaira, kia heke iho ia aiane i te ripeka, a ka whakapono matou ki a ia.

43 I whakawhirinaki ia ki te Atua: māna ia e whakaora aiane i ki te pai ia ki a ia: i mea hoki ia, Ko te Tama ahau a te Atua.

44 Me nga tahae ano i ripekatia tahitia me ia, i pera ano ta rana tawai ki a ia.

45 Na kua pouri a runga o te whenua katoa, no te ono o nga haora a taea noatia te iwa o nga haora.

46 A ka tata ki te iwa o nga haora, ka karanga a Ihu, he nui te reo, ka mea, Eri, Eri, rama hapakatani? ara, E toku Atua, e toku Atua, he aha koe i whakarere ai i a au?

47 A, te rongonga o etahi o te hunga e tu ana i reira, ka mea, E karanga ana te tangata nei i a Iraia.

48 Na kua rere tetahi o ratou, kua mau ki te hautai, whakakiia ana ki te winika, a whakanohoia ana ki runga ki te kakaho, whakainumia ana māna.

49 Ka mea ehinu, Kāti, kia kite tatou e haere mai ranei a Iraia ki te whakaora i a ia.

50 Na ka karanga ano a Ihu, he nui te reo, a tuku atu ana i tona wairua.

51 Na, te arai o te whare tapu, kua pakaru, e rua nga wahi, o runga a puta noa ki raro; ru ana te whenua, pakaru ana nga kamaka;

52 Tuwhera noa hoki nga urupa; a he maha nga tinana i ara mai o te hunga tapu kua moe;

53 A puta ake ana i nga urupa i muri iho o tona aranga

mai, haere ana ki roto ki te pa tapu, he tokomaha hoki te hunga i kitea ai ratou.

54 Na, te kitenga o te kene-turio, me ona hoa tiaki i a Ihu, i te ru, me nga mea i meatia, nui atu to ratou wehi, ka mea, He pono ko te Tama a te Atua tenei.

55 A he tokomaha nga wā-hine i reira e matakitaki ana i tawhiti, nga mea hoki i aru i a Ihu i Kariri, i mahi mea māna :

56 I roto i a ratou a Meri Makarini, a Meri whaea o Hemi raua ko Hohi, me te whaea hoki o nga tama a Heperi.

57 ¶ A, ka ahiahi, ka haere tetahi tangata taonga nui o Arimatia, ko Hohepa te ingoa, ko ia ano he akonga na Ihu :

58 I haere ia ki a Pirato, a tonoa ana e ia te tinana o Ihu. Na ka mea a Pirato kia homai te tinana.

59 Na ka tango a Hohepa i te tinana, a takaia ana e ia ki te rinena ma,

60 A whakatakotoria ana ki tana urupa hou, i haua e ia ki roto ki te kamaka : na, whakatakā atu ana e ia tetahi kohatu nui ki te kuwaha o te urupa, a haere ana.

61 A i reira ano a Meri Makarini, me tera Meri, e noho ana i te ritenga atu o te tanumanga.

62 Na, i te aonga ake i muri i te takanga *hakari*, ka haere nga tohunga nui me nga Parihi ki a Pirato,

63 Ka mea, E mara, e mahara ana matou ki ta tera tangata tinihanga i mea ai, i

a ia ano i te ora, Kia taka nga ra e toru ka ara ahau.

64 Na whakahaua atu kia tiakina te tanumanga, a tae noa ki te toru o nga ra, kei haere atu ana akonga i te po, tahae ai i a ia, a ka mea ki te iwi, Kua ara i te hunga mate : penei kino atu i to mua to muri hē

65 Ka mea a Pirato ki a ratou, He kai tiaki ano a koutou : haere, kia puta to koutou whakaaro kei taea atu ia.

66 Na haere ana ratou, hiritia ana te kohatu, me te *whakanoho* ano i nga kai tiaki, kei taea atu te tanumanga.

UPOKO 28.

Aranga o te Karaiti. 11 *Ta nga tino tohunga.* 16 *Ka puta ki ana akonga.* 18 *Ka ngare i a ratou.*

I TE mutunga o te hapati, i te mea meāke puao te *ra* tuatahi o te wiki, ka haere a Meri Makarini me tera Meri atu kia kite i te tanumanga.

2 Na, he nui te ru i puta mai : i heke iho hoki tetahi anahera a te Ariki i te rangi, a haere mai ana, whakatakā atu ana e ia te kohatu i te kuwaha, a noho ana i runga.

3 Tona ahua, me te mea he uira, ma tonu hoki tona kakahu, anō he hukarere :

4 A wiri noa iho nga kai tiaki i te wehi ki a ia, whakaputu tupāpaku ana.

5 Na ka oho mai te anahera, ka mea ki nga wāhine, Kei wehi korua : e mātau ana hoki ahau, e rapu ana korua i a Ihu i ripekatia.

MATIU 28.

6 Kahore ia i konei: kua ara hoki, kua pera me tana i mea ai. Haere mai kia kite i te wahi i takoto ai te Ariki.

7 A hohoro te haere, kore-rotia ki ana akonga, kua ara mai ia i te hunga mate: na, tena ia te haere na i mua i a koutou ki Kariri; ko reira koutou kite ai i a ia: na, kua korero nei ahau ki a korua.

8 A hohoro tonu to raua haere mai i te urupa, wehi ana, nui atu te koa, a oma ana ki te korero kiana akonga.

9 A i a raua e haere ana ki te korero ki ana akonga, na, ko Ihu kua tutaki ki a raua, kua mea, E ia ma. Na ka haere mai raua, ka pupuri i ona waewae, a koropiko ana ki a ia.

10 Katahi a Ihu ka mea ki a raua, Aua e wehi: haere, ki atu ki oku teina kia haere ki Kariri, ko reira hoki ratou kite ai i a au.

11 ¶ A, i a raua e haere ana, na, kua tae etahi o nga kai tiaki ki te pa, kua korero ki nga tohunga nui i nga mea katoa i meatia.

12 Na, ka huihui ratou ko nga kaumātua, ka runanga, a he nui te moni i hoatu e ratou ki nga hoia,

13 I mea hoki ratou, Me ki e koutou, I haere mai ana akonga i te po, a tahaetia ana ia, i a matou e moe ana.

14 A ki te tae te rongu o tenei ki te kawana, ma matou ia e whakamarie, a kahore he manukanuka mo koutou.

15 Na ka tango ratou i nga moni, a meinga ana nga mea i akona ai ratou: heoi e korerotia ana ano tenei e nga Hurai a taea noatia tenei ra.

16 ¶ Na ka haere nga akonga tekau ma tahi ki Kariri, ki te maunga i whakaritea e Ihu ki a ratou.

17 A, to ratou kitenga i a ia, ka koropiko ki a ia: ko etahi ia i ruarua.

18 ¶ Na ka haere mai a Ihu, ka korero ki a ratou, ka mea, Kua tukua katoatia ki a au te mana o te rangi, o te whe-nua.

19 Na haere, meinga hei akonga nga iwi katoa, iriiria i runga i te ingoa o te Matua, o te Tama, o te Wairua Tapu:

20 Akona ratou kia mau ki nga mea katoa i whakahaua e ahau ki a koutou: na, ko au tena hei hoa mo koutou i nga ra katoa, ā te mutunga ra ano o te ao. Amine.

RONGO PAI A MAKĀ.

UPOKO 1.

Hoani Kai iriiri. 9 To Ihu iriiringa. 12 Whakama-tautauranga. 14 Kauwhautanga. 16 Karangatanga i a Pita ma. 21 Tana whakaoranga.

KO te timatanga o te rongo pai o Ihu Karaiti, o te Tama a te Atua;

2 Ko te mea hoki ia i tuhi-tuhia i roto i nga poropiti, na ka tonoa e ahau taku karere i mua i tou aroaro, māna e whakapai tou ara i mua i a koe.

3 He reo no tetahi i te koraha e karanga ana, whakapaia te huarahi o te Ariki, whakatikaia ona ara.

4 I te koraha a Hoani e iriiri ana, e kauwhau ana i te iriiringa ripeneta hei murunga hara.

5 Na ka haere ki a ia te whenua katoa o Huria, me nga tāngata o Hiruharama, a iriiria katoatia ana e ia ki te awa o Horano, me te whāki ano i o ratou hara.

6 Na, te kakahu o Hoani, he huruhuru kamera, he hiako hoki te whitiki o tona hope; a, tana kai, he mawhi-tiwhiti he honi koraha;

7 A i kauwhau ano ia, i mea,

Tenei te haere mai nei i muri i a au tetahi e kaha rawa ana i a au, e kore ahau e tau ki te piko iho wewete ai i te here o ona hu.

8 Ko au nei, he iriiri taku i a koutou ki te wai: māna ia koutou e iriiri ki te Wairua Tapu.

9 ¶ A i aua ra ka haere mai a Ihu i Nahareta o Kariri, a ka iriiria e Hoani ki Horano.

10 A, i reira tonu iho, i a ia e haere ake ana i te wai, ka kite ia i nga rangi e tuwhera ana, me te Wairua, ano he kukupa, e heke iho ana ki a ia:

11 A ka puta mai he reo no te rangi, e mea ana, Ko koe taku Tama i aroha ai, taku i ahua-reka atu ai.

12 ¶ A i reira pu ano ka tonoa ia e te Wairua ki te koraha.

13 A e wha tekau ona ra i reira i te koraha e whakama-tautauria ana e Hatana; i roto ano i nga kararehe mo-hoao; a ko nga anahera hei kai mahi māna.

14 ¶ Na, i muri i a Hoani i tukua ki te herehere, ka haere a Ihu ki Kariri, ki te kauwhau i te rongo pai o te rangatira-tanga o te Atua,

15 A ka mea, Kua rite te tai-ma, kua tata hoki te ranga-

MAKA 1.

tiratanga o te Atua: ripe-
neta, whakaponohia te rongo
pai.

16 ¶ Na, i a ia e haere ana i
te taha o te moana o Kariri,
ka kite i a Haimona raua ko
tona teina, ko Anaru, e maka
ana i te kupenga ki te moana:
he kai hao hoki raua.

17 Na ka mea a Ihu ki a
raua, Haere mai i muri i a
au, a maku korua e mea hei
kai hao tangata.

18 A mahue tonu ake i a
raua nga kupenga, aru ana i
a ia.

19 A haere tata atu ana i
reira, ka kite ia i a Hemi tama
a Heperi, raua ko tona teina,
ko Hoani, i te kaupuke ano
raua e ta ana i nga korenga
o a ratou kupenga.

20 Na karanga tonu ia i a
raua: a mahue ake i a raua
to raua matua, a Heperi, i te
kaipuke me nga kai mahi, a
haere ana i muri i a ia.

21 ¶ A ka tomo ratou ki Ka-
perenauma; na haere tonu ia
i te hapati ki te whare kara-
kia, ka whakaako,

22 A miharo ana ratou ki
tana ako: i rite hoki tana
ako i a ratou ki ta te tangata
whai mana, kihai hoki i rite
ki ta nga karaipi.

23 A i to ratou whare karakia
tetahi tangata, he wairua poke
tona; a ka karanga ia,

24 Ka mea, Kāti ra, he aha
matou nāu, e Ihu o Nahareta?
kua tae mai koe ki te whaka-
ngaro i a matou? e mātau
ana ahau ki a koe, ko te Mea
Tapu a te Atua.

25 A riria iho ia e Ihu, ka

mea ia, Kāti te korero, puta
mai hoki i roto i a ia.

26 Na ka haehae te wairua
kino i a ia, nui atu hoki tona
reo ki te karanga, a puta mai
ana i roto i a ia.

27 A miharo noa ratou ka-
toa, uiui ana ki a ratou ano,
mea ana, He aha tenei? he
aha tenei whakaakoranga
hou? mana tonu nei hoki
tana tono i nga wairua poke,
a rongo rawa ki a ia.

28 Na pakū tonu atu tona
rongo ki nga wahi katoa e
tata ana ki Kariri.

29 ¶ A, to ratou putanga i te
whare karakia, tomo tonu
ratou ko Hemi, ko Hoani, ki
te whare o Haimona raua ko
Anaru.

30 A i te takoto te hungawai
wahine o Haimona, he kiri-
ka, a korerotia tonutia ana ia
e ratou ki a ia.

31 Na, tona taenga atu, ka
mauki tona ringa, whakaara-
hia ana ia; mutu ake tona
kiri-ka, taka ana e ia he mea
ma ratou.

32 ¶ Na, i te ahiahi, i te
toenetanga o te ra, ka mauria
mai ki a ia nga turoro katoa,
me te hunga e nohoia ana e
nga rewera.

33 A huihui katoa ana te pa
ki te kuwaha.

34 A he tokomaha te hunga
e ngaua ana e te tini o nga
mate i whakaorangia e ia, he
maha hoki nga rewera i peia;
kihai ano i tukua nga rewera
kia korero, no te mea i mātau
ratou ki a ia.

35 ¶ Na, i te atatu, i te mea
e tino pouri ana, ka ara ia,

MAKA 1, 2.

ka puta ki waho, ka haere ki te wahi koraha, ki reira inoi ai.

36 Na ka whai a Haimona ratou ko ona hoa i a ia.

37 A, ka kitea ia, ka mea ki a ia, E rapu ana nga tāngata katoa i a koe.

38 Katahi ia ka mea ki a ratou, Tatou ka haere ki nga kāinga tata, ki reira ano ahau kauwhau ai: ko taku hoki tena i haere mai ai.

39 Na ka kauwhau ia i roto i o ratou whare karakia, puta noa i Kariri, ka pei hoki i nga rewera ki waho.

40 ¶ A ka haere mai ki a ia tetahi repera, ka inoi ki a ia; te tukunga iho o nga turi ki a ia, ka mea ki a ia, Ki te pai koe, e taea ahau e koe te mea kia ma.

41 Na ka aroha a Ihu, a ka totoro tona ringa, ka pa ki a ia, ka mea ki a ia, E pai ana ahau; kia ma koe.

42 A puaki kau tona reo, kua kore tona repera, na kua ma.

43 Na ka whakatupato ia i a ia, a tonoa tonutia atu ana;

44 I mea hoki ki a ia, Kei korerotia tetahi mea ki te tangata: engari haere, kia kite te tohunga i a koe, a mauria atu mo tou whakamakanga nga mea i whakaritea e Mohi, hei mea whakaatu ki a ratou.

45 Heoi, tona putanga atu, ka anga, ka korero nui atu, ka whakapuakina taua mea, a kihai a Ihu i ahei te haere nui ki roto ki te pa i muri

iho, heoi noho ana ia i waho, i nga wahi koraha: a haere mai ana ratou ki a ia i nga wahi katoa.

UPOKO 2.

Te pararutiki. 14 Riwai ka karangatia. 15 Kei nga pupirikana. 18 Kore noho puku o ana akonga. 23 Kainga witi i te hapati.

A MURI iho i etahi ra, ka tomo ano ia ki Kape-renauma; a ka rangona kei te whare ia.

2 Na huihui tonu mai ana, he tini te tangata, a kahore noa iho he wahi e o ai ratou, hore rawa i te taha o te kuwaha: a ka korerotia e ia te kupu ki a ratou.

3 A ka haere mai etahi ki a ia, me te kawe mai i tetahi pararutiki, tokowha ki te kauhoa mai.

4 A, tē taea te whakatata ki a ia i te mano hoki, ka pokaia te tuanui o te wahi i noho ai ia: a ka oti te wawahi, tukua iho ana te moenga i takoto ai te pararutiki.

5 A, te kitenga o Ihu i to ratou whakapono, ka mea ia ki te pararutiki, E tama, ka oti ou hara te muru.

6 Na i reira etahi o nga karaipe e noho ana, e whakaa-roaro ana i o ratou ngakau,

7 Na te aha enei kupu kohukohu a tenei tangata? ko wai hei muru hara? Ko te Atua anake.

8 Na mohio tonu a Ihu i roto i tona wairua e penei ana a ratou whakaaaro i roto i a ratou, ka mea ia ki a ratou,

MAKA 2.

He aha koutou ka whakaa-roaro ai i enei mea i roto i o koutou ngakau?

9 Ko tehea te mea takoto noa, ko te mea ki te pararutiki, Ka oti ou hara te muru; ko te mea ranei, Whakatika, tangohia ake tou moenga, haere?

10 Otira kia mātau ai koutou he mana muru hara to te Tama a te tangata i runga i te whenua, (ka mea ia ki te pararutiki,)

11 Ko taku kupu tenei ki a koe, Whakatika, tangohia ake tou moenga, haere ki tou whare.

12 Na, whakatika tonu ake ia, a tangohia ake ana tona moenga, haere atu ana i te aroaro o ratou katoa: no ka miharo ratou katoa, ka whakakororia i te Atua, ka mea, Kahore ano tatou i kite noa i te penei.

13 A haere atu ana ano ia i te taha o te moana; na ka tae mai te mano katoa ki a ia, a ka whakaakona ratou e ia.

14 ¶ A i a ia e haere atu ana, ka kite ia i a Riwai, *tama* a Arapiu, e noho ana i te wahi tango takoha, a ka mea ki a ia, Arumia ahau. Na whakatika ana ia, a aru ana i a ia.

15 ¶ A, i a ia e noho ana i tona whare, he tokomaha nga pupirikana me nga tāngata hara e noho tahi ana ki a Ihu ratou ko ana akonga: he tokomaha hoki ratou, a i aru i a ia.

16 A, te kitenga o nga karaipi

ratou ko nga Parihi i a ia e kai tahi ana me nga pupirikana, me nga tāngata hara, ka mea ki ana akonga, He aha ia ka kai tahi ai, ka inu tahi ai, me nga pupirikana, me nga tāngata hara?

17 Otira ka rongō a Ihu, ka mea ki a ratou, Kahore he aha o nga tāngata ora e meatia ai e te rata, engari o te hunga e mate ana: kihai hoki ahau i haere mai ki te karanga i te hunga tika, engari i te hunga hara, kia ripeneta.

18 ¶ A kei te noho puku nga akonga a Hoani, ratou ko ā nga Parihi: a ka haere mai ratou, ka mea ki a ia, He aha nga akonga a Hoani me ā nga Parihi ka noho puku ai, tena ko āu akonga kahore e noho puku?

19 Na ka mea a Ihu ki a ratou, E ahei ranei nga tama o te whare marena te noho puku i te mea kei a ratou te tāne marena hou? e kore ratou e ahei te noho puku i nga wa kei a ratou nei te tane marena hou.

20 Na, tera e tae mai nga ra e tangohia ai te tāne marena hou i a ratou, katahi ratou ka noho puku i aua ra.

21 E kore e tuia e te tangata *tetahi wahi* o te kahu hou, hei papaki mo te kahu tawhito; kei riro *tetahi wahi* o te kahu tawhito i tona whakakapi hou, a ka nui rawa te pakaru.

22 E kore ano e ringihia e te tangata te waina hou ki te ipu tawhito: kei pakaru nga ipu i te waina hou, a ka maringi te waina, kore ake nga

MAKA 2, 3.

ipu: engari me riringi te waina hou ki te ipu hou.

23 ¶ A i a ia e haere ana i waenga witi i te hapati, ka anga ana akonga, ka kakato haere i nga puku witi.

24 Na ka mea nga Parihi ki a ia, Na, he aha ratou ka mea ai i te mea e kore e tika i te hapati?

25 A ka mea ia ki a ratou, Kahore ano koutou i kite noa i ta Rawiri i mea ai, i a ia e ngaua ana e te hiakai, ratou ko ona hoa?

26 I tona tomokanga ki te whare o te Atua i nga ra o Apiata tohunga nui, a kainga ana e ia nga taro aroaro, nga mea kihai nei i tika kia kainga, ma nga tohunga anake, a hoatu ana e ia ki ona hoa?

27 A i mea ano ia ki a ratou, Hei mea mo te tangata te hapati, ehara i te mea ko te tangata mo te hapati:

28 Waihoki ko te Tama a te tangata te Ariki o te hapati.

UPOKO 3.

Ringa memenge. 11 *Nga wairua poke.* 13 *Whiriwhiringa o te Tekau ma rua.* 22 *Mo tana peinga rewera.* 31 *Ko wai tona whaea, aha, aha.*

A KA tomo ano ia ki te whare karakia; na, i reira tetahi tangata kua memenge tona ringa.

2 A ka titiro pu ratou ki a ia, me kore ia e whakaora i a ia i te hapati; he mea hoki kia pa ai he hē ki a ia.

3 Na ka mea ia ki te tangata i te ringa memenge, Whakatika ki waenganui.

4 Na ka mea ia ki a ratou, He mea tika ranei te mahi pai i te hapati, te mahi kino ranei? te whakaora ranei, te whakamate ranei? A kahore ratou i kiki.

5 Na ka tirotiro riri ia ki a ratou, he pouri hoki mo te pakeke o o ratou ngakau, a ka mea ki taua tangata, Totoro mai tou ringa. A, te toronga mai o tona ringa, kua ora, kua pera me tetahi.

6 A haere tonu atu nga Parihi ratou ko nga tangata whaka-Herora, ka runanga mona, ki te pehea e ngaro ai ia.

7 ¶ Na ka haere a Ihu ratou ko ana akonga ki te moana: a he nui te tangata i aru i a ia i Kariri, i Huria,

8 I Hiruharama, i Irumia, i tawahi hoki o Horano; me te hunga hoki e tata ana ki Taira, ki Hairona, nui atu te huihui; to ratou rongonga ki nga mea i mea ai ia, haere mai ana ki a ia.

9 Na, ka mea ia ki ana akonga kia tatatata tetahi kaipuke iti ki a ia, i te mano hoki, kei tutetutea ia e ratou.

10 He tokomaha hoki i whakaorangia e ia; no ka popō mai ki a ia te hunga katoa e mate ana, kia pa ai ki a ia.

11 Me nga wairua poke hoki, to ratou kitenga i a ia, takoto ana ki tona aroaro, karanga ana, mea ana, Ko te Tama koe a te Atua.

12 A he maha ana kupu ki a ratou kia kaua ia e whakakitea e ratou.

13 ¶ Na ka kake ia ki te mau-

nga, akarangatia anakia ia āna i pai ai: a ka tae ratou ki a ia.

14 A kotahi tekau ma rua āna i whakarite ai hei hoa mona, hei tononga hoki māna ki te kauwhau,

15 Kia whai mana hoki e ora ai nga mate, e peia ai nga rewera:

16 A huaina iho e ia a Haimona ko Pita;

17 Ko Hemi hoki *tama* a Heperi, raua ko Hoani teina o Hemi; a huaina iho raua ko Poaneki, ara, Ko nga tama a te whatitiri:

18 Ko Anaru, ko Piripi, ko Patoromu, ko Matiu, ko Tamati, ko Hemi *tama* a Arapiu, ko Tariu, ko Haimona Kananiti,

19 Ko Hura Ikariote hoki, nāna nei ia i tuku. Na ka tae ratou ki te whare;

20 A ka huihui mai ano te mano, no kihai rawa ratou i ahei te kai taro.

21 Ano ka rongo ona hoa, ka haere ki te pupuri i a ia: i mea hoki, E haurangi ana ia.

22 ¶ Na ka mea nga karaipi i haere mai i Hiruharama, Kei a ia a Perehepura, a na te rangatira o nga rewera tana peinga rewera.

23 Na ka karangatia ratou e ia, a ka korero whakarite ki a ratou, Me pehea a Hatana ka pei ai i a Hatana?

24 Ki te tahuri iho hoki tetahi rangatiratanga ki a ia ano, e kore taua rangatiratanga e tu.

25 Ki te tahuri iho hoki tetahi whare ki a ia ano, e kore taua whare e tu.

26 A ki te whakatika a Hatana, a ka tahuri iho ki a ia ano, e kore ia e tu, engari he mutunga tona.

27 E kore te tangata e ahei te haere ki roto ki te whare o te tangata kaha, pahua ai i ona taonga, ki te kahore e mātua herea te tangata kaha; ko reira pahua ai i tona whare.

28 He pono taku e mea nei ki a koutou, Ko nga hara katoa o nga tama a nga tāngata e murua, me nga kohukohu e kohukohu ai ratou:

29 Tena ko te tangata e kohukohua ai te Wairua Tapu, e kore e murua tona a ake ake, engari ka tau te hē ki a ia a ake ake:

30 Mo ratou i ki, He wairua poke tona.

31 ¶ A, te taenga mai o ona teina, ratou ko tona whaea, ka tu i waho, a tono tangata ana ki a ia, ki te karanga i a ia.

32 A e noho ana te mano i tetahi taha ona, i tetahi taha, a ka mea ratou ki a ia, Na, tou whaea me ou teina, kei waho o rapu ana i a koe.

33 Na, ko tana whakaho-kinga ki a ratou, ka mea, Ko wai toku whaea, ko wai hoki oku teina?

34 Na ka tiro tiro ia ki te hunga e noho ana i tetahi taha ona, i tetahi taha, a ka mea, Na, toku whaea, oku teina!

35 Ki te meatia hoki e tetahi ta te Atua i pai ai, hei teina ia ki a au, hei tuahine, hei whaea.

UPOKO 4.

Te kai rui. 21 *Hei rama tatou.* 26 *Ata tupu o te Rongo Pai,* 30 *A nui noa atu.* 35 *Te tupuhi.*

NA ka timata ano ia te whakaako i te taha o te moana: a he rahi te hui i huihui ki a ia, no ka eke ia ki runga ki te kaupuke, ka noho ki te moana; a i uta te mano katoa i te taha o te moana.

2 A he maha ana mea i whakaako ai ki a ratou, he mea whakarite, i mea hoki ki a ratou, i a ia e ako ana,

3 Whakarongo; Na, i haere atu te kai rui ki te rui:

4 A, i a ia e rui ana, ka ngahoro etahi ki te taha o te ara, a, te rerenga mai o nga manu o te rangi, na kainga ake.

5 Ko etahi i ngahoro ki te wahi kamaka, ki te wahi kihai i nui te oneone; a pihi tonu ake, kahore hoki i hohonu te oneone:

6 A, te whitinga o te ra, ngaua iho; a no te mea kahore he putake, memenge noa iho.

7 Ko etahi i ngahoro ki roto ki nga tataramoa, a, te tupunga ake o nga tataramoa, koaoaotia ana nga purapura, a kore ake he hua.

8 Ko etahi i ngahoro ki te oneone pai, a whai hua ana; tona tupu! tona nui! ea ake, no etahi e toru tekau, no etahi e ono tekau, no etahi kotahi rau.

9 A i mea ano ia ki a ratou, Ki te whai taringa tetahi hei whakarongo, kia rongo ia.

10 ¶ Otira ka mahue ko ia a-nake, ka ui ki a ia ona hoa me te tekau ma rua ki taua kupu whakarite.

11 Ka mea ia ki a ratou, Kua hoatu ki a koutou te matauranga ki te mea ngaro o te rangatiratanga o te Atua: ki te hunga ia o waho e rorototia ana nga mea katoa i te kupu whakarite:

12 Mo te titiro rawa ratou, na, e kore e kite; rongo rawa, na, e kore e mātau; kei tahuri, a ka murna o ratou bara.

13 I mea ano ia ki a ratou, Kahore ranei koutou e mātau ki tenei kupu whakarite? a me pehea ka mātau ai koutou ki nga kupu whakarite katoa?

14 Ko te kai rui, e rui ana i te kupu.

15 Ko enei te hunga i te taha o te ara, i te wahi e ruia ana te kupu; a, to ratou rongo-nga ai, haere tonu mai a Hātana, kapohia ake te kupu i ruia ki o ratou ngakau.

16 Ko enei ano te hunga i nga purapura i nga wahi kamaka; ko te hunga i to ratou rongonga ai i te kupu, hohoro tonu te tango, hari tonu;

17 Na kahore o ratou pakia-ka, he mea nonaiane i kau nei: heoi, te pānga mai o te whakapawera, o te whakatoinga ranei mo te kupu, hē tonu iho.

18 Ko enei ano te hunga i nga purapura i roto i nga tataramoa; ko nga mea i rongo ki te kupu.

19 Na, te putanga o te whakaaroaronga ki tenei ao, o te hangarau o nga taonga, o nga hiahia ki era atu mea, koa-

MAKA 4.

oaotia iho te kupu, a kore ake he hua.

20 Ko enei ano te hunga inga purapura i te oneone pai; ko te hunga e rongo ana ki te kupu, a tango tonu, a whai hua ana, o etahi e toru tekau, o etahi e ono tekau, o etahi kotahi rau.

21 I mea ano ia ki a ratou, Ko raro koia i te mehua te rama whakaturia ai, ina mauria mai, ko raro ranei i te moenga? he teka ianei me whakatu ki runga ki t turinga?

22 E kore hoki tetahi mea i hunā e mahue te whakakite; kahore hoki tetahi mea i hunā, engari kia puta ki te māramatanga.

23 Ki te mea he taringa o tetahi hei whakarongo, kia rongo ia.

24 A i mea ano ia ki a ratou, Kia tupato ki ta koutou e rongo ai: ko te mehua hoki e mehua ai koutou, hei mehua ano tena ki a koutou: a ka tapiritia mai ano *he mea* ma koutou, ma nga kai whakarongo.

25 Ki te whai mea hoki tetahi, ka hoatu ano ki a ia: a ki te kahore he mea a tetahi, ko ana ake ka tangohia i a ia.

26 ¶ A i mea ano ia, E rite ana te rangatiratanga o te Atua ki te tangata i makā e ia te purapura ki te oneone;

27 A moe ana, ara ana, i te po, i te ao, me te tupu ano tera te purapura; na kua roa, tē matauria te peheatanga.

28 E hua ana hoki te whenua

i tona kaha ake ano; ko te rau ki mua, ko reira te puku, muri iho ko te witi pakari i roto i te puku.

29 Otira ka rite nga hua, na, ka hohoro te tuku atu i tana toronaihi. kua taea hoki te kotinga.

30 ¶ A i mea ano ia, Me whakarite e tatou te rangatiratanga o te Atua ki te aha? he aha oti te kupu whakarite hei whakaritenga ma tatou?

31 E rite ana ki te pua nani, i tona whakatokanga ki te whenua, ko te iti rawa ia o nga purapura katoa i runga i te whenua:

32 A, ka oti te whakato, ka tupu, ka nui atu i nga otaota katoa, a ka nui ona manga; no ka noho nga manu o te rangi i tona taumarumarutanga iho.

33 Na, he maha ana kupu whakarite pera i korerotia ai e ia te kupu ki a ratou, a ratou hoki i ahei ai te whakarongo.

34 A heoi ano ana kupu ki a ratou, he kupu whakarite anake: a ka mahue ko ratou anake, ka whakaaturia e ia nga mea katoa ki ana akonga.

35 ¶ A i mea ano ia ki a ratou i taua ra, i te mea ka ahiahi, Tatou ka whakawhiti ki ta-wahi.

36 Na ka tono ratou i te mano kia haere, a ka kawea i a ia, i runga tonu ano ia i te kaupuke. A i a ia ano etahi atu kaupuke nonohi.

37 Na ko te putanga o tetahi hau, he tupuhi, a eke ana nga

MAKA 4, 5.

ngaru ki runga ki te kaupuke, a tomo noa.

38 Na, i runga ia i tetahi urunga e moe ana, i te kei: a ka whakaara ratou i a ia, ka mea ki a ia, E te Kai whakako, kahore o whakaaro ki a tatou ka ngaro nei?

39 Na ka ara ia, a riria iho e ia te hau, ka mea ia ki te moana, Kāti, whakamutua. Na mariri iho te hau, a tino marino ana.

40 Katahi ia ka mea ki a ratou, He aha ta koutou e matakū nei? he aha koutou tē whakaponō ai?

41 Na ka matakū whakaharahara ratou, ka mea tetahi ki tetahi, Ko wai tenei, ina rongo rawa te hau me te moana ki a ia?

UPOKO 5.

Tangata i nga rewera. 13 Nga poaka. 25 Pakaruha-nga toto. 35 Kotiro a Hairuha.

A TO ratou whitinga ki a, tera taha o te moana, ki te whenua o nga Kararini;

2 Na, mahuta kau i te kaupuke, ka tutaki ki a ia tetahi tangata i roto i nga urupa, he wairua poke tona,

3 Kei nga urupa nei tona nohoanga; a, ahakoa he mekameka, kihai ia i taea te here e tetahi tangata:

4 He maha hoki ona herenga ki nga here waewae, ki nga mekameka, heoi motumotuhia ana e ia nga mekameka, mongamonga noa ano nga here waewae: a kihai tetahi ta-

ngata i ahei te whakamarie i a ia.

5 I nga urupa tonu ia, i nga maunga, i te po, i te ao, e ha-mama ana, e haehae ana i a ia ki te kohatu.

6 A, tona kitenga i a Ihu i tawhiti, oma ana ia, koropiko ana ki a ia,

7 A he nui tona reo ki te karanga, ka mea, Ko te aha taku, tau, e Ihu, e te Tama a te Atua i runga rawa? Ko te Atua taku whakaoati mou, na kaua ahau e whakama-maetia.

8 He meatanga hoki nāna ki a ia, Puta mai i tenei tangata, e te wairua poke.

9 Na ka ui ia ki a ia, Ko wai tou ingoa? A ka whakahokia e tera, ka mea, Ko Rihiona toku ingoa: he tokomaha hoki matou.

10 A, nui atu tana inoi ki a ia kia kaua ratou e tonoa i taua whenua.

11 Na, kei reira, kei nga maunga tetahi kahui poaka e kai ana, tona tini.

12 Na ka inoi nga rewera katoa ki a ia, ka mea, Tonoa matou ki nga poaka, kia tomo matou ki a ratou.

13 Na tukua tonutia ana ratou e Ihu. Heoi, te putanga o nga wairua poke, ka tomo ki nga poaka: te tino rerenga o te kahui ra te pari ki te moana, (me te mea e rua mano;) a paremo iho ki te moana.

14 Na whati ana nga kai whangai o nga poaka, a kore-rotia ana ki te pa, ki aua whenua. Na ka puta mai ra-

MAKA 5.

tou kia kite i taua mea kua meatia nei.

15 A, to ratou taenga ki a Ihu, ka kite i te tangata i nohoia nei e nga rewera, tera hoki i te rihiona, e noho ana, kua oti te whakakakahu, kua tika nga whakaaro: a ka mataku ratou.

16 A ka korerotia ki a ratou e te hunga i kite te meatanga ki te tangata i nga rewera, ki nga poaka hoki.

17 Na ka anga ratou, ka tohe ki a ia kia haere atu i o ratou wahi.

18 Ano ka eke ia ki te kaipuke, ka inoi ki a ia te tangata i nga rewera, kia waiho ia hei hoa mona.

19 Otira kihai a Ihu i tuku i a ia, i mea hoki ki a ia, Haere ki tou whare, ki ou whanau-nga, ka korero ki a ratou i nga mea nui i meinga e te Ariki ki a koe, tana atawhaitanga ano i a koe.

20 Na ka haere ia, ka anga, ka korero ki Rekaporihi, i nga mea nui i mea a ia Ihu ki a ia: a miharo ana nga tangata katoa.

21 ¶ A, te whitinga ano o Ihu ki tawahi i runga i te kaipuke, he rahi te hui i huihui ki a ia: a i te taha ia o te moana.

22 Na, ko te haerenga mai o tetahi o nga rangatira o te whare karakia, ko Hairuha tona ingoa; a ka kite i a ia, ka takoto ki ona waewae,

23 A he nui tana inoi ki a ia, ka mea, E whakahemo-hemo ana taku tamahine nohinohi: kia haere ake koe ki te whakapa i ou ringa ki a ia kia ora ai; a ka ora.

24 Na haere tahi ana raua; a he tini te tangata i aru i a ia, popō tonu ki a ia.

25 ¶ Na, ko tetahi wahine e mate ana i te pakaruhanga toto, tekau ma rua nga tau,

26 A he maha nga meatanga a nga rata tokomaha ki a ia, hemo noa ona rawa katoa, tē matūtū ake tetahi wahi, heoi kake haere ana *te mate*;

27 A, tona rongonga ki a Ihu, ka haere mai i muri, i roto i te mano, a pa ana ki tona kakahu.

28 I mea hoki, Ahakoa pa kau ahau ki ona kakahu, ka ora ahau.

29 A mimiti tonu ake te puna o ona toto; no ka mahara a roto o tona tinana kua ora ia i te mate.

30 Na, mohio tonu a Ihu kua puta he mana i roto i a ia, ka tāhurihuri i roto i te mano, ka mea, Ko wai tenei kua pa nei ki oku kakahu?

31 A ka mea ana akonga ki a ia, E kite ana koe i te mano e popō nei ki a koe, a e mea ana koe, Ko wai tenei kua pa mai ki a au?

32 Heoi tirotiro ana ia kia kite i te wahine i mea nei i tenei mea.

33 Na, ka haere mai te wahine me te wehi, me te wiri, i mahara hoki ki te mea i meatia ki a ia, a takoto ana ki tona aroaro, korerotia katoatia ana e ia te tikanga ki a ia.

34 Ano ra ko Ihu ki a ia, E ko, na tou whakapono koe i ora ai; haere marie, kia ora koe i tou mate.

35 ¶ I a ia ano e korero ana,

ka haere mai etahi o nga tangata o terangatira o te whare karakia, ka mea, Kua mate to tamahine: hei aha ake māu te whakararuraru i te Kai whakaako?

36 A, rongo kau a Ihu i te korerotanga o taua kupu, ka mea ia ki te rangatira o te whare karakia, Kaua e mataku, ko te whakapono ia, kia whakapono.

37 A kihai tetahi tangata i tukua kia haere tahi me ia, ko Pita anake, ko Hemi, ko Hoani, teina o Hemi.

38 A, te taenga ki te whare o te rangatira o te whare karakia, a ka kite ia i te ngan gau, i te nui hoki o te tangi, o te aue a etahi.

39 Tona tomokanga ki roto, ka mea ia ki a ratou, He aha koutou ka ngan gau ai, ka tangi ai? kahore te kotiro i mate, engari e moe ana.

40 Na kataina iho ia e ratou. Heoi ka oti katoa te pei ki waho, ka mau ia ki te pāpā, ki te whaea o te kotiro, ratou ko ona hoa, a tomo ana ki te wahi i takoto ai te kotiro.

41 Na ka mau ia ki te ringa o te kotiro, a ka mea ki a ia, Tarita kumi; ko tona whakamaoritanga tenei, E ko, ko taku kupu tenei ki a koe, e ara.

42 Na whakatika tonu ake te kotiro, a haere ana; kotahi tekau ma rua hoki ona tau. Na, ko te tino miharotanga i miharo ai ratou.

43 A he nui tana whakatu-pato i a ratou, kia kua tenei e mohiotia e tetahi tangata; a ka ki kia hoatu he kai māna.

UPOKO 6.

Ihu i Nahareta e whakaha-weatia ana. 7 Ka ngarea te tekau ma rua. 14 Nga kupu mona. 17 Matenga o Hoani. 30 Merekara whan-gai.

A I haere ia i reira, a ka tae ki tona kāinga tupu; me te aru ano ana akonga i a ia.

2 A, ka taka mai te hapati, ka anga ia, ka whakaako i roto i te whare karakia; a ke tokomaha i to ratou rongonga ai i miharo, i mea, No hea enei mea a tenei tangata? a he matauranga aha tenei kua homai nei ki a ia, i oti ai enei merekara nui i ona ringa?

3 Ehara ianei tenei i te kamura, i te tama a Meri, i te tuakana o Hemi, o Hohi, o Hura, o Haimona? a kahore ianei ona tuāhine i konei, i a tatou? Heoi hē ana ratou ki a ia.

4 Otira ka mea a Ihu ki a ratou, Kei tona kāinga anake, kei ona whanaunga, kei tona whare, te poropiti hapa ai i te honore.

5 A kihai ia i ahei te mea i tetahi merekara ki reira, heoi ano ko te whakapa i ona ringa ki etahi tāngata ngoikore toru-toru kia ora ai.

6 A miharo ana ia ki to ratou whakapono-kore. Na haere-erea ana e ia nga kāinga koraha, a tawhio noa, whakaako ai.

7 ¶ Katahi ia ka karanga i te tekau ma rua, a ka anga, ka tono i a ratou tokorua, tokorua; a hoatu ana ki a ratou

MAKA 6.

he mana hei *pei i* nga wairua poke.

8 I mea ano ia ki a ratou kia kaua tetahi mea e mauria ki te ara, hei te tokotoko anake; kaua he putea, kaua he taro, kaua he moni mo roto i te whitiki:

9 Engari nga hu, e here *na*; kaua ano e takiruatia nga koti hei kakahu.

10 A i mea ano ia ki a ratou, Ka tapoko ki tetahi whare, hei reira noho ai, a haere noa i reira.

11 A ki te kahore etahi e manako ki a koutou, ki te kore e whakarongo ki a koutou, ka haere atu i reira, whakanga-horotia te puehu i raro i o koutou waewae hei whakaatu ki a ratou. He pono taku e mea nei ki a koutou, Erangi to Horoma, to Komora, i te ra whakawa e māmā i to taua pa.

12 Na ka haere ratou, ka kauwhau kia ripeneta nga tāngata.

13 A he maha nga rewera i peia, he tokomaha ano nga turoro i kaukauria ki te hinu, i whakaorangia.

14 ¶ A, te rongonga *ki a ia* o Kingi Herora, (kua nui haere hoki tona ingoa,) ka mea ia, Kua ara a Hoani Kai iriiri i te hunga mate, a na reira i mahi ai nga merekara i roto i a ia.

15 Ka mea etahi, Ko Iraia ia. Ko etahi i mea, He poropiti ia, he pera ranei me tetahi o nga poropiti.

16 Heoi, te rongonga o Herora, ka mea ia, Ko Hoani

tenei i poutoa e ahau te mā-tenga: kua ara ia i te hunga mate.

17 ¶ I tonono tangata hoki taua Herora a hopukia ana a Hoani, a herea iho ki te whare herehere, he mea hoki mo Heroriaha, wahine a tona teina, a Piripi: kua marenatia hoki e ia.

18 Na Hoani hoki i mea ki a Herora, E kore e tika kia riro i a koe te wahine a tou teina.

19 Na ka mauāhara a Heroriaha ki a ia, a ka mea kia whakamatea ia; heoi kihai i taea:

20 I hopohopo hoki a Herora ki a Hoani, i mahara hoki he tangata tika, he tapu, na ka ata tiaki i a ia; a he maha ana mea i mea ai ia i tona rongonga ai ki a ia, i whakahuareka ano ki te whakarongo ki a ia.

21 A ka taka mai tetahi wapai, i ta Herora takanga hapa i tona ra whanautanga ma ana tāngata nunui, ma nga rangatira hoia, ma nga tino tangata o Kariri;

22 Na, te haerenga mai o te tamahine a taua Heroriaha ki roto, ka kanikani, a ka ahua-reka a Herora, ratou ko te hunga e noho tahi ana, ka mea te kingi ki te kotiro, Mau e tonono ki a au tau e pai ai, a ka hoatu e ahau ki a koe.

23 Na ka oati ia ki a ia, Tāu e tonono ai ki ahau, ahakoa ko tetahi taha o toku rangatiratanga, me hoatu e ahau ki a koe.

24 Na ka haere ia, ka korero

MAKA 6.

ki tona whaea, Me tonono e au ki te aha? A ka mea tera, Ki te mātenga o Hoani Kai iriiri.

25 Na, hohoro tonu tona haere ki te kingi, ka tonono, ka mea, Tāku i pai ai, kia homai e koe ki a au aianei, ko te mātenga o Hoani Kai iriiri i runga i te rihi.

26 Heoi, pouri rawa te kingi; otira i whakaaro ki te oati, ki te hunga hoki e noho tahi ana me ia, a kihai i pai kia whakakahoretia tāna.

27 Na, tonono tonutia ana he kai patu e te kingi, i mea hoki kia mauria mai tona mātenga: a haere ana tera, poutoa iho e ia tona mātenga i roto i te whare herehere,

28 A mauria mai ana tona mātenga i runga i te rihi, hoatu ana ki te kotiro: a na te kotiro i hoatu ki tona whaea.

29 Ano ka rongono ana akonga, ka haere ka tango i te tinana, a whakatakotoria ana e ratou ki te urupa.

30 ¶ Na ka huihui nga apotoro ki a Ihu, a korerotia ana e ratou ki a ia nga mea katoa i mea ai ratou, i whakaako ai.

31 Na ka mea ia ki a ratou, Haere mai koutou nei ano ki te koraha, tatou anake, kia tā ai te manawa: he tokomaha hoki e haere mai ana, e haere atu ana, no kihai rawa ratou i watea ki te kai.

32 A haere puku ana ratou ki te koraha, ki tetahi wahi motu ke, ra te kaupuke.

33 A i kite nga mano i to ratou haerenga, a he toko-

maha i mātau ki a ia, na ka oma ra uta ki reira i roto i nga pa katoa, a ko ratou kua tae, a huihui ana ki a ia.

34 Ano ka puta a Ihu, a ka kite i te hui nui, ka aroha ki a ratou, no te mea i rite ratou ki te hipi hepara-kore: a ka anga ia, ka ako i a ratou ki nga mea maha.

35 Na kua heke noa atu te ra, a ka haere mai ana akonga ki a ia, ka mea, He wahi koraha tenei, kua heke noa atu ano te ra:

36 Tonono ratou kia haere ki nga whenua, ki nga kāinga koraha, i tetahi taha, i tetahi taha, ki te hoko taro ma ratou: kahore hoki ā ratou mea hei kai.

37 Na ka whakahokia e ia, a ka mea ki a ratou, Ma koutou e hoatu he kai ma ratou. Ka mea ratou ki a ia, Me haere oti matou ki te hoko taro ki nga pene e rua rau, ka hoatu ai hei kai ma ratou?

38 Ka mea ia ki a ratou, E hia ā koutou taro? tikina tirohia. A ka mohio ratou, na ka mea, E rima, e rua hoki nga ika.

39 Ka mea ia ki a ratou kia meinga ratou katoa kia noho, he nohoanga, he nohoanga, ki runga ki te tarutaru mato-mato.

40 Na ka noho ratou, he rōpū he rōpū, tataki rau, tataki rima tekau.

41 A ka mau ia ki nga taro e rima ki nga ika hoki e rua, a ka titiro ki runga ki te rangi, ka whakapai, ka whawhati i nga taro, a hoatu ana ki ana

MAKA 6, 7.

akonga kia whakatakotoria ma ratou; i tuwhaina ano hoki e ia nga ika e rua ma ratou katoa.

42 A kai katoa ana ratou, a ka makona.

43 A kotahi tekau ma rua nga kete i kohia e ratou, ki tonu i nga whatiwhatinga, i nga ika hoki.

44 A me te mea e rima mano nga tane i kai taro ra.

45 ¶ A akiaki tonuiho ia i ana akonga kia eke ki te kaupuke, kia whakawhiti i mua i a ia ki tawahi, ki Petahaira, i a ia e tono ana i te mano kia haere.

46 Na, ka mutu tana poro-poroaki, ka haere ia ki te maunga, ki te inoi.

47 Na kua ahiahi, a i wae-nga moana te kaupuke, ko ia anake hoki i uta.

48 Na ka kite ia i a ratou e ruwhā ana i te hoenga; i hē hoki to ratou hau: a, i te wha o nga mataaratanga o te po, ka haere atu ia ki a ratou, i haere *maori* i runga i te moana, me te mea hoki ka pahika ke i a ratou.

49 Ano ka kite ratou i a ia e haere ana i runga i te moana, ka mea ratou, He wairua! a ka aue:

50 I kite hoki ratou katoa i a ia, a ihiihi ana. Na ka hohoro ia te korero ki a ratou, a ka mea ki a ratou, Kia manawanui: ko ahau tenei; kaua e wehi.

51 Na ka eke ia ki te kaupuke, ki a ratou; a mariri iho te hau: a nui atu to ratou oho mauri, miharo ana.

52 Kihai hoki i mahara ki

nga taro: he pakeke hoki no o ratou ngakau.

53 A, to ratou whitinga, ka tae ki te whenua o Kenchareta, a u ana ki uta.

54 A, to ratou mahutatanga i te kaupuke, mohio tonu ratou ki a ia,

55 A oma ana puta noa i taua whenua, a tawhio noa, ka anga, ka mau mai i nga turoro i runga i nga moenga ki te wahi i rongo ai ratou kei reira ia.

56 A i ona haerenga katoa-tanga ki nga kāinga koraha, ki nga pa, ki nga whenua ranei, ka whakatakotoria nga turoro ki nga kāinga hoko, ka inoi ki a ia kia pa kau ratou ki te taniko o tona kakahu: a ora ake nga tāngata katoa i pa ki a ia.

UPOKO 7.

Ka whakahengia nga akonga.

8 *Ta Ihu.* 24 *Wahine Kānaani.* 31 *Turi, whango.*

NA ka huihui ki a ia nga Parihi, me etahi o nga karaipi i haere mai i Hiruharama.

2 A, to ratou kitenga i etahi o ana akonga e kai taro ana me te noa ano nga ringa, ara, kihai i horoia, ka whakahe ratou.

3 E kore hoki e kai nga Parihi, me nga Hurai katoa, ki te kahore i ata horoia nga ringa, e pupuri ana hoki i te whakarerenga iho a nga kau-mātua.

4 E kore ano ratou e kai *ina hoki mai* i te kāinga hoko, ki te mea kahore i horoi. He

MAKA 7.

maha hoki era atu mea kua riro mai kia puritia e ratou, nga horoinga o nga kapa, o nga pāta, o nga mea parahi, o nga nohoanga.

5 Katahi ka ui nga Parihi me nga karaipi ki a ia, He aha o akonga tē haere ai i runga i te whakarereinga iho a nga kaumātua, a kahore e horoi i nga ringa ina kai taro?

6 Na ka whakahokia e ia, a ka mea ki a ratou, Tika rawa ta Ihaia i poropiti ai mo koutou, mo te hunga tinihanga, te mea hoki i tuhituhia, Te iwi nei, ko nga ngutu hei whakahonore i a au, matara noa atu ia i a au o ratou ngakau.

7 Otira maumau karakia noa ratou ki a au, ta ratou nei hoki e whakaako ai, ko nga whakahau a te tangata.

8 Kua whakarerea hoki e koutou ta te Atua kupu ako, pupuri ai i te whakarereinga iho a nga tāngata, i nga horoinga o nga pāta, o nga kapa: he maha hoki nga mea pena e meinga ana e koutou.

9 I mea ano ia ki a ratou, Tena ra ta koutou hanga ki te whakahahore i te whakahau a te Atua, kia mau ai koutou ki ta koutou whakarereinga iho.

10 I mea hoki a Mohi, Whakahonoretia tou pāpā me tou whaea; me tenei, Ki te kohukohua e tetahi tona pāpā, whaea ranei, kia mate ia, mate rawa:

11 Ko koutou ia hei mea, Ki te mea tetahi ki tona pāpā, ki

tona whaea ranei, Ko taku mea hei atawhainga mou, he koropana, ara, he mea i whakaherea,

12 Na, heoi ano a koutou tukunga i a ia, ki te mea i tetahi mea ma tona pāpā, ma tona whaea ranei;

13 Ka waiho nei e koutou ta koutou whakarereinga iho, i whakarerea ihonei e koutou, hei whakahahore mo ta te Atua kupu: a he maha nga mea pena e meinga ana e koutou.

14 ¶ Na karangatia ana e ia te mano katoa, a mea ana ki a ratou, Whakarongo koutou katoa, kia mātau koutou:

15 Kahore he mea o waho o te tangata ka tapoko nei ki roto ki a ia hei whakanoa i a ia: engari nga mea e puta ana i roto i a ia, ma enei e noa ai te tangata.

16 Ki te whai taringa tetahi hei whakarongo, kia rongo ia.

17 Ano ka mawehe mai ia i te mano ki te whare, ka ui ana akonga ki a ia ki te tikanga o tena kupu whakairite.

18 Na ka mea ia ki a ratou, Ha, e kuare ana ano koutou? Kahore koutou i mātau, ko nga mea katoa o waho e tapoko nei ki te tangata, e kore ia e noa i era;

19 Note mea e kore e tapoko ki tona ngakau, engari ki te kopu, a puta ana ki te poka, me te tahi ano i nga kai katoa?

20 I mea ano ia, Ko te mea e puta ake ana i te tangata, ma tera e noa ai te tangata.

MAKA 7, 8.

21 No roto hoki no te ngakau o nga tāngata te putanga o nga whakaaro kino, o nga puremu, o nga moe puku, o nga kohuru,

22 O nga tahae, o nga hiahia apo, o nga kino, o te tinihanga, o te hiahia taikaha, o te kanohi kino, o te kohukohu, o te whakapehapeha, o te wairangi:

23 No roto te putanga ake o enei kino katoa, a ma reira e noa ai te tangata.

24 ¶ Na ka whakatika atu ia i reira, ka haere ki nga wahi o Taira, o Hairona, a tomo ana ki tetahi whare, kihai i pai kia rongo tetahi tangata: otiia kihai i ngaro.

25 I rongo hoki ki a ia tetahi wahine, he wairua poke to tana kotiro, a haere ana, takoto ana ki ona waewae:

26 He wahine Kariki hoki ia, no Hairopinihia tona iwi; ka inoi ki a ia kia peia e ia te rewera i roto i tana kotiro.

27 Na ka mea a Ihu ki a ia, Tukua kia mātua makona nga tamariki: e kore hoki e pai kia tangohia te taro a nga tamariki, kia makā ma nga kuri.

28 Na ka whakahokia e ia, a ka mea ki a ia, Ae ra, e te Ariki: e kai ana ano nga kuri i raro i te tepu i nga kongakonga a nga tamariki.

29 Na ka mea ia ki a ia, Koia kei tena kupu, haere; kua puta te rewera i roto i to kotiro.

30 A, tona haerenga ki tona whare, na rokohanga atu kua puta te rewera, a ko tana ko-

tiro e takoto ana i runga i te moenga.

31 ¶ A i hoki ano ia i nga wahi o Taira, o Hairona, a haere ana ki te moana o Kariri, ra waenga o nga wahi o Rekaporihi.

32 Na ka mauria mai ki a ia he turi e whango ana; ka tohe ki a ia kia whakapākia iho tona ringa ki a ia.

33 Na ka tangohia ia i roto i te mano ki tahaki, a kuhua ana ona maihao ki ona taringa, na ka tuwha, ka whakapa ki tona arero;

34 Ka titiro ki te rangi, ka hotu tona manawa, ka mea ki a ia, Epata, ara, Kia puare.

35 Na puare tonu iho ona taringa, a korokoro noa ana te here o tona arero, na kua tika ana korero.

36 Katahi ia ka whakatupato i a ratou kia kaua e korerotia ki te tangata: otira whakatupato noa ia i a ratou, nui noa atu ta ratou korero;

37 A tino miharo rawa ratou, ka mea, Pai tonu tana mea-tanga i nga mea katoa: e mea ana ia i nga turi kia rongo, i nga reo kore kia korero.

UPOKO 8.

Nga mano e wha. 10 Nga Parihi e mea ana ki te tohu.

13 Kupu mo ratou. 22 Matapo. 27 Mo tona matenga.

34 Kia maia.

IAUA ra, i te mano e nui rawa ana, a kahore he kai ma ratou, ka karanga a Ihu i ana akonga, ka mea ki a ratou,

2 E aroha ana ahau ki nga

MAKA 8.

tāngata, ka toru nei hoki o ratou ra e noho ana ki a au, a kahore ā ratou kai :

3 A, ki te tonoa pukutia e abau ki o ratou whare, ka hemo ki te ara : i haere mai hoki etahi o ratou i tawhiti.

4 Na ka whakahokia ki a ia e ana akonga, Me aha te tāngata ka makona ai enei i te taro i konei, i te koraha ?

5 Ka ui ia ki a ratou, E hia ā koutou taro ? Ka mea ratou, E whitu.

6 Na ka mea ia ki te mano kia noho ki te whenua : a ka mau ki nga taro e whitu, ka whakawhetai, ka whawhati, a hoatu ana e ia ki ana akonga kia whakatakotoria ; a whakatakotoria ana e ratou ma te mano.

7 He ika ano ā ratou, toru-toru nei, he mea nonohi : a, ka mutute whakapai, ka mea ia kia whakatakotoria hoki era.

8 Na kai ana ratou, a ka makona : a kohia ake ana o nga whatiwhatinga i toe e whitu kete.

9 A me te mea e wha mano te hunga i kai : a tonoa ana ratou e ia.

10 ¶ Na, eke tonu ia, ratou ko ana akonga, ki te kaupuke, a ka tae ki nga wahi o Tara-manuta.

11 Na ka haere mai nga Parihi, ka anga, ka totohe ki a ia, ka rapu tohu i a ia i te rangi, hei whakamatautau mona.

12 Na ka hotu tona wairua, ka mea ia, He aha tenei whakatupuranga ka rapu ai i te

tohu ? he pono taku e mea nei ki a koutou, E kore e hoatu he tohu ki tenei whakatupuranga.

13 ¶ Na mahue ake ratou i a ia, a eke ana ano ia ki te kaupuke, rere ana ki tera taha.

14 Na, i wareware ratou ki te mau taro, a kotahi anake a ratou taro i te kaupuke.

15 Na ka whakatupato ia i a ratou, ka mea, Kia mahara, kia tupato i te rewena a nga Parihi, i te rewena hoki a Herora.

16 A ka korerorero ratou ki a ratou ano, ka mea, No te mea kahore ā tatou taro.

17 A ka mohio a Ihu, ka mea ki a ratou, He aha koutou ka korerorero ai no te mea kahore ā koutou taro ? kiano koutou i mātau noa, kiano i mahara ? e pakeke tonu ana ano ranei o koutou ngakau ?

18 He kanohi nei o koutou, a kahore e kite ? he taringa nei o koutou, a kahore e rongongo ? kahore e mahara ?

19 I a au i whawhati i nga taro e rima ma nga mano e rima, e hia nga kete ki o nga whatiwhatinga i kohia e koutou ? Ka mea ratou ki a ia, Kotahi tekau ma rua.

20 I nga taro hoki e whitu ma nga mano e wha, e hia nga kete ki o nga whatiwhatinga i kohia e koutou ? Ka mea ratou, E whitu.

21 Na ka mea ia ki a ratou, He aha ra koutou tē mātau ai ?

22 ¶ A, tona taenga ki Peta-haira, ka kawea mai e ratou

he matapo ki a ia, a ka inoi ki a ia kia whakapangia e ia.

23 Na ka mau ia ki te ringa o te matapo, ka arahi i a ia ki waho o te kāinga; ka tuwha ki ona kanohi, a whakapakia ana ona ringa ki a ia, ka ui ki a ia me kore ia e kite i tetahi mea.

24 Na ka titiro ake ia, ka mea, E kite ana ahau i nga tāngata e haereere ana me te mea he rakau.

25 Me i reira ka whakapakia ano nga ringa ki ona kanohi, a ka mea i a ia kia titiro mai: na ka ora ia, a ka mārama te titiro ki nga tāngata katoa.

26 Na ka tōno ia i a ia ki tona whare, ka mea, Kaua e tomo ki te kāinga, kaua ano e korerotia ki tetahi i te kāinga.

27 ¶ Na, ka haerea Ihu ratou ko ana akonga ki nga kāinga o Hiharia Piripai: a i te ara ka ui ia ki ana akonga, ka mea ki a ratou, Ki ta nga tangata ki, ko wai ahau?

28 Na, ko ta ratou whakahokinga, Ko Hoani Kai iriiri: ki ta etahi, ko Iraia; a ki ta etahi, ko tetahi o nga poropiti.

29 Na ka mea ia ki a ratou, A, ki ta koutou kī, ko wai ahau? Na, ko te whakahokinga a Pita, ka mea ki a ia, Ko te Karaiti koe.

30 Na ka whakatupato ia i a ratou, kia kaua ia e korerotia ki te tangata.

31 ¶ Katahi ia ka anga, ka whakaako i a ratou, kua ta-

koto te tikanga kia maha nga mamae o te Tama a te tangata, kia whakakinongia hoki e nga kaumatua, e nga tohunga nui, e nga karaipi, a kia whakamatea, kia ara ano hoki ina pahure nga ra e toru.

32 I korerotia mata-nuitia ano taua kupu e ia. A ka mau a Pita ki a ia, ka anga, ka whakahe ki tana.

33 Otira ka tahuri ia, ka titiro ki ana akonga, ka whakahe ki ta Pita, ka mea, Haere ki muri i a au, e Hatana: kahore hoki ou ngakau ki nga mea a te Atua, engari ki a te tangata.

34 ¶ Na ka karangatia e ia te mano, ratou ko ana akonga, a ka mea ki a ratou, Ki te mea tetahi tangata kia haere mai ki te whai i a au, me whakakahore ia e ia ano, me amo tona ripeka, ka aru ai i a au.

35 Ki te whai tetahi kia ora, ka mate ia; a ki te mate tetahi, mona i wbakaaro ki a au, ki te rongo pai ano hoki, ka ora ia.

36 He aha hoki te pai ki te tangata, ki te riro i a ia te ao katoa, a ka kore he ora mona?

37 He aha hoki ta te tangata e hoatu ai hei utu mona kia ora?

38 Ki te whakama hoki tetahi ki a au me aku korero, i tenei whakatupuranga puremu, hara; ka whakama ano te Tama a te tangata ki a ia, ina haere mai i runga i te kororia o tona Matua, ratou ko nga anahera tapu.

UPOKO 9.

Whakaahuatanga ketanga.

11 *Iraia.* 14 *Wairua kino ka peia.* 30 *Mo tona matenga.* 33 *Kei whakakake.*

38 *He aha te kore noa ai e whai tahi.*

I MEA ano ia ki a ratou, He pono taku e mea nei ki a koutou, Tenei ano etahi o te hunga e tu nei, e kore e pāngia e te mate, kia kite ra ano i te rangatiratanga o te Atua e haere mai ana i runga i te kaha.

2 A, ka pahure nga ra e ono, ka mau a Ihu ki a Pita, ki a Hemi, ki a Hoani, na kawea ana ratou e ia ki runga ki tetahi maunga tiketike, ko ratou anake: a ka puta ke tona ahua i to ratou aroaro.

3 A, kanapa tonu ona kakahu, ma tonu, me te hukarere; e kore e taea e te kai horoi i runga i te whenua te mea kia pera te ma.

4 Na ka kitea e ratou a Iraia raua ko Mohi: e korerorero ana hoki raua ki a Ihu.

5 Na ka oho a Pita, ka mea ki a Ihu, E te Kai whakaako, he mea pai kia noho tatou ki konei: na kia hangā e matou etahi wharau kia toru; kia kotahi mou, kia kotahi mo Mohi, kia kotahi mo Iraia.

6 Kahore hoki ia i mātau ki tana e korero ai; i wehi hoki ratou.

7 A ko tetahi kapua e tau-marumaru ana ki runga ki a ratou: a ka puta he reo i te kapua, e mea ana, Ko taku

Tama tenei i aroha ai; whakarongo ki a ia.

8 A, titiro rawa mai ratou ki tetahi taha, ki tetahi taha, kahore a ratou tangata i kite ai, ko ratou anake, ko Ihu.

9 A, i a ratou e heke iho ana i te maunga, ka whakatupato ia i a ratou kia kaua e koretia ki te tangata ā ratou i kite ai, kia ara ra ano te Tama a te tangata i te hunga mate.

10 A i puritia taua kupu e ratou, ka uiui ki a ratou ano, he aha ra te aranga ake i te hunga mate.

11 ¶ A ka ui ratou ki a ia, ka mea, He aha nga karaipi ka mea ai, ko Iraia kia mātua puta mai?

12 Na ka whakahokia e ia, a ka mea ki a ratou, E puta ana ano a Iraia ki mua, ki te whakatika i nga mea katoa; kua oti ano te tuhituhi mo te Tama a te tangata, kia maha ona mamae, kia whakahoretia.

13 Ko taku kupu ia tenei ki a koutou, Kua tae mai ano a Iraia, heoi meatia ana e ratou ki a ia ta ratou i pai ai, nga mea hoki i tuhituhia mona.

14 ¶ A, tona taenga ki nga akonga, ka kite ia he rahi te hui e karapoti ana i a ratou, me nga karaipi e totohe ana ki a ratou.

15 A kite kau te mano katoa i a ia, ka miharo, a oma ana, oha ana ki a ia.

16 Na ka ui ia ki nga karaipi, He aha ta koutou e totohe na ki a ratou?

17 Na ka whakahokia e te-

MAKA 9.

tahi i roto i te mano, ka mea, E te Kai whakaako, kua kawea mai e ahau taku tama ki a koe, he wairua reo-kore tona;

18 A i nga wahi e hopu ai te wairua i a ia, ka taia iho: tutu ana te huka, tetea noa iho ona niho, a pakoko haere ana: i mea ano ahau ki au akonga kia peia ia ki waho; heoi kihai i taea e ratou.

19 Na, ko tana whakahokinga ki a ia, ka mea, E te uri whakapono-kore, kia pehea te roa o taku nohoanga ki a koutou? kia pehea te roa o taku manawanuitanga ki a koutou? Kawea mai ki a au.

20 Na, kawea mai ana ia ki a ia: a, tona kitenga i a ia, na, haea tonutia iho ia e te wairua; a hinga ana ia ki te whenua, ka oke, ka huka.

21 Na ka ui ia ki tona matua, Pehea te roa o tenei mea i a ia? Ka mea mai ia, No te tamarikitanga:

22 A he maha ana turakanga i a ia ki te kapura, ki te wai, kia ngaro ai: otira ki te taea e koe te aha ranei, arohaina maua, kia puta to whakaaro ki a maua.

23 Ka mea a Ihu ki a ia, Ki te taea e koe te whakapono, ka taea nga mea katoa e te tangata whakapono.

24 Na, karanga tonu mai te matua o te tama, ka mea, me te heke ano nga roimata, E whakapono ana ahau, e te Ariki; kia puta to whakaaro ki taku whakapono-kore.

25 Na, te kitenga o Ihu i te

mano e oma mai ana, ka riria e ia te wairua poke, ka mea ki a ia, E te wairua reo-kore, turi, ko taku ki tenei ki a koe, Puta mai i roto i a ia, kua ano e tomo ki roto ki a ia a muri ake nei.

26 Na, hamama ana tera, a haehae noa iho i a ia, a puta ana ki waho: no ka pera taua tangata me te tupapaku, a he tokomaha i mea, Kua mate.

27 Na ka mau a Ihu ki tona ringa, ka whakaara i a ia; a ka whakatika ia.

28 A ka tomo ia ki te whare, ka ui puku ana akonga ki a ia, He aha matou te ahei ai te pei i a ia ki waho?

29 Ano ra ko ia ki a ratou, E kore e puta noa te pena, ma te inoi anake, ma te noho-puku.

30 ¶ Na ka hapainga e ratou i reira, a haere ana ra wae-nganui o Kariri; a kihai ia i pai kia rangona e tetahi.

31 Ko tana hoki tena i whakaako ai ki ana akonga, i mea ai ki a ratou, Ka tukua te Tama a te tangata ki nga ringa o nga tangata, a ma ratou ia e whakamate; a ka oti ia te whakamate, ka ara ake i te toru o nga ra.

32 Na, kihai ratou i matau ki taua kupu, a ka matakuri ki te ui ki a ia.

33 ¶ Na, tona taenga ki Kaperenauma: a i a ia i roto i te whare, ka ui ia ki a ratou, He aha ta koutou i kororeroro ai ki a koutou i te ara?

34 A kihai ratou i kiki: ko ta ratou hoki i kororeroro ai

MAKA 9.

ki a ratou i te ara, ko wai e nui rawa.

35 Na ka noho ia, a ka karanga i te tekau ma rua, ka mea ki a ratou, Ki te whai tetahi kia waiho ko ia hei mua, ka waiho ia hei muri i te katoa, hei kai mahi ma te katoa.

36 I mau ano ia ki tetahi tamaiti nohinohi, a whakaturia ana ki waenganui i a ratou: na, ka okooko i a ia, a ka mea ki a ratou,

37 Ki te manako tetahi ki tetahi o nga tamariki penei, he whakaaro ki toku ingoa, e manako ana ia ki a au: a ki te manako tetahi ki a au, ehara ahau i tana i manako ai, engari ko toku kai tono mai.

38 ¶ Na ka oho a Hoani ki a ia, ka mea, E te Kai whakaako, i kite matou i tetahi e pei rewera ana i runga i tou ingoa, a kahore e haere tahi tatou: na, riria iho e matou, mona kahore e haere tahi tatou.

39 Na ka mea a Ihu, Kaua ia e riria: ki te mea hoki noku te ingoa e mahi merekara ai tetahi, e kore e hohoro tana korero kino moku.

40 Ko ia hoki ehara i te hoa riri ki a tatou, no tatou ia.

41 Ki te whakainumia koutou e tetahi ki te kapa wai, he whakaaro ki toku ingoa, no te mea no te Karaiti koutou, he pono taku e mea nei ki a koutou, e kore ia e hapa i tona utu.

42 Na, ki te mea tetahi kia

hē tetahi o enci mea nonohi e whakapono nei ki a au, he nui te pai ki a ia ki te whakawerewerea tetahi kohatu mira ki tona kaki, a ka makā ia ki te moana.

43 Na, ki te hē koe i tou ringa, poutoa: he nui hoki te pai ki a koe kia tomo mutu koe ki te ora, a kia kaua e baere me te mau ano nga ringa e rua ki Kehena, ki te kapura e kore e tineia:

44 Ki te wahi e kore ai e mate to ratou kutukutu, ki te kapura e kore e tineia.

45 Ki te hē ano koe i tou waewae, poutoa: he nui hoki te pai ki a koe kia tomo kopa koe ki te ora, a kia kaua e makā me te mau ano nga waewae e rua ki Kehena, ki te kapura e kore e tineia:

46 Ki te wahi e kore ai e mate to ratou kutukutu, ki te kapura e kore e tineia.

47 Ki te hē ano koe i tou kanohi, makā atu: he pai hoki ki a koe kia tomo kanohi tahi ki te rangatiranga o te Atua, a kia kaua koe e makā me nga kanohi e rua ki te kapura o Kehena:

48 Ki te wahi e kore ai e mate to ratou kutukutu, ki te kapura e kore e tineia.

49 Ta te mea ka totetia nga tāngata katoa ki te kapura, ka totetia ano nga patunga tapu katoa ki te tote.

50 He pai te tote: otira ki te pirau te tote, ma te aha e whai tikanga tote ai? Kia whai tote i roto i a koutou, kia mau hoki te rongo a tetahi ki tetahi.

MAKA 10.

UPOKO 10.

Whakarere wahine. 13 Mo nga tamariki. 17 Tangata taonga. 23 Whakarere taonga. 32 Mo tona matenga, aranga. 35 Patu i te whakakake o Hoani ma. 46 Paratimiha.

NA ka whakatika ia i reira, a haere ana ki nga wahi o Huria, ra tera taha o Hiorano: na, ka huihui mai ano nga mano ki a ia; a ka whakaako ano ia i a ratou, ko tana hanga hoki ia.

2 Na ka haere mai nga Parihi, ka ui ki a ia, He mea tika ranei kia whakarere te tangata i tana wahine? he whakamatautau hoki mona.

3 Na ka whakahokia e ia, a ka mea ki a ratou, He aha ta Mohi i mea ai ki a koutou?

4 Ka ki mai ratou, I tukua e Mohi kia tuhituhia he pukapuka whakarere, ka whakarere ai.

5 Na ka whakahokia e Ihu, a ka mea ki a ratou, Na te pakeke o o koutou ngakau i tuhituhia ai e ia tenei kupu ako ki a koutou.

6 I te orokohanganga ia, i hangā raua e te Atua he tāne he wahine.

7 Mo konei ka mahue i te tangata tona pāpā me tona whaea, a ka piri ki tana wahine;

8 A hei kikokiko kotahi raua tokorua: na, heoi ano to raua tokoruatanga, engari kotahi ano kikokiko.

9 Na, ā te Atua i hono ai, kua e wehea e te tangata.

10 A i te whare ka ui ano ana akonga ki a ia ki taua mea.

11 A ka mea ia ki a ratou, Ki te whakarere tetahi i tana wahine, a ka marena i tetahi atu, e puremu ana ia, e hara ana ki tera.

12 Ki te whakarere ano te wahine i tana tane, a ka marenatia ki tetahi atu, e puremu ana ia.

13 ¶ Na ka kawea mai ki a ia etahi tamariki nonohi, kia pa ai ia ki a ratou: otira ka riria e nga akonga te hunga nana i kawe mai.

14 A, te kitenga o Ihu, ka riri, a ka mea ki a ratou, Tukua nga tamariki nonohi kia haere mai ki a au, kua hoki ratou e araia atu: no nga penei hoki te rangatiranga o te Atua.

15 He pono taku e mea nei ki a koutou, Ki te kahore e rite te tango a tetahi i te rangatiranga o te Atua ki ta te tamaiti nohinohi, e kore ia e tomo ki roto.

16 Na, okookona ana ratou e ia, whakapakia iho ona ringa ki a ratou, a manaakitia ana ratou.

17 ¶ Na, i a ia e haere ana i te huarahi, ka oma mai tetahi, tukua iho ana nga turi ki a ia, ka ui ki a ia, E te Kai whakaako pai, me aha ahau ka whiwhi ai ki te oranga tonutanga?

18 Na ka mea a Ihu ki a ia, He aha ahau i kiia ai e koe he pai? kahore tetahi

i pai, kotahi anake ko te Atua.

19 E mātau ana koe ki nga ture, Kaua e puremu, Kaua e patu tangata, Kaua e tahae, Kaua e whakapae teka, Kaua e kaiā, Whakahonoretia tou pāpā me tou whaea.

20 Na ka whakahokia mai e tera, a ka mea ki a ia, E te Kai whakaako, kua rite katoa enei mea i a au no toku tamarikitanga ake.

21 Na ka titiro a Ihu ki a ia, ka aroha ki a ia, ka mea ki a ia, Kotahi te mea kahore nei i a koe: haere, hokona ou mea, ka hoatu ki nga rawakore, a e whai taonga koe ki te rangi: katahi ka amo i te ripeka, ka aru i a au.

22 Otira i mamae ia i taua kupu, a haere pouri ana: he maha hoki ona taonga.

23 ¶ Na ka tirotiro a Ihu, ka mea ki ana akonga, Anō te whakauaua o te tapoko o te hunga taonga ki te rangatiratanga o te Atua!

24 Na ka miharo nga akonga ki ana kupu. A ka whakahokia ano e Ihu, ka mea ki a ratou, E tama ma, anō te whakauaua o te tapoko ki to te Atua rangatiratanga o te hunga e whakawhirinaki ana ki te taonga!

25 Erangi te haere o te kamera ra te kowhao o te ngira, he mea takoto noa, he *whakauaua* rawa ia te haere o te tangata taonga ki roto ki te rangatiratanga o te Atua.

26 Na, rahi rawa to ratou miharo, a ka mea ki a ratou ano, Ko wai ra e ora?

27 Na ka titiro a Ihu ki a ratou, ka mea, E kore tenei e taea e te tangata, ki te Atua ia e taea ano: e taea hoki nga mea katoa e te Atua.

28 Katahi ka anga a Pita ka mea ki a ia, Na, kua mahue nei i a matou nga mea katoa, kua aru nei i a koe.

29 Na ka whakahokia e Ihu, a ka mea, He pono taku e mea nei ki a koutou, Ki te whakarerea e tetahi tangata, he whare, he teina, he tuahine, he pāpā, he whaea, he wahine, he tamariki, he mārā, he whakaaro hoki nāna ki a au, ki te rongo pai ano hoki,

30 Ina, tataki rau nga mea e riro i a ia i tenei wa, he whare, he teina, he tuahine, he whaea, he tamariki, he mārā, me te whakatoinga: a i te ao meake puta, he ora-nga tonutanga.

31 He tokomaha ia o mua e waiho ki muri; ko o muri hoki ki mua.

32 ¶ Na, i te huarahi ratou e haere ana ki Hiruharama; me te haere ano a Ihu i mua i a ratou: na, e miharo ana ratou; e aru matakū ana. Heoi ka mau ano ia ki te tekau ma rua, ka anga ka korero ki a ratou i nga mea meake pa ki a ia,

33 Nana, e haere ana tenei tatou ki Hiruharama; a ka tukua te Tama a te tangata ki nga tohunga nui, ki nga karaipi; a ka kiia ia e ratou kia mate, ka tukua hoki ia e ratou ki nga tauwi:

34 A ka tawaia ia, ka whiua,

MAKA 10.

ka tuwhaina, ka whakamatea: a i te toru o nga ra ka ara.

35 ¶ Na ka haere ki a ia a Hemi raua ko Hoani, nga tama a Heperi, ka mea, E te Kai whakaako, e mea ana maua kia meatia e koe ta maua e inoi ai.

36 Na ka mea ia ki a raua, He aha ta korua e mea ai kia meatia e ahau ma korua?

37 Ka mea raua ki a ia, Tukua ki a maua kia noho, tetahi ki tou matau, tetahi ki tou mau, i tou kororia.

38 Na, ko te meatanga a Ihu ki a raua, Kahore korua e matau ki ta korua e inoi nei. E ahei ranei korua te inu i te kapa ka inumia nei e ahau? kia iriiria ki te iriiringa ka iriiria nei ahau?

39 Ka mea raua ki a ia, E ahei ano. Ka ki a Ihu ki a raua, E inu ano korua i te kapa ka inumia e ahau; e iriiria korua ki te iriiringa e iriiria ai ahau:

40 Tena ko te noho ki toku matau, ki toku mau, ehara i te mea maku e hoatu, engari ka riro i te hunga i whakaritea nei mo ratou.

41 A, te rongonga o te tekau, ka anga ka riri ki a Hemi raua ko Hoani.

42 Na ka karangatia ratou e Ihu, a ka mea ia ki a ratou, E mahara ana koutou, ko te hunga e kiia ana he kawana no nga tauwi, hei whakatupu rangatira ki a ratou; a ko o ratou tangata rarahi hei akiaki i a ratou.

43 Otira e kore e pera i roto i a koutou: engari ki te mea

tetahi kia whakatupu tangata rahi i roto i a koutou, me whakatupu kai mahi ia ma koutou:

44 A ki te mea tetahi o koutou kia whakatupu tino tangata, me whakatupu pono nga ia ma te katoa.

45 Kihai nei hoki te Tama a te tangata i haere mai kia mahia he mea mana, engari kia mahi ia, kia tuku hoki i a ia kia mate hei utu mo nga tangata tokomaha.

46 ¶ Na ka tae ratou ki Heriko: a i a ia e haere atu ana i roto i Heriko, ratou ko ana akonga, ko te mano tini, e noho ana a Paratimiuha, tama a Timiuha, he matapo, i te taha o te ara, ki te tono mea mana.

47 A, tona rongonga, ko Ihu o Nahareta tena, ka anga ia ka karanga, ka mea, E Ihu, e te Tama a Rawiri, kia aroha ki a au.

48 A he tokomaha ki te riri i a ia kia noho puku: heoi tino rahi ake tana karanga, E te Tama a Rawiri, kia aroha ki a au.

49 Na ka tu a Ihu, ka mea kia karangatia ia. A karangatia ana e ratou te matapo, ka mea ki a ia, Kia maia, whakatika; e karanga ana ia i a koe.

50 Na ka whakarerea e ia tona kakahu, a whakatika ana, haere ana ki a Ihu.

51 Na ka oho a Ihu, ka mea ki a ia, He aha tau e hiahia na kia meatia e ahau mau? Ka ki te matapo ki a ia, E te Ariki, kia titiro ahau.

52 Ka mea a Ihu ki a ia, Haere; na tou whakaponokoe i ora ai. Na, titiro tonu iho ia, a aru ana i a Ihu i te ara.

UPOKO 11.

Ki Hiruharama i runga i te kaihe. 12, 20 Te piki. 15 Hokohoko i roto i te temepara. 27 Nga mangai o nga tino tohunga ka purua.

A NO ka tata ratou ki Hiruharama, ki Petapaki, ki Petani, a ka tae ki maunga Oriwa, tokorua ana akonga i tonoa e ia,

2 I mea ano ia ki a raua, Haere ki te kaininga e anga mai ana ki a korua: a tomo kau ki reira, ka kite i tetahi kuao e here ana, kahore ano kia nohoia e te tangata; wetekina, arahina mai.

3 A ki te ki mai tetahi tangata ki a korua, He aha tenei ka meinga ai e korua? ka mea atu, E mea ana te Ariki ki a ia mana; na, ka tukua tonutia mai ki konei.

4 Na, haere ana raua, a ka kitea te kuao e here ana ki te kuwaha i waho, i te pekanga o te ara; a wetekina mai ana e raua.

5 A ka mea etahi o te hunga e tu ana i reira ki a raua, He aha ta korua e wewete na i te kuao?

6 Na, ka korerotia e raua ki a ratou ta Ihu i mea ai: a tukua mai ana raua e ratou.

7 A ka arahina te kuao ki a Ihu, na, wharikitia ana o raua kakahu ki runga ki a ia; a noho ana ia i runga.

8 Na, he tokomaha i whariki i o ratou kakahu ki te ara: ko etahi i kokoti i nga manga o nga rakau, a wharikitia ana ki te ara.

9 Ko te hunga i haere i mua, me te hunga i haere i muri, i karanga, i mea, Ohana; Ka whakapaingia ia e haere mai ana i runga i te ingoa o te Ariki:

10 Ka whakapaingia te rangatiratanga o to tatou matua, o Rawiri, e haere mai ana i runga i te ingoa o te Ariki: Ohana i runga rawa.

11 Na ka tomo a Ihu ki Hiruharama, ki roto hoki ki te temepara: a tirotirohia iho e ia nga mea katoa, ko te wa hoki ia o te ahiahi, na, haere ana ia ratou ko te tekau ma rua ki Petani.

12 ¶ Na, i te aonga ake, i a ratou kua riro mai i Petani, ka hiakai ia:

13 A, tona kitenga i tetahi piki i tawhiti, he rau ona, ka haere atu, me kore e kitea tetahi mea i runga: a, tona taenga atu, kihai i kitea e ia tetahi mea, he rau anake; ehara hoki i te po piki.

14 Na ka oho a Ihu, ka mea ki taua rakau, Kaua rawa te tangata e kai i tetahi hua ou ake tonu atu; me te whakarongo ano ana akonga.

15 ¶ A ka tae ratou ki Hiruharama: na, te tomokanga o Ihu ki te temepara, ka anga ka pei ki waho i te hunga e hoko atu ana, e hoko mai ana i roto i te temepara, a hurihia ake nga tepu o nga kai whaka-whitiwhiti moni, me nga no-

MAKA 11.

hoanga o nga kai hoko kupa;

16 Kihai ano i tukua kia kawea tetahi oko e te tangata ra te temepara.

17 A i whakaako ia, i mea ki a ratou, Kahore koia i tuhi-tuhia, Ka karangatia toku whare he whare inoi mo nga tauwi katoa? otiia kua meinga nei e koutou hei ana mo nga kai pahua.

18 A i rongo nga karaipi me nga tohunga nui, a ka rapu ki te pehea e whakangaromia ai ia: i matakū hoki ratou i a ia, no te mea i miharo te mano katoa ki tana ako.

19 Ano ka ahiahi, ka haere ia ki waho o te pa.

20 ¶ A i te atatu, i a ratou e haere ana, ka kite i te piki kua maroke ake i nga pakiaka.

21 Na ka mahara a Pita, a ka mea ki a ia, E te Kai whakaako, na, te piki i kangā ra e koe, kua maroke.

22 Na ka whakahokia e Ihu, a ka mea ki a ratou, Kia mau te whakapono ki te Atua.

23 He pono hoki taku e mea nei ki a koutou, Ki te mea tetahi ki tenei maunga, Kia rangā atu koe, kia whakatakā ki te moana; a e kore e ruarua tona ngakau, engari ka whakaponohia e ia te putanga o nga mea i kiia e ia; ka whiwhi ia ki tana i mea ai.

24 Koia ahau ka mea nei ki a koutou, Ko nga mea katoa e tono ai koutou ina inoi, me whakapono ka riro i a koutou, a ka whiwhi koutou.

25 A ka tu koutou, ka karakia, ki te mea he take riri to

koutou ki tetahi, murna: kia murua ai hoki o koutou hē e to koutou Matua i te rangi.

26 Na, ki te kore koutou e muru, e kore ano to koutou Matua i te rangi e muru i o koutou hē.

27 ¶ Na ka haere ano ratou ki Hiruharama: a i a ia e haereere ana i te temepara, ka haere mai ki a ia nga tohunga nui, me nga karaipi, me nga kaumatua;

28 A ka mea ki a ia, Tena, te mana i meatia ai enei mea e koe? na wai hoki tenei mana i hoatu ki a koe, i mea ai koe i enei mea?

29 Na ka whakahokia e Ihu, ka mea ki a ratou, Maku ano e ui ki a koutou kia kotahi kupu, a ma koutou e whakahoki mai ki a au, katahi ka korerotia e ahau ki a koutou te mana i mea ai ahau i enei mea.

30 Te iriiringa a Hoani, no te rangi, no nga tāngata ranei? korerotia mai ki a au.

31 A ka korerorero ratou ki a ratou ano, ka mea, Ki te mea tatou, No te rangi; e mea mai ia, Ha, he aha koutou tē whakapono ai ki a ia?

32 A ki te mea tatou, No nga tāngata; ka matakū ratou i te iwi: ki ta ratou katoa hoki he poropiti pono a Hoani.

33 Na, ka whakahokia e ratou, ka mea ki a Ihu, Kahore matou e kite. Na, ko te whakahokinga a Ihu, ka mea ki a ratou, E kore ano e korerotia e ahau ki a koutou te mana i mea ai ahau i enei mea.

UPOKO 12.

*Mo nga Hurai. 13 Ta Hiha
ki a Hiha. 18 He o nga
Haruki. 28 Te ture nui.
35 Kuaretanga ki a ia. 41
Patene a te pouaru.*

NA ka timataia e ia tetahi kupu whakarite ki a ratou. I whakatokia e tetahi tangata he māra waina, a taiepatia ana ki te taiepa, na ka keria tetakotoranga waina, a hangā ana tetahi whare tike-tike, a tukua ana e ia ki nga kai mahi, na, ko tona haerenga ki tawhiti.

2 A i te po i tika ai ka tonoa e ia he pononga ki nga kai mahi, ki te tiki i etahi hua o te māra waina i nga kai mahi.

3 Na ka mau ratou ki a ia, a whiua ana ia, tonoa kautia atu ana.

4 Na ka tonoa ano e ia ki a ratou tetahi atu pononga; a ka akina ia e ratou ki te kohatu, ngawhā iho tona mā-tenga, a, ka oti ia te tukino, ka tonoa atu.

5 Na ka tonoa ano e ia tetahi atu; a whakamatea iho ia e ratou; me era atu, tona tini, ko etahi i whiua, ko etahi i whakamatea.

6 Na, kotahi ake ano tāna, he tama aroha nāna, a muri rawa iho ka tonoa hoki ia ki a ratou, i mea ia, E hopohopo ratou ki taku tama.

7 Na ka mea aua kai mahi ki a ratou ano, Ko te tangata tenei mona te kāinga; tena, tatou ka whakamate i a ia, a mo tatou te kāinga.

8 Na ka mau ratou ki a ia,

whakamatea iho, a makā ana ki waho o te māra waina.

9 Na, ka pehea te rangatira o te māra waina? ka haere mai ia ka whakangaro i nga kai mahi, a ka hoatu te māra waina ki etahi atu.

10 Kahore koia koutou i kite i tenei karaipiture; Ko te kohatu i kapea e nga kai hanga, kua meinga hei upoko mo te kokonga:

11 Na te Ariki tenei, a he mea whakamiharo ki o tatou kanohi?

12 Na ka whai ratou kia hopukina ia, otiia i matakū i te mano: i mātau hoki ratou mo ratou te kupu whakarite i korerotia nei e ia: na, whakarerea ana ia, haere ana ratou.

13 ¶ Na ka tonoa e ratou ki a ia etahi o nga Parihi, ratou kongatāngata whaka Herora, hei hopu mo tetahi kupu āna.

14 A, to ratou taenga mai, ka mea ki a ia, E te Kai whakaako, e mātau ana matou he kupu pono tāu, e kore ano ta te tangata e whakaaroa e koe: e kore ano koe e titiro ki te kanohi tangata, engari e whakaako ana i te ara o te Atua i runga i te pono. He mea tika ranei te hoatu takoha ki a Hiha, ehara ranei?

15 Me hoatu ranei e matou, kua ranei e hoatu? Otira i mohio ia ki ta ratou tinihanga, a ka mea ki a ratou, He aha koutou ka whakamatautau ai i a au? mauria mai he pene ki a au, kia kite ai ahau.

16 A mauria mai ana. Na, ko tana meatanga ki a ratou,

No wai tenei ahua me te tuhituhinga? Ka mea ratou ki a ia, No Hiha.

17 Na ka whakahokia e Ihu, ka mea ki a ratou, Hoatu ki a Hiha nga mea a Hiha, ki te Atua ano nga mea a te Atua. A miharo ana ratou ki a ia.

18 ¶ Na ka haere ki a ia nga Haruki, e mea nei kahore he aranga; ka ui ki a ia, ka mea,

19 E te Kai whakaako, i tuhituhi a Mohi ki a matou, Ki te mate te tuakana o tetahi tangata, a ka waiho tana wahine, kahore hoki he tamarihi hei waihotanga iho, me tango tana wahine e tona teina, ka whakatupu uri ai mo tona tuakana.

20 Na, tokowhitu taua whanau i mua, he tuakana, he teina: a ka tango to mua i te wahine, a mate iho ia, kahore hoki he uri hei waihotanga iho.

21 Katahi ka tango te tuarua i a ia, ka mate, kahore ano hoki ona uri hei waihotanga iho: pera tonu ano hoki te tuatoru.

22 I tango ano te tokowhitu i a ia, a kahore o ratou uri hei waihotanga iho: muri rawa iho ka mate ano te wahine.

23 Na, i te aranga, i te mea ka ara ratou, ma wai o ratou te wahine? he wahine hoki ia na ratou tokowhitu.

24 Na ka whakahokia e Ihu, ka mea ki a ratou, Ehara ianei tenei i te mea i hē ai koutou, kahore nei hoki e mohio ki nga karaipiture, ki te kaha hoki o te Atua?

25 I te mea hoki ka ara ratou i te hunga mate, e kore e marena, e kore ano e hoatu kia marenatia; engari ka rite ki nga anahera o te rangi.

26 Na, te hūnga mate, to ratou aranga mai; kahore koutou i kite i roto i te pukapuka a Mohi, i ta te Atua i ki ai ki a ia, i tera i te rakau, i mea ai, Ko te Atua ahau o Aperahama, ko te Atua o Ihaka, ko te Atua o Hakopa?

27 Ehara ia i te Atua no te hunga mate, engari he Atua no te hunga ora: na, nui atu to koutou hē.

28 ¶ A, te haerenga mai o tetahi o nga karaipi, te rongo nga ki a ratou e totohe ana, a ka kite he pai tana whakahoki ki a ratou, ka ui ki a ia, Ko tehea te tuatahi o nga ture katoa?

29 Na, ko te whakahokinga a Ihu ki a ia, Te tuatahi o nga ture katoa, Whakarongo, e Ihairaira; Ko te Ariki, ko to tatou Atua, he Ariki kotahi:

30 Kia whakapaua hoki tou ngakau, tou wairua, tou hinegaro, tou kaha, ki te aroha ki te Ariki, ki tou Atua: ko te ture tuatahi tenei.

31 A e rite ana ano te tuarua, ko ia tenei, Kia aroha koe ki tou hoa tata, anō ko koe. Kahore he ture ke atu e rahi ake ana i enei.

32 Na ka mea te karaipi ki a ia, Ka pai, e te Kai whakaako, he pono to korero: no te mea kotahi ano te Atua; a kahore atu tetahi, ko ia anake:

33 Ko te whakapaunga hoki o te ngakan, o te hinengaro, o te wairua, o te kaha, ki te aroha ki a ia, me te aroha ki tona hoa tata, anō ko ia, nui atu tena i nga tahunga tinana me nga patunga tapu katoa.

34 A, te kitenga o Ihu he kupu mohio tana i whakahoki ai, ka mea ki a ia, Kahore koe i matara atu i te rangatiratanga o te Atua. A kihai tetahi tangata i maia ki te ui ki a ia i muri iho.

35 ¶ Na ka ki a Ihu, ka mea, i a ia e whakaako ana i roto i te temepara, Na te aha nga karaipi ka mea ai, he tama na Rawiri a te Karaiti?

36 Na Rawiri ake hoki te kupu, arā, na te Wairua Tapu, I mea te Ariki ki toku Ariki, Hei toku matau koe noho ai, kia meinga ra ano e ahau ou hoa riri hei turanga waewae mou.

37 Na ka karangatia nei ia e Rawiri ake ano, He Ariki; a no hea ia i tama ai ki a ia? A ahua-reka ana te mano tini ki te whakarongo ki a ia.

38 Na i mea ano ia ki a ratou i tana akoranga, Kia tupato ki nga karaipi, ko ta ratou e rawe ai ko nga kakahu roroa ina haereere, me nga ohatanga i nga kāinga hoko,

39 Me nga nohoanga rangatira i nga whare karakia, me nga nohoanga rangatira i nga hākari:

40 Ka pau nei i a ratou nga whare o nga pouaru, a e inoi roa ana, he ahua kau: he nui rawa te mate e pa ki enei.

41 A i te noho a Ihu i te ritenga atu o te takotoranga moni, e matakitaki ana ki te mano e panga moni ana ki te takotoranga moni: a he tokomaha nga tāngata taonga, he maha hoki nga mea i pangā e ratou.

42 Na, ko te haerenga mai o tetahi pouaru rawakore, makā ana e ia nga mea nohinohi e rua, kotahi ia patene.

43 Na ka karangatia e ia ana akonga, ka mea ki a ratou, He pono taku e mea nei ki a koutou, Ko ta tenei pouaru rawakore i maka ai, nui atu i ā ratou katoa e maka ra ki te takotoranga moni:

44 Ko ratou katoa hoki, he hira nei o ratou, a makā ana ko tetahi wahi; ko tenei ia he rawakore, a makā ana āna mea katoa, ara, tona oranga katoa.

UPOKO 13.

Temepara ka kore. 9 Nga tohu. 24 Tona haerenga mai. 28 Kia mataara.

A, I a ia e haere atu ana i te temepara, ka mea tetahi o ana akonga ki a ia, E te Kai whakaako, nana, te tu o nga kohatu, te tu o nga whare!

2 Na ka whakahokia e Ihu, ka mea ki a ia, Ka kite koe i enei whare nunui? e kore tetahi kohatu e waiho i runga i tetahi kohatu, engari ka whakahoroa.

3 A, i a ia e noho ana i maunga Oriwa i te ritenga o te temepara, ka ui puku ki a

MAKA 13.

ia a Pita, a Hemi, a Hoani,
a Anaru,

4 Korerotia mai ki a matou,
ko a hea enei mea, a he aha
te tohu ina tata enei mea
katoa te rite?

5 Na, ko te whakahokinga a
Ihu ki a ratou, ka anga ka
korero, Kia tupato kei ma-
mingatia koutou e te tangata:

6 He tokomaha hoki e haere
mai i runga i toku ingoa, e
mea, Ko ahau ia; a he toko-
maha e mamingatia.

7 A e rongo koutou ki nga
pakanga, ki nga rongo pa-
kanga, kei ohore: kua ta-
koto hoki he putanga *mo aua*
mea; taihoa ia te mutunga.

8 E whakatika hoki tetahi
iwi ki tetahi iwi, tetahi ranga-
tiratanga ki tetahi rangatira-
tanga: a he tini nga wahi e
puta ai te ru, ka puta ano
hoki nga po mate kai, me nga
whakaohoho: ko nga tima-
tanga enei o nga mamae.

9 ¶ Na, kia tupato ki a kou-
tou: ka tukua hoki koutou ki
nga runanga; ka whiua i roto
i nga whare karakia: a ka
whakaturia ki te aroaro o
nga kawana, o nga kingi, mo
te whakaaro ki a au, hei mea
whakaatu ki a ratou.

10 Kua takoto ia te tikanga
kia mātua kauwhautia te
rongo pai ki nga tauwi ka-
toa.

11 A ka arahina koutou, ka
tukua atu, kua e manu-
kanuka wawe ki ta koutou e
korero ai, kua ano e ma-
harahara: engari te mea e
hoatu ki a koutou i taua
haora, ko tena ta koutou e

korero ai: ehara hoki i te
mea ma koutou nga korero,
engari ma te Wairua Tapu.

12 Na ka tukua te tuakana
e te teina ki te mate, te ta-
maiti hoki e te pāpā; a e
whakatika nga tamariki ki
nga mātua, mea ai kia wha-
kamatea.

13 A ka kinongia koutou e
nga tāngata katoa, he mea
hoki mo toku ingoa: te ta-
ngata ia e u ana, a taea
noatia te mutunga, ko tenei
e ora.

14 A e kite koutou i te mea
whakarihariha, i te mea wha-
kangaro, i ta Raniera poropiti
i korero ai, e tu ana i te wahi
e kore e tika, (kia mātua te
kai titiro pukapuka,) ko reira
me rere te hunga i Huria ki
nga maunga:

15 Te tangata hoki i runga i
te whare kei heke iho ki roto
ki te whare, kei tapoko ki te
tiki i tetahi mea i roto i tona
whare:

16 Kua ano te tangata i te
māra e hoki mai ki muri, ki
te tiki i tona kakahu.

17 Aue, te mate o te hunga e
hapū ana, o nga mea hoki
e whangai ana ki te u, i aua
ra!

18 Ma koutou ia e inoi kei
rokohanga koutou e te whati
i te hotoke.

19 He whakapawera hoki
aua ra, kahore ona rite o te
orokohanganga ra ano i hangā
nei e te Atua, a mohoa noa
nei, kahore hoki he pera i
muri nei.

20 A me i kahore aua ra i
poroa i waenga e te Ariki, e

kore tetahi kikokiko e ora: otira ka whakaaroa te hunga whiriwhiri i whiriwhiria e ia, a ka poroa aua ra i waenga.

21 Ki te mea tetahi ki a koutou i reira, Na, tenei a te Karaiti; Na, tera; kaua e whakaponohia:

22 E whakatika hoki nga Karaiti teka, me nga poropiti teka, a ka hoatu e ratou nga tohu me nga mea whakamiharo, a, me i taea, ka mamingatia ano te hunga i whiriwhiria.

23 Kia tupato ra koutou: na, kua korerotia wawetia nei e ahau nga mea katoa ki a koutou.

24 ¶ Na, i aua ra, muri iho i taua whakapawera, ka whakapouritia te ra, e kore ano e titi te atarau.

25 Ka taka iho nga whetu o te rangi, a ka ngaueue nga mea kaha o nga rangi.

26 Ko reira ano kitea ai te Tama a te tangata, e haere mai ana i runga i nga kapua, me te kaha nui me te kororia.

27 Ko reira ano ia tonoa ai i ana anahera, a ka huihuia āna i whiriwhiri ai i nga hau e wha, i te pito o te whenua tae noa ki te pito o te rangi.

28 ¶ Na, kia akona koutou e te piki ki tetahi kupu whakarite; I tona manga e nga wari ana, a e puta ana nga rau, ka mohio koutou ka tata te raumati:

29 Waihoki ko koutou, ina kite i enei mea e puta mai ana, ka mātau ka tata, kei nga kuwaha.

30 He pono taku e mea nei

ki a koutou, E kore tenei whakatupuranga e pahemo, kia puta ra ano enei mea katoa.

31 Ko te rangi me te whenua e pahemo: ko aku kupu ia e kore e pahemo.

32 Otiia, kahore tetahi tangata e mātau ki taua ra, ki taua haora, kahore nga anahera o te rangi, kahore te Tama, ko te Matua anake.

33 Kia tupato, kia mataara, me te inoi ano: kahore hoki koutou e mātau ki te wa, ko a hea ranei.

34 Ka rite hoki ki te tangata e haere ana ki tawhiti, mahue iho i a ia tona whare, a tukua iho e ia nga tikanga ki ana pononga, tana mahi ma tetahi, ma tetahi, a ka whakahau iho ki te kai tiaki tatau kia mataara.

35 Ae ra, kia mataara: kahore hoki koutou e mātau ki te wa e haere mai ai te rangatira o te whare, ko te ahiahi, ko waenganui poranei, ko tetangi o te heihei, ko te atatu ranei:

36 Kei puta whakarere, a ka rokohanga mai koutou e ia e moe ana.

37 Na, taku ka mea atu nei ki a koutou, e meatia ana ano ki te katoa, Kia mataara.

UPOKO 14.

Whakatakoto mona. 3 Whakawahinga. 10 Ta Hura. 12 Ta Ihu mo te Kapenga. 17 Te kai tuku. 22 Hapa tapu. 27 Kupu whakatu-pato. 32 Kehemane. 43 Ta Hura tuku. 46 Ka mau. 53 Whakawakanga. 66 Ta Pita.

NA, kia rua ake nga ra ko te Kapenga, me te *hakari* o te taro rewena-kore: a ka rapu nga tohunga nui me nga karaipi i tetahi tinihanga e mau ai ia, e whakamatea ai.

2 I mea ano ratou, Kauaka i te *hakari*, kei ngangau te iwi.

3 ¶ A ia ia i Petani i te whare o Haimona repera, i a ia ano e noho ana, ka haere mai tetahi wahine me tetahi pouaka kohatu, *kī tonu* i te hinu kakara, he tino nara, he mea utu nui; a wahia ana e ia te pouaka kohatu, ringihia ana ki tona mātenga.

4 A i riri etahi i roto i a ratou, i mea, Hei aha tenei maumau o te hinu kakara?

5 Maha atu hoki i nga pene e toru rau te utu, me i hokona tenei *hinu*, na, ka hoatu ki te hunga rawakore. Na ka amu amu ratou ki a ia.

6 Ka mea atu a Ihu, Kāti ano u ana; he aha ta koutou e whakapawerawera i a ia? he mahi pai tana i mea nei ki a au.

7 Kei a koutou tonu hoki te hunga rawakore i nga wa katoa, a hei atawhainga ratou ma koutou i nga wa e pai ai koutou: e kore ia ahau e noho tonu ki a koutou.

8 Ko tāna ake kua whakapaua mai e ia: kua whakaaro wawe ia kia whakawahia toku tinana mo te tanumanga.

9 He pono taku e mea nei ki a koutou, Ko nga wahi o te ao katoa e kauwhautia ai

tenei rongo pai, ka korerotia ano ta tenei wahine i mea ai, hei whakamaharatanga ki a ia.

10 ¶ Na, ka haere a Hura Ikariote, tetahi o te tekau ma rua, ki nga tohunga nui, ki te tuku i a ia ki a ratou.

11 Ano ka rongo ratou, ka hari, ka whakaae kia hoatu he moni māna, Na ka rapu ia ki te wa pai e tukua ai ia.

12 ¶ A i te ra tuatahi o te taro rewena-kore, i te wa e patua ai te Kapenga, ka mea ana akonga ki a ia, Ko hea koe pai ai kia haere matou ki te taka, kia kai ai koe i te Kapenga?

13 A tokorua ana akonga i tonoa e ia, ka mea ia ki a raua, Haere ki te pa, a ka tutaki ki a korua he tangata e mau ana i te kahaka wai: haere i muri i a ia.

14 A ka mea ki te tangata o te whare e tomo ai ia, E mea ana te Kai whakaako, Kei hea te ruma e kai ai matou ko aku akonga i te Kapenga?

15 A ka whakaaturia e ia ki a korua he ruma nui i runga, oti rawa te whariki, te whakapai: hei reira taka ai ma tatou.

16 Na, haere ana āna akonga, a, te taenga ki te pa, ka kitea tana i korero ai ki a raua: a takā ana e raua te Kapenga.

17 ¶ Ano ka ahiahi, ka haere atu ia me te tekau ma rua.

18 I a ratou e noho ana, e kai ana, ka mea a Ihu, He pono taku e mea nei ki a koutou, Ko tetahi o koutou, kei

MAKA 14.

toku taha nei e kai ana, māna ahau e tuku.

19 Na ka pa te pouri ki a ratou, ka kī takitahi ki a ia, Ko ahau koia? me tetahi atu, Ko ahau koia?

20 Na, ka whakahokia e ia, ka mea ki a ratou, Ko tetahi o te tekau ma rua e toutou tahi nei māua ki te rihi.

21 E haere ana te Tama a te tangata, e pera ana me te mea i tuhituhia mona: otiia aue, te mate mo te tangata e tukua ai te Tama a te tangata! he mea pai mo taua tangata me i kua ia e whanau.

22 ¶ A, i a ratou e kai ana, ka mau a Ihu ki te taro, a ka mutu te whakapai, ka wha-whati, na ka homai ki a ratou, ka mea, Tangohia, kaina: ko toku tinana tenei.

23 Na ka mau ia ki te kapa, a, ka mutu te whakawhetai, ka homai ki a ratou: a ka inumia e ratou katoa.

24 I mea ano ia ki a ratou, Ko oku toto tenei, ko o te kawenata hou, e whakahekea ana mo te tini.

25 He pono taku e mea nei ki a koutou, E kore ahau e inu i te hua o te waina a mua ake nei, kia taea ra ano taua ra e inumia houtia ai e ahau i te rangatiratanga o te Atua.

26 Ano ka mutu ta ratou himene, ka haere ki maunga Oriwa.

27 ¶ Katahi a Ihu ka mea ki a ratou, Ka hē koutou katoa ki a au i tenei po: kua oti hoki te tuhituhi, Ka patua e ahau

te hepara, a ka whakamara-ratia nga hipi.

28 Otira muri iho i toku aranga mai, ka haere ahau i mua i a koutou ki Kariri.

29 Ka mea a Pita ki a ia, Ahakoa hē te katoa, e kore ahau e hē.

30 Na ka mea a Ihu ki a ia, He pono taku e mea nei ki a koe, Ko akuanei, i tenei po ano, i te mea kahore ano kia rua noa nga tangihanga o te tikaokao, ka toru au whakahoretanga ki a au.

31 Katahi ka tino nui rawa tana meatanga atu, Ahakoa kua takoto te tikanga kia mate tahi taua, e kore ahau e whakahahore ki a koe. I pera ano te korero ā ratou katoa.

32 ¶ To ratou taenga ki te wahi, ko tona ingoa nei ko Kehemane; ka mea ia ki ana akonga, Hei konei koutou noho ai, kia inoi ahau.

33 Na ka mau ia ki a Pita, ratou ko Hemi, ko Hoani, a ka timata te koera, te tumata-tenga;

34 Na ka mea ia ki a ratou, Karapotī pu toku wairua i te pouri, tata pu ki te mate: hei konei koutou noho ai, kia mataara.

35 Na ka haere ia ki pahaki tata atu, ka takoto ki te whe-nua, ka inoi, me kahore e ahei kia pahemo atu tenei haora i a ia.

36 A ka mea, E Apa, e Pa, ka taea e koe nga mea katoa; tangohia atu tenei kapa i a au: otiia kua e waiho i taku e pai ai, engari i tau.

37 Na ka haere mai ia, a

MAKA 14.

rokohanga mai e moe ana ratou, a ka mea ki a Pita, E Haimona, e moe ana koe? e kore e taea e koe te mataara kia kotahi haora?

38 Kia mataara, me te inoi, kei uru ki te whakamatautauranga. E hihiko ana te wairua, ko te kikokiko ia e ngoikore ana.

39 Ka haere atu ano ia, ka inoi, ka whakahua i taua kupu ano.

40 A, tona hokinga mai, rokohanga mai ano e moe ana, (i taimaha hoki o ratou kanohi,) a kihai i mātau ki ta ratou e whakahoki ai ki a ia.

41 Na, haere mai ana ano ia, ko te toru o nga haerenga, a ka mea ki a ratou, Moe tonu, takoto marire: heoi ra, kua taea te haora; na, ka tukua te Tama a te tangata ki nga ringa o te hunga hara.

42 Maranga, ka haere tatou; na, ka tata te kai tuku i a au.

43 ¶ A korero kau ia, kua puta a Hura, tetahi o te tekau ma rua, a he tini nga tāngata i a ia, me nga hoari, me nga patu, *he mea tono mai* na nga tohunga nui, na nga karaipi, na nga kaumatua.

44 Na, kua oti tetahi tohu te whakarite ki a ratou e tona kai tuku; i mea ia, Ko taku tangata e kihi ai, ko ia tera; hopukina, kia mau te arahi atu.

45 Na, tona taenga mai, tika tonu ki a ia, ka mea, E te Kai whakaako, e te Kai whakaako; a kihi ana i a ia.

46 ¶ Na, ka pa o ratou ringa ki a ia, a hopukina ana ia.

47 Na ka unuhia he hoari e tetahi o te hunga e tu ana i reira, a hāua iho e ia te pononga o te tohunga nui, a tapahia ana tona taringa.

48 Na ka ki a Ihu, ka mea ki a ratou, He tahae *ahau*, i haere mai ai koutou me nga hoari, me nga patu ki te hopu i a au?

49 I a koutou ahau e whakaako ana i te temepara i tena ra, i tena ra, a kihai koutou i hopu i a au: otira kia rite nga karaipiture.

50 Na, whakarere ana ratou katoa i a ia, a oma ana.

51 Na ka arumia ia e tetahi taitamariki, heoi nei ona kakahu ko tetahi rinena; a ka hopukina ia e nga taitamariki:

52 Na ka mahue i a ia te rinena, a oma tahanga ana i a ratou.

53 ¶ Katahi, ka kawea a Ihu e ratou ki te tino tohunga: a kua huihui mai ki a ia nga tohunga nui katoa, me nga kaumatua, me nga karaipi.

54 A i aru a Pita i a ia i ta-whiti, tae noa ki roto ki te whare o te tohunga nui: a noho tahi ana me nga kai mahi, pāinaina ai ki te taha o te ahi.

55 Na, i rapu nga tohunga nui me te runanga katoa i te korero mo Ihu, e whakamatea ai; heoi kihai i kitea.

56 He tokomaha hoki nga kai whakapae teka mona, otiia kihai i rite a ratou korero.

57 Na ka whakatika etahi, ka whakapae teka ki a ia, ka mea,

58 I rongo matou ki a ia e mea ana, Maku e whakahoro tenei whare tapu i hangā e te ringa, a kia toru nga ra ka hangā e ahau tetahi atu, ehara i te mea i hangā e te ringa.

59 Heoi kihai nei ano i rite a raua korero.

60 Na ka whakatika te tino tohunga i waenganui, ka ui ki a Ihu, ka mea, Kahore āu kupu? he aha ta enei e whakaatu nei mou?

61 Heoi kihai i kuihi, kahore he kupu i whakahokia e ia. Ka ui ano te tino tohunga ki a ia, ka mea ki a ia, Ko koe ranei a te Karaiti, te Tama a Tera e whakapaingia nei?

62 Ka mea a Ihu ki a ia, Ko ahau ano ia: a tera koutou e kite i te Tama a te tangata e noho ana ki matau o te kaha, e haere mai ana i roto i nga kapua o te rangi.

63 Katahi ka haehae te tino tohunga i ona kakahu, ka mea, Hei aha atu ma tatou nga kai whakaatu?

64 Kua rongo koutou ki te kohukohu: e pehea ana a koutou whakaaro? Na ka whakaae ratou katoa ka tika te mate mona.

65 Katahi ka anga etahi ka tuwha ki a ia, ka arai i tona kanohi, ka kuru i a ia, ka mea ki a ia, Poropiti mai: i pahiatia ano ia e nga pononga.

66 ¶ A, i a Pita i te whare i raro, ka haere mai tetahi o nga kotiro a te tohunga nui:

67 A, tona kitenga i a Pita e pānaina ana, ka titiro ki a

ia, ka mea, I a Ihu o Naha-reta ano hoki koe.

68 Na ka whakakahore ia, ka mea, Kahore ahau e mātau, kahore ano e mahara ki tau korero. Haere ana ia ki te whakamahau; a ka tangi te tikaokao.

69 A ka kite te kotiro i a ia, ka anga ka korero ki te hunga e tu tata ana, No ratou hoki tenei.

70 Na ka whakakahore ano ia. A muri tata iho, ka korero ano ki a Pita te hunga e tu tata ana, He pono no ratou koe; no Kariri hoki koe, e rite na hoki tou reo.

71 Katahi ia ka timata te kanga, te oati, Kahore ahau e mātau ki tena tangata e korero na koutou.

72 Na, kua tuarua te tangi o te tikaokao. A ka mahara a Pita ki te kupu i korero ai a Ihu ki a ia, E kore e tuaruatia te tangi o te tikao-kao, ka toru āu whakakahore-tanga ki a au. A ka whakaa-roa iho e ia, na ka tangi.

UPOKO 15.

Kei a Pirato. 6 Parapa mo te ora; Ihu mo te mate. 16 Karauna tataramoa. 21 Ripekatanga. 33 Matenga. 42 Tanumanga.

A MEA kau ake te ata, ka runanga nga tohunga nui, nga kaumatua, nga karaiپی, me te runanga katoa, a, ka oti a Ihu te here, ka arahina atu, a tukua atu ana ki a Pirato.

2 A ka ui a Pirato ki a ia, Ko koe ranei te Kingi o nga

Hurai? A ka whakahokia e ia, ka mea ki a ia, Kua korerotia mai na e koe.

3 A he maha nga mea i whakawakia ai ia e nga tohunga nui.

4 Ka ui ano a Pirato ki a ia, ka mea, Kahore au kupu whakahoki? na, te tini o nga kupu e korero nei ratou mou.

5 Heoi kahore a Ihu kupu; no ka miharo a Pirato.

6 ¶ Na, kotahi te herehere e tukua ana ki a ratou i taua hakari, ta ratou e inoi ai.

7 Na, i reira tetahi tangata, ko Parapa te ingoa, e here tahi ana me ona hoa tutu, he hunga i patu tangata i te ngangaretanga.

8 Na ka karanga te mano, ka anga, ka tono *kia meatia e ia* tana i mea ai ki a ratou i mua.

9 Na ka whakahokia e Pirato ki a ratou, ka mea, E pai ana ranei koutou kia tukua e ahau ki a koutou te Kingi o nga Hurai?

10 I mahara hoki ia he hae i tukua ai ia e nga tohunga nui.

11 Na ka whakahihiri nga tohunga nui i te mano, engari ko Parapa kia tukua ki a ratou.

12 A ka whakahokia ano e Pirato, ka mea ki a ratou, He aha oti ta koutou e pai ai kia meatia e ahau *ki tenei* e meinga nei e koutou ko te Kingi o nga Hurai?

13 Ka karanga ano ratou, Ripekatia.

14 Na, ka ki a Pirato ki a ratou, He aha koia tana kino

i mea ai? Heoi nui noa atu ta ratou hamama, Ripekatia ia.

15 Na ka mea a Pirato kia whakamanawarekatia te mano, a tukua ana e ia a Parapa ki a ratou, a, ka oti a Ihu te whiu, ka tukua kia ripekatia.

16 ¶ Na ka arahina ia e nga hoia ki te marae, ara ki te whare whakawa, a karanga-rangatia ana te hapu katoa.

17 A ka whakakakahuria ia ki te *kakahu* papura, a ka oti tetahi karauna tataramoa te whiri, ka potaea ki a ia.

18 Na ka anga ratou, ka oha ki a ia, Tena koe, e te Kingi o nga Hurai!

19 A patua ana e ratou tona matenga ki te kakaho, tuwha ana ki a ia, a ka tukua nga turi ki a ia, ka koropiko ki a ia.

20 Ano ka mutu ta ratou taunu ki a ia, ka tangohia te *ka kahu* papura, a whakakakahuria ana ia ki ona ake kakahu, a arahina ana ia kia ripekatia.

21 ¶ Na ka meinga e ratou tetahi tangata e tika ana na reira, a Haimona no Hairini, kia amo i tona ripeka; i haere mai ia i nga whenua, ko te papā o Arehanera raua ko Rupuha.

22 Na ka arahina ia ki tetahi wahi, ki Korokota, tona tikanga ina whakamaoritia, Ko te wahi angaanga.

23 A hoatu ana ki a ia he waina, he mea whakananu ki te maira, kia inumia: otira kihai i tangohia e ia.

24 Na, ka oti ia te ripeka, ka

wehewehea ona kakahu, he mea maka ki te rota, *kia kitea ai ko te aha e riro i tetahi, i tetahi.*

25 Na, ko te toru ia o nga haora, a ka ripeka ratou i a ia.

26 I tuhituhia ano ki runga te mea i whakawakia ai ia, KO TE KINGI O NGA HURAI.

27 A tokorua nga tahae i ripekatia ngatahitia me ia; tetahi ki matau, tetahi ki tona mau.

28 Na ka rite te karaipiture e mea nei, I tāua ngatahitia ia me te hunga hara.

29 A tawai ana ki a ia te hunga e haereere ana i reira, me te oioi o ratou mātenga, ka mea, Ha, ko koe hei whakahoro i te whare tapu, hei hanga ano i nga ra e toru,

30 Whakaorangia koe e koe ano, heke iho hoki i te ripeka.

31 Menga tohunga nui, ratou ko nga karaipi, i tawai, i mea tetahi ki tetahi, Ko era atu i whakaorangia e ia, tē taea a ia ake te whakaora e ia.

32 Te Karaiti, te Kingi o Iharaira! kia heke iho i te ripeka, kia kite ai tatou, kia whakaponu ai. I tawai hoki ki a ia te hunga i ripekatia ngatahitia me ia.

33 ¶ Ano ka taea te ono o nga haora, ka pouri a runga o te whenua katoa, taea noatia te iwa o nga haora.

34 A, i te iwa o nga haora, ka karanga a Ihu, he nui te reo, ka mea, Iroi, Iroi, rama hapakatani? ko te tikanga tenei ina whakamaoritia, E

toku Atua, e toku Atua, he aha koe i whakarere ai i a au?

35 A, te rongonga o etahi o te hunga e tu ana i reira, ka mea, Nana, e karanga ana ia i a Iraia.

36 Na ka oma tetahi, ka whakaki i tetahi hautai ki te winika, a whakanohoia ana ki te kakaho ka whakainu atu māna, ka mea, Kāti; kia kite tatou e haere mai ranei a Iraia ki te tango i a ia ki raro.

37 Na, he nui te reo i puaki i a Ihu, a hemo ake.

38 Na, kua pakaru te arai o te whare tapu, e rua nga wahi, o runga a puta noa ki raro.

39 A, te kitenga o te kene-turio e tu ana, e anga mai ana ki a ia, i penei tana karanga, a ka hemo, ka mea ia, He pono ko te Tama a te Atua tenei tangata.

40 I reira hoki etahi wāhine e matakītaki mai ana i ta-whiti: i roto i a ratou a Meri Makarini, a Meri hoki whaea o Hemi potopoto raua ko Hohi, me Haromi hoki;

41 (Ara, nga wāhine i aru nei i a ia, i a ia i Kariri, a i mahi mea māna;) he tokomaha hoki era atu wāhine i haere tahi mai me ia ki Hiruharama.

42 ¶ Na, kua tino ahiahi, ko te ra takanga ano ia, ara, ko to mua ake i te hapati,

43 Na, haere ana a Hohepa o Arimatia, he rangatira runanga, he tangata ano e tatari ana ki te rangatiratanga o te Atua, haere maia ana ia ki

a Pirato, inoia ana te tinana o Ihu.

44 Na, ka miharo a Pirato, hua noa kahore ano i mate: a karangatia ana e ia te keturio, ka ui ki a ia, Kua mate noa ake ranei ia?

45 Ano ka rongo ki te keturio, ka hoatu te tinana ki a Hohepa.

46 A ka hokona e tera tetahi rinena, a tangohia ana ia ki raro, takaia ana ki te rinena; whakatakotoria ana ia ki roto ki te urupa i haua ki te kamaka, a whakatakā atu ana he kohatu ki te kuwaha o te urupa.

47 I kite ano a Meri Makarini raua ko Meri *whaea* o Hohi i te wahi i whakatakotoria ai ia.

UPOKO 16.

Ta te anahera. 9 Putanga o Ihu ki a Meri, 12 ki te tokorua, 14 ki nga apotoro. 19 Kakenga.

A TE pahemotanga o te hapati, ka hokona etahi mea kakara e Meri Makarini, e Meri *whaea* o Hemi, e Haromi, mo ta ratou haere ki te whakawahi i a ia.

2 Na, i te atatu o te *ra* tuatahi o te wiki, ka haere ratou ki te urupa, i te putanga o te *ra*;

3 A ka mea ki a ratou ano, Ko wai ta tatou hei whakataka i te kohatu i te kuwaha o te urupa?

4 A, ta ratou tirohanga atu, ka kite kua hurihia te kohatu: he nui whakaharahara hoki.

5 Ano ka tomo ratou ki te urupa, ka kite i tetahi taitamariki e noho ana ki matau, he kakahu ma tona; a ka koera ratou.

6 Na ka mea ia ki a ratou, Kaua e koera: E rapu ana koutou i a Ihu o Nahareta i ripekatia: kua ara ia; kahore ia i konei: titiro ki te wahi i whakatakotoria ai ia.

7 Otira haere, korerotia atu ki ana akonga, ki a Pita hoki, e haere ana ia i mua i a koutou ki Kariri: ko reira koutou kite ai i a ia, ko tana hoki tena i mea ai ki a koutou.

8 A hohoro tonu ta ratou haere mai, oma mai ana i te urupa; i wiri hoki ratou, i koera: kihai rawa hoki i korero ki tetahi tangata; i wehi hoki.

9 ¶ A, te aranga ake o Ihu i te atatu i te *ra* tuatahi o te wiki, ka mātua puta ia ki a Meri Makarini, e whitu nei nga rewera i peia e ia i roto i a ia.

10 Haere ana tera, ka korero ki ana *akonga* ki mua, i a ratou e pouri ana, e tangi ana.

11 ¶ A, to ratou rongonga ai e ora ana ia, a kua kitea e ia, kihai ratou i whakaponono.

12 Muri iho i enei mea ka puta ia, he ahua ke hoki tona, ki etahi atu o ratou tokorua, i a raua e haere ana, e anga ana ki nga whenua.

13 Na, ka haere raua, ka korero ki era atu: kihai ano hoki ta raua i whakaponohia.

14 ¶ Muri iho ka puta ia ki te tekau ma tahi, i a ratou e

RUKA 1.

noho ana *ki te kai*, a riria iho e ia to ratou whakapono-kore, me te pakeke o te ngakau, mo ratou kihai i whakapono ki te hunga i kite nei i a ia kua ara.

15 Aka mea ki a ratou, Haere ki te ao katoa, kauwhautia te rongou pai ki nga tāngata katoa.

16 Ko ia e whakapono ana, a ka oti te iriiri, ka whakao-rangia; na, te tangata e kore e whakapono, ka tau te he ki a ia.

17 A ka whai tahi enei tohu i te hunga e whakapono ana: Ma toku ingoa ratou ka pei

rewera ai; ka korerotia ai e ratou nga reo hou;

18 Ka tango ake ai i nga nakahi; a ki te inu i tetahi mea whakamate, e kore e ahatia; ka pa o ratou ringa ki nga turoro, a ka ora.

19 Na, te mutunga o tana korerotanga ki a ratou, ka tangohia te Ariki ki te rangi, a noho ana ki te ringa matau o te Atua.

20 Na, haere ana ratou, kauwhau ana i nga wahi katoa, me te mahi tahi ano te Ariki, me te whakau i te kupu ki nga tohu e whai tahi ana. Amine.

KO TE

RONGO PAI A RUKA.

UPOKO 1.

Mo tana pukapuka. 5, 57 Hōani. 26 Anahera ki a Meri. 67 Ta Hakaraia.

NA, he tokomaha kua anga nei ki te whakahaere i te korero o nga mea kua tino whakaaetia nei i roto i a tatou,

2 He mea whakarite tonu ki nga tukunga mai ki a tatou ā nga kai titiro, ā nga kai mahi i te kupu, o te timatanga iho ano;

3 Koia ahau i mea ai kia ata

whakatakina iho nga mea katoa i nga take mai ano, a kia tuhituhi whakatepe atu ki a koe, e Tiopira, e te tangata pai rawa,

4 Kia mātau ai koe ki te tūturutanga o nga mea i whakaakona ai koe.

5 ¶ No mua, no nga ra o Herora kingi o Huria, tetahi tohunga, ko Hakaraia te ingoa, no te wiki o Apia: tanawahine hoki no nga tamahine a Aroana, tona ingoa ko Erihapeti.

6 A he hunga tika raua i te aroaro o te Atua, kahore he

RUKA 1.

he o ta raua haere i runga i nga kupu ako katoa me nga tikanga a te Ariki.

7 Na, kahore ā raua tamariki, he pākoko hoki a Erihapeti, a kua maha haere nga ra o tetahi, o tetahi.

8 A kei nga mahi tohunga ia i te aroaro o te Atua i te takanga mai o tana wiki,

9 E whakarite ana i nga ritenga a nga tohunga; ka taka mai mana te haere ki roto ki te whare tapu o te Ariki, tahu ai i te whakakakara.

10 Na, i waho te nuinga katoa o te iwi e inoi ana, i te haora whakakakara.

11 A ka kitea e ia tetahi anahera a te Ariki e tu ana ki matau o te āta whakakakara.

12 Na ka ohorere a Hakaraia i tona kitenga ai, a tau ana te wehi ki a ia.

13 Na ka mea te anahera ki a ia, Kaua e matakū, e Hakaraia: kua rangona hoki to inoi; a ka whanau tā korua tama ko tāu wahine, ko Erihapeti; me hua ano e koe tona ingoa ko Hoani.

14 A ka hari, ka whakamanamana koe; he tokomaha hoki e hari ki tona whanautanga.

15 E nui hoki ia ki te aroaro o te Ariki; kaua ano ia e inu i te waina, i te wai whakaurangi ranei; a ka ki ia i te Wairua Tapu, no te kopu mai ano o tona whaea.

16 He tokomaha ano hoki o nga tama a Ihairaira ka whakatahuritia e ia ki te Ariki, ki to ratou Atua.

17 Ka haere ano ia i tona aroaro i runga i te wairua, i te mana o Iraia, hei whakatahuri i nga ngakau o nga mātua ki nga tamariki, i te hunga turi ki nga whakaaro o te hunga tika; kia rite ai i a ia he hunga e ata rite ana mo te Ariki.

18 Na, ko te meatanga a Hakaraia ki te anahera, Ma te aha ka mātau ai ahau ki tenei mea? he koroheke nei hoki ahau, kua maha haere hoki nga ra o taku wahine.

19 Na ka whakahokia e te anahera, ka mea ki a ia, Ko Kapariera ahau, kei te aroaro o te Atua toku turanga; a kua tonoa mai nei ahau ki te korero ki a koe, ki te whakapuaki i tenei rongo pai ki a koe.

20 Nana, ka reokoretia koe, e kore ano e taea te whakapuaki kupu, kia tae mai ra ano te ra e meatia ai enei mea, mou kihai i whakapono ki aku kupu, ka mana nei i te wa e rite ai.

21 A tatari tonu te iwi ki a Hakaraia, me te miharo ano ki tona roa ki roto ki te whare tapu.

22 A, tona putanga mai, kihai ia i ahei te korero ki a ratou: a ka mahara ratou, kua kite ia i tetahi putanga atua i roto i te whare tapu: na, ka tungou ia ki a ratou, a mau tonu iho tona wahangu.

23 A ka rite nga ra hei minitātanga māna, ka hoki ia ki tona whare.

24 Na, muri iho i aua raka hapū tana wahine, a Erihapeti,

RUKA 1.

a e rima nga marāma i wha-
kangaro ai ia i a ia, i mea ia,

25 Ko ta te Ariki tenei i mea
ai ki a au, i nga ra i titiro
mai ai ia, ki te whakamutu i
toku tawainga i roto i nga
tāngata.

26 ¶ Na, i te ono o nga mara-
ma ka tonoa a Kapariera, te
anahera, e te Atua ki tetahi pa
o Kariri, ko Nahareta te ingoa,

27 Ki tetahi wahina i tau-
mautia ma tetahi tangata, ko
Hohepa te ingoa, no te whare
o Rawiri; te ingoa o te wa-
hina, ko Meri.

28 Na, te haerenga o te ana-
hera ki roto ki a ia, ka mea,
Tena koe, e te wahine kua
manakohia nei; kei a koe te
Ariki: ko koe te manaakitia i
roto i nga wāhine.

29 A, tona kitenga i a ia, ka
oho ki tana kupu, ka wha-
kaaroaro ki te tikanga o tenei
ohatanga.

30 Na ka mea te anahera ki
a ia, Kei matakū koe, e Meri:
kua paingia hoki koe e te
Atua.

31 Na ka hapū tena koe, a
ka whanau he tama, a me
hua tona ingoa ko IHU.

32 Ka nui ia, ka karangatia
hoki, ko te Tama a te Runga
Rawa: a ka hoatu ki a ia e
te Ariki, e te Atua, te torona
o Rawiri, o tona pāpā:

33 A hei kingi ia mo te whare
o Hakopa ake ake ake; e kore
ano e mutu tona rangatira-
tanga.

34 Na ka mea a Meri ki te
anahera, E peheatia tenei,
kahore nei hoki ahau e mohio
ki te tāne?

35 Na ka whakahokia e te
anahera, a ka mea ki a ia, Ka
tae mai te Wairua Tapu ki
runga ki a koe, a ka tauma-
rumaru iho te kaha o te
Runga rawa ki runga ki a
koe: mo reira ano hoki ka
karangatia tou whanau tapu,
Ko te Tama a te Atua.

36 Na, kua hapū ano tena a
Erihapeti tou teina, he tama,
i tona ruruhitanga; a ko te
ono tenei o nga marama ona
i karangatia nei he pākoko.

37 Kahore hoki he mea e
kore te taea e te Atua.

38 Ano ra ko Meri, Na, ko
te pononga a te Ariki; kia
peratia ahau me tau i korero
ai. A mawehe atu ana te
anahera i a ia.

39 ¶ Na ka whakatika a Meri
i aua ra, a haere kaikā ana ki
te whenua pukepuke, ki te-
tahi pa o Hura;

40 A ka tomo ki te whare o
Hakaraia, ka oha ki a Eriha-
peti.

41 A, te rongonga o Eriha-
peti i te ohatanga a Meri, ka
oho te tamaiti i roto i tona
kopū: na, kua ki a Erihapeti
i te Wairua Tapu;

42 A he nui tona reo ki te
karanga, ka mea, Ka ma-
naakitia koe i roto i nga wā-
hine, ka manaakitia ano te
hua o tou kopū.

43 No hea hoki tenei ki a au,
kia haere mai te whaea o toku
Ariki ki a au?

44 Na, pa kau mai te reo o
to ohatanga ki oku taringa,
ka oho te tamaiti i toku kopū
i te hari.

45 A ka koa ano ia e wha-

RUKA 1.

kapono ana: ka whakaritea hoki nga mea i korerotia ki a ia e te Ariki.

46 Ka mea a Meri, Ka whakanui toku wairua i te Ariki,

47 A e hari ana toku wairua ki te Atua, ki toku Kai whakaora;

48 Mona i titiro ki te iti o tana pononga: ta te mea hoki katahi ahau ka kiia e nga whakatupuranga katoa e haere ake nei, he wahine hari.

49 He nui hoki nga mahi a te Mea Kaha ki ahau; a e tapu ana tona ingoa.

50 He mahi tohu tana ki te hunga e wehi ana ki a ia, ki tenei whakatupuranga, ki tenei whakatupuranga.

51 Kua whakaputaina he kaha e ia, ara, e tona ringa; nana te hunga whakakake i marara ai i te whakaaro a o ratou ngakau.

52 Kua whakatakā e ia te hunga kaha i nga nohoanga, a whakateiteitia ake ana te hunga iti.

53 Kua whakakiia e ia te hunga mate hiakai ki nga mea pai; a tonoa kautia atu ana te hunga taonga.

54 Kua tautokona e ia a Ihairaira tana pononga, he whakamaharatanga hoki ki tana mahi tohu;

55 Ki a Aperahama ratou ko tona whanau ake tonu atu, pera hoki me tana i korero ai ki o tatou mātua.

56 A tata tonu ki te toru o nga marama i noho ai a Meri ki a ia, a hoki ana ki tona whare.

57 ¶ A ka rite te taima o

Erihapeti e whanau ai; na, ka whanau he tama.

58 A, te rongonga o te hunga e noho tata ana, me ona whanaunga, kua whakanuia e te Ariki tona aroha ki a ia; na ka hari tahi me ia.

59 A i te waru o nga ra ka haere mai ratou ki te kokoti i te tamaiti; a huaina ana e ratou, ko Hakaraia, ko te ingoa hoki o tona pāpā.

60 Na ka whakahokia e tona whaea, ka mea, Kahore; engari me hua ia ko Hoani.

61 Na, ko ta ratou meatanga ki a ia, Ara, kahore tenei ingoa i huaina ki tetahi o ou whanaunga.

62 Na ka tungou ratou ki tona pāpā, ko wai tana e pai ai kia huaina ki a ia.

63 A ka mea ia ki tetahi papa tuhituhi, a ka tuhituhi, ka mea, Ko Hoani he ingoa mona. A miharo ana ratou katoa.

64 Na ka whai reo tonu iho tona mangai, me tona arero, a ka korero ia, ka whakapai ki te Atua.

65 A tau ana te wehi ki te hunga katoa e noho tata ana ki a ratou: a ka korerotia enei mea katoa puta noa i te whenua pukepuke katoa o Huria.

66 Na ka rongoatia enei mea ki roto ki o ratou ngakau e te hunga katoa i rangona ai, ka mea, He tama aha ianei tenei! I a ia hoki te ringa o te Ariki.

67 ¶ Na, kua ki a Hakaraia, tona pāpā, i te Wairua Tapu, a ka poropiti, ka mea,

RUKA 1, 2.

68 Kia whakapaingia te Ariki, te Atua o Iharaia; kua titiro mai hoki ia, kua hoko i tona iwi,

69 A kua whakaarahia ake e ia he haona whakaora mo tatou, i roto i te whare o Rawiri, o tana pononga;

70 Ko tana hoki ia i kore-rotia e te mangai o ana poropiti tapu, no te timatanga ano o te ao:

71 Hei whakaora i a tatou i o tatou hoa whawhai, i te ringa ano o te hunga katoa e kino ana ki a tatou;

72 Hei whakaputanga mo te mahi tohu ki o tatou tupuna, hei whakamaharatanga ki tana kawenata tapu;

73 Ki te oati i oati ai ia ki a Aperahama, ki to tatou tupuna,

74 Kia tukua mai e ia ki a tatou he oranga i te ringa o o tatou hoa whawhai; a kia mahi wehi kore ki a ia,

75 I runga i te tapu, i te tika, ki tona aroaro, i nga ra katoa e ora ai tatou.

76 A ko koe, e tama, ka karangatia, ko te poropiti a te Runga rawa: e haere hoki koe i te aroaro o te Ariki, hei whakapai i ona ara;

77 Hei whakamatau i tona iwi ki te whakaoranga, i o ratou hara e murua ana;

78 He mea hoki na te aroha na te mahi tohu a to tatou Atua; na reira hoki i puta ai te puaotanga o runga ki a tatou,

79 Hei whakamārama i te hunga e noho ana i te pouri, i te atarangi hoki o te mate,

hei whakatika i o tatou wae-wae ki te huarahi o te rangi-marie.

80 Na ka tupu taua tamaiti, a ka kaha haere tona wairua; a noho ana i nga koraha, taea noatia te ra e whakakitea ai ia ki a Iharaia.

UPOKO 2.

Whanautanga o Ihu. 8 Ana-hera ki nga hepara. 22 Puringa o Meri. 25 Ta Himiona. 36 Ana. 41 Te Tamaiti i te temepara.

IAUA ra ka whakatakotoria he tikanga e Hiha Akuhata, kia tuhituhia te ao katoa.

2 No te kāwanatanga o Hairinia i Hiria i meatia ai tenei tuhituhinga tuatahi.

3 A ka haere nga tāngata katoa kia tuhituhia, ia tangata, ia tangata, ki tona pa ake ano.

4 A i haere atu ano a Hohepa i Kariri, i te pa o Nahareta, ki Huria, ki te pa o Rawiri, ko Peterehema te ingoa; (no te mea no te whare ia, no te kawei o Rawiri:)

5 Kia tuhituhia ai raua ko Meri tana wahine taumau, ko ia ano e hapū ana.

6 A, i a raua i reira, ka rite nga ra e whanau ai ia.

7 Na ka whanau tana mata-mua, a takaia ana e ia ki nga kakahu, ka whakatakotoria ki te takotoranga kai ma nga kararehe; no te mea kahore he wahi mo ratou i te whare.

8 ¶ A i taua wahi etahi hepara e noho koraha ana, e tia-ki ana i ta ratou kahui i te po.

RUKA 2.

9 Na, ko te putanga o tetahi anahera a te Ariki ki a ratou, a whiti mai ana te kororia o te Ariki ki a ratou, a tawhio noa: a nui whakaharahara to ratou wehi.

10 Na ka mea te anahera ki a ratou, Kua e matakū: ta te mea he kai kauwhau tenei ahau ki a koutou mo te hari nui, meāke puta mai ki te iwi katoa.

11 Nonaianei hoki i whanau ai he Kai whakaora mo koutou i te pa o Rawiri, ara a te Karaiti, te Ariki.

12 A ko te tohu tenei ki a koutou; E kite koutou i te tamaiti ka oti te takai ki te kakahu, e takoto ana i te takotoranga kai ma nga kararehe.

13 A kihai i aha ko te tini noa iho o te ope o te rangi e noho tahi ana me taua anahera, e whakamoemiti ana ki te Atua, e mea ana,

14 *Kia whai* kororia te Atua i runga rawa, kia mau terongo ki runga ki te whenua, me te whakaaro pai ki nga tāngata.

15 A, ka mawehe atu nga anahera i a ratou ki te rangi, ka mea nga hepara tetahi ki tetahi, Tatou ka haere ki Pēterehema, kia kite i tenei mea kua puta nei, kua whakapua-kina mai nei e te Ariki ki a tatou.

16 Na ka hohoro ratou te haere, a ka kite i a Meri, i a Hohepa, i te tamaiti ano e takoto ana i te takotoranga kai ma nga kararehe.

17 Ano ka kite, ka whakapuakina te mea i korerotia ki a ratou mo tenei tamaiti.

18 A miharo ana nga kai whakarongo katoa ki enei mea, i korerotia nei ki a ratou e nga hepara.

19 Ko Meri ia, i ata rongoa i enei mea katoa, whakaaroaro ai i roto i tona ngakau.

20 Na ka hoki nga hepara, me te whakakororia, me te whakamoemiti ki te Atua mo nga mea katoa i rongoa nei, i kite nei ratou, i rite nei ki nga mea i korerotia ki a ratou.

21 Ano ka rite nga ra e waru e kotia ai te tamaiti, ka hua ina tona ingoa ko IHU, ko ta te anahera i hua ai i te mea kahore ano i hapū tona whaea.

22 ¶ A ka rite nga ra e purea ai te *whaea*, e whakaritea ai te ture a Mohi, ka kawea ia e ratou ki Hiruharama, kia tapaea atu ki te Ariki;

23 (Kia peratia me te mea i tuhituhia ki te ture a te Ariki, Ko nga tāne katoa e oroko puta mai i te kopū, e karangatia, e tapu ana ki te Ariki;

24 Kia hoatu ano he patunga tapu, te mea i korerotia i roto i te ture a te Ariki, Kia rua kukupa, kia rua ranei pi kukupa.

25 ¶ Na, i Hiruharama tetahi tangata ko Himiona te ingoa; he tangata tika, he tangata whakaaro, e tatari ana ki te whakaharinga o Iharaira: a kei runga te Wairua Tapu i a ia.

26 Na, kua whakamaharatia mai ia e te Wairua Tapu, e kore ia e kite i te mate, kia kite ra ano ia i ta te Ariki Karaiti.

RUKA 2.

27 Na ka haere mai ia ki te temepara, he meatanga na te Wairua: a i nga mātua e mau mai ana i te tamaiti, i a Ihu, kia meatia ai e raua ki a ia ta te ture i whakarite ai,

28 Ka tango ia i a ia ki ona ringa, a ka whakapai ki te Atua, ka mea,

29 Katabi, e te Ariki, ka tukua to pononga kia haere i runga i te rangimarie, ka pera me tau i korero ai:

30 Ka kite nei hoki oku kanohi i tau whakaoranga,

31 Ka whakatakotoria nei e koe ki te aroaro o nga iwi katoa;

32 Hei whakamārama e kite ai nga tauiwi, hei kororia hoki mo to iwi, mo Iharaira.

33 A miharo tonu a Hohepa raua ko tona whaea ki nga kupu i korerotia mona.

34 Na ka manaaki a Himi-ona i a raua, a ka mea ki a Meri, ki tona whaea, Nana, ka waiho tenei *tama* hei takanga, hei aranga, mo te tini o te tangata i roto i a Iharaira; hei tohu hoki e korerotia kinotia;

35 (Ae ra, ka tika atu ano te hoari, a puta noa i tou ake wairua,) e hurahia ai nga whakaaro o nga ngakau maha.

36 ¶ Me Ana hoki, he poropiti, he tamahine na Panuera, no te iwi o Ahera: kua maha haere ona ra, e whitu nga tau o tona wahinatanga ake i noho ai ia ki te tane;

37 He pouaru, tata pu ki te waru tekau ma wha ona tau; heoi kihai i mahue i a ia te temepara; he karakia tonu

tāna, he noho puku, he inoi, i te po, i te ao.

38 Na ka tae mai ia i taua haora ano, ka whakawhetai ki te Ariki, a korerotia ana ia e ia ki te hunga katoa o Hiruharama e tatari ana ki te whakaoranga.

39 Ano ka oti nga mea katoa e rite ana ki ta te ture a te Ariki, ka hoki ratou ki Kariri, ki to ratou pa, ki Nahareta.

40 Na ka tupu te tamaiti, a ka kaha haere tona wairua, ka ki i te whakaaro nui: i a ia ano to te Atua aroha noa.

41 ¶ Ai haere ona mātua i ia tau, i ia tau, ki Hiruharama ki te hakari o te kapenga.

42 A, ka tekau ma rua ona tau, ka haere ratou ki Hiruharama i runga i nga ritenga o te hākari:

43 A ka rite nga ra, i a raua e hoki ana, ka noho te tamaiti, a Ihu ki Hiruharama; kihai hoki a Hohepa raua ko tona whaea i mohio.

44 I mea hoki raua kei roto ia i te tira, na ka haere, kotahi te ra ki te ara; a ka rapu raua i a ia i roto i nga whanaunga, i a raua tāngata hoki i mohio ai.

45 A, tē kitea ia, hoki ana ki Hiruharama, ki te rapu i a ia.

46 A, muri iho i nga ra e toru, ka kitea ia i roto i te temepara, e noho ana i wae-nganui o nga kai whakaako, e whakarongo ana ki a ratou, e ui ana ki a ratou.

47 A miharo katoa ki tona matauranga, ki ana korero, te hunga i rongongia ki a ia.

48 Ano ka kite raua i a ia,

ka tino miharo: a ka mea tona whaea ki a ia, E tama, he aha koe i penei ai ki a maua? na, pouri noa iho maua ko tou pāpā, i a mana i rapu nei i a koe.

49 Ka mea ia ki a raua, He aha korua i rapu ai i a au? kihai korua i mahara, me mea ahau i nga mea a toku Matua?

50 Heoi kihai raua i mātau ki te kupu i korerotia e ia ki a raua.

51 Na ka haere tahi atu ia me raua, ka tae ki Nahareta, a ka ngohengohe ki a raua; ko tona whaea ia, i rongoa i enei kupu katoa i roto i tona ngakau.

52 Na ka kake haere a Ihu te whakaaro nui, te kaumatua, ka paingia ano e te Atua, e te tangata.

UPOKO 3.

1, 18 *Hoani.* 15 *Mo Ihu.*

21 *Iriiringa o Ihu.* 23 *Nga tupuna o Meri.*

NA, i te tekau ma rima o nga tau o te rangatira-tanga o Taipiria Hiha, i a Ponotio Pirato e kawana ana i Huria, i a Herora e tetaraki ana i Kariri, i tona teina hoki i a Piripi e tetaraki ana i Ituria, i te whenua hoki o Taronaiti, a ko Rihania e tetaraki ana i Apirini,

2 Ko Anaha raua ko Kaiapa nga tohunga nui, ka puta te kupu a te Atua ki a Hoani, tama a Hakaraia, ki te koraha.

3 Na ka haere ia ki nga wahi katoa e patata ana ki Horano, ka kauwhau i te iriiri ripeneta, hei murunga hara;

4 I pera ano ia me te mea i tuhituhia ki te pukapuka o nga korero a Ihaia poropiti, i mea nei, He reo no tetahi i te koraha e karanga ana, Whakapaia te huarahi o te Ariki, whakatikaia ona ara;

5 Ka whakakiiia nga awaawa katoa, ka tahoroa nga mau-nga me nga pukepuke katoa; a e meinga kia tika nga wahi kopikopiko, ko nga wahi taratara hei ara maeneene;

6 A e kite nga kikokiko katoa i te whakaoranga a te Atua.

7 Na ka mea ia ki nga mano i haere mai kia iriiria e ia, E te uri nakahi, na wai koutou i whakamahara kia rere i te riri meake puta mai?

8 Na, whakaputaina nga hua e rite ana ki o te ripeneta, a kei anga, kei mea i roto i a koutou, Ko Aperahama to tatou matua: ko taku kupu hoki tenei ki a koutou, E ahei ana ano i te Atua te whakaara tamariki ake ma Aperahama i roto i enei kohatu.

9 Na, tenei ka pa te titaha ki te pakiaka o nga rakau: a ki te kahore tetahi rakau e hua i te hua pai, ka tuakina, ka māka ki te ahi.

10 Na ka ui nga mano ki a ia, ka mea, Me aha ra matou?

11 Na ka whakahokia e ia, a ka mea ki a ratou, Ko te tangata i nga koti e rua, kia hoatu ki te tangata kahore ona; me te tangata he kai tana, kia pera ano.

12 Na ka haere hoki nga pupirikana kia iriiria, a ka mea ki a ia, E te kai whakako, me aha matou?

RUKA 3.

13 Ka mea ia ki a ratou, Kei nui ake i nga mea i whakari-tea ma koutou ta koutou e tango ai.

14 Ka ui ano nga hoia ki a ia, ka mea, Me aha hoki matou? Na, ko tana meata-nga ki a ratou, Kaua e tuki-notia tetahi, kaua e whakapae teka; kati ano ma koutou ko o koutou utu.

15 ¶ Na, i te iwi e tatari ana, a e whakaaroaro katoa ana i roto i o ratou ngakau ki a Hoani, ko te Karaiti ia, ehara ranei;

16 Ka ki a Hoani, ka mea ki a ratou katoa, Ko ahau nei, he iriiri taku i a koutou ki te wai; kei te haere mai ia tetahi e kaha rawa ana i a au, e kore ahau e tau hei wewete i te here o ona hu: mana koutou e iriiri ki te Wairua Tapu ki te kapura:

17 Ko tana mea tahi kei tona ringa, a ka tino tahia e ia tana patunga witi, e kohia ano e ia te witi ki roto ki tana whare witi; ko te papapa ia e tahuna ki te kapura e kore e tineia.

18 ¶ He maha atu ano ana kupu whakahau i kauwhau ai ia ki te iwi.

19 Otira i riria e ia a Herora tetaraki mo Heroriaha, wahine a Piripi, a tona tuakana, mo nga kino katoa hoki i meinga e Herora;

20 Na, i runga i era katoa, tutakina ana e ia a Hoani ki te whare herehere.

21 ¶ A, kapoto te iwi te iriiri, i a Ihu ano kua iriiria, a e inoi ana, ka tuwhera te rangi,

22 Na ka heke iho te Wairua Tapu ki runga ki a ia, he ahua tinana ano hoki tona, ano he kukupa, ka puta ano he reo no te rangi, e mea ana, Ko koe taku Tama i aroha ai, taku i ahua-reka atu ai.

23 ¶ Na, a Ihu nei, e whakatatata ana ona tau ki te toru tekau; a ki ta te tangata ki, he tama ia na Hohepa, a ko ia ta Hiri,

24 Ko ia ta Matata, ko ia ta Riwai, ko ia ta Mereki, ko ia ta Iana, ko ia ta Hohepa,

25 Ko ia ta Matatiaha, ko ia ta Amoho, ko ia ta Nauma, ko ia ta Eheri, ko ia ta Nakai,

26 Ko ia ta Maata, ko ia ta Matatiaha, ko ia ta Hemei, ko ia ta Hohepa, ko ia ta Hura,

27 Ko ia ta Hoana, ko ia ta Reha, ko ia ta Horopapere, ko ia ta Haratiere, ko ia ta Neri,

28 Ko ia ta Mereki, ko ia ta Ari, ko ia ta Kohama, ko ia ta Eremorama, ko ia ta Ere,

29 Ko ia ta Hohe, ko ia ta Erietere, ko ia ta Horimi, ko ia ta Matata, ko ia ta Riwai,

30 Ko ia ta Himiona, ko ia ta Hura, ko ia ta Hohepa, ko ia ta Honana, ko ia ta Eriakimi,

31 Ko ia ta Merea, ko ia ta Mainana, ko ia ta Matata, ko ia ta Natana, ko ia ta Rawiri,

32 Ko ia ta Hehe, ko ia ta Opere, ko ia ta Poaha, ko ia ta Haramono, ko ia ta Nahona,

33 Ko ia ta Aminarapa, ko ia ta Arame, ko ia ta Hete-

romo, ko ia ta Parete, ko ia ta Hura,

34 Ko ia ta Hakopa, ko ia ta Ihaka, ko ia ta Aperahama, ko ia ta Tara, ko ia ta Nahora,

35 Ko ia ta Haruku, ko ia ta Rakau, ko ia ta Pereke, ko ia ta Epere, ko ia ta Hara,

36 Ko ia ta Kainana, ko ia ta Arapahata, ko ia ta Hema, ko ia ta Noa, ko ia ta Rameka,

37 Ko ia ta Matuhara, ko ia ta Enoka, ko ia ta Iarere, ko ia ta Marereere, ko ia ta Kainana,

38 Ko ia ta Enoha, ko ia ta Heta, ko ia ta Arama, ko ia ta te Atua.

UPOKO 4.

Whakamatautauranga o Ihu.

14 *Kauwhautanga.* 31 *Ta-
ngata i te rewera.* 38 *Hu-
ngawai o Pita, me era atu
turoro.* 40 *Nga rewera.*
42 *Tana inoinga.*

NA, ki tonu a Ihu i te Wairua Tapu, a hoki ana i Horano; na ka kawea ia e te Wairua ki te koraha,

2 A e wha tekau nga ra i whakamatautauria ai ia e te rewera. Kihai ano i kai i tetahi mea i aua ra: ka pahemo, muri iho ka hiakai.

3 Na ka mea te rewera ki a ia, Ki te mea ko te Tama koe a te Atua, kiia iho tenei kohatu kia meinga hei taro.

4 Na ka whakahokia e Ihu ki a ia, ka mea, Kua oti te tuhituhi, E kore e ora te tangata i te taro kau, engari i nga kupu katoa a te Atua.

5 Katahi te rewera ka kawea

i a ia ki runga ki tetahi maunga tiketike, a mea kau iho kua whakakitea katoatia ki a ia nga rangatiratanga katoa o te ao.

6 Ka mea te rewera ki a ia, Maku e hoatu ki a koe tenei rangatiratanga katoa, me te kororia o enei mea: kua tukua hoki ki ahau; a ka hoatu e ahau ki taku e pai ai.

7 Na, ki te koropiko koe ki toku aroaro, mou katoa.

8 Na ka whakahokia e Ihu ki a ia, ka mea, Haere ki muri i a au, e Hatana: kua oti hoki te tuhituhi, Me koropiko koe ki te Ariki, ki tou Atua, me mahi ano ki a ia anake.

9 Na ka kawea ia ki Hiruharama, a whakaturia ana ki runga ki te keokeonga o te temepara, a ka mea ki a ia, Ki te mea ko te Tama koe a te Atua, rere atu i konei ki raro:

10 Kua oti hoki te tuhituhi, Ka korerotia iho koe e ia ki ana anahera kia tiakina koe:

11 Ma ratou koe e hiki ake ki o ratou ringa, kei tūtuki tou waewae ki te kohatu.

12 Na ka whakahokia e Ihu, ka mea ki a ia, Kua takoto te korero, Aua e whakamatautau ki te Ariki, ki tou Atua.

13 A ka mutu katoa te whakamatautauranga a te rewera, ka mawehe atu i a ia mo tetahi wahi.

14 ¶ Na ka hoki a Ihu i runga i te kaha o te Wairua ki Kariri: a haere ana tona rongoro, a puta noa i nga wahi tata katoa.

15 A ka whakaako ia i roto i o ratou whare karakia, me te whakakororia te katoa i a ia.

16 ¶ Na ka haere ia ki Naha-reta, ki te wahi i whangainga ai ia: ka tomo i te ra hapati ki te whare karakia, ko tana hanga hoki ia, ka whakatika ki te korero pukapuka.

17 A ka homai ki a ia te pukapuka a Ihaia poropiti. Ano ka wherahia te pukapuka, ka tupono ia ki te wahi i tenei tuihuhinga,

18 Kei ahau te Wairua o te Ariki, nāna nei hoki ahau i whakawahi, hei kauwhau i te rongo pai ki te hunga rawakore; kua tonoa mai ahau e ia ki te whakaora i te hunga ngakau marū, ki te kauwhau ki nga herehere kia haere noa, ki nga matapo kia titiro, ki te tuku i te hunga e kurua ana kia haere noa atu,

19 Ki te kauwhau i te tau manakohanga mai a te Ariki.

20 Na ka kopia e ia te pukapuka, a hoatu ana ki te kai tiaki, noho ana. A matatau tonu ki a ia nga kanohi o te hunga katoa i roto i te whare karakia.

21 Katahi ia ka anga, ka korero ki a ratou, Nonaianei, i o koutou taringa e *whakarongo* mai nei, i mana ai tenei karaipiture.

22 A i whakapai ratou katoa ki a ia, i miharo ki nga kupu pai i puta i tona mangai. Ka mea ratou, Ehara ianei tenei i te tama a Hohepa?

23 Ka mea ia ki a ratou, Tera rawa e puaki mai i a koutou

tenei kupu whakarite ki a au, E rata, rongoa koe i a koe ano: ko nga mea i rongo ai matou kua meinga ki Kapere-nauma, meinga hoki ki konei ki tou whenua.

24 I mea ano ia, He pono taku e mea nei ki a koutou, E kore te poropiti e manakohia i tona ake whenua.

25 Otira he pono taku e mea nei ki a koutou, He tokomaha nga pouaru i roto i a Ihairaira i nga ra i a Iraia, i te rangi kua oti te kopani i nga tau e toru, i nga marama e ono, i te mate-kaitanga nui o te whenua katoa;

26 Heoi kihai i tonoa a Iraia ki tetahi o ratou, ki te wahine pouaru anake, ki Harepata o Hairona.

27 He tokomaha hoki nga repera i roto i a Ihairaira, i nga ra o Eriha poropiti: a kihai tetahi o ratou i whakamakia, ko Naamana anake o Hiria.

28 A ki tonu i te riri te hunga katoa i te whare karakia, i te rongonga ai ki enei mea;

29 Na, ko to ratou whakatinga ake, ka maka i a ia ki waho o te pa, a arahina ana ki te pari o te puke i hangā ai to ratou pa, whakataka ai i a ia ki raro.

30 Otira i tika ia ra wae-nganui o ratou, a haere ana.

31 ¶ A ka tae ki Kaperenau-ma, ki tetahi pa o Kariri, ka whakaako hoki i a ratou i nga hapati.

32 Na ka miharo ratou ki tana ako: i whai mana hoki tana kupu.

33 A i te whare karakia tetahi tangata he wairua rewera poke tona, a nui atu tona reo ki te karanga,

34 Ka mea, Kāti ra; he aha matou nāu, e Ihu o Nahareta; kua tae mai koe ki te whakangaro i a matou? e mohio ana ahau ki a koe; ko te Mea Tapu a te Atua.

35 Na, riria iho ia e Ihu, ka mea ia, Kāti to korero, puta mai hoki i roto i a ia. Katahi te rewera ka turaki i a ia ki waenganui, a puta mai ana i roto i a ia, kihai hoki tera i ahatia.

36 Na, tau ana te miharo ki a ratou katoa, a ka korororero tetahi ki tetahi, ka mea, He aha tenei kupu? mana tonu nei hoki tana tono i nga wairua poke, kaha tonu, a puta mai ana ki waho.

37 A pakū ana tona rongo puta noa i nga wahi tutata katoa.

38 ¶ A, tona whakatikanga i te whare karakia, tomo tonu ki te whare o Haimona. Na, e mate ana te hungawai wahine o Haimona, he nui te kiri-ka; a ka inoi ratou ki a ia mona.

39 Na ka tu ia ki runga i a ia, a riria iho te kiri-ka; a mutu ake: na, ara tonu ake ia kei te taka mea ma ratou.

40 ¶ I te toenetanga o te ra, ka kawea mai ki a ia e nga tangata katoa nga mea o ratou e mate ana i te tini o nga mate; na, whakapakia iho e ia ona ringa ki tenei, ki tenei o ratou, a ora ake ratou.

41 A he tokomaha te hunga

i puta mai nga rewera i roto i a ratou; i karanga hoki *ana wairua*, i mea, Ko te Karaiti koe, ko te Tama a te Atua. A riria ana ratou e ia, kihai i tukua kia korero: i mātau hoki ratou ko te Karaiti ia.

42 ¶ Ka ao te ra, ka puta atu ia, ka haere ki tetahi wahi koraha: a ka rapu nga mano i a ia, a ka tae ki a ia, na, puritia ana ia, kei whakarerea ratou e ia.

43 Ka mea ia ki a ratou, Me kauwhau e ahau te rangatiratanga o te Atua ki era atu pa ano: koia hoki ahau i tonoa mai ai.

44 A kauwhau ana ia i nga whare karakia o Kariri.

UPOKO 5.

Kei te kaupuke o Pita.

12 *Repera.* 17 *Pararutiki.*

27 *Riwai.* 29 *Tana hakari.*

33 *Korenga e nohopuku o ana akonga.*

A I te mano e aki mai ana ki a ia ki te whakarongo ki te kupu a te Atua, na, e tu ana ia i te taha o te roto o Kenehareta,

2 Na ka kite ia i etahi kaupuke e rua e tu ana i te taha o te roto: ko nga kai hao ia, kua riro mai i runga, e horoi ana i nga kupenga.

3 Na ka eke ia ki tetahi o nga kaupuke, ki to Haimona, ka mea ki a ia kia neke atu ki waho tata. Na, noho ana ia, whakaakona ana e ia te iwi i runga i te kaupuke.

4 A, ka mutu tana korero, ka mea ia ki a Haimona, Neke atu ki te wahi hohonu, ka

RUKA 5.

tuku ai i ā koutou kupenga ki te hao.

5 Na, ko te whakahokinga a Haimona, ka mea ki a ia, E kara, mahi noa matou i te po roa nei, tē mau tetahi: heoi nau na te kupu, me tuku e ahau te kupenga.

6 A, ta ratou meatanga i tenei, he mano tini nga ika i mau i a ratou: a ka whakapakaru ta ratou kupenga.

7 Na ka tawhiri ratou ki o ratou hoa i tera kaipuke, kia hoe mai hei hoa mo ratou. A, to ratou taenga mai, whakakii ana nga kaipuke e rua, no ka whakatotohu.

8 A, te kitenga o Haimona Pita, ka hinga iho ki nga turi o Ihu, ka mea, Mawehe atu i a au, e te Ariki; he tangata hara hoki ahau.

9 Mau tonu hoki tona miharo me to ona hoa katoa, ki te haonga o nga ika i haoa nei e ratou:

10 To Hemi hoki raua ko Hoani, he tama raua na Heperi, he hoa hoki no Haimona. Na ka mea a Ihu ki a Haimona, Kaua e matakū; i enei wa e takoto ake nei ka hao tangata koe.

11 A ka whakauria nga kaipuke ki uta, mahue ake nga mea katoa i a ratou, a aru ana i a ia.

12 ¶ A i a ia i tetahi o nga pa, na, ko tetahi tangata ekapi ana i te repera: a, tona kitenga i a Ihu, ka takoto tapapa, ka inoi ki a ia, ka mea, E te Ariki, ki te pai koe, e taea ahau e koe te mea kia ma.

13 Na ka totoro tona ringa, ka pa ki a ia, ka mea, E pai ana ahau: kia ma koe. A mutu tonu ake tona repera.

14 Na ka whakatupato ia i a ia kia kua e korerotia ki te tangata: Engari haere, kia kite te tohunga i a koe, kawea atu hoki mo tou whakamakanga nga mea i whakaritea e Mohi, hei mea whakaatu ki a ratou.

15 Heoi tino pakū atu ana tona rongo: a he tokomaha noa atu i huihui mai ki te whakarongo, kia whakaorangia hoki e ia o ratou ngoi-koretanga.

16 Otira i haere puku ia ki te koraha, ki te inoi.

17 ¶ A i tetahi o aua ra, e whakaako ana ia, me te noho ano nga Parihi me nga kai whakaako o te ture, i haere mai nei i nga kāinga katoa o Kariri, o Huria, o Hiruharama: a i reira ano te kaha o te Ariki hei whakaora i a ratou.

18 Na, ko etahi tāngata e kawea mai ana i tetahi tangata i runga i te moenga, he pararutiki: a mea noa ratou kia kawea ia ki roto, kia whakatakotoria ki tona arbaro.

19 A, tē kitea e ratou te peheatanga e kawea ai ia ki roto, i te mano hoki, ka kakea te whare, a tukua iho ana ia ra nga toetoe, me te moenga ano, ki waenganui, ki te aroaro o Ihu.

20 A, tona kitenga i to ratou whakapono, ka mea ia ki a ia, E hoa, ka oti ou hara te mura.

21 Na ka anga, ka whakaroaro nga karaipi me nga Parihi, ka mea, Ko wai tenei nāna nga kupu kohukohu? Ko wai hei muru hara? ko te Atua anake.

22 Otira i mahara a Ihu ki ā ratou whakaroaronga, a ka oho, ka mea ki a ratou, He aha ta koutou e whakaroaro na i roto i o koutou ngakau?

23 Ko tehea te mea takoto noa, ko te mea, Ka oti ou hara te muru; ko te mea ranei, Whakatika, haere?

24 Otiia kia mātau ai koutou he mana muru hara to te Tama a te tangata i runga i te whenua, (ka mea ia ki te pararutiki,) Ko taku kupu tenei ki a koe, Whakatika, tangohia ake tou moenga, haere ki tou whare.

25 Na, whakatika tonu ake ia i to ratou aroaro, a tangohia ake ana te mea i takoto ai ia, haere ana ki tona whare, me te whakakororia i te Atua.

26 A miharo katoa ratou, ka whakakororia i te Atua, ki tonu hoki ratou i te mataku, ka mea, Puta ke nga mea i kite nei tatou i naianei.

27 ¶ A, muri iho i enei mea, ka haere ia, a ka kite i tetahi pupirikana, ko Riwai te ingoa, e noho ana i te wahi tango takoha: a ka mea ki a ia, Arumia mai ahau.

28 Na, whakarerea ake e ia nga mea katoa, a whakatika ana, aru ana i a ia.

29 ¶ Na ka takā e Riwai he hākari nui māna i tona whare:

a he tokomaha nga pupirikana me nga tāngata ke i noho tahi ratou.

30 Na ka amuamu o ratou karaipi me nga Parihi ki ana akonga, ka mea, He aha koutou ka kai tahi ai, ka inu tahi ai me nga pupirikana me nga tāngata hara?

31 Na ka whakahokia e Ihu, a ka mea ki a ratou, Kahore he aha o nga tāngata ora e meatia ai e te rata, engari o te hunga e mate ana.

32 Kihai ahau i haere mai ki te karanga i te hunga tika, engari i te hunga hara, kia ripeneta.

33 Na ka mea ratou ki a ia, He aha nga akonga a Hoani ka hono ai te noho puku, ka inoi ai, me nga akonga ano a nga Parihi; ko āu ia e kai ana, e inu ana?

34 Na, ko tana meatanga ki a ratou, E taea ranei e koutou te mea kia noho puku nga tama o te whare marena, i te mea kei a ratou te tāne marena hou?

35 Na, tera e tae mai nga ra e tangohia ai te tāne marena hou i a ratou, katahi ratou ka noho puku i aua ra.

36 I korerotia ano e ia tetahi kupu whakarite ki a ratou; E kore e makā e te tangata tetahi wahi o te kahu hou hei papaki mo te kahu tawhito; kei pakaru i te mea hou, a e kore te papaki i tangohia mai i te mea hou e u ki te mea tawhito.

37 E kore hoki te tangata e riringi i te waina hou ki te ipu tawhito; kei pakaru nga

ipu i te waina hou, na, ka maringi, a kore ake nga ipu.

38 Engari me riringi te waina hou ki te ipu hou; a ora ake e rua, e rua.

39 Ka inu hoki te tangata i te waina tawhito, e kore ia e hiahia wawe ki te mea hou: e mea hoki ia, Erangi te mea tawhito.

UPOKO 6.

Hapati. 12 Te Tekau ma rua, 17 Turoro. 20 Kaw-whau. 47 Turanga pai mo te whare.

NA, i te hapati tuatahi i muri i te ra tuarua, ka haere ia ra waenga witi; a katohia ana e ana akonga nga puku witi, kainga ake, he mea komukumuku ki nga ringa.

2 Ka mea etahi o nga Parihi ki a ratou, He aha koutou ka mea ai i te mea e kore e tika kia meatia i te hapati?

3 Na ka whakahokia e Ihu, a ka mea ki a ratou, Kahore ianei koutou i kite i ta Rawiri i mea ai, i a ia e mate ana i te hiakai, ratou ko ona hoa;

4 I tona tomokanga atu ki te whare o te Atua, a tango-hia ana e ia nga taro aroaro, na, kainga ana e ia, hoatu ana hoki ki ona hoa, nga mea kihai nei i tika kia kainga, engari ma nga tohunga anake?

5 I mea ano ia ki a ratou, Ko te Tama a te tangata te Ariki ano hoki o te hapati.

6 ¶ A i tetahi atu hapati, ka tomo ia ki te whare karakia,

ka whakaako: a kei reira tetahi tangata, ko tona ringa matau kua memenge.

7 A ka titiro pu nga karaipi me nga Parihi ki a ia, me kore ia e whakaora i te hapati; kia ai hei whakawakanga mona.

8 Na ka mahara ia ki a ratou whakaaro, a ka mea ki te tangata i te ringa memenge, Whakatika, e tu ki wacnganui. A whakatika ana ia, tu ana.

9 Katahi ka mea a Ihu ki a ratou, Maku e ui ki a koutou tetahi mea; He mea tika ranei te mahi pai i te hapati, te mahi kino ranei? te whakaora, te whakamate ranei?

10 Na ka tiroiro ia ki a ratou katoa, a ka mea ki taua tangata, Torona mai to ringa. A pera ana ia: na, kua ora ano tona ringa, kua pera me tetahi.

11 Na, ki tonu ratou i te haurangi; a ka korerorero ki a ratou ano, me aha ranei a Ihu e ratou.

12 ¶ A i ana ra ka haere ia ki te maunga ki te inoi, a he inoi tonu tana i te roa o te po ki te Atua.

13 A ka ao te ra, ka karangatia e ia ana akonga: a kotahi tekau ma rua o ratou ana i whiriwhiri ai, a huaina ana e ia he apotoro;

14 Ko Haimona, (i huaina ano hoki ia ko Pita,) ko tona teina, ko Anaru, ko Hemi raua ko Hoani, ko Piripi raua ko Patoromu,

15 Ko Matiu raua ko Tamati, ko Hemi tama a Arapiu,

RUKA 6.

ko Haimona e karangatia nei ko Heroti,

16 Ko Hura *teina* o Hemi, ko Hura Ikariote hoki, ko ia ano te kai tuku.

17 ¶ Na, ka heke iho ngatahi ratou, a tu ana ki te wahi raorao, ratou ko te ropu o ana akonga, me te huihuinga nui o te iwi i Huria katoa, i Hiruharama, i te taha hoki o te moana o Taira o Hairona, i haere mai nei ki te whakarongo ki a ia, kia whakaorangia hoki o ratou mate;

18 Me te hunga ano e whakatoia ana e nga wairua poke: a whakaorangia ana ratou.

19 A i whai te mano katoa kia pa ki a ia: i puta mai hoki he kaha i a ia, a whakaorangia ana ratou katoa.

20 ¶ Na ka titiro ona kanohi ki ana akonga, a ka mea ia, Ka koa *koutou*, e nga rawakore: mo koutou hoki te rangatiratanga o te Atua.

21 Ka koa *koutou* e hiakai nei inaianei: ka makona hoki koutou. Ka koa *koutou* e tangi nei inaianei: e kata hoki koutou.

22 Ka koa koutou, ina kinongia e nga tångata, ina wehewehea mai i *roto i a ratou*, ina tawaia, ina ruka atu to koutou ingoa, ano he mea kino, mo te whakaaro hoki ki te Tama a te tangata.

23 Kia hari i taua ra, me te tupekepeke: he nui hoki to koutou utu i te rangi: i peheitia hoki nga poropiti e o ratou mātua.

24 Otira aue, te mate mo koutou, mo te hunga taonga!

kei a koutou hoki to koutou whakamarietanga.

25 Aue, te mate mo koutou, mo te hunga e makona ana! e mate hoki koutou i te hia-kai. Aue, te mate mo koutou, mo te hunga e kata ana inaianei! ka aue hoki koutou, ka tangi.

26 Aue, te mate mo koutou ua korerotia paitia koutou e nga tångata katoa! i penei hoki o ratou mātua ki nga poropiti teka.

27 Na, ko tāku kupu tenei ki a koutou e whakarongo mai nei, Arohaina o koutou hoa whawhai; kia pai te mahi ki te hunga e kino ana ki a koutou;

28 Manaakitia te hunga e kanga ana i a koutou, me inoi mo te hunga e whakawhiu ana i a koutou.

29 Na, ki te pakia tou paparinga e tetahi, tahuri atu hoki tetahi; a, ki te tangohia tou ngeri e tetahi, kua e kaiponuhia tou koti.

30 Hoatu ki nga tångata katoa e inoi ana ki a koe; kua ano e tonoa o mea ki te tangohia e te tangata.

31 Ko ta koutou e pai ai kia meatia e nga tångata ki a koutou, meatia ano e koutou ki a ratou.

32 A, ki te aroha koutou ki te hunga e aroha ana ki a koutou, kei hea he whakawhetai ki a koutou? e aroha ana hoki te hunga hara ki te hunga e aroha ana ki a ratou.

33 A, ki te atawhai koutou i te hunga e atawhai ana i a koutou, kei hea he whakawhe-

tai ki a koutou? e pena ana ano te hunga hara.

34 Ki te tuku moni hoki koutou ki te hunga e mea ai koutou ka utua mai e ratou, kei hea he whakawhetai ki a koutou? e tuku moni ana hoki te hunga hara ki te hunga hara, mo te pera kia whakahokia ki a ratou.

35 Engari kia aroha ki o koutou hoa whawhai, atawhaitia hoki, tukua atu te moni, kua ano e whakaaro kia utua mai ta koutou; a e rahi te utu ki a koutou, ka whakatupu tamariki ano hoki koutou ki a te Rungarawa: e atawhai ana hoki ia i te hunga e kore e whakawhetai, i te hunga kino.

36 Kia ngawari rapea koutou, kia pera me to koutou Matua e ngawari ana.

37 Kaua e whakawa, a e kore koutou e whakawakia: kaua e whakatau he a e kore te he e whakataua ki a koutou: houhia te rongo, a e houhia ano te rongo ki a koutou:

38 Hoatu, a ka homai ki a koutou; he mehua pai, pehi rawa, oioi rawa, purena tonu ta ratou e homai ai ki te kororutanga o o koutou kakahu. Ko te mehua hoki e mehua ai koutou, hei mehua ano tena ki a koutou.

39 A ka puaki tana kupu whakarite ki a ratou, E ahei ranei te matapo te arahi i te matapo? e kore ranei e taka tokorua ki te waikeri?

40 E kore te akonga e rahi ake i tona kai whakaako:

engari ka rite ano ki o ratou kai whakaako nga tangata katoa kua tino pukengatia.

41 He aha tau e titiro ki te otaota i roto i te kanohi o tou teina, te kite i te kurupae i tou ake kanohi?

42 E pehea ranei to korero ki tou teina, E *taku* teina, iaua, kia kapea atu e ahau te otaota i roto i tou kanohi, te kite i te kurupae i roto i tou kanohi? E te tangata tinihanga, kia matua kapea atu e koe te kurupae i roto i tou kanohi, katahi koe ka mara ki te kape i te otaota i roto i te kanohi o tou teina.

43 E kore hoki te rakau atahua e hua i te hua kino; e kore ano te rakau kino e hua i te hua atahua.

44 Ma ona hua ake nei hoki ka mohiotia ai tenei rakau, tenei rakau. E kore hoki e kohia nga piki i runga i nga tataramoa, e kore ano e whakiia te karepe i runga i te tumatakuru.

45 He tangata pai, he pai tana e whakaputa mai ai i roto i te taonga pai a tona ngakau; he tangata kino, he kino tana e whakaputa mai ai i roto i nga taonga kino o tona ngakau: he purenatanga hoki no te ngakau nga kupu a te mangai.

46 He aha koutou ka karannga ai ki a au, E te Ariki, e te Ariki, te mahi i aku korero?

47 ¶ Na, te tangata e haere mai ana ki a au, e rongo ana ki aku kupu, a e mahi ana, maku e whakaatu ki a koutou he ritenga aha tona:

48 Ka rite ia ki te tangata i hangā e ia tetahi whare, i keri, i whakahohonu, a whakatakoto ana i te turanga ki runga ki te kamaka: a, te putanga mai o te waipuke, ka pakaru te roma ki taua whare, heoi kihai i taea te whakangaueue: no te mea i hangā ki runga ki te kamaka.

49 Tena ko te tangata i rongō, a kihai i mahi, ka rite ia ki te tangata i hanga i tetahi whare ki runga ki te oneone, a kahore he turanga: te pakarutanga mai o te roma, na, hinga tonu iho; a nui atu te pakarutanga o taua whare.

UPOKO 7.

Keneturio. 11 Naina. 18 Ta Hoani ki a Ihu. 24 Mo Hoani. 36 Wahine hara, —tona aroha.

ANO ka mutu enei kupu katoa āna, me te whakarongo ano te iwi, ka tomo ia ki Kaperenauma.

2 Na, e mate ana te pononga a tetahi keneturio, meāke marere, tana hoki i mate-nui ai.

3 A, tona rongonga ki a Ihu, ka tonoa ki a ia etahi kau-matua o nga Hurai, hei mea ki a ia kia haere mai ki te whakaora i tana pononga.

4 A, to ratou taenga mai ki a Ihu, he kaha ta ratou inoi, ka mea, he pai te tangata e meatia ai tenei e ia:

5 E aroha ana hoki ia ki to tatou iwi, nāna hoki i hanga te whare karakia mo matou.

6 Na, haere tahi ana a Ihu

me ratou. A i a ia kahore nei i matara mai i te whare, ka tonoa te keneturio i etahi hoa ki a ia, ka mea ki a ia, E te Ariki, kei maumau ngenge noa koe: ehara hoki ahau i te tikanga tangata e haere ake ai koe ki raro i toku tuānui:

7 Koia tē tae ai toku aro ki te haere atu ki a koe: engari kia puaki mai tau kupu, a ka ora taku pononga.

8 He tangata hoki ahau e whakahaua ana, he hoia ano aku hei whakahaunga maku, na ka mea ahau ki tenei, Haere, a ka haere; ki tetahi atu hoki, Haere mai, a ka haere mai; ki taku pononga ano hoki, Meatia tenei, a ka meatia e ia.

9 Te rongonga o Ihu ki enei mea, ka miharo ki a ia, a ka tahuri, ka mea ki te mano e aru ana i a ia, Ko taku kupu tenei ki a koutou, kahore ano ahau i kite i roto i a Iharaira i te whakapono hei rite mo tenei te nui.

10 A, te hokinga atu ki te whare o te hunga i tonoa, rokohanga atu kua ora te pononga i mate.

11 ¶ A i te aonga ake, ka haere ia ki tetahi pa, ko Naina te ingoa; a he tokomaha o ana akonga i haere tahi me ia, he rahi hoki te hui.

12 A ka whakatata ia ki te kuwaha o te pa, na, he tupa-paku tera e kauhoatia mai ana, he huatahi na tona whaea, a ko ia he pouaru: a he tokomaha o te pa e haere tahi ana me ia.

RUKA 7.

13 A, te kitenga o te Ariki i a ia, ka aroha ki a ia, ka mea ki a ia, Kua e tangi.

14 Na ka haere ia, ka pa ki te kauhoa : a, tu tonu nga kai kauhoa. Na, ko tana meatanga, E tama, ko taku kupu tenei ki a koe, E ara.

15 Na ka noho te tupapaku ki runga, ka anga, ka korero. A hoatu ana ia e ia ki tona whaea.

16 Na ka tau te wehi ki a ratou katoa : a ka whakakororia i te Atua, ka mea, Kua puta ake i roto i a tatou he poropiti nui ; a, Kua titiro mai te Atua ki tona iwi.

17 Na, haere ana tenei korero mona puta noa i Huria, i nga wahi patata katoa ano hoki.

18 ¶ A ka korerotia enei mea katoa ki a Hoani e ana akonga.

19 Na ka karangatia e Hoani etahi o ana akonga tokorua, ka tonoa ki a Ihu, mea ai, Ko koe ranei tera e haere mai ana? me tatari ranei matou ki tetahi atu?

20 A, te taenga mai o aua tangata ki a ia, ka mea, Kua tonoa mai maua e Hoani Kai iriiri ki a koe, mea ai, Ko koe ranei tera e haere mai ana? me tatari ranei matou ki tetahi atu?

21 I taua wa pu ano he tokomaha te hunga i whakaorangia e ia i nga turorotanga, i nga mate, i nga wairua kino ; a he tokomaha nga matapo i meinga kia kite.

22 A ka whakahokia e Ihu, ka mea ki a raua, Haere ko-

rerotia ki a Hoani nga mea e kite nei, e rongo nei korua ; ko nga matapo e titiro ana, ko nga kopa e haereere ana, ko nga repera kua ma, ko nga turi e rongo ana, ko nga tupapaku e whakaarahia ana, e kauwhautia ana te rongo pai ki te hunga rawakore ;

23 Na ka koa te tangata e kore e hē ki a au.

24 ¶ A, te rironga o nga karere a Hoani, ka timata ia, a ka korerotia a Hoani ki te mano, I haere atu koutou ki te koraha kia kite i te aha? I te kakaho e whakangauenetia ana e te hau?

25 Ano ra, i haere koutou kia kite i te aha? I te tangata he kakahu maeneene ona? Na, kei nga whare kingi te hunga i nga kakahu whakapaipai, i nga kai papai.

26 Ano ra, i haere koutou kia kite i te aha? I te poropiti? Ae ra, ko taku kupu tenei ki a koutou, tera atu i te poropiti.

27 Moni te mea kua tuhituhia nei, Na, ka tonoa e ahau taku karere ki mua i tou aroaro, māna e whakapai tou huarahi i mua i a koe.

28 Ko taku kupu hoki tenei ki a koutou, Kahore he poropiti nui atu i a Hoani Kai iriiri i roto i nga whanau a nga wāhine : heoi rahi ake i a ia te nohinohi rawa o te rangatiratanga o te Atua.

29 Na, i whakatikaia ta te Atua e te hunga katoa i rongo, e nga pupirikana ano, i iriiria hoki ki te iriiringa a Hoani.

30 Ko nga Parihi ia, ratou

ko nga kai whakaako o te ture, i whakakahore ki ta te Atua whakaaro ki a ratou, i a ratou kihai nei i iriiria e ia.

31 A ka mea te Ariki, Me whakarite e ahau nga tangata o tenei whakapaparanga ki te aha? e rite ana ki te aha?

32 E rite ana ki nga tamariki e noho ana i te kaininga hoko, e karanga ana hi a ratou ano, e mea ana, Whakatangia noa matou i te putorino ki a koutou, a kahore koutou i kanikani; aue noa matou ki a koutou, na, kahore koutou i tangi.

33 I haere mai hoki a Hoani Kai iriiri, a kihai i kai taro, kihai i inu waina; heoi ka mea koutou, He rewera tona.

34 I haere mai te Tama a te tangata me te kai, me te inu; a ka mea koutou, Na, he tangata kakai, he tangata iinu waina, he hoa no nga pupirikana me nga tangata hara!

35 Otira e whakatikaia ana te whakaaro nui e ana tamariki katoa.

36 ¶ Na ka mea tetahi o nga Parihi ki a ia kia kai tahi raua. A ka tomo ia ki te whare o te Parihi, ka noho.

37 A ka mātau tetahi wahine hara o te pa, kei te whare o te Parihi ia e noho ana, na, ka kawea mai e ia tetahi pouaka kohatu e *kī* ana i te hinu kakara,

38 A tu tangi ana i muri i ona waewae, ka anga ka whakamakuku i ona waewae ki nga roimata, ka muru ki nga makawe o tona mātenga, ka kihi i ona waewae, ka

whakawahi ki te hinu kakara.

39 A, te kitenga o te Parihi i karangatia ai ia, ka korero i roto i a ia, ka mea, Me he poropiti tenei, kua mātau ia ki te wahine e pa nei ki a ia, tona peheatanga: he wahine hara hoki.

40 Na ka korero a Ihu, ka mea ki a ia, E Haimona, he kupu taku ki a koe. Ka mea ia, Korero, e te Kai whakaako.

41 Na, tokorua nga tangata i a raua te moni a tetahi kai tuku moni: e rima rau nga pene i tetahi, e rima tekau i tetahi.

42 A, tē whai mea raua hei whakautu mai, whakarerea noatia ana e ia ki a raua. Na, māu e korero mai, ko wai o raua e tino nui tona aroha ki a ia.

43 Na ka whakahokia e Haimona, ka mea, Ki taku whakaaro, ko te tangata nāna te mea nui i whakarerea noatia atu. Na, ko tana mea-tanga ki a ia, Tika tonu tāu.

44 Na ka tahuri ia ki te wahine, a ka mea ki a Haimona, E kite ana koe i tenei wahine? I haere mai ahau ki roto ki tou whare, kahore i homai e koe he wai mo oku waewae: nāna ia i whakamakuku oku waewae ki nga roimata, a murua iho ki nga makawe o tona mātenga.

45 Kihai koe i kihi i ahau: ko tenei ia kahore ano i mutu-mutu te kihi i oku waewae no taku taenga mai ra ano.

46 Kihai koe i whakawahi i

RUKA 7, 8.

toku mātenga ki te hinu: na, whakawahia ana e ia oku waewae ki te hinu kakara.

47 Koia ahau ka mea nei ki a koe, Kua murua ona tini hara; ina hoki he nui tona aroha: otira i iti nga mea o tetahi i murua, ka iti ano tona aroha.

48 A ka mea ia ki a ia, Kua murua ou hara.

49 Na ka anga ka korero ona hoa noho ki a ratou ano, Ko wai tenei e muru nei ano hoki i nga hara?

50 Na, ko tana meatanga ki te wahine, Na tou whakapono koe i ora ai; haere marie.

UPOKO 8.

Ta nga wahine atawhaitanga i a te Karaiti. 4 Kai rui.

19 Tona whaea, aha, aha.

22 Ki te hau. 26 Rewera.

37 Ta nga Kararini. 43

Wahine mate. 49 Ta Hairuha kotiro.

A MURI iho, ka haereere ano ia ki nga pa, ki nga kāinga, ka kauwhau, ka whakapuaki i te rongo pai o te rangatiratanga o te Atua: ia ia hoki te tekau ma rua,

2 Me etahi wāhine hoki kua oti nei te whakaora i nga wairua kino, i nga ngoikoretanga, ko Meri e karangatia nei ko Makarini, e whitu nei nga rewera i puta mai i roto i a ia,

3 Ko Hoana hoki, wahine a Kuha, a ta Herora kai whakahauhau, me Huhana, me era atu tona tini, a na ratou i mahi etahi o o ratou taonga hei mea māna.

4 Na kua rahi te hui i mine mai, kua tae hoki ki a ia i tenei pa, i tenei pa, a ka korero kupu whakarite ia:

5 I haere atu te kai rui ki te rui i tana purapura: a, i a ia e rui ana, ka ngahoro etahi ki te taha o te ara; a takahia ana, na, kainga ake e nga manu o te rangi.

6 Ko etahi i ngahoro ki runga ki te toka; te tupunga ake, kua maroke, kahore hoki he makuranga.

7 Ko etahi i ngahoro ki roto ki nga tataramoa; a tupu tahi ana nga tataramoa, koaoaotia iho.

8 Ko etahi i ngahoro ki te oneone pai; tupu ana, tatakirau ona hua. Ka mutu enei korero, ka karanga ia, Ko ia he taringa ona hei whakarongo, kia rongo ia.

9 ¶ Na, ka ui ana akonga ki a ia, ka mea, He aha te tikanga o tenei kupu whakarite?

10 Ka mea ia, Kua hoatu ki a koutou te matauranga ki nga mea ngaro o te rangatiratanga o te Atua: ki era atu ia, he whakarite nga kupu: kia kite ai ratou, a e kore e kite, kia rongo ai, a kore ake e mātau.

11 Na, tenei te kupu whakarite: Ko te purapura te kupu a te Atua.

12 Era i te huarahi, ko nga kai whakarongo; me i reira ka haere mai te rewera, ka kapo i te kupu i roto i o ratou ngakau, kei whakapono ratou, a ka ora.

13 Era i runga i te toka ko

RUKA 8.

te hunga e tango nei i te kupu me te hari ano i to ratou rongonga ai; kahore ia o ratou pakiaka, whakaponona ana ratou e hia ake ano ra, a i te wa o te whakama-
tautau ka mawehe atu.

14 Tera i ngahoro ki roto ki nga tataramoa, ko te hunga e whakarongo ana, a, te haere-
nga atu, ka koaoaotia e nga whakaaroaronga, e nga tao-
nga, e nga whakaahuareka o te ao, a hore ake e pakari
o ratou hua.

15 Ko tera i te oneone pai, ko te hunga e tika ana, e pai
ana te ngakau, a, te rongonga i te kupu, ka pupuri, a hua
ana nga hua i runga i te manawanui.

16 E kore e tahuna te rama e tetahi, a e hipokina ki te
oko, e waiho ranei i raro i te moenga; engari ka whakatu-
ria ki runga ki te turanga, kia kitea ai te maramata-
nga e te hunga e tomo mai ana.

17 E kore hoki tetahi mea i hunā, e mahue te whakakite; e kore ano tetahi mea i ngaro, e mahue te mohio te puta
hoki ki te maramatanga.

18 Kia tupato ki ta koutou whakarongo: ki te whai mea
hoki tetahi, ka hoatu ano ki a ia; a ki te kahore he mea a
tetahi, ko te mea i kiia nāna ake, ka tangohia i a ia.

19 ¶ Na, ka haere mai ki a ia tona whaea me ona teina, a
kikai ratou i ahei te tutuki ki a ia, na te mano hoki.

20 Na ka korerotia ki a ia, ka mea ratou, Tou whaea me

ou teina te tu mai nei i waho, e mea ana kia kite i a koe.

21 Na ka whakahokia e ia, a ka mea ki a ratou, Ko toku
whaea me oku teina enei e rongonei, e mahi nei i te kupu
a te Atua.

22 ¶ A, i tetahi o aua ra, ka eke ia, ratou, ko ana akonga
ki te kaupuke: a ka mea ki a ratou, Tatou ka whakawhiti
ki tera taha o te roto. Na, rere ana ratou.

23 A i a ratou e rere ana, ka moe ia: na, ko te putanga o
tetahi hau, he tupuhi, ki te roto; a ka tomo ratou, tata
pu ki te tahuri.

24 Na ka haere ratou, ka whakaara i a ia, ka mea, E
kara, e kara, ka mate tatou. Na ka ara ia, a riria ana e ia
te hau, me te ngaru o te moana: a mutu iho, na, kua
marino.

25 Na ka mea ia ki a ratou, Kei heatokoutou whakaponona? Matakū ana ratou, miharo
ana, ka mea ki a ratou ano, Ko wai ra tenei, ka tapa nei
ki nga hau ki te moana, a rongo rawa ki a ia?

26 ¶ Na, ka rere atu ratou ki te whenua o nga Kararini, ki
tawahi atu o Kariri.

27 A, tona haerenga atu ki uta, ka tutaki ki a ia he tangata no te pa, he rewera
ona no mua ke, kahore nei ona kakahu i kakahu ai, kikai
ano i noho i roto i te whare, engari ki nga urupa.

28 A, tona kitenga i a Ihu, ka karanga, ka takoto ki tona
aroaro, a he nui tona reo ki te mea mai, He aha ahau

RUKA 8.

nāu, e Ihu, e te Tama a te Atua i runga rawa? E, kauerā ahau e whakamamaetia.

29 (I mea hoki ia ki te wairua poke kia puta mai i taua tangata. He maha hoki nga wa i hopukia ai ia e ia: a e tiakina ana ia, he mea here ki nga mekameka ki nga here waewae; heoi motumotuhia ana e ia nga here, a aia ana e te rewera ki te koraha.)

30 Na ka ui a Ihu ki a ia, ka mea, Ko wai tou ingoa? Ka mea ia, Ko Rihiona: he tokomaha hoki nga rewera i tomo ki roto ki a ia.

31 Katahi ka inoi ratou ki a ia kia kauerā ratou e tonoa e ia kia haere ki te hohonu.

32 Na, kei reira tetahi kahui poaka, he maha, e kai ana i runga i te maunga: a ka inoi ratou ki a ia kia tukua ratou kia tomo ki aua poaka. A tukua ana ratou.

33 A, te putanga o aua rewera i roto i te tangata, ka tomo ki roto ki nga poaka: na, ko te tino rerenga o te kahui ra te pari ki te moana, a paremo iho.

34 Ano ka kite nga kai whangai i taua mea i meatia, ka whati, ka haere, ka korero ki te pa, ki aua whenua hoki.

35 Na ka haere mai ratou kia kite i taua mea i meatia; a, to ratou taenga ki a Ihu, ka kite i te tangata i puta nei nga rewera i roto i a ia, kua oti te whakakakahu, kua tika ona whakaaro, e noho ana ki nga waewae o Ihu: a ka matakū ratou.

36 A korerotia ana ki a ratou e te hunga i kite, te whakaoranga o te tangata i nga rewera.

37 Na ka mea te huihui katoa o nga kāinga patata o nga Kararini kia mawehe atu ia i a ratou; i matakū whakaharahara hoki ratou: a eke ana ia ki te kaupuke, hoki ana.

38 Na ka inoi ki a ia te tangata i puta nei nga rewera i roto i a ia, kia meinga hei hoa mona: heoi ka tono atu a Ihu i a ia, ka mea,

39 Hoki atu ki tou whare, korerotia nga mea nui kua meinga nei e te Atua ki a koe. Na, haere ana ia, korerotia ana ki te pa katoa nga mea nui i mea ai a Ihu ki a ia.

40 ¶ A ka hoki a Ihu, ka koa te mano ki tona taenga mai: e tatari ana hoki ratou katoa ki a ia.

41 Na, ko te haerenga mai o tetahi tangata, ko Hairuha te ingoa, he rangatira ano ia no te whare karakia: a takoto ana ki nga waewae o Ihu, ka inoi ki a ia kia tomo ki tona whare:

42 Kotahi tana tamahine, he huatahi, kotahi nei tekau ma rua ona tau, a e whakahe-mohemo ana. Na, i tona haerenga, popō tonu nga mano ki a ia.

43 ¶ Na, ko tetahi wahine e mate ana i te pakaruhanga toto, tekau ma rua nga tau, a poto katoa tona orange ki nga rata, kihai ano i taea te whakaora e tetahi,

RUKA 8, 9.

44 Ka haere mai ia i muri, ka pa ki te taniko o tona kakahu: a mutu iho te rere o ona toto.

45 Na ka mea a Ihu, Ko wai tenei kua pa nei ki a au? Ano ka whakakahore katoa, ka mea a Pita ratou ko ona hoa, E kara, e pipiri ana nga mano ki a koe, e tutetute ana, a e mea ana oti koe, Ko wai tenei kua pa nei ki a au?

46 Otira i mea ano a Ihu, Kua pa mai ano tetahi ki a au: e mahara ana hoki ahau kua puta atu he mana i a au.

47 A, te kitenga o te wahine kihai ia i ngaro, haere wiri mai ana, takoto ana i tona aroaro, korerotia ana e ia ki a ia i te aroaro o te iwi katoa te mea i pa ai ia ki a ia, me te hohoro o tona orange.

48 Na ka mea ia ki a ia, Kia maia, e ko: na tou whakapono koe i ora ai; haere marie.

49 ¶ I a ia ano e korero ana, ka haere mai tetahi i te *whare* o te rangatira o te whare karakia, ka mea ki a ia, Kua mate to tamahine; kaua e whakararu te Kai whakaako.

50 A, te rongonga o Ihu, ka whakahokia e ia ki a ia, ka mea, Kaua e matakū: ko te whakapono ia kia whakapono, a ka ora.

51 A ka tomo ia ki te whare, kihai tetahi i tukua e ia kia tapoko, ko Pita anake, ko Hemi, ko Hoani, me te pāpā raua ko te whaea o te kotiro.

52 A e tangi ana ratou katoa, e aue ana mona. Na ka mea ia, Kaua e tangi; kahore ia i mate, engari e moe ana.

53 A kataina iho ia e ratou, i mohio hoki ratou kua mate ia.

54 Otira ka oti katoa te pei e ia ki waho, ka mau ia ki tona ringa, ka karanga, ka mea, E ko, e ara.

55 Na, hoki mai ana tona wairua, a whakatika tonu ake ia: na ka mea ia kia hoatu he kai māna.

56 A, miharo tonu ona mātua: na ka whakatupato ia i a ratou kia kaua e korerotia taua meatanga ki tetahi.

UPOKO 9.

Ngarenga o ana apotoro. 7 Hiahia o Herora. 10 Mano e rima. 18 Nga kupu mona. 23 Kia mara. 28 Whakaahuatanga ketanga. 37 Tamaiti i te rewera. 43 Mo tona matenga ano. 46 Kei whakakake. 51 Ta nga Hamari.

NA ka karangatia e ia ana akonga kotahi tekau marua, a ka hoatu ki a ratou he kaha, he mana, e *peia ai* nga rewera katoa, e ora ai nga mate.

2 A tonoa ana ratou ki te kauwhau i te rangatiratanga o te Atua, ki te whakaora hoki i te hunga e mate ana.

3 A i mea ano ia ki a ratou, Kaua tetahi mea e mauria ki te ara, kaua nga tokotoko, kaua he putea, kaua he taro, kaua he moni; kaua ano e takiruatia nga koti.

4 A ka tomo koutou ki tetahi whare, hei reira noho ai, a haere noa i reira.

5 A ki te kahore etahi e

RUKA 9.

manako ki a koutou, ka haere koutou ki waho o taua pa, na, te puehu nei ano o o koutou waewae whakangahoretia atu, hei mea whakaatu ki a ratou.

6 Na, to ratou rironga atu, ka haereerea e ratou nga kaininga, ka kauwhau i te rongo pai, ka whakaora i nga wahi katoa.

7 ¶ A, te rongonga o Herora tetaraki ki nga mea katoa i meinga e ia, ka pohēhē, no te mea ki ta etahi ki, kua ara mai a Hoani i te hunga mate;

8 Ki ta etahi, kua puta mai a Iraia; ki ta etahi, kua ara mai tetahi o nga poropiti onamata.

9 Na ka mea a Herora, Kua poutoa e ahau te mātenga o Hoani: a ko wai tenei mona nei enei korero ka rangona nei e ahau? A ka whai kia kite i a ia.

10 ¶ Na, te hokinga mai o nga apotoro, ka korerotia ki a ia nga mea katoa i mea ai ratou. A ka tango ia i a ratou, ka haere ko ratou anake, ki tetahi wahi korāha o te pa ko Petahaira nei te ingoa.

11 Ano ka rongo te mano, ka aru i a ia: na ka pupuri ia i a ratou, ka korerotia ki a ratou te rangatiratanga o te Atua, whakaorangia ana hoki e ia te hunga e mea ana kia rongoatia.

12 Na, kua titaha haere te ra, a ka haere te tekau ma rua, ka mea ki a ia, Tonoa te mano, kia haere ki nga kaininga ki nga whenua i tetahi

taha, i tetahi taha, moe ai, ki te mea kai hoki ma ratou; he wahi koraha hoki tenei i a tatou nei.

13 A ka mea ia ki a ratou, Ma koutou e hoatu he kai ma ratou. Ka mea ratou, Heoi ano ā matou, e rima nga taro e rua nga ika; ki te kahore matou e haere ki te hoko kai ma tenei iwi katoa.

14 A me te mea e rima mano nga tāne. A ka mea ia ki ana akonga, Meinga ratou kia noho, kia rima tekau ki te nohoanga.

15 A pera ana ratou, meinga katoatia ana kia noho.

16 Na ka mau ia ki nga taro e rima, ki nga ika e rua, ka titiro atu ki te rangi, ka whakapai i au mea, ka whawhati, ka hoatu ki nga akonga kia whakatakotoria atu ma te mano.

17 Na ka kai ratou, ka makona katoa: a kotahi tekau ma rua nga kete i kohia ake e ratou, he toenga na ratou no nga whatiwhatinga.

18 ¶ A i a ia e inoi ana ko ia anake, kei a ia ano nga akonga: na ka ui ia ki a ratou, ka mea, Ko wai ahau ki ta nga tāngata ki?

19 Na, ka whakahokia e ratou, ka mea, Ko Hoani Kai iriiri; ki ta etahi, ko Iraia; na, ki ta etahi, kua ara tetahi o nga poropiti onamata.

20 Na ka mea ia ki a ratou; A ki ta koutou ki, ko wai ahau? Ka whakahokia e Pita, a ka mea, Ko te Karaiti a te Atua.

21 Katahi ia ka whakatupato

RUKA 9.

i a ratou, ka mea kia kaua tenei e korerotia ki te tangata;

22 I mea ano ia, Kua takoto te tikanga kia maha nga mae o te Tama a te tangata, kia whakakinoia ano ia e nga kaumatua, e nga tohunga nui, e nga karaipi, kia whakamatea, a i te toru o nga ra kia ara.

23 ¶ I mea ano ia ki a ratou katoa, Ki te mea tetahi kia haere mai i muri i a au, me whakakahore ia e ia ano, me amo tona ripeka i nga ra katoa, ka aru ai i a au.

24 Ki te whai hoki tetahi kia ora, ka mate ia: a ki te mate tetahi, mona i whakaaro ki a au, ka ora ia.

25 He aha hoki te painga ki te tangata, ki te riro i a ia te ao katoa, a ko ia ano ka ngaro, ka riro ranei i te hē?

26 Ta te mea ki te whakama tetahi ki a au, me aku korero, ka whakama ano te Tama a te tangata ki a ia, ina haere mai i runga i te kororia ona, o tona Matua, o nga anahera tapu.

27 Na, he pono taku korero ki a koutou, Tenei ano etahi o te hunga e tu nei e kore e pangia e te mate, kia kite ra ano i te rangatiratanga o te Atua.

28 ¶ A ka tata ki te waru o nga ra i muri i enei korero, ka mau ia ki a Pita, ki a Hoani, ki a Hemi, ka haere atu ki runga ki te maunga, ki te inoi.

29 A i tana inoinga, ka puta ke te ahua o tona mata, a mā

tonu tona kakahu, kanapa tonu.

30 Na, tokorua nga tangata e korero tahi ana me ia, ko Mohi raua ko Iraia:

31 I puta kororia mai, a i korero ki tona haerenga meā-ke nei rite i a ia ki Hiruharama.

32 A i pehia a Pita ratou ko ona hoa e te moe: a, to ratou aranga ake, ka kite i tona kororia, me nga tangata tokorua e tu tahi ana me ia.

33 A i a raua e mawehe atu ana i a ia, ka mea a Pita ki a Ihu, E kara, he mea pai kia noho tatou i konei: na, kia hangā e matou etahi wharau kia toru; kia kotahi mou, kia kotahi mo Mohi, kia kotahi mo Iraia: tē mohio ia ki tana i mea ai.

34 I a ia e korero ana i enei mea, ka puta mai he kapua, a taumaru iho ana ki a ratou: a matakua ana ratou i to ratou haerenga ki roto ki te kapua.

35 Na ka puta mai he reo i te kapua, ka mea, Ko taku Tama tenei i aroha ai: whakarongo ki a ia.

36 A, te mutunga o te reo, ko Ihu anake i kitea. A whakarongo kau ana ratou, kihai hoki i korerotia e ratou ki te tangata i aua ra tetahi o nga mea i kite ai ratou.

37 ¶ Na, i te aonga ake o te ra, i a ratou kua tatū iho i runga i te maunga, he rahi te hui i tutaki ki a ia.

38 Na ka karanga mai tetahi tangata i roto i te mano, ka mea, Tena koa, e te Hāi

RUKA 9.

whakaako, titiro mai ki taku tama: ko ia anake hoki tāku.

39 Na, te hopukanga a te wairua i a ia, kihai i aha kua hamama; na ka haehae i a ia me te tutū ano te huka, a marū iho ia, na, whakarere whakauaua ana i a ia.

40 A, i te inoi ahau ki o akonga kia peia ia ki waho: heoi kihai i taea e ratou.

41 Na ka whakahokia e Ihu, a ka mea, E te uri whakapono-kore, parori ke, kia pehea te roa o taku nohoanga ki a koutou, o taku manawanuitanga ki a koutou? Kawea mai to tama ki konei.

42 Na, i a ia e haere mai ana, ka taia iho ia e te rewera, haehaea iho. Na ka riria te wairua poke e Ihu, a whakaorangia ana te tamaiti, hoatu ana ki tona pāpā.

43 ¶ Oho mauri katoa ana ratou ki te nui o te Atua. A, i a ratou e miharo ana ki nga mea katoa i meinga e Ihu, ka mea ia ki ana akonga,

44 Rongoatia enei korero ki roto ki o koutou taringa: meāke hoki tukua te Tama a te tangata ki nga ringa o nga tāngata.

45 A kihai ratou i mohio ki tenei kupu, kua ngaro hoki, kei kitea taua mea e ratou: a ka matakū ratou ki te ui ki a ia ki taua kupu.

46 ¶ Na, ka puta ake he kororero i roto i a ratou, ko wai o ratou e nui rawa.

47 A ka kite a Ihu i te whakaaroaronga o o ratou ngakau, ka mau ia ki tetahi ta-

maiti, a whakaturia ana ki tona aroaro,

48 Ka mea ki a ratou, Ki te manako tetahi ki tenei tamaiti, na te whakaaro hoki ki toku ingoa, e manako ana ia ki a au: a ki te manako tetahi ki a au, e manako ana ia ki toku kai tono mai: na, te iti rawa i roto i a koutou katoa ko ia hei mea nui.

49 Na ka whakahokia e Hoani, ka mea, E kara, i kite matou i tetahi e pei rewera ana i runga i tou ingoa; a riria iho e matou, mona kahore e haere tahi tatou.

50 A ka mea a Ihu ki a ia, Kaua e riria: ki te mea hoki ehara tetahi i te hoa whawhai no tatou, no tatou ano ia.

51 ¶ Ano ka rite nga ra mo tona tangohanga ki runga, māro pu tona kanohi ki te haere ki Hiruharama:

52 Na ka tono ia i etahi karere ki mua i tona aroaro: a ka haere ratou, ka tomo ki tetahi kāinga o nga Hamari ki te mea tukunga mai mona.

53 Heoi kihai era i manako ki a ia, e anga ana hoki ona kanohi ki Hiruharama.

54 A, te kitenga o ana akonga, o Hemi raua ko Hoani, ka mea raua, E te Ariki, e pai ana ranei koe kia koreotia e maua he kapura kia heke iho i te rangi, hei whakangaro i a ratou, hei pera me ta Iraia i mea ai?

55 A ka tahuri ia, ka riri ki a raua, ka mea, Kahore korua e mātau no tehea wairua korua.

RUKA 9, 10.

56 Kihai hoki te Tama a te tangata i haere mai ki te whakamate tangata, engari ki te whakaora. A haere ana ratou he kainga ke.

57 ¶ A iratou e haere ana i te ara, ka mea tetahi ki a ia, E te Ariki, ka aru ahau i a koe ki nga wahi katoa e haere ai koe.

58 Na, ko te meatanga a Ihu ki a ia, He rua o nga pokiha, he kohanga o nga manu o te rangi; tena ko te Tama a te tangata, kahore ona wahi e takoto ai tona mātenga.

59 Ka mea ia ki tetahi atu, Arumia mai ahau. A ka mea ia, E te Ariki, tukua ahau kia mātua haere ki te tanu i toku pāpā.

60 Na, ka mea a Ihu ki a ia, Waiho ma nga tupapaku e tanu o ratou tupapaku: ko koe ia, me haere ki te kauwhau i te rangatiratanga o te Atua.

61 Ka mea hoki tetahi atu, E te Ariki, ka aru ahau i a koe; otira tukua ahau kia mātua poroporoaki ki te hunga i toku whare.

62 Na ka mea a Ihu ki a ia, Ki te pa te ringa o tetahi ki te parau, a ka titiro ki muri, e kore ia e tau mo te rangatiratanga o te Atua.

UPOKO 10.

Ngarenga o te Whitu tekau. 17 To ratou hokinga mai. 21 Tana whakawhetaitai. 25 Ko wai te hoa tata. 38 Tana ki a Mata.

NA, i muri i enei mea ka whakaritea ano e te Ariki

etahi atu e whitu tekau, a tonoa ana ratou takirua, takirua, ki mua i tona aroaro, ki nga pa katoa ki nga wahi meake nei ia haere ki reira.

2 I mea ano ia ki a ratou, Ko te kotinga e nui ana, ko nga kai mahi ia e ruarua ana: na, inoi atu ki te Ariki nana te kotinga, kia tonoa e ia he kai mahi ki tana kotinga.

3 Haere: nana, ka tonoa nei koutou e ahau, ano he reme ki waenganui o nga wuruwhi.

4 Kaua e mauria he takotoraanga moni, kaua he putea, kaua ano he hu: kaua ano e oha atu ki tetahi i te huarahi.

5 A ka tomo koutou ki tetahi whare, ka mātua mea atu, *Kia tau* te rangimarie ki tenei whare.

6 A ki te mea kei reira te tama a te rangimarie, ka tau ta koutou rangimarie ki reira: ki te kahore, e hoki mai ano ki a koutou.

7 Na, hei taua whare koutou noho ai, ka kai ai, ka inu ai i ta ratou e homai ai: ka tika hoki te utu mo te kai mahi. Kaua e haereere i tenei whare ki tenei whare.

8 A, ka tomo koutou ki tetahi pa, a ka manako mai ratou ki a koutou, kainga nga mea e whakatakotoria ana ma koutou:

9 Me whakaora te hunga mate o reira, ka mea ki a ratou, Kua tata ki a koutou te rangatiratanga o te Atua.

10 Tena ki te tomo koutou ki tetahi pa, a e kore ratou e manako ki a koutou, me haere

RUKA 10.

atu ki nga huarahi o reira, me ki atu,

11 Te puehu nei o to koutou pa e piri nei ki a matou, tenei te mukua atu nei e matou ki a koutou: otira kia mohio koutou ki tenei, kua tata ki a koutou te rangatiratanga o te Atua.

12 Ko taku kupu tenei ki a koutou, Engari to Horoma i taua ra e māmā i to taua pa.

13 Aue, te mate mou, e Korahina! aue, te mate mou, e Petahaira! me i meatia hoki ki Taira ki Hairona nga merekara kua meatia nei ki a korua, kua ripeneta ke raua, he taratara hoki te kakahu, me te noho i roto i te pungarehu.

14 Otira erangi to Taira, to Hairona, i te ra whakawa, e māmā i to korua.

15 Me koe hoki, e Kapere-nauma, e ikeike na, a tutuki noa ki te rangi, ka whakatakā koe ki te reinga.

16 Ki te whakarongo tetahi ki a koutou, e whakarongo ana ia ki a au; a ki te whakakahore tetahi ki a koutou, e whakakahore ana ia ki a au; a ki te whakakahore tetahi ki a au, e whakakahore ana ki toku kai tono mai.

17 ¶ Na, ka hoki hari mai aua tekau e whitu, ka mea, E te Ariki, nga rewera na ano, rongo tonu ki a matou, he mea hoki na tou ingoa.

18 A ka mea ia ki a ratou, I kite ahau i a Hatana, me te mea he uira, te takanga i te rangi.

19 Na, ka hoatu nei e ahau ki a koutou he mana e haere

ai koutou i runga i nga nakahi, i nga kopiona, i te kaha katoa ano o te hoa whawhai: a e kore rawa koutou e mate i tetahi mea.

20 Otira kua e hari ki tenei, ki nga wairua ka riro nei ki raro i a koutou; ko ta koutou ia e tino hari ai, ko o koutou ingoa kua oti te tuhituhi ki te rangi.

21 ¶ I taua wa ano ka hari te wairua o Ihu, a ka mea ia, Ka whakawhetai ahau ki a koe, e Pa, e te Ariki o te rangi, o te whenua, kua hunā nei hoki e koe enei mea i te hunga mātau, i te hunga mahara, a hurahia ana ki nga kohungahunga: ae ra, e Pa, i pai hoki te penei ki tau titiro.

22 Kua oti nga mea katoa te tuku ki a au e toku Matua: e kore ano tetahi e mātau ki te Tama ko wai ia, ko te Matua anake; ko wai ranei te Matua, ko te Tama anake, me te tangata ano hoki e pai ai te Tama kia whakakitea ia.

23 Na, ka tahuri ia ki nga akonga, ka mea puku atu, Ka hari nga kanohi e kite ana i nga mea e kite nei koutou:

24 Ko taku kupu hoki tenei ki a koutou, he tokomaha nga poropiti me nga kingi i hiahia kia kite i nga mea e kite nei koutou, a kahore i kite; kia rongo ano i nga mea e rongo nei koutou, a kahore i rongo.

25 ¶ Na, ka whakatika tetahi kai whakaako o te ture, ka whakamatautau ia ia, ka mea, E te Kai whakaako, me aha ahau ka whiwhi ai ki te ora-nga tonutanga?

26 Ka mea ia ki a ia, He aha te mea i tuhituhia ki te ture? ka pehea to korerotanga?

27 Na ka whakahokia e ia, ka mea, Kia whakapaua tou ngakau, tou wairua, tou kaha, tou hinengaro, ki te aroha ki te Ariki, ki tou Atua; *me aroha* hoki ki tou hoa tata, ano ko koe.

28 Ka mea ia ki a ia, Ka tika to korero: meinga tenei, a ka ora koe.

29 Na ka mea ia kia whakatika i a ia, a ka ki atu ki a Ihu, Ko wai ra toku hoa tata?

30 Na ka whakahokia e Ihu, ka mea, I haere atu tetahi tangata i Hiruharama ki Heriko, a ka tutaki ki nga kai pahua, na ka huia ona e ratou, ka tukitukia ia, a haere ana, whakarerea iho ia, me te mea kua mate.

31 Na, ko tetahi tohunga e haere noa ana i taua ara: a, tona kitenga i a ia, ninihi ke ana na tahaki.

32 I pena hoki tetahi Riwaiti, tae kau ki taua wahi, ka haere ka titiro, ninihi ke ana na tahaki.

33 Na, ko tetahi Hamari e haere ana ki nga whenua, te taenga ki a ia, ka kite i a ia, ka aroha,

34 Na ka haere atu, ka takai i ona patunga, ringibia iho ki te hinu, ki te waina, ka whakanoho i a ia ki tona ake kararehe, a kawea ana ia ki te whare tira, atawhaitia ana ia.

35 I te aonga ake, i tona haerenga, ka tangohia e ia e rua nga pene, a hoatu ana ki

te tangata i te whare, ka mea ki a ia, Mau ia e tiaki; a ki te maha atu au mea e pau, maku koe e utu ina hoki mai ahau.

36 Na, ki tau whakaaro, ko wai o tenei tokotoru te hoa ona i tutaki nei ki nga kai pahua?

37 Ka mea ia, Ko tera i atawhaitia ai ia. Ka mea ano a Ihu ki a ia, Haere, kia pera ano tau mahi.

38 ¶ A, i to ratou haerenga atu, ka tomo ia ki tetahi kainga: na, ko tetahi wahine, ko Mata te ingoa, i whakamanuhiri i a ia ki tona whare.

39 A he teina tona, ko Meri te ingoa, na ka noho tenei ki nga waewae o Ihu, whakarongo ai ki tana kupu.

40 Na, raruraru noa iho a Mata i te nui o te mahi tuari, a haere mai ana, ka mea, E te Ariki, he mea noa oti ki a koe kia waiho nei e toku teina maku anake te tuari? na, korero atu kia haere mai ia hei hoa moku.

41 Ka whakahokia e Ihu, ka mea ki a ia, E Mata, e Mata, e manukanuka ana koe e raruraru ana ki nga mea maha:

42 Kotahi ia te mea e matea ana: a kua whiriwhiria e Meri tena wahi pai, e kore nei e tangohia i a ia.

UPOKO 11.

Kia kaha ki te inoi. 14 Te wahangu. 29 Tana kauwhau. 37 Mo nga Parihi.

A I a ia e inoi ana i tetahi, wahi, a ka mutu, ka ki tetahi o ana akonga ki a

ia, E te Ariki, whakaakona matou ki te inoi, me Hoani hoki i whakaako i ana ako-nga.

2 Ka mea ia ki a ratou, Ka inoi koutou, mea atu, E to matou Matua i te rangi, Kia tapu tou ingoa. Kia tae mai tou rangatiratanga. Kia mea-tia tau e pai ai ki runga ki te whenua, kia rite ano ki to te rangi.

3 Homai ta matou taro ki a matou, to tenei ra, to tenei ra.

4 Murua o matou hara; e murua ana hoki e matou o nga tangata katoa e hara ana ki a matou. Aua hoki matou e kawea kia whakawaia; engari whakaorangia matou i te kino.

5 I mea ano ia ki a ratou, Ko wai o koutou ki te mea he hoa tona, a ka tae atu ki a ia i waenganui po, ka mea ki a ia, E hoa, homai ki a au etahi taro, kia toru;

6 Kua tae mai hoki toku hoa ki a au i te ara, kahore aku mea e whakatakoto ai ahau māna?

7 A ka whakahokia mai e tera i roto, ka mea, Hoha ki, kāti ra: kua tutakina noatia ake te tatau, a kei te moenga nei matou ko aku tamariki; e kore e ahei kia whakatika atu ahau ki te hoatu ki a koe.

8 Ko taku kupu tenei ki a koutou, Ahakoa kahore ia i whakatika ki te hoatu ki a ia, no te mea he hoa nona, ma tana tohe ano ka ara ake ai ia, ka hoatu ai ki a ia i nga mea i tonoa e ia.

9 Ko taku kupu ano tenei ki a koutou, Inoia, a ka homai ki a koutou; rapua, a ka kitea e koutou; patukia, a ka uakina ki a koutou.

10 Ta te mea ka whiwhi nga tangata katoa ina inoi; ka kite ina rapu; a ka uakina ki te tangata e patuki ana.

11 Ko tehea matua o koutou ki te inoia e tana tama tetahi taro, e hoatu ranei ki a ia he kamaka? a, *ki te inoia* he ika, e hoatu ranei ki a ia he nakahi hei ika?

12 A, ki te inoia he hua manu, e hoatu ranei ki a ia he kopi-ona?

13 Ki te mea ko koutou, hunga kino nei, e mātau ana ki te hoatu mea papai ki a koutou tamariki: tera noa ake te homaitanga o te Wai-rua Tapu e to koutou Matua i te rangi ki te hunga e inoi ana ki a ia.

14 ¶ Na e pei rewera ana ia, he wahangu ano hoki ia. A, te putanga o te rewera ki waho, ka korero te wahangu; a miharo ana te mano.

15 Na ka mea etahi o ratou, Na te rangatira o nga rewera, na Perehepura tana peinga rewera.

16 Na ka whakamatautau etahi, ka mea ki tetahi tohu i a ia i te rangi.

17 Otiia i mātau ia ki ā ratou whakaaro, a ka mea ki a ratou, Ki te tahuri iho tetahi rangatiratanga ki a ia ano, ka kore; a, *ki te tahuri* tetahi whare ki tetahi whare, ka hinga.

18 A, ki te tahuri iho a Hātana ki a ia ano, me pehea e tu ai tona rangatiratanga? e mea na hoki koutou, na Perehepura taku peinga rewera.

19 Na, ki te mea na Perehepura taku peinga rewera, na wai te peinga a a koutou tama? mo konei hei kai whakahe ratou mo koutou.

20 Tena ki te mea na te ringa o te Atua taku peinga rewera, ina, kua tae noa mai te rangatiratanga o te Atua ki a koutou.

21 I te mea ka tiakina tona whare e te tangata kaha, he patu nei tana, ka ata takoto ona taonga:

22 Ki te puta mai ia tetahi e kaha atu ana i a ia, a ka hinga tera, na, ka tangohia ana patu i whakamanawa atu ia, ka tuwhatuwhaia ona taonga.

23 Te tangata ehara i te hoa noku, he hoa riri ia ki a au: te tangata kahore e kohikohi tahi maua, e titaritari ana.

24 Ka puta mai te wairua poke i roto i te tangata, ka haereere ia ra nga wahi wai kore rapu okiokinga ai; a, tē kitea, ka mea ia, Ka hoki ahau ki toku whare i puta mai ai ahau.

25 A, te taenga atu, rokonga atu kua oti te puruma, te whakapaipai.

26 Na ka haere ia, ka tango i etahi atu wairua tokowhitu, he kino atu i a ia ano; a tomo atu ana, noho ana i reira: a kino atu i te timatanga te

whakamutunga o taua tangata.

27 ¶ A, i a ia e korero ana i enei mea, ka karanga ake tetahi wahine i roto i te mano, ka mea ki a ia, Koa tonu te kopu i kawea ai koe, me nga u i ngotea e koe.

28 Ano ra hoki ko ia, Engari, koa tonu te hunga e whakarangona ana ki te kupu a te Atua, a e mahi ana.

29 ¶ Ano ka rupeke mai te mano, ka anga ia ka korero, He whakatupuranga kino tenei: e rapu ana i tetahi tohu; a e kore tetahi tohu e hoatu, ko te tohu anake o Hona poropiti.

30 I waiho nei hoki a Hona hei tohu ki nga tāngata o Ninewe, ka pera ano te Tama a te tangata ki tenei whakatupuranga.

31 Ka whakatika ngatahi te kuini o te tonga i te whakawakanga me nga tāngata o tenei whakatupuranga, a ka whakatau i te hē ki a ratou: i haere mai hoki ia i nga pito o te whenua ki te whakarangongo ki te whakaaro nui o Horomona; a tenei ano tetahi e nui atu ana i a Horomona.

32 Ka whakatika ngatahi nga tāngata o Ninewe i te whakawakanga me tenei whakatupuranga, a ka whakatau i te hē ki a ratou: i ripeneta hoki ratou i te kauwhautanga a Hona; a tenci ano tetahi e nui atu ana i a Hona.

33 ¶ Ka tahuna te rama, e kore e waiho e te tangata ki te wahi ngaro, ki raro ranei i

RUKA 11.

te puhera, engari ki runga ki te turanga, kia kitea ai te māramatanga e te hunga e tomo atu ana.

34 Ko te kanohi te rama o te tinana: na, ki te atea tou kanohi, ka mārāma ano tou tinana katoa; tena ki te kino, ka pouri ano hoki tou tinana.

35 Na, kia tupato kei pouri te māramatanga i roto i a koe.

36 Na, ki te mārāma tou tinana katoa, a kahore ona wahi pouri, ka mārāma katoa ano, me te mea ko te mura o te rama e whakamārāma ana i a koe.

37 ¶ I a ia e korero ana, ka kiia ia e tetahi Parihi kia tina rahi raua: a ka haere ia ki roto, ka noho.

38 A, te kitenga o te Parihi, ka miharo, no te mea kahore ia e horoi i mua o te tina.

39 Ka mea te Ariki ki a ia, Tenei koutou, e nga Parihi, te horoi nei i waho o te kapa, o te rihi; ko roto ia o koutou e ki ana i te pahua, i te kino.

40 E te hunga kuare, kihai ianei i hangā a roto e te kai hanga o waho?

41 Engari hoatu nga mea o roto hei atawhainga mo nga rawakore; a ka ma nga mea katoa ki a koutou.

42 ¶ Na, aue, te mate mo koutou, e nga Parihi! e hoatu ana hoki e koutou te wahi whakatekau o te miniti, o te ru, o nga otaota katoa, a kapea ake te whakarite whakawa me te aroha ki te Atua: e tika ana ano ko enei kia

meatia, kia kaua ano hoki era e kapea.

43 Aue, te mate mo koutou, e nga Parihi! ko ta koutou hoki e rawe ai ko nga nohoanga rangatira i nga whare karakia, me nga ohatanga i nga kāinga hoko.

44 Aue, te mate mo koutou, e nga karaipi, e nga Parihi, e te hunga tinihanga! e rite ana koutou ki nga urupa e ngaro ana, a e kore e kitea e nga tāngata e haereere ana i runga.

45 ¶ Na ka whakahokia e tetahi o nga kai whakaako o te ture, ka mea ki a ia, E te Kai whakaako, he whakahe ano hoki mo matou enei korero āu.

46 Na, ko tana meatanga, Aue, te mate mo koutou ano, e nga kai whakaako o te ture! e whakawaha ana hoki koutou i nga tāngata ki nga kawenga e taimaha rawa ana hei pikaunga, a e kore tetahi o o koutou matihao e pa atu ki aua kawenga.

47 Aue, te mate mo koutou! ko koutou nei hoki hei hanga i nga urupa o nga poropiti, a na o koutou mātua ratou i whakamate.

48 Na, he kai whakaatu koutou, he kai whakaae ki nga mahi a o koutou mātua: na ratou hoki ratou i whakamate, ko koutou hoki hei hanga i o ratou urupa.

49 Na konei ano te matauranga o te Atua i mea ai, Maku e tono he poropiti, he apotoro ki a ratou, a ka whakamate, ka tukino ratou i tetahi ratou:

RUKA 11, 12.

50 Kia rapua ai *he utu* i tenei whakapaparanga mo te toto o nga poropiti katoa, i ringihia nei no te timatanga ra ano o te ao ;

51 No te toto o Aperā, tae noa ki te toto o Hakaraia i mate ki te takiwa o te āta, o te temepara : ae ra, ka mea atu ahau ki a koutou, E rapua *he utu* i tenei whakapaparanga.

52 Aue, te mate mo koutou, e nga kai whakāako o te ture ! kua tangohia hoki e koutou te kī o te matauranga : kihai koutou i tomo ki roto, a i arai i te hunga e tomo ana.

53 ¶ Na, i a ia e korero ana i enei mea ki a ratou, ka timata ta nga karaipi ta nga Parihi, a kaha rawa ta ratou tohe ki a ia, he mea kia maha atu ai ana korero :

54 E whanga ana hoki mona, e whai ana kia mau tetahi kupu a tona mangai, e whakapa hē ai ratou ki a ia.

UPOKO 12.

Ako kei rite ki nga Parihi.

13 *Ako mo te apo taonga, aha, aha.* 49 *Te tukino mo ratou.*

NA, kei te huihui ano tera nga mano, tona tini, no ka takatakahi i a ratou ano, a ka anga ia, ka mea ki ana akonga, Ko tenei ta koutou e tupato wawe ai, ko te rewena a nga Parihi, ara, ko te tinihanga.

2 Kahore hoki he mea i hipokina e mahue te hura ; kahore hoki tetahi mea ngaro e mahue te mohio.

3 Mo konei ko ta koutou e korero ai i te pouri, ka rangona i te maramatanga ; a ko ta koutou e ki ai ki te taringa i nga ruma i roto rawa, ka kauwhautia i runga i nga whare.

4 Na, ko taku kupu tenei ki a koutou, e oku hoa, Kaua e wehingia te hunga e whakamate nei i te tinana, a, muri iho, kahore ake ā ratou e mea ai.

5 Engari maku e whakaatu ki a koutou ta koutou e wehi ai : Wehingia ia kei a ia nei te tikanga mo te maka ki Kehena i muri i tana whakamatenga ; ae ra hoki, ko taku kupu tenei ki a koutou, Kia wehi ki a ia.

6 Kahore ianei e hokona nga pihoihoi e rima ki nga patene e rua ? a kahore tetahi o ratou e wareware i te Atua.

7 Heoi ko nga makawe nei ano o o koutou matenga, oti katoa te tatau. Kaua ra e wehi : erangi koutou i nga pihoihoi maha.

8 Ko taku kupu tenei ki a koutou, Ki te whakaae tetahi ki a au ki te aroaro o nga tangata, ka whakaaetia ano ia e te Tama a te tangata ki te aroaro o nga anahera a te Atua :

9 A, ki te whakakahore tetahi ki a au ki te aroaro o nga tangata, ka whakakahoretia ano ia ki te aroaro o nga anahera a te Atua.

10 A, ki te korero tetahi he whakahe mo te Tama a te tangata, ka murua tona hara : tena ko te tangata e kohuko-

RUKA 12.

hua ai te Wairua Tapu, e kore tana e murua.

11 A ka kawea koutou ki nga whare karakia, ki nga rangatira, ki te hunga whai mana; kua e manukanuka ki te pehea, ki te aha ranei e whakahoki atu ai koutou, ki ta koutou ranei e korero ai.

12 Ma te Wairua Tapu hoki koutou e ako i taua haora ano ki nga mea e tika ana kia korerotia e koutou.

13 ¶ Na ka mea tetahi i roto i te mano ki a ia, E te Kai whakaako, mea atu ki toku tuakana, kia kotia mai moku tetahi wahi o te kāinga.

14 Na, ko tana meatanga ki a ia, E te tangata nei, na wai ahau i mea hei kai whakarite whakawa, hei kai kokoti mo koutou?

15 I mea ano ia ki a ratou, Kia mahara, kia tupato ki te apo: ehara hoki te hua o ona taonga i te mea e ora ai te tangata.

16 Na ka korerotia e ia tetahi kupu whakarite ki a ratou, ka mea, Hua rawa te whenua o tetahi tangata taonga:

17 Na ka whakaaroaro ia i roto i a ia, ka mea, Me pehea ahau? kahore hoki aku wahi e kohikohi ai ahau i aku hua.

18 A ka mea ia, Tenei taku e mea ai: ka wawāhia e ahau aku whare witi, a ka hangā kia nui: a ka kohikohia ki reira aku hua katoa, me aku mea papai:

19 Katahi ahau ka mea ki toku wairua, E toku wairua,

ka maha o mea papai kei te rongoa mo nga tau e maha; noho noa iho, e kai, e inu, kia koa te ngakau.

20 Otiia ka mea te Atua ki a ia, Kuare, ko a tenei po ano tangohia ai tou wairua i a koe: a ma wai nga mea kua pae na i a koe?

21 Ka penei ano te tangata mona ake ano nga taonga e meatia ana e ia, a kahore e hua nga taonga whaka te Atua.

22 ¶ Na ka mea ia ki ana akonga, Koia ahau ka mea nei ki a koutou, Kua e manukanuka ki to koutou orange, ki ta koutou e kai ai; ki te tinana ano, ki ta koutou e kakahu ai.

23 Rahi atu te orange i te kai, me te tinana i te kakahu.

24 Whakaaroa nga pukeko: kahore nei e whakato, kahore e kokoti; kahore a ratou toa, kahore he whare witi; heoi e whangainga ana ratou e te Atua: tera noa ake koutou i nga manu.

25 Ko wai o koutou e taea e ia te whakaaro iho, te hono atu tetahi wahi ki tona roa, kia kotahi te whatianga?

26 A, ki te kore e taea e koutou te mea nohinohi rawa, he aha i manukanuka ai ki tetahi atu?

27 Maharatia nga rengarenga, to ratou tupu: e kore nei e mahi, e kore e miro; na, ko taku kupu tenei ki a koutou, Kihai a Horomona me tona kororia katoa i rite ki tetahi o enei te whai kakahu.

28 Na, ki te penei ta te Atua

RUKA 12.

whakakakahu i te tarutaru, kei te parae nei inaianei, a apopo ka makā ki te oumu; tera noa ake tana i a koutou, e te hunga whakapono iti.

29 Kaua ra e rapu ki ta koutou e kai ai, ki ta koutou e inu ai, kaua e tirengi noa te whakaaro.

30 E rapu ana hoki nga iwi o te ao ki enei mea katoa: a e mahara ana to koutou Matua e matea ana e koutou enei mea.

31 Engari rapua te rangatiratanga o te Atua, a ka tapiritia mai enei mea katoa ma koutou.

32 Kaua e matakū, e te kahui nohinohi; kua pai hoki to koutou Matua ki te homai i te rangatiratanga ki a koutou.

33 Hokona o koutou taonga, hoatu he mea ma te hunga rawakore; hanga ma koutou he pēke moni e kore e tawhitotia, he taonga ki te rangi e kore e memeha, ki te wahi e kore nei e tata atu te tahae, e kore ano te huhu e kai.

34 Ko te wahi hoki i to koutou taonga, ko reira ano o koutou ngakau.

35 ¶ Kia whitikiria o koutou hope, kia kā nga rama;

36 A, te rite mo koutou hei nga tāngata e tatari ana ki to ratou rangatira, ina hoki mai i te marenatanga; mo tona tae rawa mai patukituki ai, na, uaki tonu ratou ki a ia.

37 Ka koa nga pononga e rokohina mai e to ratou rangatira e mataara ana ina tae

mai: he pono taku e mea nei ki a koutou, ka whitiki ia i a ia, a ka mea i a ratou kia noho, ka haere mai ki te mahi mea ma ratou.

38 A ki te haere mai ia i te rua o nga mataaratanga, ki te haere mai i te toru o nga mataaratanga, a ka rokohina e penei ana ano, ka koa aua pononga.

39 Otira kia mohio koutou ki tenei, me i mātau te tangata i te whare, ki te wa e haere mai ai te tahae, kua mataara ia, a kahore i tukua kia pokaia tona whare.

40 Kia tatanga ra koutou: no te mea e puta mai te Tama a te tangata i te haora e kore ai koutou e mahara.

41 ¶ Na ka mea a Pita ki a ia, E te Ariki, mo matou tenei kupu whakarite e korero nei koe? mo te katoa ranei?

42 Na ka mea te Ariki, Ko wai ra te tuari pono, mahara, e meinga e tona ariki hei rangatira mo ana tangata, hei hoatu i te mehua kai i te wa e tika ai?

43 Ka koa taua pononga, ki te rokohina e tona rangatira ina tae mai, e pena ana.

44 He pono taku e mea nei ki a koutou, ka meinga ia hei rangatira mo ana taonga katoa.

45 Otira ki te mea taua pononga i roto i tona ngakau, Ka roa te haerenga mai o toku ariki; a ka anga, ka whiu i nga pononga tāne, i nga pononga wāhine, ka kai, ka inu, ka haurangi;

46 Ka haere mai te ranga-

tira o taua pononga i te ra e kore ai ia e mahara, i te haora e kore ai ia e mohio, a ka hautopea ia, ka meinga mona wahi i roto i te hunga whakapono-kore.

47 Na, te pononga i mahara ki ta tona rangatira i pai ai, a kihai i whakaaro wawe, kihai i mea i tana i pai ai, he maha nga whiu mona.

48 Tena ko ia kihai nei i mātau, a kua mea i nga mea e tika ai kia whiua, he toru-toru nga whiu mona. He nui hoki te mea i hoatu ki tetahi tangata, he nui te mea e kiia kia homai e ia: a he nui te mea i tukua atu ki tetahi tangata, hira noa atu te mea e-tonoa i a ia.

49 ¶ I haere mai ahau ki te maka kapura ki te whenua; a ko te aha taku e pai ai? kia tungia nei ano!

50 Otiia he iriiringa toku e iriiria ai ahau; a takare tonu ahau kia oti ra ano.

51 E mea ana ranei koutou, i haere mai ahau ki te homai i te rangimarire ki te whenua? Tenei taku kupu ki a koutou, Kahore; engari i te wehewehe:

52 Ta te mea i nga ra e takoto ake nei ka tokorima i roto i te whare kotahi, ka tahuri ratou ki a ratou ano, tokotoru ki te tokorua, tokorua ki te tokotoru.

53 Tahuri ana ko te pāpā ki te tama, ko te tama ki te pāpā; te whaea ki te tamahine, me te tamahine ki te whaea: te hungawai wahine ki tana hunaonga, me te hu-

naonga ki tona hungawai wahine.

54 ¶ A i mea ano ia ki nga mano, Ka kite koutou i te kapua e puta mai ana i te hauauru, na, mea tonu ake koutou, He ua te haere mai nei; a ko ia ano ia.

55 A, *ka kite* i te tonga e pupuhi ana, ka mea koutou, Meake ko te werawera; a ko ia ano ia.

56 E te hunga tinihanga, e mātau ana koutou ki te titiro ki te mata o te whenua, o te rangi; he aha koutou tē titiro ai ki tenei taima?

57 He aha hoki koutou ake ano tē whakaaro ai i te mea tika?

58 I a korua ko tou hoa tau-whāinga e haere ana ki te kai whakarite whakawa, hei te huarahi ano kia kaha te mea kia tukua atu koe e ia: kei toia koe e ia ki te kai whakarite whakawa, a ka tukua koe e te kai whakarite whakawa ki te katipa, a ka makā koe e te katipa ki te whare herehere.

59 Ko taku kupu tenei ki a koe, E kore koe e puta mai i reira, kia poto ra ano nga moni iti rawa te utu e koe.

UPOKO 13.

Ripeneta. 6 Piki hua kore.

10 Te piko ka whakaorangia. 22 Kuwaha kuiti. 31 Mo Herora. 34 Hiruharama.

I REIRA ano etahi i taua wa e korero ana ki a ia ki nga tāngata o Kariri, i whakananua nei o ratou toto e

RUKA 13.

Pirato ki a ratou patunga tapu.

2 Na, ko te whakahokinga a Ihu, ka mea ki a ratou, E mea ana ranei koutou, he hara rawa aua tângata o Kariri i nga tângata katoa o Kariri, no te mea he pera o ratou mate?

3 Na, ko taku kupu tenei ki a koutou, Kahore: engari ki te kore koutou e ripeneta, ka pera ano hoki koutou katoa te ngaro.

4 Me taua tekau ma waru i horoa nei e te pourewa o Hiroama, a mate iho, e mea ana oti koutou, he hara rawa ratou i nga tângata katoa e noho ana i Hiruharama?

5 Ko taku kupu tenei ki a koutou, Kahore: engari ki te kore koutou e ripeneta, ka pera ano koutou katoa te mate.

6 ¶ A i korerotia e ia tenei kupu whakarite; He piki ta tetahi tangata, he mea whakato ki tana mārā waina; na, ka haere ia, ka rapu hua i runga, a kihai i kitea.

7 Katahi ia ka mea ki te kai mahi waina, Na, ka toru oku tau e haere mai ana ki te rapu hua i runga i tenei piki, heoi kahore i kitea: tuakina; hei aha i maumauria ai hoki te whenua?

8 ¶ Na, ko ta tera whakahokinga ka mea ki a ia, E te ariki, waiho ano hoki i tenei tau, kia keria ra ano e ahau nga taha, a kia makā he wai-rakau:

9 A ki te whai hua, *ka waiho*: ki te kahore, ka tuakina e koe

10 ¶ A i roto ia i tetahi o nga whare karakia e whakako ana i te hapati.

11 Na, ko tetahi wahine, he wairua ngoikore tona, kotahi tekau ma waru nga tau, piko tonu, kihai rawa i ahei te whakatika ake.

12 A, te kitenga o Ihu i a ia, ka karanga, ka mea ki a ia, E kui, ka oti tou ngoikore-tanga te wewete atu.

13 Na, whakapakia iho e ia ona ringa ki a ia: a kihai i aha kua tika, a whakakororia ana i te Atua.

14 Na ka korero te rangatira o te whare karakia, i riri hoki mo Ihu i whakaora i te hapati, a ka mea ki te mano, E ono nga ra e tika ai te mahi: hei reira koutou haere mai ai kia whakaorangia, kau-aka i te ra hapati.

15 Na ka whakahokia e te Ariki ki a ia, ka mea, Tangata tinihanga, e kore ianei tenei tangata, tenei tangata o koutou e wewete i tana kau i te hapati, i tana kaihe ranei, ka arahi atu ai i te turanga ki te whakainu?

16 A, tenei tamahine nei a Aperahama, i herea nei e Hatanā, kotahi tekau ma waru nga tau, kihai ianei i tika kia wetekina tenei here ona i te ra hapati?

17 Ano ka korerotia enei mea e ia, ka whakama katoa te hunga e whakahe ana ki a ia: a hari katoa te mano ki nga mea kororia katoa i meinga e ia.

18 ¶ Na ka mea ia, E rite ana te rangatiratanga o te

RUKA 13.

Atua ki te aha? a me whakarite e ahau ki te aha?

19 E rite ana ki te pua nani i kawea e te tangata, i ruia ki tana kari; a ka tupu, ka whakarakaunui; no ka noho nga manu o te rangi ki ona manga.

20 A i mea ano ia, Me whakarite e ahau te rangatiratanga o te Atua ki te aha?

21 E rite ana ki te rewena i tangohia e tetahi wahine, a whaongia ana ki roto ki nga mehua paraoa e toru, no ka rewenatia katoatia.

22 ¶ A ka haereerea e ia nga pa, nga kaininga koraha, whakaako ai, me te ahu ano ki Hiruharama.

23 Na ka mea tetahi ki a ia, E te Ariki, he torutoru koia te hunga e ora? Na, ko tana meatanga ki a ratou,

24 Kia kaha te tohe ki te tomo ma te kuwaha kuiti: ko taku kupu hoki tenei ki a koutou, he tokomaha e whai ki te tomo, a e kore e taea.

25 Kia whakatika kau te tangata i te whare, kia tutakina te tatau, katahi koutou ka anga, ka tu ki waho, ka patu ki te tatau, ka mea, E te Ariki, e te Ariki, uakina ki a matou; na ka whakahokia mai e ia, a ka mea ki a koutou, Kahore ahau i mohio ki a koutou, no hea ranei;

26 Ko reira koutou timata ai te mea, Kua kai matou kua inu ki tou aroaro, a i whakako ano koe ki o matou huarahi.

27 A ka ki mai ano ia, Ka mea atu ahau ki a koutou,

kahore ahau i matau ki a koutou, no hea ranei; mawehe atu i a au, e nga kai mahi katoa i te kino.

28 Ko te wa tena o te tangihanga me te teteatanga o nga niho, ina kite koutou i a Ape-rahama, i a Ihaka, i a Hakopa, me nga poropiti katoa, kei te rangatiratanga o te Atua, a ko koutou kua makā ki waho.

29 A ka haere mai ratou i te rawhiti, i te hauauru, i te hauraro, i te tonga, ka noho ki te rangatiratanga o te Atua.

30 Na, tera etahi o muri e meinga ki mua, me etahi o mua ki muri.

31 ¶ I taua ra ka tae etahi o nga Parihi, ka mea ki a ia, Haere, whakarerea a konei: e hiahia ana hoki a Herora kia whakamatea koe.

32 A ka mea ia ki a ratou, Haere mea atu ki taua pokiha, Na, tenei ahau te pei rewera nei, te mahi nei i te mahi whakaora aiane, apopo, a i te toru o nga ra ka oti taku.

33 Otiia me haereere ahau aiane, apopo, a tahi ra: e kore hoki e ahei kia mate he poropiti i waho o Hiruharama.

34 E Hiruharama, e Hiruharama, e whakamate nei i nga poropiti, e aki nei ki te kamaka i te hunga e tonoa ana ki a koe; ano te tini o aku meatanga kia whakaminea o tamariki, kia peratia me te heihei e whakamine nei i ana pi ki raro ki ona parirau, a kihai koutou i pai!

35 Na ka mahue ki a koutou to koutou whare kia takoto

noa ana: he pono taku e mea nei ki a koutou, E kore koutou e kite i a au, kia tae mai ra ano *te ra* e mea ai koutou, Ka whakapaingia ia e haere mai ana i runga i te ingoa o te Ariki.

UPOKO 14.

Whakaoranga i te hapati. 7
Kei whakakake. 25 E tahi
atu kupu ako ana.

A I tona haerenga ki te whare o tetahi o nga rangatira, he Parihi, ki te kai taro i te hapati, na, titiro pu ana ratou ki a ia.

2 Na, he tangata kopu tetere tera i tona aroaro.

3 Na ka oho a Ihu, ka korero ki nga kai whakaako o te ture, ki nga Parihi, ka mea, He mea tika ranei te whakaoara i te hapati?

4 A kihai ratou i kiki. Na ka mau ia ki a ia, a whakorangia ana, tukua ana kia haere.

5 Na ka whakahokia e ia ki a ratou, ka mea, Ki te taka te kaihe, te kau ranei, a tetahi o koutou ki te poka, e kore ianei e hutia ake e ia i reira pu ano i te ra hapati?

6 A kihai i taea e ratou te utu enei *kupu ana*.

7 ¶ Na ka korerotia e ia tetahi kupu whakarite ki te hunga i karangatia, i tona kitenga i a ratou e whiriwhiri ana inga nohoanga rangatira; i mea ia ki a ratou,

8 Ki te karangatia koe e tetahi ki te marenatanga, kaua e noho ki te nohoanga ranga-

tira; kei karangatia hoki e ia tetahi e nui atu ana i a koe;

9 A ka haere mai te tangata i karangatia ai korua, ka mea ki a koe, Tukua he nohoanga mo tenei; a ka whakama koe, ka haere ki to muri nohoanga noho ai.

10 Engari, ka karangatia koe, haere, e noho ki to muri nohoanga; mo tetaerawa mai o te tangata nana koe i karanga, na ka mea ia ki a koe, E hoa, neke ake. Ko reira hoki koe whai kororia ai i te aroaro o nga tangata e noho tahi ana koutou.

11 Ki te whakanui hoki tetahi i a ia, ka whakaititia; a ki te whakaiti tetahi i a ia, ka whakanuia.

12 ¶ I mea ano ia ki te tangata nana nei ia i karanga, E taka koe i te tina, i te hapa ranei, kaua e karangatia ou hoa, kaua hoki ou teina, kaua hoki ou whanaunga, kaua ano nga tangata taonga e noho tata ana; kei karangatia ano koe, a ka whai utu koe.

13 Engari ka taka hakari koe, karangatia nga rawakore, nga ngongengonge, nga kopa, nga matapo:

14 A ka koa koe; kahore hoki a ratou utu ki a koe: engari ka utua koe a te aranga o te hunga tika.

15 ¶ Ano ka rongo ki enei mea tetahi o te hunga e noho tahi ana ki te kai, ka mea ki a ia, Ka koa te tangata kai taro i te rangatiratanga o te Atua.

16 Na ka mea ia ki a ia, I takā he hapa nui e tetahi ta-

RUKA 14.

ngata, a he tokomaha i karangatia :

17 A ka tonoa tana pononga i te haora o te hapa, hei mea ki te hunga i karangatia, Haere mai ; kua rite nei hoki nga mea katoa.

18 Na, ka anga ratou katoa, ka whakakahore ngatahi. Ka mea to mua ki a ia, Kua hokona e ahau he mārā, me haere ahau kia kite : e mea ana ahau ki a koe, kia tukua ahau kia whakakahore.

19 Na, ko te meatanga mai a tetahi, E rima takirua nga okiha kua hokona e ahau, ka haere ahau ki te whakamatau : e mea ana ahau ki a koe, kia tukua ahau kia whakakahore.

20 A i mea mai ano tetahi, Kua marenatia ahau ki te wahine, a he mea tenei e kore ai ahau e ahei te haere.

21 Na, te haerenga mai o taua pononga, ka korerotia enei mea ki tona rangatira. Na ka riri te tangata i te whare, a ka mea ki tana pononga, Hohoro te haere ki nga ara, ki nga huarahi o te pa, arahina mai ki konei nga rawakore, nga ngongengonge, nga kopa, me nga matapo.

22 Na ka mea te pononga, E kara, kua rite tau i mea ai, a tenei ano he wahi takoto noa.

23 A ka mea te rangatira ki te pononga, Haere ki nga huarahi, ki nga taiepa, toia hoki kia haere mai, kia kī ai toku whare.

24 Ko taku kupu hoki tenei ki a koutou, E kore tetahi o

aua tangata i karangatia ra e kai i taku hapa.

25 ¶ Na, he rahi te hui i haere tahi me ia : ka tahuri ia, ka mea ki a ratou,

26 Ki te haere mai tetahi ki a au, a ka kore e whakakino ki tona pāpā, whaea, wahine, tamariki, teina, tuahine, ae ra ki te ora ano mona ake, e kore ia e ahei hei akonga maku.

27 A ki te kore tetahi e mau ki tona ripeka, e haere mai i muri i a au, e kore ia e ahei hei akonga maku.

28 Ko wai hoki o koutou, ki te mea ia ki te hanga taumaihi, e kore e mātua noho ki te tatau i nga utu, e ranea ranei āna mea hei whakaoti ?

29 Kei whakatakoto rawa ake ia i te turanga, na e kore e taea te whakaoti, a ka tawai ki a ia te hunga katoa e titiro ana,

30 Ka mea, I timata te tangata nei te hanga whare, a kihai i taea te whakaoti.

31 Ko tehea kingi ranei e haere ana ki te whawhai ki tetahi atu kingi, a e kore e mātua noho, e whakaaro, e ahei ranei ia me nga mano kotahi tekau, te tu ki te riri i tetahi atu e haere mai ana ki a ia me nga mano e rua tekau ?

32 A, ki te kahore, i a ia ano i tawhiti, ka tukua he karere, ka mea kia houhia te rongo.

33 Waihoki, ko nga tangata katoa o koutou e kore e whakarere i a ratou mea katoa, e kore e ahei hei akonga maku.

34 He mea pai te tote: otira ki te hemo te ha o te tote, ma te aha ka whai ha ai?

35 E kore e pai mo te whe-nua, e kore ano hei whakawairakau; a ka akiritia ki waho. Ko ia he taringa ona hei whakarongo, kia rongo ia.

UPOKO 15.

*Hae o nga Parihi ka patua.
11 Tama kuare.*

NA ka whakatata ki a ia nga pupirikana katoa me nga tangata hara, ki te whakarongo ki a ia.

2 A ka amuamu nga Parihi me nga karaipi, ka mea, E manako ana tenei tangata ki nga tangata hara, a e kai tahi ana me ratou.

3 ¶ Na ka korerotia e ia tenei kupu whakarite ki a ratou, a ka mea,

4 Ko tehea tangata o koutou, he rau ana hipi, a ka ngaro tetahi o ratou, e kore ianei e waiho e ia nga tekau e iwa ma iwa i te koraha, a ka haere ki taua mea i ngaro, kia kitea ra ano?

5 A ka kitea, ka waha i runga i ona pokowhiwhi, ka koa.

6 Ano ka tae ki te whare, ka karangatia ona hoa me nga tangata e noho tata ana, ka mea ki a ratou, Kia hari tahi tatou; kua kitea hoki taku hipi i ngaro.

7 Ko taku kupu tenei ki a koutou, Ka pera ano i te rangi mo te tangata hara kotahi ina ripeneta, nui atu i te hari mo nga tangata tika e

iwa tekau ma iwa, kahore nei ā ratou mea e ripeneta ai.

8 ¶ Ko tehea wahine ranei, kotahi nei tekau ana moni, a ki te ngaro tetahi moni, e kore ianei ia e tahu i te rama, e puruma i te whare, e rapu marie, kia kitea ra ano?

9 Ano ka kitea, ka karangatia ona hoa me te hunga e noho tata ana, ka mea, Kia hari tahi tatou; kua kite hoki ahau i taku moni i ngaro.

10 Waihoki ko taku kupu tenei ki a koutou, He hari kei te aroaro o nga anahera a te Atua mo te tangata hara kotahi ina ripeneta.

11 ¶ A i mea ano ia, Tokorua nga tama a tetahi tangata:

12 A ka mea to muri o raua ki tona pāpā, E pa, homai ki a au te wahi taonga e wehea e koe moku. Na ka wehe-wehea e ia ki a raua tona oranga.

13 A kihai i maha nga ra, ka kohikohia e te tama o muri nga mea katoa, a haere ana ki te whenua tawhiti, mau-mauria ana ona taonga ki reira, he tōreretanga ki te kino.

14 Ano ka poto ana mea katoa, ka mate rawa taua whenua i te kai; a ka timata ia te rawakore.

15 Na ka haere ia, ka noho ki tetahi o nga tangata o taua whenua; a ka tonoa e ia ki ana māra ki te whangai poaka.

16 A i hiahia ia kia whakakiia tona kopu ki nga lua e kainga ana e nga poaka:

heoi kihai i hoatu e tetahi ki a ia.

17 A, te hokinga ake o ona whakaaro, ka mea ia, Ano te tini o nga kai mahi a toku pāpā, he nui noa atu a ratou taro, ko ahau ia, ka ngaro i te kai kore!

18 Ka whakatika ahau, ka haere ki toku matua, ka mea ki a ia, E pa, kua hara ahau ki te rangi, ki tou aroaro ano,

19 A heoi ano tikanga kia karangatia ahau he tama nāu: meinga ahau kia rite ki tetahi o o kai mahi.

20 Na ka whakatika ia, a haere ana ki tona matua. Na, i a ia i tawhiti, ka kite tona matua i a ia, ka aroha, ka oma, hinga iho ki tona kaki, kihi ana i a ia.

21 Na, ko te meatanga a te tama ki a ia, E pa, kua hara ahau ki te rangi, ki tou aroaro ano, a heoi ano tikanga kia karangatia ahau he tamaiti nāu.

22 Na ka mea te matua ki ana pononga, Mauria mai te kakahu, te mea pai rawa, whakakakahuria ki a ia; homai hoki he mowhiti mo tona ringa, he hu hoki mo ona waewae:

23 Kawea mai ano te kuao kau, te mea whangai, patua; kia kai tatou, kia koa te ngakau:

24 Ko tenei tama hoki aku i mate, a kua ora; i ngaro, a kua kitea. A ka anga ratou, ka koa.

25 Na, kei te māra tana tama mātāmua: a, tona haerenga mai, ka whakatata ki

te whare, ka rongo i te waiata i te kanikani.

26 Na karangatia ana e ia tetahi o nga tāngata, ka ui, he aha ra enei mea.

27 Na, ko ta tera meatanga ki a ia, Kua tae mai to teina; a kua patua te kuao momona a te kau e tou matua, no te mea kua riro ora mai ia.

28 Na ka riri ia, a kihai i pai kia haere ki roto: me i reira ka haere tona matua ki waho, ka tohe ki a ia.

29 Na ka whakahokia e ia, ka mea ki tona matua, Na, te tini o nga tau i mahi nei ahau ki a koe, kahore rawa hoki i takahi i to kupu: heoi kahore rawa i homai e koe ki a au he kuao koati, kia koa tahi ai ahau me oku hoa:

30 Tena ka tae mai nei tenei tama āu, i pau nei to oranga i a ia, ratou tahi ko nga wāhine puremu, kua patua e koe te kuao momona a te kau māna.

31 Na ka mea tera ki a ia, E tama, kei a au tonu koe, a māu aku mea katoa.

32 He tika ia kia koa tatou, kia hari: i mate hoki to teina nei, a kua ora; i ngaro, a kua kitea.

UPOKO 16.

Whakaaro tika mo nga taonga. 14 He o ta nga Parihi. 19 Te tangata taonga.

A I mea ano ia ki ana akonga, No mua tetahi tangata taonga, he tuari taonga tana; a ka korerotia ia ki a ia, e maumauria ana e ia ana mea.

2 Na ka karangatia ia, a

RUKA 16.

ka mea ki a ia, He aha tenei e rangona nei e ahau mou? korerotia mai te tikanga o nga mea i tuarititia e koe; e kore hoki e ahei kia waiho koe hei tuari.

3 Na, ko te meatanga a taua tuari i roto i a ia, Me aha ahau? e tangohia ana hoki i a au te tuaritanga e toku ariki: e kore ahau e kaha ki te kerī; e whakama ana ahau ki te tono *mea maku*.

4 E mohio ana ahau ki taku e mea ai, mo toku peinga rawatanga atu i te tuaritanga, ka ai o ratou whare hei tuku-nga atu moku.

5 Na ka karangatia e ia tenei tangata, tenei tangata o te hunga i a ratou nei etahi mea a tona ariki, a ka mea ki te tuatahi, E hia nga mea a toku ariki i a koe?

6 Na ka mea tera, Kotahi rau mehua hinu. Na, ko tana meatanga ki a ia, Tangohia to pukapuka, hohoro te noho, tuhituhia e rima tekau.

7 Katahi ia ka mea ki tetahi, E hia hoki i a koe? Ka mea ia, Kotahi rau mehua witi. Na ka mea ia ki a ia, Tangohia to pukapuka, tuhituhia e waru tekau.

8 A ka whakamoemititia te tuari kino e te ariki, mona i whai whakaaro: engari hoki nga tamariki o tenei ao, i to ratou whakapaparanga, e nui ana te whakaaro i to nga tamariki o te marama.

9 Na, ko taku kupu tenei ki a koutou, Waiho te taonga kino hei mea i etahi hoa aroha mo koutou; mo te hē rawa

iho o koutou, ka ai he tuku-nga atu mo koutou ki nga whare ora tonu.

10 Ko ia e pono ana i te mea nohinohi rawa, e pono ano i te mea nui: a ko ia e kore e tika i te mea nohinohi rawa, e kore e tika i te mea nui.

11 Na, ki te kahore i pono ta koutou mahi ki te taonga hē, ma wai e tuku ki a koutou te *taonga* pono?

12 A, ki te kahore koutou i pono i to te tangata ke, ma wai e hoatu he mea ma koutou ake ki a koutou?

13 E kore e ahei i tetahi te mahi ki nga rangatira tokorua: ka kino hoki ki tetahi, ka aroha ki tetahi; ka u ranei ki tetahi, a ka whakahawea ki tetahi. E kore e ahei i a koutou te mahi ki te Atua, ki te taonga.

14 ¶ A i rongo nga Parihi ki enei mea katoa, he hunga apoapo moni hoki ratou: a ka whakahi ki a ia.

15 Na, ko tana meatanga ki a ratou, Ko koutou te hunga e whakatikatika ana i a koutou ano i te aroaro o nga tātanga; ko te Atua ia e mātau ana ki o koutou ngakau: ko te mea nui hoki ki nga tātanga hei mea whakarihariha ki te aroaro o te Atua.

16 I *tutuki* te ture me nga poropiti ki a Hoani: no reira ake i kauwhautia ai te rangatiratanga o te Atua, a taruke ana nga tātanga katoa ki roto.

17 Erangi te pahemotanga o te rangi, o te whenua, e takoto noa ana, e kore ia tetahi tohu o te ture e taka.

RUKA 16, 17.

18 Ki te whakarere tetahi i tana wahine, a ka marena i tetahi atu, e puremu ana ia: a ki te marena tetahi i te wahine kua whakarerea e te tangata, e puremu ana ia.

19 ¶ I mua tetahi tangata taonga, he kakahu papura ona, he rinena, i kai ano i nga kai papai i nga ra katoa:

20 Na, ko tetahi tangata rawakore ko Raharuhi te ingoa, ka whakatakotoria ki tona kuwaha, he tuwhenua,

21 A e hiahia ana kia whangainga ki nga kongakonga e ngahoro ana i te tepu a te tangata taonga: i haere mai ano nga kuri, a mitimiti ana i ona mate.

22 Nawai a, ka mate te tangata rawakore, a kawea ana e nga anahera ki te uma o Aperahama: i mate ano te tangata taonga, a tanumia ana;

23 A tona tirohanga ake i te reinga, i a ia e whakamamaetia ana, ka kite i a Aperahama i tawhiti, me Raharuhi i tona uma.

24 Na ka karanga ia, ka mea, E pa, e Aperahama, kia aroha ki a au, tonoa mai hoki a Raharuhi ki te tou i te pito o tona matihao ki te wai, hei whakamatao i toku arero; e mamae ana hoki ahau i tenei muramura.

25 Na ka mea a Aperahama, E tama, kia mahara, kua riro i a koe au mea papai i tou oranga, he kino hoki nga mea i a Raharuhi: na ka whakamarietia nei ia, a e whakamamaetia ana koe.

26 A hāunga enei mea katoa, kua oti te whakapumanu tetahi tawhā nui ki te takiwa o koutou, o matou: a ki te mea etahi ki te whakawhiti atu i konei ki a koutou, e kore e ahei; e kore ano e whiti mai i kona ki a matou.

27 Ano ra ko tera, Koia ahau ka mea nei ki a koe, e pa, kia tonoa ia ki te whare o toku pāpā:

28 Tokorima hoki oku teina; kia korero ai ia ki a ratou, kei haere mai hoki ratou ki tenei wahi mamae.

29 Ka mea a Aperahama ki a ia, Kei a ratou a Mohi ratou ko nga poropiti; me whakarongo ki a ratou.

30 Ka mea ia, Kahore, e pa, e Aperahama: engari ki te haere tetahi ki a ratou o te hunga mate, ka ripeneta ratou.

31 Na ka mea mai tera ki a ia, Ki te kore ratou e whakarongo ki a Mohi, ki nga poropiti, e kore ano e whakaae, ahakoa ara atu te tangata i te hunga mate.

UPOKO 17.

Etahi atu akoranga ana.

5 Kahore he koninga ake mo ta tatou ki te Atua. 11 Nga repera. 20 Tona haerenga mai he huaki tata.

NA ka mea ia ki nga akonga, E kore e taea te whakakahore te putanga o nga take hē: otiia aue, te mate mo te tangata e puta ai!

2 E nui te pai ki a ia ki te whakawerewerea ki tona kaki te kohatu mira kaihe, kia

RUKA 17.

makā hoki ia ki te moana, a kia kaua ia e whakahe i tetahi o enei mea nohinohi.

3 Kia tupato ki a koutou: Ki te hara ki a koe tou teina, riria; a, ki te ripeneta, murua tāna.

4 A, ki te whitu nga haranga ki a koe i te ra tahi, a ka whitu ona hokinga ki a koe i te ra tahi, a ka mea, E ripeneta ana ahau; murua tāna.

5 ¶ A ka mea nga apotoro ki te Ariki, Whakanuia to matou whakapono.

6 Na ka mea te Ariki, Ki te mea he whakapono to koutou, me te pua nani *te rahi*, ka mea koutou ki tenei hikamaina, Kia rangā atu koe, kia whakatokia ki te moana; na ka rongo ki a koutou.

7 Na, ko wai o koutou he pononga tana e parau ana, e tiaki ana ranei i nga hipi, a, tona hokinga mai i te māra, ka mea tonu atu ki a ia, Haere ake, e noho ki te kai?

8 A e kore e mea ki a ia, Takā he hapa maku, ka whiti ai i a koe, ka tuari mai ki a au, a ka kai ahau, ka inu; a, ka mutu enei mea, ka kai hoki koe, ka inu?

9 E whakawhetai oti ia ki taua pononga, mona i mea i nga mea i whakahaua ai ia? E mea ana ahau, Kahore.

10 Waihoki ko koutou, ka oti nga mea katoa i whakahaua ai koutou, me ki atu, He pononga kino matou: ta matou i mea ai, ko te mea kua takoto nei te tikanga kia mahia e matou.

11 ¶ A, i a ia e haere ana ki

Hiruharama, ka haere ia ra waenganui o Hamaria, o Kariri.

12 A, i a ia e tomo ana ki tetahi kainga koraha, kotahi tekau nga tangata i tutaki ki a ia, he repera, na ka tu mai ratou i tawhiti:

13 A ka karanga, ka mea, E kara, e Ihu, kia aroha ki a matou.

14 A, tona kitenga atu, ka mea ki a ratou, Haere, kia kite nga tohunga i a koutou. A i a ratou e haere ana, na kua ma.

15 A, te kitenga o tetahi o ratou, kua ora ia, ka hoki mai, a he rahi tona reo ki te whakakororia i te Atua,

16 A takoto tapapa ana ia ki ona waewae, ka whakawhetai ki a ia: a no Hamaria ia.

17 A ka oho atu a Ihu, ka mea, Kihai ranei te tekau i whakaorangia? a kei hea nga tokoiwa?

18 Heoi ano nga mea i kitea e hoki mai ana ki te homai i te kororia ki te Atua, ko tenei tangata iwi-ke.

19 Na ka mea ki a ia, Whakatika, haere: na to whakapono koe i ora ai.

20 ¶ A ka uia ia e nga Parihi, ko a hea puta ai te rangatiratanga o te Atua, na ka whakahokia e ia ki a ratou, ka mea, E kore e kitea te putanga o te rangatiratanga o te Atua:

21 E kore ano ratou e mea, Na, tenei! na, tera! kei roto hoki i a koutou te rangatiratanga o te Atua.

22 ¶ A i mea ano ia ki nga akonga, Tera e tae mai nga ra e hiahia ai koutou kia kite i tetahi o nga ra o te Tama a te tangata, a e kore e kite.

23 A e mea ratou ki a koutou, Na, tenei; na, tera: kua e haere atu, kua e aru atu.

24 Ka rite hoki ki te uira e hiko mai ana i tetahi wahi i raro o te rangi, a tiaho atu ana ki tetahi wahi i raro o te rangi; e pera ano te Tama a te tangata i tona ra.

25 Otiia ko te tikanga tenei kia maha nga mamae mona ki mua, kia whakakino ano hoki e tenei whakapapara-nga.

26 Ka rite hoki ki nga ra i a Noa nga ra o te Tama a te tangata.

27 E kai ana ratou, e inu ana, e marena ana, e tukua ana ki te marena, taea noatia te ra i tomo ai a Noa ki te āka, a, te putanga o te wai-puke, na, ngaro katoa.

28 Ka rite ano ki nga ra i a Rota; e kai ana ratou, e inu ana, e hoko mai ana, e hoko atu ana, e whakato ana, e hanga whare ana;

29 A, te ra i puta ai a Rota i Horoma, ka uaina he kapura he whanariki i te rangi, na, ngaro katoa.

30 Ka pera ano i te ra e whakakitea mai ai te Tama a te tangata.

31 I taua ra, kei runga tetahi i te whare, me ona taonga hoki i roto i te whare, kua ia e heke iho ki te tiki i aua mea: te tangata hoki i te

māra, kua hoki ia e hoki atu ki nga mea o muri.

32 Kia mahara ki te wahine a Rota.

33 Ki te whai tetahi kia ora ia, ka mate ano ia; a ki te mate tetahi, ka ora ano ia.

34 Ko taku kupu tenei ki a koutou, I taua po tokorua i te moenga kotahi; kotahi e tangohia, kotahi e waiho.

35 Tokorua nga wāhine e huri ana; kotahi e tangohia, kotahi e waiho.

36 Tokorua nga tāngata i te māra; kotahi e tangohia, kotahi e waiho.

37 Na ka whakahokia e ratou, ka mea ki a ia, Ko hea, e te Ariki? Ka mea ia ki a ratou, Ko te wahi i te tupa-paku, ko reira huihui ai nga ekara.

UPOKO 18.

Me inoi, 9 me te whakaiti ano i a koe. 15 Nga tamariki. 18 Arainga a te taonga. 28 Me whakanui ia ki runga ake i nga mea maori. 31 Mo tona mate-nga. 35 Te matapo.

NA ka korero ia i tetahi kupu whakarite ki a ratou mo tenei, kia inoi tonu, kia kua e ngoikore;

2 I mea ia, I tetahi pa tetahi kai whakarite whakawa, kihai nei i wehi ki te Atua, kihai ano i hopohopo ki te tangata:

3 A i taua pa ano tetahi pouaru; na ka haere mai ia ki a ia, ka mea, Whakatikaia taku whakawa i toku hoa tau-whāinga.

4 A, roa iho, kihai ia i pai:

muri iho ka mea ia i roto i a ia, Ahakoa kahore ahau e wehi ki te Atua, e hopohopo ki te tangata :

5 Heoi ka raruraru ahau i te pouaru nei, na ka whakatikaia e ahau tana whakawa, kei haere tonu mai, a taea noatia iho taku raru.

6 Ka mea te Ariki, Whakaro-ngo ki ta te kai whakarite whakawa kino i mea ra.

7 A e kore ranei te Atua e whakatika i te whakawakanga a ana tāngata i whiriwhiri ai, e karanga nei ki a ia i te ao, i te po, ahakoa whakaroa noa ia ki a ratou ?

8 Ko taku kupu tenei ki a koutou, Ka hohoro ia te whakatika i ta ratou whakawa. Otira ka tae mai te Tama a te tangata, e rokohina mai ranei e ia he whakapono ki runga ki te whenua ?

9 ¶ Ka korero ano ia i tenei kupu whakarite ki etahi i u o ratou whakaaro ki a ratou ano, he tika, a i whakakorekore ki era atu :

10 Tokorua nga tāngata i haere ki te temepara ki te inoi ; he Parihi tetahi, ko tetahi he pupirikana.

11 Tu ana te Parihi ko ia anake, ko tana karakia tenei, E te Atua, ka whakawhetai ahau ki a koe, no te mea kahore ahau e rite ki era atu tāngata, ki te hunga hao taonga, kino, puremu, moku hoki tē rite ki tenei pupirikana.

12 Takirua oku nohoanga pukutanga i te wiki, e hoatu ana e ahau te wahi whakatekau o aku mea katoa.

13 Ko te pupirikana ia, i tu mai i tawhiti, kihai i mea kia anga ake ona kanohi ki te rangi, heoi patuki ana ki tona uma, ka mea, E te Atua, tohungia ahau, te tangata hara.

14 Ko taku kupu tenei ki a koutou, Nui atu te tika o tenei i to tera i te hokinga atu ki tona whare : ki te whakanui hoki tetahi i a ia, ka whakaititia ; a ki te whakaiti tetahi i a ia, ka whakanuia.

15 ¶ Na ka kawea mai e ratou ki a ia etahi tamariki nonohi, kia pa ai ia ki a ratou : a, te kitenga o ana akonga, ka riria atu ratou.

16 Otira ka karangatia ratou e Ihu, ka mea ia, Tukua nga tamariki nonohi kia haere mai ki a au, kaua hoki ratou e araia atu : no nga penei hoki te rangatiratanga o te Atua.

17 He pono taku e mea nei ki a koutou, Ki te kahore e rite te tango a tetahi i te rangatiratanga o te Atua ki ta te tamaiti nohinohi, e kore rawa ia e tomo ki roto.

18 ¶ Na ka ui tetahi rangatira ki a ia, ka mea, E te Kai whakaako pai, me aha ahau ka whiwhi ai ki te oranga tonutanga ?

19 Na, ko te meatanga a Ihu ki a ia, He aha ahau i kiia ai e koe he pai ? kahore tetahi i pai, kotahi anake, ko te Atua :

20 E mātau ana koe ki nga ture, Kaua e puremu, Kaua e patu tangata, Kaua e tahae, Kaua e whakapae teka, Wha-

RUKA 18.

kahonoretia tou pāpā me tou whaea.

21 Na ka mea ia, Kua rite i a au enei katoa no toku tamarikitanga ake.

22 A, te rongonga o Ihu ki enei mea, ka mea ki a ia, Kotahi te mea kahore i rite i a koe: hokona o mea katoa, ka tuwha atu ma nga rawakore, a e whai taonga koe ki te rangi: a haere mai i muri i a au.

23 Na ka rongoa ia ki enei mea, ka pouri rawa; he nui hoki ona taonga.

24 A ka kite a Ihu i a ia e pouri rawa ana, ka mea, Ano te whakauaua o te tapoko o te hunga taonga ki te rangatiratanga o te Atua!

25 Ta te mea erangi te haere o te kamera ra te kowhao o te ngira, e takoto noa ana, he whakauaua rawa ia te haere o te tangata taonga ki roto ki te rangatiratanga o te Atua.

26 Na ka mea nga kai whakarongo, Ko wai ra e ora?

27 Ka mea ia, Ko nga mea e kore e taea e te tangata, e taea e te Atua.

28 A ka mea a Pita, Na, kua whakarerea nei e matou nga mea katoa, a aru ana i a koe.

29 Na ka mea ia ki a ratou, He pono taku e mea nei ki a koutou, Ki te whakarerea e tetahi tangata he whare, he matua, he tuakana, he wahine, he tamariki, he whakaaro hoki nana ki te rangatiratanga o te Atua,

30 Ina, tini atu nga mea e riro i a ia i tenei wa, a i te

ao meake puta ko te oranga tonutanga.

31 ¶ A ka mau ia ki te tekau ma rua, ka mea ki a ratou, Na, e haere ana tenei tatou ki Hiruharama, a ka rite katoa nga mea i tuhituhia e nga poropiti mo te Tama a te tangata.

32 Ka tukua hoki ia ki nga tauwiwi, ka tawaia, ka whakatupuria kinotia, ka tuwhaina:

33 A, ka oti ia te whiu, ka whakamatea: a i te toru o nga ra ka ara.

34 A kihai ratou i mātau ki tetahi o enei mea: a he mea huna ki a ratou tenei kupu, kihai hoki ratou i mohio ki nga mea i korerotia.

35 ¶ A, i a ia e whakatata ana ki Heriko, e noho ana tetahi matapo i te taha o te huarahi ki te tono mea mana:

36 A, tona rongonga i te mano e haere atu ana, ka ui atu, He aha tenei?

37 Ka mea ratou ki a ia, Ko Ihu o Nahareta e haere atu ana.

38 Katahi ia ka karanga, ka mea, E Ihu, e te Tama a Rawiri, kia aroha ki a au.

39 Na ka riria ia e te hunga i haere i mua kia noho puku: heoi rahi noa ake tana karanga, E te Tama a Rawiri, kia aroha ki a au.

40 Na ka tu a Ihu, ka mea kia arahina mai ki a ia: ano ka tata, ka ui ki a ia,

41 Ka mea, Kia ahatia koe e ahau? Ka mea ia, E te Ariki, kia titiro ahau.

42 Ka mea a Ihu ki a ia,

Titiro: na tou whakapono koe i whakaora.

43 A titiro tonu ake ia, a aru ana i a ia, me te whakakororia i te Atua: a, te kite nga o te iwi katoa, ka whakamoemiti ki te Atua.

UPOKO 19.

Hakiaha. 11 Nga moni i nga pononga. 28 Kei runga i te kaihe. 37 Ta te mano. 41 Tana tangi. 45 Tana i roto i te temepara.

A KA tomo a Ihu, ka tika i waenganui o Heriko.

2 Na, ko tetahi tangata, ko Hakiaha te ingoa i karangatia ai, he rangatira pupirikana, he tangata taonga ano:

3 I whai ia kia kite i a Ihu he pehea ranei ia; heoi kihai i taea e ia i te mano, he tangata poto hoki.

4 Na ka oma ia ki mua, a kake ana ki tetahi hikamora, kia kite i a ia: meāke hoki ia tika ra reira.

5 Ano ka tae a Ihu ki taua wahi, ka titiro atu, ka kite i a ia, a ka mea ki a ia, E Hakiaha, e ahua, heke iho; me noho hoki ahau ki tou whare aiane.

6 A hohoro tonu ia te heke iho, koa tonu hoki ki a ia hei manuhiri māna.

7 Na ka amuamu katoa nga tāngata i kitea ai, ka mea, Kua riro ia ki te tangata hara noho ai.

8 Na ka tu a Hakiaha, ka mea ki te Ariki, E te Ariki, na, he hoatu taku i te hawhe o aku taonga ki te hunga rawakore: a, ki te mea kua

riro mai i a au te mea a tetahi i te whakapae teka, ka takiwhatia aku utu.

9 Na, ko te meatanga a Ihu ki a ia, Nonaianei te oranga i tae mai ai ki tenei whare, he tama nei hoki ia na Aperahama;

10 I haere mai hoki te Tama a te tangata ki te rapu, ki te whakaora i te mea i ngaro.

11 ¶ A i a ratou e whakaro-ngo ana ki enei mea, ka kore-rotia ano e ia tetahi kupu whakarite, no te mea e tata ana ia ki Hiruharama, a e mea ana ratou, ko reira pu ano whakakitea mai ai te rangatiratanga o te Atua.

12 Na ka mea ia, I haere tetahi rangatira nui ki te whenua mamao, kia riro ai i a ia tetahi rangatiratanga, ka hoki mai ai.

13 A kotahi tekau āna pononga i karangatia e ia, a kotahi tekau nga pauna i hoatu e ia ki a ratou, ka mea ki a ratou, Mahia *enei*, kia hoki mai ra ano ahau.

14 Otira i kino tona iwi ki a ia, ka tono karere i muri i a ia, ka mea, E kore matou e pai ki tenei hei kingi mo matou.

15 A, tona hokinga mai, i te rironga o te rangatiratanga i a ia, na ka mea kia karangatia ki a ia aua pononga, i hoatu nei e ia te moni ki a ratou, kia kite ai ia i ta tetahi, i ta tetahi i mabi ai.

16 Ka tae mai to mua, ka mea, E te ariki, ka ngahuru nga pauna kua mahia ki to pauna.

17 A ka mea ia ki a ia, Ka pai, e te pononga pai: pono tonu tau mahi i te mea nohi-nohi rawa, na, hei rangatira koe mo nga pa kotahi tekau.

18 A, te haerenga mai o te tokorua, ka mea, E te ariki, e rima nga pauna kua mahia ki to pauna.

19 A ka mea ia ki tenei, Hei rangatira ano koe mo nga pa e rima.

20 Na, te haerenga mai o tetahi, ka mea, E te ariki, na, to pauna; i te rongoa hoki i a au i roto i te tauera:

21 I matakū hoki ahau ki a koe, no te mea he tangata uaua koe: e tango ana koe i te mea kihai i whakatakotoria iho e koe, e kotikoti ana i te mea kihai i ruia e koe.

22 Na, ko tana meatanga ki a ia, Kei ta to mangai he whakahēanga maku i a koe, e te pononga kino. I mohio koe he tangata uaua ahau, e tango ana i te mea kihai i whakatakotoria e ahau, e kotikoti ana i te mea kihai i ruia e ahau:

23 A he aha koe tē hoatu ai i taku moni ki te takotoranga moni, penei kua riro mai taua mea i a au, me ona hua ano, i toku taenga mai?

24 Na ka mea ia ki te hunga e tu tata ana, Tangohia te pauna i a ia, hoatu hoki ki tera i nga pauna kotahi tekau.

25 (Ka mea ratou ki a ia, E te ariki, kotahi nei tekau ana pauna.)

26 Ko taku kupu hoki tenei ki a koutou, Ki te whai mea tetahi, ka hoatu ano ki a ia;

a ki te kahore he mea a tetahi, ko ana mea ake ka tangohia i a ia.

27 Tena ko aua hoa riri oku kihai nei i pai ki a au hei kingi mo ratou, arahina mai ki konei, me patu ki toku aroaro.

28 ¶ Ano ka mutu enei korero, ka turia atu e ia ki mua, ka haere ki Hiruharama.

29 Ano ka tata ia ki Peta-paki ki Petani, ki te maunga e karangatia nei ko to nga Oriwa, na, tokorua ana ako-nga i tonoa e ia,

30 I mea ia, Haere korua ki te kāinga e anga mai ana ki a korua; ano ka tomo atu, ka kite korua i tetahi kuao kaihe e here ana, he mea kahore ano i nohoia noatia e te tangata: wetekina, arahina mai.

31 A ki te mea tetahi ki a korua, He aha i wetekina ai e korua? kia penei ta korua ki atu, E mea ana te Ariki ki a ia māna.

32 Na, te haerenga atu o nga tāngata i tonoa, roko-hanga atu, rite tonu ki tana i korero ai ki a raua.

33 Na, i a raua e wewete ana i te kuao, ka mea ona rangatira ki a raua, He aha korua ka wewete ai i te kuao na?

34 Na, ko ta raua meatanga atu, E mea ana te Ariki ki a ia māna.

35 Na ka arahina mai ia ki a Ihu: a pangā iho e raua o raua kakahu ki runga ki te kuao, whakanohia ana a Ihu ki runga.

36 A, i a ia e haere ana, ka wharikiria o ratou kakahu ki te huarahi.

37 ¶ A, tona tatanga ki te heketanga o maunga Oriwa, na, koa noa iho te huihui katoa o nga akonga, ka anga, ka whakamoemiti ki te Atua, he nui hoki te reo, mo nga merekarakatoa i kite ai ratou;

38 Ka mea, Ka whakapaingia te Kingi e haere mai ana i runga i te ingoa o te Ariki: he rongo mau ki runga ki te rangi, he kororia ki runga rawa.

39 Na ka mea etahi o nga Parihi i roto i te mano ki a ia, E te Kai whakaako, riria o akonga.

40 Na ka whakahokia e ia, ka korero ki a ratou, Ko taku kupu tenei ki a koutou, me i noho puku enei, kua karanga ake nga kamaka.

41 ¶ Anoka tata ia, a ka kite i te pa, ka tangihia e ia,

42 Ka mea, Me i mohio koe, a koe ano, ahakoa i tenei ra nei ano ou, ki nga mea e mau ai tou rongo! ko tenei kua hunā atu i tou tirohanga.

43 Tera hoki e tae mai nga ra ki a koe, e hangā ai e ou hoa riri he parepare mou a taka noa, a ka karapotia koe, ka kopania hoki i nga taha katoa.

44 A ka whakahoroa koe ki raro, me o tamariki i roto i a koe; e kore ano e waiho tetahi kamaka i runga i tetahi kamaka i roto i a koe; no te mea kihai koe i mātau ki te wa i tirohia ai koe.

45 ¶ A ka tomo ia ki te teme-

para, ka anga, ka pei ki waho i te hunga o reira e hoko mai ana, e hoko atu ana;

46 A ka mea ki a ratou, Kua oti te tuhituhi, Ko toku whare hei whare inoi: a kua meinga nei e koutou hei ana mo nga kai pahua.

47 ¶ A whakaako ana ia i te temepara i ia ra, i ia ra. Otiia e rapu ana nga tohunga nui me nga karaipi me nga rangatira o te iwi kia whakangaromia ia;

48 Heoi kihai i kitea ta ratou e mea ai: no te mea e u ana nga tāngata katoa ki a ia, e whakarongo ana.

UPOKO 20.

Te ui ka utua ki te ui. 9 Mara waina. 19 Mo te takoha, 27 Tana ki nga Haruki. 41 Ariki o Rawiri. 45 Mo nga karaipi.

A I tetahi o aua ra, i a ia e whakaako ana i te iwi i roto i te temepara, a e kauwhau ana i te rongo pai, ka tae mai nga tohunga nui, nga karaipi, me nga kaumatua ki a ia,

2 Ka korero ki a ia, ka mea, Korerotia mai ki a matou te mana i mea ai koe i enei mea? na wai hoki i hoatu tena mana ki a koe?

3 Ka whakahokia e ia, a ka mea ki a ratou, Maku hoki e ui ki a koutou kia kotahikupu; a ma koutou e mea mai ki a au:

4 Te iriiringa a Hoani, no te rangi ranei, no nga tāngata ranei?

5 A ka korero ratou ki a

ratou ano, ka mea, Ki te mea tatou, No te rangi; ka mea mai ia, Ha, he aha koutou tē whakapono ai ki a ia?

6 A ki te mea tatou, No nga tāngata; ka akina tatou e te iwi katoa ki te kamaka: e mea ana hoki ratou he poropiti a Hoani.

7 Na ka whakahokia mai e ratou, E kore e kitea no hea ranei.

8 Na, ko te meatanga a Ihu ki a ratou, E kore ano e korerotia e ahau ki a koutou te mana i mea ai ahau i enei mea.

9 ¶ Na ka anga ia, ka korero i tenei kupu whakarite ki te iwi; I whakatokia tetahi māra waina e tetahi tangata, a tukua ana ki nga kai mahi, a haere ana ki tawhiti, a maha noa nga ra.

10 A i te po i tika ai ka tonoa he pononga ki nga kai mahi, kia homai ai e ratou ki a ia etahi o nga hua o te māra waina: otira ka whiua ia e nga kai mahi, whakahokia kautia ana.

11 Na ka tonoa ano e ia tetahi atu pononga: a ka whiua ano ia e ratou, ka tukinotia, whakahokia kautia ana.

12 Na ka tonoa ano hoki tetahi e ia, te tuatoru: a tukitukia ana ia e ratou, makā ana ki waho.

13 Na ka mea te rangatira o te māra waina, Me pehea ahau? Ka tonoa taku tama, taku e aroha nei: tera pea ratou e hopohopo ki a ia ina kite i a ia.

14 A, te kitenga o nga kai mahi i a ia, ka kororerero ki a ratou ano, ka mea, Ko te rangatira tenei mona te kāinga: tena, tatou ka whakamate i a ia, kia riro mai ai te kāinga mo tatou.

15 Na, makā ana ia ki waho o te māra waina, whakamatea iho. Na ka aha te rangatira o te māra waina ki a ratou?

16 Ka haere mai ia, ka whakangaro i aua kai mahi, a ka hoatu te māra waina ki etahi atu. A, ka rongo ratou, ka mea, Kauaka.

17 Ka titiro ia ki a ratou, ka mea, He aha ra tenei kua oti te tuhituhi, Ko te kohatu i kapea e nga kai hanga, kua meinga tenei hei upoko mo te kokonga?

18 Na, ki te hinga tetahi ki runga ki tenei kohatu, na, mongamonga noa; a ki te hinga tenei ki runga ki tetahi, ngotangota noa ia, ano he puehu.

19 ¶ Na ka whai nga tohunga nui me nga karaipi kia hopukia ia i taua wa ano; a ka matakua ratou i te iwi: i mohio hoki ratou i korerotia e ia tenei kupu whakarite mo ratou.

20 A ka ata tirohia ia e ratou, tonoa mai ana he kai whakarongo, ko te ahua kei to te hunga tika, hei hopu mo tana korero, kia tukua ai ia ki te rangatiratanga, ki te kaha o te kawana.

21 A ka ui ratou ki a ia, ka mea, E te Kai whakaako, e mohio ana matou he tika tau e korero nei, e whakaako nei,

RUKA 20.

e kore ano e manakohia e koe te kanohi *tangata*, engari e whakaako pono ana koe i te huarahi a te Atua:

22 He mea tika ranei te hoatu takoha e matou ki a Hiha, kauaka ranei?

23 Otira i kitea e ia to ratou hianga, a ka mea ki a ratou, He aha koutou ka whakama-
tautau nei i a au?

24 Kia kite ahau i tetahi pene. No wai tona ahua me te tuhituhinga? Na ka whakahokia e ratou, ka mea, No Hiha.

25 Katahi ia ka mea ki a ratou, Hoatu rapea ki a Hiha nga mea a Hiha, ki te Atua ano nga mea a te Atua.

26 Heoi kihai i taea e ratou te hopu i tetahi korero ana i te aroaro o te iwi: na ka miharo ratou ki tana kupu, a whakarongo kau ana.

27 ¶ Na ka tae mai etahi o nga Haruki e mea nei kahore he aranga; ka ui ki a ia,

28 Ka mea, E te Kai whakaako, i tuhituhi a Mohi ki a matou, Ki te mate te tuakana o tetahi tangata, a he wahine ano tana, a ka mate uri-kore ano ia, me tango te wahine e tona teina, ka whakatupu uri ai mo tona tuakana.

29 Na, tokowhitu taua whanau: ka tango to mua i te wahine, a mate uri-kore ana.

30 Na ka tango te tokorua i te wahine, a ka mate uri-kore ano ia.

31 Na ka tango te tokotoru i a ia; penei ano nga tokowhitu: kahore ā ratou tamariki i waiho ai, a mate iho ratou.

32 Na, muri iho i te katoa, ka mate ano te wahine.

33 Na, i te aranga, ma wai o ratou te wahine? he wahine hoki ia na te tokowhitu.

34 Ka whakahokia e Ihu, ka mea ki a ratou, E marena ana, e hoatu ana ki te marena nga tamariki o tenei ao:

35 Tena ko te hunga e paingia ana kia whiwhi ki tera ao, ki te aranga ano i roto i te hunga mate, e kore e marena, e kore ano e hoatu ki te marena:

36 E kore ano ratou e ahei kia mate: e rite ana hoki ki nga anahera; he tamariki hoki ratou na te Atua, he tamariki na te aranga.

37 Na, te aranga o te hunga mate, kua whakakitea mai tena e Mohi i *tana mo* te rakau, i te Ariki e korerotia ana e ia, Ko te Atua o Aperahama, ko te Atua o Ihaka, ko te Atua o Hakopa.

38 Ehara hoki ia i te Atua no te hunga mate, engari no te hunga ora: e ora katoa ana hoki i roto i a ia.

39 Na ka whakahokia mai e etahi o nga karaipi, ka mea, E te Kai whakaako, e pai ana to korero.

40 A kihai ratou i maia ki te ui ano ki a ia ki tetahi mea.

41 ¶ Na ka mea ia ki a ratou, Na te aha ratou i mea ai he tama na Rawiri a te Karaiti?

42 Kua mea nei a Rawiri i te pukapuka o nga waiata, I mea te Ariki ki toku Ariki, Hei toku matau koe noho ai,

43 Kia meinga ra ano e ahan

ou hoa riri hei turanga wae-wae mou.

44 Na ka karangatia nei ia e Rawiri he Ariki, a na te aha i tama ai ki a ia?

45 ¶ A, i te iwi katoa e whakarongo ana, ka mea ia ki ana akonga,

46 Kia tupato ki nga karaipi, ko ta ratou nei e rawe ai ko nga kakahu roroa ina hae-reere ratou, a e whakapai ana ki nga ohatanga i nga kāinga hoko, me nga nohoanga rangatira i nga whare karakia, me nga nohoanga rangatira i nga hākari;

47 Pau ake hoki i a ratou nga whare o nga pouaru, a e inoi roa ana, he ahua kau: nui rawa te hē e tau ki a ratou.

UPOKO 21.

Te kohikohi pai. 5 *Whakangaromanga o Hiruharama.* 20 *Tohu.* 34 *Kia mataara.*

A, TANA tirohanga ake, ka kite i te hunga taonga, e maka ana i a ratou moni hoatu noa ki te takotoranga moni.

2 A ka kite ia i tetahi pouaru rawakore, e maka ana i nga moni nohinohi rawa e rua ki reira.

3 Na ka mea ia, He pono taku e mea nei ki a koutou, nui ke ta tenei pouaru rawakore i maka ai i a ratou katoa:

4 Ko ratou katoa hoki, e hira nei o ratou, a makā ana ko tetahi wahi ki roto ki nga mea ma te Atua: ko tenei ia,

he rawakore, a makā ana e ia tona oranga katoa.

5 ¶ A, i etahi e korero ana ki te temepara, ka oti nei te whakapaipai ki nga kohatu papai, ki nga whakahere, ka mea ia,

6 Na, enei mea e kite nei koutou, tera e tae mai nga ra e kore ai e toe tetahi kohatu i runga i tetahi kohatu, engari ka whakahoroa.

7 Na ka ui ratou ki a ia, ka mea, E te Kai whakaako, ko a hea enei mea? a he aha te tohu ina tata enei mea te puta?

8 A ka mea ia, Kia mahara kei mamingatia koutou: he tokomaha hoki e haere mai i runga i toku ingoa, e mea, Ko ahau ia; a kua tata te taima: na, kei haere i muri i a ratou.

9 Na, ka rongo koutou ki nga taua, ki nga whakaoho, kaua e matakū: kua takoto hoki te tikanga mo enei mea kia mātua puta mai; taihoa ia te mutunga.

10 ¶ Katahi ia ka mea ki a ratou, Ka whakatika tetahi iwi ki tetahi iwi, tetahi rangatira-tanga ki tetahi rangatiranga;

11 A e nui nga ru i te tini o nga wahi, me nga wa o te mate kai, me nga mate uruta; me nga matakū hoki, me nga tohu nui o te rangi.

12 A ko mua ake i enei mea katoa pa ai o ratou ringa ki a koutou, tukino ai i a koutou, tuku ai ki nga whare whakawa, ki nga whare herehere, he mea arahi ki nga kingi ki nga kawana, mo toku ingoa.

13 A ka waiho ki a koutou hei tohu whakaatu.

14 Na, kia tūturu o koutou ngakau, kia kaua e whakaaroa wawetia ta koutou kupu e whakahoki atu ai:

15 Maku hoki e hoatu ki a koutou he mangai, he matauranga, e kore e taea te whakakahore, te pehi, e o koutou hoa whawhai katoa.

16 A ka tukua atu koutou e nga mātua, e nga teina, e nga whanaunga, e nga hoa; ka whakamatea ano etahi o koutou.

17 Ka kino ano nga tāngata katoa ki a koutou, he whakaaaro ki toku ingoa.

18 Otiia e kore e ngaro tetahi makawe o o koutou upoko.

19 Ma te manawanui e mau ai o koutou wairua.

20 ¶ Otira ka kite koutou i Hiruharama e karapotia ana e nga taua, ko reira koutou mohio ai, kua tata tona whakangaromanga.

21 Hei reira kia oma te hunga i Huria ki nga maunga; me te hunga i waenganui o reira kia haere atu; kei haere hoki ki reira te hunga i nga tuawhenua.

22 Ko nga ra hoki enei o te rapunga utu, e rite ai nga mea katoa kua oti te tuhituhi.

23 Otira aue, te mate o te hunga e hapū ana, o nga mea e whangai ana ki te u, i aua ra! e nui hoki te aituā ki te whenua, me te riri ki tenei iwi.

24 A ka hinga ratou i te mata o te hoari, ka riro pārau ki nga iwi katoa: a ka takahia

Hiruharama e nga tauwi, kia rite ra ano nga wa o nga tau-iwi.

25 Na ka whai tohu te ra, te marama, me nga whetu: a i runga i te whenua he pawera no nga tauwi, he tumatatenga; me te haruru ano te moana, te ngaru;

26 Ka hemo ano nga tāngata i te matakū, i te taringa atu ki nga mea e puta mai ana ki te ao: e ngaueue hoki nga mea kaha o nga rangi.

27 Ko reira ano ratou kite ai i te Tama a te tangata e haere mai ana i runga i te kapua, me te kaha ano, me te kororia nui.

28 Ano ka timata enei mea te puta, titiro ake, kia ara hoki o koutou mātenga; ka tata hoki to koutou whakao-ranga.

29 ¶ Na ka korerotia e ia tetahi kupu whakarite ki a ratou; Titiro ki te piki, me nga rakau katoa;

30 I te mea e pihi ana, na ka kite koutou, ka mātau noa ake kua tata te raumati.

31 Waihoki, ko koutou, ina kite i enei mea e puta mai ana, ka mātau, kua tata te rangatiratanga o te Atua.

32 He pono taku e mea nei ki a koutou, E kore rawa e pahemo tenei whakatupuranga, kia puta enei mea katoa.

33 E pahemo te rangi me te whenua, ko akukupu ia, e kore e pahemo.

34 ¶ Otira kia tupato ki a koutou ano, kei taimaha o koutou ngakau i te kakai, i te hau-

rangi, i nga raruraru o te ao, a ka puta whakarere mai taua ra ki a koutou.

35 Ka puta mai hoki, ano he reti, ki nga tangata katoa e noho ana i te mata o te whe-nua katoa.

36 Mo konei ra kia mataara, kia inoi tonu, kia paingia ai koutou kia mawhiti i enei mea katoa meake nei puta, kia tu hoki i te aroaro o te Tama a te tangata.

37 ¶ Ai whakaako ia i te temeparai te awatea; na, i te po, ka haere, ka noho ki te mau-nga i karangatia nei ko to nga Oriwa.

38 A i haere katoa te iwi ki a ia i te atatu ki te temepara, ki te whakarongo ki a ia.

UPOKO 22.

Ta nga tino tohunga ratou ko Hura. 7 Kapenga. 19 Hapa tapu. 21 Ta Ihu mo Hura. 24 Mo nga akonga, kia kua e whakatupu rangatira. 39 Kei Oriwa. 47 Ta Hura. 50 Maraku. 54 Ta Pita. 63 A Ihu i te runanga.

NA kua tata te hakari taro rewena-kore, e karangatia nei ko te kapenga.

2 A ka rapu nga tohunga nui me nga karaipi ki te pehea e whakamate ai ratou i a ia: i matakū hoki ratou i te iwi.

3 ¶ Na ka tapoko a Hatana ki a Hura, tona ingoa nei ko Ikariote, ko ia nei tetahi o te tekau ma rua.

4 A ka haere ia, ka korero ki nga tohunga nui me nga

rangatira hoia, ki te pehea e tukua ai ia ki a ratou.

5 A ka hari ratou, ka whakaae kia hoatu he moni ki a ia.

6 Na ka whakaae ia, a ka rapu i te wa pai e tukua ai ia ki a ratou, i te mea kahore he huihuinga tangata.

7 ¶ Na ka tae mai te ra o te taro rewena-kore, i tika nei kia patua te kapenga.

8 A ka tonoa e ia a Pita raua ko Hoani, ka mea, Tikina, takā te kapenga ma tatou, kia kai ai tatou.

9 Na ka mea raua ki a ia, Ko hea koe pai ai kia takā e maua?

10 A ka mea ia ki a raua, Na, ka tomo korua ki te pa, ka tutaki he tangata ki a korua e mau ana i te kahaka wai; e aru korua i a ia ki te whare e tomo ai ia;

11 Ka mea ai ki te tangata i te whare, E mea ana te Kai whakaako ki a koe, Kei hea te ruma e kai ai matou ko aku akonga i te kapenga?

12 A ka whakaaturia e ia ki a korua he ruma nui i runga, oti rawa te whariki: me taka e korua ki reira.

13 Na haere ana, a rokoha-nga atu rite tonu ki tana i korero ai ki a raua: a takā ana e raua te kapenga.

14 ¶ A ka rite te haora, ka noho ia, ratou ko nga apotoro kotahi tekau ma rua.

15 Na ka mea ia ki a ratou, Nui atu toku hiahia kia kai tahi tatou i tenei kapenga, i te mea kahore ano ahau i mate noa:

16 Ko taku kupu hoki tenei ki a koutou, E kore ahau e kai i tenei a muri ake nei, kia iho rite ra ano i te rangatiratanga o te Atua.

17 Na ka mau ia ki te kapa, ka mutu te whakawhetai, ka mea ia, Tangohia tenei, tuwhaina ma koutou :

18 Ko taku kupu hoki tenei ki a koutou, E kore ahau e inu i te hua o te waina, kia tae mai ra ano te rangatiratanga o te Atua.

19 ¶ Na ka mau ia ki te taro, ka mutu te whakawhetai, ka whawhati, na ka hoatu e ia ki a ratou, a ka mea, Ko toku tinana tenei e hoatu ana mo koutou : meinga tenei hei whakamaharatanga ki a au.

20 I peneitia ano hoki te kapa, i muri iho i te hapa, i mea ia, Ko tenei kapa te kawenata hou i runga i oku toto e ringihia ana mo koutou.

21 Otira, tenei kei ahau nei, kei te tepu, te ringa o te kai tuku i a au.

22 Na, e haere ana te Tama a te tangata, e pera ana me te mea i whakaritea : he aue ia ma te tangata e tukua ai ia !

23 Na ka anga ratou ka rapu ki a ratou ano, ma wai o ratou tenei e mea.

24 ¶ A he tautotohe ano ta ratou, ko wai o ratou e meinga te tangata nui.

25 Na ka mea ia ki a ratou, Ko nga kingi o nga tauwiwi hei whakatupu rangatira ki a ratou ; a e huaina ana o ratou kai akiaki, He hunga atawhai.

26 Otia kua koutou e pera :

engari kia rite ki to muri rawa te mea nui o koutou : kia rite ano te tino tangata ki te kai mahi.

27 Ko wai hoki te mea nui, ko ia e noho ana ki te kai, ko te kai mahi ranei ? ehara ranei te tangata e noho ana ki te kai ? tenei raia ahau i roto i a koutou te rite nei ki te kai mahi.

28 Na, ko koutou te hunga i noho tahi tatou i oku whakamatautauranga.

29 A ka whakarite ahau i te rangatiratanga mo koutou, i te pera me ta toku Matua i whakarite ai moku ;

30 Kia kai, kia inu koutou ki taku tepu i toku rangatiratanga, kia noho ano ki runga ki nga torona, whakawa ai i nga iwi kotahi tekau ma rua o Iharaira.

31 Na ka mea te Ariki, E Haimona, e Haimona, na, kua inoia koutou e Hatana kia tataria, ano he witi :

32 Otia kua inoi ahau mou, kei hemo tou whakapono : a ka tahuri mai koe, whakakangia ou teina.

33 Na ka mea tera ki a ia, E te Ariki, e pai ana ahau kia haere hei hoa mou ki te whare herehere, ki te mate hoki.

34 Ano ra ko ia, Tenei taku kupu ki a koe, e Pita, e kore te tikaokao e tangi aiane, ka toru au whakakahoretanga i tou matauranga ki a au.

35 ¶ I mea ano ia ki a ratou, I taku tononga i a koutou, a kahore a koutou peke moni, kahore he putea, kahore he hu, i kore ranei tetahi mea

ma koutou? Ka mea ratou, Kahore.

36 Ano ra ko ia ki a ratou, Tena ko tenei, ki te mea he pēke moni to tetahi, mauria, me te putea ano: me ia hoki kahore ana hoari, kia hokona tona kakahu, ka hoko ai i *tetahi*.

37 Ko taku kupu hoki tenei ki a koutou, Ko te tikanga tenei, kia rite i a au te mea kua oti nei te tuihitihi, ara, Kua huihuia ia ki te hunga hara: he tutukitanga hoki to nga mea moku.

38 Na ka mea ratou, E te Ariki, na, e rua enei hoari. A ka mea ia ki a ratou, Kāti ano.

39 ¶ Na ka puta atu ia, ka haere ki maunga Oriwa, ko tana hanga hoki; me te aru ano ana akonga i a ia.

40 A, te taenga ki taua wahi, ka mea ia ki a ratou, Me inoi kei uru koutou ki te whakamatautauranga.

41 Na ka mawehe atu ia i a ratou, kei to te taunga kamaka te *mataratanga*, a ka tukua ona turi, ka inoi,

42 Ka mea, E Pa, ki te pai koe, tangohia atu tenei kapa i a au: otira kauaka e waiho i taku e pai ai, engari i tāu.

43 Na ka puta mai ki a ia tetahi anahera i te rangi, e whakakaha ana i a ia.

44 A, uaua tonu tana inoi, me te oke ano: a ko tona kakawa, ano he tepe toto e turuturu iho ana ki te whe-nua.

45 Na ka ara ia i te inoi, a, te taenga ki ana akonga, roko-

hanga mai e moe ana *āto*, he ngakau pouri hoki.

46 Na, ko tana meatanga ki a ratou, He aha koutou ka moe ai? Whakatika ki te inoi, kei uru ki te whakamatautauranga.

47 ¶ A, i a ia e korero ana, na, ko te huihuinga tangata, me tera hoki i karangatia nei ko Hura, ko ia hoki tetahi o te tekau ma rua, e haere ana i mua i a ratou, na ka whakataata ia ki a Ihu ki te kihi i a ia.

48 Ano ra ko Ihu ki a ia, E Hura, he kihi tāu hei tuku mo te Tama a te tangata?

49 A, te kitenga o ona hoa i nga mea meāke meatia, ka mea ratou ki a ia, E te Ariki, me patu ranei matou ki te hoari?

50 Na, hāua iho e tetahi o ratou te pononga a te tohunga nui, a tapahia ana tona taringa matau.

51 Na ka oho mai a Ihu, ka mea, Kātira i tenei. A whakapakia ana tona taringa, na kua ora.

52 Katahi ka mea a Ihu ki nga tohunga nui, ki nga rangatira o te temepara, ki nga kaumatua, i haere atu ki a ia, He tahae *ahau* i haere mai ai koutou me nga hoari me nga patu?

53 I a au e noho ana i a koutou i te temepara i ia ra, i ia ra, kihai i totoro mai o koutou ringa ki a au: otira no koutou tenei haora, ko te kahanga hoki o te pouri.

54 ¶ Na ka hopu ratou i a ia, ka arahi atu, a kawea ana ia

ki roto ki te whare o te tino tohunga. Ko Pita ia i aru i tawhiti.

55 Ano ka oti i a ratou he kapura te tahu ki waenga marae, i a ratou e noho tahi ana, ka noho hoki a Pita i waenganui o ratou.

56 Na ka kitea ia e tetahi kotiro, i a ia e noho ana i te kapura; a matatau tonu mai te titiro ki a ia, ka mea, I a ia ano hoki tenei.

57 Na ka whakakahore ia ki a ia, ka mea, E ko, kahore ahau e mohio ki a ia.

58 A taro kau iho ka kite tetahi atu i a ia, ka mea, No ratou hoki koe. Na, ka mea a Pita, E mara, kahore.

59 A, me te mea kotahi te haora ki te takiwa, ka tohe ano tetahi atu, ka mea, He pono i a ia ano hoki tenei: no Kariri hoki.

60 A ka mea a Pita, E mara, kahore ahau e mātau ki tau e mea. A i reira pu ano, i a ia e korero ana, ka tangi te tikaokao.

61 Na ka tahuri te Ariki, ka titiro ki a Pita. A ka mahara a Pita ki te kupu a te Ariki, ki tana meatanga ki a ia, E kore e tangi te tikaokao, ka toru āu whakakahoretanga ki a au.

62 Na haere atu ana a Pita ki waho, a nui atu tana tangi.

63 ¶ Na ka taunu nga kai pupuri o Ihu ki a ia, ka whiu.

64 A ka hipokina ia, ka pahiatia tona kanohi, ka ui ki a ia, ka mea, Poropiti mai, na wai koe i papaki?

65 A he maha era atu kupu

kino i korero ai ratou ki a ia.

66 ¶ Ano ka ao te ra, ka huihui nga kaumatua o te iwi, nga tohunga nui, me nga kairaipi, a arahina atu ana ia ki to ratou runanga, ka mea ratou,

67 Ko te Karaiti ranei koe? meinga mai ki a matou. Ano ra ko ia ki a ratou, Ki te korerotia e ahau ki a koutou, e kore kotitou e whakapono;

68 A ki te ui ahau, e kore koutou e whakahoki kupu ki a au, e kore ano hoki e tuku i a au kia haere.

69 Tenei ake ka noho te Tama a te tangata ki matau o te kaha o te Atua.

70 Na ka mea ratou katoa, Ko te Tama ranei koe a te Atua? Ano ra ko ia ki a ratou, Kua korerotia mai na e koutou, ko ahau ia.

71 Na ka mea ratou, Hei aha ake he kai whakaatu ma tatou? kua rongo nei hoki tatou ake i ta tona mangai.

UPOKO 23.

A Ihu i a Pirato. 8 Ta Herora ki a ia. 13 Ko Parapa kia ora: ko Ihu kia mate.

27 Tana ki nga wahine e tangi ana. 33 Tona ripekatanga. 50 Tanumanga.

KATAHI ka whakatika to ratou huihui katoa, a arahina ana ia ki a Pirato.

2 Na ka anga ratou ka whakapa hē ki a ia, ka mea, Kua mau i a matou tenei tangata e kukume ke ana i te iwi, e mea ana, kia kaua e hoatu te takoha ki a Hiha, e kī ana he kingi ia, ko te Karaiti.

3 Na ka ui a Pirato ki a ia, ka mea, Ko koe ranei te kingi o nga Hurai? Ka whakahokia e ia ki a ia, ka mea, Kua korerotia mai na e koe.

4 Na, ko te meatanga a Pirato ki nga tohunga nui, ki nga mano, Kahore tetahi hē o tenei tangata i mau i a au.

5 A nui atu ta ratou tohe, ka mea, E whakahihiri ana ia i te iwi, e whakaako ana puta noa i Huria, no Kariri te timatanga, a taea noatia a konei.

6 A, te rongonga o Pirato ki Kariri, ka ui, No Kariri ranei tenei tangata?

7 A ka rongo ia no te rangatiratanga o Herora ia, ka tonoa ia ki a Herora, i Hiruharama hoki ia i aua ra.

8 ¶ A, te kitenga o Herora i a Ihu, nui rawa tona hari: no mua hoki tona hiahia kia kite i a ia, he maha hoki nga mea i rangona e ia mona; i mea hoki ia kia kite i tetahi tohu e meinga ana e ia.

9 Na he maha nga kupu i ui ai ia ki a ia; heoi kahore kau he kupu i whakahokia e ia.

10 Na, tu ana nga tohunga nui me nga karaipi, a kaha rawa ta ratou whakapa hē ki a ia.

11 Na ka whakorekore a Herora ratou ko ana hoia ki a ia, ka taunu, a ka oti ia te whakakakahu ki te kahu whakapaipai, ka whakahokia ki a Pirato.

12 I taua rangi ano ka houhia te rongo a Pirato raua ko

Herora: i mua hoki e mauahara ana ki a raua.

13 ¶ Na ka karangatia e Pirato nga tohunga nui, nga rangatira, me te iwi ano,

14 Ka mea ia ki a ratou, Kua kawea mai nei e koutou tenei tangata ki a au, me te ki ano kei te kukume ke ia i te iwi: a ka oti nei ia te uiui e ahau i to koutou aroaro, kihai i mau i a au tetahi hē o tenei tangata i roto i nga mea i whakapangia nei e koutou ki a ia:

15 Kihai ano a Herora: i tonoa hoki koutou e ahau ki a ia; a kahore nei ana mahi e tika ai kia mate ia.

16 Na, me whiu ia e ahau, ka tuku atu ai.

17 (Kua takoto hoki te tika-nga kia tukua tetahi ki a ratou i te hakari.)

18 Na ka panui ratou ki te karanga, ka mea, Whakamatea tenei, ko Parapa te tuku mai ki a matou:

19 (Ko tenei hoki i makā ki te whare herehere mo te nananga i nana ai ia i roto i te pa, mo te patu tangata.)

20 Na ka karanga ano a Pirato, he mea hoki nāna kia tukua a Ihu.

21 Heoi karanga ana ratou, mea ana, Ripekatia ia, ripekatia.

22 Ka mea ano ia ki a ratou, ko te toru o nga meatanga, He aha ra te kino i meinga e tenei tangata? kahore ano i mau i a au tetahi hē ona e mate ai: maku ia e whiu, ka tuku atu ai.

23 Heoi nui atu o ratou reo

ki te tohe, ka tono kia ripekatia ia. A riro rawa i nga reo o ratou ko nga tohunga nui.

24 Na ka ki a Pirato kia waiho i ta ratou i tono ai.

25 Na tukua ana ki a ratou te tangata i makā ki te whare herehere mo te nananga, mo te patu tangata, ta ratou hoki i tono ai; ko Ihu ia, i tukua ki ta ratou i pai ai.

26 ¶ A, i a ratou e arahi ana i a ia, ka mau ki a Haimona, ki tetahi tangata o Hairini, e haere mai ana i nga whenua, a whakatakotoria ana ki a ia te ripeka, kia amohia i muri i a Ihu.

27 ¶ Na he nui te huihuinga o te iwi i aru i a ia, me nga wāhine hoki e tangi ana, e aue ana ki a ia.

28 Na ka tahuri a Ihu ki a ratou, ka mea, E nga tamāhine o Hiruharama, kaua ahau e tangihia, engari me tangi ki a koutou, ki a koutou tamarihi.

29 Tera hoki e puta nga ra e mea ai ratou, Koa tonu nga pākoko, me nga kopu kahore ano i whanau, me nga u kahore ano i ngotea.

30 Ko reira timata ai ratou te mea ki nga maunga, Horo iho ki runga ki a matou: ki nga pukepuke hoki, Hipokina matou.

31 Ki te meinga hoki enei mea e ratou i te rakau e kaimata ana, ko te aha e meatia i te rakau ka maroke?

32 ¶ Na, tokorua ano hoki era, he hunga mahi kino, e arahina ngatahitia ana ratou kia whakamatea.

33 ¶ A ka tae mai ratou ki te wahi e karangatia nei ko Angaanga, ka ripeka i a ia ki reira, me aua kai mahi kino, kotahi ki matau, kotahi ki mau.

34 Na ka mea a Ihu, E Pa, houhia te rongo ki a ratou: kahore hoki ratou e mahara ki ta ratou e mea nei. A wehewehea ana ona kakahu e ratou, he mea maka ki te rota.

35 Me te tu ano te iwi matakitaki ai. Na ka whakahi ratou tahi ko nga rangatira, ka mea, Ko era atu i whakorangia e ia; māna ano ia e whakaora, ki te mea ko te Karaiti ia, ko ta te Atua i whiriwhiri ai.

36 I taunu hoki nga hoia ki a ia, i haere mai me te kawe mai i te winika ki a ia,

37 I mea, Ki te mea ko te kingi koe o nga Hurai, māu koe e whakaora.

38 A ka tuhituhia te tuhi-tuhinga ki runga i a ia, no Kariki, no Roma, no Hiperu nga reta, KO TE KINGI TE-NEI O NGA HURAI.

39 ¶ I kohukohu ano ki a ia tetahi o nga kai mahi kino i iri ra, i mea, Ki te mea ko te Karaiti koe, whakaorangia koe, tatou hoki.

40 Na ka whakahokia e tetahi, ka riri ki a ia, ka mea, E kore ranei koe e matakū ki te Atua, kei tenei mate tahi nei hoki koe?

41 Ka tika raia to taua; ka whiwhi hoki taua ki nga mea e tika ana mo a taua hanga: ko tenei ia, kahore ana mahi hē.

42 Na, ko tana meatanga ki a Ihu, E te Ariki, kia mahara koe ki a au ina haere mai koe i runga i tou rangatiratanga.

43 Ano ra ko Ihu ki a ia, He pono taku e mea nei ki a koe, Ko aiane koe noho ai ki a au, ki pararaiha.

44 ¶ Na kua tata ki te ono o nga haora, a ka pouri a runga o te whenua katoa, a, te iwa ra ano o nga haora.

45 I pouri ano te ra, i pakaru ano hoki te arai o te whare tapu i waenganui.

46 A nui atu te reo o Ihu ki te karanga; i mea ia, E Pa, tena toku wairua ka tukua atu na ki ou ringa. Ka mutu enei kupu, ka hemo.

47 Na, te kitenga o te kene-turio i taua mea, ka whakakororia ia i te Atua, ka mea, He pono, he tangata tika tenei.

48 Me te hunga katoa hoki i huihui ki taua matakitakinga, i to ratou kitenga i aua mea i meatia, ka patuki ki o ratou uma, a hoki ana.

49 A tu mai ana i tawhiti te hunga katoa i mohio ki a ia, ratou ko nga wahine i aru mai i a ia i Kariri, matakitaki ana ki enei mea.

50 ¶ Na, *tera* tetahi tangata, ko Hohepa te ingoa, he tangata noho runanga; he tangata pai, he tangata tika:

51 (Kihai ano i whakaae ki ta ratou whakaaro, ki ta ratou mahi;) no Arimatia ia, no tetahi pa o nga Hurai: he tangata ano ia e tatari ana ki te rangatiratanga o te Atua.

52 I haere ia ki a Pirato, a

tonoa ana e ia te tinana o Ihu.

53 Na ka tangohia iho e ia taua *tinana*, a takaia ana ki te rinena, ka waiho ki te rua i haua ki roto ki te kohatu, kahore hoki i takoto noa tetahi tangata ki reira.

54 Na, ko te ra takanga *hakari* ia, a meake puao te hapati.

55 A i aru mai ano nga wahine i haere tahi mai nei me ia i Kariri, a kite ana i te urupa, i te whakatakotoranga ano o tona tinana.

56 Na, ka hoki ratou, ka mahi i nga mea kakara me nga hinu; a noho ana i te hapati, he whakaaro hoki ki te ture.

UPOKO 24.

Ta nga anahera mo tona aranga. 13 Putanga i te ara ki Emauha; 36 Kinga apototoro. 50 Kakenga.

NA, i te *ra* tuatahi o te wiki, i te tino ata po, ka haere ratou ki te urupa, ki te mau i nga mea kakara kua mahia nei e ratou, ratou tahi ko etahi atu.

2 A, rokohanga e ratou kua hurihia te kamaka i te urupa.

3 A, to ratou haerenga ki roto, kihai i kitea te tinana o te Ariki, o Ihu.

4 A, i a ratou e whakaaroaro ana ki tenei, na, tokorua nga tangata i puta ki a ratou, uira tonu nga kakahu.

5 Na, i a ratou e matakua ana, a e kupapa iho ana o ratou kanohi ki te whenua, ka mea

raua ki a ratou, He aha koutou ka rapu ai i te tangata ora i roto i te hunga mate?

6 Kahore ia i konei, engari kua ara: kia mahara ki tana i mea ai ki a koutou i a ia i Kariri,

7 Ki tana meatanga, Kua takoto te tikanga kia tukua te Tama a te tangata ki nga ringa o te hunga hara, kia ripekatia, a, i te toru o nga ra, kia ara.

8 Na ka mahara ratou ki ana kupu;

9 A hoki ana i te urupa, ka korero i enei mea katoa ki te tekau ma tahi, ratou ko era atu katoa.

10 Ko Meri Makarini ratou ko Hoana, ko Meri *whaea* o Hemi, ko o ratou hoa wahine, nga kai korero i enei mea ki nga apotoro.

11 A ki ta ratou whakaaro he mea tito noa a ratou kupu, a kihai ratou i whakaponohia.

12 Katahi ka whakatika a Pita, ka oma ki te urupa; a, tona pikonga iho ka kite, ko nga kakahu takai anake e takoto ana; a hoki ana me te miharo ano i roto i a ia ki taua mea i meatia.

13 ¶ Na, tokorua o ratou e haere ana i taua ra ki tetahi kainga koraha, e ono tekau paronga te mataratanga i Hiruharama, ko Emauha te ingoa.

14 A e korerorero ana raua tetahi ki tetahi ki enei mea katoa i meinga.

15 A, i a raua e korerorero ana e uiui ana ki a raua, na,

ko Ihu ake ano kua whakataata mai, a haere tahi ana ratou.

16 I puritia hoki o raua kanohi, i kore ai raua e mohio ki a ia.

17 Na ka mea ia ki a raua, He aha enei kupu e korero nei korua ki a korua, i a korua e haere nei, e ahua pouri nei?

18 Na ka whakahokia e tetahi, ko Kereopa te ingoa, a ka mea ki a ia, I Hiruharama koe e noho ana, a ko koe anake kahore i mohio ki nga mea kua meinga nei ki reira i enei ra?

19 Ka mea ia ki a raua, Ki ehea mea? Ka mea raua ki a ia, Ki nga mea o Ihu o Nahareta, he poropiti hoki ia, he kaha tana mahi, tana kupu, i te aroaro o te Atua, o te iwi katoa:

20 Ki tona hoatutanga hoki e nga tohunga nui, e o matou rangatira hoki, kia tukua ki te mate, a ripekatia ana ia.

21 I tumanako ano matou ki a ia, māna e whakaora a Ihairaira: na, i te taha ano o enei mea katoa, ko te toru hoki tenei o nga ra i meinga ai enei mea.

22 A miharo noa iho matou ki etahi wahine o matou, i haere i te atatu ki te urupa;

23 Heoi kihai i kitea tona tinana, a haere mai ana ratou, ka mea, kua kitea ano e ratou he putanga anahera, i mea mai nei, kei te ora ia.

24 Na ka haere atu etahi o o maua hoa ki te urupa, a rokohanga atu, rite tonu ki

ta nga wāhine i korero ai: otira kihai ia i kitea.

25 Na, ko tana meatanga ki a raua, E te hunga whakaaro kore, ngakau puhoi ki te whakapono ki nga mea katoa i korero ai nga poropiti:

26 Kahore ianei i takoto te tikanga kia mate a te Karaiti i enei mea, a kia tomo ki tona kororia?

27 Na ka timata ia ki ta Mohi, ki ta nga poropiti katoa, a whakaaturia ana ki a raua nga mea mona o nga karaipiture katoa.

28 A ka tata ki te kāinga i haere ai ratou: na ka ahu atu ia, me te mea e haere tonu ana ia.

29 Na ka tohe raua ki a ia, ka mea, E noho ki a maua: kua ahiahi hoki, kua titaha hoki te ra. Na ka tomo atu ia, ka noho ki a raua.

30 A, tona nohoanga iho ki a raua, ki te kai, ka mau ia ki te taro, ka whakapai, ka whawhati, a hoatu ana ki a raua.

31 Na kua kite o raua ka-nohi, a ka mohio ki a ia; a ngaro whakarere atu ia i a raua.

32 A ka mea raua ki a raua, Kihai koia o taua ngakau i mumura i roto i a taua, i a ia e korero ana ki a taua i te ara, e whakaatu ana i nga karaipiture ki a taua?

33 Na ka whakatika raua i taua haora ano, a hoki ana ki Hiruharama, a rokohangamai kua huihui te tekau ma tahi me o ratou hoa,

34 A e mea ana, Koia rawa

ano! kua ara te Ariki, a kua puta ki a Haimona.

35 Na ka korerotia e raua nga meatanga i te ara, to raua mohiotanga hoki ki a ia i te whatiwhatinga o te taro.

36 ¶ A, i a raua e korero ana i enei mea, na, ko Ihu ake ano e tu ana i waenganui o ratou, e mea ana ki a ratou, *Kia tau* te rangimarie ki a koutou.

37 Na, koera ana ratou, wehi tonu; i mea hoki he wairua ta ratou i kite ai.

38 Na, ko tana meatanga ki a ratou, He aha koutou ka pororaru ai? na te aha hoki i puta ake ai nga whakaaro-aronga i roto i o koutou ngakau?

39 Tirohia oku ringa me oku waewae, ko ahau ano ia: wha-whakia ahau, kia kite ai koutou; kahore hoki o te wairua kikokiko, wheua ranei, me oku e kitea nei e koutou.

40 Ano ka korerotia tenei, ka whakakitea ki a ratou ona ringa me ona waewae.

41 A i a ratou kahore nei i whakapono i te hari, a e mi-hare ana, ka mea ia ki a ratou, He kai ranei ta koutou i konei?

42 Ka hoatu e ratou ki a ia tetahi ika, he mea tunu, me tetahi honikoma.

43 Na ka tango ia, a kainga ana e ia i to ratou aroaro.

44 ¶ I mea ano ia ki a ratou, Ko nga kupu enei i korero ai ahau ki a koutou, i a au ano i a koutou, me whakarite nga mea katoa kua oti te tuhituhi i roto i te ture a Mohi, i nga poropiti, i nga waiata, moku.

HOANI 1.

45 Katahi ia ka whakamako i o ratou hinengaro, kia mātau ai ki nga karaipiture,

46 A ka mea ki a ratou, Ko te mea tenei i tuhituhia, ko te tikanga ano tenei, ko te Karaiti kia whakamamaetia, kia ara ano i te hunga mate i te toru o nga ra :

47 A kia kauwhautia te ripeneta me te murunga hara i runga i tona ingoa, ki nga tauwi katoa ; ki Hiruharama ano hoki timata ai.

48 Na, ko koutou hei kai whakaatu mo enei mea.

49 A maku e tuku ki a koutou te mea i korerotia i mua

e toku Matua : otiia kia noho koutou ki te pa, ki Hiruharama, kia whiwhi ra ano ki te kaha i runga.

50 ¶ Na, arahina ana ratou e ia ki waho, ki Petani, na kua ara ona ringa, a whakapaingia ana ratou e ia.

51 A, i a ia e whakapai ana i a ratou, ka mawehe atu ia i a ratou, kahakina atu ana ki te rangi.

52 Na ka koropiko ki a ia, a hoki ana ki Hiruharama, he nui hoki te koa :

53 A noho tonu ana ratou i te temepara, me te whakamoemiti, me te whakapai ki te Atua. Amine.

KO TE

RONGO PAI A HOANI.

UPOKO 1.

Atuatanga, tangatatanga, mahi, a Ihu. 15 Ta Hoani. 35 Anaru ma.

I TE timatanga te Kupu, a i te Atua te Kupu, ko te Atua ano te Kupu.

2 I te Atua ano tenei *Kupu* i te timatanga.

3 Nāna nga mea katoa i hanga ; a kahore tetahi mea i kore te hanga e ia o nga mea i hangā.

4 I a ia te ora ; a ko te ora

te māramatanga mo nga tāngata.

5 I roto i te pouri te Māramatanga e whiti ana ; heoi kihai i mau i te pouri.

6 I tonoa mai he tangata e te Atua, ko Hoani tona ingoa.

7 I haere mai ia hei kai whakaatu, hei whakaatu mo te Māramatanga, kia meinga ai e ia nga tāngata katoa kia whakapono.

8 Ehara ia i te Māramatanga, engari hei kai whakaatu mo te Māramatanga.

HOANI 1.

9 Ko te Māramatanga pono tera, e mārāma ai nga tāngata kātōa e haere mai ana ki te ao.

10 I te ao ia, i hangā ano e ia te ao, a kihai te ao i mohio ki a ia.

11 I haere mai ia ki ona, a kihai ona i manako ki a ia.

12 Tena ko te hunga i manako ki a ia, i tukua e ia ki a ratou nga tikanga e meinga ai ratou hei tamariki ma te Atua, ki te hunga hoki e whakapono ana ki tona ingoa:

13 Ki te hunga ehara nei i te toto, ehara i ta te kikokiko i pai ai, ehara i ta te tangata i pai ai, engari na te Atua i whanau ai.

14 A i whakakikokikotia te Kupu, a noho ana i a matou, (a i kite ano matou i tona kororia, he kororia e rite ana ki to te Tama kotahi a te Matua), ki tonu i te aroha noa me te pono.

15 ¶ I korerotia ano ia e Hoani; i karanga tera, i mea, Ko ia tenei i korerotia ra e ahau, Ko ia e haere mai ana i muri i a au e meinga ana ki mua i a au: no mua hoki ia i a au.

16 A kua riro i a tatou katoa tetahi wahi o tona raneatanga, te aroha noa hoki hono iho ano ki te aroha noa.

17 I homai hoki e Mohi te ture, ko te aroha noa me te pono, i ahu mai i a Ihu Karaiti.

18 Kahore ano tetahi i kite noa i te Atua; ko te Tama kotahi i te uma o te Matua, nana ia i whakapuaki.

19 ¶ Na, ko te korero tenei a Hoani, i te tononga o nga tohunga ratou ko nga Riwaiti e nga Hurai i Hiruharama hei ui ki a ia, Ko wai koe?

20 Na ka whakina e ia, kihai i whakakahore, i whaki hoki, Ehara ahau i a te Karaiti.

21 A ui ana ratou ki a ia, Ko wai oti? Ko Iraia koe? Ka mea ia, Kahore. Ko te poropiti oti koe? Ka whakahokia e ia, Kahore.

22 Na ka mea ratou ki a ia, Ko wai koia koe? hei kupu whakahoki ma matou ki te hunga i tonoa mai ai matou. E pehea ana koe ki a koe?

23 Ka mea ia, He reo ahau no tetahi e karanga ana i te koraha, Whakatikaia te huarahi o te Ariki; he pera ano me ta Ihaia poropiti i mea ai.

24 A no nga Parihi te hunga i tonoa.

25 Na ka ui ratou ki a ia, ka mea ki a ia, Na te aha oti koe i iriiri ai, ki te mea ehara koe i a te Karaiti, ehara i a Iraia, ehara i te poropiti?

26 Na ka whakahokia e Hoani ki a ratou, ka mea, He iriiri taku ki te wai: otiia tena te tu na i waenganui i a koutou tetahi kahore e mohiotia e koutou;

27 Ko ia tenei e haere mai ana i muri i a au, no mua ia i a au; kahore hoki ahau e tau hei wewete i te here o tona hu.

28 I meatia enei mea ki Petapara, ki tawahi atu o Horano, ki te wahi i iriiri ai a Hoani.

HOANI 1.

29 ¶ I te aonga ake ka kite a Hoani i a Ihu e haere mai ana ki a ia, a ka mea, Na, te Reme a te Atua, hei waha atu i te hara o te ao!

30 Ko ia tenei i korero ai ahau, Kei te haere mai i muri i a au tetahi tangata kua meinga ki mua i a au; no mua hoki ia i a au.

31 A kahore ahau i mātau ki a ia; heoi hei whakakite i a ia ki a Iharaia, i haere mai ai ahau me taku iriiri ki te wai.

32 Na ka whakaatu a Hoani, ka mea, I kite ahau i te Wairua e heke iho ana i te rangi, ano he kukupa, a noho ana i runga i a ia.

33 A kahore ahau i mātau ki a ia: engari i ki mai ki a au te kai tono i a au ki te iriiri ki te wai, Te tangata e kite ai koe i te Wairua e heke iho ana, a e noho ana ki runga ki a ia, ko ia tena te kai iriiri ki te Wairua Tapu.

34 A kua kite ahau, kua whakaatu nei hoki, ko te Tamā tenei a te Atua.

35 ¶ I te aonga ake i tetu ano a Hoani, me ana akonga tokorua;

36 Na ka titiro ia ki a Ihu e haere ana, a ka mea, Na, te Reme a te Atua!

37 A ka rongo nga akonga tokorua ki a ia e korero ana, a aru ana raua i a Ihu.

38 A, te tahuritanga o Ihu, ka kite i a raua e aru ana, ka mea ia ki a raua, E rapu aha ana korua? Na, ko ta raua meatanga ki a ia, E Rapi, (ko te tikanga tenei ina whaka-

maoritia, E te Kai whakaako,) kei hea tou kāinga?

39 Ka mea ia ki a raua, Haere mai kia kite. Haere ana raua, a ka kite i tona wahi i noho ai, a noho ana i a ia i taua ra: ko te tekau hoki ia o nga haora.

40 Ko Anaru teina o Haimona Pita tetahi o taua tokorua i rongo nei ki a Hoani, a aru ana i a ia.

41 Ko ia kua kite wawe i tona tuakana ake, i a Haimona, ka mea ki a ia, Kua kitea e maua te Mihaia, (ko te tikanga tenei ina whakamaoritia, ko te Karaiti.)

42 Ka arahi ia i a ia ki a Ihu. A ka titiro a Ihu ki a ia, ka mea, Ko Haimona koe, tama a Hona: me hua koe ko Kipa, (tona whakamaoritanga, ko Kohatu.)

43 ¶ I te aonga ake ka mea a Ihu kia haere ki Kariri, a, tona kitenga i a Piripi, ka mea ki a ia, Arumia mai ahau.

44 Na, no Petahaira a Piripi, no te pa o Anaru raua ko Pita.

45 Ka kite a Piripi i a Natanahira, ka mea ki a ia, Kua kitea e matou ta Mohi i tuhi-tuhi ai i roto i te ture, ta nga poropiti hoki, a Ihu o Nahareta, tama a Hohepa.

46 Na ka mea a Natanahira ki a ia, E puta koia tetahi mea pai i Nahareta? Ka mea a Piripi ki a ia, Haere mai kia kite.

47 A, te kitenga o Ihu i a Natanahira e haere mai ana ki a ia, ka puaki tana kupu mona, Na, he tino tangata no

HOANI 1, 2.

Iharaira, kahore ona tinihanga.

48 Ka mea a Natanahira ki a ia, No hea koe i mātau ai ki a au? Ka whakahokia e Ihu ki a ia, ka mea, I te mea kiano koe i karangatia e Piripi, i a koe ano i raro i te piki, i kite ahau i a koe.

49 Na ka whakahokia e Natanahira, ka mea ki a ia, E Rapi, ko te Tama koe a te Atua, ko te Kingi koe o Ihairaira.

50 Na ka whakahokia e Ihu, ka mea ki a ia, Nā taku meatanga ki a koe, I kite ahau i a koe i raro i te piki, i whakapono ai koe? rahi atu i enei nga mea e kitea e koe.

51 I mea ano ia ki a ia, He pono, he pono tenei kupu aku ki a koutou, Tukua atu koutou kite ai i te rangi e tuwhera ana, i nga anahera ano a te Atua e piki atu ana, e heke iho ana ki te Tama a te tangata.

UPOKO 2.

Te wai hei waina. 12 Kei Kaperenauma. 13 Kei Hiruharama. 14 Ana mahi i reira.

NA, i te toru o nga ra he marenatanga kei Kana o Kariri; a i reira te whaea o Ihu:

2 A i karangatia ano a Ihu ratou ko ana akonga ki te marenatanga.

3 A, te potonga o te waina, ka mea te whaea o Ihu ki a ia, Kahore a ratou waina.

4 Ka mea a Ihu ki a ia, Ko

te aha taku, tau, e tai? kahore ano kia taea noatia toku haora.

5 Ka mea tona whaea ki nga kai mahi, Ko tana e mea ai ki a koutou, meatia.

6 A e ono nga ipu kohatu e tu ana i reira, he tikanga na nga Hurai mo te horoi, e rua, e toru nga mehua o tetahi, o tetahi, ina ki.

7 Ka mea a Ihu ki a ratou, Whakakiiia nga ipu ki te wai. A whakakiiia ana e ratou, purena noa.

8 Na ka mea ia ki a ratou, Tena, utuhia, kawea atu ki te rangatira o te hākari. A kawea ana e ratou.

9 Ano ka whakamatautau te rangatira o te hākari i te wai i whakawainatia, a kihai i mohio no hea ranei; (ko nga pononga ia i utuhia ai te wai i mohio;) ka karanga te rangatira o te hākari ki te tāne marena hou,

10 Ka mea ki a ia, E whakatakatoria ana e nga tāngata katoa te waina pai i te timatanga; a ka roa te inumanga, mo reira te waina he iti iho nei te pai: ko koe ia, kua tohu i te waina pai mo konei.

11 I meatia tenei timatanga merekara e Ihu ki Kana o Kariri, a whakakitea ana e ia tona kororia; a whakapono ana ana akonga ki a ia.

12 ¶ Muri iho i tenei ka haere ia ki Kaperenauma, a ia, tona whaea, ona teina, me ana akonga: a kihai i maha nga ra i noho ai ratou ki reira.

13 ¶ Na kua tata te kapenga

HOANI 2, 3.

o nga Hurai, a ka haere a Ihu ki Hiruharama :

14 Na, rokohanga atu e ia kei roto i te temepara e noho ana nga kai hoko kau, hipi, kukupa, me nga kai whakawhitiwhiti moni.

15 A ka oti tetahi whiu te hanga e ia ki nga aho nonohi, na, whiua katoatia ana ratou e ia ki waho i te temepara, me nga hipi, me nga kau ; a ringihia ana te moni a nga kai whakawhitiwhiti moni, hurihia ake nga tepu ;

16 I mea ano ia ki nga kai hoko kukupa, Tangohia atu enei i konei ; aua te whare o toku Matua e meinga hei whare hokohoko.

17 A ka mahara ana akonga ki te mea i tuhituhia, Ka pau ahau i te aroha ki tou whare.

18 Na ka whakahokia e nga Hurai, ka mea ki a ia, He aha te tohu e whakakitea ana e koe ki a matou, ina koe ka mea i enei mea ?

19 Na ka whakahokia e Ihu, ka mea ki a ratou, Wawahia tenei whare tapu, a, kia toru nga ra, ka ara ano i a au.

20 Ano ra ko nga Hurai, E wha tekau ma ono nga tau i hangā ai tenei whare tapu, a e oti ranei te hanga e koe i nga ra e toru ?

21 Otira ko te whare tapu o tona tinana tana i korero ai.

22 Na, tona aranga ake i te hunga mate, ka mahara ana akonga ki tana korerotanga i tenei ki a ratou ; a whakaponona ki te karaipiture, ki te kupu hoki i korerotia e Ihu.

23 ¶ Na, i a ia i Hiruharama i te kapenga, i te hākari, he tokomaha i whakaponona ki tona ingoa, i to ratou kitenga i ana merekara i meatia e ia.

24 Otira kihai a Ihu i tuku i a ia ki a ratou, i mohio hoki ia ki nga tāngata katoa.

25 A kahore ana meatanga kia whakaaturia te tangata e tetahi : i mātau hoki ia ki te mea i roto i te tangata.

UPOKO 3.

Ta Ihu ki a Nikorima. 14 Me titiro ki a ia, ka kore e mate. 22 Ta Hoani Kai iriiri mona.

NA, he tangata tera no nga Parihi, ko Nikorima tona ingoa, he rangatira no nga Hurai :

2 I haere mai tenei ki a Ihu i te po, a ka mea ki a ia, E Rapi, e mātau ana matou i haere mai koe i te Atua hei kai whakaako, ina hoki e kore tetahi tangata e ahei te mea i enei merekara e meatia nei e koe, ki te kahore te Atua i a ia.

3 Ka whakahokia e Ihu, ka mea ki a ia, He pono, he pono taku e mea nei ki a koe, Ki te kahore te tangata e whanau hou, e kore ia e ahei te kite i te rangatiratanga o te Atua.

4 Ka mea a Nikorima ki a ia, Me pehea ka whanau ai te tangata i tona koroheketa-nga ? e taea ranei te takirua o nga haerenga ki roto ki te kopu o tona whaea, whanau mai ai ?

5 Ka whakahokia e Ihu, He

HOANI 3.

pono, he pono taku e mea nei ki a koe, Ki te kahore te tangata e whanau i te wai, i te Wairua hoki, e kore ia e ahei te tomo ki te rangatiratanga o te Atua.

6 Ko ta te kikokiko e whanau ai he kikokiko; a ko ta te Wairua e whanau ai he wairua.

7 Aua ra e miharo ki taku i mea nei ki a koe, He mea tūturu tenei, ara, kia whanau hou koutou.

8 E pupuhi ana te hau ki tana wahi e pai ai, a ka rongo koe ki tona harurutanga, otia e kore e mohiotia e koe te wahi i puta mai ai, e tae atu ai ranei: ko te ritenga tenei ki te hunga katoa ka whanau i te Wairua.

9 Ka whakahokia e Nikorima, ka mea ki a ia, Me pehea ka taea ai enei mea?

10 Ka whakahokia e Ihu, ka mea ki a ia, He kai whakaako koe no Iharaira, a kahore i mātau ki enei mea?

11 He pono, he pono taku e mea nei ki a koe, E korerotia ana e matou ta matou i mātau ai, a e whakaaturia ana ta matou i kite ai; heoi, e kore koutou e tango ki ta matou whakaaturanga.

12 Ki te mea kua korerotia e ahau ki a koutou nga mea o te whenua, a kahore koutou e whakapono, me pehea ka whakapono ai ki te korerotia e ahau ki a koutou nga mea o te rangi?

13 Kahore hoki he tangata i kake noa ki te rangi, ko ia anake i heke iho i te rangi,

ko te Tama a te tangata, e noho mai nei i te rangi.

14 Ka rite hoki ki ta Mohi whakairinga i te nakahi i te koraha; kua takoto te tikanga kia pera te whakairinga o te Tama a te tangata:

15 Kia kahore ai e ngaro te tangata e whakapono ana ki a ia, engari kia whiwhi ai ki te oranga tonutanga.

16 Koia ano te aroha o te Atua ki te ao, homai ana e ia tana Tama kotahi, kia kahore ai e ngaro te tangata e whakapono ana ki a ia, engari kia whiwhi ai ki te oranga tonutanga.

17 Kihai hoki te Atua i tono i tana Tama ki te ao, ki te whakahē i te ao; engari kia ora ai te ao i a ia.

18 Ko ia e whakapono ana ki a ia, e kore e tau te hē ki a ia: tena ko ia e kore e whakapono, kua whakahengia noatia ake, mona kihai i whakapono ki te ingoa o te Tama kotahi a te Atua.

19 A ko te whakahenga tenei, no te mea kua tae mai nei te māramatanga ki te ao, a nui atu to nga tāngata aroha ki te pouri i to ratou ki te māramatanga, he kino hoki no a ratou mahi.

20 E kino ana hoki ki te māramatanga nga kai mahi katoa i te kino, e kore ano hoki e haere mai ki te māramatanga, kei whakakitea a ratou mahi.

21 Tena ko te kai mahi i te pono, e haere mai ana ki te māramatanga, kia kitea ai ana mahi, i mahia i roto i te Atua.

HOANI 3, 4.

22 ¶ A no muri i enei mea ka haere a Ihu, ratou ko ana akonga, ki te whenua o Huria; a noho tahi ana ratou ki reira, me tana iriiri ano.

23 Na, i te iriiri ano hoki a Hoani ki Enona, ki tetahi wahi e tata ana ki Harema, no te mea he nui te wai o reira: a ka haere mai ratou, ka iriiria.

24 Kahore hoki i pangā noatia a Hoani ki te whare herehere,

25 Na ka totohe nga akonga a Hoani ki nga Hurai ki te purenga.

26 A ka haere ratou ki a Hoani, ka mea ki a ia, E rapi, te tangata i tera taha na korua i Horano, tau i whakaatu mai na, nana, kei te iriiri ano ia, a e haere ana te katoa ki a ia.

27 Ka whakahokia e Hoani, ka mea, E kore tetahi mea e riro mai i te tangata, ki te kore e homai ki a ia i runga i te rangi.

28 Ko koutou hei kai whakaae ki a au, ki taku meatanga, Ehara ahau i a te Karaiti, engari i tonoa mai ahau i mua i a ia.

29 Te tangata i te wahine marena hou, ko ia te tane marena hou: na, te hoa o te tane marena hou, e tu ana, e rongo ana ki a ia, ka hari pu ki te reo o te tane marena hou: na reira i tino nui ai tenei hari oku.

30 Ko te tikanga tenei, ko ia kia nui haere, ko ahau kia iti haere.

31 ¶ Ko ia e haere mai ana i runga, kei runga ake ia i te katoa: ko to te whenua no te whenua ia, a no te whenua ana korero: ko ia e haere mai ana i te rangi, kei runga ake ia i te katoa.

32 A ko tana i kite ai, i rongo ai, ko ia tana e whakaatu ai: kahore hoki tetahi tangata e tango i tana whakaaturanga.

33 Ki te manako tetahi ki tana whakaaturanga, kua piri tana tohu ki te pono o ta te Atua.

34 Ko ta te Atua i tono mai ai, e korero ana ia i nga kupu a te Atua: kahore hoki te Wairua e homai e te Atua i runga-i te mehua.

35 E aroha ana te Matua ki te Tama, a kua hoatu nga mea katoa ki tona ringa.

36 Ko ia e whakapono ana ki te Tama, he oranga tonutanga tona: a ko ia e kore e whakapono ki te Tama, e kore e kite i te ora; engari ka mau tonu te riri a te Atua ki a ia.

UPOKO 4.

Ki te wahine o Hamaria.

31 *Ki ana akonga.* 43 *Kei Kariri.* 46 *Te tamaiti mate i Kapere-nauma.*

ANO ka mohio te Ariki, kua rongo nga Parihi, ko nga akonga a Ihu i mea ai, i iriiri ai, he tokomaha atu i a Hoani.

2 (He ahakoa ra ehara i a Ihu nana i iriiri, engari na ana akonga,)

HOANI 4.

3 Ka mahue Huria i a ia, a hoki ana ano ki Kariri.

4 Na, te ara mona i tika na Hamaria.

5 A ka haere ia ki tetahi pa o Hamaria, ko Haika te ingoa, e patata ana ki te kāinga i hoatu e Hakopa ki tana tama ki a Hohepa.

6 A kei reira te puna a Hakopa. Na kua ngenge a Ihu i te haerenga, heoi noho ana ia ki te taha o te puna: a meāke ko te ono o nga haora.

7 Na ka haere mai tetahi wahine o Hamaria ki te utu wai: ka mea a Ihu ki a ia, Homai he wai moku.

8 (Kua riro hoki ana akonga ki te pa, ki te hoko kai:)

9 Na, ko te meatanga mai a te wahine o Hamaria ki a ia, He aha koe ka tono mai ai ki te wai i a au, ina he Hurai koe, he wahine ahau no Hamaria? kahore hoki e tātata nga Hurai ki nga Hamari.

10 Ka whakahokia e Ihu, ka mea ki a ia, Me i mātau koe ki ta te Atua e homai ai, ki tenei hoki e mea nei ki a koe, Homai he wai moku; penei kua tono koe ki a ia, a kua hoatu e ia te wai ora ki a koe.

11 Ka mea te wahine ki a ia, E kara, kahore au pēre, a e hohonu ana te puna: no hea tena wai ora āu?

12 He nui oti koe i to matou matua, i a Hakopa, i homai ai te puna ki a matou, a inu ana ia i konei, ratou ko ana tamariki, me ana kararehe?

13 Ka whakahokia e Ihu, ka mea ki a ia, E mate ano i te wai nga tāngata katoa e inu ana i tenei wai:

14 Tena ko te tangata e inu ana i te wai e hoatu e ahau ki a ia, e kore e mate i te wai a ake ake; engari te wai e hoatu e ahau ki a ia, hei puna wai i roto i a ia e pupū ake ana, a te oranga tonutanga ra ano.

15 Ka mea te wahine ki a ia, E kara, homai ki a au tena wai, kei mate ahau i te wai, kei haere mai hoki ki konei utu ai.

16 Ka mea a Ihu ki a ia, Tikina karangatia tou tahu, ka hoki mai ai.

17 Ka whakahokia e te wahine, ka mea, Kahore oku tahu. Ka mea a Ihu ki a ia, He korero tika tau, Kahore oku tahu:

18 Ina hoki kua tokorima ou tahu; a ko ia i a koe nei ehara i te tahu nou: he pono tenei korero āu.

19 Ka mea te wahine ki a ia, E kara, e kite ana ahau he poropiti koe.

20 I karakia o matou mātua i runga i tenei maunga; a e mea ana koutou, ko Hiruharama te wahi e tika ai te karakia.

21 Ka mea a Ihu ki a ia, E tai, whakaponoki a au, meake puta te wa, e kore ai koutou e karakia ki te Matua i runga i tenei maunga, e kore ano i Hiruharama.

22 Kahore koutou e mohio ki ta koutou e karakia nei: e mātau ana matou ki ta matou

HOANI 4.

e karakia nei: no nga Hurai nei hoki te ora.

23 Otira meāke puta te wa, a tenei ano, e karakia ai nga kai karakia pono ki te Matua i runga i te wairua, i te pono: e rapu ana hoki te Matua ki te pera hei karakia ki a ia.

24 He Wairua te Atua: a me karakia nga kai karakia ki a ia i runga i te wairua, i te pono.

25 Ka mea te wahine ki a ia, E mātau ana ahau kei te haere mai a te Mihaia, (e karangatia nei ko te Karaiti;) ka tae mai ia, mana nga mea katoa e korero ki a tatou.

26 Ka mea a Ihu ki a ia, Ko ahau ano ia e korero nei ki a koe.

27 ¶ Na ka puta mai i reira ana akonga a ka miharo ki tana korerotanga ki te wahine: heoi kihai tetahi i mea, He aha tau e rapu? He aha koe ka korero ai ki a ia?

28 Na ka whakarerea e te wahine tana ipu, a haere ana ki te pa, ka mea ki nga tāngata,

29 Haere mai, kia kite i te tangata i korerotia mai ai ki a au nga mea katoa i mea ai ahau: ehara oti tenei i a te Karaiti?

30 Me i reira ka puta ratou ki waho o te pa, a haere ana ki a ia.

31 ¶ A i taua takiwa ano ka tohe nga akonga ki a ia, ka mea, E te Kai whakaako, e kai ra.

32 Ka mea ia ki a ratou, He kai ano taku hei kai maku, e kore e kitea e koutou.

33 Na ka mea nga akonga tetahi ki tetahi, I kawea mai ranei e tetahi he kai māna?

34 Ka mea a Ihu ki a ratou, Ko taku kai tenei, ko te mea i ta toku kai tonu e pai ai, kia whakaotia hoki tana mahi.

35 E kore ianei koutou e mea, Kia wha atu nga mara, a ka taea te kotinga? Nana, ko taku kupu tenei ki a koutou, Kia ara ake o koutou kanohi, tirohia nga māra; kua ma noa ake: ko te kotinga tenei.

36 A ka whiwhi te kai kokoti ki te utu, ka kohia ano hoki e ia nga hua mo te oranga tonutanga: kia hari tahi ai te kai rui raua ko te kai kokoti.

37 Na konei hoki i pono ai taua ki, E rui ana tetahi, e kokoti ana tetahi.

38 I tonoa koutou e ahau ki te kokoti i te mea kihai i mahia e koutou: he tangata ke na ratou i mahi, a kua uru koutou ki ā ratou mahi.

39 ¶ A he tokomaha nga Hamari o taua pa i whakapono ki a ia, mo te ki a te wahine i mea ra, I korerotia mai e ia ki a au nga mea katoa i mea ai ahau.

40 Ano ka tae nga Hamari ki a ia, ka mea kia noho ia ki a ratou: a e rua nga ra i noho ai ia ki reira.

41 Na, hira noa ake nga tāngata i whakapono, he mea hoki na tana ake kupu;

42 I mea ano ki te wahine, Ehara i te mea na to kupu i whakapono ai matou inaianei: kua rongo nei hoki matou ake, a ka mātau, ko te

HOANI 4, 5.

Karaiti pu tenei, ko te Kai whakaora o te ao.

43 ¶ Ka pahure nga ra e rua, ka turia e ia i reira, a haere ana ki Kariri.

44 I mea hoki a Ihu, Kahore he honore o te poropiti i tona kāinga ake.

45 A, tona taenga ki Kariri, ka whakamanuhiritia ia e nga tāngata o Kariri, i kite hoki ratou i nga mea katoa i meatia e ia ki Hiruharama, i te hākari: i haere hoki ratou ki te hākari.

46 ¶ A ka tae ano a Ihu ki Kana o Kariri, ki te wahi i meatia ai e ia te wai hei waina. Na, ko tetahi tangata a te kingi, kei Kaperenauma tana tama e mate ana.

47 Ano ka rongo ia kua tae mai a Ihu i Huria ki Kariri, ka haere atu ki a ia, ka inoi ki a ia kia haere ia ki te whakaora i tana tama: meake hoki marere.

48 Na, ko te meatanga a Ihu ki a ia, Ki te kahore koutou e kite i nga tohu, i nga merekara, e kore koutou e whakapono.

49 Ka mea te tangata a te kingi ki a ia, E te Ariki, haere ake i te mea kahore ano kia mate noa taku tama.

50 Ka mea a Ihu ki a ia, Haere; kua ora to tama. Na, whakapono ana te tangata ki te kupu i korerotia e Ihu ki a ia, a haere ana.

51 A, i a ia e haere ana, ka tutaki ana pononga ki a ia, ka korero, ka mea, Kua ora to tama.

52 Na ka ui ia ki a ratou ki

te haora i matūtū ake ai ia. Ka mea ratou ki a ia, Nananahi, no te whitu o nga haora, i mutu ai tona kā.

53 Na ka mohio te pāpā ko te tino haora ia i mea ai a Ihu ki a ia, Kua ora to tama: a whakapono ana ia ratou ko tona whare katoa.

54 Ko te rua ano tenei o nga merekara i meatia e Ihu, i muri i tona haerenga i Huria ki Kariri.

UPOKO 5.

Whakaoranga i te Hapati.

10 *Ta nga Hurai.* 17 *Ana utu ki a ratou.*

MURI iho i enei mea he hākari ta nga Hurai; a haere ana a Ihu ki Hiruharama.

2 ¶ Na, kei Hiruharama tetahi wai kaukauranga kei te tatau hipi, tona ingoa Hiperu ko Petehera; e rima ona whakamañāū.

3 Na, kei roto i enei e takoto ana tona tini o nga turoro, o nga matapo, o nga kopa, o nga memenge, e tatari ana ki te pokarekarenga o te wai.

4 I heke iho hoki tetahi anahera i te wa i rite ai ki te kaukauranga, whakapokarekare ai i te wai: a ko ia kua tae wawe i muri iho o te pokarekarenga o te wai, i ora i tona mate, ahakoa he aha, he aha.

5 Na, kei reira tetahi tangata, e toru tekau ma waru nga tau i mate ai.

6 A, te kitenga o Ihu i a ia e takoto ana, a ka mātau ano

ka roa ke nei te wa ona e *mate ana*, ka mea ki a ia, E pai ana ranei koe kia whakaorangia?

7 Ka whakahokia e taua tūrōro ki a ia, E te Ariki, kahore aku tangata hei tuku i a au ki te kaukauranga, ina whakapokarekarea te wai: heoi i ahau e haere atu ana, ka heke atu tetahi i mua i a au.

8 Ka mea a Ihu ki a ia, Whakatika, tangohia ake tou moenga, haere.

9 A ora tonu ake taua tangata, a tangohia ake ana e ia tona moenga, haere ana. A ko te hapati taua ra.

10 ¶ Na ka mea nga Hurai ki taua tangata i whakaorangia, Ko te hapati tenei: e kore e tika kia mauria e koe tou moenga.

11 Ka whakahokia e ia ki a ratou, Te tangata i whakaorangia ai ahau, nāna i mea ki a au, Tangohia ake tou moenga, haere.

12 Na ka ui ratou ki a ia, Ko wai tena tangata i mea na ki a koe, Tangohia ake tou moenga, haere?

13 Otiia kihai taua tangata i whakaorangia i mohio ko wai ia: i pahuhu atu hoki a Ihu, he tokomaha hoki nga tangata i taua wahi.

14 Muri iho i enei mea ka kite a Ihu i a ia i roto i te temepara, a ka mea ki a ia, Na, ka oti nei koe te whakaora, kāti te hara, kei kino rawa iho te mea e pa ki a koe.

15 Haere ana taua tangata,

korero ana ki nga Hurai, Na Ihu ia i whakaora.

16 Koia nga Hurai i whai ai i a Ihu, i mea ai kia whakamatea ia, mona i mea i enei mea i te hapati.

17 ¶ Na ka whakahokia e Ihu ki a ratou, E mahi ana toku Matua a taea noatia tenci ra; e mahi ana ano ahau.

18 Koia nga Hurai i tino whai rawa ai kia patua ia, ehara hoki i te mea ko tana takahanga anake i te hapati, engari mona i mea ko te Atua tona Matua ake, i mea e rite ana ia ki te Atua te nui.

19 ¶ Na ka whakahokia e Ihu, a ka mea ki a ratou, He pono, he pono taku e mea nei ki a koutou, E kore e taea e te Tama te mea tetahi mea e ia anake, engari nga mea e kite ai ia e meatia ana e te Matua: ko tana hoki e mea ai, e meatia ana hoki e te Tama.

20 E aroha ana hoki te Matua ki te Tama, a e whakakitea ana ki a ia nga mea katoa e mea ai ia: a nui atu i enei nga mahi e whakakitea e ia ki a ia, kia miharo ai koutou.

21 Ko ta te Matua hoki, he whakaara, he whakaora i nga tupāpaku; ka pera ano te Tama, ka whakaora i ana e pai ai.

22 E kore hoki te Matua e whakawa i tetahi, engari kua tukua e ia nga whakawa katoa ki te Tama:

23 Kia rite ai te whakahonore a nga tangata katoa i te Tama ki ta ratou whakahonore i te Matua. Ki te

HOANI 5.

kahore tetahi e whakahonore i te Tama, e whakakahore ana ia i te honore mo te Matua nana nei ia i tono mai.

24 ¶ He pono, he pono taku e mea atu nei ki a koutou, Te tangata e rongō ana ki taku korero, a e whakapono ana ki toku kai tono mai, he oranga tonutanga tona; e kore ano ia e riro ki roto ki te whakamatenga, engari kua whiti i te mate ki te ora.

25 He pono, he pono taku e mea nei ki a koutou, Meāke puta te wa, a tenei ano inaianei, e rongō ai nga tupāpaku i te reo o ta te Atua Tama; a, te hunga e rongō ana ka ora.

26 Ta te mea he oranga to te Matua kei roto i a ia; waihoki kua homai e ia ki te Tama, kia whai oranga i roto i a ia;

27 A kua homai ano ki a ia he tikanga mo te whakawa, no te mea ko te Tama ia a te tangata.

28 Kua e miharo ki tenei: no te mea meāke puta te wa, e rongō ai i tona reo nga tāngata katoa i roto i nga urupa,

29 A ka puta mai; ko nga kai mahi o te pai ki te aranga o te oranga; a ko nga kai mahi o te kino ki te aranga o te whakawakanga.

30 ¶ E kore e ahei i a au te mea tetahi mea e ahau anake: rite tonu taku whakawa ki taku e rongō ai: a e tika ana taku whakawa; kahore hoki ahau e rapu i taku i pai ai, engari i ta te Matua i pai

ai, nāna nei ahau i tono mai.

31 Me he mea ko ahau hei whakaatu i aku aha, i aku aha, ehara taku i te whakaatu pono.

32 Tera atu ano tetahi kai whakaatu moku; a e mohio ana ahau he whakaaturanga pono tāna e whakaatu nei moku.

33 I tono tangata koutou ki a Hoani, a i whakaaturia e ia te pono.

34 Kahore ahau e manako ki ta te tangata whakaaturanga: engari e korerotia ana e ahau enei mea kia ora ai koutou.

35 He rama kā tera, he rama marama tonu: a he wa ano i pai ai koutou kia hari ki tona māramatanga.

36 Otiia he kai whakaatu ano toku nui atu i a Hoani: ko nga mahi hoki i homai e te Matua kia whakaotia e ahau, ko aua mahi e mahia nei e ahau, hei whakaatu moku, i tonoa mai ahau e te Matua.

37 Na, te Matua nana nei ahau i tono mai, kua oti ahau te whakaatu e ia. Kahore ano koutou i rongō noa ki tona reo, kahore ano i kite i tona ahua.

38 Kahore ano hoki i mau tana kupu i roto i a koutou; ina kahore ano koutou i whakapono ki tenei i tonoa mai e ia.

39 Whakatakina nga tikanga o nga karaipiture; e mea ana hoki koutou kei reira te oranga tonutanga mo koutou:

HOANI 5, 6.

a ko enei hei kai whakaatu moku.

40 Heoi kahore koutou e pai kia haere mai ki a au, kia whiwhi ai ki te ora.

41 He kororia tangata, kahore au e manako atu.

42 Na, kua mātau ahau ki a koutou, kahore te aroha o te Atua i roto i a koutou.

43 Kua tae mai nei ahau i runga i te ingoa o toku Matua, a kahore nei koutou e manakoki a au; ki te haere mai tetahi i runga i tona ake ingoa, ka manako koutou ki a ia.

44 Me pehea koutou ka whakapono ai, i a koutou ka whakapai nei ki te honore a koutou ki a koutou ano, a kahore e rapu i te honore e puta mai ana i te Atua anake?

45 Kei mea koutou, e kore-rotia tokoutou hē e ahau ki te Matua: tera te kai korero mo to koutou hē, ko Mohi, ko ta koutou e tumanako nei.

46 Me i whakapono hoki koutou ki a Mohi, kua whakapono ano ki a au: tana hoki i tuhi-tuhi ai he mea moku.

47 Tena ko tenei ka kore koutou e whakapono ki ana i tuhituhi ai, ma te aha ka whakapono ai ki aku korero?

UPOKO 6.

Whangainga o nga mano e rima. 15 *Ta ratou.* 16 *Tona mawehenga atu.* 22 *Ka whaia.* 26 *Tana.* 32 *Ko ia te taro ora.* 66 *Ta ratou.* 68 *Ta Pita.*

MURI iho i enei mea ka whiti a Ihu i te moa-

no o Kariri, ara i to Tai-piria.

2 A he rahi te hui i aru i a ia, i kite hoki ratou i ana merekara i mea ai ia ki nga turoro.

3 Na ka haere a Ihu ki runga ki te maunga, a noho ana i reira ratou ko ana akonga.

4 A kua tata te kapenga, te hākari a nga Hurai.

5 Na, te marangatanga ake o nga kanohi o Ihu, ka kite i te rahi o te hui e haere mai ana ki a ia; ka mea ia ki a Piripi, Ko hea tatou hoko ai i etahi taro, kia kai ai enei?

6 I penei ai tana ki hei whakamatau mona; i mohio hoki ia ki tana e mea ai.

7 Ka mea a Piripi ki a ia, E kore e ranea ma ratou nga taro o nga pene e rua rau, e kore e riro tetahi wahi iti i tenei, i tenei o ratou.

8 Ka mea tetahi o ana akonga ki a ia, a Anaru teina o Haimona Pita,

9 He tamaiti tenei e rima ana taro pare, e rua ika no-nohi; heoi hei aha enei ma tenei ope nui?

10 Na ka mea a Ihu, Meinga nga tāngata kia noho. He nui hoki te tarutaru i taua wahi. Na, noho ana nga tāngata ki raro, te tokomaha me te mea e rima mano.

11 Na ka mau a Ihu ki nga taro; a ka mutu te whakawhetai, ka tuwha atu ki nga akonga, a na nga akonga ki te hunga i noho ra; me nga ika ano, ta ratou i pai ai.

12 Ano ka makona ratou, ka

HOANI 6.

mea ia ki ana akonga, Kohi-kohia nga toenga o nga whatiwhatinga, kei maumauria tetahi wahi.

13 Na kohikohia ana e ratou, a whakakiiia ana nga kete tekau ma rua ki nga whatiwhatinga o nga taro pare e rima, ki nga toenga a nga tāngata i kai ra.

14 A, te kitenga o aua tāngata i te merekara i meatia e Ihu, ka mea ratou, Ko ia ano, tenei ko te poropiti e haere mai ana ki te ao.

15 ¶ A i mahara a Ihu, meāke ratou haere mai ki te tango i a ia, ki te whakakingi i a ia, na haere ana ano ia ki te maunga, ko ia anake.

16 ¶ Ano ka ahiahi, ka haere ana akonga ki te moana.

17 Na ka eke ratou ki te kaupuke, ka whakawhiti ki tera taha o te moana, ki Kaperenauma. A kua pouri noa ake, kahore ano a Ihu kia tae noa ki a ratou.

18 Na, ko te turanga o te moana, he nui hoki no te puhanga o te hau.

19 A, to ratou hoenga atu, e rua tekau ma rima, e toru tekau ranei paronga, ka kite i a Ihu e haere *maori* ana i runga i te moana, a e whakataata ana ki te kaupuke: na ka matakau ratou.

20 Na ka mea ia ki a ratou, Ko ahau tenei; aua e mataku.

21 Na ka mea ratou kia eke ia ki te kaupuke: a kihai i aha kua u te kaupuke ki te wahi i hoe ai ratou.

22 ¶ I te aonga ake, ka maha-

ra te mano e tu ana i tera taha o te moana, kahore he poti ke atu o reira, ko tera anake i eke ai ana akonga, a kihai a Ihu i eke tahi ratou ko ana akonga ki te poti, engari ko ana akonga anake i haere;

23 (He poti ke ra ia i u mai i Taipiria ki pahaki atu o te wahi i kai ai ratou i te taro i ta te Ariki whakawhetainga:)

24 A, te kitenga o te mano kahore a Ihu i reira, kahore ano hoki ana akonga, ka eke ano ratou ki nga kaupuke, ka rere ki Kaperenauma ki te rapu i a Ihu.

25 A, to ratou kitenga i a ia i tawahi o te moana, ka mea ki a ia, E Rapi, nonahea koe i tae mai ai ki konei?

26 ¶ Ka whakahokia e Ihu ki a ratou, ka mea, He pono, he pono taku e mea nei ki a koutou, Ehara i te mea he kiteanga no koutou i nga merekara i rapu ai koutou i a au, engari no te mea i kai koutou i nga taro, a ka makona.

27 Aua e mahia te kai memeha, engari te kai e mau tonu ana, ā te oranga tonutanga ra ano, ta te Tama hoki a te tangata e hoatu ai ki a koutou: kua oti hoki ia te whai tohu e te Atua, e te Matua.

28 Na ka mea ratou ki a ia, Me aha matou e mahi ai i nga mahi a te Atua?

29 Ka whakahokia e Ihu, a ka mea ki a ratou, Ko ta te Atua mahi tenei, kia whakapono koutou ki tana i tono mai ai.

HOANI 6.

30 Na ka mea ratou ki a ia, Ko tehea tohu te meatia ana e koe kia kite ai matou, kia whakapono ai ki a koe? tena koa tau mahi?

31 I kai mana o tatou mātua i te koraha; ko te mea hoki tena i tuhituhia, I homai e ia he taro i te rangi hei kai ma ratou.

32 ¶ Na, ko te meatanga a Ihu ki a ratou, He pono, he pono taku e mea nei ki a koutou, Ehara i a Mohi nana i hoatu tena taro ki a koutou i te rangi; engari tenei te hoatu nei te taro pono o te rangi e toku Matua ki a koutou.

33 Ko te taro hoki a te Atua, ko ia e heke iho ana i te rangi, e homai ana i te oranga ki te ao.

34 Na ka mea ratou ki a ia, E te Ariki, homai tenei taro ki a matou i nga wa katoa.

35 Ka mea a Ihu ki a ratou, Ko ahau te taro o te ora: ki te haere mai tetahi ki a au, e kore rawa ia e hiakai; ki te whakapono hoki tetahi ki a au, mutu ake tona mate wai.

36 Otira i mea ano ahau ki a koutou, Kua kite koutou i a au, a kahore i whakapono.

37 Ko a te Matua e homai ai ki a au, ka haere katoa mai ki a au; a ki te haere mai tetahi ki a au, e kore rawa e pangā e ahau ki waho.

38 I heke iho hoki ahau i te rangi, ehara i te mea hei mahi i taku i pai ai, engari i ta toku kai tono mai i pai ai.

39 A ko ta te Matua i pai ai, nana nei ahau i tono mai,

koia tenei, kia kaua e ngaro i a au tetahi wahi o nga mea katoa i homai e ia ki a au; engari kia whakaarahia ake e ahau a te ra whakamutu-nga.

40 A ko te pai tenei a toku kai tono mai, ko nga tāngata katoa e kite ana i te Tama, a e whakapono ana ano ki a ia, kia whiwhi ratou ki te oranga tonutanga; maku ano ratou e whakaara ake a te ra whakamutunga.

41 ¶ Na ka korero komuhumu-hunga Hurāi ki a ia, mona i mea, Ko ahau te taro i heke iho i te rangi.

42 A ka mea ratou, Ehara oti tenei i a Ihu, tama a Hōhepa, e mohio nei tatou ki tona pāpāraua kotona whaea? ha! he pehea tana e ki nei, I heke iho ahau i te rangi?

43 Na ka whakahokia e Ihu, ka mea ia ki a ratou, Kāti te komuhumu i roto i a koutou.

44 Kahore he tangata e ahei te haere mai ki a au, ki te kahore ia e kumea e te Matua i tonoa mai ai ahau: a maku ano ia e whakaara ake a te ra whakamutunga.

45 Kua oti te tuhituhi i roto i nga poropiti, A ka whakaakona katoatia ratou e te Atua. Na, nga tāngata katoa kua rongo ki te Matua, a kua akona, ka haere mai ki a au.

46 Kahore hoki te tangata i kite i te Matua; ko ia anake i puta mai i te Atua, ko ia kua kite i te Matua.

47 He pono, he pono taku e mea nei ki a koutou, Ki te

HOANI 6.

whakapono tetahi ki a au, he oranga tonutanga tona.

48 Ko ahau te taro o te ora.

49 I kai mana o koutou mātua i te koraha, a kua mate.

50 Ko te taro tenei e heke iho ana i te rangi, kia kai ai te tangata i a ia, a kia kaua e mate.

51 Ko ahau te taro ora i heke iho i te rangi; ki te kai tetahi i tenei taro, e ora tonu ia: a, te taro e hoatu e ahau, ko oku kikokiko, e hoatu e ahau hei oranga mo te ao.

52 ¶ Na ka totohe nga Hurai tetahi ki tetahi, ka mea, Me pehea e homai ai e tenei tangata ona kikokiko kia kainga e tatou?

53 Na, ko te meatanga a Ihu ki a ratou, He pono, he pono taku e mea nei ki a koutou, Ki te kahore koutou e kai i nga kikokiko o te Tama a te tangata, e inu i ona toto, kahore he oranga i roto i a koutou.

54 Ko ia e kai ana i oku kikokiko, a e inu ana i oku toto, he oranga tonutanga tona; a maku ia e whakaara ake a te ra whakamutunga.

55 He kai pono hoki oku kikokiko, he tino mea oku toto hei inumanga.

56 Ko ia e kai ana i oku kikokiko, a e inu ana i oku toto, e noho ana i roto i a au, me ahau hoki i roto i a ia.

57 Na te Matua ora hoki ahau i tono mai, no te Matua ano toku oranga: waihoki ki te kai tetahi i a au, kei a au he oranga mona.

58 Ko te taro tenei i heke

iho i te rangi: e kore e pera me o koutou mātua i kai mana nei, a kua mate: ki te kai tetahi i tenei taro, e ora tonu ia.

59 I korerotia enei mea e ia i roto i te whare karakia, i a ia e whakaako ana i Kapere-nauma.

60 ¶ Na, he tokomaha ana akonga i te rongonga ai, i mea, He kupu pakeke tenei; ko wai e ahei te whakarongo atu?

61 A ka mohio a Ihu i roto i a ia, e komuhumuhu ana ana akonga ki tenei, ka mea ia ki a ratou, E hē ana koutou ki tenei?

62 Ka pehea ra ki te mea ka kitea e koutou te Tama a te tangata, e kake atu ana ki te wahi i noho ai ia i mua?

63 Ko te wairua te whakaora ana; kahore o te kikokiko wahi: he wairua, he oranga, nga kupu e korero nei ahau ki a koutou.

64 Tenei ano ia etahi o koutou kahore o ratou whakapono. I mātau hoki a Ihu no te timatanga ki nga mea kahore o ratou whakapono, ki te tangata ano e tukua ai ia.

65 A ka mea ia, Na konei ahau i mea ai ki a koutou, Kahore he tangata e ahei te haere mai ki a au, ki te kahore e hoatu ki a ia e toku Matua.

66 ¶ I taua wa he tokomaha ana akonga i hoki ki muri, a mutu ake to ratou haere tahi me ia.

67 Na ka mea a Ihu ki te

tekau ma rua, E mea ana ano ranei koutou kia haere?

68 Na ka whakahokia e Haimona Pita ki a ia, E te Ariki, me haere matou ki a wai? kei a koe nga kupu o te oranga tonutanga.

69 A kua whakapono matou, kua mātau, ko te Karaiti koe, ko te Tama a te Atua ora.

70 Ka whakahokia e Ihu ki a ratou, He teka ianei kotahi tekau ma rua koutou i whiri-whiria e ahau, a he rewera tetahi o koutou?

71 Ko Hura Ikariote, *tama* a Haimona tana i korero ai: ko te tangata hoki ia meake nei tuku i a ia; ko tetahi o te tekau ma rua hoki ia.

UPOKO 7.

Tana ki ona teina. 10 Kei Hiruharama. 14 Kei te temepara. 40 Ta te iwi mona. 45 Riri a nga Parahi.

I MURI i enei mea ka haereere a Ihu i Kariri: kahore hoki ia i pai ki te haereere i Huria, e rapu ana hoki nga Hurai kia whakamatea ia.

2 Na kua tata ta nga Hurai hākari wharau.

3 Na ka mea ona teina ki a ia, Haere atu i konei, anga atu ki Huria, kia kite ai ano o akonga i au mahi e mahi nei koe.

4 E kore hoki tetahi tangata e mea huna i tetahi mea, ki te whai ia kia ara tona ingoa. Ki te mea koe i enei mea, kia kite te ao i a koe.

5 Kihai hoki ona teina i whakapono ki a ia.

6 Na ka mea a Ihu ki a ratou, Kahore ano kia taea noatia toku taima: to koutou taima ia, kei nga wa katoa.

7 E kore te ao e kino ki a koutou; engari ka kino ki a au, no te mea e whakaaturia ana e ahau e kino ana āna mahi.

8 Haere koutou ki tenei hākari: e kore ahau e haere wawe ki tenei hākari; kahore hoki toku taima kia ata rite noa.

9 A ka mutu tenei korero āna ki a ratou, ka noho ia ki Kariri.

10 ¶ Ano ka riro ona teina, ka haere ano ia ki te hākari, ehara i te mea whakakite nui, engari i tuā huna.

11 A i rapu nga Hurai ki a ia i te hākari, i mea, Kei hea ia?

12 A he nui te korero komuhumu mona i roto i te mano: ko etahi i mea, He tangata pai ia: ko etahi i mea, Kahore; engari e whakapohehe ana ia i te iwi.

13 Heoi kihai i rahi te korero a tetahi tangata mona, he wehi ki nga Hurai.

14 ¶ Na, i waenganui o te hākari, ka haere a Ihu ki roto ki te temepara whakaako ai.

15 A ka miharo nga Hurai, ka mea, Na te aha i hua ai te mohio o tenei tangata, ehara nei hoki ia i te mea whakaako?

16 Ka whakahokia e Ihu ki a ratou, ka mea, Ehara i te mea naku ake taku e wha-

HOANI 7.

kaako nei, engari na toku kai tonono mai.

17 Ki te pai tetahi tangata ki te mea i tana e pai ai, e mātau ia ki te whakaakoranga, na te Atua ranei, he korero naku ake ranei.

18 Te tangata nāna ake tāna korero, e whai ana ia i tona ake kororia: tena ki te whai tetahi i te kororia o tona kai tonono, e pono ana ia, a kahore ona hē.

19 He teka ianei na Mohi te ture i homai ki a koutou, a kahore e whakaritea te ture e tetahi o koutou? He aha koutou ka whai nei kia whakamatea ahau?

20 Na, ko te whakahokinga a te mano, ka mea, He rewera tou: ko wai te whai ana kia whakamatea koe?

21 Ka whakahokia e Ihu, ka mea ki a ratou, Kotahi aku mahi i mahi ai, a e miharotia ana e koutou katoa.

22 I homai e Mohi te kotinga ki a koutou; (ehara i te mea na Mohi ake, engari na nga tupuna;) a e kokoti ana koutou i te tangata i te hapati.

23 Ki te kotia te tangata i te hapati, kei takahia te ture a Mohi; e riri ana oti koutou ki a au, moku i whakaora rawa i te tangata i te hapati?

24 Kaua e waiho te whakawa i runga i ta te kanohi, engari kia tika ta koutou whakarite.

25 ¶ Me i reira ka mea etahi o nga tāngata o Hiruharama, Ehara oti tenei i a ia, i whaia nei e ratou kia whakamatea?

26 Na, maia tonu tana korero, a kahore a ratou kupu ki a ia.

E tino mātau ana ranei nga rangatira, ko te tino Karaiti tenei?

27 Otiia e mātau ana tatou ki te wahi i puta mai ai tenei: tena ka tae mai a te Karaiti, kahore he tangata e mātau ki te wahi e puta mai ai ia.

28 Na ka karanga a Ihu, i te temepara, i a ia e whakaako ana, ka mea, E mātau ana koutou ki a au, e mātau ana ano ki te wahi i haere mai ai ahau: ehara i a au ake toku haere mai; engari e pono ana te kai tonono mai i a au; kahore nei ano koutou i mātau noa ki a ia.

29 E mātau ana ahau ki a ia; i puta mai hoki ahau i a ia, nāna ano ahau i tonono mai.

30 A i whai ratou kia hopukia ia: otiia kihai i pa te ringa o tetahi ki a ia, kahore hoki tona haora i taka noa.

31 A he tokomaha o te mano i whakapono ki a ia, i mea, Ka tae mai a te Karaiti, tera ranei e maha atu ana merekara e mea ai i a tenei e mea nei?

32 I rongā nga Parihi i te mano e korerorero ana i enei mea mona; na ka tonoa e nga Parihi ratou ko nga tohunga nui he katipa ki te hopu i a ia.

33 Na ka mea a Ihu ki a ratou, He iti noa ake te wahi e noho ai ahau ki a koutou, katahi ahau ka hoki ki toku kai tonono mai.

34 Tera koutou e rapu i a au, heoi e kore koutou e kite: e kore hoki koutou e ahei te

HOANI 7, 8.

haere ake ki te wahi e noho ai ahau.

35 Na ka mea nga Hurai ki a ratou ano, E haere oti ia ki hea, e kore ai e kitea e tatou? e haere oti ia ki nga konene i roto i nga Kariki, ako ai i nga Kariki?

36 He ki aha tenei e ki mai nei ia, Tera koutou e rapu i a au, a e kore e kite: e kore hoki koutou e ahei te haere ake ki te wahi e noho ai ahau?

37 ¶ I te ra whakamutunga, i te ra nui o te hākari, i tu a Ihu, i karanga, i mea, Ki te mate wai tetahi, kia haere mai ia ki a au inu ai.

38 Ki te whakapono tetahi ki a au, ka rite ki ta te karaiti, ka rere nga awa wai ora i roto i tona kopu.

39 (I korerotia tenei e ia mo te Wairua, meake nei riro i te hunga e whakapono ana ki a ia; kahore hoki te Wairua Tapu kia tae noa mai; no te mea kiano a Ihu i whakakororiatia noatia.)

40 ¶ A he tokomaha o te mano i to ratou rongonga ai i tenei kupu, i mea, He pono ko te Poropiti tenei.

41 Ka mea etahi, Ko te Karaiti tenei. Ko etahi i mea, E puta mai ranei a te Karaiti i Kariri?

42 Kahore koia te karaipiture i mea, E puta mai a te Karaiti i te uri o Rawiri, i Peterehema, i te kāinga i noho ai a Rawiri?

43 Na ka waiho ia hei take wehewehenga mo te mano.

44 Ko etahi o ratou i mea

kia hopukia ia: otira kihai i pa nga ringa o tetahi ki a ia.

45 ¶ Na, ko te taenga atu o nga katipa ki nga tohunga nui ratou ko nga Parihi; ka mea enei ki a ratou, Na te aha ia tē kawea mai ai e koutou?

46 Ka whakahokia e nga katipa, Kahore rawa he tangata i rite ana korero ki a tenei tangata.

47 Na ka pehia ta ratou e nga Parihi, Kua tinihangatia ano hoki koutou?

48 Kua whakapono koia tetahi o nga rangatira, o nga Parihi ranei ki a ia?

49 Ko tenei hunga ia kahore nei e mātau ki te ture, ka oti ratou te kanga.

50 Ka mea e Nikorima ki a ratou, (tera hoki i haere po mai ki a ia, ko ia hoki tetahi o ratou,)

51 Ka whakahengia ranei te tangata e to tatou ture, i te mea kahore ano i whakarongo noa ki a ia, i mātau hoki ki tana mahi?

52 Na ka pehia e ratou, ka mea ki a ia, Ko koe hoki no Kariri? Mau e rapu, e titiro: kahore hoki kia ara noa tetahi poropiti i Kariri.

53 ¶ Na hoki ana ratou ki tona whare, ki tona whare.

UPOKO 8.

Te wahine puremu. 12 T'a Ihu karuwhau.

NA ka haere a Ihu ki mau-nga Oriwa.

2 A i te atatu ka hoki ano ia ki te temepara, a tae katoa mai ana te iwi ki a ia; na ka

HOANI 8.

noho ia, ka whakaako i a ratou.

3 Katahi ka arahina mai ki a ia e nga karaipi ratou ko nga Parihi tetahi wahine i hopukia e puremu ana; a whakaturia ana ki waenganui.

4 Ka mea ratou ki a ia, E te Kai whakaako, i hopukia putia te wahine nei e puremu ana.

5 A i whakahau a Mohi ki a matou i roto i te ture, kia akina nga penei ki te kohatu: tena koa tau ki?

6 I penei ai ratou he whakamatautau mona, kia whai take ai ratou e whakapangia ai he hē ki a ia. Ka piko a Ihu, a tuhituhi ana tona ringa ki te whenua.

7 A ka tohe tonu ratou ki te ui ki a ia, ka whakatika ake ia, ka mea ki a ratou, Te tangata o koutou kahore ona hara, māna te kohatu mātāhua e aki ki a ia.

8 Na ka piko ano ia, ka tuhituhi ki te whenua.

9 A, to ratou rongonga ai, ka ngau o ratou hē i roto i o ratou ngakau, ka haere takitahi atu ki waho, na nga kaumatua i timata, a poto noa o muri rawa: a ko Ihu anake i mahue, me te wahine hoki e tu ana i waenganui.

10 A, te marangatanga ake o Ihu, kahore ana tangata i kite ai, ko te wahine anake, na ka mea ia ki a ia, E tai, kei hea aua kai whakapa hē ou? kahore ano ranei tetahi kia whakatau noa i te hē ki a koe?

11 Ano ra ko tera, Kahore,

e te Ariki. Ka mea a Ihu ki a ia, Kahore ano hoki ahau e whakatau i te hē ki a koe: haere, kāti te hara.

12 ¶ I ki atu ano a Ihu ki a ratou, i mea, Ko ahau te whakamarama o te ao: ki te aru tetahi i a au, e kore ia e haere i te pouri, engari ka whiwhi ki te māramatanga o te ora.

13 Na ka mea nga Parihi ki a ia, Ko koe ano tou kai whakaatu; ehara tau i te whakaaturanga pono.

14 Ka whakahokia e Ihu, a ka mea ki a ratou, Ahakoa ko ahau ano toku kai whakaatu, e pono ana taku whakaaturanga: no te mea e mātāua ana ahau ki te wahi i haere mai ai ahau, ki te wahi hoki e haere atu nei ahau; ko koutou ia, kahore e mātāua ki te wahi i haere mai ai ahau, ki te wahi ano e haere atu nei ahau.

15 Na te kikokiko ta koutou tikanga whakawa; e kore ahau e whakawa i tetahi.

16 A ki te whakawa ahau, e tika ana taku whakawa; ehara hoki i te mea ko ahau anake, engari ko maua ko te Matua nāna nei ahau i tono mai.

17 Kua oti ano hoki te tuhituhi i roto i to koutou ture, E pono ana te whakaaturanga a nga tangata tokorua.

18 Ko ahau hei kai whakaatu moku, a hei kai whakaatu ano moku te Matua nāna nei ahau i tono mai.

19 Na ka mea ratou ki a ia, Kei hea tou Matua? Ka

HOANI 8.

whakahokia e Ihu, Kahore koutou e mātau ki a au, kahore ano ki toku Matua: me i mātau koutou ki a au, kua mātau ano ki toku Matua.

20 I korerotia enei kupu e Ihu i te whare takotoranga taonga, i a ia e whakaako ana i roto i te temepara: a kahore tetahi i hopu i a ia; kiano hoki tona haora i taka noa.

21 ¶ Me i reira ka ki atu ano a Ihu ki a ratou, E haere atu ana ahau, a tera koutou e rapu i a au, e mate ano hoki i roto i to koutou hara: e kore koutou e ahei te haere ake ki te wahi e haere ai ahau.

22 Na ka mea nga Hurai, E whakamate oti ia i a ia ano? ina ia ka mea, E kore koutou e ahei te haere ake ki te wahi e haere ai ahau.

23 Ano ra ko ia ki a ratou, No raro nei koutou; no runga ahau: no tenei ao koutou; ehara ahau i tenei ao.

24 Koia ahau i mea ai ki a koutou, E mate koutou i roto i o koutou hara: ki te kore hoki koutou e whakapono ko ahau ia, e mate koutou i roto i o koutou hara.

25 Katahi ratou ka mea ki a ia, Ko wai koe? Na ka mea a Ihu ki a ratou, Ko taku ano i korero ai ki a koutou i te timatanga.

26 He maha aku mea mo koutou e korero ai, e whakawa ai: otira e pono ana toku kai tono mai; a e korerotia ana e ahau ki te ao nga mea i rongo ai ahau ki a ia.

27 Kihai ratou i mātau ko te Matua tana i korero ai ki a ratou.

28 Katahi a Ihu ka mea ki a ratou, Kia oti te Tama a te tangata te whakairi e koutou, ko reira koutou mātau ai ko ahau ia, a e kore e meatia tetahi mea e ahau ake; engari ko a toku Matua i whakaako mai ai ki a au, ko enei aku e korero nei.

29 Kei a au nei ano toku kai tono mai: kihai ahau i waiho e te Matua ko ahau anake; no te mea e mahi tonu ana ahau i nga mea e paingia ana e ia.

30 I a ia ano e korero ana i enei mea, he tokomaha i whakapono ki a ia.

31 ¶ Me i reira ka mea a Ihu ki nga Hurai i whakapono ki a ia, Ki te mau tonu koutou ki taku kupu, he tino akonga koutou naku;

32 A e mātau koutou ki te pono, ma te pono ano koutou ka rangatira ai.

33 Ka whakahokia e ratou ki a ia, He whanau matou na Aperahama, kahore matou i waiho noa hei pononga ma tetahi tangata: he aha tau e mea, Ka whakarangatiratia koutou?

34 Ka whakahokia e Ihu ki a ratou, He pono, he pono taku e mea nei ki a koutou, He pononga na te hara nga kai mahi katoa i te hara.

35 E kore te pononga e noho tonu i te whare: ko te Tama ia, e noho tonu ana.

36 Na, i te mea ka whakarangatiratia koutou e te

HOANI 8.

Tama, he tino rangatira koutou.

37 E mātau ana ano ahau, he whanau koutou na Aperahama; heoi e whai ana koutou kia whakamatea ahau, he kore hoki no taku kupu e mau i roto i a koutou.

38 E korerotia ana e ahau taku i kite ai ki toku Matua: a e mahi ana koutou i ta koutou i kite ai ki to koutou matua.

39 Ka whakahokia e ratou, ka mea ki a ia, Ko Aperahama to matou matua. Ka mea a Ihu ki a ratou, Me he tamariiki koutou na Aperahama, kua mahia e koutou nga mahi a Aperahama.

40 Tena ko tenei e whai ana koutou kia whakamatea ahau, te tangata i korero i te pono ki a koutou, taku hoki i rongo ai ki te Atua: kihai a Aperahama i pena.

41 E mahi ana koutou i nga mahi a to koutou matua. Katahi ratou ka mea ki a ia, Kihai matou i whanau poriro mai; kotahi to matou Matua, ko te Atua.

42 Ka mea ano a Ihu ki a ratou, Me he mea ko te Atua to koutou Matua, kua aroha koutou ki a au: i haere mai hoki ahau i te Atua, a kua tae mai nei; kihai hoki ahau i haere noa mai, engari nana ahau i tono mai.

43 He aha ra koutou tē mātau ai ki taku korero? no te mea e kore koutou e ahei te whakarongo ki taku kupu.

44 Na to koutou matua koutou, na te rewera, a e pai ana

kia mea i ta to koutou matua i hiahia ai. He kai kohuru ia no te timatanga, a kihai i mau ki te pono, no te mea kahore he pono i roto i a ia. I te mea ka korero teka ia, e korerotia ana e ia āna: he korero teka hoki tana, ko te matua hoki ia o tena mea.

45 I taku korerotanga i te pono, kahore koutou e whakapono ki a au.

46 Ko wai o koutou hei whakaatu he hara toku? Ki te pono taku korero, he aha koutou tē whakapono ai ki a au?

47 E whakarongo ana te tangata a te Atua ki nga korero a te Atua: koia koutou tē whakarongo ai, no te mea ehara koutou i te Atua.

48 Na ka whakahokia e nga Hurai, ka mea ki a ia, Kahore koia i tika ta matou i mea ra, No Hamaria koe, a he rewera tou?

49 Ka whakahokia e Ihu, Kahore oku rewera; engari e whakahonore ana ahau i toku Matua, ko koutou ia te whakakahore ana i te honore moku.

50 Kahore aku whai i te kororia moku: tera ano te kai whai, te kai whakatika-tika.

51 He pono, he pono taku e mea nei ki a koutou, Ki te pupuri tetahi i taku kupu, e kore ia e kite i te mate, ake ake.

52 Ka mea ano nga Hurai ki a ia, Katahi matou ka mohio he rewera tou. Kua mate a Aperahamaratou ko nga poro-

HOANI 8, 9.

piti; a e mea ana koe, Ki te pupuri tetahi i taku kupu, e kore ia e pangia e te mate, ake ake.

53 He nui oti koe i to matou matua, i a Aperahama kua mate nei? kua mate ano nga poropiti: ki tau ko wai koe?

54 Ka whakahokia e Ihu, Ki te whakahonore ahau i a au ano, he honore noa toku: ko toku Matua hei whakahonore i a au; ko ta koutou e mea nei, Ko ia to koutou Atua:

55 Heoi kahore koutou i mātau ki a ia; ko ahau ia e mātau ana ki a ia: a ki te mea ahau, Kahore ahau e mātau ki a ia, he tangata teka ahau, he pena ano me koutou: otira e mātau ana ahau ki a ia, a e pupuri ana i tana kupu.

56 I hari to koutou matua, a Aperahama, mona ka kite i toku ra: i kite ia, a koa ake.

57 Katahi ka mea nga Hurai ki a ia, Kahore ano i rima tekau noa ou tau, a kua kite koe i a Aperahama?

58 Ka mea a Ihu ki a ratou, He pono, he pono taku e mea nei ki a koutou, Kahore ano a Aperahama kia whanau noa, ko ahau tenei.

59 Na ka mau ratou ki etahi kohatu hei epa ki a ia: heoi huna ana a Ihu i a ia, puta mai ana i roto i te temepara na waenganui o ratou, a tika tonu atu.

UPOKO 9.

Te matapo, 8 Kei nga Parihi.

35 *Kei a Ihu.* 39 *Ta Ihu.*

NA, i a Ihu e haere ana, ka kite ia i tetahi i matapo,

no tona whanautanga mai ano.

2 Na ka ui ana akonga ki a ia, ka mea, E te Kai whakako, ko wai i hara, ko tenei, ko ona mātua ranei, i whanau matapo ai ia?

3 Ka whakahokia e Ihu, Ehara i te mea ko tenei kua hara, ko ona mātua ranei: engari kia ai ia hei whakakitenga mo nga mahi a te Atua.

4 Me mahi e ahau nga mahi a toku kai tono mai i te mea e ao ana: meake ko te po e kore ai e taea te mahi e tetahi tangata.

5 I te mea ke i te ao nei ahau, ko ahau te maramatanga o te ao.

6 Ka mutu enei korero ana, ka tuwha ia ki te whenua, a pokepokea ana tetahi paru ki te huware, pania ana te paru ki nga kanohi o te matapo,

7 Na ka mea ki a ia, Haere ki te horoi ki te kaukauranga i Hiroama, (ko Tono te whakamaoritanga.) Na haere ana ia, horoi ana, a hoki titiro mai ana.

8 Me i reira ka mea nga tāngata e noho tata ana, ratou ko nga tāngata i kite i tona matapotanga i mua, Ehara ianei tenei i taua tangata i noho ra, i tono *mea māna*?

9 Ka mea etahi, Ko ia tenei: ko etahi i mea, Me ia ano te ahua: ka mea ia, Ko ahau ra ia.

10 Katahi ratou ka mea ki a ia, Na te aha ra i kite ai ou kanohi?

HOANI 9.

11 Ka whakahokia e ia, a ka mea, Na tetahi tangata, ko Ihu te ingoa, i pokepoke paru, a pania ana e ia ki oku kanohi; i mea ano ia ki a au, Hae-re ki Hiroama horoi ai: na, toku haerenga atu, toku ho-roinga, kite ana ahau.

12 Na ka mea ratou ki a ia, Kei hea ia? Ka mea ia, E kore ahau e mohio.

13 ¶ Ka kawea atu ki nga Parihi taua tangata i matapo i mua ra.

14 A no te hapati i pokepo-kea ai e Ihu te paru, i meinga ai ona kanohi kia kite.

15 Na ka ui ano nga Parihi ki a ia, ki te pehea i kite ai ia. Ka mea ia ki a ratou, I pania e ia he paru ki oku kanohi, na horoi ana ahau, kite ana.

16 Na ka mea etahi o nga Parihi, Ehara tenei i te tangata na te Atua, ina hoki tē whakarite ia i te hapati. Ka mea etahi, Ma te aha e taea ai enei merekara e te tangata hara? Na ka wehewehea ratou.

17 Ka mea ano ratou ki te matapo, E pehea ana koe ki a ia, ki tana meatanga i ou kanohi kia kite? Ka mea ia, He poropiti ia.

18 Heoi kahore nga Hurai i whakapono i matapo taua tangata, a kua meinga kia kite, karangatia noatia e ratou nga mātua ona i meinga nei kia kite.

19 Na ka ui ratou ki a raua, ka mea, Ko ta korua tama tenei, e mea nei korua i whanau matapo mai? na te aha ra ia i titiro ai inaianei?

20 Ka whakahokia ki a ratou e ona mātua, ka mea, E mohio ana ano maua, ko ta maua tama tenei, a i whanau matapo mai ano:

21 Ko te mea ia i kite ai ia inaianei, kahore i mohiotia e maua; kahore ano hoki maua e mohio na wai i mea ona kanohi kia kite: he kaumatua ia; ui atu ki a ia: māna ia e korero.

22 I penei ona mātua, no te mea i matakau raua i nga Hurai: kua takoto noa ake hoki ta nga Hurai tikanga, na, ki te whakaae tetahi, ko te Karaiti ia, me pei ki waho o te whare karakia.

23 Koia ona mātua i mea ai, He kaumatua ia; ui atu ki a ia.

24 Na ka karangatia ano e ratou te tangata i matapo i mua ra, a ka mea ki a ia, Hoatu he kororia ki te Atua; e mātau ana matou he tangata hara tenei.

25 Na ka whakahokia e ia. a ka mea, Kahore ahau e mātau he tangata hara ranei ia: kotahi ano taku e mātau nei, i matapo ahau i mua, a kua kite tenei.

26 Ka mea ano ratou ki a ia, I aha ia ki a koe? I peheatia ou kanohi, i meinga ai e ia kia kite?

27 Ka whakahokia e ia ki a ratou, Kua korerotia noatia ake e ahau ki a koutou, a kihai koutou i whakarongo: he aha ka hiahia ai koutou kia rongo ano? e mea ana oti koutou kia meinga hei akonga māna?

28 Na whakahi ana ratou ki a ia, ka mea, Ko koe tana akonga; ko matou ia he akonga na Mohi.

29 E mātau ana matou i korero te Atua ki a Mohi: ko tenei tangata ia, kahore matou e mātau ki tona wahi i haere mai ai.

30 Na, ko te whakahokinga a taua tangata, ka mea ki a ratou, Ha! he mea whakamiharo ra tenei, kahore koutou i mātau ki tona wahi i haere mai ai, heoi kua meinga e ia oku kanohi kia kite.

31 E mātau ana ra tatou, e kore te Atua e whakarongo ki nga tangata hara: tena ki te karakia tetahi ki te Atua, a ka mea i tana e pai ai, ka rongo ki a ia.

32 Kahore rawa i rangona no te timatanga ra ano o te ao, i whakatirohia e tetahi nga kanohi o te tangata i whanau matapo mai.

33 Me he mea kihai i puta mai tenei tangata i te Atua, e kore e taea e ia tetahi mea.

34 Na ka whakahokia e ratou, ka mea ki a ia, I whanau pu koe i roto i nga hara, a ko koe hei whakaako i a matou? Na peia ana ia e ratou ki waho.

35 ¶ I rongo a Ihu kua oti ia te pei e ratou ki waho; a, tona kitenga i a ia, ka mea ki a ia, E whakapono ana ranei koe ki te Tama a te Atua?

36 Ka whakahokia e ia, a ka mea, Ko wai ia, e te Ariki, kia whakapono ai ahau ki a ia?

37 Ka mea a Ihu ki a ia, Kua

kite koe i a ia, ko ia hoki tenei e korero nei ki a koe.

38 Na, ko tana meatanga mai, E te Ariki, e whakapono ana ahau. Na koropiko ana ia ki a ia.

39 Katahi a Ihu ka mea, I haere mai ahau ki tenei ao ki te whakarite whakawa, he mea e kite ai te hunga kahore nei i kite; e whakamatapotia ai hoki te hunga e kite ana.

40 A, ka rangona enei mea e etahi o nga Parihi e tu tahi ana me ia, ka mea ratou ki a ia, E matapo ana ano ranei matou?

41 Ka mea a Ihu ki a ratou, Me i matapo koutou, kahore o koutou hara: tena ka mea na koutou, E kite ana matou; na, e mau na to koutou hara.

UPOKO 10.

Te tatau. Heparapai. 19 Ta ratou mona. 22 Ana mahi hei toku mona. 40 Kei Horano.

HE pono, he pono taku e mea nei ki a koutou, Ki te kahore tetahi e tomo ra te kuwaha ki te kāinga hipi, a ka piki ke, he tahae ia, he tangata pahua.

2 Tena ko te tangata e tomo ana ra te kuwaha, ko te hepara ia o nga hipi.

3 Ka uaki te kai tiaki tatau ki a ia; a ka rongo nga hipi ki tona reo: na ka karangatia e ia ana hipi ake, to tenei ingoa, to tenei ingoa, a ka arahina ki waho.

4 A ka oti ana ake hipi te tuku ki waho, ka haere ia ki mua i a ratou, a ka aru nga

HOANI 10.

hipi i a ia : e mātau ana hoki ratou ki tona reo.

5 E kore ia ratou e aru i te tauhou, engari ka oma i a ia : e kore hoki e mātau ki te reo o nga tauhou.

6 I korerotia tenei kupu whakarite e Ihu ki a ratou : heoi kihai ratou i mohio ki nga mea i korerotia e ia ki a ratou.

7 ¶ Na ka mea ano a Ihu ki a ratou, He pono, he pono taku e mea nei ki a koutou, Ko ahau te tatau o nga hipi.

8 He tahae, he kai pahua te hunga katoa i haere mai i mua i a au : heoi kihai nga hipi i whakarongo ki a ratou.

9 Ko ahau te tatau : ki te waiho ahau hei huarahi tomokanga mo tetahi, e ora ia, a ka haere ki roto, ka haere ki waho, ka kite hoki i te kai.

10 Heoi ano ta te tahae e haere mai ai, he tahae, he patu, he whakamōti hoki : i haere mai ahau kia whiwhi ai ratou ki te ora, ina, tona nui noa atu.

11 Ko ahau te hepara pai : he hepara pai, ka tuku i a ia ano kia mate mo nga hipi.

12 Tena ko te tangata e utua ana, ehara nei i te hepara, ehara nei i a ia nga hipi, tona kitenga i te wuruhi e haere mai ana, whakarerea ake e ia nga hipi, oma ana : na ka hopukia ratou e te wuruhi, a whakamararatia ana nga hipi.

13 Ka oma te tangata e utua ana, no te mea e utua ana ia,

a kahore ana whakaaro ki nga hipi.

14 Ko ahau te hepara pai, e mātau ana hoki ki aku, a e matauria ana ahau e aku,

15 Pera tonu me to te Matua matauranga ki a au, me toku matauranga hoki ki te Matua : e tuku ana hoki ahau i a au ki te mate mo nga hipi.

16 He hipi atu ano aku, ehara nei i tenei kāinga : me arahi mai ratou e ahau, a ka rongo ratou ki toku reo ; a e whakakotahitia te kahui, kotahi ano hoki hepara.

17 Koia te Matua ka aroha mai ai ki a au, no te mea e tuku ana ahau i a au kia mate, kia whakaora ake ai ano ahau i a au.

18 Ehara i te mea ma tetahi tangata ahau e whakamate, engari maku ano ahau e tuku ki te mate. Kei a au te tikanga mo te tuku atu, kei a au ano te tikanga mo te whakaora. Na toku Matua tenei ture kua riro mai nei i a au.

19 ¶ Katahi ka wehewehea nga Hurai, na enei kupu hoki.

20 He tokomaha o ratou i mea, He rewera tona, e haurangi ana ; he aha koutou ka whakarongo ai ki a ia ?

21 Ko etahi i mea, Ehara enei i nga kupu a te tangata e nohoia ana e te rewera. E ahei koia i te rewera te mea i nga kanohi o nga matapo kia kite ?

22 ¶ A i Hiruharama ano tenei, i te hākari horohoronga, i te mea ko te hotoke.

23 E haereere ana a Ihu i te

HOANI 10.

temepara i te whakamahau o Horomona.

24 Na ka karapotia ia e nga Hurai, a ka mea ratou ki a ia, Kia pehea te roa o tau mahi whakaruarua i o matou ngakau? Ki te mea ko te Karaiti koe, korerotia matanuitia mai ki a matou.

25 Ka whakahoki a Ihu ki a ratou, Kua korerotia e ahau ki a koutou, a kahore koutou e whakapono: ko nga mahi e mahi nei ahau i runga i te ingoa o toku Matua, ko enei hei kai whakaatu moku.

26 Otira e kore koutou e whakapono, no te mea ehara koutou i te hipi naku, ko taku hoki ia i mea ai ki a koutou.

27 E rongo ana aku hipi ki toku reo, a e mātau ana ahau ki a ratou, e aru ana hoki ratou i a au:

28 A e hoatu ana e ahau ki a ratou he oranga tonutanga; e kore ano ratou e ngaro ake ake, e kore ano tetahi e tango i a ratou i roto i toku ringa.

29 Nui atu i te katoa toku Matua, nana nei ratou i homai ki a au; e kore ano ratou e taea e tetahi te tango i roto i te ringa o toku Matua.

30 Ko ahau, ko te Matua, kotahi maua.

31 Katahi ka mau ano nga Hurai ki te kohatu hei aki ki a ia.

32 Ka whakahokia e Ihu ki a ratou, He maha nga mahi pai kua whakakitea nei e ahau ki a koutou, he mea na toku Matua; mo tehea o aua mahi ka akina ai ahau e koutou?

33 Ka whakahokia e nga

Hurai ki a ia, ka mea, Ehara te mahi pai i te mea e akina ai koe; engari mo te kohukohu; mo te mea hoki ko koe, tangata nei ano, e whakaatua na i a koe.

34 Ka whakahokia e Ihu ki a ratou, Kahore ranei i tuhi-tuhia i roto i ta koutou ture, I mea ahau, He atua koutou?

35 Ki te huaina e ia he atua te hunga i tae nei te kupu a te Atua ki a ratou, a e kore e taea te whakakahore te kairapiture;

36 E mea ana oti koutou ki ta te Matua i whakatapu ai, i tono mai ai hoki ki te ao, E kohukohu ana koe; noku i mea, Ko te Tama ahau a te Atua?

37 Ki te kore ahau e mahi i nga mahi a toku Matua, aua ahau e whakaponohia.

38 Tena ki te mahi ahau, ahakoa kahore koutou e whakapono ki a au, whakaponohia nga mahi: kia mātau ai koutou, kia whakapono ai, ko te Matua kei roto i a au, me ahau hoki kei roto i a ia.

39 Na ka whai ano ratou kia hopukia ia: heoi puta atu ana ia i o ratou ringa;

40 ¶ Na ka haere ano ia ki tera taha o Horano, ki te wahi i mātua iriiri ai a Hoani; a noho ana i reira.

41 A he tokomaha i haere ki a ia; i mea ratou, Kihai a Hoani i mahi i tetahi merekara: he pono ia nga mea katoa i korerotia e Hoani mo tenei.

42 A he tokomaha o reira i whakapono ki a ia.

HOANI 11.

UPOKO 11.

Ko Raharuhi. 47 Ta Kaiapa ma mona. 49 poropititanga mona. 54 Rapu kau ana.

NA, kei te mate tetahi tangata, a Raharuhi o Petani, kainga o Meri raua ko tona tuakana, ko Māta.

2 (Ko taua Meri ia nāna nei i whakawahi te Ariki ki te hinu, i muru hoki i ona wae-wae ki ona makawe; he tungane nona a Raharuhi i mate nei.)

3 Na ka tono tangata nga tuāhine ki a ia, ka mea, E te Ariki, tenei kei te mate tau tangata e aroha nei.

4 Te rongonga o Ihu, ka mea ia, Ehara tenei i te mate e mate rawa ai ia, engari hei mea mo te kororia o te Atua; ma tenei hoki ka whai kororia ai te Tama a te Atua.

5 Na i aroha a Ihu ki a Māta, raua ko tona teina, ki a Raharuhi hoki.

6 Ano ka rongo ia ki tona matenga, e rua ona ra i noho ai ki taua wahi ra ano.

7 Muri iho i tenei ka mea ia ki ana akonga, Tatou ka haere ano ki Huria.

8 Ka mea nga akonga ki a ia, E te Kai whakaako, i whai nga Hurai i mua tata ake nei kia akina koe ki te kohatu; a e haere atu ano koe ki reira?

9 Ka whakahokia e Ihu, He teka ianei tekau ma rua nga haora o te ra? Ki te haere tetahi i te awatea, e kore ia e tūtuki, no te mea e kite ana

ia i te māramatanga o tenei ao.

10 Tena ka haere tetahi i te po, ka tūtuki ia, no te mea kahore he whakamarama i roto i a ia.

11 Ka korerotia enei mea e ia: na, muri iho ka mea ia ki a ratou, Kei te moe to tatou hoa a Raharuhi; otiia ka haere ahau ki te whakaara i a ia i te moe.

12 Na, ko te meatanga a ana akonga, E te Ariki, me he mea kei te moe ia, e ora.

13 Kaore ko tona matenga ta Ihu i korero ai: ko ratou ia i mea, mo te takotoranga ina moe tana korero.

14 Katahi, ka mea nui a Ihu ki a ratou, Kua mate a Raharuhi.

15 A e hari ana ahau, he whakaaro hoki ki a koutou, no te mea kahore ahau i reira, kia whakapono ai koutou; ahakoa ra kia haere tatou ki a ia.

16 Na ka mea a Tamati, e karangatia nei ko Ririmu, ki ona hoa akonga, Kia haere ano tatou, kia mate tahi me ia.

17 ¶ Na, te taenga atu o Ihu, rokohanga atu e wha ona ra i roto i te urupa.

18 Na e tata ana Petani ki Hiruharama, kotahi peatekau ma rima paronga:

19 A he tokomaha nga Hurai i tae mai ki a Māta raua ko Meri, ki te whakamarie i a raua mo to raua tungane.

20 A, te rongonga o Māta, tena a Ihu te haere mai na, ka whakatau i a ia: ko Meri ia i noho i roto i te whare.

HOANI 11.

21 Na ka mea a Māta ki a Ihu, E te Ariki, me i konei koe, kihai i mate toku tungane.

22 Heoi e mātau nei ano ahau, ko tau e inoi ai ki te Atua, e homai e te Atua ki a koe.

23 Ka mea a Ihu ki a ia, E ara ano tou tungane.

24 Ka mea a Māta ki a ia, Ka mātau ahau e ara ano ia i te aranga a te ra whakamutunga.

25 Ka mea a Ihu ki a ia, Ko ahau te aranga me te ora : ko ia e whakapono ana ki a au, ahakoa kua mate, e ora ano :

26 E kore ano e mate ake ake nga tāngata katoa e ora ana, a e whakapono ana ki a au. E whakapono ana ranei koe ki tenei ?

27 Ka mea ia ki a ia, Ae, e te Ariki : e whakapono ana ahau, ko te Karaiti koe, ko te Tama a te Atua, e haere mai ana ki te ao.

28 A, ka mutu enei korero ana, ka haere, ka karanga puku i tona teina, i a Meri, ka mea, Kua tae mai te Kai whakaako, a e karanga ana ki a koe.

29 Ano ka rongo ia, hohoro tonu te whakatika a haere mai ana ki a ia.

30 Na, kahore a Ihu i tomo noa ki te kāinga ; heoi kei taua wahi ano ia i tutaki ai a Māta ki a ia.

31 A, te kitenga o nga Hurai e noho ana ki a ia i roto i te whare, e whakamarie ana i a ia, ka hohoro a Meri te whakatika, te puta ki waho, ka

aru ratou i a ia, ka mea, E haere ana ia ki te urupa, ki reira tangi ai.

32 Ano ka tae a Meri ki te wahi kei reira nei a Ihu, a ka kite i a ia, ka takoto ki ona waewae, ka mea ki a ia, E te Ariki, me i konei koe, kihai i mate toku tungane.

33 Ano ka kite a Ihu i a ia e tangi ana, me nga Hurai i haere tahi mai me ia e tangi ana, ka ngunguru ia, ara, tona wairua, ka koingo,

34 A ka mea, I whakatakorua ia e koutou ki hea ? Ka mea ratou ki a ia, E te Ariki, haere mai kia kite.

35 Tangi ana a Ihu.

36 Na ka mea nga Hurai, Nana, tona aroha ki a ia !

37 Na ka mea etahi o ratou, He kai whakatitiro tenei i nga kanohi o te matapo, a kahore ranei i taea e ia te mea i tenei tangata kia kaua e mate ?

38 Na ka ngunguru ano a Ihu i roto i a ia, ka haere ki te urupa. He ana ia, kua oti te pa ki te kohatu.

39 Ka mea a Ihu, Tangohia te kohatu. Ka mea ki a ia a Māta, tuahine o te tupāpaku, E te Ariki, kua piro noa ake ia : ko te po wha hoki tenei.

40 Ano ra ko Ihu ki a ia, Kihai koia ahau i mea ki a koe, Ki te whakapono koe, e kite koe i te kororia o te Atua ?

41 Na ka tangohia e ratou te kohatu i te wahi i takoto ai te tupāpaku. Na ka ara ake nga kanohi o Ihu, ka mea ia, E Pa, ko taku whakawhe-

tai tenei ki a koe, mou i whakarongo ki a au.

42 I mahara ano ahau e rongongo tonu ana koe ki a au: heoi he whakaaro ki te hunga e tu mai nei i korero ai ahau, kia whakapono ai ratou, nau ahau i tono mai.

43 Ano ka penei tana ki atu, he nui tona reo ki te karanga, E Raharuhi, puta mai.

44 Na, ko te putanga mai o te tupāpaku, he mea here nga ringa me nga waewae ki nga takai: he mea takai tona mata ki te tauera. Ka mea a Ihu ki a ratou, Wetekia, tukua kia haere.

45 ¶ Na, he tokomaha nga Hurai i haere mai nei ki a Meri, a, to ratou kitenga i nga mea i mea ai a Ihu, ka whakapono ki a ia.

46 Ko etahi o ratou i haere ki nga Parihi, i korero ki a ratou i nga mea i mea ai a Ihu.

47 ¶ Na ka whakaminea he runanga e nga tohunga nui ratou ko nga Parihi, a ka mea, Kei te aha tatou nei? he maha hoki nga merekara e meatia nei e tenei tangata.

48 Ki te penei ta tatou tuku i a ia, ka whakapono katoa ki a ia: a ka haere mai nga Roma, ka tango i to tatou kāinga, i to tatou iwi.

49 Na, ko tetahi o ratou, ko Kaiapa, ko te tohunga nui o ia tau, ka mea ki a ratou, kahore koutou e mātau ki tetahi mea,

50 Tē whakaaro, he pai mo tatou ki te mate te tangata kotahi mo te iwi, a kahore e ngaro te iwi katoa.

51 Na, ehara tenei korero i te mea nāna ake: engari ko te tohunga nui ia mo tera tau, a ka poropiti, kia mate a Ihu mo taua iwi;

52 A hāunga taua iwi anake, engari kia whakaminea kia kotahi nga tamariki a te Atua kua marara noa atu.

53 No taua ra ake ano ka runanga ratou kia whakamatea ia.

54 ¶ Koia i mutu ai te haere matanui o Ihu i roto i nga Hurai. Heoi haere atu ana ia i reira ki te wahi e tata ana ki te koraha, ki tetahi pa, ko Eperaima te ingoa, a noho ana i reira ratou ko ana akonga.

55 ¶ Na kua tata te kapenga a nga Hurai: a he tokomaha i haere atu i taua whenua i mua o te kapenga ki Hiruharama, ki te pure i a ratou.

56 Na ka rapu ratou i a Ihu, a ka kororerero ki a ratou ano, i a ratou e tu ana i te temepara, E pehea ana a koutou whakaaro? e kore ranei ia e haere mai ki te hākari?

57 Na kua takoto te tikanga a nga tohunga nui ratou ko nga Parihi, ki te mātau tetahi tangata ki te wahi e noho ai ia, me whakaatu, kia hopukia ai ia e ratou.

UPOKO 12.

Ta Meri whakawahinga. 12 Haere nui ana a Ihu ki Hiruharama. 20 Nga Kariki. 37 Pakeke tonu nga Hurai. 44 Ta Ihu ki a ratou.

HOANI 12.

NA, e ono nga ra i mua ake o te kapenga, ka haere a Ihu ki Petani, kei reira nei a Raharuhi i mate ra, i whakaarahia ake nei e ia i te hunga mate.

2 A taka ana e ratou he hapa māna ki reira, ko Māta te kai taka : ko Raharuhi tetahi o te hunga i noho tahi me ia.

3 Na ka mau a Meri ki tetahi pauna hinu kakara, he tino nara, he mea utu nui, a whakawahia ana e ia nga waewae o Ihu, me te muru ano i ona waewae ki ona makawe; ki noa te whare i te kakara o te hinu.

4 Na ka mea tetahi o ana akonga, a Hura Ikariote, *tama* a Haimona, tenei meāke nei tuku i a ia,

5 He aha tenei hinu tē hokoa ai ki nga pene e toru rau, ka hoatu ai ki te hunga rawakore?

6 I korerotia ai tenei e ia, ehara i te mea he whakaaro nona ki te hunga rawakore; erangi no te mea he tahae ia, i a ia hoki te putea, ko ia hoki hei mau i nga mea i whaongia *ki roto*.

7 Na, ko te meatanga a Ihu, Waiho ra u ana : i tohungia tenei e ia mo te ra o toku tanumanga.

8 Kei a koutou hoki nga rawakore i nga wa katoa; ko au ia e kore e noho tonu ki a koutou.

9 ¶ He tokomaha o nga Hurai i mātau, kei reira a Ihu : a haere mai ana, ehara i te mea mo Ihu anake, erangi kia kite hoki i a Raharuhi, i

whakaarahia e ia i te hunga mate.

10 Otira kua takoto te whakaaro a nga tohunga nui kia whakamatea ano a Raharuhi;

11 Nana hoki i tokomaha ai nga Hurai i haere, i whakaponono ki a Ihu.

12 ¶ I te aonga ake ka rongo te mano tini i haere mai nei ki te hākari, e haere mai ana a Ihu ki Hiruharama,

13 Ka mau ratou ki nga manga nikau, haere ana ki te whakatau i a ia, me te karanga, Ohana: ka whakapai-ngia te Kingi o Ihairaira e haere mai ana i runga i te ingoa o te Ariki.

14 Ano ka kite a Ihu i tetahi kuao kaihe, ka noho ia i runga; ka pera ano me te mea i tuhituhia,

15 Kaua e matakū, e te tamahine o Hiona: na, kei te haere mai tou Kingi, e noho ana i runga i te kuao kaihe.

16 Otiia kihai ana akonga i mātau wawe ki enei mea: engari ka oti a Ihu te whakakororia, katahi ratou ka mahara, kua tuhituhia enei mea mona, a kua meinga ano enei mea ki a ia.

17 I whakaae ano te hunga i tona taha i tana karangatanga i a Raharuhi i roto i te urupa, i tana whakaarahanga hoki i a ia i te hunga mate.

18 Na konei hoki te mano i whakatau ai i a ia, i rongo hoki ratou, kua meinga tenei merekara e ia.

19 Na ka mea nga Parihi ki a ratou ano, Ka kite ranei

HOANI 12.

koutou kahore a koutou wahi? na kua riro te ao ki te whai i a ia.

20 ¶ Na he Kariki etahi o te hunga i haere mai ki te hā-kari, ki te karakia:

21 A haere mai ana enei ki a Piripi o Petahaira o Kariri, a ki ana ki a ia, mea ana, E kara, e hiahia ana matou kia kite i a Ihu.

22 Haere ana a Piripi, korero ana ki a Anaru: na Anaru ano raua ko Piripi i korero ki a Ihu.

23 Ka ki a Ihu ki a raua, ka mea, Kua tae mai te haora e whakakororiatia ai te Tama a te tangata.

24 He pono, he pono taku e mea nei ki a koutou, Ki te kore tetahi pata witi e marere ki te oneone, a e pirau, ka takoto ko ia anake: tena ki te pirau, he nui ona hua.

25 Ki te aroha tetahi ki te ora, ka mate ano ia; a ki te kino tetahi ki te ora i tenei ao, ka tūturu ki a ia te ora ake ake.

26 Ki te mea tetahi ko ia hei kai mahi maku, me aru ahau e ia: a, te wahi e noho ai ahau, ko reira ano taku kai mahi: a ki te mahi tetahi i aku mahi, ma toku Matua ia e whakahonore.

27 Kua pouri tenei toku wai-rua; a kia pehea atu ahau? E Pa, whakaorangia ahau i tenei wa: otiā ko te mea tenei i haere mai ai ahau ki tenei wa.

28 E Pa, whakakororiatia tou ingoa. Na ka puta he reo i te rangi, Kua whaka-

kororiatia e ahau, a e whakakororiatia ano.

29 A, te rongonga o nga tāngata e tu ana i reira, ka mea, He whatitiri: ko etahi i mea, Kua korero tetahi anahera ki a ia.

30 Ka whakahokia e Ihu, ka mea, Ehara tenei reo, i puta mai nei, i te mea moku, engari mo koutou.

31 Ko aianeī te whakawa mo tenei ao: ko aianeī makā ai te rangatira o tenei ao ki waho.

32 A ki te whakairihia ake ahau ki runga i te whenua, maku nga tāngata katoa e kukume ki a au.

33 I penei ia hei whakaatu i te mate e mate ai ia.

34 Ka whakahokia e te mano ki a ia, Kua rongo matou ki ta te ture, e ora tonu ana a te Karaiti: a he aha tau e mea, Me whakairi te Tama a te tangata? Ko wai koia tenei Tama a te tangata?

35 Ano ra ko Ihu ki a ratou, He wahi iti nei te maunga o te māramatanga i roto i a koutou. Haere ra i te mea e whai māramatanga ana koutou, kei rokohina koutou e te pouri: ko ia hoki e haere ana i te pouri, e kore e kite i te wahi e haere ai ia.

36 I te mea kei a koutou te māramatanga, me whakapono ki te māramatanga, kia meinga ai koutou he tamariki na te māramatanga. I korerotia e Ihu enei mea, a haere ana, huna ana i a ia, *kei kitea e ratou.*

37 ¶ Heoi ahakoa i meatia e

ia aua merekara maha ki to ratou aroaro, kihai ratou i whakapono ki a ia:

38 I rite ai te korero a Ihaia poropiti, tana i mea ai, E te Ariki, ko wai i whakapono ki ta matou korero? I whakakitea hoki ki a wai te ringa o te Ariki?

39 Koia hoki ratou tē ahei ai te whakapono, kua mea nei hoki a Ihaia,

40 I whakamatapotia e ia o ratou kanohi, i whakapaketia o ratou ngakau; kei kite nga kanohi, kei mātau hoki te ngakau, kei tahuri ratou, a ka whakaorangia e ahau.

41 I korerotia enei mea e Ihaia, i te wa i kite ai ia i tona kororia, i puaki ai hoki tana kupu mona.

42 He ahakoa ra he tokomaha ano nga rangatira i whakapono ki a ia; otira kihai i whakaae ki a ia, he whakaaro hoki ki nga Parihi, kei peia ratou ki waho o te whare karakia:

43 Ko ta te tangata honore hoki ta ratou i rawe ai, a kapea ake ta te Atua honore.

44 ¶ Na ka karanga a Ihu, ka mea, Ki te whakapono tetahi ki a au, ehara ahau i tana i whakapono ai, engari ko toku kai tono mai.

45 A ko ia e kite ana i a au, e kite ana hoki i toku kai tono mai.

46 Kua tae mai nei ahau hei whakamarama mo te ao, kei noho i te pouri tetahi e whakapono ana ki a au.

47 Na, ki te rongu tetahi ki

aku kupu, a e kore e whakapono, e kore ahau e whakahe i a ia: kihai hoki ahau i haere mai ki te whakahe i te ao, engari ki te whakaora i te ao.

48 Ko ia e whakakahore ana ki a au, a e kore e tango i aku kupu, tena ano te kai whakahe mona; te kupu i korerotia e ahau, ko tena hei whakahe mona a te ra whakamutunga.

49 No te mea ehara i a au ake aku korero; engari na te Matua i tonoa mai ai ahau, nana i tuku mai te ture ki a au, mo taku e korero ai, mo taku e ki ai.

50 A e mahara ana ano ahau he orangea tonutanga tana ture: na, aku e korero nei, rite tonu ki ta te Matua i mea mai ai ki a au taku korero.

UPOKO 13.

Horoinga i nga waewae, me tana ako. 18 Mo Hura.

31 Kia aroha. 36 Ki a Pita.

NA, i mua ake o te hākari o te kapenga, ka mahara a Ihu kua taka tona wa e haere atu ai ia i tenei ao ki te Matua; aroha ana ia ki ona o te ao nei, arohaina ana ratou taea noatia te mutunga.

2 Na, te mutunga o te hapa, kua whakamaharatia noatia ake ano hoki e te reuera te ngakau o Hura Ikariote, *tama* a Haimona, kia tukua ia;

3 A ka mahara a Ihu kua oti nga mea katoa te homai e te Matua ki ona ringa, a i

HOANI 13.

haere mai ia i te Atua, a e hoki atu ana ki te Atua;

4 Ka whakatika ia i te hapa, ka whakarere i ona kakahu; ka mau ki te tauera, ka whiti ki a ia.

5 Me i reira ka ringihia e ia he wai ki te peihana, a ka anga ka horoi i nga waewae o nga akonga, ka muru hoki ki te tauera i whitikiria ai ia.

6 A, tona haerenga ki a Haimona Pita; ka mea tera ki a ia, E te Ariki, e horoi ana koe i oku waewae?

7 Ka whakahokia e Ihu, ka mea ki a ia, E kore koe e mātau aianeī ki taku e mea nei: otira e mātau koe a mua ake nei.

8 Ka mea a Pita ki a ia, E kore rawa koe e horoi i oku waewae. Ka whakahokia e Ihu ki a ia, Ki te kore ahau e horoi i a koe, kahore āu wahi i roto i a au.

9 Ka mea a Haimona Pita ki a ia, E te Ariki, aua ra ko oku waewae anake, engari ko oku ringa me toku mātenga.

10 Ka mea a Ihu ki a ia, Ki te mea i te horoi tetahi, kahore atu he aha mona, ko te horoi anake i ona waewae, e ma katoa ana hoki ia: a e ma ana ano koutou; he teka ia te katoa.

11 I mohio hoki ia ki te tangata e tukua ai ia; koia ia i mea ai, Kahore koutou katoa i ma.

12 ¶ A ka oti o ratou wae-wae te horoi, a ka mau ia ki ona kakahu, ka noho ano, na ka mea ki a ratou, E mātau

ana ranei koutou ki taku i mea nei ki a koutou?

13 E karangatia ana ahau e koutou, E te Kai whakaako, E te Ariki: a e tika ana ano ta koutou korero; ko ahau hoki ia.

14 Na kua horoia nei o koutou waewae e ahau, e to koutou Ariki, e to koutou Kai whakaako; me horoi ano hoki e koutou nga waewae o tetahi, o tetahi.

15 Kua hoatu nei hoki e ahau he tauira mo koutou, kia rite ai ta koutou mahi ki taku i mea nei ki a koutou.

16 He pono, he pono taku e mea nei ki a koutou, Kahore te pononga i nui ake i tona rangatira; e kore ano te tangata i tonoa e nui atu i tona kai tono.

17 Ki te mātau koutou ki enei mea, ka koa ki te meatia e koutou.

18 Ehara taku i te korero mo koutou katoa: e mātau ana ahau ki aku i whiriwhiri ai: otira kia rite ai te karai-piture, Ko ia e kai taro tahi nei maua, kua hiki ake tona rekereke ki a au.

19 Na ka korerotia nei e ahau ki a koutou i te mea kahore ano i puta noa, mo te puta rawa mai, kia whaka-pono ai koutou, ko ahau ia.

20 He pono, he pono taku e mea atu nei ki a koutou, Ki te tango tetahi i taku e tono ai, e tango ana ia i a au; a ki te tango tetahi i a au, e tango ana i toku kai tono mai.

21 ¶ Ano ka korerotia e Ihu

HOANI 13.

enei mea, ka pouri tona wai-
rua, a ka korero ia, ka mea,
He pono, he pono taku e mea
nei ki a koutou, ma tetahi o
koutou ahau e tuku.

22 Na ka titiro nga akonga
tetahi ki tetahi, ka pohehe,
ko wai ranei tana i korero ai.

23 Na, i te whakawhirinaki
ki te uma o Ihu tetahi o ana
akonga, ta Ihu hoki i aroha
ai.

24 Na ka tungou a Haimona
Pita ki a ia kia ui atu, ko wai
ranei tana i korero ai.

25 Na ka takoto atu ia ki te
uma o Ihu, a ka mea ki a ia,
E te Ariki, ko wai koia?

26 Ka whakahokia e Ihu,
Ko te tangata e hoatu ai e
ahau te maramara taro ki a
ia, ina tona iho e ahau. Ano
ka tona iho e ia te maramara
taro, ka hoatu ki a Hura
Ikariote *tama* a Haimona.

27 A, muri iho i te maramara
taro, ka tomo a Hatana ki
roto ki a ia. Na ka mea a
Ihu ki a ia, E ahua te mea i
tau e mea ai.

28 Kahore ia tetahi o te
hunga i tava hapa i matau
mo te aha tenei i korerotia
nei e ia ki a ia.

29 I mea hoki etahi, no te
mea i a Hura te putea, koia a
Ihu i mea ai ki a ia, Hokoa
nga mea ma tatou mo te
hākari; kia hoatu ranei te-
tahi mea ma nga rawakore.

30 Na ka tangohia e ia te
maramara taro, haere tonu
atu ki waho: he po ano hoki.

31 ¶ A, tonarirongaki waho,
ka mea a Ihu, Katahi te Tama
a te tangata ka whakakororia-

tia, a ka whai kororia ano te
Atua i a ia.

32 Ki te whai kororia te Atua
i a ia, ka whai kororia ano ia
i roto i te Atua ake, ina, ka
hohoro ia te whakakororia e
ia.

33 E nga tamariki, poto kau
nei toku noho i a koutou.
Tera koutou e rapu i a au: a,
ko taku i mea ai ki nga Hurai,
E kore koutou e ahei te haere
ake ki te wahi e haere ai
ahau; ko taku kupu ano tena
ki a koutou.

34 He ture hou taku ka
hoatu nei ki a koutou, Kia
aroha koutou tetahi ki tetahi;
kia rite ki toku aroha ki a
koutou, waihoki kia aroha
koutou tetahi ki tetahi.

35 Ma konei ka mātau ai
te katoa, he akonga koutou
naku, me ka aroha koutou
tetahi ki tetahi.

36 ¶ Kamea a Haimona Pi-
ta ki a ia, E te Ariki, e haere
ana koe ki hea? Ka whaka-
hokia e Ihu ki a ia, E kore
koe e ahei te aru i a au
aianei ki te wahi e haere atu
nei ahau; a mua ia ka aru
koe i a au.

37 Ka mea a Pita ki a ia, E
te Ariki, he aha ahau tē aru
ai i a koe aianei? Ka tuku
ahau i a au kia mate, he
whakaaro naku ki a koe.

38 Ka whakahokia e Ihu ki
a ia, E tuku oti koe i a koe ki
te mate, he whakaaro nau ki
a au? He pono, he pono
taku e mea nei ki a koe, E
kore e tangi te tikaokao, kia
toru ra ano āu whakakahore-
tanga ki a au.

UPOKO 14.

Tana whakamarie. 6 Ko ia te ara, aha, aha. 16 Mo te Wairua. 27 Mo tana rangimarie.

KEI pouri o koutou ngakau: e whakapono ana koutou ki te Atua, whakapono hoki ki a au.

2 He maha nga nohoanga i roto i te whare o toku Matua: me he kahore, kua korerotia e ahau ki a koutou. Ka haere ahau ki te mea i tetahi wahi hei tukunga ake mo koutou.

3 A ki te haere ahau ki te mea wahi hei tukunga ake mo koutou, ka haere mai ano ahau, ki te tango i a koutou ki a au; kia noho ai hoki koutou ki te wahi e noho ai ahau.

4 Na, e mātau ana koutou ki te wahi e haere atu nei ahau, e mātau ana ano hoki ki te huarahi.

5 Ka mea a Tamati ki a ia, E te Ariki, kahore matou e mātau ki te wahi e haere na koe; me pehea ka mātau ai matou ki te huarahi?

6 Ka mea a Ihu ki a ia, Ko ahau te huarahi, te pono, me te ora: e kore rawa tetahi tangata e haere ake ki te Matua, ki te kahore ahau.

7 Me i mātau koutou ki a au, kua mātau ano ki toku Matua: na, i enei ake wa ka mohio koutou ki a ia, kua kite ano hoki i a ia.

8 Ka mea a Piripi ki a ia, E te Ariki, whakakitea te Matua ki a matou, a ka tatu o matou ngakau.

9 Ka mea a Ihu ki a ia, Roa noa atu toku nohoanga i a koutou, a kahore ano koe i mātau noa ki a au, e Piripi? Ko ia kua kite i a au, kua kite hoki i te Matua; a he aha koe ka mea ai, Whakakitea te Matua ki a matou?

10 E kore ianei koe e whakapono, ko ahau kei roto i te Matua, a ko te Matua kei roto i a au? ko nga kupu e korero nei ahau ki a koutou, ehara i te korero naku ake: engari na te Matua e noho ana i roto i a au, ko ia te mea ana i nga mahi.

11 Whakapono mai ki a au, kei roto ahau i te Matua, a ko te Matua kei roto i a au: a ki te kahore, whakaaro ki nga mahi, ka whakapono ai ki a au.

12 He pono, he pono taku e mea atu nei ki a koutou, Ki te whakapono tetahi ki a au, ko nga mahi e mea nei ahau, e meinga ano e ia; a nui atu i enei āna e mea ai; no te mea e haere ana ahau ki toku Matua.

13 A ko ta koutou e inoi ai i runga i toku ingoa, e meatia tenei e ahau, kia whai kororia ai te Matua i te Tama.

14 Ki te inoia tetahi mea e koutou i runga i toku ingoa, maku e whakamana mai.

15 Ki te aroha koutou ki a au, kia mau ki aku ture.

16 A ka inoi ahau ki te Matua, a māna e homai ki a koutou tetahi atu Kai whakamarie, hei noho tonu ki a koutou;

17 Te Wairua o te pono; e

HOANI 14, 15.

kore nei e riro i te ao, no te mea e kore e kite i a ia, e kore ano e mātau ki a ia: otira e mātau ana koutou ki a ia; kei a koutou hoki ia e noho ana, a ka noho ano i roto i a koutou.

18 E kore koutou e waiho pani e ahau: e haere mai ano ahau ki a koutou.

19 Taro ake a heoi ano kite-nga o te ao i a au; ko koutou ia e kite i a au: e ora ana ahau, a ka ora ano koutou.

20 A taua ra koutou mātau ai kei roto ahau i toku Matua, a ko koutou kei roto i a au, me ahau hoki kei roto i a koutou.

21 Te tangata kei a ia nei aku ture, a e puritia ana e ia, ko ia te aroha ana ki a au: a ki te aroha tetahi ki a au, ka arohaina ia e toku Matua, a ka aroha ahau ki a ia, ka whakaatu i a au ki a ia.

22 Ka mea a Hura ki a ia, hāunga a Ikariote, E te Ariki, me pehea tau whakaatu i a koe ki a matou, a kahore ki te ao?

23 Ka whakahokia e Ihu, ka mea ki a ia, Ki te aroha tetahi ki a au, e puritia e ia taku kupu: a ka arohaina ia e toku Matua, ka haere atu maua ki a ia, ka noho tonu ki a ia.

24 Ki te kahore tetahi e aroha ki a au, e kore e puritia e ia aku kupu: na, ehara i a au ake te kupu e rongo nei koutou, engari na te Matua i tonoa mai ai ahau.

25 Kua korerotia nei e ahau enei mea ki a koutou, i a au e noho nei i a koutou.

26 Na, te Kai whakamarie,

te Wairua Tapu, e tonoa mai e te Matua i runga i toku ingoa, māna koutou e whakaako ki nga mea katoa, māna koutou e whakamahara ki nga mea katoa kua korerotia nei e ahau ki a koutou.

27 ¶ He rangimarie taku e waiho nei ki a koutou, tenei taku rangimarie te hoatu nei e ahau ki a koutou; e kore e rite ki ta te ao hoatutanga taku hoatutanga ki a koutou. Kei pouri o koutou ngakau, kei matakau.

28 Kua rongo na koutou ki taku i mea ai ki a koutou, E haere ana ahau, a ka hoki mai ano ki a koutou. Me i aroha koutou ki a au, kua hari koutou, noku i mea, E haere ana ahau ki te Matua: e nui ana hoki toku Matua i a au.

29 Na kua korero nei ahau ki a koutou, i te mea kahore ano i puta, mo te puta rawa mai, ka whakapono koutou.

30 E kore e maha ake aku korero ki a koutou: e haere mai ana hoki te ariki o tenei ao, a kahore ana wahi i roto i a au;

31 Otira kia mātau ai te ao, e aroha ana ahau ki te Matua; a ko ta te Matua i whakahau mai ai ki a au, ko taku tena e mea nei. Whakatika, ka haere atu tatou i konei.

UPOKO 15.

Te Waina. 18 *Kia u ina tukinotia.* 26 *Kai Whakamarie.*

KO ahau te waina pono, ko toku Matua te kai mahi.

HOANI 15.

2 Ko nga manga katoa i roto i a au e kore e whai hua, e tangohia e ia: a nga *manga* katoa e whai hua ana, ka whakapaia e ia, kia maha atu ai ona hua.

3 Na kua ma tenei koutou i te kupu i korerotia e ahau ki a koutou.

4 Kia u koutou ki roto ki a au, me ahau hoki ki roto ki a koutou. Ka rite hoki ki te manga e kore e whai hua ko ia anake, ki te kahore e u ki te waina; e kore ano hoki koutou, ki te kore e u ki roto ki a au.

5 Ko ahau te waina, ko koutou nga manga: ki te u tetahi ki roto ki a au, me ahau hoki ki roto ki a ia, ka maha o tera hua: ki te motu ke hoki i ahau, e kore tetahi mea e taea e koutou.

6 Ki te kore e u tetahi ki roto ki a au, ka makā atu ia, ano he manga, a ka maroke; na ka kohikohia, ka makā ki te kapura, ka tahuna.

7 Ki te u koutou ki roto ki a au, a ka u ano aku kupu ki roto ki a koutou, e inoia e koutou ta koutou e pai ai, a ka meatia ma koutou.

8 Ka whakakororiatia toku Matua ki te penei, ki te whai hua maha koutou: a ka meinga koutou he akonga naku.

9 Rite tonu ki to te Matua aroha ki a au toku aroha ki a koutou: kia u ki toku aroha.

10 Ki te pupuri koutou i aku ture, ka u koutou ki toku aroha: me ahau hoki kua pupuri nei i nga ture a toku

Matua, a ka u nei ki tona aroha.

11 Kua korerotia enei mea e ahau ki a koutou, kia pumau ai toku koa i roto i a koutou, kia nui rawa ai ano to koutou koa.

12 Ko taku ture tenei, Kia aroha koutou tetahi ki tetahi, me ahau hoki kua aroha nei ki a koutou.

13 Kahore he aroha o tetahi i rahi ake i tenei, ara, kia tuku te tangata i a ia ano kia mate mo ona hoa.

14 Ko koutou oku hoa, ki te meatia e koutou aku e whakahau nei ki a koutou.

15 Heoi ano taku meatanga he pononga koutou; e kore hoki te pononga e mohio ki ta tona ariki e mea ai: engari kua oti koutou te hua e au he hoa; ko aku mea katoa hoki i rongo ai ahau ki toku Matua, kua oti te whakakite e ahau ki a koutou.

16 Kahore koutou i whiri-whiri i a au, engari naku koutou i whiriwhiri, a naku ano koutou i mea kia haere, kia whai hua, kia mau tonu hoki o koutou hua: a ko ta koutou e inoi ai ki te Matua i runga i toku ingoa, ka hoatu ki a koutou.

17 Ko aku whakahau enei ki a koutou, kia aroha koutou tetahi ki tetahi.

18 ¶ Ki te mea e kinongia ana koutou e te ao, e mohio ana koutou i kinongia ahau i mua i a koutou.

19 Me he mea no te ao koutou, e arohaina e te ao ona: tena ko tenei, ehara nei kou-

tou i te ao, a naku ano koutou i whiriwhiri i roto i te ao, koia te ao ka kino ai ki a koutou.

20 Kia mahara ki te kupu i korero ai ahau ki a koutou, E kore te pononga e rahi ake i tona ariki. Ki te mea i whakatoia ahau e ratou, ka whakatoia ano koutou; ki te mea i pupuri ratou i taku kupu, ka pupuri ano ratou i ta koutou.

21 Otira e meatia katoatia enei mea e ratou ki a koutou he whakaaro ki toku ingoa, no te mea kahore ratou i mohio ki toku kai tono mai.

22 Me i kaua ahau te haere mai, te korero ki a ratou, penei kahore o ratou hara: tena ko tenei, kahore o ratou whakaoraora mo to ratou hara.

23 Te tangata e whakakino ana ki a au, e whakakino ana hoki ki toku Matua.

24 Me i kaua te mahia e ahau i roto i a ratou nga mahi kahore i mahia e tetahi atu, penei kahore o ratou hara: tena ko tenei, kua kite ratou, kua whakakino ano hoki ki a maua ko toku Matua.

25 Ma tenei ia ka rite ai te kupu i tuhituhia ki to ratou ture, Kua kino noa ratou ki a au.

26 ¶ Otiia ka tae mai te Kai whakamarie e tonoa mai e ahau ki a koutou i te Matua, te Wairua o te pono, e puta mai ana i te Matua, ko ia hei kai whakaatu moku:

27 Ko koutou ano hei kai whakaatu, no te mea i ahau

koutou no te timatanga iho ra ano.

UPOKO 16.

Mo te tukinotanga ano. 7 Ta te kai whakamarie. 23 Te inoi i runga i tona ingoa. 33 Era atu kupu ana.

KUA korerotia e ahau enei mea ki a koutou, kei hē koutou.

2 Ka peia atu koutou i roto i nga whare karakia; a meake puta te wa e mea ai nga kai whakamate katoa i a koutou, he mahi pai ta ratou ki te Atua.

3 Na, e meatia enei mea ki a koutou, no te mea kahore ratou i mohio ki te Matua, kahore hoki ki a au.

4 Otiia kua korerotia enei mea e ahau ki a koutou, mo te puta rawa mai o taua wa, ka mahara koutou ki aua mea, he mea korero naku ki a koutou. Na, kihai enei mea i korerotia e ahau ki a koutou i te timatanga, no te mea e noho ana ahau i a koutou.

5 Na e haere ana tenei ahau ki toku kai tono mai; a kahore tetahi o koutou i ui mai ki a au, Ko hea koe?

6 Otira i taku korerotanga nei i enei mea ki a koutou, ka ki o koutou ngakau i te pouri.

7 ¶ Na, he pono taku korero ki a koutou; Nui atu te pai mo koutou ki te haere ahau: ki te kahore hoki ahau e haere, e kore te Kai whakamarie e tae mai ki a koutou; a ki te haere ahau, maku ia e tono mai ki a koutou.

8 Na ka tae mai ia, māna e whakaatu ki te ao te hara, te tika, me te whakawa:

9 Te hara, mo ratou kahore e whakapono ki a au;

10 Te tika, no te mea e haere ana ahau ki toku Matua, a heoi ano to koutou kitenga i a au;

11 Te whakawa, no te mea kua whakatikaia te whakawa mo te rangatira o tenei ao.

12 Tenei ake aku mea maha e korero ai ahau ki a koutou, otiia e kore e taea e koutou te mau aianeia.

13 Na ka tae mai ia, te Wairua o te pono, māna koutou e arahi ki te pono katoa: ehara hoki tana i te korero nāna ake; engari ka korerotia e ia nga mea e rongo ai ia: māna hoki e whakakite ki a koutou nga mea e puta mai ana.

14 Ka whakakororiatia ahau e ia: ka tango hoki ia i aku mea, a ka whakaaturia ki a koutou.

15 Nga mea katoa a te Matua, naku: koia ahau i mea ai, ka tangohia e ia aku mea, a ka whakaaturia ki a koutou.

16 Taro ake a e kore koutou e kite i a au: a taro ake ano, ka kite koutou i a au, no te mea ka haere ahau ki te Matua.

17 Na ka mea etahi o ana akonga tetahi ki tetahi, He aha tenei e mea nei ia ki a tatou, Taro ake a e kore koutou e kite i a au: taro ake ano ka kite ano koutou i a au: me tenei, No te mea e haere ana ahau ki te Matua?

18 Na ka mea ratou, He aha tenei e mea nei ia, Taro ake? e kore tatou e mātau ki tana e mea nei.

19 A i mohio a Ihu, e hiahia ana ratou ki te ui atu ki a ia, a ka mea ki a ratou, E rapu ana koutou i roto i a koutou ki taku i mea ra, Taro ake a e kore koutou e kite i a au: a, taro ake ano ka kite ano koutou i a au?

20 He pono, he pono taku e mea nei ki a koutou, Ka tangi koutou, ka aue, ko te ao ia ka hari: e pouri ano koutou, otira ka meinga to koutou pouri hei hari.

21 I te mea ka whakamamae te wahine, ka pouri, no te mea ka tae mai tona wa: ka whanau tana tamaiti, heoi ano maharatanga ki te mamea, i te hari hoki, no te mea ka whanau he tangata ki te ao.

22 Na, tenei koutou te pouri nei: e kite ano ia ahau i a koutou, a ka hari o koutou ngakau, e kore hoki e tangohia i a koutou to koutou hari e tetahi.

23 ¶ Na, i taua ra e kore koutou e ui ki tetahi mea i a au. He pono, he pono taku e mea nei ki a koutou, Ko a koutou e inoi ai ki te Matua i runga i toku ingoa, e homai e ia ki a koutou.

24 Kahore ano i inoia noatia e koutou tetahi mea i runga i toku ingoa: inoia, a ka whiwhi koutou, kia tino nui ai to koutou koa.

25 ¶ He mea whakarite taku korerotanga i enei mea ki a

koutou: otiia meake puta te wa e kore ai ahau e korero kupu whakarite ki a koutou, engari ka marama taku korero ki a koutou mo te Matua.

26 A taua ra ka inoi koutou i runga i toku ingoa; a e kore ahau e mea ki a koutou, e inoi ahau ki te Matua mo koutou:

27 E aroha ana hoki te Matua ake ano ki a koutou, mo koutou hoki i aroha ki a au, a i whakapono i haere mai ahau i te Atua.

28 I haere mai ahau i te Matua, a kua tae mai nei ki te ao: ka mahue ano i a au te ao, a ka haere ki te Matua.

29 Ka mea ana akonga ki a ia, Na, kua marama to korero, ehara tau korero i te kupu whakarite.

30 Katahi matou ka mohio, tenei koe te mohio nei ki nga mea katoa, a e kore e mea ma tetahi e ui ki a koe: na konei matou i whakapono ai i haere mai koe i te Atua.

31 Ka whakahokia e Ihu ki a ratou, Katahi koutou ka whakapono?

32 Na, meake puta te wa, a kua puta nei ano, e whakamararatia ai koutou ki tana mea, ki tana mea, a ka waiho ko ahau anake; otiia he teka ko ahau anake, no te mea kei a au nei te Matua.

33 Kua korerotia e ahau enei mea ki a koutou, kia whai marietanga ai koutou i roto i a au. To koutou i te ao nei, he matemate: otira kia maia; kua taea e ahau te ao.

•

UPOKO 17.

Tana inoi ki tona Matua mo ana akonga, ratou ko te hunga whakapono.

KA korerotia enei mea e Ihu, na, ka anga ake ona kanohi ki te rangi, ka mea, E Pa, kua taea te haora: whakakororiatia to Tama, kia whakakororiatia ai ano hoki koe e to Tama:

2 Kua tukua mai nei hoki e koe ki a ia nga tikanga mo nga kikokiko katoa, kia hoatu e ia te orange tonutanga ki te hunga katoa kua homai nei e koe ki a ia.

3 A ko te orange tonutanga tenei, kia mātau ratou ki a koe, *ko koe* anake te Atua pono, ki a Ihu Karaiti ano hoki i tonoa mai nei e koe.

4 Kua whakakororiatia koe e ahau i runga i te whenua: ka oti i a au te mahi i homai e koe kia mahia e ahau.

5 Na kia whai kororia ahau aiane i a koe ake, e Pa; hei te kororia i kororiatia ai ahau i a koe i mua atu o te ao.

6 Kua whakapuakina e ahau tou ingoa ki nga tāngata i homai e koe ki a au i roto i te ao: nou ratou, nau ano hoki ratou i homai ki a au; a kua puritia e ratou tau kupu.

7 Katahi ratou ka mātau nau nga mea katoa i homai nei e koe ki a au;

8 No te mea kua hoatu e ahau ki a ratou nga kupu i homai e koe ki a au; a kua tango ratou, kua tino mātau ano, i haere mai ahau i a koe,

kua whakapono ano ratou, nau ahau i tono mai.

9 Mo ratou taku inoi: kahore aku inoi mo te ao, engari mo āu i homai ai ki a au; nau hoki ratou.

10 Aku katoa, nau ano, naku hoki āu; a ka whai kororia ahau i a ratou.

11 Na heoi ano toku noho i te ao; kei te ao nei ano enei, ko ahau ia ka haere atu ki a koe. E te Matua tapu, puritia i runga i tou ingoa te hunga kua homai e koe ki a au, kia kotahi ai ratou, me tāua nei.

12 I ahau ano e noho ana i a ratou i te ao, i puritia ratou e ahau i runga i tou ingoa: kua tiakina e ahau āu i homai ai ki a au, a kahore tetahi o ratou i ngaro, ko te tama anake o te ngaromanga; kia rite ai te karaipiture.

13 Na ka haere atu nei ahau ki a koe; a e korerotia ana e ahau enei mea i te ao nei, kia tino nui ai toku koa i roto i a ratou.

14 Kua hoatu e ahau tau kupu ki a ratou; a e kino ana te ao ki a ratou, no te mea ehara ratou i te ao, me ahau hoki ehara nei i te ao.

15 Kahore aku inoi kia tangohia atu ratou e koe i te ao, engari kia tiakina ratou e koe kei kino.

16 Ehara ratou i te ao, me ahau hoki ehara i te ao.

17 Whakatapua ratou e koe i runga i to pono: ko tau kupu te pono.

18 Nau ahau i tono mai ki

te ao, he pena ano taku tono i a ratou ki te ao.

19 A he whakaaro ki a ratou i whakatapu ai ahau i a au, kia tapu ai hoki ratou i te pono.

20 Ehara taku i te inoi mo enei anake, engari mo te hunga e meinga e ta ratou kupu kia whakapono ki a au;

21 Kia kotahi ai ratou katoa; me koe hoki, e Pa, i roto i a au, me ahau ano i roto i a koe, kia kotahi ai hoki ratou i roto i a tāua: kia whakapono ai te ao, nau ahau i tono mai.

22 Kua hoatu ano e ahau ki a ratou te kororia i homai e koe ki a au; kia kotahi ai ratou, me taua nei hoki he kotahi:

23 Ko ahau i roto i a ratou, ko koe hoki i roto i a au, kia tino tutuki ai ratou ki te kotahitanga: kia mohio ai ano te ao, nau ahau i tono mai, a e rite ana tou aroha ki a ratou ki tou aroha ki a au.

24 E Pa, e mea ana ahau kia noho tahi ki a au, ki te wahi e noho ai ahau, āu i homai ai ki a au; kia kite ai ratou i toku kororia kua homai nei e koe ki a au: no mua atu hoki i te hanganga o te ao tou aroha ki a au.

25 E te Matua tika, ahakoa te ao tē mohio ki a koe, e mohio ana ano ahau ki a koe, a kua mohio ano enei, nau ahau i tono mai.

26 Kua whakapuakina ano tou ingoa e ahau ki a ratou, a ka whakapuakina ano: kia

mau ai i roto i a ratou te aroha i arohaina ai ahau e koe, me ahau ano i roto i a ratou.

UPOKO 18.

Ta Hura. 3 Nga kai hopu. 10 Maraku. 12 Whare o te tino tohunga. 15 Ta Pita. 19 Ta Kaiapa. 28 Kei a Pirato. 40 Ko Parapa kia ora.

KA mutu enei korero a Ihu, ka haere ia, ratou ko ana akonga ki tera taha o te mangawai, ara o Kerono. Na, he k̄ari kei reira, a tapoko atu ana ia, ratou ko ana akonga.

2 I matauria ano taua wahi e Hura, e te tangata e tukua ai ia: he maha hoki nga hokinga o Ihu ratou ko ana akonga ki reira.

3 ¶ Na ka hoatu ki a Hura tetahi matua me etahi katipa e nga tohunga nui, ratou ko nga Parihi, a haere ana ki reira, me nga roherohe, me nga rama, me nga patu.

4 A i mātau a Ihu ki nga mea katoa meāke pa ki a ia, ka puta atu, ka mea ki a ratou, Ko wai ta koutou e rapu?

5 Ka whakahokia e ratou ki a ia, Ko Ihu o Nahareta. Ka mea a Ihu ki a ratou, Ko ahau ia. A, i te tu ano i roto i a ratou a Hura, tona kai tuku.

6 Na, tana korerotanga ki a ratou, Ko ahau ia, hoki ana ratou ki muri, hinga ana ki te whenua.

7 Na ka ui ano ia ki a ratou, Ko wai ta koutou e rapu? Ka

mea ratou, Ko Ihu o Nahareta.

8 Ka whakahokia e Ihu, Kua mea ahau ki a koutou, Ko ahau ia: ki te mea e rapu ana koutou i a au, tukua enei kia haere:

9 Kia rite ai te kupu i koreotia e ia, Kahore i ngaro tetahi o te hunga i homai e koe ki a au.

10 ¶ Na, he hoari ta Haimona Pita, unuhia ana e ia, a haua iho te pononga a te tohunga nui, tapahia ana tona taringa matau. Te ingoa o taua pononga ko Maraku.

11 Ka mea a Ihu ki a Pita, Kuhua to hoari ki te takotoranga: auaka ranei te kapa i homai e toku Matua ki a au e inumia e ahau?

12 ¶ Me i reira ka hopukina a Ihu e taua matua, e te rangatira me nga katipa o nga Hurai, a hereherea ana ia.

13 Na ka mātua kawea ia e ratou ki a Anaha; ko ia hoki te hungawai o Kaiapa, ko Kaiapa hoki te tohunga nui mo ia tau.

14 Ko Kaiapa te kai whakatakoto i te whakaaro ki nga Hurai, Nui atu te pai ki te mate te tangata kotahi mo te iwi.

15 ¶ Na ka arumia a Ihu e Haimona Pita, raua ko tetahi atu o nga akonga: i mohiotia hoki taua akonga e te tohunga nui, a tomo tahi ana me Ihu ki te whare o te tohunga nui.

16 Ko Pita ia, i tu i te kuwaha i waho. Na ka puta atu taua

HOANI 18.

akonga i mohiotia nei e te tohunga nui, ka korero ki te kai tiaki o te tatau, a arahina ana a Pita ki roto.

17 Na, ko te meatanga a te kotiro tiaki o te tatau ki a Pita, Ehara ianei koe i tetahi o nga akonga a tenei tangata? Ka mea ia, Ehara.

18 Na, i te tu tera nga pononga me nga katipa, i whakaungia hoki e ratou he kapura waro, i te makariri: a inaina ana ratou: tu tahi ana ano a Pita me ratou, inaina ana.

19 ¶ Na ka uia a Ihu e te tohunga nui ki ana akonga, ki tana ako.

20 Ka whakahokia e Ihu ki a ia, I marama tonu taku korero ki te ao; i ake tonu ahau i roto i te whare karakia, i te temēpara hoki, i te wahi i huihui tonu ai nga Hurai; kahore hoki tetahi mea i korerotia pukutia e ahau.

21 He aha koe ka ui ai ki a au? ui atu ki te hunga i rongo ki taku i mea ai ki a ratou: nana, e mohio ana ratou ki aku i korero ai.

22 Tana korerotanga i enei kupu, ka papaki i a Ihu tetahi o nga katipa i tu ra, ka mea, E pena ana koe ki te tohunga nui?

23 Ka whakahokia e Ihu ki a ia, Ki te kino aku korero, whakaaturia te kino: a, ki te pai, he aha koe i papaki ai i a au?

24 Na ka tonoa hereheretia atu ia e Anaha ki a Kaiapa tohunga nui.

25 ¶ A i te tu ano a Hai-

mona Pita, e inaina ana. Ka mea ratou ki a ia, Ehara ianei koe i tetahi o ana akonga? Ka whakakahore ia, ka mea, Ehara.

26 Ka mea tetahi o nga pononga a te tohunga nui, he whanaunga nona i tapahia nei te taringa e Pita, Kihai ianei ahan i kite ia koe, korua tahi, i te kāri?

27 Na ka whakakahore ano a Pita: a tangi tonu iho te tikaokao.

28 ¶ Katahi ka arahina a Ihu e ratou i a Kaiapa ki te whare whakawa: a ka puao te ata; ko ratou ia kihai i tomo ki te whare whakawa, kei poke ratou; engari kia kai ai ratou i te kapenga.

29 Na ka puta a Pirato ki a ratou, ka mea, He aha ta koutou korero whakawa mo tenei tangata?

30 Ka whakahokia e ratou, ka mea ki a ia, Me i kaua ia te mahi i te kino, kihai i kawea mai e matou ki a koe.

31 Na, ko te meatanga a Pirato ki a ratou, Tangohia atu, whakawakia; kei ta koutou te ture. Ka ki nga Hurai ki a ia, E kore e tika kia whakamatea tetahi tangata e matou:

32 I rite ai hoki te kupu i korerotia e Ihu, tana hoki i korero ai hei whakaatu i te matenga e mate ai ia.

33 ¶ Me i reira ka tomo ano a Pirato ki te whare whakawa, a ka karanga i a Ihu, ka mea ki a ia, Ko te Kingi ranei koe o nga Hurai?

34 Ka whakahokia e Ihu ki a ia, Nau ake ano tenei kupu, he korero ranei moku na te tangata ke ki a koe?

35 Ka mea a Pirato, He Hurai koia ahau? Na tou iwi, na nga tohunga nui ano hoki, koe i kawē mai ki a au: i aha koia koe?

36 Ka whakahokia e Ihu, Ehara toku rangatiratanga i tenei ao: me he mea no tenei ao toku rangatiratanga, kua tatau aku pononga, kei tukua ahau ki nga Hurai: tena ko tenei ehara toku rangatiratanga i konei.

37 Na ka mea a Pirato ki a ia, He kingi ōti koe? Ka whakahokia e Ihu, Kua kore-rotia mai na e koe he kingi ahau. Ko te mea tenei i whanau ai ahau; na tenei hoki ahau i haere mai ai ki te ao, hei kai whakaatu mo te pono. E whakarongo ana ki toku reo nga tangata katoa o te pono.

38 Ka mea a Pirato ki a ia, He aha te pono? A, te puakanga o tenei ki, hoki ana ia ki waho ki nga Hurai, ka mea ki a ratou, Kahore tetahi hē o tenei tangata i mau i a au.

39 Ōtiia he ritenga tenei na koutou, kia tukua e ahau ki a koutou tetahi tangata i te kapenga: na, e pai ana ranei koutou kia tukua e ahau ki a koutou te Kingi o nga Hurai?

40 Heoi karanga katoa ana ano ratou, ka mea, Auaka tenei, engari a Parapa. Na, he tahae a Parapa.

UPOKO 19.

E tukinotia ana a Ihu. 4 Ta Pirato mona. 17 Ka ripekatia. 23 Ta nga hoia. 25 Tona whaea. 28 Matenga. 31 Tona werohanga. 38 Tanumanga.

KATAHI ka mau a Pirato ki a Ihu, ka whiui a ia.

2 A ka whiria e nga hoia he karauna tataramoa, potaea ana ki tona mātenga, whakakahuria ana hoki ia ki te kahu papura,

3 Na ka mea ratou, Tena koe, e te Kingi o nga Hurai! a pakia ana ia.

4 ¶ Ka haere ano a Pirato, ka mea ki a ratou, Na, tenei te arahina atu nei e ahau ki a koutou, kia mohio ai koutou, kahore rawa i mau i a au tetahi hē ona.

5 Na ka puta a Ihu ki waho, me te karauna tataramoa i runga i a ia, me te kakahu papura. Ka mea a Pirato ki a ratou, Na, te tangata nei!

6 A, te kitenga o nga tohunga nui ratou ko nga katipa i a ia, ka karanga ratou, ka mea, Ripekatia, ripekatia. Ka ki a Pirato ki a ratou, Tangohia atu ia e koutou, ripekatia: kahore hoki i mau i a au tetahi hē ona.

7 Ka whakahokia e nga Hurai ki a ia, He ture to matou, a ki to matou ture, he mea tika kia mate ia, mona i mea ko te Tama ia a te Atua.

8 A, te rongonga o Pirato i tenei ki, nui rawa tona wehi; 9 Ka tomo ano ia ki te whare

HOANI 19.

whakawa, a ka mea ki a Ihu, No hea koe? Heoi kahore a Ihu kupu whakahoki ki a ia.

10 Na ka mea a Pirato ki a ia, E kore koe e korero ki a au? kahore koe e mohio, kei a au te tikanga mo te ripeka i a koe, kei a au ano te tikanga mo te tuku i a koe kia haere?

11 Ka whakahokia e Ihu, Kahore o tikanga ki a au, me kahore i homai ki a koe i runga: koia i nui rawa ai te hara o te kai tuku i a au ki a koe.

12 Na, i reira ake ano ka whai a Pirato kia tukua ia kia haere: otiia ka karanga nga Hurai, ka mea, Ki te tukua tenei e koe, ehara koe i te hoa no Hiha: ki te whakakingi tetahi tangata i a ia, he whakakahore tana i a Hiha.

13 Ano ka rongo a Pirato i tenei korero, ka arahina e ia a Ihu ki waho, a noho ana ki runga ki te nohoanga whakawa, ki te wahi e karangatia nei, ko te Whariki kohatu, ki te reo Hiperu, ko Kapata.

14 Ko te takanga ia o te kapenga, tata pu ki te ono o nga haora: a ka mea ia ki nga Hurai, Na, to koutou Kingi!

15 Na, ko ta ratou karanga-tanga, Whakamatea, whakamatea, ripekatia. Ka mea a Pirato ki a ratou, Kia ripeka koia ahau i to koutou Kingi? Ka whakahokia e nga tohunga nui, Kahore o matou kingi, ko Hiha anake.

16 Katahi ia ka hoatu e ia ki a ratou kia ripekatia. A

ka mau ratou ki a Ihu, ka arahi atu.

17 ¶ A amo ana ia i tona ripeka, haere ana ki te wahi e karangatia nei, ko te wahi o te angaanga, tona ingoa ki te reo Hiperu, ko Korokota:

18 Na, ripekatia ana ia e ratou ki reira, a ia me tera tokorua atu, kotahi ki tetahi taha, kotahi ki tetahi taha, ko Ihu i waenganui.

19 Na, tuhituhia ana e Pirato tetahi ingoa, whakapiritia ana ki te ripeka. Ko te tuhituhi tenei, KO IHU O NAHARETA, KO TE KINGI O NGA HURAI.

20 A he tokomaha nga Hurai i korerotia ai tenei ingoa: i tata hoki ki te pa te wahi i ripekatia ai a Ihu: i tuhituhia hoki ki te reo Hiperu, ki te reo Kariki, ki te reo o Roma.

21 Na ka mea nga tohunga nui o nga Hurai ki a Pirato, Aua e tuhituhia, Ko te Kingi o nga Hurai; engari, Nana i mea, Ko te Kingi ahau o nga Hurai.

22 Ka whakahokia e Pirato, Ko taku i tuhituhi ai, kua tuhituhia.

23 ¶ A, ka oti a Ihu te ripeka e nga hoia, ka mau ratou ki ona kakahu, wehea ake kia wha nga wahi, ki ia hoia he wahi; me te kotahi ano: na, kahore he tui o te kotahi, he mea whatu iho i runga a puta noa.

24 Na ka mea ratou tetahi ki tetahi, Kaua e haea e tatou, engari me maka ki te rota kia kitea ai, mo wai ranei:

HOANI 19.

na ka rite te karaipiture e mea nei, I wehewehea oku kakahu mo ratou, i maka rota hoki mo toku weruweru. Ko ta nga hoia tenei i mea ai.

25 ¶ Na, i te taha o te ripeka o Ihu tona whaea e tu ana, ratou ko te teina o tona whaea, ko Meri wahine a Kereopa, ko Meri Makarini.

26 A, te kitenga o Ihu i tona whaea, me te akonga hoki i aroha ai ia e tu tahi ana, ka mea ia ki tona whaea, E tai, nana, to tamaiti!

27 Katahi ia ka mea ki taua akonga, Na, tou whaea! No taua haora ake ano, i tango ai taua akonga i a ia ki tona whare.

28 ¶ Muri iho i tenei, ka mohio a Ihu ka oti nga mea katoa, na ka mea ia, hei whakaritenga hoki mo te karaipiture, He mate wai toku.

29 Na, tera e tu ana tetahi oko, ki tonu i te winika: a ka whakakiiia e ratou tetahi hau-tai ki te winika, whakanohia ana ki runga ki te hihopa, hoatu ana ki tona mangai.

30 A, te inumanga nei o te winika e Ihu, ka mea ia, Kua oti: na ka tuohu tona mātenga, tukua atu ana te wairua.

31 ¶ Na, i mea nga Hurai, kia kaua e mau nga tinana ki te ripeka i te hapatī, ko te takanga hoki ia, ko te ra nui hoki taua hapatī, ka mea ratou ki a Pirato kia whatiia o ratou waewae, kia tango-hia atu hoki.

32 Na ka haere nga hoia, ka whawhati i nga waewae o

to mua, me o tera i ripekatia ngatahitia me ia.

33 A, to ratou taenga ki a Ihu, ka kite kua mate noa ake ia, kihai i whatiia e ratou ona waewae:

34 Engari i werohia tona kaokao e tetahi o nga hoia ki te matia, a puta tonu he toto, he wai.

35 A ko te tangata i kitea ai, ko ia ano te kai whakaatu, e pono ana ano tana whakaturanga: a e mohio ana ano ia he korero pono tana, he mea ra kia whakapono ai koutou.

36 I meatia hoki enei mea, kia rite ai te karaipiture, E kore tetahi iwi ona e whatiia.

37 A e mea ana ano tetahi atu karaipiture, Ka titiro ratou ki ta ratou i wero ai.

38 ¶ Muri iho i enei mea, ka inoi a Hohepa o Arimatia ki a Pirato kia tangohia e ia te tinana o Ihu; he akonga ia na Ihu, otiia he mea huna, i te wehi ki nga Hurai: a whakaae ana a Pirato. Na ka haere ia, ka tango i te tinana o Ihu.

39 I haere ano a Nikorima, tera i haere ra i mua ki a Ihu i te po, me te mau ano i te maira, i te aroa, he mea whakananu, kia kotahi pea rau patna.

40 Na ka tango raua i te tinana o Ihu, takaia ana ki nga kakahu rinena me nga mea kakara, ko ta nga Hurai ritenga hoki ia mo te tanu.

41 Na, he kārī kei te wahi i ripekatia ai ia; a i roto i taua kārī tetahi urupa hou, he mea

kahore ano i takotoria noatia e tetahi.

42 Na ka whakatakotoria a Ihu e raua ki reira, no te mea he ra takanga ia no nga Hurai; a e tata ana te urupa.

UPOKO 20.

Meri ki te rua. 3 Pita raua ko Hoani. 11 Putanga ki a Meri; 19 ki ana akonga. 24 Ta Tamati.

I TE ra tuatahi o te wiki ka haere a Meri Makarini ki te urupa i te atatu, i te mea e pouri ana ano, a ka kite i te kohatu kua tangohia atu i te urupa.

2 Na ka oma ia, ka haere ki a Haimona Pita raua ko tera akonga i aroha ai a Ihu, a ka mea ki a raua, Kua tangohia e ratou te Ariki i te urupa, a kahore matou e mohio ki te wahi i waiho ai ia e ratou.

3 ¶ Na kaputa atu a Pita, me taua akonga, ka haere ki te urupa.

4 A oma ngatahi ana raua; otiia i hohoro tera akonga i a Pita, a ko ia kua tae wawe ki te urupa.

5 Na, piko iho ana ia, ka kite i nga takai rinena e takoto ana; heoi kihai i tapoko ki roto.

6 Na ka haere mai ano a Haimona Pita, i muri i a ia, a, tona tomokanga ki te urupa, ka kite i nga takai rinena e takoto ana,

7 Me te tauera i takaia ai tona mātenga, kihai i takoto tahi me nga takai rinena, he mea whakakopa ia ki tetahi wahi i tahaki.

8 Katahi ka tomo tera akonga, i tae wawe mai nei ki te urupa, kite ana, whakapono ana.

9 Kiano hoki ratou i mohio noa ki te karaipiture, Kua takoto te tikanga kia ara ake ia i te hunga mate.

10 Na hoki ana ano nga akonga ki te kāinga.

11 ¶ Ko Meri ia, i tu tonu i waho o te urupa tangia i: a, i a ia e tangi ana, ka piko iho ki te urupa,

12 Ka kite i nga anahera tokorua, he ma nga kakahu, e noho ana, ko tetahi ki te mātenga, ko tetahi ki nga waewae, i te wahi i takoto ai te tinana o Ihu.

13 A ka mea raua ki a ia, E tai, he aha tau e tangi? Ka mea ia ki a raua, Kua tangohia e ratou toku Ariki, a e kore ahau e mātau ki te wahi i whakatakotoria ai ia.

14 A, ka penei ana korero, ka tahuri whakamuri, ka kite i a Ihu e tu ana, otiia kihai i mohio ko Ihu ia.

15 Ka mea a Ihu ki a ia, E tai, he aha tau e tangi? ko wai tau e rapu? Hua noa ia ko te kai ngaki kāri, na, ko tana meatanga ki a ia, E mara, ki te mea kua mauria atu ia e koe, korerotia ki a au te wahi i whakatakotoria ai ia, a maku ia e tango atu.

16 Ka mea a Ihu ki a ia, E Meri. Ka tahuri atu tera, ka mea ki a ia, E Raponi; (ko te tikanga tenei, E te Kai whakako.)

17 Ka mea a Ihu ki a ia, Kei pa ki a au; kiano hoki ahau

i kake noa ki toku Matua: engari haere ki oku teina, ka mea ki a ratou, ka kake ahau ki toku Matua, ki to koutou Matua; ki toku Atua, ki to koutou Atua.

18 Haere ana a Meri Makarini, korero ana ki nga akonga, kua kite ia i te Ariki, a kua korerotia e ia enei mea ki a ia.

19 ¶ I taua ra tuatahi ano o te wiki, i te ahiahi, i nga tatau e kati ana o te wahi i huihui ai nga akonga i te wehi i nga Hurai, ka haere mai a Ihu, ka tu i waenganui, a ka mea ki a ratou, *Kia tau* te rangimarie ki a koutou.

20 A ka puaki tenei kupu ana, ka whakakitea e ia ona ringa me tona kaokao ki a ratou. Na, hari tonu nga akonga, i to ratou kitenga i te Ariki.

21 Ka mea ano a Ihu ki a ratou, *Kia tau* te rangimarie ki a koutou: itonoa mai ahau e te Matua, ka pera ano taku tono i a koutou.

22 Ka korerotia tenei, ka whakaha mai ia, a ka mea ki a ratou, *Kia riro* te Wairua Tapu i a koutou:

23 Ki te whakarerea noatia atu e koutou nga hara o etahi, ka whakarerea o ratou; a ki te whakamaua o etahi e koutou, ka mau ano.

24 ¶ Ko Tamati ia, ko tetahi o te tekau ma rua, tetahi o ona ingoa ko Ririmu, kahore i a ratou i te taenga mai o Ihu.

25 A, te meatanga a era akonga ki a ia, Kua kite matou

i te Ariki; ka mea ia ki a ratou, Ki te kahore ahau e kite i te ngaunga a nga whao i ona ringa, e kuhu i toku matihao ki te ngaunga a nga whao, e kuhu hoki i toku ringa ki tona kaokao, e kore e whakaponohia e ahau.

26 ¶ A ka pahemo ano nga ra e waru, na, kei roto ano ana akonga, ratou ko Tamati: ka haere mai a Ihu i te mea e kati ana nga tatau, ka tu i waenganui, ka mea, *Kia tau* te rangimarie ki a koutou.

27 Katahi ia ka mea ki a Tamati, Torona mai tou matihao, kia kite hoki koe i oku ringa; torona mai hoki tou ringa, ka kuhu ki toku kaokao: aua e whakateka, engari me whakapono.

28 Na ka whakahokia e Tamati, ka mea ki a ia, E toku Ariki, e toku Atua.

29 Ka mea a Ihu ki a ia, No to kitenga i a au, i whakapono ai koe, e Tamati: ka koa te hunga kahore i kite, a kua whakapono.

30 ¶ He maha ano era atu tohu i oti i a Ihu, i te aroaro o ana akonga, kahore nei i tuhituhia ki tenei pukapuka:

31 Otiia kua tuhituhia enei, kia whakapono ai koutou ko Ihu te Karaiti, ko te Tama a te Atua; kia whiwhi ai hoki ki te orange i runga i tona ingoa, ina whakapono.

UPOKO 21.

Putanga ano ki ana akonga.

15 *Tana ki a Pita.* 18 *Mo*

to Pita matenga. 20 Mo Hoani.

MURI iho i enei mea ka whakakite a Ihu i a ia ki nga akonga i te moana o Taipiria; ko tana whakakitenga tenei:

2 E noho tahi ana a Haimona Pita, a Tamati, ko Ririmu nei tona ingoa, a Natanahira o Kana o Kariri, nga *tama* a Heperi, tokorua atu ano o ana akonga.

3 Ka mea a Haimona Pita ki a ratou, Ka haere ahau ki te hao. Ka mea ratou ki a ia, Tatou tahi te haere. Haere ana ratou, a eke tonu atu ki runga ki te kaipuke; a i taua po kihai i mau tetahi mea.

4 Na ka puao te ata, ka tu a Ihu ki tatahi: otiia kihai nga akonga i mohio ko Ihu ia.

5 Na, ko te meatanga a Ihu ki a ratou, E *tama* ma, kahore a koutou kai? Ka whakahokia e ratou ki a ia, Kahore.

6 Ka mea ia ki a ratou, Makā te kupenga ki te taha matau o te kaipuke, a ka mau *etahi*. Na, ta ratou makanga atu, kihai i taea te kukume i te tini o nga ika.

7 Katahi ka mea te akonga i arohangia e Ihu ki a Pita, Ko te Ariki. A, te rongonga o Haimona Pita, ko te Ariki, ka whitikiria tona kakahu, (e tu kau ana hoki ia,) a rere ana ki te moana.

8 Ko era akonga ia, i hoe mai i runga i te poti; (kihai hoki i mamao atu i te whe-

nua, me te mea e rua rau whatianga,) e kukume ana i te kupenga me nga ika.

9 A, to ratou uranga ki uta, ka kite i te kapura waro me nga ika e takoto ana i runga, me tetahi taro.

10 Ka mea a Ihu ki a ratou, Homai etahi o nga ika kua mau na i a koutou.

11 Na haere ana a Haimona Pita, a kumea ana e ia te kupenga ki uta, ki tonu i nga ika nunui, kotahi rau e rima tekau ma toru: a ahakoa tini, kihai i pakaru te kupenga.

12 Ka mea a Ihu ki a ratou, Haere mai ki te kai. Heoi kihai tetahi o nga akonga i maia ki te ui ki a ia, Ko wai koe? i mohio hoki ko te Ariki.

13 Na ka haere mai a Ihu, ka mau ki te taro, a homai ana e ia ki a ratou, me nga ika.

14 Ko te toru tenei o nga putanga o Ihu ki ana akonga, i muri i tona aranga ake i te hunga mate.

15 ¶ A, ka mutu ta ratou kai, ka mea a Ihu ki a Haimona Pita, E Haimona, *tama* a Hona, rahi atu ranei tou aroha ki a au i to enei? Ka mea tera ki a ia, Ae, e te Ariki; e mohio ana koe e aroha ana ahau ki a koe. Ka mea ia ki a ia, Whangainga aku reme.

16 Ka mea ano ia ki a ia, ko te rua o nga meatanga mai, E Haimona, *tama* a Hona, e aroha ana koe ki a au? Ka mea tera ki a ia, Ae, e te

Ariki; e mohio ana koe e aroha ana ahau ki a koe. Ka mea ia ki a ia, Whangainga aku hipi.

17 Ka mea ia ki a ia, ko te toru o nga meatanga, E Haimona, *tama* a Hona, e aroha ana koe ki a au? Ka pouri a Pita no te mea ka toru ana meatanga ki a ia, E aroha ana koe ki a au? Ka mea ano ki a ia, E te Ariki, e mohio ana koe ki nga mea katoa; e mohio ana koe e aroha ana ahau ki a koe. Ka mea a Ihu ki a ia, Whangai-nga aku hipi.

18 He pono, he pono taku e mea nei ki a koe, I tou tamarikitanga, i whitiki koe i a koe, i haere ki tau wahi i pai ai: ka koroheketia koe, ka whakamarokia e koe ou ringa, a he tangata kē māna koe e whitiki, e kawē ki te wahi e kore ai koe e pai.

19 I korerotia tenei e ia, hei tohu mo te mate e whakakororia ai ia i te Atua. A ka puaki tenei kupu āna, ka mea ia ki a ia, Haere mai i muri i a au.

20 A, te tahuritanga o Pita,

ka kite i te akonga i aroha ai a Ihu e aru ana; tera hoki i whakawhirinaki ki tona uma i te hapa, a i mea, E te Ariki, ko wai te kai tuku mou?

21 A, te kitenga o Pita i a ia, ka mea ki a Ihu, E te Ariki, e aha ra tenei?

22 Ka mea a Ihu ki a ia, Ki te pai ahau kia noho tonu ia kia tae mai ra ano ahau, hei aha mau? haere mai koe i muri i a au.

23 Heoi ka puta atu tenei kupu ki nga hoa, e kore taua akonga e mate: ofiia kihai a Ihu i mea ki a ia, E kore ia e mate; engari, Ki te pai ahau kia noho tonu ia kia tae mai ra ano ahau, hei aha mau?

24 ¶ Ko taua akonga tenei e whakaatu nei i enei mea, ko te kai tuhituhi hoki ia i enei mea: a e mohio ana ano matou e tika ana tana whakaaturanga.

25 Na, tera atu ano tona tini o nga mea i mea ai a Ihu, me i tuhia katoatia, e mea ana ahau, e kore te ao nei ano e whai takotoranga mo nga pukapuka e tuhia. Amine.

KO

NGA MAHI A NGA APOTORO.

UPOKO 1.

*Ihu ki ana akonga. 6 Ka-
kenga. 15 Te whakakapi
mo Hura.*

TO mua korero he mea tuhi-
tuhi naku, e Tiopira, mo
nga mea katoa i timata ai a
Ihu te mahi, te ako,

2 Taea noatia te ra i tango-
hia ake ai ia, i muri i tana
akoranga, ara i ta te Wairua
Tapu, ki nga apotoro i whiri-
whiria e ia;

3 He maha hoki nga tohu i
whakakite ora ai ia i a ia ki
a ratou, i muri i tona ma-
tenga; e wha tekau ano nga
ra i kitea ai e ratou, i kore-
rotia ai e ia nga mea o te
rangatiratanga o te Atua:

4 A ka huihui tahi ia me
ratou, ka mea ia kia kua
ratou e haere atu i Hiruha-
rama, engari kia taria te mea
i korerotia i mua e te Matua,
i rongo ra koutou ki a au:

5 I iriiri hoki a Hoani ki te
wai; ko koutou ia e kore e
maha ake nga ra ka iriiria ki
te Wairua Tapu.

6 ¶ A ka tamene mai ratou, ka

ui ki a ia, ka mea, E te Ariki,
ko te wa ianei tenei e wha-
kahoki ai koe i te rangatira-
tanga ki a Iharaira?

7 Na, ko tana meatanga ki
a ratou, E kore e riro i a kou-
tou te mohio ki nga wa ki
nga taima, kua waiho e te
Matua māna ake te tikanga.

8 Engari ka riro he kaha i
a koutou, ina haere mai te
Wairua Tapu ki runga ki a
koutou: a hei kai whakaatu
koutou moku ki Hiruharama,
ki Huria katoa, ki Hamaria
hoki, a tae noa ki te pito
whakamutunga o te ao.

9 Ano ka mutu tana korero
i enei mea, i a ratou ano e
titiro ana, ka tangohia atu
ia: a toremi atu i to ratou
tirohanga ki roto ki te kapua.

10 A i a ratou e titiro mata-
tau atu ana ki te rangi, i a
ia e haere ana, na, tokorua
nga tāngata e tu ana i to
ratou taha, he ma nga ka-
kahu;

11 E mea mai ana, E nga
tāngata o Kariri, he aha ta
koutou e tu e matakītaki atu
na ki te rangi? ko tena Ihu
kua tangohia atu na i a kou-
tou ki te rangi, ka pera ano

NGA MAHI A NGA APOTORO 1, 2.

tona haerenga mai me ia i tirohia atu na e koutou e haere ana ki te rangi.

12 ¶ Na hoki ana ratou ki Hiruharama i te maunga e karangatia nei ko Oriwa, he wahi tata ki Hiruharama, he haerenga hapati.

13 A ka tomo ratou, ka kake ki te ruma i runga, ki te wahi i noho ai a Pita, a Hemi, a Hoani, a Anaru, a Piripi, a Tamati, a Patoromu, a Matiu, a Hemi *tama* a Arapiu, a Haimona Heroti, a Hura *teina* o Hemi.

14 Enei katoa, kotahi tonu te whakaaro i u ai ki te inoi, ki te karakia, me nga wāhine, me to Ihu whaea me Meri, me ona *tēina*.

15 ¶ I aua ra ka whakatika a Pita i waenganui o nga akonga, ka mea, (na, te maha o nga ingoa ki te huihuia, kotahi rau e rua tekau.)

16 E hoa ma, e *oku tēina*, i tika ano kia whakaritea tenei karaipiture, ta te Wairua Tapu, i korerotia i mua e te mangai o Rawiri mo Hura, mo te kai arahi o nga kai hopu i a Ihu.

17 I huihuia tahitia hoki ia ki a tatou, i a ia ano tetahi wahi o tenei mahi.

18 Na hokoa ana e taua tangata tetahi wahi ki te utu o te kino; a taka tupou iho, koara pu i waenganui, pakaru katoa ki waho ona whekau.

19 I rangona ano e te hunga katoa e noho ana i Hiruharama; na reira taua wahi i huaina ai, ko Akerama, he

kupu no to ratou reo mo tenei, Ko te kāinga o te toto.

20 Kua oti hoki te tuhituhi ki te pukapuka o nga waiata, Kia ururuatia tona nohoanga, kua hoki tetahi e noho ki reira; a, kia riro tana mahi tirotiro i tetahi atu.

21 Na, ko te tikanga tenei, Ko nga tāngata i haere tahi nei tatou, i nga wa katoa i haereere mai ai, i haereere atu ai te Ariki, a Ihu i roto i a tatou,

22 Hei te iriiringa a Hoani timata ai, a tae noa ki te ra i tangohia ake ai ia i a tatou, me waiho tetahi o era hei hoa mo tatou ki te whakaatu i tona aranga mai.

23 A tokorua a ratou i whakarite ai, ko Hohepa i karangatia nei ko Pahapa, tetahi o ona ingoa ko Hutuha, raua ko Matiaha.

24 Na ka inoi ratou, ka mea, Ko koe, e te Ariki, te mohio ana ki nga ngakau o te katoa, mau e whakakite ko wai o tenei tokorua tau i whiriwhiri ai,

25 Kia riro i a ia tetahi wahi o tenei mahi minita, o te apotorotanga, i taka atu nei a Hura, he mea kia haere ai ia ki tona wahi.

26 Na ka hoatu e ratou o raua rota; a ka tau te rota ki a Matiaha; a uru ana ia ki nga Apotoro tekau ma tahi.

UPOKO 2.

Wairua Tapu. 4 *Reo ke.* 5

Ta te mano. 14 *Ta Pita.*

37 *Te iriiringa.* 41 *Te hahi.*

NGA MAHI A NGA APOTORO 2.

A, KA taka mai te ra o te Petekoha, e noho tahi ana ratou katoa, kotahi ano te whakaaro.

2 Na, puta whakarere mai ana he harurutanga no te rangi, ano he hau nui e keriri ana, a ki katoa te whare i noho ai ratou.

3 Heoi puta mai ana ki a ratou etahi arero he mea manganga, ano he ahi, a tau ana ki runga ki tetahi, ki tetahi o ratou.

4 Na, ki katoa ratou i te Wairua Tapu, a ka timata te korero, rere ke ana nga reo, rite tonu ki ta te Wairua i hoatu ai ki a ratou kia kore-rotia.

5 ¶ A i Hiruharama e noho ana etahi Hurai, he hunga whakaaro, no nga iwi katoa i raro o te rangi.

6 Na ka haere te rongo o tenei, ka whakarapopoto te mano, ka pororaru, no te mea ka rangona e tera, e tera tona reo e korerotia ana e ratou.

7 Na ka oho ratou katoa, ka miharo, ka mea tetahi ki tetahi, Na, ehara ianei enei katoa e korero nei i te hunga no Kariri?

8 A na te aha tatou ka rongo nei, ia tangata, ia tangata, i o tatou reo o to tatou whanautanga?

9 Te hunga o Patia, o Miria, o Erama, nga mea e noho ana i Mehopotamia, i Huria, i Kaparokia, i Ponoto, i Ahia,

10 I Perukia, i Pamapurua, i Ihipa, i nga wahi o Ripia e patata ana ki Hairini, me nga

manuhiri o Roma, nga Hurai, nga porohiraiti,

11 Nga Kariti, nga Arapi, e rongo ana tatou i a ratou e whakapuaki ana i nga mahi nui a te Atua, a no tatou ano nga reo.

12 A miharo katoa ana ratou, pohēhē ana, ka mea tetahi ki tetahi, He aha tenei?

13 Ko etahi i whakamanu-manu, i mea, E ki ana ratou i te waina reka.

14 ¶ Otira ka whakatika a Pita me te tekau ma tahi, ka karanga ake, ka mea ki a ratou, E nga tāngata o Huria, koutou katoa e noho ana i Hiruharama, kia mohio koutou ki tenei, kia whai taringa mai ki aku kupu:

15 Kahore hoki o enei haurangi me ta koutou e whakaaro nei, ko te toru hoki tenei o nga haora o te ra.

16 Engari ko te mea tenei i korerotia e Hoera poropiti;

17 A, tenei ake kei nga ra whakamutunga, e ai ta te Atua, ka ringihia e ahau toku Wairua ki nga kikokiko katoa: a e poropiti a koutou tama, a koutou tamahine, e kite ano a koutou taitamariki i nga kitenga, a ka moemoea o koutou kaumatua:

18 I aua ra ano ka ringihia e ahau toku Wairua ki aku pononga tāne, ki aku pononga wahine, a ka poropiti ratou:

19 Ka hoatu ano e ahau nga mea whakamiharo i te rangi i runga, me nga tohu ki te whenua i raro; he toto, he kapura, he paoa pongere:

NGA MAHI A NGA APOTORO 2.

20 Ko te ra ka rere ke, ka pouri, ko te marama ka whakatoto, i te mea kiano i puta noa mai taua ra nui o te Ariki e rahi nei te rongo:

21 Na, ko reira ora ai te hunga katoa e karanga ana ki te ingoa o te Ariki.

22 E nga tāngata o Iharaira, kia rongo koutou ki enei kupu; Ko Ihu o Nahareta, he tangata i whakakitea nuitia e te Atua ki a koutou, i runga i nga merekara, i nga mea whakamiharo, i nga tohu i mea te Atua kia mahia e ia i waenganui okoutou, e mahara ana ano ra koutou:

23 Ko tenei tangata i tukua, he whakaaro i whakatakotia, he mea hoki i mohiotia noatia ake e te Atua, tangohia ana e koutou, whakamatea iho, he mea titi e nga ringa kino;

24 Na te Atua ia i whakaara ake, nāna i wewete nga mae o te mate: no te mea e kore ia e taea te pupuri e taua mate.

25 Ko ta Rawiri korero hoki tenei mona, Kua kite noa ake ahau i te Ariki i mua tonu i toku aroaro; kei toku matau nei ia; a e kore ahau e whakakorikoria:

26 Koia i koa ai toku ngakau, i whakamanamana ai hoki toku arero; i takoto tumanako ai ano oku kiko-kiko:

27 No te mea e kore e waiho e koe toku wairua i te po, e kore ano e tukua to Mea Tapu kia kite i te pirau.

28 Kua whakakitea e koe ki

a au nga huarahi o te ora; purena tonu toku koa i tou aroaro.

29 E hoa ma, e oku tēina, e tika ana kia hangai te kupu ki a koutou mo te tupuna, mo Rawiri, kua mate ia, kua tannumia, kei a tatou ano tona urupa, a taea noatia tenei ra.

30 He poropiti ano ia, a i mahara ano kua oati te Atua i te oati ki a ia, ka whakaputaina ake a te Karaiti, he hua no tona hope, he mea hoki no te kikokiko, hei noho ki runga ki tona torona;

31 I kite wawe ia i tenei, a korerotia ana te aranga o te Karaiti, ara, tona wairua kihai i waiho i te reinga, kihai ano tona kikokiko i kite i te pirau.

32 Kua whakaarahia ake tenei Ihu e te Atua: ko matou katoa nga kai whakaatu.

33 Na ka oti nei ia te whakaikike e te ringa matau o te Atua, a ka homai ki a ia e te Matua te Wairua Tapu i korerotia i mua, kua ringihia mai e ia tenei, e kite nei, e rongo nei koutou.

34 Kahore hoki a Rawiri i kake ki te rangi; heoi e mea ana ia, I mea te Ariki ki toku Ariki, Hei toku ringa matau koe noho ai,

35 Kia meinga ra ano e ahau ou hoa riri hei turanga wae-wae mou.

36 Mo reira ra kia mātau pu te whare katoa o Iharaira, kua meinga e te Atua hei Ariki, hei Karaiti, taua Ihu i ripekatia na e koutou.

NGA MAHI A NGA APOTORO 2, 3.

37 ¶ To ratou-rongonga ai, ka pawerawera o ratou ngakau, a ka mea ki a Pita ratou ko era atu apotoro, E hoa ma, engā tuākana, me aha matou?

38 Na, ko te meatanga a Pita ki a ratou, Ripeneta, kia iriiria tena tangata, tena tangata o koutou i runga i te ingoa o Ihu Karaiti, hei murunga hara; a ka riro i a koutou te homaitanga o te Wairua Tapu.

39 Ki a koutou hoki, ki a koutou tamariki te kupu homai, ki te hunga katoa ano o tawhiti, ki nga mea e karanga ai te Ariki, to tatou Atua.

40 A he maha atu era kupu i korero ai, i kauwhau ai ia, i mea ai, Kia ora koutou i tenei whakatupuranga tutū.

41 ¶ Na, nga mea i tango hari i tana kupu, i iriiria, a tata tonu ki te toru o nga mano nga wairua i honoa mai i tauara.

42 A u tonu ratou ki te ako a nga apotoro, ki te whaka-hoatanga, ki te whawhatitaro, ki te inoi.

43 A tau ana te wehi ki nga wairua katoa; he maha hoki nga mea whakamiharo me nga tohu i meinga e nga apotoro.

44 I noho tahi ano te hunga whakapono katoa, i huihuia katoatia ano hoki a ratou mea;

45 A hokoa ana e ratou nga kāinga, me nga taonga, a tu-whaina ana ma te katoa, rite tonu ki te mate o tetahi, o tetahi.

46 Noho tonu ano hoki ratou i tenei ra, i tenei ra, i te temepara, kotahi tonu ano te ngakau, a whawhati taro ana i ia whare, i ia whare, kai ana i a ratou kai i runga i te koa, i te ngakau tapatahi;

47 E whakamoemiti ana ki te Atua, e paingia ana hoki e te iwi katoa. A honoa ana e te Ariki i nga ra katoa ki te hahi te hunga e whakaorangia ana.

UPOKO 3.

Te kopa. 11 Ta Pita kauwhau.

NA, e haere tahi ana a Pita raua ko Hoani ki te temepara i te haora inoi, i te iwa o nga haora.

2 Na ka kawea mai tetahi tangata, he kopa no te kōpū mai ano o tona whaea, he mea whakatakoto i nga ra katoa ki te kuwaha o te temepara i karangatia nei ko Ataahua, ki te tono mea māna i te hunga e tomo ana ki te temepara;

3 A, tona kitenga i a Pita raua ko Hoani meake tomo ki te temepara, ka tono ia ki tetahi mea māna

4 Na ka titiro matatau a Pita raua ko Hoani ki a ia, a ka mea, Titiro mai ki a maua.

5 Na ka tatari ake ia ki a raua, hua noa, ka riro mai tetahi mea a raua māna.

6 Ano ra ko Pita, Kahore aku hiriwa, aku koura; na, taku nei, me hoatu tenei e ahau ki a koe: Whakatika i runga i te ingoa o Ihu Karaiti o Nahareta, haere.

NGA MAHI A NGA APOTORO 3.

7 Na, ko tana hopukanga i tona ringa matau, kei te whakaara: na, kaha tonu iho ona waewae me nga pona.

8 Heoi, tona mokowhitinga a tana, na, haere ana, tomo ki tana me raua ki te temepara, haere ana, tupeke ana, whakamoemiti ana ki te Atua.

9 A ka kite te iwi katoa i a ia e haere ana, e whakamoemiti ana ki te Atua,

10 A ka mahara, ko ia ano tera i noho ki te tona mea māna ki te tataua Ataahua o te temepara: na, ka ohorere ratou, ka miharo ki taua mea i pa ki a ia.

11 ¶ A, i te kopa i whakarangia nei e pupuri ana i a Pita raua ko Hoani, ka oma mai te iwi katoa ki a ratou ki te whakamahau i karangatia nei ko ta Horomona, rahi rawa te miharo.

12 A, te kitenga o Pita, ka mea ki te iwi, E nga tāngata o Iharaira, he aha ta koutou e miharo ki tenei? he aha hoki koutou ka titiro pu mai ai ki a maua, me te mea he mana no maua ake, he ngakau karakia ranei i meatia ai tenei kia haere?

13 Na te Atua o Aperahama, o Ihaka, o Hakopa, na te Atua o o tatou mātua, i whakakororia tana Tama, a Ihu; ta koutou i tuku na, i whakahore na i te aroaro o Pirato, i a ia ra i mea kia tukua ia kia haere.

14 Heoi whakahoretia ana e koutou te Mea Tapu, te Mea Tika, a inoia ana ko te

tangata kohuru kia tukua ki a koutou;

15 A patua ana e koutou te take o te ora; na kua whakarahia nei ia e te Atua i te hunga mate; a ko nga kai whakaatu nei ano matou.

16 A na tona ingoa, na te whakapono hoki ki tona ingoa i whakakaha tenei tangata, e kite nei, e mātau nei koutou; ae, ko te whakapono ki a ia te mea nāna i hoatu tenei tino oranga ki a ia i te aroaro o koutou katoa.

17 Na, e oku tēina, e mahara ana ahau, na te kuare tena mahi a koutou ko o koutou rangatira.

18 Heoi, nga mea a te Atua i whakakitea i mua e nga mangai o ana poropiti katoa, mo te Karaiti kia whakamaetia, kua rite enei i a ia.

19 Na, ripeneta ra koutou, tahuri hoki, kia murua ai o koutou hara, ina tae mai nga wa o te tānga manawa i te aroaro o te Ariki,

20 A ka tonoa e ia a Ihu Karaiti, i kauwhautia nei ki a koutou i mua:

21 Kua takoto nei te tikanga kia noho ia ki te rangi, kia tae mai ra ano nga wa o te whakahokinga o nga mea katoa, o ta te Atua, i korerotia e nga mangai o ana poropiti tapu katoa, o te timatanga ra ano o te ao.

22 I mea ra hoki a Mohi ki nga tupuna, Ma te Ariki, ma to koutou Atua e whakaara ake he poropiti mo koutou i roto i o koutou tēina, he penei ano me ahau te ahua; ko ia

NGA MAHI A NGA APOTORO 3, 4.

ta koutou e whakarongo ai i nga mea katoa e mea ai ia ki a koutou.

23 A, nga wairua katoa e kore e whakarongo ki taua poropiti, ka whakamatea rawatia i roto i te iwi.

24 Na, nga poropiti katoa, o Hamuera iho ano, me o muri nei, te hunga katoa i korero, i poropititia ano enei ra e ratou.

25 Ko koutou nga tamariki a nga poropiti, o te kawenata hoki i whakatakotoria e te Atua ki o tatou tupuna, i a ia i mea ki a Aperahama, Matou uri ka manaakitia ai nga hapu katoa o te ao.

26 Ka oti nei tana Tama, a Ihu te whakaara e te Atua, ka mātua tonoa mai nei ia e ia ki a koutou, hei manaaki i a koutou, hei whakatahuri i tenei, i tenei i o koutou hara.

UPOKO 4.

Ka mau a Pita ma. 5 E whakawakia ana. 8 Ta Pita. 13 Ta ratou. 19 Ta Pita-ma. 23 Ta te hahi. 31 Ta te Atua. 32 To ratou aroha.

A I a raua e korero ana ki te iwi, ka whakaekea raua e nga tohunga, e te rangatira o te temepara, e nga Haruki, 2 I riri mo ta raua ako i te iwi, mo te kauwhautanga hoki i runga i a Ihu i te aranga i roto o te hunga mate.

3 Na ka pa o ratou ringa ki a raua, a ka meinga kia tiakina kia ao ra ano te ra; no te mea kua ahiahi noa ake.

4 Ahakoa ra he tokomaha i

whakapono o te hunga i rongo i te kupu; te tokomaha o nga tātangata, me te mea e rima nga mano.

5 ¶ Na, i te aonga ake, ka huihui o ratou rangatira: a kaumātua me nga karaipi, ki Hiruharama,

6 Ratou ko Anaha tino tohunga, ko Kaiapa, ko Hoani, ko Arehanera, me nga whanaunga katoa o te tohunga nui.

7 Ano ka whakaturia raua ki waenganui, ka uia, Tena koa te mana, te ingoa i meatia ai tenei e korua?

8 A ki tonu a Pita i te Wairua Tapu, ka mea ki a ratou, E nga rangatira o te iwi, e nga kaumātua o Ihairaira,

9 Ki te uia maua aiane i kite mahi pai ki te tangata ngoi-kore, ki te peheatanga i whakaorangia ai ia;

10 Kia mohio koutou katoa, me te iwi katoa o Ihairaira, na te ingoa o Ihu Karaiti o Nahareta i ripekatia na e koutou, i whakaarahia ake ano e te Atua i te hunga mate, nāna tenei i tu ora ai i to koutou aroaro.

11 Ko te kohatu tenei i whakakahoretia e koutou, e nga kai hanga, a kua meinga nei hei upoko mo te kokonga.

12 Kahore hoki he oranga i tetahi ake: kahore hoki he ingoa ke atu i raro o te rangi kua homai ki nga tātangata, e ora ai tatou.

13 ¶ Na ka kite ratou i te maia o Pita raua ko Hoani, a ka mātau ki a raua e hara i te

NGA MAHI A NGA APOTORO 4.

mea whakaako, a he hunga ware, ka miharo ratou; ka mahara hoki he hoa raua no Ihu.

14 A ka kite i te tangata i whakaorangia e tu tahi ana ratou, kahore a ratou kupu hei whakahoki.

15 Na ka tono ratou i a raua kia haere ki waho o te runanga, a ka korororero ki a ratou ano,

16 Ka mea, Me aha e tatou enei tângata? ka kite katoa hoki te hunga e noho ana i Hiruharama, he merekara ingoa nui kua meinga nei e raua; e kore ano e ahei te whakorekore e tatou.

17 Otiia kua e tukua kia horapa atu ki roto ki te iwi; engari kia kaha ta tatou whakawehi i a raua, kia kua e korerotia tenei ingoa ki tetahi tangata, i nga wa e takoto ake nei.

18 A karangatia ana raua e ratou, ka mea ki a raua, Kia kua rawa e korero, kia kua e whakaako i runga i te ingoa o Ihu.

19 Na, ko te whakahokinga a Pita raua ko Hoani ki a ratou, ka mea, Whakaaroa e koutou, ka tika ranei ki te aroaro o te Atua ko koutou kia whakarangona, a kua te Atua?

20 E kore hoki e ahei kia kua e korerotia e maua nga mea i kite ai, i rongo ai matou.

21 Heoi whakawehi ana ano ratou ki a raua, a tukua ana kia haere, kihai hoki i kitea te mea e whiua ai raua, *i wehi*

hoki i te iwi: i whakakororia katoa hoki i te Atua mo taua mea i meatia.

22 No te mea kua wha tekau ke nga tau o te tangata i meinga nei ki a ia tenei merekara whakaora.

23 ¶ A, ka oti raua te tuku, ka haere ki o raua hoa, a korerotia katoatia ana nga mea i korero ai nga tohunga nui me nga kaumātua ki a raua.

24 A, to ratou rongonga ai, ka karanga tahi ratou ki te Atua, ka mea, E te Ariki, ko koe te Atua i hangā ai te rangi me te whenua, temoana, me o reira mea katoa:

25 Nau te kupu *i korerotia* e te mangai o to pononga, o Rawiri, He aha ka nana ai nga tauwi, ka whakaaro horihori ai te iwi?

26 I whakatika nga kingi o te whenua, i huihui ngatahi nga rangatira ki te whawhai ki te Ariki raua ko tana Karaiti.

27 He pono nei hoki te huihuinga o Herora, o Ponotio Pirato, o nga tauwi, ratou ko te iwi o Ihairaira, ki to Tama tapu, ki a Ihu i whakawahia e koe,

28 Ki te mea i ta tou ringa, i ta tou whakaaro i whakatako ai i mua kia meatia.

29 Na, titiro iho, e te Ariki, aiane ki a ratou kupu whakawehi: atukua ki o pononga kia tino maia te korero i to kupu,

30 Whakamarokia mai tou ringa ki te whakaora; a kia meatia nga tohu me nga mea

whakamibaro, i runga i te ingoa o to Tama tapu, o Ihu.

31 ¶ Te mutunga o ta ratou inoi, ka ngaueue te wahi i whakamine ai ratou; a ki katoa ana ratou i te Wairua Tapu, na, maia noa iho ratou ki te korero i te kupu a te Atua.

32 Kotahi ano ngakau, kotahi ano wairua o te mano o te hunga whakapono: kihai ano tetahi i mea, māna ake tetahi o ana taonga; heoi he mea huihui noa iho a ratou mea katoa.

33 A nui atu te kaha i whakapuakina ai e nga apotoro te aranga o te Ariki, o Ihu; he nui ano te aroha noa i runga i a ratou katoa.

34 Kahore hokitetahi o ratou i rawakore: ko te hunga hoki he kāinga, he whare o ratou, hokona ana e ratou, a mauria mai ana nga utu o nga mea i hokoa,

35 A whakatakotoria ana ki nga waewae o nga apotoro: na ka tuwhaina ma ia tangata, ma ia tangata, he mea whakarite ki te mate o tetahi, o tetahi.

36 A ko Hohi i huaina e nga apotoro ko Panapa, (ko te tikanga tenei ina whakamaoritia, Ko te tama a te whakamarietanga,) he Riwa-iti, ko Kaiperu tona kāinga,

37 He wahi whenua tona, na hokoa ana, a mauria mai ana nga moni, whakatakotoria ana ki nga waewae o nga apotoro.

UPOKO 5.

Anania ma—korero teka. 17
Ka mau nga apotoro. 19
Ta te anahera: 21 *Ta ratou.* 22 *Nga katipa.* 27
Kei te runanga. 29 *Ta Pita ma.* 33 *Ka waiho i ta Kamariere.*

NA ka hokona he kāinga e tetahi tangata, ko Anania te ingoa, raua ko tana wahine, ko Liapaira;

2 A wehea ketia atu ana e ia tetahi wahi o te utu, me te mohio ano tana wahine, ka mauria mai tetahi wahi, a whakatakotoria ana ki nga waewae o nga apotoro.

3 Na, ko te meatanga a Pita, E Anania, na te aha i whakakii ai tou ngakau e Hatana kia teka koe ki te Wairua Tapu, a kia wehea atu tetahi wahi o te utu o te whenua?

4 He teka ianei nou ake i te mea kahore ano i riro, a ka oti te hoko, i a koe ano te tikanga mo te pehea, mo te pehea? na te aha tenei mea i whakaaroa ai i roto i tou ngakau? kihai koe i teka ki te tangata, engari ki te Atua.

5 A, te rongonga o Anania i enei kupu, hinga ana, mate rawa: a he nui te wehi i tau ki te hunga katoa i rongo i enei mea.

6 Na ka whakatika nga tai-tamariki, takai ana i a ia, maua atu ana ki waho, tanumia ana.

7 ¶ A ka tata te takiwa ki te toru o nga haora, ka tomo

NGA MAHI A NGA APOTORO 5.

mai tana wahine, kihai i mohio ki taua meatanga.

8 Na, ko te meatanga a Pita ki a ia, Korero mai ki a au, ko nga utu tera i hokoa ai e korua te whenua? Ka mea mai ia, Ae, ko ia tena.

9 Ka mea a Pita ki a ia, He aha korua i ngakau tahi ai ki te whakamatautau i te Wairua o te Ariki? Nana, kei te kuwaha nga waewae o te hunga i tanumia ai to tane, a ma ratou koe e kawe ki waho.

10 Na hinga tonu iho ia ki ona waewae, mate rawa: a, te haerenga mai o nga taitamariki, rokohanga mai kua mate, na kawea ana ki waho, tanumia ana ki te taha o tana tane.

11 A nui atu te wehi o te hahi katoa, o te hunga katoa ano i rangona ai enei mea.

12 ¶ A no nga apotoro nga ringa i meinga ai nga tohu maha, me nga mea whakamiharo, i roto i te iwi; (a i noho ratou katoa ki te whakamahau a Horomona, kotahi ano te ngakau.

13 Kihai hoki tetahi o era atu i maia te uru ki a ratou: a whakanuia ana ratou e te iwi.

14 A nui atu te hunga whakapono i honoa ki te Ariki, tona tini o te tane, o te wahine.)

15 I mauria atu ano e ratou nga turoro ki nga ara, he mea whakatakoto ki nga moenga, ki nga whariki, kia taumarumaruru iho ai ko te atarangi kau o Pita ki tetahi o ratou, i a ia e haere ana.

16 A he tokomaha i huihui mai ki Hiruharama i nga pa o tetahi taha, o tetahi taha, me te mau mai ano i nga turoro, i te hunga ano e whakatoia ana e nga wairua poke: a whakaorangia katoatia ana ratou.

17 ¶ Me i reira ka whakatika te tohunga nui, ratou ko ona hoa katoa, (te titorehanga ki nga Haruki,) ki tonu i te riri,

18 Ka pa o ratou ringa ki nga apotoro, a makā ana e ratou ki te whare herehere nui.

19 Otira na tetahi anahera a te Ariki i uaki nga tatau o te whare herehere i te po; arahina ana ratou e ia ki waho, ka mea ia,

20 Haere, e tu i roto i te temepara, ka korero ki te iwi i nga kupu katoa o tenei ora.

21 A, to ratou rongonga ai, tomo ana ki te temepara i te atatu, ako ana. Na, te haerenga mai o te tohunga nui, ratou ko ona hoa, huihuia ana e ratou te runanga me nga kaumātua katoa o nga tana a Iharaira, ka tonu tangata ki te whare herehere hei tiki i a ratou.

22 A, te taenga atu o nga katipa, kihai ratou i kitea i roto i te whare herehere, na, ka hoki atu, ka korero,

23 Ka mea, Rokohina atu e matou e tutaki ana ano te whare herehere, u tonu, me nga kai tiaki e tu ana i waho o nga tatau: te whakapuare-tanga, kahore kau i kitea tetahi i roto.

NGA MAHI A NGA APOTORO 5.

24 Ano ka rongo te tohunga, ratou ko te rangatira o te temepara, ko nga tohunga nui, ki enei kupu, ka pororaru, he aha ranei te tukunga iho o tena mea.

25 ¶ Na, ko te haerenga mai o tetahi, ka korero ki a ratou, ka mea, Na, te hunga i makāra e koutou ki te whare herehere, e tu mai ra i te temepara, e ako ana i te iwi.

26 Katahi ka haere te rangatira, ratou ko nga katipa, a arahina mai ana ratou, he mea ata hanga: i wehi hoki i te iwi, kei akina ki te kohatu.

27 A ka oti ratou te arahi mai, ka whakaturia ki roto ki te runanga: na ka ui te tohunga nui ki a ratou,

28 Ka mea Kihai koia matou i ata whakatupato i a koutou kia kaua e ako i runga i tenei ingoa? na kua ki nei Hiruharama i ta koutou ako, a e mea ana koutou kia whakairia nga toto o tenei tangata ki a matou.

29 Na, ko te whakahokinga a Pita, ratou ko nga apotoro, ka mea, Erangi te whakarongo ki te Atua, kaua ki te tangata.

30 Na te Atua o o tatou tūpuna i whakaara ake a Ihu, kua whakamatea na e koutou, he mea whakairi ki te rakau.

31 Kua oti tenei te whakanoho ki runga e te ringa matau o te Atua, hei Piriniha, hei Kai whakaora, hei homai i te ripeneta, i te murunga hara ki a Ihairaira.

32 A ko matou ana kai wha-

kaatu i enei mea; ko te Wairua Tapu ano i homai e te Atua ki te hunga e rongo ana ki a ia.

33 ¶ A, to ratou rongonga ai, mamae pu ratou, a ka runanga kia whakamatea ratou.

34 Na ka whakatika tetahi o nga Parihi i roto i te runanga, ko Kamariere te ingoa, he kai whakaako i te ture, he tangata e whakanuia ana e te iwi katoa, ka mea, kia nekehia atu nga apotoro ki waho tetahi wahi;

35 Na, ko tana meatanga ki a ratou, E nga tāngata o Ihairaira, kia tupato ki ta koutou e mea ai ki enei tāngata.

36 I mua hoki i enei ra ka whakatika a Teura, me te ki ano, ko ia tetahi *tangata nui*; a tata tonu ki te wha o nga raute tokomaha o nga tāngata i huihui ki a ia: na, marū iho ia; whakamararatia ake hoki te hunga katoa i rongo ki a ia, kore ake.

37 A, muri iho i taua tangata, ka whakatika a Hura o Kariri i nga ra o te tuhituhinga, a he tini te tangata i kumea ki te whai i a ia; ngaro iho ano ia; marara ake te hunga katoa i rongo ki a ia.

38 Na, ko taku kupu tenei ki a koutou, Kati te mea ki enei tāngata, waiho; ki te mea hoki na te tangata tenei whakaaro, tenei mahi, tera e kahore noa iho:

39 Tena, na te Atua, e kore rawa e taea te whakahakore e koutou; kei kitea pea e wha-whai ana koutou ki te Atua.

NGA MAHI A NGA APOTORO 5, 6.

40 A rongo rawa ratou ki a ia: na ka karanga i nga apotoro, ka whiu, ka whakapato, kia kua e korero i runga i te ingoa o Ihu, a tukua ana kia haere.

41 Heoi haere hari atu ana ratou i te aroaro o te runanga, no te mea i paingia ratou kia whaikinotia mo tona ingoa.

42 A i tenei ra, i tenei ra, hore rawa kia mutu ta ratou ako, ta ratou kauwhau i a Ihu Karaiti, i roto i te temepara, i tenei whare, i tenei whare.

UPOKO 6.

Nga rikona mo nga rawakore.

8 *Tepene.* 11 *Ka whakawakia:*

NA, i aua ra, i te mea ka tokomaha haere nga akonga, ka amuamu nga Hurai whaka-Kariki ki nga Hiperu, no te mea i hapa a ratou pouaru i nga mea i tuwhaina i tenei ra, i tenei ra.

2 Katahi ka karangatia e te tekau ma rua te mano o nga akonga, ka mea E kore e pai kia whakarerea e matou te kupu a te Atua, a ko te mahi tepu ma matou.

3 Na tirohia iho, e nga tēina, i roto i akoutou kia tokowhitu nga tangata e korerotia paitia ana, e kī ana i te Wairua Tapu, i te mahara, a ma matou ratou e whakatu ki tenei mahi.

4 Ko matou ia ka u tonu ki te inoi, ki te mahi i te kupu.

5 A pai katoa te mano ki taua korero: na, whiriwhiria ana e ratou a Tepene, he tangata e kī ana i te whakapono,

i te Wairua Tapu, ratou ko Piripi, ko Porokoru, ko Nikanora, ko Timona, ko Paramena, ko Nikora, he porohiraiti no Anatioka:

6 Na whakaturia ana ratou ki te aroaro o nga apotoro: ka inoi era, ka whakapa i nga ringa ki a ratou.

7 ¶ Heoi tupu ana te kupu a te Atua; tino nui haere ana te tokomaha o nga akonga i Hiruharama; a he tokomaha rawa nga tohunga i tahuri mai ki te whakapono.

8 ¶ A ki tonu a Tepene i te whakapono, i te kaha, he nui hoki nga merekara me nga tohu i meatia e ia i roto i te iwi.

9 Na ka whakatika etahi o te whakaminenga e karangatia nei, no nga Riperetini, me etahi o nga tangata o Hairini, o Arehanaria, o te hunga hoki o Kirikia, o Ahia, totohe ai ki a Tepene.

10 A kihai i tau i a ratou te whakatae ki te mohio, ki te wairua i korero ai ia.

11 Na ka whakaki ratou i etahi tangata hei mea, I rongo matou i a ia e korero kohukohu ana mo Mohi, mo te Atua ano hoki.

12 A whakaohokia ana e ratou te iwi, nga kaumatua, me nga karaipi, na, whakaekea ana ia e ratou, hopukia ana, kawea ana ki te runanga.

13 A whakaturia ana e ratou etahi kai whakapae teka hei mea, Kahore e mutu te korero a tenei tangata i nga kupu

NGA MAHI A NGA APOTORO 6, 7.

kohukohu mo tenei kāinga tapu, mo te ture :

14 I rongo hoki matou ki a ia e mea ana, Ma tenei Ihu o Nahareta e pākaru te kāinga nei, e whakaputa ke nga rite-nga i homai e Mohi ki a tatou.

15 A ka titiro pu ki a ia te hunga katoa e noho ana i te runanga, ka kite i tona mata, ano he mata anahera.

UPOKO 7.

Ta Tepene korero whakapapa.

He whakahaere i ta te Atua, i ta ratou ko o ratou tupuna;

52 I ta ratou ki a Ihu. 54

Ka riri. 59 Tona matenga.

KATAHI ka mea te tohu-nga nui, He pono ranei enei mea ?

2 Na, ko tana meatanga, E hoa ma, e *oku* tuākana, e *aku* mātua, whakarongo; I puta te Atua o te kororia ki to tatou matua, ki a Aperahama, i a ia i Mehopotamia, i te mea kiano i noho noa ki Karana,

3 I mea ki a ia, Haere atu i tou whenua, i ou whanaunga, a haere mai ki te whenua e whakakitea e ahau ki a koe.

4 Na, ko tona haerenga mai i te whenua o nga Karari, noho ana ki Karana: a, te matenga o tona pāpā, ka whakahekea mai ia ki tenei whenua e noho nei koutou.

5 A kihai i homai tetahi kāinga mona i konei, kahore noa iho he turanga waewae: heoi i mea mai ia, e homai a konei hei kāinga mona, mo tona whanau ano i muri i a ia, i te mea kahore ano ana tamariki.

6 I penei ano te korero a te Atua, e noho manene tana whanau ki te whenua ke: ka meinga hoki hei pononga, a e wha rau nga tau e tukinotia ai.

7 Na, te iwi e meinga ai ratou hei pononga, ka whakawakia e ahau, e ai ta te Atua: muri iho i tenei ka puta mai ratou, a ka karakia i tenei wahi ki a au.

8 A i homai ano e ia ki a ia te kawenata o te kotinga: a whanau ake tana tama ko Ihaka, a i te tuawaru o nga ra ka kotia; a na Ihaka a Hakopa; na Hakopa hoki nga tūpuna kotahi tekau ma rua.

9 Na ka hae nga tūpuna, a hokoa ana a Hohepa ki Ihipa: otira i a ia te Atua;

10 Nāna ia i whakaora i ona matenga katoa, a homai ana ki a ia he pai, he matauranga i te aroaro o Parao kingi o Ihipa; a meinga ana e tera hei kawana mo Ihipa, mo tona whare katoa.

11 Na, ko te putanga o te mate kai ki te whenua katoa o Ihipa, o Kanaana, he nui te mate: kihai rawa i kitea he orange e o tatou mātua.

12 Ano ka rongo a Hakopa, e whai witi ana a Ihipa, ka mātua tonoa e ia o tatou mātua.

13 A i te rua o nga haerenga ka whakaaturia a Hohepa ki ona tuākana; a ka kitea e Parao te iwi o Hohepa.

14 Na ka tono tangata a Hohepa ki te tiki i tona pāpā, i a Hakopa, me ona huānga katoa, e whitu tekau ma rima nga wairua.

NGA MAHI A NGA APOTORO 7.

15 Na ka heke a Hakopa ki Ihipa, a ka mate, a ia, me o tatou mātua.

16 Ka kawea ratou ki Hike-me, ka whakatakotoria ki te urupa i hokoa e Aperahama, he mea hoko ki te moni i nga tama a Emora *papā* o Hikeme.

17 Ano ka tata te wa mo te mea i korerotia i mua, i oatitia e te Atua ki a Aperahama, ka tupu te iwi, ka tini haere ki Ihipa,

18 A whakatika noa tetahi atu kingi kihai nei i mohio ki a Hohepa.

19 Tinihangatia ana e tenei to tatou iwi, whakaturupuria kinotia ana o tatou matua, meinga ana kia makā atu a ratou tamariki kei ora.

20 I taua wa ka whanau a Mohi, he mea ataahua ki te Atua, e toru nga marama i whangainga ai ia i roto i te whare o tona pāpā.

21 A ka oti ia te maka atu, ka tangohia ake e te tamahine a Parao, a atawhaitia ana hei tamaiti māna.

22 Na ka whakaakona a Mohi ki nga whakaaro mohio katoa o nga Ihipi, kaha rawa te kupu, te mahi.

23 A, ka tino wha tekau ona tau, ka mea a roto o tona ngakau, kia kite ia i ona tuākana, i nga tama a Ihairaira.

24 A, ka kite ia i tetahi e whakaturupuria kinotia ana, ka awhinatia e ia, a rapua ana e ia he utu mo te mea i tuki-notia, patua iho e ia te Ihipi.

25 Hua noa e mohio ona tuākana, nona te ringa e ho-

mai ai e te Atua te whakao-ranga mo ratou: heoi kihai ratou i mohio.

26 Na, i te aonga ake, ka puta ano ia ki etahi e wha-whai ana ki a raua, ka tohe kia houhia ta raua rongo, ka mea, E hoa ma, he teina he tuakana korua; he aha tetahi ka kino ai ki tetahi?

27 Heoi turakina atu ana ia e te tangata nana te hē ki tona hoa; i mea ia, Na wai koe i mea hei rangatira hei kai whakarite whakawa mo mana?

28 E mea ana koe ki te whakamate i a au, me koe i whakamate i te Ihipi inanahi?

29 Na ka oma a Mohi i taua korero, a noho manene ana i te whenua o Miriana; a whanau ana ki reira ana tama tokorua.

30 A, ka tino rite nga tekau e wha o nga tau, ka puta ki a ia i te koraha o maunga Hinai tetahi anahera a te Ariki, i roto i te mura ahi i te rakau.

31 A, te tirohanga a Mohi, ka miharo ki taua kitenga: a i a ia e whakatata ana ki te matakitaki, ka puaki te reo o te Ariki ki a ia,

32 Ko ahau te Atua o ou mātua, te Atua o Aperahama, te Atua o Ihaka, te Atua o Hakopa. Heoi wiri noa a Mohi, kihai i ngoto te titiro atu.

33 Na, ko te kiangā a te Ariki ki a ia, Wetekia nga hu o ou waewae: he whenua tapu hoki te wahi e tu na koe.

34 Kua kite ahau, kua kite

ahau i te matenga o taku iwi i Ihipa, kua rongo hoki i to ratou auetanga, a kua heke iho nei ki te whakaora i a ratou. Na, haere mai, me tonoko e ahau ki Ihipa.

35 Ko taua Mohi i whakakahoretia ra e ratou, i mea ra ratou, Na wai koe i mea hei rangatira hei kai whakarite whakawa? ko ia ano i tonoa e te Atua hei rangatira, hei kai whakaora, he mea ki mai na te anahera i puta ki a ia i roto i te rakau.

36 Nāna ratou i arahi mai ki waho, i muri iho i tana malinga i nga mea whakamiharo i nga tohu ki te whenua o Ihipa, ki te moana Whero, ki te koraha, i nga tau e wha tekau.

37 Ko taua Mohi ano tenei nāna nei i mea ki nga tama a Iharaira, Ma te Ariki, ma to koutou Atua e whakaara ake he poropiti mo koutou, i roto i o koutou tēina, he penei ano me ahau; ko ia ta koutou e rongo ai.

38 Ko ta te hahi tangata tenei i te koraha, ko te hoa o te anahera i korero ki a ia i maunga Hinai, o o tatou mātua ano hoki: i riro mai ano i a ia nga ture ora kia homai ki a tatou:

39 Kihai nei o tatou mātua i pai ki te whakarongo ki a ia, heoi peia ana ia e ratou, a hoki ana o ratou ngakau ki Ihipa,

40 A mea ana ratou ki a Arona, Hangā ma tatou etahi atua hei haere i mua i a tatou: ko tenei Mohi hoki i

arahina mai ai tatou i te whenua o Ihipa, kahore tatou e mātau i ahatia ranei.

41 Heoi hangā ana e ratou he kuao kau i aua ra, a tapaea ana he patunga tapu ma taua whakapakoko, a koa ana o ratou ngakau ki nga mahi a o ratou ringa.

42 Na ka tahuri te Atua, ka tukua ratou kia karakia ki te ope o te rangi: kia pera me *te mea* i tuhia ki te pukapuka a nga poropiti, E te whare o Iharaira, i homai koia e koutou ki a au nga patunga tapu me nga whakahere, i nga tau e wha tekau i te koraha?

43 Na kua mau koutou ki te tapenakara o Moroka, ki te whetu o to koutou atua, o Remapana, ki nga whakapakoko i hangā e koutou hei koropikonga atu; na, maku koutou e kawea atu ki ko atu i Papurona.

44 I o tatou tūpuna te tapenakara o te whakaaturanga i te koraha, tana hoki i whakarite ai, i mea ai ki a Mohi kia hangā e ia, kia rite ki te ahua i kite ai ia.

45 A, te rironga mai i o tatou tūpuna, na mauria mai ana e ratou ko Hohua ki te whenua o nga tau iwi i peia nei e te Atua i te aroaro o o tatou tūpuna, a taea noatia nga ra i a Rawiri;

46 Na, i paingia tera e te Atua, a ka mea ia kia kitea tetahi tapenakara mo te Atua o Hakopa.

47 Na Horomona ia i hanga he whare mona.

48 He ahakoa e kore a te

NGA MAHI A NGA APOTORO 7, 8.

Runga rawa e noho ki nga whare i hangā e te ringa, ko ta te poropiti hoki tena i mea ai,

49 Ko te rangi toku torona, ko te whenua toku turanga waewae: he whare pehea ta koutou e hanga ai moku? e ai ta te Ariki: a ko tehea te wahi e okioki ai ahau?

50 Ehara koia i toku ringa nana enei mea katoa i hanga?

51 ¶ E te hunga kakī maro, kahore nei i kotia te ngakau, te taringa, tutū tonu koutou ki te Wairua Tapu: rite tonu ta koutou ki ta o koutou tūpuna.

52 Ko tehea o nga poropiti kihai i whakatupuria kinotia e o koutou mātua? a marū iho i a ratou te hunga i poropititia ai te haerenga mai o te Tika: ko koutou nei ona kai tuku, ona kai whakamate:

53 Kua riro ano i a koutou te ture, he mea whakatakoto mai na nga anahera, heoi kihai i mau i a koutou.

54 ¶ A, to ratou rongonga i enei mea, mamae pu o ratou ngakau, tetea noa iho nga niho ki a ia.

55 Otiia ki tonu ia i te Wairua Tapu, a titiro pu ana ki te rangi, ka kite i te kororia o te Atua, me Ihu e tu ana ki te ringa matau o te Atua;

56 Na, ko tana kiangā atu, Nana, ka kite ahau i nga rangi e tuwhera ana, me te Tama a te tangata e tu ana i te ringa matau o te Atua.

57 Na, nui atu to ratou reo ki te hamama, purua ana o

ratou taringa, tahi tonu te amohanga mai ki a ia,

58 Makā ana e ratou ki waho o te pa, akina iho ki te kamaka: i whakatakotoria ano e nga kai whakaatu o ratou kakahu ki nga waewae o te tahi taitamariki, ko Haora te ingoa.

59 Heoi akina ana a Tepene ki te kamaka e ratou, i a ia e karanga ana, e mea ana, E te Ariki, e Ihu, tena toku wairua ki a koe.

60 Na tukua ana e ia nga turi, a nui atu tona reo ki te karanga, E te Ariki, aua tenei hara e whakairia ki a ratou. A, tana korerotanga i tenei, ka moe.

UPOKO 8.

Piripi ki Hamaria. 14 A

Pita-ma ka ungā ki reira.

18 Haimona Makutu. 26

Unaka o Etiopia.

A I reira a Haora e whakaae ana ki tona mate-nga. Na, he nui te whakatoinga o te hahi i Hiruharama i taua wa: a marara katoa ratou, puta noa i nga wahi o Huria, o Hamaria; kahore ia nga apotoro.

2 A na te hunga whakaaro a Tepene i kawē i taua, he nui hoki te tangihanga i tangihia ai ia e ratou.

3 Ko Haora ia, raru ana i a ia te hahi, tomo ana ki tenei whare, ki tenei whare, toia ana nga tāne nga wahine, a hoatu ana ki roto ki te whare herehere.

4 ¶ Na, nga mea i marara

NGA MAHI A NGA APOTORO 8.

atu, haere noa atu ana me te kauwhau i te kupu.

5 I haere ano a Piripi ki te pa o Hamaria, a kauwhau ana i a te Karaiti ki a ratou.

6 Na, kotahi ano te ngakau o nga tangata ki te whakarongo ki nga mea i korero ai a Piripi, i a ratou e rongono ana, e kite ana, i nga merekara i mea ai ia.

7 I puta mai hoki nga wairua poke i roto i te tini e nohoia ana, he nui hoki te reo ki te karanga: he tokomaha ano nga pararutiki, nga kopa, i whakaorangia.

8 A nui atu te hari o taua pa.

9 ¶ Na, ko tetahi tangata, ko Haimona te ingoa, no mua nei tana mahi makutu i roto i taua pa, e ki ana he tangata nui ia, a miharo noa te iwi o Hamaria.

10 A i whakarongo katoa ki a ia te iti, te rahi, i mea, Ko te kaha nui o te Atua tenei tangata.

11 I whakarongo ai ratou ki a ia, kua roa ke hoki to ratou miharotanga ki ana mahi makutu.

12 Ano ka whakapono ratou ki a Piripi e kauwhau ana i nga mea o te rangatiratanga o te Atua, o te ingoa hoki o Ihu Karaiti, ka iriiria ratou, nga tane, nga wahine.

13 Me Haimona ano, i whakapono ano ia, i iriiria, a u ana ki a Piripi; a, tona kite nga i nga merekara, i nga tohu nunui i meinga, ka miharo.

14 ¶ A ka rongono nga apo-

toro i Hiruharama, ko Hamaria kua tango i te kupu a te Atua, ka tonoa ki a ratou a Pita raua ko Hoani.

15 To raua taenga atu, ka inoi mo ratou kia riro te Wairua Tapu i a ratou:

16 (Kahore hoki ia i tau noa ki tetahi o ratou: i iriiria kautia i runga i te ingoa o te Ariki, o Ihu.)

17 Me i reira ka whakapakia nga ringa ki a ratou, a ka riro mai te Wairua Tapu.

18 ¶ A, te kitenga o Haimona, na te panga o nga ringa o nga apotoro i hoatu ai te Wairua Tapu, ka mauria mai he moni ki a ratou,

19 Ka mea ia, Homai hoki ki a au tenei mana, kia riro ai te Wairua Tapu i te tangata e whakapakia e oku ringa.

20 Na, ko te meatanga a Pita ki a ia, Kia pirau ngatahi korua ko to moni, ina koe ka mea, ma te moni ka whiwhi ai ki nga mea e homai ana e te Atua.

21 Kahore he wahi mou, kahore he taunga mou ki tenei mea: kahore hoki i tika tou ngakau i te aroaro o te Atua.

22 Na ripenetatia tenei kino au, inoi ki te Atua, me kore e murua te whakaaro o tou ngakau.

23 Kua kite hoki ahau i a koe, kei te au kawa, kei te here o te kino.

24 Na, ko te whakahokinga a Haimona, ka mea, Ma korua e inoi moku ki te Ariki, kei pa ki a au tetahi o nga mea kua korerotia na e korua.

NGA MAHI A NGA APOTORO 8, 9.

25 ¶ A ka mutu ta raua whakaatu, ta raua kauwhau i te kupu a te Ariki, ka hoki ki Hiruharama, a he maha nga kaininga o nga Hamari i kauwhautia ai e raua te rongo pai.

26 ¶ Na ka ki tetahi ana-hera a te Ariki ki a Piripi, ka mea, Whakatika, haere ki te tonga, ki te ara e maro ana i Hiruharama ki Kaha; he wahi koraha tena.

27 Whakatika ana ia, haere ana: na, ko tetahi tangata o Etiopia, he unaka, he tangata nui na Kanarahi kuini o nga Etiopia, ko te kai tiaki ia o ona taonga katoa, i haere ki Hiruharama, ki te karakia,

28 A e hoki ana, e noho ana i runga i tona hariata, me te korero i a Ihaia poropiti.

29 Na, ko te meatanga a te Wairua ki a Piripi, Haere, awhitia atu ki te hariata ra.

30 Heoi oma atu ana a Piripi, a, ka rongo ki a ia e korero ana i a Ihaia poropiti, ka mea atu, E mātau ana ranei koe ki tau e korero na?

31 Ano ra ko ia, Me pehea koia, ki te kore tetahi e aratiki i a au? Na ka mea ia ki a Piripi kia eke ki runga, noho tahi ai raua.

32 A, te wahi o te karaipiture i korero nei ia, ko ia tenei, Ano he hipi i arahina ia kia patua; a me te reme i te aroaro o tona kai kukuti e wahangu ana, kihai i kuihi tona waha:

33 I tona whakaitinga i wha-

kakorea he whakarite whakawa mona: ma wai hoki tona whakatupuranga e korero? kua tangohia hoki ia kei ora ki te whenua.

34 Na ka oho te unaka, ka mea ki a Piripi, Tena koa, mo wai tenei korero a te poropiti? mona ranei, mo te tangata ke ranei?

35 Na ka puaki te mangai o Piripi, a ka timata i taua karaipiture ano, kauwhautia ana e ia a Ihu ki a ia.

36 A, i a raua e haere ana i te ara, ka tae ki tetahi wai: a ka mea te unaka, Na, he wai; he aha ahau tē iriiria ai?

37 Mea atu ana a Piripi, Ki te whakapono katoa tou ngakau, e ahei ano. Na ka whakahokia e ia, a ka mea, E whakapono ana ahau ko Ihu Karaiti te Tama a te Atua.

38 Katahi tera ka mea kia tu te hariata: a heke ana raua ki te wai, a Piripi raua ko te unaka, a iriiria ana ia e ia.

39 A, to raua haerenga ake i te wai, kahakina atu ana a Piripi e te Wairua o te Ariki, a heoi ano to te unaka kitenga i a ia: na haere hari ana ia i tona ara.

40 Ko Piripi ia, i kitea ki Ahota: na haereere ana ia ki te kauwhau ki nga pa katoa, tae noa ki Hiharia.

UPOKO 9.

Haora ki Ramahiku. 4 Ihu ki a ia. 18 Iriiringa. 20 Kauwhautanga. 23 Oranga

NGA MAHI A NGA APOTORO 9.

noatanga. 26 Kei Hiruharama. 32 Ta Pita ki a Ainia, 36 ki a Tapita.

KO Haora ia, he whakawehi tonu, he patu ta tona ngakau mo nga akonga a te Ariki, a haere ana ki te tohunga nui;

2 Kei te tono pukapuka i a ia ki nga whakaminenga i Ramahiku, mo te tutaki rawa ake ki etahi tangata e anga penei ana, nga tane, nga wahine, ka herea e ia, ka kawea ki Hiruharama.

3 I a ia ano e haere ana, a ka whakatata ki Ramahiku; na whiti whakarere ana ki a ia he maramatanga no te rangi:

4 Hinga ana ia ki te whenua, ka rongo i tetahi reo e mea ana ki a ia, E Haora, e Haora, he aha tau e whakato nei i a au?

5 Ano ra ko ia, Ko wai koe, e te Ariki? Ka mea te Ariki, Ko Ihu ahau, e whakatoia nei e koe: ehara tau, te whana ki nga koikoi.

6 Na wiri ana ia, ihiihi ana, ka mea, E te Ariki, kia aha ahau? Ano ra ko te Ariki ki a ia, Whakatika, tomo atu ki te pa, a ka korerotia ki a koe tau e mea ai.

7 Na, nga tangata i haere tahi ra ia, tu reo kore ana ratou, rongo kau ana ki te reo, kahore i kitea he tangata.

8 A, te whakatikanga ake o Haora i te whenua, te mawheratanga o ona kanohi, hore rawa ana tangata i kite ai: na ka arahina ringari-

ngatia ia, a kawea ana ki Ramahiku.

9 A e toru ona ra kihai ia i kite, kihai i kai, kihai i inu.

10 ¶ Na, i Ramahiku tetahi akonga, ko Anania te ingoa; a ka puta te Ariki, ka mea ki a ia, he mea kitenga, E Anania. A ka mea tera, Tenei ahau, e te Ariki.

11 Ano ra ko te Ariki ki a ia, Whakatika, haere ki te ara e karangatia nei ko Tika, ka rapu i roto i te whare o Hura i tetahi tangata, ko Haora te ingoa, no Tarahu: kei te inoi hoki ia,

12 A kua kite mocmoea i tetahi tangata, ko Anania te ingoa, e tomo ana, e whakapa ana i tona ringa ki a ia, kia kite ai ia.

13 Na, ko te whakahokinga a Anania, E te Ariki, he tokomaha aku i rongo ai ki tenei tangata, ki te nui o ana kino i mea ai ki tau hunga tapu i Hiruharama:

14 A tenei ano kei a ia he tikanga i nga tohunga nui, kia herea katoatia te hunga e karanga ana ki tou ingoa.

15 Heoi ka mea te Ariki ki a ia, Haere: he mea whiriwhiri ia naku, hei mau mo toku ingoa ki te aroaro o nga tauwi, o nga kingi, o nga tama a Ihairaira:

16 Ka whakakitea atu hoki e ahau ki a ia nga mea nui e mamae ai ia mo toku ingoa.

17 Na haere ana a Anania, tomo ana ki roto ki te whare, ka whakapa i ona ringa ki a ia, ka mea, E toku teina, e

Haora, na te Ariki, na Ihu i puta ra ki a koe i te ara i haere mai na koe, nāna ahau i tono mai, kia kite ai koe, kia ki ai hoki i te Wairua Tapu.

18 Na marere tonu iho *etahi mea*, ano he unahi, i ona kanohi, a kite tonu ake ia, ka whakatika, ka iriiria.

19 ¶ Na ka kai ia, ka whai kaha. Na, noho ana a Haora ki nga akonga i Ramahiku i etahi ra;

20 A kauwhautia tonutia ana e ia a te Karaiti i roto i nga whare karakia, ko te Tama ia a te Atua.

21 A miharo tonu te hunga katoa i rongo, ka mea, Ehara ianei tenei i te kai whakangaro o te hunga i karanga ki tenei ingoa i Hiruharama, a ko te mea ano tenei i haere mai ai ia, kia herea ratou, kia arahina ki nga tohunga nui?

22 Heoi ka kaha haere a Haora, a whakapororarutia ana e ia nga Hurai e noho ana i Ramahiku, i a ia e whakakite ana ko te Karaiti ano tenei.

23 ¶ A ka maha nga ra ka pahure, ka runanga nga Hurai kia whakamatea ia:

24 Heoi i mātau a Haora ki ta ratou whakapapanga *mona*. A whanga tonu ratou ki nga tataui i te ao, i te po, kia whakamatea ia.

25 Na ka mau nga akonga ki a ia i te po, a tukua iho ana e ratou ra te taiepa i roto i te kete.

26 ¶ A, te taenga o Haora ki Hiruharama, ka whai kia uru ki nga akonga: otiia i wehi katoa ratou i a ia, kibia i whakapono he akonga ia.

27 Na ka tango a Panapa i a ia, a arahina ana ki nga apotoro, a korerotia ana e ia ki a ratou tona kitenga i te Ariki i te ara, tana korerotanga hoki ki a ia, tona maia hoki ki te kauwhau i Ramahiku i runga i te ingoa o Ihu.

28 Na ka noho ia i a ratou, haereere atu ana, haereere mai ana i Hiruharama.

29 A maia rawa ia te kauwhau i runga i te ingoa o te Ariki, o Ihu, korero ana, totohe ana ki nga Hurai whakakari: otiia ka whakanga-kau ratou kia whakamatea ia.

30 A, ka mohio nga tuākana, ka arahina ia ki raro, ki Hiharia, a tonoa ana ki Tarahu.

31 ¶ Na ka whai tānga manawa nga hahi, puta noa i Huria, i Kariri, i Hamaria, tupu ana te whakaaro; a haere ana i runga i te wehi o te Ariki, i te whakamarietanga ano a te Wairua Tapu, ka whakatokomahatia

32 ¶ A, i a Pita e haereere ana ki nga *kāinga* katoa, ka haere ki raro, ki nga tāngata tapu e noho ana i Raira.

33 A ka kitea i reira tetahi tangata, ko Ainia te ingoa, e waru ona tau i takoto ai i runga i te moenga, he pararutiki.

34 Na, ko te meatanga a Pita ki a ia, E Ainia, ka ora koe i a Ihu Karaiti: whaka-

NGA MAHI A NGA APOTORO 9, 10.

tika, wharikitia tou moenga. Na whakatika tonu ake ia.

35 A i kite katoa i a ia te hunga e noho ana i Raira, i Harona, a tahuri ana ki te Ariki.

36 ¶ Na, i Hopa tetahi ako-nga e noho ana, ko Tapita te ingoa, te whakamaoritanga, ko Roka: he mahi tonu ta taua wahine i nga mahi pai, he atawhai rawakore.

37 A i aua ra ka turorotia ia, ka mate rawa: a ka oti ia te horoi e ratou, ka whakata- katoria ki to runga ruma.

38 Na, e tata ana Raira ki Hopa, a, te rongonga o nga akonga, kei reira a Pita, ka tonoa e ratou tokorua nga tângata ki a ia hei mea, kia kua ia e whakaroa ki te haere ki a ratou.

39 Na whakatika ana a Pita, haere tahi ana ratou. Tona taenga atu, ka arahina ki te ruma i runga: a i tona taha e tu ana nga pouaru katoa, e tangi ana, e whaka- kite ana i nga koti i nga ka- kahu i hangā e Roka, i a ia e noho ana i a ratou.

40 Na ka tonoa ratou katoa e Pita ki waho, ka tukua ona turi, ka inoi; na tahuri ana ia ki te tupāpaku, ka mea, E Tapita, e ara. Na ka titiro ona kanohi: a ka kite i a Pita, ka noho ki runga.

41 Na hoatu ana e ia tona ringa ki a ia, whakaarahia ana ia, a ka oti te karanga nga tângata tapu me nga pouaru, hoatu ora ana i a ia.

42 A ka rangona tenei puta

noa i Hopa; he tokomaha hoki i whakapono ki te Ariki.

43 A he maha ona ra i noho ai ia ki Hopa, ki a Haimona kai mahi hiako.

UPOKO 10.

Koroniria. 9 Putanga ki a Pita. 23 Kei a Koroniria- ma. 44 To ratou iriiringa.

NA, i Hiharia tetahi tanga- ta, ko Koroniria te ingoa, he keneturio no te pu i kara- ngatia nei ko to Itari;

2 He tangata karakia ia, e wehi ana i te Atua, ratou ko tona whare katoa, he maha ana mahi atawhai ki te iwi, me te inoi tonu ano ki te Atua.

3 I kite nui ia, i te mea ka tata ki te iwa o nga haora o te ra, i tetahi anahera a te Atua, he mea kitenga, e haere mai ana ki a ia, e mea ana hoki ki a ia, E Koroniria.

4 Na ka titiro pu atu ia ki a ia, a ka wehi, ka mea, He aha, e te ariki? Ka ki mai tera ki a ia, Kua puta ake au inoi me au mahi atawhai, hei whakamaharatanga ki te aro- aro o te Atua.

5 Na tonoa aianeia he tangata ki Hopa, ki te tiki i a Hai- mona, te rua nei o ona ingoa ko Pita:

6 He manuhiri ia na Hai- mona kai mahi hiako, kei te taha nei o te moana tona whare: māna e korero ki a koe tau e mea ai.

7 A, te rironga o te anahera i korero nei ki a Koroniria, tokorua ana tângata i kara- ngatia e ia, me tetahi hoia

NGA MAHI A NGA APOTORO 10.

karakia no te hunga e piri tonu ana ki a ia;

8 A, ka oti *enei* mea katoa te korero ki a ratou, ka tonoa ratou e ia ki Hopa.

9 ¶ Na, i te aonga ake, i a ratou e haere ana, a ka whakatata ki te pa, ka kake a Pita ki runga ki te tuanui, i te ono o nga haora, ki te inoi:

10 Na, ka nui tona mate kai, ka mea ia ki te kai: otira, i a ratou e taka ana, ka puta te ngakau matakite ki a ia;

11 Na ka kite i te rangi e mawhera ana, me tetahi mea e heke iho ana ki a ia, ano he kakahu nui, he mea here i nga pito e wha, a tatū rawa ki raro ki te whenua:

12 A i runga ano i taua mea nga mea waewae-wha katoa o te whenua, me nga kararehe mohao, me nga mea ngokingoki, me nga manu o te rangi.

13 Na, ko te putanga o te reo ki a ia, E Pita, e ara; patua, e kai.

14 Na, ko te kiana atu a Pita, Kahore, e te Ariki; kiano hoki ahau i kai i te mea noa, i te mea pake.

15 Na ka tuaruatia ano te reo ki a ia, Ko ā te Atua i mea ai kia mā, aua e whakanoatia e koe.

16 A, ka toru nga meatanga o tenei, ka whakahokia taua mea ki te rangi.

17 ¶ Heoi, i a Pita e whakaroaro ana i roto i a ia ki te tikanga o te kitenga nei, na, ko nga tāngata i tonoa e Koroniria kua ui ki te whare o

Haimona, a e tu ana i te kuwaha,

18 E karanga ana, e ui ana, me kahore he manuhiri i kona, a Haimona, te rua nei o ona ingoa ko Pita.

19 A, i a Pita e whakaaro ana ki taua kitenga, ka mea te Wairua ki a ia. Nana, tokotoru enei tāngata e rapu nei i a koe.

20 Na whakatika, heke atu, haere tahi koutou, kei ruarua; naku hoki ratou i tonoa mai.

21 Na ka haere iho a Pita ki aua tāngata i tonoa mai ki a ia e Koroniria; ka mea, Ko ahau tenei e rapua nei e koutou: he aha tenei e tu nei koutou?

22 Na ka mea ratou, Ko Koroniria ra, he keneturio, he tangata tika, e wehi ana i te Atua, e korerotia paitia ana e te iwi katoa o nga Hurai, kua whakamaharatia ia e tetahi anahera tapu kia tikina mai koe ki tona whare, kia rongoi ia ki etahi kupu i a koe.

23 ¶ Na karangatia ana ratou e ia ki roto hei manuhiri mānū. A i te aonga ake ka haere tahi ratou ko Pita; i haere tahi ano etahi tēina i Hopa.

24 Na, i te aonga ake, ka tomo ratou ki Hiharia. A e tatari ana a Koroniria ki a ratou, kua oti hoki te huihui mai ona whanaunga, me ona hoa tupu.

25 Na, i a Pita e tomo atu ana, ka tutaki a Koroniria ki a ia, hinga ana ki ona wae-wae, koropiko ana.

NGA MAHI A NGA APOTORO 10.

26 Otira ka whakaara a Pita i a ia, ka mea, E tu ki runga; he tangata ano hoki ahau.

27 Na ka korororero raua, a, te tomokanga ki roto, ka kite he tokomaha kua mene mai.

28 Na, ko tana meatanga ki a ratou, E mātau ana kontou e kore e tika kia huihui te tangata o nga Hurai, kia haere atu ranei ki te tangata iwi ke: otiia kua whakakitea e te Atua ki a au kia kaua e kiia te tangata he noa, he poke.

29 Koia ahau i haere mai ai, tē whai kupu i toku tikinga ake: na, ka ui nei ahau, he aha te mea i tikina ake ai ahau?

30 Ka mea a Koroniria, I te noho puku ahau a taea noatia tenei haora, i te wha o enei ra ka pahemo nei; a i te iwa o nga haora, ka inoi ahau i roto i toku whare; na, ko te turanga o tetahi tangata i toku aroaro, kanapa tonu te kakahu,

31 Ka mea mai, E Koroniria, kua rangona to inoi, e maharatia ana hoki āu mahi awhai i te aroaro o te Atua.

32 Na tonoa he tangata ki Hopa, ki te tiki i a Haimona, te rua nei o ona ingoa ko Pita; he manuhiri ia i roto i te whare o Haimona kai mahi hiako, i te taha o te moana; ka tae mai ia, māna e korero ki a koe.

33 Na, tono tonu atu ahau ki a koe; a tika tonu tau mahi, tou haerenga mai. Na,

tenei matou katoa kei te aroaro o te Atua, whakarongo ai ki nga mea katoa i whakahaua e te Atua ki a koe.

34 ¶ Na ka puaki te mangai o Pita, ka mea, He pono, ka kite ahau kahore a te Atua whakapai kanohi.

35 Engari ki te wehi tetahi tangata o nga tini iwi ki a ia, ki te mahi tika, ka paingia e ia.

36 Te kupu i homai e ia kia whakapuakina ki nga tama a Iharaira, te kauwhau o te rongo ka mau i a Ihu Karaiti: (ko ia te Ariki o te katoa:)

37 E mātau ana ano kontou ki taua kupu, i kauwhautia nei puta noa i Huria, no Kariri te timatanga, i muri i te iriiringa i kauwhautia e Hoani;

38 He mea mo Ihu o Naharetā i whakawahia nei e te Atua ki te Wairua Tapu, ki te kaha: a haereere ana ki te mahi pai, ki te whakaora i te hunga katoa i pehia e te rewera; no te mea i a ia te Atua.

39 A ko matou nga kai whakaatu o nga mea katoa i mea ai ia ki te whenua o nga Hurai, ki Hiruharama; a whakamatea ana ia e ratou, he mea whakairi ki runga ki te rakau:

40 I whakaarahia ake tenei tangata e te Atua i te toru o nga ra, a meinga ana kia kitea nuitia;

41 Ehara i te mea e te iwi katoa, engari e nga kai whakaatu i whiriwhiria e te Atua i mua, ara e matou i kai tahi,

NGA MAHI A NGA APOTORO 10, 11.

i innu tahi nei me ia, i muri i tona aranga ake i te hunga mate.

42 A i mea ia ki a matou kia kauwhau ki te iwi, kia whakaatu, ko ia ta te Atua i whakarite ai hei Kai whakarite whakawa mo nga tangata ora, mo nga tangata mate.

43 He kai whakaatu nga poropiti katoa mona, ara, ma tona ingoa ka whiwhi ai ki te murunga hara nga tangata katoa e whakapono ana ki a ia.

44 ¶ I a Pita e korero ana i enei kupu, ka tau te Wairua Tapu ki te hunga katoa e whakarongo ana ki te kupu.

45 A miharo ana te hunga whakapono o te kotinga, nga mea i haere tahi i a Pita, no te mea kua ringihia mai ano hoki te Wairua Tapu, kua homai ki nga tauwi;

46 I rongo hoki ratou ki nga reo i korero ai, i whakamui ai ratou i te Atua. Katahi ka oho a Pita,

47 E ahei ranei te whakahore e tetahi te wai, kei iriiria enei, kua whiwhi tahi nei me tatou ki te Wairua Tapu?

48 Na ka mea ia kia iriiria ratou i runga i te ingoa o te Ariki. A ka tohe ratou kia noho ia i etahi ra.

UPOKO 11.

Pita.—Mo tona haerenga ki a Koroniria. 19 Rongo pai kei nga whenua. 22 Panapa ka ungā ki a ratou. 26 Karaitiana. 27 Atawhai ki nga rawakore.

A I rongo nga apotoro me nga tuākana i Huria, kua tango ano hoki nga tau-iwi i te kupu a te Atua.

2 Na, te taenga o Pita ki Hiruharama, ka whakawakia ia e te hunga o te kotinga,

3 I mea ratou, I haere koe ki roto ki nga tangata kihai i kotia, a kai tahi ana koutou.

4 Na ka timata a Pita, ka korero whakatepe atu ki a ratou, ka mea,

5 I te pa ahau, i Hopa e inoi ana: a ka kite moemoea i tetahi kitenga, ko tetahi mea e heke iho ana, ano he kakahu nui, he mea tuku iho i te rangi ki nga pito e wha; a tae tonu mai ki a au:

6 A ka titiro pu atu ahau ki reira, ka whakaaro ahau, a ka kitea nga mea waewae wha o te whenua, me nga kararehe mohoa, me nga mea ngokingoki, me nga manu o te rangi.

7 A ka rongo ahau i te reo e mea ana ki a au, E ara, e Pita; patua, e kai.

8 Heoi ka ki atu ahau, Kahore, e te Ariki: kiano hoki tetahi mea e noa ana, e poke ana, i tapoko noa ki toku mangai.

9 Na ka whakahoki ano te reo ki a au i te rangi, ko te rua o nga meatanga, Ko ā te Atua i mea ai kia ma, aua e whakanoatia e koe.

10 A, ka toru nga meatanga o tenei, ka hutia katoatia ake ano ki te rangi.

11 Na, i reira pu ano kua tae ake nga tangata tokotoru ki te whare i noho ai ahau,

he mea tono mai no Hiharia ki a au.

12 Na ka mea te Wairua ki a au kia haere tahi matou, kia kua ahau e ruarua. I haere tahi ano i a au enei tēina tokoono, a tomo ana matou ki te whare o taua tangata:

13 Na ka korerotia mai e ia ki a matou tona kitenga i te anahera i tona whare e tu ana, e mea ana ki a ia, Tonoa etahi tāngata ki Hopa, tikina a Haimona, te rua nei o ona ingoa ko Pita;

14 Māna e korero ki a koe etahi kupu, e ora ai koutou ko tou whare katoa.

15 A, taku timatanga ki te korero, ka tau te Wairua Tapu ki a ratou, ka pera ano me ia ki a tatou i te timatanga.

16 Katahi ahau ka mahara ki te kupu a te Ariki, ki tana i mea ai, I iriiri ra a Hoani ki te wai; ko koutou ia, ka iriiria ki te Wairua Tapu.

17 Na ka rite nei ta te Atua mea i hoatu ai ki a ratou, ki tana nei ki a tatou, ki te hunga kua whakapono ki te Ariki, ki a Ihu Karaiti; he aha ahau, hei arai i ta te Atua?

18 Ano ka rongo ratou ki enei mea, mutu pu ta ratou korero, heoi ka whakakororia i te Atua, ka mea, Koia hoki, kua homai e te Atua ki nga tauwi te ripeneta e ora ai.

19 ¶ Na, te hunga i whakamararatia i te tukinotanga i puta ake i to Tepene, haereere ana ratou, a tae noa ki Piniki, ki

Kaiperu, ki Anatioka, me te kauwhau ano i te kupu ki nga Hurai anake, kahore ki etahi atu.

20 Etahi tāngata hoki o ratou no Kaiperu, no Hairini, i haere enei ki Anatioka, i korero ki nga Hurai whaka-Kariki, i kauwhau i te Ariki, i a Ihu.

21 A i a ratou te ringa o te Ariki: he tokomaha rawa hoki i whakapono, i tahuri ki te Ariki.

22 ¶ Na, te taenga o te rongo o enei mea ki nga taringa o te hahi i Hiruharama, ka tonoa e ratou a Panapa kia haere ki Anatioka.

23 A, tona taenga atu, tona kitenga i te aroha noa o te Atua, ka hari, ka whakahau i a ratou katoa kia u te ngakau, kia piri ki te Ariki.

24 He tangata pai hoki ia, ki tonu i te Wairua Tapu, i te whakapono: a he nui te hunga i honoa ki te Ariki.

25 Me i reira ka haere atu a Panapa ki Tarahu, ki te rapu i a Haora:

26 A, tona kitenga i a ia, ka kawea ia ki Anatioka. A kotahi to raua tino tau i huihui ai ki te hahi, he nui hoki te hunga i whakaakona. A i mātua huaina nga akonga he Karaitiana ki Anatioka.

27 ¶ I aua ra ka haere mai etahi poropiti i Hiruharama ki Anatioka.

28 A ka whakatika tetahi o ratou, ko Akapu te ingoa, ka korero, he mea whakaako e te Wairua, meāke he mate

NGA MAHI A NGA APOTORO 11, 12.

nui i te hiakai pa ai ki te whenua, a puta noa : i puta ano tenei i nga ra o Karauria Hiha.

29 Na ka whakatakoto tika-nga nga akonga, ara, nga mea i whai rawa, tenei, tenei, kia tonoa he mea ma nga tuākana e noho ana i Huria :

30 I pera ano ratou, i mea kia kawea ki nga kaumatua e nga ringa o Panapa raua ko Haora.

UPOKO 12.

Matenga o Hemi. 3 Hereherenga o Pita. 6 Ka whakaputaina mai e te anahera. 20 Matenga o Herora.

NA, i taua wa, ka totoro nga ringa o kingi Herora ki te tukino i etahi o te hahi.

2 A whakamatea ana e ia a Hemi tuakana o Hoani ki te hoari.

3 A, tona kitenga he pai ki nga Hurai, ka anga ia, ka hopu ano i a Pita. (Ko nga ra ia o te taro rewena-kore.)

4 Ano ka mau ia, ka makā ki te whare herehere, a tukua ana ki nga hoia kotahi tekau ma ono kia tiakina ; i mea, ko muri iho i te kapenga ka whakaputaina ki waho, ki te iwi.

5 Na ka puritia a Pita ki roto ki te whare herehere : otiia kihai i mutumutu te inoi a te hahi ki te Atua mona.

6 ¶ Ano ka tata ia te arahina ki waho e Herora, i taua po e moe ana a Pita i waenganui o nga hoia tokorua, he mea here ki nga mekameka e rua :

me nga kai tiaki i te tatau, e tiaki ana i te whare herehere.

7 Na, ko te turanga o tetahi anahera a te Ariki ki tona taha, tiaho ana te maramatanga i roto i te whare : na ka papaki ia i te kaokao o Pita, ka whakaara i a ia, ka mea, E ara, hohoro. A marere iho ona mekameka i nga ringa.

8 Na, ko te meatanga a te anahera ki a ia, Whitikiria tou, herea ou hu. A meinga ana e ia. Ka mea ano ki a ia, Kakahuria tou kakahu, haere mai i muri i a au.

9 Na ka haere ia ki waho, ka aru i a ia ; a kihai i mahara he pono ta te anahera i mea ai ; hua noa he rekanga kanohi tana i kite nei.

10 Ano ka mahue te tuatahi, te tuarua o nga kai tiaki, ka tae ki te tatau rino i te putanga atu ki te pa ; tuwhera noa ana ki a raua : puta ana raua ki waho, haere ana, puta rawa i tetahi ara, mawehe tonu atu te anahera i a ia

11 A, te hokinga ake o nga whakaaro o Pita, ka mea ia, Katahi ahau ka tino mohio, kua tono mai te Ariki i tana anahera, hei tango i a au i roto i te ringa o Herora, i nga mea katoa ano e taria nei e te iwi o nga Hurai.

12 Ano ka whakaaroa e ia, ka haere ki te whare o Meri, whaea o Hoani te rua nei o ona ingoa ko Maka ; he tokomaha hoki kua huihui ki reira e inoi ana.

13 A, te patukinga a Pita ki te tatau o te whatitoka, ka tae mai he kotiro ki te

whakarongo, ko Rora te ingoa.

14 Ano ka mohio ia ki te reo o Pita, kihai i uakina te tatau i te hari, heoi oma ana ki roto, ki te korero ki te tunga o Pita i te tatau.

15 Na ka mea ratou ki a ia, E haurangi ana koe. Heoi ka tohe tonu ia he pono. Na ka mea ratou, Ko tona anahera.

16 Me te patuki tonu ano tera a Pita: a, ta ratou uakanga, ka kite i a ia, ka miharo.

17 Na ka pepehi atu tona ringa i a ratou kia kaua e kuihi, ka korerotia ki a ratou tona whakaputanga mai e te Ariki i te whare herehere. A ka mea, Korerotia enei mea ki a Hemi, ratou ko nga tēina. Na ka puta mai ia, a haere ana he wahi ke.

18 Na, ka ao te ra, kihai i iti te pororaru o nga hoia, i ahatia ranēi a Pita.

19 Na ka rapu a Herora i a ia, a, tē kitea, ka whakawa i nga kai tiaki, a ka mea kia whakamatea. Na haere atu ana ia i Huria ki raro, ki Hiharia noho ai.

20 ¶ A he nui te riri o Herora ki te hunga o Taira, o Hairoa: otira ka puta ngatahi mai ratou ki a ia, a ka oti a Parahitu, te kai tiaki o te whare moenga o te kingi, te whakaki e ratou, ka tono kia houhia te rongo; no to te kingi whenua hoki nga kai o to ratou.

21 A i tetahi ra i whakaritea, ka kakahu a Herora i tetahi kakahu kingi, ka noho ki ru-

nga ki te torona, a whakatu ana ki a ratou.

22 Na, ko te karangatanga a te huihui, He reo atua, ehara i to te tangata.

23 A i reira pu ano ka patua ia e tetahi anahera a te Ariki, no te mea kihai i hoatu e ia te kororia ki te Atua: a kainga ana ia e te kutukutu, hemo ake.

24 ¶ Na, ka tupu te kupu a te Atua, ka nui haere.

25 A ka hoki a Panapa raua ko Haora i Hiruharama, i te otinga o ta raua mahi, me te kawe mai i a Hoani, te rua nei o ona ingoa ko Maka.

UPOKO 13.

Paora raua ko Panapa ka ungā. 4 Ta Paora ki a Erima. 13 Kei Anatioka. 44 Ta nga Hurai, 46 I tahuri ai a Paora ma ki nga Tauwiwi.

NA, i te hahi i Antioka etahi poropiti, me etahi kai whakaako: ko Panapa, ko Himeona i karangatia nei ko Nikera, ko Rukia no Hairini, ko Manaena he mea whakaputu ngatahi nei raua ko Herora tetaraki, me Haora ano.

2 A, i a ratou e karakia ana ki te Ariki, e noho puku ana, ka mea te Wairua Tapu, Motuhia mai ki a au a Panapa raua ko Haora ki te mahi i karangatia ai raua e ahau.

3 Na ka noho puku ratou, ka inoi, ka popoki iho o ratou ringa ki a raua, a tonoa ana kia haere.

NGA MAHI A NGA APOTORO 13.

4 ¶ Na, ka tonoa nei raua e te Wairua Tapu, ka haere ki Herukia; a rere atu ana i reira ki Kaiperu.

5 Na, i a raua i Harami, ka kauwhautia e raua te kupu a te Atua i roto i nga whare karakia o nga Hurai: i a raua ano a Hoani hei kai mahi.

6 A, to ratou putanga ki tera taha o te motu, ki Papaho, ka kitea tetahi kai makutu, he poropiti teka, he Hurai, ko Paraihu te ingoa:

7 I te tino kawana ia, i a Herekiu Paora; he tangata ma ra a *Herekiu*; a karangatia ana e ia a Panapa raua ko Haora, i hiahia kia rongo ki te kupu a te Atua.

8 Otira i tautohe ki a raua a Erima te kai makutu, (ko te whakamaoritanga hoki tenei o tona ingoa,) i mea kia tahuri ke te tino kawana i te whakapono.

9 Na, te tino tirohanga pūtannga ki a ia o Haora, (ara o Paora,) ki tonu i te Wairua Tapu,

10 Ka mea, Ki tonu koe i te tinihanga, i nga tini mahi pokanoa; tama a te rewera, hoa riri o nga mahi tika katoa! e kore ianei e mutu to whakaputa ke i nga ara tika a te Ariki?

11 Na, aianei *pa ai* te ringa o te Ariki ki a koe, ka matapotia koe, e kore e kite i te ra a taka noa tetahi wa. Na tau tonu iho ki a ia he kohu me te pouri; a haereere noa ia ki te rapu kai arahi.

12 A, te kitenga o te tino kawana i taua meatanga, ka

whakapono, i miharo hoki ki te ako a te Ariki.

13 ¶ Na ka rere atu a Paora ratou ko ona hoa i Papaho, ka u ki Pereka i Pamapurua: a whakarere ana a Hoani i a raua, hoki ana ki Hiruharama.

14 Ko raua ia, haere atu ana i Pereka, tae tonu atu ki Anatioka i Pihiria, a tomo ana ki te whare karakia i te rahapati, noho ana,

15 A ka mutu te korerotanga o te ture me nga poropiti, ka tono tangata nga rangatira o te whare karakia ki a raua, ka mea, E hoa ma, ki te mea he kupu whakaako ta korna ki te hunga nei, korero.

16 ¶ Na ka tu a Paora ki runga, ka tawhiri tona ringa, ka mea, E nga tangata o Iharaira, e te hunga e wehi ana ki te Atua, whakarongo mai.

17 Na te Atua o tenei iwi, o Iharaira, i whiriwhiri o tatou matua, a whakanuia ana e ia tenei iwi, i a ratou e noho manene ana i te whenua o Ihipa, a i runga tonu te ringa i arahina mai ai ratou e ia i reira.

18 Na, me te mea e wha tekau nga tau i atawhaitia ai ratou e ia i te koraha.

19 A, ka whitu nga iwi ka ngaro i a ia i te whenua o Kanaana, ka wehewehea e ia ki te rota to ratou whenua mo ratou.

20 A, muri iho i enei mea, i te mea ka tata ki nga tau e wha rau e rima tekau, ka

NGA MAHI A NGA APOTORO 13.

hoatu e ia he kai whakarite whakawa, taea noatia a Hamuera poropiti.

21 Katahi ratou ka mea ki tetahi kingi : a homai ana e te Atua ki a ratou a Haora, tama a Kihī, he tangata no te pu o Peniamine, a e wha tekau nga tau.

22 A, ka oti ia te whakataka, ka whakaarahia ake a Rawiri hei kingi mo ratou ; i whakaturia hoki ia e ia, i korerotia, Kua kitea e ahau a Rawiri tama a Hehe, he tangata e whakaaetia ana e toku ngakau ; ka meatia e ia nga mea katoa e pai ai ahau.

23 He uri no tenei tangata, he Kai whakaora mo Ihairaira, a Ihu i whakaarahia nei e te Atua, ko tana hoki tena i korero ai i mua :

24 No mua tata ano hoki i tona haerenga mai te kauwhautanga a Hoani i te iriiri ripeneta ki te iwi katoa o Ihairaira.

25 A, ka tutuki a Hoani ki tona tutukitanga, ka mea ia, Ko wai koia ahau ki ta koutou whakaaro ? ehara ra ahau i a ia, engari tera te haere mai ana tetahi i muri i a au, ko ona hu, e kore ahau e tau hei wewete.

26 E oku tuākana, e nga tamariki o te kawēi o Aperahama, e te hunga i roto i a koutou e wehi ana ki te Atua, kua homai te kupu o tenei oranga kia whakapuakina ki a koutou.

27 Kihai te hunga e noho ana i Hiruharama, me o ratou rangatira, i mohio ki a ia, ki

nga reo ano o nga poropiti e korerotia ana i nga hapati katoa. Na kua rite i a ratou *aua reo*, i a ratou i tuku i a ia ki te mate.

28 Ahakoa kihai i kitea e ratou he mea e mate ai ia, ka tohe ratou ki a Pirato kia whakamatea ia.

29 Ano ka rite katoa i a ratou nga mea i tuhituhia mona, tangohia iho ana ia i te rakau, whakatakotoria ana ki roto ki te urupa.

30 Heoi na te Atua ia i whakaara ake i te hunga mate :

31 A he maha nga ra i kitea ai ia e te hunga i haere tahi i a ia i Kariri ki Hiruharama, ko ratou hoki hei kai whakaatu mona ki te iwi.

32 Na, he kauwhau tenei ta maua ki a koutou i te rongo pai, i korerotia i mua ki nga matua,

33 Kua mana nei tenei i te Atua, hei mea ma tatou, ma a ratou tamariki, i a ia i whakaara nei i a Ihu ; ko te mea hoki tena i tuhituhia i te rua o nga waiata, Ko koe taku Tama, nonaiane i koe i whakatupuria ai e ahau.

34 Ko tana korero ano tenei mona i whakaarahia nei e ia i te hunga mate, tē hoki ano ki te pirau i muri iho, Ka hoatu e ahau ki a koutou nga mea tapu, nga mea pono o Rawiri.

35 Koia hoki ia i mea ai i tetahi atu *waiata*, E kore koe e tuku i to Mea Tapu kia kite i te pirau.

36 Ko Rawiri hoki i mahi i ta te Atua i pai ai i tona wha-

katupuranga ano, a moe iho, whakatakotoria ana ki ona mātua, kite ana i te pirau

37 Ko tenei ia i whakaarahia ake nei e te Atua, kihai ia i kite i te pirau.

38 Na kia mohio koutou, e oku tuākana, na tenei tangata te murunga hara e kauwhautia nei ki a koutou;

39 A mānanga tangata katoa, e whakapono ana, ka whakatikaia ai i nga mea katoa, e kore nei koutou e whakatikaia i runga i ta Mohi ture.

40 Na kia mahara, kei pa ki a koutou te mea i korerotia e nga poropiti;

41 Titiro mai, e te hunga whakahawea, ka miharo ai, a whakangaromia iho: ka mahia hoki e ahau he mahi i o koutou ra, he mahi e kore e whakaponohia e koutou ki te whakapuakina e te tangata ki a koutou.

42 ¶ A, ka puta mai nga Hurai i roto i te whare karakia, ka tohe nga tauwi kia kauwhautia ano aua kupu ki a ratou i to muri iho hapatī.

43 Heoi ka pākarakaru te huihui, he tokomaha nga Hurai me nga porohiraiti karakia i aru i a Paora raua ko Panapa: a ka korero raua ki a ratou, ka ako kia mau tonu ratou ki te aroha noa o te Atua.

44 ¶ Na, i to muri iho hapatī, ka huihui mai te pa, me te mea ko ratou katoa, ki te whakarongo ki te kupu a te Atua.

45 A, te kitenga o nga Hurai

i te huihui, ka ki ratou i te hae, ka whakakahore ki nga mea i korerotia e Paora, ka whakateka, ka kohukohu.

46 Katahi a Paora raua ko Panapa ka korero maia atu, ka mea, I takoto te tikanga kia mātua korerotia te kupu a te Atua ki a koutou: na ka peia nei e koutou, ka whakaaro koutou e kore e pai te oranga tonutanga mo koutou, na ka tahuri atu nei maua ki nga tauwi.

47 I penei hoki te ako a te Ariki ki a matou, Kua waiho koe e ahau hei mārama ki nga tauwi, kia ai koe hei oranga puta noa i nga pito o te whenua.

48 Na, te rongonga o nga tauwi, ka hari, ka whakakororia i te kupu a te Ariki: a ka whakapono te hunga i rite mo te oranga tonutanga.

49 A pakū ana te kupu a te Ariki puta noa i taua whenua.

50 Otira i whakaohokia nga wahine karakia e nga Hurai, me nga wahine rangatira, me nga tangata nunui o te pa, a ara ana i a ratou he whakatoinga mo Paora raua ko Panapa, peia ana raua i o ratou wahi.

51 Heoi ruia atu ana e raua te puehu o o raua waewae ki a ratou, a haere ana ki Ikoniuma.

52 Na, ki tonu nga akonga i te hari, i te Wairua Tapu.

UPOKO 14.

Tukinotia ana i Ikoniuma.

8 Kopa i Raihita. 19 Ta ratou ki a Paora. 21 Kau-

whau tonu. 26 Hoki ana ki Anatioka.

NA, i Ikoniuma, ka haere tahi raua ki roto ki te whare karakia o nga Hurai, a ka korero, no ka whakapono tona tini o nga Hurai, o nga Kariki.

2 Na nga Hurai whakateka ia i whakaoho, i whakakino nga ngakau o nga tauwi ki nga tēina.

3 Na, he nui te wa i noho ai raua, i maia ai te korero i nga mea a te Ariki, me te whakaae ano ia ki te kupu o tona aroha noa, me te homai ano e ia nga tohu me nga mea whakamiharo kia meatia e o raua ringa.

4 Otiia i wehewehea nga tāngata o te pa: ko etahi i u ki nga Hurai, ko etahi ki nga apotoro.

5 A i nga tauwi, ratou ko nga Hurai, ko o ratou rangatira, e huaki mai ana ki te whakutupu kino, ki te aki i a raua ki te kohatu,

6 Ka tupato raua, a rere ana ki Raihitara, ki Rerepe, ki nga pa o Raikaonia, ki pahaki tata atu ano hoki:

7 A kauwhautia ana e raua te rongo pai ki reira.

8 ¶ A i Raihitara e noho ana tetahi tangata waewae ngoikore, he kopa no te kopu mai o tona whaea, kahore i haere i mua iho:

9 I rongo tenei i a Paora e korero ana: a, te tirohanga pūtanga atu o tera ki a ia, ka kite he whakapono tona e ora ai;

10 He nui noa atu tona reo ki te ki atu, E tu ou waewae ki runga. Na mokowhiti ake ana ia, haere ana.

11 A, te kitenga o nga tāngata i ta Paora i mea ai, ka ara to ratou reo, to Raikaonia, ka mea, Kua heke iho nga atua ki a tatou, no nga tāngata te ahua.

12 A huaina ana e ratou a Panapa ko Hupita, a Paora ko Merekurai, no te mea ko ia te pu korero.

13 Na ka kawea mai e te tohunga o Hupita, o tera i te ngutu o to ratou pa, he puru, he tupare ki nga kuwaha, a ka mea kia patua he whakahere e ratou ko nga tāngata.

14 A, te rongonga o nga apotoro, o Panapa raua ko Paora, ka haehae i o raua kakahu, a rere ana ki roto ki nga tāngata, ka karanga atu,

15 Ka mea, E mara ma, he aha koutou ka mea ai i enei mea? He tāngata hoki maua e rite tahi ana ki a koutou te tu, a e kauwhau ana kia tahuri ke koutou i enei mea te kateka noa ki te Atua ora, nāna nei i hanga te rangi, me te whenua, te moana, me o reira mea katoa:

16 I nga whakatupuranga hoki kua pahemo atu, i tukua e ia nga iwi katoa kia haere i o ratou ara ake.

17 Otiia kihai i tukua e ia kia kahore he kai whakaatu mona; i atawhai hoki, i homai ano e ia ki a tatou te ua o te rangi, me nga po hua, i makona ai o tatou ngakau i te kai, i te koa.

NGA MAHI A NGA APOTORO 14, 15.

18 A, ka korerotia enei *kupu*, na, mutu whakauaua i a raua ta nga tångata *meatanga* ki te patu whakahere ma raua.

19 ¶ Na, ko te haerenga mai o etahi Hurai i Anatioka, i Ikoniuma, ka whakaki i te iwi, a akina ana a Paora ki te kohatu, toia ana ki waho o te pa, hua noa kua mate.

20 Otiia, i nga akonga e tu ana i tona taha, ka whakatika ia, haere ana ki roto ki te pa: a i te aonga ake ka haere raua ko Panapa ki Rerepe.

21 Ano ka kauwhau raua i te rongo pai ki taua pa, a ka tokomaha ka meinga hei akonga, na hoki ana raua ki Raihitara, ki Ikoniuma, ki Anatioka,

22 Whakau ana i nga wairua o nga akonga, whakahau ana i a ratou kia mau tonu ki te whakapono; kua takoto hoki te tikanga, me na runga i nga matenga maha te ara atu mo tatou ki te rangatiratanga o te Atua.

23 I whakarite kaumatua ano raua mo ratou i tenei hahi, i tenei hahi, me te inoi ano raua, me te noho puku, a tukua atu ana ratou ki te Ariki i whakapono nei ratou.

24 Na ka haere raua na waenganui o Pihiria, tae tonu atu ki Pamapurua.

25 A, ka oti te kauwhau e raua te kupu ki Pereka, ka haere ki raro, ki Ataria:

26 A rere ana i reira ki Anatioka, ki te wahi i tukua ai raua ki te aroha noa o te Atua mo te mahi ka oti nei i a raua.

27 Na, ka tae atu, ka huihuia te hahi, ka korerotia nga mea i mahi tahi ai te Atua me raua, tana uakanga hoki i te tatau o te whakapono ki nga tauwi.

28 A kihai i iti te wa i noho ai raua i reira ki nga akonga.

UPOKO 15.

Tautohetohe mo te kotinga

6 *Te hinota.* 13 *Ta Hemi.*

22 *Te pukapuka.* 36 *Paora raua ko Panapa ka wēhea.*

NA, te taenga ake o etahi i Huria, ka whakaako i nga tēina, Ki te kore koutou e kotia, kia rite ki ta Mohi, e kore koutou e taea te whakaora.

2 Na kihai i iti te whawhai, te uiui a Paora raua ko Panapa ki a ratou, a ka whakaritea ko Paora, ko Panapa, ko etahi atu hoki o ratou, kia haere ki nga apotoro, ki nga kaumatua, ki Hiruharama, ki tenei tautohenga.

3 Heoi arahina ana ratou e te hahi, haere ana ra Piniki, ra Hamaria, ka korerotia te tahuritanga o nga tauwi: a nui atu te hari o nga tēina katoa.

4 A, to raua taenga ki Hiruharama, ka whakamanuhiritia e te hahi, e nga apotoro hoki ratou ko nga kaumatua, ka korerotia nga mea i mahi tahi ai te Atua me raua.

5 Na, te whakatikanga o etahi tångata whakapono no te titorehanga ki nga Parihi, ka mea, me kokoti ratou, me ako hoki kia whakaritea te ture a Mohi.

NGA MAHI A NGA APOTORO 15.

6 ¶ Na ka huihui nga apotoro ratou ko nga kaumatua ki te whakaaro ki tenei mea.

7 A ka nui te tautohetohe, ka whakatika a Pita, ka mea ki a ratou, E nga tuākana, ka mātau koutou, noku te mangai i roto i a tatou i whiri-whiria e te Atua i nga ra o mua hei mea e rongo ai nga tauwi ki te kupu o te rongo pai, e whakapono ai hoki.

8 I whakaae hoki ki a ratou te Atua e mātau nei ki nga ngakau, i a ia i hoatu i te Wairua Tapu ki a ratou, rite tahi ki tana ki a tatou;

9 A kahore i puta ke tona whakaaro ki a tatou, ki a ratou, i o ratou ngakau kua ma i a ia i runga i te whakapono.

10 Ko tenei, he aha koutou ka whakamātautau ai i te Atua, ka whakatakoto ioka ai ki te kaki o nga akonga, he mea kīhai nei i taea te mau e o tatou mātua, e tatou hoki?

11 Heoi ka whakapono nei tatou, tera tatou e ora i runga i te aroha noa o te Ariki o Ihu Karaiti, ka pera tahi ano ratou.

12 Na noho puku ana te mano katoa, whakarongo ana ki a Panapa raua ko Paora e korero ana i nga tohu i nga mea whakamiharo, i mea ai te Atua kia mahia e raua i roto i nga tauwi.

13 ¶ A, ka mutu ta raua, ka whakahoki a Hemi, ka mea, E nga tuākana, whakarongo ki a au:

14 Kua korerotia e Himiona ta te Atua tirohanga mai i

mua, tana tangohanga i tetahi iwi i roto i nga tauwi mo tona ingoa.

15 A e rite ana ki tenei nga korero a nga poropiti; i tuhia hoki,

16 I muri i enei mea ka hoki ahau, ka hangā ano e ahau te tapenakara o Rawiri, kua hinga nei; ka hangā ano e ahau ona wahi kua horoa, a ka whakaarahia ano:

17 Kia rapu ai nga toenga o nga tāngata i te Ariki, nga tauwi katoa hoki i karangatia nei toku ingoa ki runga ki a ratou, e ai ta te Ariki, e mahi nei i enei mea katoa.

18 E mohiotia ana e te Atua ana mahi katoa no te timata-nga ra ano o te ao.

19 Na ko taku whakaaro tenei, kia kaua e whakararua te hunga e tahuri ana mai ki te Atua i roto i nga tauwi:

20 Engari kia tuhi atu ki a ratou, kia mawehe atu i nga poke o nga whakapakoko, i te moe tahae, i te mea kua nōtia te kaki, i te toto.

21 No nga whakatupuranga hoki o mua nga kai kauwhau i a Mohi i tenei pa, i tenei pa, he mea korero i roto i nga whare karakia i nga hapati katoa.

22 ¶ Katahi ka pai nga apotoro ratou ko nga kau-mātua me te hahi katoa, kia whiriwhiria etahi tāngata i roto i a ratou, kia tonoa hei hoa mo Paora raua ko Panapa ki Anatioka; a Hura i karangatia nei ko Pahapa, raua ko Hira, he hunga ingoa nui i roto i nga teina:

23 Ka tuhia hoki enei mea hei mauranga; Na nga apotoro-ratou ko nga kaumātua ko nga tuākana ki nga tēina o roto i nga tauīwi, i Anatioka, i Iliria, i Kirikia; tena koutou:

24 Na ka rongo nei matou, tera etahi i haere atu nei i a matou, i whakararu i a koutou ki nga korero, i whakapohēhē i o koutou ngakau, i mea, Kia kotia koutou, kia whakaritea hoki te ture: kahore nei a matou kupu ki a ratou:

25 Kotahi tōnu ta matou whakaaro kia whiriwhiria etahi tangata, kia tonoa ki a koutou, hei hoa mo a matou tangata e aroha nei, mo Panapa raua ko Paora.

26 He hunga i tuku nei i a raua ki te mate hei mea mo te ingoa o to tatou Ariki, o Ihu Karaiti.

27 Na kua tonoa nei e matou a Hura raua ko Hira, ma raua hoki e korero a kupu atu aua mea ano.

28 I pai hoki ki te Wairua Tapu, ki a matou hoki, kia kua e whakatakotoria ki a koutou tetahi atu whakataimaha, ko enei mea tika anake;

29 Kia mawehe koutou i nga mea e patua ana ma nga whakapakoko, i te toto, i te mea kua nōtia te kaki, i te moe tahae: ka tiakina koutou i enei mea, ka pai ta koutou mahi. Kia ora koutou.

30 ¶ A, to ratou tukunga atu, ka haere ki Anatioka: na ka huihuia te mano, ka hoatu te pukapuka:

31 A, ka oti te korero, ka koa ratou mo te kupu whakahaui.

32 Na, he maha nga kupu a Hura raua ko Hira i whakahaui ai, i whakau ai i nga tēina; he poropiti hoki raua.

33 A roa iho raua, ka tukua e nga tēina i runga i te rangi-marie ki nga apotoro.

34 Heoi i pai a Hira kia noho ki reira.

35 I noho hoki a Paora raua ko Panapa ki Anatioka, i whakaako, i kauwhau i te kupu a te Ariki, ratou tahi ko tera hunga tokomaha.

36 ¶ Na, muri iho i etahi ra, ka ki a Paora ki a Panapa, Tana ka hoki, ka tiro tiro i o taua tēina i nga pa katoa i kauwhautia ai e taua te kupu a te Ariki, to ratou peheatanga.

37 A ka mea a Panapa kia mauria hei hoa a Hoani e karangatia nei ko Maka.

38 Ki ta Paora ia, na, i whakarere ia i a raua ki Pampurua, kihai hoki i haere tahi me raua ki te mahi, e kore e pai kia uru ia ki to raua tira.

39 Heoi, nui atu to raua ngangare, i mawehe ai raua i a raua: a mauria ana e Panapa a Maka, rere ana ki Kaipuru;

40 Na, tango ana a Paora i a Hira, haere ana, he mea tuku ki te aroha noa o te Atua e nga tēina.

41 A haere ana ia ra Hiria, ra Kirikia, whakau ana i nga hahi.

UPOKO 16.

Timoti. 11 Piripai. 16 Te wairua whiro. 19 Ka whiua a Paora ma, ka hereherea. 26 Te ru, te aha, te aha. 35 Ka tukua.

NA ka tae atu ia ki Rerepe, ki Raihitarā: a i reira tetahi akonga, ko Timoti te ingoa, he tama na tetahi wahine whakapono, he Hurai, tona pāpā he Kariki:

2 I pai te korero mona a nga tēina i Raihitarā, i Ikoniuma.

3 I mea a Paora kia haere ia hei hoa mona; a tangohia ana ia, kotia ana, mo nga Hurai hoki e noho ana i aua wahi: i mātau hoki ratou katoa, he Kariki tona pāpā.

4 A, to ratou haereerenga i nga pa, ka tukua hei pupuri ma ratou nga tikanga i whakaritea e nga apotoro, e nga kaumātua i Hiruharama.

5 Na ka whakaukia nga hahi ki te whakapono, ka nui haere hoki i tenei ra, i tenei ra.

6 ¶ Na haere ana ratou na waenganui o Pirikia, o te whenua hoki o Karatia, ka araia ratou e te Wairua Tapu i kore ai e korero i te kupu ki Ahia;

7 Te taenga atu ki Maihia, ka whakamatauria te haere ki Pitinia: heoi kihai i tukua e te Wairua.

8 Na, kapea ana Maihia, ka haere ki Toroa.

9 A ka kitea e Paora he kite-nga i te po; He tangata no

Makeronia e tu ana, e tohe ana ki a ia, e mea ana, Whiti mai ki Makeronia, awhinatia matou.

10 Ano ka kitea te kitenga, ka mea tonu matou kia haere ki Makeronia, i whakaaro hoki, na te Ariki matou i karanga ki te kauwhau i te rongo pai ki a ratou.

11 ¶ Heoi, te rerenga i Toroa, ka tika tonu matou ki Hamotarakia, ao ake te ra ki Neapori;

12 I reira ano ki Piripai, ko te pa nui ia o taua wahi o Makeronia, he koroni: anoho ana matou i taua pa a taka noa etahi ra.

13 Na i te ra hapati ka haere matou ki waho o te pa, ki te awa, ko te wahi tera i kiia hei karakiatanga; a ka noho, ka korero ki nga wahine i huihui ra.

14 Na ka whakarongo tetahi wahine, ko Riria te ingoa, he kai hoko papura, no te pa o Taiataira, he wahine karakia ki te Atua: he mea whakapuare tona ngakau e te Ariki i rongo ai ia ki nga mea i korerotia e Paora.

15 Ano ka oti ia te iriiri, ratou ko tona whare, ka tohe ia, ka mea, Ki te mea kua whakaaro koutou he pono taku mahi ki te Ariki, tomo mai koutou, e noho ki toku whare. Na ka tohea matou e ia.

16 ¶ Na, i a matou e haere ana ki te inoi, ka tutaki ki a matou tetahi kotiro, he wairua Whiro nei tona, he nui te

utu i riro i a ia mo ana rangatira, i a ia e poropiti ana:

17 Ka whai ia i a matou ko Paora, ka karanga, ka mea, He pononga enei tângata na te Atua i runga rawa, e whakapuakina ana e ratou te ara o te ora ki a tatou.

18 Na, he maha nga ra i mea ai ia i tenei. Otiia ka hōhā a Paora, ka tahuri, ka mea ki te wairua, Ko taku kupu tenei ki a koe i runga i te ingoa o Ihu Karaiti, puta mai i roto i a ia. A puta mai ana i taua haora ano.

19 ¶ Na, te kitenga o ona rangatira, kua kore he mahinga moni ma ratou, ka mau ki a Paora raua ko Hira, ka toia ki te kāinga hoko, ki nga rangatira;

20 A ka mauria raua ki nga kai whakarite whakawa, ka mea, Ka raru to tatou pa i enei tângata, he Hurai hoki;

21 E whakapuakina ana hoki e raua he ritenga e kore nei e tika kia whakaaetia, kia mahia e tatou, e nga tângata o Roma.

22 Na, ko te whakatikanga mai o te mano ki a raua; ka haea o raua kakahu e nga kai whakarite whakawa, ka mea kia whiua ki te rakau.

23 A ka maha o raua whiunga, ka makā ki te whare herehere, ka akona te kai tiaki herehere, kia mau tana pupuri i a raua:

24 Te rironga i a ia o taua kupu, ka makā raua ki te whare herehere i roto rawa,

ka whakauria o raua waewae ki te rakau.

25 Na ka inoi a Paora raua ko Hira i waenganui po, ka waiata atu ki te Atua; me te whakarongo ano nga herehere ki a raua.

26 Na ka pa whakarere mai he ru nui, i ngarue ai nga turanga o te whare herehere: a puare tonu nga tatau katoa, whakakorokoroa ana nga hengenaga o nga tângata katoa.

27 A, ka ohote kai tiaki herehere i te moe, tona kitenga i nga tatau o te whare herehere e puare ana, ka unuhia tana hoari, ka mea kia patu i a ia ano, hua noa kua oma nga herehere.

28 Na ka nui te reo o Paora ki te karanga, ka mea, Kauaka tetahi mea kino e meatia ki a koe: tenei hoki matou katoa.

29 A karangatia ana he rama, ka rere ki roto, ka haere wiri mai, ka takoto ki te aroaro o Paora raua ko Hira,

30 Ka arahina hoki raua ki waho, ka mea, E hoa ma, me aha ka ora ai ahau?

31 Ka mea raua, Me whakaponono ki te Ariki, ki a Ihu Karaiti, ka ora ai koe, koutou tahi ko tou whare.

32 Na ka korerotia te kupu a te Ariki ki a ia, ki nga tângata katoa hoki i roto i tona whare.

33 A ka mauria raua i taua haora o te po, ka horoia o raua whiunga; na, iriiria tonutia iho ia me ana tângata katoa.

34 A ka arahina raua ki tona

whare, ka whakaturia he tepu kai, ka koa hoki, i a ia kua whakapono nei ki te Atua me tona whare katoa.

35 ¶ Ka ao te ra, ka tonoa nga katipa e nga kai whakarithite whakawa, ka mea, Tukua ana tāngata.

36 Na ka korerotia e te kai tiaki herehere enei kupu ki a Paora, Kua tono tangata mai nga kai whakarite whakawa, e mea ana, kia tukua atu korua: tena ra puta atu, haere i runga i te rangimarie.

37 Na, ko te kiangā atu a Paora ki a ratou, Kua whiua nuitia nei maua, i te mea kahore i whakawakia, he tāngata hoki no Roma, kua makā hoki ki te whare herehere; ko tenei hoki ka makā pukutia ki waho? Kahore ra hoki; engari ma ratou e haere mai e arahi maua ki waho.

38 Na ka korerotia enei kupu e nga katipa ki nga kai whakarite whakawa: a ka rongo ratou no Roma raua, ka wehi.

39 Na ka haere ratou, ka tohe ki a raua, a ka arahi ki waho, ka ki kia haere atu i te pa.

40 Na, te putanga mai i te whare herehere, ka tomo ki te whare o Riria: ano ka kite raua i nga tēina, ka whakahau i a ratou, ka haere.

UPOKO 17.

Paora i Teharonika. 10 Kei Peria. 15 Atene,—te totohetanga.

NA ka haereere raua i Amapipori i Aporonia, ka tae ki Teharonika; kei reira te whare karakia o nga Hurai:

2 Ka tomo hoki a Paora ki a ratou, ko tona ritenga hoki, a e toru nga hapati i korerorero ai ki a ratou i roto i nga karaipiture,

3 E whakapuaki ana, e korero ana, kua takoto te tika-nga kia manae a te Karaiti, kia ara mai hoki i te hunga mate; ko tenei hoki te Karaiti, ko Ihu e kauwhautia nei e ahau ki a koutou.

4 Na ka whakapono etahi o ratou, ka piri hoki ki a Paora raua ko Hira; tokomaha hoki o nga Kariki karakia, kihai hoki i ruarua nga wāhine rangatira.

5 Heoi ka hae nga Hurai whakateka, a ka tango ki a ratou i etahi tāngata kino o te hunga mangere, ka huihuia nga tāngata, ka whakaho i te pa; na, ko te huakanga ki te whare o Hahona, ka mea kia kawea raua ki te iwi.

6 A, tē kitea raua, ka toia a Hahona ratou ko etahi tēina ki nga rangatira o te pa, ka karanga, Kua tae mai ki konei nga tāngata i whakatutūngia ai te ao;

7 Kua puritia hoki e Hahona: tika ke nga mahi a tenei hunga katoa i nga ture a Hiha, e mea ana, tera atu tetahi kingi, ko Ihu.

8 Na, ka rongo te mane ratou ko nga rangatira o te pa ki enei mea, ka raru.

NGA MAHI A NGA APOTORO 17.

9 Na ka tango ratou i etahi moni pupuri i a Hahona ratou ko era atu, a ka tuku atu i a ratou.

10 ¶ Na ka tono tonu nga tēina i a Paora raua ko Hira i te po ki Peria: to raua taenga atu, ka haere ki te whare karakia o nga Hurai.

11 Engari enei i nui atu te ahua rangatira i to nga tāngata o Teharonika, i hohoro tonu ratou te tango i te kupu, a i tenei ra, i tenei ra, i rapu i roto i nga karaipiture i te tikanga o enei mea.

12 Na, he tokomaha o ratou i whakapono; kihai hoki i ruarua nga wāhine rangatira o nga Kariki, me nga tāne hoki.

13 Heoi ka mātau nga Hurai o Teharonika, tera te kupu a te Atua te kauwhautia ana e Paora ki Peria, ka haere hoki ratou ki reira, ki te whakaoho i te iwi.

14 Katahi ka tono nga tēina i a Paora kia haere, me te mea ko te moana: ko Hira ia raua ko Timoti, i noho ki reira.

15 Na ka kawea a Paora e ona kai arahi ki Atene: a ka riro mai he kupu ki a Hira raua ko Timoti kia hohoro te haere ki a ia, ka hoki ratou.

16 ¶ Na, i a Paora e tatari ana ki a raua i Atene, ka oho tona wairua i roto i a ia, i tona kitenga i te pa e ki ana i te whakapakoko.

17 Na totohe ana ia i roto i te whare karakia ki nga Hurai, ratou ko nga tāngata

karakia, i te kāinga hoko hoki ki nga tāngata i pono ki a ia i nga ra katoa.

18 A ka ngangare ki a ia etahi tohunga o nga Epikureana, o nga Toika. Ko etahi i mea, He aha ta tenei tangata korororero e mea nei? *i mea* etahi, Me te mea he kai whakapuaki i etahi atua tauhou: mo tana kauwhau i a Ihu, i te aranga ki a ratou.

19 Na ka mau ratou ki a ia, ka kawea ki Areopaka, ka mea, Kia mohio matou, he aha ranei tenei akoranga hou e korerotia nei e koe?

20 Poka ke hoki nga mea e mauria mai nei e koe ki o matou taringa: koia matou i mea ai kia mohio, he aha enei mea.

21 (Heoi hoki ta nga tāngata katoa o Atene, ratou ko nga manuhiri e noho ana i reira, e watea ai, ko te korero ranei, ko te whakarongo ranei ki tetahi mea hou.)

22 ¶ Na ka tu a Paora i wae-nganui o Areopaka, ka mea. E nga tāngata o Atene, i nga mea katoa ka kite ahau he ahua nui ke to koutou wehi ki nga atua maori.

23 I a au hoki e haereere ana, e matakītaki ana i nga mea e karakia nei koutou, ka kitea e ahau he āta i tuhia nei a runga, MO TE ATUA NGARO. Heoi ko ta koutou e karakia kuare nei, ko ia taku e whakaatu nei ki a koutou.

24 Te Atua nāna i hanga te ao me nga mea katoa i roto, ko ia nei te Ariki o te rangi,

NGA MAHI A NGA APOTORO 17, 18.

o te whenua, e kore ia e noho ki nga whare i hangā nei e te ringa;

25 E kore ano e mahia he mea māna e te ringa tangata, me te mea he mate nona ki tetahi aha ranei, ko ia hoki hei homai i te ora, i te manawa, me nga mea katoa, ki nga tāngata katoa;

26 Kotahi ano te toto i hangā ai e ia nga iwi katoa o nga tāngata, hei noho ki te mata katoa o te whenua, nāna hoki i whakatakoto o ratou wa i whakaritea i mua, me nga kaha o to ratou nohoanga;

27 Kia rapu ai ratou ki te Ariki, me kore e whawha, e kite i a ia, ahakoa ra kahore ia i matara atu i a tatou katoa:

28 Nāna hoki tatou i ora ai, i korikori ai, i noho ai; i pera hoki te korero a etahi o o koutou kai tito, Ko tatou hoki tona uri.

29 Na, he uri nei tatou no te Atua, e kore e tika kia mea tatou, kei te rite te atuataka ki te koura, ki te hiriwa, ki te kohatu, ki te mea i whakairoa e te mohio, e te whakaaro o te tangata.

30 Na kahore i whakaaroa e te Atua nga wa o te kuare-tanga; inaianei ia kua whakahau i nga tāngata katoa o nga wahi katoa kia ripe-neta:

31 Kua rite hoki i a ia he ra e whakawa ai ia i te ao i runga i te tika, ara, ma te tangata kua whakaritea nei e ia; kua tukua nei hoki he tohu ki nga tāngata katoa, i

tana whakaarahanga i a ia i te hunga mate.

32 ¶ Na ka rangona e ratou te aranga mai o te hunga mate, ka tawai etahi; ko etahi i mea, Taihoa matou e whakarongo ki tenei mea i a koe.

33 Heoi puta atu ana a Paora i waenganui i a ratou.

34 Ko etahi tāngata ia i piri ki a ia, i whakapono: i roto i a ratou a Rionaihia no Areo-paka, ko tetahi wahine ko Ramari te ingoa, ratou ko etahi atu.

UPOKO 18.

Tui teneti ki Koriniti. 12 Ta Kario. 24 Aporo.

MURI iho i enei mea ka haere a Paora i Atene, ka tae ki Koriniti;

2 Na, tona kitenga i tetahi Hurai ko Akuira te ingoa, i whanau ki Ponoto, he mea tae hou mai i Itari, raua ko tana wahine, ko Pirihiara; (kua ki hoki a Karauria kia haere atu nga Hurai katoa i Roma:) ka haere ia ki a raua.

3 A, no te mea kotahi ta ratou mahi, ka noho ia ki a raua, ka mahi: he tui teneti hoki ta raua mahi.

4 Na ka korerorero ia i roto i te whare karakia i nga hapati katoa, e tohe ana ki nga Hurai ratou ko nga Kariki.

5 ¶ A, te taenga mai o Hira raua ko Timoti i Makeronia, ka takare te ngakau o Paora, ka whakapuaki ki nga Hurai ko Ihu te Karaiti.

6 Heoi i a ratou ka whakatika mai, ka kohukohu, ka

ruia ona kakahu, ka mea ia ki a ratou, Hei runga i o koutou mātenga o koutou to-to; ka ma ahau: ko tenei ka haere ahau ki nga tauwi.

7 Na, tona haerenga i reira, ka tae ki te whare o tetahi tangata, ko Hutuha te ingoa, he tangata karakia ki te Atua, ko tona whare i tata ki te whare karakia.

8 Na ka whakapono ki te Ariki a Kirihipu, te rangatira o te whare karakia, me tona whare katoa; he tokomaha hoki nga Koriniti, i a ratou ka rongo, i whakapono, i iri-iria hoki.

9 A ka korero moemoea te Ariki ki a Paora i te po, Kaua e wehi, engari me korero, kei noho puku:

10 Kei a koe hoki ahau, e kore hoki tetahi tangata e pa ki a koe, e hoatu i te kino ki a koe: he nui hoki aku tāngata i tenei pa.

11 Na, kotahi te tau e ono marama i noho ai ia, i whakaakona ai te kupu a te Atua i roto i a ratou.

12 ¶ Na, i a Kario e noho ana hei kawana mo Akaia, ka whakatika ngatahi nga Hurai ki a Paora, a kawea ana ia ki te nohoanga whakawa,

13 Ka mea, E kukume ana tenei i nga tāngata ki tetahi karakia ki te Atua e tika ke ana i ta te ture.

14 A, ka whano ka puaki te mangai o Paora, na ka mea a Kario ki nga Hurai, E nga Hurai, me he mea ko tetahi

hanga hē, tetahi mahi kino ranei, e tika kia ata whakarongo ahau ki a koutou:

15 Ko tenei, he totohe korero, he mea ki nga ingoa, ki ta koutou ture, kei a koutou te whakaaro; e kore hoki ahau e pai kia waiho ahau hei kai whakarite mo ena mea.

16 Na, peia atu ana ratou i te nohoanga whakawa.

17 Na ka mau nga Kariki katoa ki a Hotene, rangatira o te whare karakia, a whiua ana ia i mua o te nohoanga whakawa. Heoi kihai a Kario i whakaaro ki tetahi o enei mea.

18 ¶ A ka maha nga ra i noho ai a Paora, ka poroporoaki ia ki nga tēina, a rere ana ki Hiria, ratou ko Pirihira ko Akuiria; he mea moremore tona upoko i Kenekerea: he ki taurangi hoki nāna.

19 Te taenga ki Epeha, ka mahue raua ki reira: a ko ia i tomo ki te whare karakia, korororero ai ki nga Hurai.

20 A ka mea ratou kia roa atu te wa e noho ai ia ki a ratou, kihai ia i whakaae;

21 I poroporoaki ki a ratou, i mea, Kua takoto rawa te tikanga kia mahi ahau i tenei hākari ka tata nei ki Hiruharama: e hoki mai ano ia ahau ki a koutou, ki te pai te Atua. Na, rere ana ia i Epeha.

22 A ka u ki Hiharia, ka haere atu, ka oha atu ki te hahi, a haere ana ki Anatioka.

23 A, roaroa iho, ka haere, a haereerea marietia ana e ia te

NGA MAHI A NGA APOTORO 18, 19.

whenua o Karatia, o Pirikia, me te whakau i nga akonga katoa.

24 ¶ Heoi i haere mai tetahi Hurai ki Epeha, ko Aporo te ingoa, i whanau ki Arehanaria, he pu korero, he tangata kaha ki nga karaipiture.

25 I whakaakona tenei tangata ki te ara o te Ariki; he tangata ia e toko tonu ake ana te ngakau, ka korero ia, tika tonu hoki tana whakaako i nga mea a te Ariki; heoi ano tana i matau ai ko te iriiringa a Hoani.

26 Ka anga ano ia, ka korero nui i roto i te whare karakia: a ka rongo a Akuira raua ko Pirihira ki a ia, ka mau raua ki a ia, a ata whakaaturia ana e raua ki a ia te ara o te Atua.

27 Ano ka mea ia kia haere ki Akaia, ka tuhituhi nga tēina ki nga akonga, ka kiia atu ia hei manuwihiri ma ratou: a, tona taenga atu, ka whakakahangia e ia te hunga i meinga nei e te aroha noa kia whakapono:

28 Kaha rawa hoki tana whawhati i ta nga Hurai i roto i te huihui; whakaaturia ana e ia ta nga karaipiture mo Ihu, ko ia te Karaiti.

UPOKO 19.

He akonga na Hoani. 11 Merekara. 13 He poka-noa. 18 Pukapuka makutu ka takuna. 23 Rimiritiu-ma ka oho.

I A Aporo Koriniti, ka puta atu a Paora na nga wahi o runga, ka haere ki Epeha: a tupono atu ko etahi akonga.

2 Ka mea ia ki a ratou, Kua riro ranei te Wairua Tapu i a koutou i muri i to koutou whakaponotanga? Ano ra ko ratou ki a ia, Kiano matou i rongo noa ko te Wairua Tapu tenei.

3 Ka mea ia ki a ratou, I iriiria oti koutou ki roto ki te aha? Ka mea ratou, Ki roto ki ta Hoani iriiringa.

4 Na ka mea a Paora, Ta Hoani iriiringa he iriiringa ripeneta. I mea ia ki te iwi, kia whakapono ratou ki tetahi e haere mai ana i muri i a ia, ara ki a Karaiti Ihu.

5 A, ka rongo ratou, ka iriiria i runga i te ingoa o te Ariki, o Ihu.

6 Na, ka whakapakia iho nga ringa o Paora ki runga ki a ratou, a ka tae mai te Wairua Tapu ki a ratou; na, ka koreotia e ratou nga reo, ka poropiti hoki.

7 A tata tonu ki te tekau ma rua aua tangata katoa.

8 ¶ Na, ka tomo ia ki te whare karakia, ka korero maia atu, a e toru nga marama i kororeroro ai, i kukume ai ki nga mea o te rangatirangata o te Atua.

9 A, ka pakeke etahi, ka whakateka, ka whakahawea ki taua ritenga i te aroaro o te mano, ka mawehe ia i roto i a ratou, ka wahi ke i nga akonga, ka kororeroro i tenei ra, i tenei ra, i roto i te

NGA MAHI A NGA APOTORO 19.

kura o tetahi tangata, ara o Tairanu.

10 Na, e rua ona tau i penei ai; a ka rongokatoa te hunga e noho ana i Ahia, nga Hurai, nga Kariki, i te kupu a te Ariki, a Ihu.

11 Na ehara i te merekara noa ake a te Atua i mea ai kia meatia e nga ringa o Paora.

12 I mauria mai hoki i tona tinana ki te hunga mate nga tauera, me nga aporona, a mutu ake o ratou mate, i puta mai ano nga wairua kino i roto i a ratou.

13 ¶ Katahi ka anga etahi o nga Hurai haereere noa, he hunga pei wairua, ka whakahua i te ingoa o te Ariki, o Ihu, ki runga ki etahi i nga wairua kino, ka mea, He whakahua tenei na matou ki a koutou i a Ihu, i ta Paora e kauwhau nei.

14 Na, i pera ano nga tama tokowhitu a Hewa, a tetahi Hurai, he tohunga nui ano ia.

15 Na ka whakahoki te wairua kino, ka mea, E mohio ana ahau ki a Ihu, e matau ana ki a Paora; ko koutou ia, ko wai ra?

16 Na, ko te tupeketanga mai o te tangata, i a ia nei te wairua kino, ki a ratou, kua kaha i a ratou, taea ana ratou e ia, no ka oma tahanga, ka oma mamae atu i taua whare.

17 A i mohiotia tenei e nga Hurai katoa, e nga Kariki, e noho ana i Epeha; ka tau te wehi ki a ratou katoa, a whakanuia ana te ingoa o te Ariki, o Ihu.

18 A he tokomaha i haere mai o te hunga whakapono, i whaki, i whakakite i a ratou mahi.

19 He tokomaha ano o te hunga i mahi i nga mahi tinihanga, i huihui i a ratou pukapuka, a tahuna ana ki te aroaro o te katoa: a ka taua nga utu o aua *pukapuka*, ka kitea, e rima tekau mano hiriwa.

20 Koia ano te nui o te tupu o te kupu a te Atua, te kaha.

21 ¶ Ano ka rite enei mea, ka mea a Paora i roto i tona wairua kia tika na Makeronia, na Akaia, kia haere ki Hiruharama; i mea ia, Ka tae ahau ki reira, ko Roma ano taku e tiki ai, e titiro.

22 A tokorua ana i tono ai ki Makeronia o te hunga e mahi ana ki a ia, ko Timoti raua ko Eratu; ko ia hoki, he roaroa iho tona noho ki Ahia.

23 ¶ A i taua wa kihai i nohinohi te ngangau i puta ake i taua tikanga.

24 Ko tetahi tangata hoki, ko Rimitiriu te ingoa, he kai mahi hiriwa, nana nei i hanga nga temepara hiriwa o Riana, a kihai i nohinohi nga utu i tika mai i tana *mahi* ki nga kai hanga;

25 Na ka whakaminea ratou e ia me era kai mahi o nga pera, a ka mea E mara ma, e matau ana koutou, na tenei mahi a tatou rawa.

26 Na e kite ana, e rongoa ana koutou, ehara i te mea ko Epeha anake, engari he

NGA MAHI A NGA APOTORO 19, 20.

iti te wahi o Ahia katoa kua mahue nei i tenei Paora te kukume, te whakapeau ke i te tini o te tangata, e mea ana ia, Ehara enei i te atua, e hangā nei e te ringa:

27 Na, ehara i te mea ko ta tatou nei wahi anake ka tata te kore noa iho; tera e whakakahoretia te temepara o te atua nui, o Riana, a meāke memeha noa iho tona nui, e karakiatia nei e Ahia katoa, e te ao.

28 Na, to ratou rongonga ai, ka ki i te riri, ka karanga ake, ka mea, He nui a Riana o nga Epehi.

29 Na ka tutū te puehu o te pa katoa: a ka hopukia e ratou a Kaiu raua ko Aritaku, he hunga no Makeronia, he hoa haere no Paora, a kokiri ngatahi ana ki te whare matakītaki.

30 A, i a Paora e mea ana kia tomo ki roto ki te iwi, kihai ia i tukua e nga ako-nga.

31 Na ka unga tangata etahi o nga rangatira o Ahia, i pai nei ki a ia, ka mea kia kaua ia e tuku i a ia ki roto ki te whare matakītaki.

32 Heoi puta ke te karanga a etahi, a etahi: raruraru ke hoki taua whakaminenga; te nuinga, kihai i mātau ki te mea i huihui ai ratou.

33 Na ka akiakina a Arehanera i roto i te hui, na nga Hurai ia i mea kia whakatika. A tawhiri ana te ringa o Arehanera, i mea hoki kia korerotia e ia ta ratou ki te iwi.

34 Heoi ka mātau ratou he Hurai ia, kotahi tonu te reo o te katoa ki te karanga, (a tata noa ki te rua o nga haora,) He nui a Riana o nga Epehi.

35 A ka marire iho te huihui i te kai whakarite, ka mea ia, E nga Epehi, ko wai te tangata kahore e mohiotia e ia ko te pa o nga Epehi te kai tiaki temepara o te atua nui, o Riana, o te *whakapakoko* ano i taka iho i a Hupita?

36 Na, ka kore nei enei mea e taea te whakorekore, erangi kia ata noho, kaua hoki e hikaka te mahi.

37 Kua arahina mai nei hoki e koutou enei tāngata, ehara nei i te hunga tahae mea tapu, ehara ano i te hunga kohukohu ki to koutou atua.

38 Na, ki te mea he kupu ta Rimitiriu ratou ko ona hoa mahi mo tetahi tangata, e taea te whakawa, tenei ano nga kawana: ma ratou ano ratou e whakawa.

39 Na, ki te mea he mea ke ta koutou e whai na, waiho ma te runanga tika te rite-nga.

40 Ko wai hoki ka tohu? tera pea tatou e whakawakia mo tenei ngangautanga onaianei, kahore hoki he take e tika ai ta tatou korero mo tenei huihui.

41 Ano ka puaki enei *kupu* ana, ka tonoa atu e ia te whakaminenga.

UPOKO 20.

Paora ki Makeronia, 2 Ki Kariki. 3 Ka hoki. 6 Kei

NGA MAHI A NGA APOTORO 20.

Toroa. 17 Kei Miretu.

*18 Tana ako ki nga kau-
matua o te hahi o Epeha.*

TE mutunga o te ngangau,
ka karangatia e Paora
nga akonga, ka awhitia, a
turia atu ana e ia, haere ana
ki Makeronia.

2 A ka haereerea e ia aua
wahi, a, ka maha ana kupu i
whakahau ai i a ratou, haere
ana ia ki Kariki;

3 A, ka toru ona marama ki
reira, i nga Hurai ano e wha-
katakoto whakaaro ana mona,
i a ia meake rere ki Hiria, ka
mea ia kia hoki ma Make-
ronia.

4 A i haere tahi ano i a ia a
tae noa ki Ahia, a Hopate o
Peria; a Aritaku raua ko
Hekunu o Teharonika; a Kainu
o Rerepe, a Timoti; ratou ko
Tikiku, ko Toropimu o Ahia.

5 I haere enei i mua ki Toroa
tatari ai ki a matou.

6 ¶ Na, i te mutunga o nga ra
o te taro rewena-kore, ka rere
matou i Piripai, a po rima ka
tae ki a ratou, ki Toroa; a e
whitu nga ra i noho ai ki
reira.

7 Na, i te ra tuatahi o te
wiki, i te mea kua huihui nga
akonga ki te whawhati taro,
ka kauwhau a Paora ki a
ratou, e mea ana hoki ki te
haere i te aonga ake; a ka
kumea roatia tana korero a,
waenganui po ra ano.

8 Heoi he maha nga rama i
te ruma i runga, i te wahi i
huihui ai ratou.

9 A i te matapihi e noho ana
tetahi taitamariki, ko Utiku

te ingoa, na au tonu te moe
i parangia ai ia: a ka roa
tonu nei te kauwhau a Paora,
na ka pehia rawatia ia e te
moe, a taka iho i te toru o nga
whakapaparanga o nga ruma,
tangohia rawatia ake kua
mate.

10 Na ka heke iho a Paora,
a hinga ana ki runga ki a ia,
awhi ana i a ia, ka mea, Kei
ngangau koutou; kei roto
hoki i a ia tona wairua.

11 Na ka kake atu ano ia,
ka whawhati taro, ka kai, a,
ka roa rawa te korerotanga, a
puao noa, ka haere.

12 Heoi arahina oratia atu
ana e ratou taua taitama,
kiai hoki i nohinohi te
koa.

13 ¶ Na, ko matou kua tae
i mua ki te kaupuke, a rere
ana ki Aho, i mea kia utaina
a Paora i reira: nāna hoki i
whakarite, i mea hoki ko ia
me ra uta.

14 A ka tutaki ki a matou ki
Aho, ka utaina ia, a rere ana
matou ki Mitirini.

15 Rere atu ana matou i
reira, i te aonga ake ka taea
te ritenga atu o Kio; ao ake
ano ka u ki Hamo, a noho ana
ki Torokiriuma; ao ake ano
ka u ki Miretu.

16 I mea hoki a Paora kia
rere i waho ake o Epeha, kei
roa ia ki Ahia: i porangi hoki
me kore e rokohanga ia e
te ra o te Petekoha ki Hiru-
harama.

17 ¶ Na ka tonu tangata ia i
Miretu ki Epeha, hei tiki i
nga kaumātua o te hahi.

NGA MAHI A NGA APOTORO 20.

18 ¶ A, to ratou taenga ki a ia, ka mea ia ki a ratou, E matau ana koutou ki taku tikanga i roto i a koutou i nga ra katoa, no te ra tuatahi iho ano o toku taenga mai ki Ahia,

19 Pāpaku noa iho te ngakau i mahi ai ahau ki te Ariki, he maha ia nga roimata, me nga whakamatautauranga i pa ki a au, i nga Hurai e whakata-koto whakaaro ana *moku*:

20 Kihai i puritia e ahau tetahi o nga mea pai; i whakakitea atu ano ki a koutou, i akona nuitia ki a koutou, i tenei whare hoki, i tenei whare,

21 I kauwhautia hoki ki nga Hurai, ki nga Kariki, te ripe-neta whaka te Atua, me te whakapono ki to tatou Ariki, ki a Ihu Karaiti.

22 Na, tenei ahau te haere nei ki Hiruharama, he here-herenga na te Wairua, kahore hoki e mohio ki nga mea e pa ki a au i reira:

23 Heoi ano ko ta te Wairua Tapu e whakaatu nei i tenei pa, i tenei pa, e mea ana, e taria mai ana ahau e nga mekameka, e nga mate.

24 Otiia kahore aku whakaaro ki tetahi o *enei* mea, e kore ano ahau e ihupuku ki te ora, engari kia koa ahau ina taea taku e whai nei, me te mahi i homai ki a au e te Ariki, e Ihu, *ara* kia whakaa-turia te rongo pai o te aroha noa o te Atua.

25 Na, e mohio ana tenei ahau, heoi ano kitenga o toku mata e tetahi o koutou, e te

hunga i kauwhau haere nei ahau i te rangatiratanga o te Atua i roto i a koutou.

26 Koia ahau ka mea nei ki a koutou aianei, Kahore oku poke i nga toto o tetahi ta-ngata.

27 Kihai hoki ahau i manawapa ki te kauwhau i te whakaaro katoa a te Atua ki a koutou.

28 Na kia tupato ki a koutou, ki te kahui katoa ano i meinga ai koutou e te Wairua Tapu hei kai tirotiro, wha-ngaia te hahi a te Atua, i hokona nei e ia ki ona ake toto.

29 E mohio ana hoki ahau ki tenei, ka riro ahau, tera e puta ki a koutou nga wuruhi nanakia, e kore nei e tohu i te kahui.

30 A ka whakatika ano etahi tāngata i roto i a koutou, korero ai i nga mea parori ke, kukume ai i nga akonga hei whai i a ratou.

31 Na kia mataara, kia mahara ano ki nga tau e toru kihai nei ahau i mangere i te po, i te ao, ki te whakatupato i tenei, i tenei o *koutou*, me te tangi ano ahau.

32 Na, tenei ahau, e *oku* teina, te tuku nei i a koutou ki te Atua, ki te kupu hoki o tona aroha noa, e kaha nei ki te whakatupu ake, ki te hoatu hoki i tetahi wahi ki a koutou i roto i te hunga katoa kua oti te whakatapu.

33 Kihai i hiahiatia e ahau te hiriwa, te koura, te kakahu ranei, o tetahi.

34 E mohio ana ano koutou, na enei ringa i mahi nga mea i matea e ahau, e oku hoa.

35 I whakakite ahau i nga mea katoa ki a koutou, kia penei te mahi, te atawhai i te hunga ngoikore, kia mahara hoki ki nga kupu a te Ariki, a Ihu, ki tana i mea ai, Te whakawhiwhi, nui atu te hari i to te whiwhi.

36 ¶ Te mutunga o enei kupu, ka tukua ona turi ki raro, ka inoi tahi ia me ratou katoa.

37 He nui hoki te tangi o te katoa; hinga iho ratou ki runga ki te kakī o Paora, ka kīhi i a ia;

38 I tino mamae pu hoki ratou i te kupu i mea ai ia, heoi ano to ratou kitenga i tona mata. Na ka arahi ratou i a ia ki te kaupuke.

UPOKO 21.

Rere tonu. 3 Kei Taira;

7 Toromai. 8 Hiharia. 10

Ta Akapu. Hei aha mana?

17 Kei Hiruharama. 23

Tikanga a Hemi ma. 27

Ka mau.

HEOI ka motu ke matou i a ratou, ka rere, a tika tonu atu, taea noatia a Koha, ao ake te ra, kei Roro, ā, Patara:

2 Na ka rokohanga tetahi kaupuke e whakawhiti atu ana ki Piniki, a eke ana matou ki runga, rere ana.

3 A ka kitea Kaiperu, ka mahue atu i te taha ki mauī, a rere ana ki Hiria, u noa ki Taira: e waiho ana hoki e te kaupuke tona utanga ki reira.

4 A, ka kitea nga akonga, e whitu nga ra i noho ai matou ki reira: a ka korero ratou ki a Paora, he mea na te Wairua, kia kaua ia e haere ki Hiruharama.

5 A ka rite aua ra o matou, ka puta atu matou, ka haere; me te kawē ano ratou katoa, nga wāhine, nga tamariki, i a matou, a waho ra ano o te pa: na ka tukua o matou turi ki te tahatai, ka inoi.

6 Katahi ka awhi matou tetahi ki tetahi, a eke ana ki te kaupuke; ko ratou i hoki ki o ratou kāinga.

7 ¶ A, te mutunga o to matou rerenga mai i Taira, ka tae ki Toromai, na ka oha atu ki nga tēina, a kotahi te ra i noho ai ki a ratou.

8 I te aonga ake ka turia e matou ko Paora ma, ka haere ki Hiharia: a tomo ana ki te whare o Piripi kai kauwhau, ko ia nei tetahi o nga toko-whitu; a noho ana i a ia.

9 Na, tokowha ana tamāhine, he wahina, he poropiti.

10 A, ka maha o matou ra i noho ai, ka haere mai tetahi poropiti i Huria, ko Akapu te ingoa.

11 A, te taenga mai ki a matou, ka mau ki te whitiki o Paora, herea iho e ia ona ake ringa me ona waewae, ka mea, Ko ta te Wairua Tapu korero tenei, E peneitia te here o te tangata nona tenei whitiki e nga Hurai i Hiruharama, e tukua atu ano ia ki nga ringa o nga tauīwi.

12 Heoi, to matou rongonga

NGA MAHI A NGA APOTORO 21.

i enei mea, ka tohe matou ko nga tângata o taua kâinga, kia kua ia e haere ki Hiruharama.

13 Na, ko te whakahokinga mai a Paora, He aha ta koutou e tangi, e whakangakaukore nei i a au? ehara hoki i te mea ko te here anake taku e pai ai, engari ko te mate ano hoki ki Hiruharama, mo te ingoa o te Ariki, o Ihu.

14 A, tē rongo ia, ka mutu ta matou, ka mea, Kia meatia ta te Ariki e pai ai.

15 ¶ A, ka pahemo enei ra, ka takai matou i a matou mea, a haere ana ki Hiruharama.

16 I haere tahi ano i a matou *etahi* o nga akonga o Hiharia, me te kawē ano i a Nahona o Kaiperu, he akonga tawhito, hei tukunga atu mo matou.

17 ¶ A, to matou taenga ki Hiruharama, na, koa noa iho nga tēina ki a matou hei hoa mo ratou.

18 I te aonga ake ka haere tahi matou ko Paora ki a Hemi: i reira ano nga kumātua katoa.

19 Na ka oha ia ki a ratou, ka korerotia takitahitia nga mea i mea ai te Atua kia meatia e ia i roto i nga tauwi.

20 Na, to ratou rongonga ai, ka whakakororia i te Ariki, ka mea ki a ia, Kua kite koe, e to matou teina, i nga mano tini o nga Hurai kua whakapono nei; a e uaua katoa ana ki te ture:

21 Kua rongo ano hoki ratou ki a koe, e whakaako ana i nga Hurai katoa i roto i nga

tauwi, kia whakarerea a Mohi, e mea ana kia kua ratou e kokoti i nga tamariki, kia kua ano e haere i runga i nga ritenga o mua.

22 Na, me pehea? tera e rupeke mai te huihui: erongo hoki ratou ki tou taenga mai.

23 Na, me mea e koe tenei e korerotia nei e matou ki a koe: 'Tokowha o matou tângata, he kupu taurangi ta ratou;

24 'Tangohia enei, kia purea ngatahitia koutou, mau ano e utu a ratou mea, kia waruhia ai o ratou mātenga: a ka kite katoa ratou he teka noa nga mea i korerotia mou; engari e tika ana tou haere, a kei te whakarite ano koe i te ture.

25 Ko nga tauwi ia kua whakapono, kua tuhituhi atu matou, kua whakatakoto i te tikanga kia kua he penei e meatia e ratou, ko tenei anake, kia tupato ratou i nga mea e patua ana ma nga whakapakoko, i te toto, i te mea kua notia te kaki, me te moe tahae.

26 Na ka mau a Paora ki aua tângata, a i te aonga ake ka pure tahi, ka haere tahi ratou ki roto ki te temepara, hei whakaatu i te ritenga o nga ra mo te purenga, kia whakaherea ra ano he whakahere mo tetahi, mo tetahi o ratou.

27 ¶ Heoi ka tata nga ra e whitu te taka, ka kitea ia i roto i te temepara e etahi Hurai o Ahia: na ratou i

whakaoho te mano katoa, a ka pa o ratou ringa ki a ia,

28 Ka karanga, E nga tāngata o Iharaira, awhinatia mai. Ko te tangata tenei e whakaako nei i nga tāngata katoa o nga wahi katoa ki nga mea whakahe mo te iwi, mo te ture, mo tenei kāinga: kua kawea ano e ia etahi Kariki ki roto ki te temepara, a ka noa nei i a ia tenei wahi tapu.

29 (I kite hoki ratou i mua, he hoa nona i roto i te pa a Toropimu o Epeha; a tohu noa ratou, kua kawea ia e Paora ki roto ki te temepara.)

30 Na ka oho te pa katoa, ka oma mai nga tāngata: a ka mau ki a Paora, toia ana ia ki waho o te temepara: a tutakina tonutia atu ana nga tatau.

31 Na, i a ratou e whai ana kia patua ia, ka tae te rongo ki te rangatira mano o te hapū hoia, kua tutū te puehu i Hiruharama katoa.

32 Na, hohoro tonu tana mau ki etahi hoia me etahi keneturio, a oma iho ana ki a ratou: a, to ratou kitenga i te rangatira mano me nga hoia, ka mutu te patu i a Paora.

33 Na ka whakatata te rangatira mano, ka tango i a ia, ka mea kia herea ki nga mekameka e rua; a ka ui, Ko wai ia, i aha hoki ia?

34 He kupu ano ta tetahi, he kupu ano ta tetahi, i roto i te mano: a, tē rongo ia ki te tikanga i te ngangau, ka mea kia arahina ia ki te pa.

35 Na, te taenga ki te piki-

tanga, ka hikitia ia e nga hoia i te taututetutenga hoki a te tangata.

36 I aru mai hoki te huihui o te iwi, me te karanga, Whakamatea ia.

37 ¶ Ano ka whano a Paora te kawea ki roto ki te pa, ka mea ia ki te rangatira mano, E pai ranei kia korero ahau i tetahi kupu ki a koe? Ka mea ia, E mātau ana ranei koe ki te reo Kariki?

38 Ehara oti koe i taua Ihipi i whakatupu i te tutū i mua i enei ra, a kawea ana e ia nga tāngata kohuru e wha mano ki te koraha?

39 Ka mea a Paora, He tangata ahau no nga Hurai, no Tarahu o Kirikia, he tangata tupu no tera pa, ehara ano i te pa ingoa kore: na, ko taku inoi tenei ki a koe, tukua ahau kia korero ki te iwi.

40 Na tukua ana e ia, a tu ana a Paora ki te pikitanga, ka tawhiri tona ringa ki te iwi. Na, mutu pu te turituri, ka korero ia, he Hiperu te reo, ka mea,

UPOKO 22.

Tana taki i runga i te pikitanga. 22 Ora noa i te whiu.

E HOA ma, e oku tuākana, e oku mātua, whakarongo ki tenei korero aku ki a koutou.

2 (A ka rongo ratou ko te reo Hiperu tana i korero ai ki a ratou, na, mutu rawa te kīkī: a ka mea ia,)

3 He tangata ahau no nga Hurai, i whanau ki Tarahu o Kirikia, i whakatupuria i roto i tenei pa ki nga waewae o Kamariere, i ata whakaakona ki te tino tikanga o te ture o nga mātua, i uaua ano ahau mo te Atua, i pena me koutou katoa inaianei;

4 A whakatoia ana e ahau *nga tāngata* o tenei tikanga, a mate noa; herea ana e ahau nga tāne, nga wāhine, a tukua ana ki nga whare herehere.

5 Ma te tohunga nui ratou ko nga kaumātua katoa e whakatika tenei aku: i riro mai hoki i a au a ratou pukapuka ki nga tēina, a haere ana ahau ki Ramahiku, kia herea, kia arahina te hunga ano o reira ki Hiruharama kia whakamamaetia.

6 I a au ano e haere ana, a ka whakatata ki Ramahiku i te poutumarotanga, ka whiti whakarere mai ki a au he maramatanga nui no te rangi;

7 A hinga ana ahau ki te whenua, ka rangona he reo e mea ana ki a au, E Haora, e Haora, he aha tau e whakatoi nei i a au?

8 Na ka whakahokia e ahau, Ko wai koe, e te Ariki? Ka mea ia ki a au, Ko Ihu ahau o Nahareta, e whakatoia nei e koe.

9 I kite ano oku hoa i te maramatanga, a wehi ana; otira kihai i rongo i te reo ona i korero ki a au.

10 Ka mea ahau, Me aha ahau, e te Ariki? Ka mea te Ariki ki a au, Whakatika,

haere ki Ramahiku; a ka korerotia ki a koe ki reira nga mea katoa kua whakari-tea kia meinga e koe.

11 Ano ra kahore ahau i kite, na te kororia hoki o taua maramatanga, ka arahina a ringaringatia e oku hoa haere, ka tae ki Ramahiku.

12 Na, ko tetahi *tangata*, ko Anania, he tangata karakia, i rite tonu nei ki ta te ture *ana mahi*, e korerotia paitia ana e nga Hurai katoa e noho ana i *reira*,

13 Haere mai ana ia ki a au, a tu ana, ka mea ki a au, E *toku* teina, e Haora, titiro ake. A i taua haora ano ka titiro ahau ki a ia.

14 I mea ano ia, Na te Atua o o tatou mātua koe i whiriwhiri, kia mātau ki tana e pai ai, kia kite i a te Tika, kia rongo hoki i te reo o tona mangai:

15 No te mea ko koe hei kai whakaatu māna ki nga tāngata katoa, mo nga mea i kite ai, i rongo ai koe.

16 Na, he aha tau e whakaroa nei? whakatika, kia iriiria koe, kia horoia ou hara, me te karanga ano ki te ingoa o te Ariki.

17 A, toku hokinga mai ki Hiruharama, i a au e inoi ana i roto i te temepara, ka puta te ngakau matakite ki a au;

18 A ka kite ahau i a ia e mea ana ki a au, E ahua, kia hohoro te haere atu i Hiruharama: e kore hoki ratou e tango i to korero moku.

19 Na, ko taku meatanga atu, E te Ariki, e matau ana

ratou, he kai herehere ahau, he kai whiu i roto i nga whare karakia, i te hunga i whakaponono ki a koe:

20 A, i te whakahekenga o nga toto o tou kai whakaatu, o Tepene, i reira ahau e tu ana, e whakaae ana ki tona whakamatenga, e tiaki ana hoki i nga kakahu o ona kai whakamate.

21 Na, ko tana meatanga ki a au, Haere: ka ungā hoki koe e ahau ki tawhiti, ki nga tauwiwi.

22 ¶ A whakarongo ana ratou ki a ia taea noatia tenei kupu, na ka hamama ratou, ka mea, Whakamatea atu te koroke nei i runga i te whenua: e kore hoki e pai kia ora ia.

23 Heoi i a ratou e karanga ana, e rukeruke ana i o ratou kakahu, e akiri ana i te puehu ki te rangi,

24 Ka ki te rangatira kia kawe ia ki te pa, ka mea kia whiua, kia uia; kia mātau ai ia ki te mea i penei ai ratou te karanga ki a ia.

25 A i a ratou e here ana i a ia ki nga here, ka mea a Paora ki te keneturio e tu ana i reira, He mea tika ranei kia whiua e koutou te tangata o Roma, i te mea kahore ano i mau noa tona hē?

26 Na, te rongonga o te keneturio, ka haere, ka korero ki te rangatira mano, ka mea, Kia tupato ki tau e mea ai: no Roma hoki te tangata nei.

27 Na ka haere mai te rangatira mano, ka mea ki a ia,

Korero mai ki a au, no Roma koe? Ka mea ia, Ae.

28 Na ka whakahoki te rangatira mano, He nui te utu i hokona ai e ahau tenei tangata-whenuatanga. Ka mea a Paora, He tangata whenua ra ahau no toku whanautanga.

29 Na whakarerea tonutia iho ia e te hunga e mea ana ki te ui ki a ia: i matakū ano te rangatira mano i tona rongonga ai no Roma ia, mona hoki i herea.

30 ¶ I te aonga ake ka mea ia kia mātau ki te tikanga, ki te mea i whakawakia ai ia e nga Hurai, a ka wewete i ona here, ka mea kia haere mai nga tohunga nui me to ratou runanga katoa, a arahina iho ana a Paora, whakaturia ana ki to ratou aroaro.

UPOKO 23.

Kei te runanga a Paora e korero ana. 2 Ka pakia.

11 Ta te Ariki ki a ia. 12 Te whakapapa mona. 23 Ka kawea ki Hiharia.

NA ka titiro pu a Paora ki te runanga, a ka mea, E hoa ma, e oku tuākana, tika tonu ki taku mahara taku whakahaere i te aroaro o te Atua, a taea noatia tenei ra.

2 Na ka mea a Anania tohunga nui ki te hunga e tu ana i tona taha, kia pakia tona mangai.

3 Ano ra ko Paora ki a ia, Tenei ake ka papaki te Atua i a koe, e te pakitara kua oti te pani ki te paru ma: kaore,

kia noho koe ki te mea ki a au i ta te ture i whakatakoto ai, heoi kapea ana e koe ta te ture, kiia ana ahau e koe kia pakia?

4 Na ka mea te hunga e tu tata ana, E whakamanumanu ana koe ki te tohunga nui a te Atua?

5 Anorako Paora, Kihai ahau i mātau, e *oku* tuākana, ko ia te tohunga nui: kua oti hoki te tuhituhi, Aua e korerotia kinotia te rangatira o tou iwi.

6 Ano ka kite a Paora no nga Haruki etahi, ko etahi no nga Parihi, ka karanga ia i roto i te runanga, E hoa ma, e *oku* tuākana, he Parihi ahau, he tama na te Parihi: ko te aranga o te hunga mate e tumanakohia nei, te mea e whakawakia nei ahau

7 A, tana korerotanga i tenei, ka totohe nga Parihi ki nga Haruki: a ka wehea te huihui.

8 E mea ana hoki nga Haruki, Kahore he aranga, kahore he anahera, kahore he wairua: ko nga Parihi ia, e whakaae ana ki aua mea e rua.

9 A ka nui te ngangare: ka whakatika nga karaipi o te Parihi taha, ka totohe, ka mea, Kahore ano i mau i a matou te hē o tenei tangata: engari ki te mea kua korero tetahi wairua ki a ia, tetahi anahera ranei, aua tatou e whawhai ki te Atua.

10 Ano ka nui te ngangau, ka matakū te rangatira mano kei motumotuhia a Paora e ratou, ungā ana e ia nga hoia kia heke atu ki te tango i a

ia i roto i a ratou, kia arahina hoki ki te pa.

11 ¶ A i taua po ka tu te Ariki ki tona taha, ka mea, Kia maia, e Paora: me whakaatu ano e koe ki Roma, me pera me tau whakaaturanga i aku mea ki Hiruharama.

12 ¶ Ao ake te ra, ka huihui etahi o nga Hurai, ka maka oati ki a ratou ano, ka mea, kia kaua ratou e kai, kai kaua e inu, kia whakamatea ra ano a Paora.

13 A e wha tekau ngahoro nga tāngata nāna tenei oati-tanga.

14 Na ka haere ratou ki nga tohunga nui ratou ko nga kaumātua, ka mea, Mau pu ta matou oati i oati ai, kia kaua e pa kai, kia mate ra ano a Paora i a matou.

15 Na, ma koutou tahi ko te runanga e ki atu ki te rangatira mano kia arahina iho ia ki a koutou apopo, me ki atu e mea ana koutou kia ata mohiotia nga mea mona: ko matou ia, i te mea kiano ia i tata noa, ka whai mahara ki te whakamate i a ia.

16 A, te rongonga o te iramutu o Paora ki a ratou whakamō whakapapa, na ka haere ia, ka tomo ki te pa, ka korero ki a Paora.

17 Katahi ka karanga a Paora ki tetahi keneturio, ka mea, Arahina atu te tamaiti nei ki te rangatira mano: he korero hoki tana ki a ia.

18 Na ka mau ia ki a ia, ka arahi i a ia ki te rangatira mano, ka mea, I karanga te

NGA MAHI A NGA APOTORO 23.

herehere, a Paora, i a au, i mea kia arahina tenei tamaiti ki a koe, he korero hoki tana ki a koe.

19 Na ka mau te rangatira mano ki tona ringa, ka haere ki tahaki, ka ui, He aha tau mea hei korerotanga ki a au?

20 Ano ra ko tera, Kua whakakoto whakaaro nga Hurai kia mea ki a koe, kia arahina iho a Paora apopo ki te runanga, ano e ata uia tetahi atu mea mona.

21 Na aua koe e rongu ki a ratou: e wha hoki tekau ngahoro tātanga o ratou e whangana ana ki a ia, kua puaki ta ratou oati, kia kaua e kai, kia kaua e inu, kia mate ra ano ia i a ratou: na kua rite tenei ratou, e tatari ana ki te kupu whakaae i a koe.

22 Katahi ka tukua atu taua tamaiti e te rangatira mano, a ka mea ia, Kaua e korerotia ki tetahi to whakaaturanga mai i enei mea ki a au.

23 ¶ Na, tokorua nga keneturio i karangatia e ia; i mea ia, Kia rite mai etahi hoia kia rua rau hei haere ki Hiharia, me etahi hoia eke hoiho kia whitu tekau, me tetahi hunga mau matia kia rua rau, i te toru o nga haora o te po;

24 Kia rite mai hoki nga kararehe, hei whakanohanga iho mo Paora ki runga, kia kawea oratia ai ia ki a Pirika, ki te kawana.

25 He penei te pukapuka i tuhia e ia:

26 Na Karauria Raihia ki

a Pirika, ki te kawana pai rawa, Tena koe.

27 I hopukia tenei tangata e nga Hurai, a i a ia ka tata te whakamatea e ratou, ka puta atu ahau me nga hoia, a tangohia mai ana ia; i rongu hoki ahau no Roma ia.

28 I mea ano ahau kia rongu i te take i whakawakia ai ia e ratou, a arahina ana ki to ratou runanga:

29 Na ka kite ahau he kupu tautohe no to ratou ture i whakawakia ai ia, kahore hoki ona hē i tika ai te mate, te here ranei.

30 A ka korerotia mai ki a au, meāke whanga nga Hurai mo tenei tangata, na, tonoa tonutia e ahau ki a koe, i mea hoki ahau ki ona kai whakawa, kia korerotia ki a koe nga mea mona. Hei kona ra.

31 ¶ Na ka mau nga hoia ki a Paora, ka pera me te mea i korerotia ki a ratou, a arahina ana ia i te po ki Anapitipatari.

32 Ao ake te ra ka tukua atu nga tātanga eke hoiho hei hoa haere mona, a hoki ana ki te pa:

33 A, to ratou taenga atu ki Hiharia, ka hoatu te pukapuka ki te kawana, a whakaturia ana a Paora ki tona aroaro.

34 A, te tirohanga iho a te kawana, ka ui, No tehea kawanatanga ia? A ka rongu no Kirikia;

35 Ka mea ia, Ka whakarongu ahau ki a koe ina tae

mai ano hoki ou kai whakawa. I mea ano ia kia tiakina ia i roto i te whare whakawa o Herora.

UPOKO 24.

Ka whakawakia ano. 10 Tana korero. 22 Ta te Kawana.

NA ka pahure nga ra e rima, ka haere atu a Anania, te tohunga nui ratou ko nga kaumātua, ko tetahi kai korero, ko Tereturu, whakakite ai i nga hē o Paora ki te kawana.

2 A, ka oti ia te karanga, ka timata a Tereturu te whakawa, ka mea, Nau i hua ai te rangimarie ki a matou, he ata ngarahu hoki nau i pai ai nga mea i meatia ki tenei iwi,

3 Nui atu ta matou whakawhetai mo *aua mea* ka riro mai nei i a matou, i nga wa katoa, i nga wahi katoa, e Pirika, e te tangata pai rawa.

4 Otiia e kore e nui atu taku whakaware i a koe; tena, he ngawari nei hoki koe, whakarangona mai ta matou kupu kotahi nei.

5 I mau hoki tenei tangata, ano he mate uruta, e whakaho ana i nga Hurai katoa o te ao, ko ia hoki te tino take o te titorehanga ki ta nga Nahareti:

6 I mea hoki ia kia whakanoatia te temepara: na ka hopu matou i a ia, a ka mea kia meatia ki a ia ta to matou ture i whakatakoto ai.

7 Na ka puta a Raihia ra-

ngatira mano, rupahu noa iho, tangohia ana e ia i o matou ringa,

8 A ungā ana ona kai whakawa kia haere ki a koe: mau e ui ki a ia, kia rongo ai koe ki enei mea katoa e whakawakia nei ia e matou.

9 A i whakaae ano nga Hurai, i mea, Koia ano tena.

10 ¶ Na, ko te whakahokinga a Paora, i ta te kawana tungoutanga ki a ia kia korero, E matau ana ahau, ka maha ou tau e whakawa nei koe i tenei iwi, koia i pai ai toku ngakau ki te tohe i te tika o aku mea:

11 E takoto kau ana hoki hei mohiotanga mau, kahore i maha ake i te tekau ma rua nga ra oku i haere mai nei ki Hiruharama, ki te karakia.

12 Kihai ano ahau i mau i a ratou i roto i te temepara e totohe ana ki tetahi, e mea ana ranei i te mano kia tutū, kahore i nga whare karakia, kahore ano hoki i te pa:

13 E kore ano e taea e ratou te whakatau ki a au nga mea e whakawakia nei ahau e ratou.

14 Otira me whaki tenei e ahau ki a koe, ko ta ratou ritenga e ki nei he titorehanga, ko taku tena i a au e karakia nei ki te Atua o oku mātua; e whakapono ana hoki ahau ki nga mea katoa kua oti te tuhituhi i roto i te ture, i ta nga poropiti:

15 E tumanako ana ki ta te Atua, ki ta ratou ake ano e whakaae nei, *ara* tenei ake

ka ara nga tāngata mate, nga tāngata tika, nga tāngata hē.

16 Tenei ano taku e whai nei, kia hara kore tonu toku hinengaro i te aroaro o te Atua, o nga tāngata.

17 Na, muri iho i nga tau e maha, ka tae mai ahau ki te kawē mai i nga mea atawhai rawakore ki toku iwi, me nga whakahere.

18 I kitea ahau i reira e etahi Hurai o Ahia, e purea ana i roto i te temepara, kahore he huihui, kahore he ngangau.

19 Ko te tikanga ra kia haere mai ratou ki a koe ki te whakawa, ki te mea he mea ta ratou moku.

20 Ma enei ake ano ranei e korero, me i kitea e ratou he hē toku, i a au ano e tu ana i te runanga,

21 Ko taua kupu kotahi pea i karanga ai ahau, i a au e tu ana i roto i a ratou, Ko te aranga o te hunga mate te mea e whakawakia nei ahau e koutou inaianei.

22 ¶ Heoi ka rongo a Pirika ki enei mea, ka ungā atu ratou, he nui atu hoki no tona mohio ki taua ritenga, ka mea ia, Kia tae mai a Raihia rangatira mano, ka tino rapu ahau i te tikanga o a koutou mea.

23 Na ka mea ia ki te kene-turio kia tiakina a Paora, kia waiho noa ano ia, kia kaua e riria ona hoa ina mahi *ki a ia*, ina haere mai ki a ia.

24 ¶ Na, muri iho i etahi ra, ka tae mai a Pirika raua ko tana wahine, ko Ruruhira, he

Hurai, ka mea ia kia tikina a Paora, a ka whakarongo ki a ia ki te whakapono ki a te Karaiti.

25 A, i a ia e korero ana ki nga mea o te tika, ki te hiahia kia pehia, ki te whakawakanga a mua, ka wiri a Pirika, ka mea, Haere aianei; kia watea ahau, ka karangatia koe e ahau.

26 Tohu noa hoki ka hoatu ki a ia he moni e Paora kia tukua ai ia: koia i hono ai te tiki i a ia, te korero ki a ia.

27 Na, muri iho i nga tau e rua, ka riro mai a Porohiū Petuha hei whakakapi mo Pirika, a ka mea a Pirika kia manawarekatia nga Hurai, na ka waiho e ia a Paora kia here ana.

UPOKO 25.

Kei a Petuha e whakawakia ana. 10 Ma Hiha te whakawa. 13 Akaripa.

THE taenga o Petuha ki te kawanatanga, ka toru nga ra, ka haere atu i Hiharia ki Hiruharama.

2 Na ka korero te tohunga nui, me nga rangatira o nga Hurai ki a ia mo Paora, ka tohe ki a ia,

3 Kia whakaaetia ta ratou mona, kia tikina atu ia ki Hiruharama, he whanga hoki ta ratou mona kia whakamatea ki te ara.

4 Na ka whakahokia e Petuha, me pupuri a Paora ki Hiharia; e hohoro ana hoki tona haere *ki reira*.

5 I mea ano ia, Me haere tahi ano ki raro nga mea o

NGA MAHI A NGA APOTORO 25.

koutou e watea ana, ki te whakawa i taua tangata, ki te mea he *kino* tana.

6 ¶ A, ngahuru noa atu nga ra i noho ai ia ki a ratou, ka haere ia ki Hiharia; ao ake te ra ka noho ki te nohoanga whakawa, a ka mea kia arahina mai a Paora.

7 Tona taenga mai, e tu ana tera nga Hurai i haere mai i Hiruharama, he maha, he nui nga hē i whakapangia e ratou ki a Paora; heoi kihai i u ta ratou.

8 A ka utua e ia, Kahore rawa oku hara ki te ture a nga Hurai, kahore ki te temepara, kahore ano ki a Hiha.

9 Heoi ka mea a Petuha kia manawarekatia nga Hurai, a ka ki ki a Paora, ka mea, E pai ana koe kia haere ki Hiruharama, ki reira whakawakia ai mo enei mea ki toku aroaro?

10 Ano ra ko Paora, E tu ana ahau ki te whakawakanga a Hiha, ko te wahi tika tera hei whakawakanga moku: kahore oku hē ki nga Hurai, kua tino kitea na hoki e koe.

11 Me he hē toku, a kua meinga e ahau tetahi mea e tika ai te mate, e kore ahau e kino kia mate: tena ko tenei he teka nga mea e whakapangia nei e ratou ki a au, e kore e ahei kia tukua ahau e tetahi ki a ratou. He karanga tenei naku ki a Hiha.

12 Na ka korororero a Petuha ki te runanga, ka mea, Kua karanga koe ki a Hiha: me haere koe ki a Hiha.

13 ¶ A, muri iho i etahi ra, ka tae mai a kingi Akaripara ko Pereniki ki Hiharia, ki te oha ki a Petuha.

14 A ka po maha raua e noho ana i reira, ka korerotia e Petuha ki te kingi nga meatanga ki a Paora, ka mea, Tenei tetahi tangata kua waiho e Pirika e here ana:

15 A, toku taenga ki Hiruharama, ka korerotia mai ia e nga tohunga nui, e nga kaumātua o nga Hurai, ka tono ratou kia whakawakia ia.

16 Na, ko taku whakahokinga atu ki a ratou, Ehara i te ritenga no nga tangata o Roma kia tukua he tangata kia mate, i te mea kiano i tutataki noa te tangata e whakawakia ana ki nga kai whakawa, me tuku ano ia ki te whakahoki kupu ki te kupu whakawa.

17 A, to ratou minenga ki konei, kihai ahau i whakaroa: ao ake te ra ka noho ahau ki te nohoanga whakawa, ka mea kia arahina mai taua tangata.

18 A, te turanga o nga kai whakawa, kihai tetahi hē o aku i whakaaro ai i korerotia e ratou mona:

19 Heoi he kupu tautohenga no ta ratou karakia ta ratou i mea ai ki a ia, ko tetahi Ihu ano, kua mate, a e kiia ana e Paora kei te ora.

20 Heoi pohewa noa iho ahau ki taua tautotohenga, a ka mea me kore ia e pai kia haere ki Hiruharama, ki reira whakawakia ai mo au mea.

21 A, te karangatanga a

Paora kia waiho ia, kia whakarangona tana e Akuhata, ka mea ahau kia waiho ia, kia tukua ra ano ki a Hiha.

22 Ka mea a Akaripa ki a Petuha, E hiahia ana ano ahau kia rongu ki ta tera tangata. Ka mea ia, Ko apopo koe rongu ai ki a ia.

23 ¶ I te aonga ake ka tae a Akaripa raua ko Pere-niki, me nga whakapaipai maha, a tomo ana ki te whare whakarongo, ratou ko nga rangatira mano, ko nga tangata nunui o te pa, a, ka ki a Petuha, ka mauria mai a Paora.

24 Na, ko te kiana a Petuha, E kingi Akaripa, e koutou katoa e noho nei tatou, ka kite koutou i tenei tangata i tohe mai ai ki a au te huihui katoa o nga Hurai i Hiruharama, i konei ano hoki, i karanga ai, Ehara rawa i te tika kia waiho ia i te ora.

25 A, toku kitenga kahore ana mahi e tika ai te mate, a ka karanga ano ia ki a Akuhata, ka mea ahau kia ungā atu ia.

26 Kahore ia aku tino mea e tuhituhi atu ai ahau mona ki toku ariki. Koia ahau ka arahi mai nei i a ia ki a koutou, ki a koe rawa ano, e kingi Akaripa, kia whai mea ai ahau hei tuhituhinga atu, ua mutu te uiui.

27 Ki taku hoki he mea hē kia ungā atu he herehere, a kia kua e korerotia te mea i whakawakia ai ia.

UPOKO 26.

Ta Paora ki a Akaripa-ma.

24 *Ta Petuha.* 30 *Whakamutunga.*

NA, ko te meatanga a Akaripa ki a Paora, Tena korerotia o koro. Katahi ka totoro te ringa o Paora, kei te koro:

2 He koanga ngakau tenei ki a au, e kingi Akaripa, kia korerotia e ahau ki a koe aianeia nga mea katoa e whakawakia nei ahau e nga Hurai:

3 He mohio rawa hoki koe ki nga ritenga katoa me nga tautohenga a nga Hurai: tena koa, whakarongo marie ki a au.

4 E mohio ana nga Hurai katoa ki taku whakahaere o toku tamarikitanga ake, no te oroko-timatanga ra ano i roto i toku iwi, i Hiruharama;

5 Mohio tonu ratou ki a au o mua iho, me i pai ratou ki te whakaatu; taku mahi, no ta te titorehanga pakeke rawa o ta tatou karakia, no ta nga Parihi.

6 Tenei ahau te tu nei, te whakawakia nei mo te tumanako ki te mea i korerotia e te Atua i mua ki o tatou matua:

7 Ko te uru ano ki tenei ta o tatou iwi kotahi tekau ma rua e tumanako nei, i a ratou e mahi tonu nei ki te Atua i te ao, i te po. Ko tenei, e kingi Akaripa, e tumanakohia atu nei, te mea e whakawakia nei ahau e nga Hurai.

NGA MAHI A NGA APOTORO 26.

8 Koia, ki ta koutou e kore e whakaponohia ta te Atua whakaarahanga i te hunga mate?

9 Ko ahau nei, i whakaaro ahau ko te mea tika kia maha nga mea e mahia e ahau hei pehi mo te ingoa o Ihu o Nahareta.

10 Ae, i meinga ano tenei e ahau ki Hiruharama: he tokomaha ano te hunga tapu i uakina e ahau ki nga whare herehere, he mea tuku hoki nga tikanga na nga tohunga nui ki a au; a ka whakamatea ratou, i te whakaae ano ahau.

11 He maha ano aku whiunga i a ratou i roto i nga whare karakia katoa, i meinga ano ratou e ahau kia kohukohu; heoi haurangi noa iho ahau ki a ratou, whaia ana e ahau, a taea noatia nga pa o tawhiti.

12 Nawai a i a au e haere ana ki Ramahiku, me nga tikanga, me te kupu whakaae a nga tohunga nui,

13 I te poutumarotanga, e te kingi, ka kitea e ahau i te ara he maramatanga no te rangi e tiaho ana ki a au, ki oku hoa haere ano, tera atu i te maramatanga o te ra.

14 Heoi hinga katoa ana matou ki te whenua, ka rongo ahau i te reo e korero ana ki a au, no nga Hiperu ano hoki te reo, e mea ana, E Haora, e Haora, he aha tau e whakatoi nei i a au? ehara tau, te whana ki nga koikoi.

15 Ano ra ko ahau, Ko wai koe, e te Ariki? Ka mea ia,

Ko Ihu ahau e whakatoia nei e koe.

16 Otira whakatika, e tu ou waewae ki runga: ko te mea tenei i puta ai ahau ki a koe, kia meinga koe hei kai mahi, hei kai whakaatu mo nga mea i kite nei koe, me nga mea ano e kitea ai ahau e koe.

17 Ka whakaorangia koe i te iwi, i nga tau iwi, ka tonoa nei koe e ahau ki a ratou,

18 Hei whakatitiro i o ratou kanohi, hei whakatahuri i a ratou i te pouri ki te maramatanga, i te kaha o Hatana ki te Atua, kia whiwhi ai ratou ki te murunga hara, i runga i te whakapono ki a au, ki tetahi wahi ano i roto i te hunga ka oti te whakaputu

19 No reira, kihai ahau i whakatuturi, e kingi Akaripa, ki to te rangi kitenga:

20 Heoi i matua korero ahau ki te hunga i Ramahiku, i Hiruharama, ki te whenua katoa ano o Huria, ki nga tau iwi hoki, kia ripeneta, kia tahuri ki te Atua, me te mahi ano i nga mahi tika o te ripeneta

21 Na reira nga Hurai i hopu ai i a au i te temepara, i whai ai kia whakamatea ahau.

22 Heoi ka awhinatia mai ahau e te Atua, ka tu tonu nei ahau, a mohoa noa nei, me te korero ki te iti, ki te rahi, kahore aku kupu ke ake i ta nga poropiti ratou ko Mohi i mea ai meake puta:

23 Ara, ko te Karaiti kia mate, ko ia te matamua o te

aranga o te hunga mate, a māna e whakapuaki te maramatanga ki te iwi, ki nga tauiwi.

24 ¶ I a ia e korero ana i enei mea, nui atu te reo o Petuha ki te karanga, E Paora, e haurangi ana koe; na te nui o to korero pukapuka i haurangi ai koe.

25 Ano ra ko ia, Kahore oku haurangi, e Petuha, e te tangata pai rawa; engari he pono, he whai whakaaro, aku kupu e whakapuaki nei.

26 E mātau ana hoki te kingi ki enei mea, i maia ai ahau ki te korero ki a ia: e mea ana hoki ahau, kahore tetahi o enei mea i ngaro i a ia; kihai hoki tenei mea i mahia i te kokonga.

27 E whakapono ana ranei koe ki nga poropiti, e Kingi Akaripa? e mea ana ahau, tenei koe te whakapono nei.

28 Ano ra ko Akaripa ki a Paora, Wahi iti kua riro atu ahau ki tau, ki ta te Karaiti tikanga.

29 Na, ko te meatanga a Paora, *Pai tonu* kia inoi ahau ki te Atua kia kua e iti, engari kia tino nui, kia kua ano e *waiho* i tou kotahi, engari kia tino rite ki a au te hunga katoa e whakarongo nei ki a au inaianei: ko enei mekameka ia kia kore.

30 ¶ A, ka mutu enei korero ana, ka whakatika te kingi raua ko te kawana, me Pere-niki, me te hunga i noho tahi ratou:

31 Na haere ke ana ratou,

ka kororerero ki a ratou ano, ka mea, Kahore he hanga a tenei tangata e tika ai te mate, te here ranei.

32 Katahi ka mea a Akaripa ki a Petuha, Ka tukua tenei tangata kia haere, me i kua ia te karanga ki a Hiha.

UPOKO 27.

E rere ana ki Roma. 9 Tana whakatupato. 14 Tupuhi. 27 Ora noa.

ANO ka takoto te tikanga kia rere matou ki Itari, ka tukua a Paora, me era atu herehere ki tetahi keneturio, ko Huriu te ingoa, no te hapū o Akuhata.

2 Na eke ana matou ki tetahi kaupuke o Ataramitiu-ma, e tika ana ra nga kāinga o Ahia, rere ana matou; ko Aritaku o Teharonika, he tangata no Makeronia, to matou hoa.

3 Po tahi ka u ki Hairona. Na ka ngawari te mahi a Huriu ki a Paora, a tukua ana ia kia haere ki ona hoa, kia atawhaitia.

4 Rere ana i reira, ka miri haere matou i te taha o Kai-peru, no te mea i hē te hau.

5 Whitiana matou i te moana o Kirikia, o Pamapurua, ka u ki Maira o Raikia.

6 Na ka mau i te keneturio he kaupuke ki reira no Arehanaria, e rere ana ki Itari; ka utaina matou ki runga.

7 A ka po maha i puboi ai te rere, ka whiti whakauaua ki te ritenga atu o Hiniru, a, tē tukua matou e te hau, ka miri haere matou i te taha

o Kariti i te ritenga atu o Haramone;

8 A ka pahemo whakauaua a reira, ka u matou ki tetahi kāinga, ko Nga Kokoru Atahua te ingoa; e tata ana a reira ki te pa o Rahia.

9 ¶ A, ka maha nga ra ka pahemo, na, kua kino te rere-nga, no te mea kua pahemo ke te po noho puku, ka whakatupato a Paora,

10 Ka mea ki a ratou, E mara ma, e kite ana ahau i te kino, i te nui o te hē e pa mai i tenei rerenga, ehara i te mea ko te utanga anake me te kaupuke, engari ko tatou ano.

11 Heoi ka whakaae te kene-turio ki ta te rangatira, raua ko te tangata nona te kaupuke, whakanuia ake e ia ta raua i ta Paora i korero ai.

12 A, tē pai taua kokoru hei tunga i te hotoke, i mea te tokomaha kia rere atu ano i reira, me kore e u ki Piniki, ki reira tu ai i te hotoke; he kokoru ia no Kariti, e anga ana ki te uru ma tonga, ki te uru ma raki.

13 A, ka parekareka te tonga, ka mea ratou kua taea ta ratou i whakaaro ai, ka hutia; miri haere ana i Kariti.

14 Na kihai i roa ka puta ke he hau nui whakaharahara, ko Urokaraiona te ingoa.

15 A ka kahakina te kaupuke, tē ngongo ki te hau, na ka tukua kia paea.

16 Na ka miri i te taha ruru o tetahi motu, tona ingoa ko Karaura; ka riro whakauaua mai te poti i a matou:

17 A ka hutia ake, ka hangā ki te whakau, ka whakawhaia-whitia te tangere o te puke; ano ka matakū kei eke ki te tahuna, ka tukua te ra, a ka paea haeretia.

18 Ano ka tino akina matou e te tupuhi, i te aonga ake ka akiritia *nga utanga*;

19 A i te toru o nga ra, ka makā atu e o matou ringa ake nga mea ake o te kaupuke.

20 A he maha nga ra i kore ai e puta te ra me nga whetu, kihai ano i iti te tupuhi i akina ai matou, na ka mahue katoa to matou whakaaro ki te ora.

21 Heoi ka roa te nohoanga pukutanga, na ka tu a Paora i waenganui o ratou, ka mea, E mara ma, engari ra me i rongo koutou ki a au, a kihai i rere mai i Kariti, kei pa mai tenei kino, tenei mate.

22 Na, ko taku kupu tenei ki a koutou, Kia mārama te ngakau: e kore hoki e mate tetahi o koutou, ko te kaupuke anake.

23 I tu hoki ki toku taha i tenei po he anahera na te Atua, nāna nei ahau, ko ia taku e karakia nei,

24 I mea mai, Aua e matakū, e Paora; me tu koe ki te aroaro o Hiha: nana, kua hoatu ki a koe e te Atua te hunga katoa e rere tahi na koutou.

25 Na kia mārama te ngakau, e hoa ma: e whakapono ana hoki ahau ki te Atua, e rite ano ki tana i korero mai ai ki a au.

26 Otira kua takoto te ti-

NGA MAHI A NGA APOTORO 27.

kanga kia eke tatou ki tetahi motu.

27 ¶ Na, i te tekau ma wha o nga po, i a matou e kahaki-hakina ana i Aria, i waenganui po, ka mea nga kai mahi kaipuke ka tata tetahi whenua ki a ratou;

28 Na ka whakatatūtū ratou, ka kite e rua tekau maro: a ka neke tata atu, ka whakatatūtū ano, ka kite kotahi tekau ma rima maro.

29 Na ka matakū kei paea matou ki nga toka, ka tukua nga punga e wha i te kei, ka hiahia ki te awatea.

30 A, i nga kai mahi kaipuke e mea ana kia oma atu i te kaipuke, a e tuku ana i te poti ki te moana, he whakaware, kia kiia ai e tukua ana etahi punga i te ihu,

31 Ka mea a Paora ki te keneturio ratou ko nga hoia, Ki te kore enei enoho ki te kaipuke, e kore koutou e taea te whakaora.

32 Katahi ka kotia nga whakaheke o te poti e nga hoia, a tukua ana kia taka atu.

33 A, i te mea meāke puao te ra, ka tohe a Paora ki a ratou katoa kia kai, ka mea, Ko te tekau ma wha tenei o nga ra e tatari nei koutou, e noho puku nei, tē o te kai.

34 Koia ahau ka tohe nei kia kai: ko tetahi mea hoki tenei e ora ai koutou: e kore hoki e ngahoro tetahi huruhuru o te upoko o tetahi o koutou.

35 A, tana korerotanga i enei kupu, na ka mau ki te taro,

ka whakawhetai ki te Atua i te aroaro o te katoa: a ka whawhati, ka timata te kai.

36 Na ka marama nga ngakau o ratou katoa, a ka kai ano ratou.

37 Na, e rua rau e whitu tekau ma ono matou katoa i te kaipuke.

38 Ano ka makona i te kai, ka whakamāmā ratou i te kaipuke, ka akiritia te witi ki te moana.

39 A, ka ao te ra, kihai ratou i mohio ki tera whenua: a, te kitenga i tetahi kokorutanga he one to reira, na, ka mea ratou me kore e ahei te aki atu i te kaipuke ki roto.

40 Na kotia ana e ratou nga punga, tukua ana ki te moana, i whakakorokoroa ano nga here o te urungi, ka hutia ano te ra nui ki te hau, ka tika atu ki te one.

41 A, ka puta atu ki tetahi wahi, he tai papaki rua, ka whakaheke te kaipuke; a titi tonu te ihu, mau tonu, ko te kei i pakaru i te kaha o te ngaru.

42 A ki to nga hoia whakaaro me whakamate nga herehere, kei kau tetahi ki uta, kei oma.

43 Ko te keneturio ia i mea kia whakaorangia a Paora, a kihai i tukua ki ta ratou i whakaaro ai; na, ka mea ia, kia mātua peke atu te hunga e mātau ana ki te kauhoe, kia kau ki uta:

44 Era atu, etahi i runga i nga papa, etahi i runga i etahi o nga mea o te kaipuke. Heoi tae ora katoa ana ratou ki uta.

UPOKO 28.

Kei Merita. 3 Te neke. 7 Ana whakaoranga. 11 E rere ana ano. 16 Korero ki nga Hurai. 30 Kei Roma e noho ana, e rua tau.

A KA ora ratou, katahi ka , mohio ko Merita te ingoa o te motu.

2 Na kihai i nohinohi te atawhai a nga tāngata maori i a matou: ka tahuna he kapura, a whakamanuhiritia ana matou katoa, no te mea e ua ana te ua, no te matao hoki.

3 Na ka kohikohia e Paora he pupu wahie, a makā ana e ia ki te kapura: heoi puta mai ana he neke i te werawera, ka mau ki tona ringa.

4 A, te kitenga o nga tāngata whenua i te ngarara e werewere anaki tona ringa, ka mea ratou tetahi ki tetahi, Koia, he tangata kohuru tenei, ka ora nei ia i te moana, na, kihai i tukua e te Tika kia ora.

5 Otiia i ruia atu e ia te ngarara ki te kapura, a kihai i mate, kihai i aha.

6 Na whanga noa ratou kia tetere ia, kia hinga whakarere ranei, kia mate: heoi ka roa noa to ratou whanganga, a, te kitenga kahore he aha i pa ki a ia, ka puta ke, ka mea, he atua ia.

7 ¶ I taua wahi te kāinga o te tino rangatira o te motu, ko Pupiria te ingoa: hemanuhiri matou nāna; e toru nga ra i atawhaitia ai matou e ia.

8 Na, i te takoto te pāpā o

Pupiria, e mate ana i te kiri ka, i te koripi: heoi ka tomo a Paora ki a ia, ka inoi, ka whakapa i ona ringa ki a ia, a ora ake.

9 A, te meatanga o tenei, na ka haere mai ano era atu o te motu he mate o ratou, a ka whakaorangia:

10 A nui atu te honore i whakahonoretia ai matou e ratou; a, i to matou rerenga, ka utaina nga mea e pai ana ma matou.

11 ¶ A, muri iho i nga mara-ma e toru, ka rere matou i runga i tetahi kaipuke o Arelanaria, i tu nei ki taua motu i te hotoke, ko Katoro raua ko Poruku te ingoa.

12 Na ka u ki Hairakuha, a e toru o matou ra i noho ai ki reira.

13 Na ka awhio ake matou i reira, a ka u ki Rekiuma: ka po tahi ka pa te tonga, a i te rua o nga ra ka u ki Puteori:

14 Ano ka kitea nga tuākana i reira, ka tohea matou kia noho i a ratou, kia whitu nga ra: heoi haere ana matou ki Roma.

15 A ka rongo nga tuākana o reira ki a matou, ka haere ake ki te whakatau i a matou ki Apiuwhoruma, ki Wharetoru: a, te kitenga o Paora i a ratou, ka whakawhetai ki te Atua, ka ora te ngakau.

16 ¶ Na ka tae matou ki Roma, a ka hoatu nga herehere e te keneturio ki te rangatira hoia: ko Paora ia i tukua kia noho motu ke raua ko tetahi hoia hei tiaki i a ia.

17 ¶ A, i muri i nga ra e toru, ka huihuia e Paora nga tino tāngata o nga Hurai: a, to ratou minenga mai, ka mea ia ki a ratou, E hoa ma, e oku tuākana, kahore nei oku hara ki te iwi, ki nga ritenga ranei o nga mātua, i tukua ai ahau i Hiruharama hei herehere ki nga ringa o nga tāngata o Roma.

18 A, toku whakawakanga e ratou, ka mea ratou kia tukua ahau, no te mea kahore he take e mate ai ahau.

19 Heoi ka whakahe tonu nga Hurai; e taea hoki te aha? karanga ana ahau ki a Iiia; kahore ia aku mea e whakawa ai ahau i toku iwi.

20 Koia ahau i karanga ai i a koutou kia kite, kia korero ki a koutou: no te mea hoki ko ta Iharaira e tumanako nei te mea i herea ai ahau ki tenei mekameka.

21 Na, ko ta ratou meatanga ki a ia, Kahore he pukapuka mou i tae mai ki a matou i Huria, kahore ano tetahi o nga tuākana i haere mai nei i kawē kupu mai, i korero mai ranei i tetahi kino mou.

22 Otira e mea ana matou kia rongo ki a koe, ki ou whakaaro: e mohio ana hoki matou ki tenei tikanga, e korerotia kinotia ana i nga wahi katoa.

23 ¶ A ka oti te whakarite he ra ki a ia, he tokomaha i haere mai ki a ia, ki tona whare; a whakakitea ana e ia ki a ratou, whakaaturia ana te rangatiratanga o te Atua,

me te tiki ano i ta te ture a Mohi, i ta nga poropiti, hei kukume i a ratou ki nga mea o Ihu, no te ata a ahiahi noa.

24 Ko etahi i whakapono ki nga mea i korerotia, ko etahi kihai i whakapono.

25 A, tē rite a ratou korero, ka puta atu ratou, me te korero ano a Paora i tetahikupu, Tika tonu te korero a te Wai-rua Tapu, i a Ihaia poropiti, ki o tatou mātua,

26 I mea nei, Haere ki tenei iwi, mea atu, Rongo noa koutou, e kore e mātua; titiro noa koutou, e kore e kite:

27 Kua matotoru hoki te ngakau o tenei iwi, e puhoi ana nga taringa ki te whakarongo, o ratou kanohi kua whakamoea e ratou; kei kite nga kanohi, kei rongo nga taringa, kei mātua te ngakau, a ka tahuri ratou, ka ora i a au.

28 Na kia mohio koutou, ka tukua te whakaoranga a te Atua ki nga tau iwi, a ka rongo ratou.

29 ¶ A ka mutu enei korero āna, ka haere nga Hurai, he nui hoki ta ratou tautohetohē ki a ratou ano.

30 ¶ A e rua tino tau i noho ai a Paora ki tona whare i utua e ia, a tukua tonutia mai ana e ia te hunga katoa e tomo mai ana ki a ia;

31 A maia tonu ia ki te kauwhau i te rangatiratanga o te Atua, ki te whakaako i nga mea o te Ariki, o Ihu Karaiti, kihai ano i riria.

KO TE PUKAPUKA A PAORA APOTORO

KI TE

HUNGA O ROMA.

UPOKO 1.

Mona, 3 mo Ihu. 8 Mo ratou. 16 Mo tana rongo pai. 18 Mo ta te Atua ki te mahi he. 21 He o nga Tauwiwi.

NA Paora, pononga a Ihu Karaiti, i karangatia hei apotoro, i motuhia ki te rongo pai a te Atua,

2 (I korerotia e ia i mua, ara e ana poropiti i roto i nga Karaipiture tapu,)

3 Mo tana Tama, mo to tatou Ariki, mo Ihu Karaiti, i whanau nei he uri no Rawiri, no te wahi ki te kikokiko;

4 I whakapuakina mai nei, ko te Tama a te Atua, i runga i te kaha, i runga i ta te Wairua o te tapu, i te mea ka whakaarahia i te hunga mate:

5 Nana nei matou i whiwhi ai ki te aroha noa, ki te mahi apotoro, kia ngohengohe ai, kia whakapono ai nga iwi katoa, hei mea mo tona ingoa:

6 No ratou nei hoki koutou, he hunga karanga na Ihu Karaiti:

7 Ki te hunga katoa i Roma e arohaina nei e te Atua, ka oti nei te karanga hei hunga

tapu: *Kia tau* ki a koutou te aroha noa me te rangimarie, he mea na te Atua, na to tatou Matua, na te Ariki hoki, na Ihu Karaiti.

8 ¶ Taku tuatahi he whakawhetai ki toku Atua, i roto i a Ihu Karaiti, mo koutou katoa, no te mea e korerotia ana to koutou whakapono i te ao katoa.

9 Ko te Atua, e mahi nei toku wairua ki a ia i roto i te rongo pai o tana Tama, hei kai whakaatu moku, mo te mau tonu o toku maharahara ki a koutou, i aku karakiatanga i nga wa katoa;

10 E inoi ana me kore e pai te Atua, ko tenei haerenga nei oku ki a koutou kia whakatikaia.

11 Nui atu hoki toku hiahia kia kite i a koutou, kia whakawhiwhia ai hoki koutou e ahau ki tetahi hoatutanga, he mea wairua, kia whakaungia ai koutou;

12 Ara kia ora ngatahi ai toku ngakau me o koutou i te whakapono o tatou tahi, o koutou, oku,

13 Na e kore ahau e mea, e *oku* tēina, kia ngaro i a koutou te maha o aku meatanga kia haere atu ki a koutou, (heoi araia mai ana ahau, a mohoa noa nei,) kia whiwhi ai ano ahau ki tetahi hua i roto i a koutou, ki te pera me o era tauwi.

14 Nga Kariki, nga tautāngata, nga mohio, nga whakaarokore, he nama ta ratou kei runga i a au.

15 A e ngakau nui ana ano ahau kia whakapaua taku ki te kauwhau i te rongo pai ki a koutou ano i Roma.

16 Kahore hoki oku whakama ki te rongo pai o te Karaiti: ko te kaha hoki ia o te Atua hei whakaora mo nga tāngata katoa e whakapono ana; mo te Hurai ki mua, mo te Kariki ano hoki.

17 Kei reira hoki e whakakitea ana ta te Atua tika, he mea no te whakapono ki te whakapono: kua oti nei hoki te tuhituhi, Ma te whakapono e ora ai te tangata tika.

18 ¶ E whakakitea iho ana hoki i te rangi to te Atua riri ki nga karakiakoretanga katoa, ki nga hē o nga tāngata e pupuri ana i te pono i runga i te hē;

19 Kei roto hoki i a ratou e marama ana nga mea o te Atua e taea te mohio; kua whakamaramatia nei hoki e te Atua ki a ratou.

20 Nga mea hoki ona kahore nei i kitea, e kitea nuitia ana, no te hanganga iho ra ano o te ao, e mohiotia ana

hoki ki nga mea i hangā, aratona kaha o tua iho, me tona Atuatanga; e kore ai he kupu whakahoki ma ratou:

21 I a ratou nei hoki e mātau ana ki te Atua, kihai ratou i whakakororia i a ia hei Atua, kihai i whakawhetai; heoi kua kuare o ratou whakaaro, a pouri ana o ratou ngakau pohēhē.

22 I a ratou e mea ana he mohio ratou, na, he wairangi,

23 A whakaputaina ketia ake te kororia o te Atua e kore nei e pirau, kia rite ki te ahua o te tangata pirau noa, o nga manu, o nga wae-wha, o nga mea ngokingoki.

24 ¶ Koia hoki ratou i tukua ai e te Atua ki te mahi poke, i runga i nga hiahia o o ratou ngakau, a whakatūtūatia iho o ratou tinana e ratou whaka ratou:

25 Whakarere ake e ratou to te Atua pono, ka mau ke ki te teka, a karakia ana, mahi ana ki te mea hanga, kapea ake te Kai hanga, ko ia nei tē whakapaingia ake ake. Amine.

26 ¶ Koia ratou i tukua ai e te Atua ki nga hiahia tūtūa: a ratou wāhine hoki, mahue ake te tikanga maori, kei te ngau ke noa atu:

27 Me nga tāne ano, whakarere ake e ratou te tikanga maori ki te wahine, ano he ahi te kanga o to ratou hiahia ki a ratou ano; nga tāne ki nga tāne, mahi ai i te hanga whakama, me te whiwhi ano

ROMA 1, 2.

ratou ki te utu e rite ana mo to ratou ngaunga ketanga.

28 ¶ A, i a ratou kihai nei i pai kia mau tonu te Atua ki o ratou mahara, tukua ana ratou e te Atua ki te hine-ngaro hē, kia mahia nga mea kahore e tau kia mahia.

29 Ki tonu ratou i nga mahi hē katoa, i te moepuku, i te kino, i te apo, i te mauā-hara; whawhao rawa i te hae, i te kohuru, i te totohe, i te hianga, i te whanoke; he hunga kohumuhumu,

30 He hunga ngau-tuara, kino ki te Atua, he hunga whakalihi, whakakake, whakapehapeha, he kai tito i nga mea kino, e turi ana ki nga mātua,

31 Kahore o ratou matauranga, he hunga kupu taka, kahore nei he aroha, he hunga takahi kawenata, kahore e tohu tangata:

32 E mātau nei ano ratou ki ta te Atua tikanga, e tika te mate mo nga kai mahi i enei mea, heoi mahia ana e ratou ko aua mea ra ano, whakaae ana hoki ki te hunga e pera ana te mahi.

UPOKO 2.

To whakahe hei whakanui i te he mou ake; 12 ahakoa Tauwiwi, 17 ahakoa Hurai.

NA kahore he kupu whakahoki māu, e te tangata katoa e whakahe ana; i a koe hoki e whakahe na i tera, e whakatau ana koe i te he ki a koe ano; kei te mahi hoki

koe, te kai whakahe, i aua mea na ano.

2 Na e mātau ana tatou kei runga i te pono te whakakanga a te Atua mo nga kai mahi i aua mea.

3 Ko tou whakaaro ranei tenei, e te tangata e whakahe ana ki nga kai mahi i aua mea, a e mahi na ano koe i aua mea, ko koe e ora i ta te Atua whakahe?

4 E whakahawea ana ranei koe ki tona ngawari, ki tona tikanga mahaki, ki tona manawanui, e ranea tonu nei; tē mahara ko te ngawari o te Atua hei arahi i a koe ki te ripeneta?

5 Heoi pakeke tonu koe, kahore e ripeneta tou ngakau, e puranga ana koe i te riri mou, mo te ra o te riri, o te whakakitenga mai ano i ta te Atua whakaritenga tika i te whakawa;

6 Ko tana e homai ai ki tetahi, ki tetahi, ka rite ki ā ratou mahi:

7 Ki te hunga e whai ana ki te kororia, ki te honore, ki te matenga-kore, me te mau ano ki te mahi pai, he oranga tonutanga:

8 Ki te hunga ia e totohe ana, a e turi ana ki te pono, e whakarongo ana hoki ki te hē, he riri, he aritarita,

9 He pawera, he rarunga, mo nga wairua tangata katoa e mahi ana i te kino, mo te Hurai ki mua, mo te Kariki ano hoki:

10 He kororia ia, he honore, he rangimarie, mo nga tāngata katoa e mahi ana i te

ROMA 2.

pai, mo te Hurai ki mua, mo te Kariki ano hoki:

11 Kahore hoki ā te Atua whakapai kanohi.

12 Te hunga hoki i hara ture-kore, ka ngaro ture-kore, ano hoki: me te hunga i hara i runga i te ture, kei te ture ano he whakahe mo ratou;

13 (He teka hoki ko nga kai whakarongo o te ture e tika ki ta te Atua; engari ko nga kai mahi o te ture e whakatikaia.

14 I te mea hoki e mahia noatia ana nga mea o te ture e nga tauwi, kahore nei o ratou ture, ko enei, kahore nei o ratou ture, hei ture ano ki a ratou:

15 E whakakite nei hoki ratou i te mahi a te ture, he mea tuhituhi ki o ratou ngakau, me te whakaae tahi ano o ratou hinengaro: ko o ratou whakaaro ano kei te whakahēhē, kei te whakatikatika ranei i tetahi, i tetahi;)

16 I te ra e whakaritea ai te whakawa e te Atua mo nga mea ngaro a nga tāngata, he mea whakarite tonu ki taku rongo pai, hei meatanga ma Ihu Karaiti.

17 ¶ Na, e karangatia ana koe he Hurai, e whakawhirinaki ana ki te ture, ko te Atua hoki tau e whakamana mana ai,

18 E mohio ana hoki ki tana e pai ai, e kitea ana e koe nga mea e rere ke ana, he mea whakaako na te ture;

19 E uana hoki tou whakaaro, ko koe hei kai arahi mo nga

matapo, hei māramatanga mo te hunga i roto i te pouri,

20 Hei kai tohutohu mo nga kuare, hei kai whakaako mo nga kohungahunga; kei a koe ano hoki te ahua o te matauranga raua ko te pono i runga i te ture.

21 He kai whakaako koe i tera atu, e kore ianei koe e whakaako i a koe ano? e kauwhau na koe kia kaua e tahae, e tahae ana ranei koe?

22 E mea na koe, Kaua e puremu, e puremu ana ranei koe? e whakarihariha na koe ki nga whakapakoko, e tahae ana ranei koe i nga mea tapu?

23 E whakamanamana na koe ki te ture, kei te whakaiti ranei koe i te Atua i te mea ka takahi koe i te ture?

24 Na koutou hoki i kohukohua ai te ingoa o te Atua i roto i nga tauwi, i peratia ai me te mea kua oti te tuhituhi.

25 E whai wahi ana hoki te kotinga, ki te mahia e koe te ture: tena ki te takahi koe i te ture, ka riro tou kotinga hei kotinga-kore.

26 Na, ki te mau i te kotinga kore nga tikanga o te ture, e kore ianei tona kotinga-kore e kiia hei kotinga?

27 A, ki te rite te ture i te mea kihai i kotia maoritua, e kore ianei ia e whakahe i a koe, i te tangata i te kupu tuhituhi, i te kotinga, i a koe e takahi na i te ture?

28 Ehara hoki to waho i te Hurai; ehara ano te kotinga i te mea no waho, no te kiko-kiko:

ROMA 2, 3.

29 Engari ko to roto te Hurai, a, te kotinga no te ngakau, he mea wairua, he teka na te kupu tuhituhi; ehara ano hoki i te mea e whakamoemititia ana e te tangata, engari e te Atua.

UPOKO 3.

Nga homaitanga ki nga Hurai, 3 mau tonu. 9 Heoi kei te he ano ratou. 21 Tatou katoa, na Ihu anake i tika ai. 31 Te ture ia tu tonu.

HA, he aha ra te pai i hua ki te Hurai? he aha te rawa o te kotinga?

2 He nui ra i nga mea katoa: te tuatahi, kua oti te tuku ki a ratou nga kupu a te Atua.

3 Tena iana, ki te mea kihai etahi i whakapono, e taka ranei to te Atua pono i to ratou whakapono kore?

4 Kahore rapea: engari ko te Atua kia pono, a kia teka kau nga tangata katoa; ko te mea hoki ia i tuhituhia, Kia tika ai tau i to korerotanga, kia puta ai tau ina whakawakia koe.

5 Ha, ki te mea na to tatou hē i kitea nuitia ai to te Atua tika, me pehea he kupu ma tatou? E hē ana ranei te Atua, i a ia e whakapa ana i te riri? (he kupu tangata tenei naku:)

6 Kahore rapea: penei ka pehea ta te Atua whakarite whakawa mo te ao?

7 Na, ki te mea na taku teka i hira rawa ai to te Atua pono hei kororia mona, he aha

ano au i whakahengia ai hei tangata hara?

8 Tē ki ranei (ko te kupu whakapae teka tenei mo matou, ki ta etahi hoki, ko ta matou kupu tenei,) Tatou ka mahi i te kino, kia puta ai he pai? tika tonu te tau o te he ki a ratou.

9 ¶ He aha koia? ko matou te hunga pai? Kahore ra hoki: kua oti hoki te whakaatu e matou, ko nga Hurai, ko nga Kariki, kei raro katoa i te hara;

10 Ko te mea hoki ia i tuhituhia, Kahore he tangata tika, kahore kia kotahi:

11 Kahore he tangata e mātau ana, kahore he tangata e rapu ana i te Atua.

12 Kua peka ke ratou katoa, kua kino ngatahi; kahore he tangata e mahi ana i te pai, kahore kia kotahi.

13 He urupa puare noa o ratou korokoro; e patipati ana o ratou arero; Kei roto i o ratou ngutu te wai whakamate o nga nakahi:

14 Ki tonu o ratou mangai i te kanga, i te nanakia:

15 O ratou waewae, hohoro tonu ki te whakaheke toto:

16 He whakangaromanga, he ngakau pouri, kei o ratou ara:

17 Kahore hoki ratou i mohio ki te ara o te rangimarie:

18 Kahore te wehi o te Atua i mua i o ratou kanohi.

19 Na e mātau ana tatou ki nga kupu a te ture, he mea korero ki te hunga i te ture: kia purua ai nga mangai ka-

ROMA 3, 4.

toa, kia tu hē ai te ao katoa i te aroaro o te Atua.

20 No te mea kahore he mahi o te ture e tika ai tetahi kikokiko i tona aroaro: ma te ture hoki ka mohiotia ai te hara.

21 ¶ Otiia kua whakamaramatia inaianei te tika a te Atua, motu ke i te ture, he mea whakaatu na te ture, na nga poropiti;

22 Ara te tika a te Atua e na runga mai ana i te whakapono ki a Ihu Karaiti ki te hunga katoa e whakapono ana: kahore hoki he pokanga ketanga:

23 Kua hara katoa hoki, kahore e taea e ratou te kororia o te Atua;

24 He mea whakatika utukore na tona aroha noa, i runga i ta Karaiti Ihu hokonga:

25 Ko ia hoki ta te Atua i whakaatu ai i mua hei whakamarietanga, i runga i te whakapono, he mea na ona toto; kia whakakitea ai tana tika, i te mea ka whakapahe-motia nei nga hara o mua, he mea hoki na to te Atua manawanui;

26 Hei whakakite i tana tika i tenei wa nei ano: he mea hoki kia tika ai ia, me te whakatika ano i te tangata e whakapono ana ki a Ihu.

27 Na, kei hea te whakamanamana? Kua araia atu. E tehea ture? e to nga mahi? Kahore: engari e te ture o te whakapono.

28 Koia matou ka mea ai, kei te whakapono he tika mo

te tangata, motu ke i nga mahi o te ture.

29 Ko te Atua oti ia o nga Hurai anake? he teka ianei no nga tauwi ano hoki? Ae ra, no nga tauwi ano hoki:

30 Kotahi nei hoki te Atua, māna e whakatika te kotinga i runga i te whakapono, me te kotinga kore ina whakapono.

31 E taka ranei te ture i ta matou, ara i te whakapono? Kahore rapea: engari na ta matou i u ai te ture.

UPOKO 4.

Te whakapono o Aperahama hei tika mona, 10 i te mea kihai i kotia. 13 I runga ano i tera te kupu whakaari. 16 Hei matua ia ki te hunga whakapono. 24 Ko to tatou whakapono hei tika mo tatou.

HE aha ra, ki ta tatou, te mea i riro mai i a Aperahama, i to tatou matua i runga i te kikokiko?

2 Me he mea hoki na nga mahi i tika ai a Aperahama, he mea tana e whakamana-mana ai ia; otira kahore i to te Atua aroaro.

3 E pehea ana hoki te Karaiture? I whakapono a Aperahama ki te Atua, a ka whakairia hei tika mona.

4 Na, he tangata e mahi ana, e kore e kiia te utu mona he mea aroha noa, engari he mea mo tana.

5 Tena he tangata kahore e mahi, engari e whakapono ana ki te kai whakatika i te tangata karakia-kore, ka whakairia tona whakapono hei tika.

ROMA 4.

6 Pera hoki me ta Rawiri i ki ai mo te hari o te tangata ka whakairia nei e te Atua he tika ki a ia motu ke i nga mahi,

7 Ka hari te hunga kua oti ā ratou mahi tutū te muru, o ratou hara te hipoki:

8 Ka hari te tangata e kore nei e whakairia e te Ariki he hara ki a ia.

9 Na, tenei haringa, mo te kotinga ranei, mo te kotinga-kore ranei? e mea ana hoki tatou, I whakairia te whakapono hei tika mo Aperahama.

10 He pehea te whakairinga? i a ia i te kotinga, i te kotinga-kore ranei? He teka *i a ia* i te kotinga, engari i te kotinga-kore.

11 A riro ana i a ia te kotinga hei tohu, hei hiri mo te tika i ra runga mai i tona whakapono, i te mea kahore ia i kotia; kia waiho ai ia hei matua ki te hunga katoa e whakapono ana i runga i te kotinga kore; ara kia whakairia ai ano hoki te tika ki a ratou:

12 Hei matua ano ki te kotinga, ki te hunga ehara i te mea ko te kotinga anake to ratou, engari e takahi ana hoki i runga i nga tapuae o taua whakapono o to tatou matua, o Aperahama, *i a ia* kahore ano i kotia.

13 Te kupu hoki ki a Aperahama ratou ko ona uri, mo te ao ka riro i a ia, kihai i na runga mai i te ture; engari i na runga i te tika o te whakapono.

14 Me i riro hoki i te hunga

ture, kua tikanga-kore te whakapono, kua taka te kupu whakaari:

15 Ta te ture hoki e mahi ai, he riri: me he mea hoki kahore he ture, kahore he hara.

16 Koia i na-roto-tia ai i te whakapono, kia *waiho* ai ma te aroha noa; kia u ai te kupu whakaari ki te whanau katoa; ehara i te mea ki to te ture anake, engari ki to te whakapono o Aperahama; ko ia nei hoki te matua o tatou katoa,

17 (Ko te mea hoki ia i tuhi-tuhia, Kua waiho koe e ahau hei matua ki nga iwi maha,) i te aroaro o tana i whakapono ai, o te Atua e whakaora nei i nga tupapaku, e karanga nei i nga mea kahore *i konei* me te mea *kei konei* nei ano.

18 Ahakoa kahore nei he rawa, u tonu tona manakonako ki a ia ka meinga hei matua mo nga iwi maha, ki te mea i korerotia, Ka penei tou whanau.

19 Kihai ano i ngoikore tona whakapono, kihai ia i mahara iho ki tona tinana kua tupapakutiā noatia ake, (wahi iti nei hoki kua kotahi rau ona tau,) ki te tupapakutanga hoki o te kōpū o Hera:

20 Heoi kihai ia i ruarua, i whakateka ki ta te Atua kupu whakaari; engari kaha tonu tona whakapono, whakakororia ana ia i te Atua;

21 U tonu hoki tana whakaaro e taea e ia te mea tana i korero ai.

22 Koia hoki i whakairia ai ki a ia hei tika.

23 Otira ehara i te mea he whakaaro ki a ia anake i tuihuhia ai taua whakairinga ki a ia;

24 Engari ki a tatou ano hoki; ka whakairia hoki ki a tatou, ki te whakapono ki te kai whakaara i a Ihu, i to tatou Ariki, i te hunga mate:

25 I tukua nei mo o tatou he, i whakaarahia ano hoki mo tatou kia whakatikaia.

UPOKO 5.

Na te whakapono i mau ai te rongo; 2 i tumanako ai.

8 *Na reira ano i ora ai.*

12 *Na Arama te mate.* 15

Na Ihu te ora.

NA, ka tika nei tatou i te whakapono, ka mau ta tatou rongo ki te Atua, he mea na to tatou Ariki, na Ihu Karaiti:

2 Nana hoki te whakatanganga mo tatou, i runga i te whakapono, ki tenei aroha noa e tu nei tatou, a whakamana mana ana tatou, i te mea ka tumanako nei ki te kororia o te Atua.

3 Ehara hoki i te mea ko tera anake, engari e whakamana mana ana ano tatou ki nga mamae: e mohio ana hoki, ko ta te mamae e mahi ai he manawanui;

4 Ta te manawanui he matauranga; ta te matauranga he tumanako:

5 E kore ano e whakama i te mea ka tumanako nei: kua ringihia hoki te aroha o te Atua ki o tatou ngakau e

te Wairua Tapu kua homai nei ki a tatou.

6 I a tatou hoki e ngoikore ana, i te wa i rite ai, ka mate a te Karaiti mo te hunga karakia-kore.

7 E mate whakauaua hoki tetahi mo te tangata tika: tera pea ia tetahi e maia ki te mate mo te tangata pai.

8 Heoi e whakakitea nuitia ana e te Atua tona aroha ki a tatou, i a tatou hoki e hara ana ka mate a te Karaiti mo tatou.

9 Na, tera noa ake he whakaoranga mo tatou e ia i te riri, i a tatou ka tika nei i ona toto.

10 I te mea hoki he hoa whawhai tatou, ka houhia ta tatou rongo ki te Atua i runga i te matenga o tana Tama; na, ka mau nei te rongo, tera noa ake he whakaoranga mo tatou, i a ia kua ora nei.

11 A, ehara i te mea ko tera anake, engari e whakamana mana ana ano tatou ki te Atua, he mea na to tatou Ariki, na Ihu Karaiti, nana nei tenei houhanga rongo i a tatou.

12 ¶ Na, ka rite ki te putanga mai o te hara ki te ao, he mea na te tangata kotahi, me te mate ano i runga i te hara, a horapa ana te mate ki nga tangata katoa; no te mea kua hara katoa:

13 (I te ao nei hoki te hara, a taea noatia te ture: otira e kore e whakairia te hara i te mea kahore he ture.

14 Ahakoa ra he mana kingi

ROMA 5, 6.

to te mate, no Arama iho ano taea noatia a Mohi, ki te hunga ano hoki kihai nei i rite to ratou hara ki to Arama pokanga ketanga, he ahua nei hoki ia no *tenei* i taria nei.

15 Otira kihai i rite ki te hara te mea i homai noa mai. Na te hara nei hoki o te kotahi i mate ai te tokomaha, waihoki, tera noa atu te huanga ki te tokomaha o to te Atua aroha noa, o te mea homai hoki i runga i te aroha noa o te tangata kotahi, o Ihu Karaiti.

16 Kihai ano hoki i rite te mea i homai ki to te kotahi i hara: no te kotahi hoki te whakawakanga i tau ai te he; no nga hara maha ia te mea i homai noa mai hei whakatika.

17 Na te hara nei hoki o te kotahi i kingi ai te mate, he mea na te tangata kotahi; waihoki tera noa ake he kingitanga i runga i te ora mo te hunga ka riro mai nei i a ratou te aroha noa e hua tonu nei, me te tika i homai noa nei, he mea na te kotahi, na Ihu Karaiti).

18 Ae ra, na te hara kotahi i tau ai te hē ki nga tātanga katoa, waihoki na te tika kotahi *te mea homai noa* ki nga tātanga katoa, e tika ai, e ora ai.

19 E rite ana hoki ki te tātanga kotahi i tutū nei, a whai hara iho te tokomaha, waihoki ka ngohe ngohe nei te kotahi, ka whā tika te tokomaha.

20 I puta mai ano hoki te ture kia nui ai te hara. Heoi i te hara e nui noa ana, kua hua noa ake te aroha noa:

21 Na, ko te hara te kingi i mua, a he mate tona tukunga iho; waihoki hei kingi ano te aroha noa i runga o te tika, he oranga tonutanga te tukunga iho, he mea hoki na Ihu Karaiti, na to tatou Ariki.

UPOKO 6.

Kaua e hara; 3 Kua iriiria nei hoki; 18 Kua whakaae ki nga mahi a te tika; 23 Ta te hara utu hoki he mate.

HA, kia pehea a tatou korero? Kia u tonu tatou ki te hara, kia hua ai te aroha noa?

2 Kahore rapea. Ka whakatupāpakutia nei tatou ki te hara, kei-hea ake he nohoanga mo tatou i runga i taua hara?

3 Kahore ianei koutou i mohio, ko tatou kua iriiria nei ki roto ki a Karaiti Ihu, kua iriiria ki roto ki tona matenga?

4 Na kua tanumia ngatahitia nei tatou me ia i te iriiriranga ki roto ki te matenga: kia rite ai ki a te Karaiti i whakaarahia ake nei i te hunga mate e te kororia o te Matua, waihoki ko tatou kia haere i roto i te houtanga o te ora.

5 Ki te mea hoki kua honoa tatou ki te ahua o tona matenga, ka honoa ano tatou ki to tona aranga:

6 E mohio ana hoki ki tenei, kua ripekatia ngatahitia to

ROMA 6.

tatou tangata tawhito me ia, kia hemo ai te tinana o te hara, kia mutu ai ta tatou mahi ki te hara.

7 Ki te mate hoki tetahi, kua mawheto ia i te hara.

8 Na, ki te mea kua mate tahi tatou ko te Karaiti, e whakapono ana tatou, e ora tahi ano tatou me ia:

9 E mātau ana hoki tatou, ka ara nei a te Karaiti i te hunga mate, heoi ano ona matenga; kahore he kingitanga o te mate ki a ia a mua ake nei.

10 Ko tona matenga hoki, he matenga kotahi ki te hara: tona orange ia, he orange ki te Atua.

11 Waihoki mahara iho ki a koutou, kua whakatupāpaku-tia koutou ki te hara, e ora ana ia ki te Atua, i roto i a Ihu Karaiti, i to tatou Ariki.

12 ¶ Mo konei ra aua te hara e kingi i roto i to koutou tinana mate, e ngohengohe ai koutou ki ta te hara, i runga i nga hiahia o taua tinana nei.

13 Kaua ano e tukua o koutou wahi hei mahi hē ki te hara: engari tukua atu koutou ki te Atua, he hunga kua ora i roto i te hunga mate, me o koutou wahi hei mahi tika ki te Atua.

14 E kore hoki te hara e waiho hei rangatira mo koutou: ehara hoki koutou i te ture, engari no te aroha noa.

15 ¶ He aha koia? kia hara oti tatou, no te mea ehara

tatou i te ture, engari no te aroha noa? Kahore rapea.

16 Kahore oti koutou i mātau, ki te tuku koutou i a koutou ki tetahi hei pononga, he pononga koutou na tera kua ngohengohe na koutou ki tana; na te hara ranei, a mate iho, na te ngohengohe ranei, a tika ake?

17 Ko tenei me whakawhetai ki te Atua, he pononga koutou i mua na te hara, heoi kua ngohengohe o koutou ngakau ki te ahua o te ako i whakaritea nei mo koutou.

18 Na, ka atea nei koutou i te hara, he pononga koutou na te tika.

19 He kupu tangata tenei naku, na te ngoikore o to koutou kikokiko: na, i tukua o koutou wahi hei pononga ma te poke, ma te tutū, ki te mahi tutū; waihoki me tuku o koutou wahi aianei hei pononga ma te tika, puta ake he tapu.

20 I te mea hoki he pononga koutou na te hara, e atea ana koutou i te tika.

21 Na i taua wa he aha nga hua i a koutou o nga mea e whakamana koutou? he mate hoki te mutunga o aua mea.

22 Tena ko tenei, ka atea nei koutou i te hara, a ka meinga hei pononga ma te Atua, nga hua ki a koutou he tapu, a, te tukunga iho he orange tonutanga.

23 Ko nga utu hoki a te hara he mate; ko ta te Atua ia e homai nei he orange tonutanga, i roto i a Karaiti Ihu, i to tatou Ariki.

ROMA 7.

UIOKO 7.

Kua mawheto mai tatou i te ture. 14 No te tangata te he.

KAHORE ano koutou kia mātau, e oku tēina, (e korero ana hoki ahau ki te hunga mātau ki te ture,) hei rangatira te ture mo te tangata i te wa e ora ai ia?

2 Te wahine tāne hoki, e mau ana ano ia i te ture ki te tāne, i a ia ano e ora ana; a ki te mate te tāne, kua mawheto i te ture a te tāne.

3 Na, i te oranga o te tāne, ka karangatia ia he wahine puremu ki te riro ia i te tangata ke: tena, ka mate te tāne, e atea ana ia i te ture; tē meinga he wahine puremu ki te riro i te tangata ke.

4 Me koutou ano hoki, e oku tēina, kua tupāpakutia ki te ture e te tinana o te Karaiti; kia riro ai koutou i tetahi atu i whakaarahia nei i te hunga mate, kia whai hua ai tatou ki te Atua.

5 I a tatou hoki i te kiko-kiko, e mahi ana nga hihiritanga o nga hara e whakao-hokia nei e te ture i roto i o tatou wahi, a hua ake ko te mate.

6 Ko tenei kua mawheto mai nei tatou i te ture, i te mea ka mate nei tera i puritia ai tatou; kia mahi ai tatou i runga i te houtanga o te wairua, auaka i runga i te tawhi-totanga o te kupu tuhituhi.

7 ¶ Kia pehea ra he kupu ma tatou? He Lara ranei te ture?

Kahore rapea. Engari kihai ahau i mātau ki te hara, me i kua te ture: kahore hoki ahau i mohio ki te hiahia, me i kua te ture te mea mai, Aua koe e hiahia.

8 I mau hoki te hara ki te ture hei whakaoho, a mahia ana nga hiahia katoa i roto i ahau. Ki te kore hoki te ture ka mate te hara.

9 I ora hoki ahau i mua, i te korenga o te ture: te taenga mai o te kupu ako, kua ora ano te hara, a mate iho ahau.

10 Na, taua kupu ako i meinga mo te ora, kitea rawatia ake, hei whakamate tenei moku.

11 I mau hoki te hara ki te kupu ako hei whakaoho, a tinihangatia iho ahau, na mate iho ahau i a ia.

12 Ae ra, e tapu ana te ture, me te kupu ako ano, e tapu ana, e tika ana, e pai ana.

13 I meinga koia te mea pai hei mate moku? Kahore rapea. Engari na te hara, kia mohiotia ai he hara, i mea te mea pai hei mahi mate moku; no ka ai te kupu ako hei mea i te hara kia nui noa atu te hara.

14 E mātau ana hoki tatou no te wairua te ture: ko ahau ia no te kikokiko, he mea hoko hei pārau ma te hara.

15 Ko taku hoki e mahi nei kahore e maharatia iho e ahau: kahore hoki e mahia e ahau taku i pai ai; heoi taku i kino ai, meatia ana tenei e ahau.

16 Na, ki te mahia e ahau

taua mea pu kihai nei ahau i pai atu, e whakaae ana ahau ki te ture, he pai.

17 Ko tenei ehara i ahau nana i mahi, engari na te hara e noho nei i roto i a au.

18 E mātau ana hoki ahau, kahore he mea pai e noho ana i roto i a au, ara, i roto i toku kikokiko: ko te hiahia hoki kei a au, ko te mea ia i te pai kahore e kitea e au.

19 Te pai hoki e hiahiatia ana e ahau, kahore e mahia e ahau: engari te kino kihai nei au i pai, mahia ana tenei e ahau.

20 Na, ki te mahia e ahau taua mea pu kihai nei au i pai atu, ehara i a au nāna taua mea i mahi, engari na te hara e noho nei i roto i ahau.

21 Na kua kitea e ahau te ture, ara, i ahau e hiahia ana kia mea i te pai, tata tonu te kino ki ahau.

22 E ahua-reka ana hoki ahau ki te ture a te Atua, ara to roto tangata:

23 Heoi kua kitea e ahau tetahi atu ture i roto i oku wahi, e whawhai ana ki te ture a toku hinengaro, a e mea ana i a au hei taurekareka ma te ture a te hara, ma tenei i roto nei i oku wahi.

24 Aue, te mate i ahau! ma wai ahau e whakaora i te tinana o tenei mate?

25 Whakawhetai tonu ahau ki te Atua, i runga i a Ihu Karaiti, i to tatou Ariki. Na, ahau ake nei ano, ka mahi ko toku hinengaro ki te ture a te

Atua; ko toku kikokiko ia ki te ture a te hara.

UPOKO 8.

*Ko wai e kiia he tika? 5
Ta te ngakau maori. 6
Ta te Wairua. 17 Pai ki a ratou. 29 He mea whakarite te pai no mua. 38
Mau o tana.*

NA kahore e tau te hē inaianei ki te hunga i roto i a Karaiti Ihu, kahore nei e haere i runga i ta te kikokiko, engari i ta te Wairua.

2 Na te ture hoki a te Wairua o te ora i roto i a Karaiti Ihu ahau i atea ai i te ture o te hara, o te mate.

3 Te mea hoki kihai i taea e te ture, he ngoikore nona i te kikokiko, tonoa mai ana e te Atua tana Tama, i te ahua o te kikokiko hara, mo te hara ano, a whakataua ana te hē ki te hara i roto i te kikokiko:

4 Kia rite ai to te ture tika i roto i a tatou kahore nei e haere i runga i ta te kikokiko, engari i ta te Wairua.

5 Te hunga hoki i runga i ta te kikokiko, whakaaro ana ratou ki a te kikokiko; a, te hunga i runga i ta te Wairua, ki a te Wairua.

6 To te whakaaro hoki ki te kikokiko, he mate; to te whakaaro ia ki te Wairua, he ora, he rangimarie.

7 He tikanga whawhai hoki ki te Atua te whakaaro ki te kikokiko: kahore nei hoki e ngawari ki te ture a te Atua,

ROMA 8.

kahore ano e ahei *kia ngawari*.

8 Na e kore e taea e te hunga i te kikokiko te whakamanawareka ki te Atua.

9 Na, kahore koutou i te kikokiko, engari i te Wairua, ki te mea e noho ana te Wairua o te Atua i roto i a koutou. Na, ki te kahore te Wairua o te Karaiti i tetahi, ehara tenei i a ia.

10 Tena ki te mea kei roto a te Karaiti i a koutou, he tupāpaku te tinana i te hara; he ora ia te wairua i te tika.

11 Na, ki te noho i roto i a koutou te Wairua o te kai whakaara o Ihu i te hunga mate, māna, ma te kai whakaara o te Karaiti i roto i te hunga mate, e whakaora o koutou tinana mate ki tona Wairua e noho na i roto i a koutou.

12 ¶ Na, e *oku* tēina, kahore he rawa e tohe ai te kikokiko ki a tatou kia noho i runga i ta te kikokiko.

13 Ki te noho hoki koutou i runga i ta te kikokiko, ka mate: tena ki te mea ko te Wairua to koutou e whakamate ai i nga mahi a te tinana, ka ora.

14 Te hunga hoki e arahina ana e te Wairua o te Atua, he tama ratou na te Atua.

15 He teka hoki he wairua pononga kua riro mai nei i a koutou, e matakū ai ano hoki koutou; engari kua riro i a koutou te Wairua whakamariki, e karanga ai koutou, E Apa, e Pa.

16 Ko taua Wairua na ano hei whakaae ake ki o tatou wairua, he tamariki tatou na te Atua:

17 A ki te mea he tamariki, mo tatou te kāinga; mo tatou te kāinga o te Atua, mo tatou tahi ko te Karaiti; ki te mate tahi tatou me ia, kia whakakororiatia ngatahitia ai hoki tatou.

18 ¶ Ki toku whakaaro iho hoki, he kore noa iho nga mamae o tenei wa, *ki te whakaritea* ki te kororia e whakakitea mai ki a tatou a mua.

19 Tumanako tonu nei hoki te mea i hangā, tatari tonu ki te whakakitenga mai o nga tama a te Atua.

20 Kua oti hoki te tekateka noa te mea hei rangatira mo te mea i hangā, ehara i te mea na tenei te whakaae, engari na te kai whakarite, me te tumanako ano,

21 Tera te mea hanga e whakaateatia mai i te tēpirau whakataurekarekatanga, whakarangatiratia ake ki roto ki te kororia o nga tamariki a te Atua.

22 E mohio ana hoki tatou, kei te aue tahi, kei te mamae tahi nga mea hanga katoa taea noatia tenei ra.

23 Ehara i te mea *ko ratou* anake, ko tatou nei ano kua whiwhi nei kite hua mātāmua, ara ki te Wairua, ina, e aue ana hoki tatou i roto i a tatou, e tatari ana ki te whakatamarikitanga, *ara*, ki te whakaoranga o o tatou tinana.

24 Ka ora hoki tatou i a tatou ka tumanako nei: tena ka kitea te mea e tumanakotia ana, kore ake te tumanako: he aha hoki te tangata ka tumanako ai ki te mea kua kitea nei e ia?

25 Na, ki te tumanako tatou ki te mea kahore nei e kitea, ka ata tāria marietia e tatou.

26 ¶ Ko te Wairua ano hei hoa mo tatou e ngoikore nei: kahore hoki tatou e mātau ki ta tatou e inoi ai kia tika: ko te Wairua nei ano ia te inoi ana mo tatou, ona aue e kore e taea te whakahua.

27 A, te kai titiro i nga ngakau, e mohio ana ia ki te whakaaro o te Wairua, rite tonu hoki ki ta te Atua i *pai ai* tana inoi mo te hunga tapu.

28 Na, e mātau nei tatou, kei te mahi tahi nga mea katoa i te pai mo te hunga e aroha ana ki te Atua, he mea karanga nei ratou i runga i *tana* i whakatakoto ai.

29 Ko āna hoki i mohio ai i mua, i whakaritea ano e ia i mua kia rite ki te ahua o tana Tama, kia ai ia hei muanga i roto i nga tēina tokomaha.

30 A, āna i whakarite ai i mua, ko enei ano i karangatia e ia: a, āna i karanga ai, ko enei ano i whakatikaia e ia: a, āna i whakatika ai, ko enei ano i whakakororiatia e ia.

31 ¶ Na kia pehea ta tatou korero ki enei mea? Ki te

mea ko te Atua hei hoa mo tatou, ko wai hei whawhai ki a tatou?

32 Kihai nei i kaiponuhia e ia tana ake Tama, heoi tukua mai ana e ia mo tatou katoa, e kore ianei e tapiritia noatia mai e ia ki a ia nga mea katoa mo tatou?

33 Ma wai e whakapa hē ki ā te Atua i whiriwhiri ai? Ko te Atua hei whakatika.

34 Ko wai hei whakatau hē? Ko te Karaiti i mate, ae ra kua ara ano, a kei te ringa matau ano o te Atua, ko ia hoki kei te inoi mo tatou.

35 Ma wai tatou e momotu kē i te aroha o te Karaiti? Ma te whakapawera, ma te rarunga, ma te whakatoi, ma te mate kai, ma te kakahu kore, ma te mate ka tata, ma te hoari ranei?

36 Ko te mea hoki ia i tuhi-tuhia, Na te whakaaro ki a koe matou i whakamatea ai i te ra roa nei; kiia ana matou hei hipi e patua ana.

37 Engari i enei mea katoa nui atu te wikitoria i a tatou, he mea na te kai aroha i a tatou.

38 U tonu hoki taku whakaaro, e kore te mate, e kore te ora, e kore nga anahera, e kore nga rangatira, e kore nga kaha, e kore nga mea onaiane, e kore nga mea e puta mai a mua,

39 E kore te tiketike, e kore te hohonu, e kore tetahi atu mea hanga, e kaha ki te momotu i a tatou i te aroha o te Atua, i tera i roto nei i a Karaiti Ihu, i to tatou Ariki.

UPOKO 9.

Tona pouri ki nga Hurai. 7

*Kua puta ke he uri mo Ape-
rahama. 14 Na te Atua*

ake ano tana mahi tohu. 19 To tatou nei rite. 25

Aua tikanga nei āna he

mea whakaatu no mua. 30

Take i he ai nga Hurai.

HE pono taku korero i roto
i a te Karaiti, kahore
aku teka, (me te whakaae
ano toku hinengaro ki a au i
roto i te Wairua Tapu.)

2 Nui atu toku pouri, mau
tonu te mamae o toku nga-
kau.

3 He pai hoki ki a au me
i kangā ahau, me i motuhia
i a te Karaiti, mo oku tēina,
mo oku whanaunga o te wahi
ki te kikokiko :

4 No Ihairaira nei ratou ; no
ratou nei te whakatamariki-
tanga, te kororia, nga kawē-
nata, te homaitanga o te ture,
te karakia, me nga kupu
whakaari ;

5 No ratou nei nga mātua,
no ratou ano a te Karaiti no
te wahi ki te kikokiko, kei
runga ake nei ia i nga mea
katoa, te Atua e whakapaingia
ana, ake ake. Amine.

6 Ehara ia i te mea, kua
taka te kupu a te Atua. Te
hunga hoki o Ihairaira, ehara
i te mea no Ihairaira katoa :

7 Ahakoa he uri no Apera-
hama, ehara ratou katoa i te
tamariki : engari, Kei a Ihaka
te karangatanga mo ou uri.

8 Ara ko nga tamariki a te
kikokiko ehara enei i te ta-
mariki na te Atua : engari

nga tamariki a te kupu wha-
kaari, ka kiia ratou he uri.

9 Ko te kupu whakaari hoki
tenei, Kia taka ki tenei wa
ka haere mai ahau, a ka wha-
nau ta Hera tama.

10 Na ehara i te mea *ko*
tenei anake ; i a Ripeka ano
hoki kua hapū i tetahi, i a
Ihaka, i to matou matua ;

11 (I nga *tama* hoki kahore
ano i whanau noa, kahore ano
hoki i mahi i te pai, i te kino
ranei, he mea kia u ai ta te
Atua i whakatakoto ai mo te
whiriwhiringa, ehara i nga
mahī, engari na te kai kara-
nga ;)

12 Ka korerotia ki a ia, Ko
te tuakana hei pononga ma
te teina :

13 Ko te mea ia i tuhituhia,
Kua aroha ahau ki a Hakopa,
kua kino ki a Ehau.

14 ¶ Kia pehea ra ta tatou
korero ? He tikanga hē koia
kei te Atua ? Kahore rapea.

15 I mea hoki ia ki a Mohi,
E tohu ahau i taku e tohu
ai, e atawhai ahau i taku e
atawhai ai.

16 Ae ra, ehara i te mea na
te kai hiahia, ehara i te mea
na te kai oma, engari na te
Atua, na te kai tohu.

17 E mea nei hoki te karai-
piture ki a Parao, Mo konei
pu ano koe i whakaarahia ai
e ahau, kia ai koe hei whaka-
kitenga mo toku kaha, kia
korerotia ai hoki toku ingoa
ki te whenua katoa.

18 Na ko tana e pai ai e
tohungia, a ko tana e pai ai
e whakapakeketia.

19 ¶ Na, tera koe e mea ki a au, He aha ia i riri ai ano? ko wai hoki i whakakeke ki tana i pai ai?

20 Ha, te tangata nei, ko wai koe hei whakahoki kupu ki te Atua? Ma te mea hanga-koia e mea ki tona kai hanga, He aha ahau i hanga ai e koe kia penei?

21 He teka ianei kei te kai hanga rihi te tikanga mo te paru, kia hangā tetahi wahi o taua mea i pokepokea hei oko honore, a ko tetahi wahi hei mea honore-kore?

22 He aha hoki, ki te mea i pai te Atua kia whakakitea tona riri, kia whakapuakina tona kaha, a puta nui ana tona manawanui ki nga oko riri kua whakaritea nei mo te whakangaromanga?

23 Kia whakakitea ano hoki te hua o tona kororia ki nga oko e tohungia ana, kua rite noa ake nei i a ia mo te kororia,

24 Ki a tatou, i karangatia nei e ia, ehara i te mea no nga Hurai anake, engari no nga tauwi ano hoki?

25 Ko tana kupu ano tena i ta Hohea, Ehara i te iwinaku, heoi ka karangatia e ahau, Ko taku iwi; he wahine hoki e arohaina ana te wahine kihai i arohaina.

26 A tenei ake i te wahi i korerotia ai ki a ratou, Ehara koutou i te iwi noku; ko reira ratou karangatia ai, he tama na te Atua ora.

27 Ta Ihaia karanga hoki mo Ihairaira, Ahakoa i rite ki te onepu o te moana te to-

komaha o nga tama a Ihairaira, he toenga e ora:

28 Na, e whakaotia e ia te mahi, e poroa hoki i runga i te tika: poro rawa hoki ta te Ariki mahi e mahi ai ki runga ki te whenua.

29 Ko ta Ihaia hoki ia i ki ai i mua, Me kahore te toe i te Atua o nga mano he whanau mo tatou, kua pera tatou me Horoma, kua rite ano hoki ki Komora.

30 ¶ Na kia pehea ta tatou korero? Ko nga tauwi kihai nei i whai i te tika, kua mau i a ratou te tika, ara, to te whakapono tika.

31 Ko Ihairaira ia, i whai nei i te ture o te tika, kahore i taea e ratou te ture o te tika.

32 Na te aha? Na te mea kihai ratou i ra runga i te whakapono, ra runga ke ana ratou i nga mahi o te ture. I tūtuki hoki o ratou waewae ki te kamaka tūtukinga;

33 Ko te mea hoki ia i tuhi-tuhia, Na ka whakatakotoria e ahau ki Hiona he kamaka tūtukinga, he kohatu whakahinga: na, nga tāngata katoa e whakapono ana ki a ia, e kore e whakama.

UPOKO 10.

To te ture tika; to te whakapono; 12 Hurai, Tauwi rite tonu. 16 He mea korero tenei i mua.

E OKU tēina, ta toku ngakau i pai ai, i inoi ai ki te Atua, ko ia tenei, ko Ihairaira kia ora.

2 E whaksaē ana hoki ahau

ki a ratou, he ngakau nui ano to ratou ki te Atua, otiia ehara i te mea mohio.

3 I a ratou hoki e kuare ana ki ta te Atua tika, a e whai ana kia whakaukia to ratou ake tika, kahore ratou i ngohengohe ki te tika a te Atua.

4 Ko te Karaiti hoki te tukunga iho o te ture hei tika mo nga tangata whakapono katoa.

5 Kua tuhituhia nei hoki e Mohi ta te ture tika, Te tangata e whakarite ana i aua mea, e ora ia i aua mea.

6 Ko te kupu ia tenei o ta te whakapono tika, Aua e mea i roto i tou ngakau, Ko wai hei kake ki te rangi? (ara ki te tiki atu i a te Karaiti ki raro:)

7 Ko wai ranei hei heke atu ki te hohonu? (ara ki te tiki atu i a te Karaiti i roto i te hunga mate.)

8 E pehea ana oti? E tata ana ki a koe te kupu, kei tou mangai, kei tou ngakau: ko ia ia, ko te kupu o te whakapono e kauwhau nei matou;

9 Ara ki te whakaae tou mangai ko Ihu te Ariki, a ka whakapono tou ngakau na te Atua ia i whakaara ake i te hunga mate, e ora koe.

10 Ma te ngakau hoki kia whakapono ka tika ai; ma te mangai kia whakaae ka ora ai.

11 E mea ana hoki te kairapiture, Nga tangata katoa e whakapono ana ki a ia e kore e whakama.

12 Kahore hoki he rerenga ketanga o te Hurai, o te Ka-

riki: e hua tonu ana hoki nga taonga a taua Ariki na ano o nga tangata katoa, ki te hunga katoa e karanga ana ki a ia.

13 E ora hoki nga tangata katoa e karanga ana ki te ingoa o te Ariki.

14 A me pehea ta ratou karanga ki a ia, ki te kahore i whakapono ki a ia? me pehea hoki ta ratou whakapono ki a ia, ki te kahore i rongo ki a ia? me pehea hoki e rongo ai, ki te kahore he kai kauwhau?

15 Me pehea hoki e kauwhau ai, ki te kahore e toonoa? ko te mea hoki ia i tuhituhia, Ano te ataahua o nga waewae o nga kai kauwhau o te maunga rongo, e kauwhau ana i nga mea pai!

16 ¶ Otira kahore ratou katoa i ngohengohe ki te rongo pai. E mea ana hoki a Ihaia, E te Ariki, ko wai i whakapono ki ta matou rongo?

17 Ina, na te rongo te whakapono, a i rongo ai, na te kupu a te Atua.

18 Na, ko taku kupu tenei, Kahore ranei ratou i rongo? Koia ra ia, kua puta atu to ratou reo ki te whenua katoa, a ratou kupu hoki ki nga topito o te ao.

19 Na, ko taku kupu tenei, Kahore ianei a Iharaia i mohio? Na Mohi te kupu tuatahi. Maku koutou e mea kia hae ki te hunga ehara i te iwi. Ka meinga e ahau te iwi poauau hei whakaoho i a koutou ki te riri.

20 Maia rawa ia ta Ihaia i mea ai, Kua kitea ahau e te hunga kihai nei i rapu i a au; kua matauria ahau e te hunga kihai nei i ui ki a au.

21 Tana kupu ia mo Ihairaira, Pau katoa te ra me te totoro atu ano oku ringa ki te iwi tutu, *ki te iwi whakahawea.*

UPOKO 11.

Nga morehu. 7 Era atu kua tukua ki te pakeke. 13 Kua nga Tauwi e whakamana-mana. 25 Tenei ake ko Ihairaira. 33 Ngaro o a te Atua tikanga.

NA, ko taku kupu tenei, Kua peia oti e te Atua tana iwi? Kahore rapea. No Ihairaira hoki ahau, no te uri o Aperahama, no to Peniamine iwi.

2 Kahore te Atua i pei i tana iwi i mohio ai i mua. Kahore oti koutou i mātau ki ta te Karaipiture korero i ta Iraia? i inoi ra hoki ia ki te Atua, i whakahe i a Ihairaira, i mea,

3 E te Ariki, kua patua e ratou o poropiti, kua whakahoroa o āta; ko ahau anake hoki kua mahue nei, a e whai ana ratou kia patua ahau.

4 Heoi e pehea mai ana ki a ia te ki tapu? E whitu mano tāngata kua waiho e ahau maku, kahore nei i piko te turi ki a Paara.

5 Waihoki, i tenei wa nei ano, he toenga tenei, he whiriwhiringa na te aroha noa.

6 A, ki te mea na te aroha noa, ehara i te mea na nga

mahi: penei ehara te aroha noa i te aroha noa. Ki te mea hoki na nga mahi, ehara i te mea aroha noa: penei ehara te mahi i te mahi.

7 Ha, e pehea ana? Ko ta Ihairaira e rapu nei, kihai tenei i taea e ratou; otira kua taea e te whiriwhiringa, ko era atu ia i whakapakeketia,

8 (Ko te mea hoki ia i tuhi-tuhia, Kua hoatu ki a ratou e te Atua he wairua hiamoe, he kanohi e kore ai ratou e kite, he taringa e kore ai e rongo,) a taea noatia tenei ra.

9 E mea ana hoki a Rawiri, Kia whakatupu mahanga to ratou tepu, hei roro hoki, hei tūtukinga waewae, hei utu ano ki a ratou:

10 Kia whakapouritia o ratou kanohi, kei kite ratou, kia piko tonu ano o ratou tuara.

11 Na, ko taku kupu tenei, He tūtuki to ratou e hinga ai? Kahore rapea: engari na to ratou hinganga te oranga o nga tauwi, he mea kia hae ai ratou.

12 Na, hei taonga nei mo te ao to ratou hinganga, a hei taonga mo nga tauwi to ratou whakaitinga; tera noa ake ano to ratou whakanuinga.

13 ¶ Ki a koutou, ki nga tauwi tenei kupu aku, ko te apotoro nei hoki ahau ki nga tauwi; e whakanui ana ahau i taku mahi minita:

14 Me kore e hae nga tāngata o toku kikokiko, kia ora ai etahi o ratou i a au.

15 Ko to ratou makanga atu

ROMA 11.

nei hoki hei houhanga rongo ma te ao, a ka aha to ratou tangohanga mai? he teka ia-nei he oranga ake i roto i te hunga mate?

16 Ki te mea hoki e tapu ana te mea mātāmua, ka pera ano te puranga: a ki te tapu te pakiaka, e pera ano nga manga.

17 Ki te whatiia hoki etahi o nga manga, a ka honoa atu koe, te oriwa ngahere, ki roto ki aua *manga*, ka whiwhi ngatahi ki te pakiaka, ki te monomatanga ano o te oriwa;

18 Aua e whakapehapena ki nga manga. A, ki te whakapehapeha: oe, ehara i te mea nau i mau ake ai te pakiaka, engari na te pakiaka koe.

19 Na, tera koe e mea, I whatiia atu nga manga, kia honoa iho ai ahau.

20 E pai ana; na te whakapono-kore ratou i whatiia atu ai, a na te whakapono koe i tu ai. Aua e whakakake, engari kia wehi:

21 Na, kihai nei i tohungia nga manga tupu e te Atua, *kia tupato* kei kore pea koe e tohungia.

22 Na, tirohia iho te ngawari me te pakeke o te Atua: pakeke ki te hunga i hinga; ngawari ki a koe, ki te u koe ki *tana tikanga* ngawari: ki te kahore, ka tapahia hoki koe.

23 Me ratou ano, ki te kore e u ki te whakapono kore, ka honoa ano: e taea hoki ratou e te Atua te hono mai ano.

24 He oriwa ngahere nei hoki koe i te rakau tupu, a

i tapahia mai, i honoa kētia mai ki te oriwa pai; ina, tera noa ake he hononga mo enei, mo nga *manga* tupu, ki to ratou oriwa ake.

25 ¶ E kore hoki ahau e pai, e *oku* tēina, kia kuare koutou ki tenei mea ngaro, kei mea koutou he mātatau koutou; kua tau te pakeke ki a Iharaira, mo tetahi wahi, kia riro mai ra ano te whakanuinga o nga tauwi.

26 Ko reira a Iharaira katoa ora ai: ko te mea hoki ia i tūhituhia, Tera e puta mai te Kai whakaora i Hiona, a māna e kaupare atu te karakia-kore i a Hakopa:

27 Ko taku kawenata hoki tenei ki a ratou, ina ka tangohia e ahau o ratou hara.

28 Na, i runga i te rongo pai, e hoariritia ana *ratou*, he whakaaro ki a koutou; a i runga i te whiriwhiringa, e arohaina ana *ratou*, he whakaaro ki nga mātua.

29 Ko a te Atua homaitanga hoki, ko tana karangatanga, kahore e puta ke te whakaaro.

30 Ka rite hoki ki a koutou kihai i whakapono i mua ki te Atua, inaianei ia kua tohungia, he mea na to ratou whakapono-kore:

31 Waihoki ko enei, kahore i whakapono inaianei, a ka tohungia nei koutou, ka tohungia hoki ratou.

32 Kua oti hoki te katoa te kopani e te Atua ki roto ki te whakateka, he mea kia tohungia katoatia ai.

33 ¶ Ano te hohonu, te hua o a te Atua whakaaro, o tona mohio! e kore āna tikanga e taea te whakaaro, ona huarahi e kore e taea te rapu!

34 Ko wai hoki te mohio ana ki te hinengaro o te Ariki? ko wai hoki tona hoa whakatakoto whakaaro?

35 Ko ta wai hoki kua hoatu ki a ia i mua, a ka whakahokia he utu ki a ia?

36 Nga mea katoa nei hoki, nāna, kei runga ano i a ia, e ahu ana hoki ki a ia: mona te kororia ake tonu atu. Amine.

UPOKO 12.

Whakaaroa ana mahi aroha, a whaia tana e pai ai. 3 Kei whakakake. 6 Tahuri ki tau mahi ake. 19 Kei rapu utu.

KOIA ahau ka akiaki nei i a koutou, e oku tēina, kia whakaaroa nga mahi tohu a te Atua, kia tapaea atu o koutou tinana hei whakahere ora, e tapu ana, e manakohia ana e te Atua, he mahi na to koutou hinengaro.

2 A kua to koutou ahua e rite ki to tenei ao: engari kia rere kē, ara kia whakahoutia o koutou hinengaro, kia whakamatautauria ai e koutou ta te Atua e pai ai, te mea e pai ana, e manakohia ana, e tino rite ana.

3 ¶ Ko taku kupu hoki tenei ki nga tāngata katoa i roto i a koutou, he mea na te aroha noa i homai nei ki a au, Kua te whakaaro e kake ki runga ake i te mea i tika kia wha-

kaaroa; engari kia ata whakaaro, kia rite ki ta te Atua wahi whakapono i tuwha ai ki tetahi, ki tetahi.

4 E rite ana hoki ki o tatou wahi ka maha nei i te tinana kotahi, a, aua wahikatoa, kihai i kotahi te mahi ma ratou:

5 Wai hoki ko tatou tokomaha, he tinana kotahi i roto i a te Karaiti, ko tatou takitahi ia, he wahi no tatou tahi.

6 ¶ Naka rere kē nei nga mea i homai ki a tatou, he mea e rite ana ki te āroha noa i homai ki a tatou, ki te mea he mahi poropiti, kia rite ki te tikanga o te whakapono;

7 He mahi minita, *kia u* ki te mahi minita; te kai whakaako, *kia u* ki te whakaako;

8 Te kai whakahauhau, *kia u* ki te whakahauhau; te kai hoatu, *kia* tapatahi tengakau; te kai tohutohu, *kia* uaua; te kai atawhai, *kia* marama te ngakau.

9 Te aroha, hei te mea tinihanga kore. Whakariharihangia te kino; *kia u* ki te pai.

10 Te ngakau aroha o tetahi ki tetahi, *kia* rite ki to te tuakana raua ko te tēina; *kia* nui te whakahonore a tetahi i tetahi;

11 *Kia* uaua, kua e mangere; *kia* toko tonu ake te wairua; me te mahi ano ki te Ariki;

12 *Kia* hari i runga i te tumanako; *kia* manawanui ki te whakapawera; *kia u* ki te inoi;

13 Whakawhiwhia te hunga tapu ina rawakore; *kia* mau ki te atawhai manuhiri.

14 Manaakitia te hunga e tukino ana i a koutou: manaaki, kaua e kanga.

15 Kia hari tahi me te hunga hari, tangi tahi me te hunga tangi.

16 Kia kotahi te whakaaro o koutou tetahi ki tetahi. Kaua e whakakake te whakaaro, engari me whakauru ki roto ki te hunga iti. Kei mea ake koutou he mohio koutou.

17 Kaua e utua ta tetahi kino ki te kino. Whakaaroa wawetia he pai ki te aroaro o nga tangata katoa.

18 Ki te taea, whakapaua ta koutou kia mau te rongo ki nga tangata katoa.

19 Aua e rapu utu mo koutou, e *oku* hoa aroha, engari neke atu i te riri: kua oti hoki te tuhituhi, Maku te rapu utu; maku te hoatu utu, e ai ta te Ariki.

20 Na, ki te mate kai tou hoa-riri, whangainga; ki te mate wai, whakainumia: ki te penei hoki tau mahi, ka purangatia e koe he waro kapura ki tona mātenga.

21 Kei hinga koe i te kino, engari kia hinga te kino i tou pai.

UPOKO 13.

Whakanuia nga kai whakahaeretikanga. 8 *Kote aroha anake kia takoto roa.* 11 *Nga mahi hē whakarerea.*

KIA ngohengohe nga wai-rua katoa ki nga mana nunui. Kahore hoki he mana, na te Atua anake: nga mana o tenei wa nei he mea whakarite na te Atua.

2 Na, ki te whakakeke tetahi ki te mana, e whakakeke ana ki ta te Atua i whakarite ai: a, te hunga whakakeke, te mea mo ratou he whakatau hē.

3 Ehara hoki nga rangatira i te whakawehi mo nga mahi pai, engari mo nga *mahi* kino. E mea ana koe kia kaua e wehi i te mana? meatia te pai, a he whakamoemiti tana e homai ai ki a koe:

4 He minita hoki ia na te Atua ki a koe mo te pai. Tena ki te mahi kino koe, e wehi ra; ehara hoki tana i te mau noa i te hoari: he minita hoki ia na te Atua, he kai rapu utu hei riri i te kai mahi i te kino.

5 Koia i takoto ai te tikanga kia ngohengohe *koutou*, ehara i te mea he whakaaro kau ki te riri, engari ki te hinegaro ano hoki.

6 Na konei hoki koutou i hoatu ai i te takoha: na te Atua hoki ratou minita, he hunga hoki e mau tonu ana ki tenei mea pu ano.

7 Na, hoatu nga mea i tika ki te katoa: he takoha-tangata ki te *tangata i tika ai* te takoha-tangata; he takoha-taonga ki te *tangata i tika ai* te takoha-taonga; he wehi ki te *tangata i tika ai* te wehi; he honore ki te *tangata i tika ai* te honore.

8 ¶ Kei waiho kia takoto roa ana te mea i tika kia hoatu ki tetahi, ko te aroha anake o tetahi ki tetahi: ka rite hoki te ture i te tangata e aroha ana ki tera atu.

9 Ko tenei hoki, Kaua e puremu, Kaua e patu tangata, Kaua e tahae, Kaua e whakapae teka, Kaua e hiahia *ki ta te tangata*; a ki te mea tera atu ano tetahi kupu ako, ka whakarapopototia ki roto ki tenei kupu, ara, Kia aroha ki tou hoa tata, ano ko koe.

10 E kore te aroha e hanga kino ki tona hoa: ko te aroha hoki te whakaritenga o te ture.

11 ¶ Tenei ano hoki tetahi, e mohio ana tatou ki te taima, *kua taka noa ake te wa e ara ai tatou i te moe*: engari hoki tenei e tata ana to tatou oranga i to te wa i whakapono ai tatou.

12 Kua aua atu te po, ka tata te ao: mo konei ra kia whakarerea e tatou nga mahi o te pouri, kia kakahuria iho nga kakahu whawhai o te maramatanga.

13 Kia pai to tatou haere, kia rite ki to te awatea; kauaka i nga kakainga, i nga haurangitanga, kaua i nga hē moenga, i nga hiahia taikaha, kaua i te whawhai, i te hae.

14 Engari kakahuria iho te Ariki, a Ihu Karaiti, a kaua e whakaaroa wawetia te kiko-kiko, kia mahia *ona hiahia*.

UPOKO 14.

Kei he te ngoikore i o tautohetohenga. 13 *Kia manawapa ki a ia kei he i a koe.*

TE tangata e ngoikore ana te whakapono whakahoa-tia, kauaka ia ki nga totohenga whakaaro.

2 Ta tetahi hoki i whakapono ai, me kai e ia nga mea katoa: te tangata ngoikore ia, e kai otaota ana.

3 Kaua te tangata e kai ana e whakahawea ki te tangata kahore e kai; kaua hoki te tangata kahore e kai e whakahē i te tangata e kai ana: kua manakohia hoki ia e te Atua.

4 Ko wai koe e whakahē na i ta tera pononga? ma tonu rangatira ia e whakatu, e whakahinga ranei. Ina ka whakaturia ano ia: e taea hoki ia e te Atua te whakatu.

5 Ki ta tetahi ki, nui atu tetahi ra i tetahi ra: ki ta tetahi ki, *rite* katoa nga ra. Kia u marire nga whakaaro a tetahi, a tetahi.

6 Te tangata e whakaaro ana ki te ra, *he whakaaro* ki te Ariki tana whakaaro; a, te tangata e kore e whakaaro ki te ra, *he whakaaro* ki te Ariki tana kore e whakaaro. Te tangata e kai ana, *he whakaaro* ki te Ariki tana kainga, e whakawhetai ana hoki ia ki te Atua; a, te tangata kahore e kai, *he whakaaro* ki te Ariki tana korenga e kai, e whakawhetai ana ano ia ki te Atua.

7 Ehara hoki i te mea mona ake ano te oranga o tetahi o tatou, ehara hoki i te mea mona ake te matenga o tetahi.

8 Ta te mea ahakoa ora, e ora ana tatou ki te Ariki; ahakoa mate, e mate ana ki te Ariki: na, ahakoa ora, ahakoa mate, no te Ariki tatou.

9 Ko te mea hoki tenei i mate ai a te Karaiti, i ara ake ai ano, i ora ai ano, kia waiho ai ia hei rangatira mo te hunga mate, mo te hunga ora.

10 Ko koe na, he aha koe i whakahē ai i tou teina? me koe na hoki, he aha koe i whakahawea ai ki tou teina? e tu katoa hoki tatou ki te nohoanga whakawa o te Karaiti.

11 Kua oti hoki te tuhituhi, E ora ana ahau, e ai ta te Ariki, ina e piko katoa nga turi ki a au, a e whakaae nga arero katoa ki te Atua.

12 Ae ra ka korerotia e tenei, e tenei o tatou te tikanga o ana mahi ki te Atua.

13 ¶ Na kāti ta tatou whakahē tetahi i tetahi; engari ko tenei kia rite i a koutou, kia kua e whakatakotoria he tūtukinga *waewae*, he whakahinga ranei, mo te teina.

14 E mohio ana ahau, u tonu toku whakaaro i roto i te Ariki, i a Ihu, kahore he mea nona ake ano tona noa: engari ki te mea tetahi e noa ana tetahi mea, he noa ano ki a ia.

15 Otiia ki te mea na te kai tou teina i pouri ai, kahore e mau ana tou haere i runga i te aroha. Kei mate i to kai te tangata i mate nei a te Karaiti mona.

16 Na kei korerotia kinotia to koutou pai.

17 Ehara hoki te rangatiranga o te Atua i te kai, i te wai; engari he tika, he rangi-marie, he hari i roto i te Wai-rua Tapu.

18 Te tangata hoki ko enei hei mahinga māna ki a te Karaiti, ka manakohia ia e te Atua, ka paingia hoki e nga tāngata.

19 Na kia whaia e tatou nga mea e mau ai te rongu, nga mea ano hoki e hangā ai te pai o tetahi e tetahi.

20 Kaua e waiho te kai hei whakahoro mo ta te Atua mahi. E ma ana ano nga mea katoa; otiia he kino ki te tangata ki te mea he tūtukitanga waewae nei tana kainga.

21 He mea pai ano kia kaua e kai kikokiko, kia kaua e inu waina, aha ranei e tūtuki ai tou teina, e hinga ai ranei, e ngoikore ai ranei.

22 He whakapono tou? waiho i a koe ano ki te aroaro o te Atua. Ka hari te tangata kahore e whakatau i te hē ki a ia ano mo te mea i whakapaia atu e ia.

23 Ki te ruarua ia tetahi, a ka kai, kua tau te hē ki a ia; no te mea ehara i te *kai* whakapono: he hara hoki nga mea katoa kihai nei i *puta ake* i te whakapono.

UPOKO 15.

Whakaaroa nga ngoikore. 3 Tate Karaiti. 7 Kia pera ano tatou. 22 Nga wahi e haere ai ia.

TE mahi tika ma tatou, ma te hunga kaha, he pikau i nga ngoikoretanga o te hunga kaha-kore; kaua hoki e whaia ko ta tatou ake i ahua-reka ai.

2 Me whai e tatou kia ahua-reka mai tona hoa, tona hoa,

kia *whai* pai *ai*, hei hanga mo te *whare*.

3 Kihai hoki a te Karaiti i *whai* ki tana ake i *ahuareka ai*; engari i rite ki te mea kua oti te *tuhituhi*, Kua tau ki a au nga *tawainga* a te *hunga e tawai* ana i a koe.

4 Na, nga mea i *tuhituhia* i mua he mea *tuhituhi* hei *whakaako* i a tatou, kia *whai tumanakotanga ai* tatou, i te mea ka *whakamanawanui*, ka *whakamarietia* hoki e nga *Karaipiture*.

5 A ma te Atua o te *manawanui*, o te *whakamarie*, e homai ki a koutou kia kotahi te *whakaaro* a tetahi ki tetahi, kia rite ki ta Karaiti Ihu:

6 Kia kotahi ai te *ngakau*, kia kotahi ai te *waha*, e *whakakororia ai* koutou i te Atua, ara, i te Matua o to tatou Ariki, o Ihu Karaiti.

7 Na me *whakahoa* koutou tetahi ki tetahi, kia rite ki a te Karaiti i mea nei i a tatou hei *hoa mona*, kia *whai kororia ai* te Atua.

8 ¶ Na, ko taku kupu tenei, He minita a Ihu Karaiti ki te *kotinga*, he *whakaaro* ki te pono o te Atua, kia u ai nga mea i *whakaaria* ki nga *mātua*:

9 Kia *whakakororia ai* ano hoki nga *tauwi* i te Atua mo tana mahi tohu, kia pera ai me te mea i *tuhituhia*, Mo konei ka *whakawhetai ai* ahau ki a koe i *waenganui* o nga *tauwi*, ka *himene ai* ki tou ingoa.

10 Tenei ano tetahi kupu āna, Kia hari tahi, e nga *tauwi*, me tana iwi.

11 Tenei ano hoki, *Whakamoemititia* te Ariki, e nga *tauwi* katoa; *whakamoemititia* ano ia, e nga *iwi* katoa.

12 E mea ana ano a Ihaia, Tera e *whai pakiaka* a Hehe, me tetahi e *whakatika* ana hei *rangatira* mo nga *tauwi*; ko ia hei *tumanakohanga* ma nga *tauwi*.

13 Na, ma te Atua, nāna nei te *tumanako*, e *whakaki* koutou ki te hari katoa, ki te *rangimarie*, i runga i te *whakapono*, kia hua ai to koutou *tumanako*, i runga i te kaha o te Wairua Tapu.

14 ¶ Na e u ana ano toku ake *whakaaro* e oku tēina, ki a koutou, e kī ana i te pai, *whawhao* rawa i te *mataura* nga katoa, a e taea ano e koutou te *whakatupato* tetahi i tetahi.

15 Otiia i nui ai tetahi wahi o toku maia ki te *tuhituhi* ki a koutou, e oku tēina, he *whakamahara* hoki i a koutou, he mea na te *aro*ha noa kua homai nei ki a au e te Atua,

16 I meinga ai ahau hei minita ma Ihu Karaiti ki nga *tauwi*, hei mahi i nga mea tapu o te *rongo* pai a te Atua, kia *manakohia ai* te *whakahere* o nga *tauwi*, he mea *whakatapu* na te Wairua Tapu.

17 Na kua *whai whakamanananga* nei ahau i roto i a Karaiti Ihu i nga mea a te Atua.

18 E kore hoki ahau e maia ki te *korero* ki tetahi mea kihai nei i meinga e te Karaiti

kia mahia e ahau, e *taku* kupu, e *taku* mahi, hei mea kia ngohengohe mai ai nga tauwi,

19 I runga i te kaha o nga tohu, o nga mea whakamiharo, i runga i te kaha o te Wairua o te Atua; no ka whakapaua e ahau te kauwhau i te rongo pai o te Karaiti, mai i Hiruharama, a taka noa ki Irurikuma.

20 Ko ia tenei taku tohe ki te kauwhau i te rongo pai, ehara i te mea ki nga wahi kua whakahuatia nei a te Karaiti ki reira, kei hanga whare ahau ki runga ki ta tera tangata turanga:

21 Engari kia rite ki te mea kua oti te tuhituhi, Te hunga kihai nei ia i korerotia ki a ratou, e kiteratou: a, te hunga kihai nei i rongo, e mātau ratou.

22 ¶ Na konei ano i maha ai oku whakawarenga, tē tae atu ai ahau ki a koutou.

23 Inaianei ia kua kore nei he wahi moku i enei whenua, a ka maha nei oku tau i nui ai toku hiahia kia haere ki a koutou:

24 Kei toku haerenga atu ki Hipani, ka tae ahau ki a koutou: e mea ana hoki ahau tera ahau e kite i a koutou i toku haerenga atu, a ka kawea ano e koutou ki reira, kia mātua ora tetahi wahi o toku ngakau i a koutou.

25 Inaianei ia e haere ana tenei au ki Hiruharama, ki te mahi mea ma te hunga tapu.

26 Kua pai hoki a Makeronia raua ko Akaia kia meinga tetahi kohikohi mo nga rawa-

kore o te hunga tapu i Hiruharama.

27 I pai ano; a e tika ana ano kia hoatu ki a ratou. Kua uru nei nga tauwi ki a ratou mea o te wairua, waihoki e tika ana ano kia mahia e enei etahi mea o te kikokiko ma ratou.

28 Na, kia oti tenei i a au, a hiri rawa tenei hua *hei mea* ma ratou, ka tika atu ahau na to koutou *wahi* ki Hipani.

29 E mātau ana ano ahau, ka haere atu ahau ki a koutou, tera au e haere i runga i te hua noa iho o te manaakitanga o te rongo pai o te Karaiti.

30 ¶ Na, he tohe tenei naku ki a koutou, e *oku* tēina, kia whakaaro koutou ki to tatou Ariki, ki a Ihu Karaiti, ki te aroha hoki o te Wairua, a kia tohe tahi tatou, ara kia inoi ki te Atua, moku;

31 Kia whakaorangia ahau i te hunga whakateka i Huria; kia manakohia ano e te hunga tapu taku mea e mahi nei mo Hiruharama;

52 Kia haere hari ai ahau ki a koutou, ki te pai te Atua, kia ora tahi ai o tatou ngakau.

33 Na *kia noho* te Atua o te rangimarie ki a koutou katoa. Amine.

UPOKO 16.

Ana owhatanga. 17 *Mawehe atu i nga tangata wehewehe.*

21 *Owhatanga a ona hoa.*

TENA to matou tuahine a Pipi te tukua atu na e ahau ki a koutou, he kai mahi ia na te hahi i Kenekerea:

ROMA 16.

2 Hei manuhiri ia ma koutou i roto i te Ariki, kia rite ki ta te hunga tapu tikanga, a ki te matea e ia tetahi mea a koutou, ma koutou e atawhai: he tokomaha hoki ana i atawhai ai, ahau ano hoki.

3 ¶ Oha atu ki a Pirihira raua ko Akuirā, ki oku hoa mahi i roto i a Karaiti Ihu:

4 Na raua nei hoki o raua kaki i tuku kia ora ai ahau: ehara hoki i te mea ko ahau anake e whakawhetai ki a raua, engari ko nga hahi katoa hoki o nga tauwi.

5 Oha atu ano ki te hahi i to raua whare. Oha atu ki a Epainetu, ki taku i aroha ai, ko ia hoki ta te Karaiti mātāmua o Akaia.

6 Oha atu ki a Meri, he nui tana mahi ki a matou.

7 Oha atu ki a Anaroniku raua ko Hunia, oku whanaunga, oku hoa herehere ano hoki, he ingoa nui nei o raua i roto i nga apotoro, no mua nei ia au to raua urunga ki a te Karaiti.

8 Oha atu ki a Amapiria, ki taku i aroha ai i roto i te Ariki.

9 Oha atu ki a Urapane, ki to matou hoa mahi i roto i a te Karaiti, ki a Takuha ano hoki, ki taku i aroha ai.

10 Oha atu ki a Apere e paingia ana i roto i a te Karaiti. Oha atu ki a Aritopuru ma.

11 Oha atu ki a Heroriona, ki toku whanaunga. Oha atu ki a Nakihu ma, ki nga mea i roto i te Ariki.

12 Oha atu ki a Taripina raua ko Taripoha, e mahi nei i roto i te Ariki. Oha atu ki a Perahi e arohaina nei, he nui nei tana mahi i roto i te Ariki.

13 Oha atu ki a Rupuha i whiriwhiria i roto i te Ariki, ki tona whaea, ara ki to maua tahi.

14 Oha atu ki a Ahunikiritu, ratou ko Perekona, ko Hera-ma, ko Pataropa, ko Herami, ki nga teina ano e noho ana i a ratou.

15 Oha atu ki a Piroroku, raua ko Huria, ki a Nireu, raua ko tona tuahine, ki a Orimapa ratou ko te hunga tapu katoa e noho ana i a ratou.

16 Oha atu tetahi ki tetahi, hei te kihi tapu ano. Tenei te oha atu nei nga hahi o te Karaiti ki a koutou.

17 ¶ He tohe tenei naku ki a koutou, e oku teina, tirohia iho te hunga e mea ana i nga wehewehenga, i nga mea whakahinga, he mea puta kē i te whakaakoranga i whakaakona ai koutou: tahuri atu i a ratou.

18 Ehara hoki to tatou Ariki, a Ihu Karaiti i ta ratou e mahi atu nei, engari ko o ratou kōpū; a he whakapati, he kupu pai ta ratou, hei tiniha-nga mo nga ngakau o te hunga kino kore.

19 Ko to koutou ngohengo-hetanga mai ia, kua pakū ki nga tāngata katoa. Kōia ahau ka hari nei ki a koutou: a e mea ana ano ahau kia whai

I. KORINITI 1.

whakaaro koutou ki te pai,
kia atea hoki i te kino.

20 ¶ Na, tera te Atua o te rangimarie e hohoro te kuru i a Hatana ki raro i o koutou waewae. *Kia tau* ki a koutou te aroha noa o to tatou Ariki, o Ihu Karaiti. Amine.

21 ¶ Tenei te oha atu nei ki a koutou a Timoti toku hoa mahi, a Ruhin, a Hahona, a Hohipate, oku whanaunga.

22 Ko ahau tenei ko Teretiu, ko te kai tuhituhi o tenei pukapuka, te oha atu nei ki a koutou i roto i te Ariki.

23 Tenei te oha atu nei ki a koutou a Kaiu te kai atawhai oku, o te hahi katoa. Tenei te oha atu nei a Eratu kai tiaki o nga mea o te pa, raua ko te teina, ko Kuaratu.

24 *Kia tau* ki a koutou katoa te aroha noa o to tatou Ariki, o Ihu Karaiti. Amine.

25 ¶ Na, he kaha nei te Atua ki te whakau i a koutou, i runga i nga ritenga o taku rongo pai, o te kauwhautanga hoki o Ihu Karaiti, o te whakakitenga mai ano o te mea ngaro, kihai nei i rangona no te timatanga ra ano o te ao,

26 A kua whakamaramatia mai inaianei e nga karaipiture a nga poropiti, he mea whakarite mai na te Atua ora tonu, a whakapuakina mai ana ki nga tauwi katoa, kia ngohengohe ai ratou ki ta te whakapono:

27 *Waiho atu* i te Atua, ko ia nei anake te Mea mātau, te kororia i roto i a Ihu Karaiti, ake aké. Amine.

KO TE PUKAPUKA TUATAHI A PAORA APOTORO

KI TE

HUNGA O KORINITI.

UPOKO 1.

Owhatanga, whakawhetai.

10 *Kia kotahi.* 12 *Kaua e wehewehe.* 18 *To te ao matauranga.* 21 *To te Atua.* 26 *Ehara i te mea ko te hunga nunui; 27 engari ko nga kuare āna i karanga ai.*

NA Paora, i paingia e te Atua kia karangatia hei apotoro ma Ihu Karaiti, na te teina hoki, na Hotene,

2 Ki ta te Atua hahi e noho ana i Koriniti, ki te hunga kua oti te whakatapu i roto i a Karaiti Ihu, kua karangatia hei hunga tapu, ratou ko te hunga katoa i nga wahi

I. KORINITI 1.

katoa e karanga ana ki te ingoa o Ihu Karaiti, o to tatou Ariki, to ratou, to tatou :

3 *Kia tau* ki a koutou te aroha noa, me te rangimarie, he mea na te Atua, na to tatou Matua, na te Ariki hoki, na Ihu Karaiti.

4 ¶ He whakawhetai tonu taku ki toku Atua mo koutou, mo te aroha noa o te Atua kua homai nei ki a koutou i roto i a Karaiti Ihu ;

5 No te mea kua hua nga mea katoa, nga korero katoa, nga matauranga katoa, ma koutou i roto i a ia ;

6 Me te whakaaturanga na hoki i a te Karaiti kua u na i roto i a koutou ;

7 I kore ai koutou e hapa i tetahi homaitanga, i a koutou e tatari naki te whakakitenga mai o to tatou Ariki, o Ihu Karaiti :

8 Māna ano koutou e whakau taea noatia te mutunga, hei hunga e kore e ekengia e te kupu i te ra o to tatou Ariki, o Ihu Karaiti :

9 Pono tonu te Atua, nāna nei koutou i karanga kia uru tahi ki tana Tama, ki a Ihu Karaiti, ki to tatou Ariki.

10 ¶ He tohe tenei naku ki a koutou, e *oku* tēina, i runga i te ingoa o to tatou Ariki, o Ihu Karaiti, kia kotahi ta koutou katoa korero, kia kaua he wehewehenga i roto i a koutou ; engari kia tino tika koutou, kia kotahi te ngakau, kia kotahi te whakaaro.

11 Kua oti hoki koutou, e *oku* tēina, te korero ki a au e

te hunga o te whare o Koroi, he tautohetohe ena kei roto i a koutou.

12 Ko taku kupu ano tenei, Ko te ki tenei a tetahi, a tetahi o koutou, Ko ahau no Paora ; Ko ahau no Aporo ; Ko ahau no Kipa ; Ko ahau no te Karaiti.

13 Kua oti koia a te Karaiti te wahi ? i ripekatia ranei a Paora mo koutou ? i iriiria ranei koutou ki runga ki te ingoa o Paora ?

14 E whakawhetai ana tenei ahau ki te Atua, no te mea kihai ahau i iriiri i tetahi o koutou, ko Kirihipu anake raua ko Kaiu ;

15 Kei mea tetahi i iriiri ahau ki runga ki toku ingoa.

16 I iriiri ano ahau i nga tangata o te whare o Tepana : heoi, kahore ahau e mahara ki taku iriiringa i tetahi atu.

17 Kihai hoki ahau i tonoa e te Karaiti ki te iriiri, engari ki te kauwhau i te rongo pai : ehara i te mea i runga i te mohiotanga ki te korero, kei whakakahoretia te ripeka o te Karaiti.

18 ¶ Ki te hunga hoki e whakangaromia ana, he mea kuare te korero o te ripeka ; ki a tatou ia e whakaorangia nei, ko te kaha o te Atua.

19 Ka oti hoki te tuhituhi, Ka ngaro i a au te whakaaro nui o te hunga whakaaro, ka kore hoki i a au te mahara o te hunga mahara.

20 Kei hea te tangata whakaaro ? kei hea te karaipi ? kei hea te tangata tohe o tenei

I. KORINITI 1, 2.

ao? kahore ano koia i whakauaretia e te Atua te whakaaro nui o tenei ao?

21 I te mea hoki i runga i o te Atua whakaaro nui, kihai nga whakaaro nui o te ao i mātau ki te Atua, na ka pai te Atua kia meinga te kuaretanga o te kupu kauwhau hei whakaara i te hunga e whakapono ana.

22 Ta nga Hurai nei hoki, he tono tohu, ta nga Kariki, he rapu whakaaro nui:

23 Ta matou ia, he kauwhau i a te Karaiti kua oti nei te ripeka, he tūtukitanga wae-wae ki nga Hurai, he mea kuare ki nga Kariki;

24 Ki te hunga ia e karangatia ana, ki nga Hurai, ki nga Kariki, ko te Karaiti, ko te kaha o te Atua, ko to te Atua whakaaro mohio.

25 No te mea he kuaretanga no te Atua, nui atu i nga tāngata te mohio; he ngoikoretanga no te Atua, kaha atu i nga tāngata.

26 ¶ Ka kite nei hoki koutou, e oku tēina, i to koutou karangatanga, ehara i te mea he tokomaha te hunga whakaaro o te wahi ki te kikokiko e karangatia ana, ehara i te mea he tokomaha te hunga nunui, ehara i te mea he tokomaha nga rangatira;

27 Engari i whiriwhiria e te Atua nga mea kuare o te ao, hei mea e whakama ai te hunga whakaaro; a kua whiriwhiria ano e te Atua nga mea ngoikore o te ao, hei mea e whakama ai nga mea kaha;

28 Kua whiriwhiria hoki e te Atua nga mea ware o te ao, me nga mea e kinongia ana, me nga kahore noa iho, hei whakakahore i nga tino mea;

29 Kia kore ai e whakamanamana tetahi kikokiko ki tona aroaro.

30 Nāna hoki koutou i roto i a Karaiti Ihu, kua meinga nei ia hei take whakaaro nui mo tatou, he mea na te Atua, hei tika, hei whakatapu, hei hoko:

31 Kia rite ai ki te mea kua oti te tuhituhi, Ki te whakamanamana tetahi, me whakamanamana ki te Ariki.

UPOKO 2.

Tana kauwhau ehara i te pai kupu; 4 engari hei runga i te kaha o te Atua. 6 E kore ano e mohiotia e te ngakau maori.

I A au ano, e oku tēina, i haere ki a koutou, kihai au i haere me te pai kupu, me te hua ranei o te whakaaro, i taku kauwhautanga ki a koutou i te whakaaturanga a te Atua.

2 I takoto hoki taku whakaaro kia kua ahau e mātau ki tetahi mea i roto i a koutou, ko Ihu Karaiti anake, ko ia hoki i ripekatia.

3 I a au ano i a koutou, i runga ahau i te ngoikore, i te wehi, i te wiri nui.

4 Taku kupu hoki, me taku kauwhau, ehara i te kupu whakapati no a te tangata whakaaro nui, engari he wha-

I. KORINITI 2, 3.

kakitenga na te Wairua, na te kaha:

5 Kei mau hoki to koutou whakapono i runga i o te tangata whakaaro nui, engari i to te Atua kaha.

6 ¶ Ki te hunga tino tika ano ia, e whai whakaaro ana ano ta matou korero: ehara ia i te whakaaro mohio no tenei ao, no nga rangatira ranei o tenei ao ka memeha nei:

7 Engari e korerotia ana e matou nga whakaaro nui o te Atua i roto i te mea ngaro, era i hunā ra, a te Atua i whakatakoto ai i mua o te ao, hei whakakororia mo tatou.

8 Kihai nei i mātau i tetahi o nga rangatira o tenei ao: me i mātau hoki, kihai i ripekatia e ratou te Ariki o te kororia.

9 Heoi ka rite ki te mea kua oti te tuihitihi, Kahore te kanohi i kite, kahore te tari-nga i rongu, kahore ano i tapoko noa ki te ngakau o te tangata, nga mea kua rite mai i te Atua mo te hunga e aroha ana ki a ia.

10 Heoi kua whakakitea mai ki a tatou e te Atua, ara e tona Wairua: e rapu ana hoki te Wairua i nga mea katoa, i nga mea hohonu a te Atua.

11 Ko wai hoki te tangata e mātau ana ki nga mea a te tangata? ko te wairua anake o te tangata i roto i a ia: waihoki ko nga mea a te Atua, e kore e matauria e

tetahi, engari e te Wairua o te Atua.

12 Ehara i te ao te wairua kua riro nei i a tatou, engari ko te Wairua e ahu mai nei i te Atua; kia mātau ai tatou ki nga mea kua oti nei te homai ki a tatou e te Atua.

13 A i a matou ka korero nei i aua mea, ehara nga kupu i te mea whakaako na te whakaaro mohio o te tangata, engari he mea whakaako na te Wairua Tapu; e whakariterite ana i nga mea wairua ki nga mea wairua.

14 E kore ia te tangata i te ngakau maori e tango i nga mea o te Wairua o te Atua: he mea kuare hoki ki a ia: e kore ano e ahei te mātau, ma te Wairua hoki ka kitea ai.

15 Otiia ki te mea kei tetahi te Wairua, ka kitea e ia nga mea katoa, e kore ano ia e kitea e tetahi.

16 Ko wai hoki te mātau ana ki te hinengaro o te Ariki, e whakaako ai ia i a ia? Kei a tatou ia te hinengaro o te Karaiti.

UPOKO 3.

He tamariki kau ratou mei te wehewehe. 4 He kai whakato kau ratou, nga kai kauwhau. 10 Ko te Karaiti te turanga. 16 Ko ratou te temepara. 17 Na, kia pai.

KIHAI ano ahau, e oku tēina, i ahei te korero ki a koutou, me taku ki he hunga i te Wairua, engari i te kikokiko, ano he kohungahunga i roto i a te Karaiti.

2 He waiu, ehara i te kai

I. KORINITI 3.

māro taku i whangai atu ra ma koutou: kiano hoki koutou i kaha noa, kahore nei ano e kaha inaianei.

3 Kei te kikokiko na ano koutou: i te mea hoki kei a koutou te hae, te totohe, nga wehewehe, ehara oti koutou i te hunga i te kikokiko, a e haere ana i runga i ta te tangata ritenga?

4 I tetahi hoki e ki nei, Ko ahau no Paora; me tetahi atu, Ko ahau no Aporo; ehara oti koutou i te hunga i te kikokiko?

5 Ko wai ra a Paora, ko wai a Aporo? ehara ianei i nga minita i whakapono ai koutou, i runga hoki i ta te Ariki i homai ai ki tetahi, ki tetahi?

6 Nāku i whakato, na Aporo i whakamakuku; na te Atua ia i mea kia tupu.

7 Heoi, he kore noa iho te kai whakato, he kore noa iho te kai whakamakuku, engari te Atua nāna nei i mea kia tupu.

8 Na, te kai whakato, te kai whakamakuku, kotahi tonu raua: a ka rite ki tana ake mahi tona utu e riro i tetahi, i tetahi.

9 He hoa mahi hoki matou no te Atua: he ngakinga koutou na te Atua, he whare hanga na te Atua.

10 ¶ Rite tonu taku ki ta te Atua aroha noa i homai nei ki a au, he pera me ta te kai hanga mohio; kua takoto i a au te tūnga, a ko tetahi atu kei te hanga whare ki runga. Kia tupato ia tetahi, tetahi,

ki tana whare e hanga ai ki runga.

11 E kore hoki tetahi e ahei te whakatakoto i tetahi tūnga kē atu i tera kua oti nei te whakatakoto, ara i a Ihu Karaiti.

12 Na, ki te hangā e tetahi ki runga ki tenei tūnga he koura, he hiriwa, he kohatu utu nui, he rakau, he tarutaru, he otaota,

13 E whakakitea te mahi a tetahi, a tetahi: ma te ra hoki e whakaatu, ma te kapura hoki e hura; a ka whakama- tautauria e te kapura te mahi a tetahi, a tetahi, tona pehea- tanga.

14 Ki te mau tonu ta tetahi mahi e hanga ai ki runga, e riro he utu i a ia.

15 Ki te wera te mahi a tetahi, ka maumauria tana: heoi e ora ano ia, otira me te mea i roto i te ahi.

16 ¶ Kahore oti koutou i mātau, he whare koutou no te Atua; kei roto hoki i a koutou te Wairua o te Atua e noho ana?

17 Ki te hē i tetahi te whare o te Atua, ka hē ano ia i te Atua; e tapu ana hoki te whare o te Atua, ko taua whare nei ano koutou.

18 ¶ Kei tinihanga tetahi ki a ia ano. Ki te mea tetahi o koutou he tangata whaka- aro ia no tenei ao, me whaka- tupu kuare ia kia whai wha- kaaro ai.

19 Ki te Atua hoki he mea kuare nga whakaaro mohio o tenei ao: kua oti hoki te tuhi-

I. KORINITI 3, 4.

tuhi, Ka mau i a ia te hunga whakaaro i runga i to ratou tinihanga.

20 Me tenei hoki, E mātau ana te Ariki ki nga whakaaro o te hunga whakaaro, he teka-teka noa.

21 Na kei whakamanamana tetahi ki te tāngata: na koutou hoki nga mea katoa;

22 Paora, Aporo, Kipa, te ao, te ora, te mate, nga mea onaianei, nga mea e takoto mai nei, na koutou katoa;

23 No te Karaiti hoki koutou; no te Atua ano a te Karaiti.

UPOKO 4.

He kai mahi a Paora ma.

6 Kei whakamua kautia.

8 Kei te ora nga Koriniti;

9 kei te whakahengia a Paora ma. 14 He matua ano ia no ratou.

TE tikanga mo ta te tāngata whakaaro ki a matou koia tenei, he kai mahi na te Karaiti, he tuari hoki no nga mea ngaro a te Atua.

2 Na, to nga tuari e mate-nuitia ana, koia tenei, kia kitea tetahi e pono ana.

3 Ki a au ia, he mea nohi-nohi rawa ta koutou kupu moku, ta te tangata kupu ranei moku; kahore nei hoki aku kupu moku ano:

4 Kahore ano kia mau noa i a au tetahi aha aku; heoi e kore tenei e ai hei whakatika moku: te kai whakapuaki kupu hoki moku, ko te Ariki.

5 Na kua e whakawakia wawetia tetahi mea, kia tae mai ra ano te Ariki, a māna

e whakamarama nga mea huna o te pouri, e whakakite hoki nga whakaaro o nga ngakau: ko reira whakamomititia ai tetahi, tetahi, e te Atua.

6 ¶ He mea whakariro kē hoki enei naku, e oku tēina, ki a maua ko Aporo, he whakaaro ki a koutou; kia ai maua hei whakaako i a koutou kia kua te whakaaro e neke ki runga ake i te mea kua oti te tuhituhi, kia kua koutou e whakapehapeha, e hapai ake i tetahi ki runga ake i tetahi.

7 Na wai hoki koe i rere kē ai? ko tehea mea hoki āu ehara i te mea homai ki a koe? Na, he mea i homai nei ki a koe, he aha koe ka whakamanamana ai, me te mea ehara i te mea homai?

8 Kua makona na koutou, kua hua o koutou taonga, i a matou ka motu kē mai nei, e kingi ana koutou: koia ano te pai me i kingi tonu koutou, kia kingi tahi ai tatou.

9 Ki taku whakaaro hoki kua waiho matou, nga apotoro, e te Atua mo muri rawa, ano he hunga mo te mate: kua meinga hoki matou hei matakitakinga ma te ao, ma nga anahera, ma nga tāngata.

10 Ko matou he kuare mo ta te Karaiti, ko koutou ia he hunga whai whakaaro i roto i a te Karaiti; ko matou he ngoikore, ko koutou ia he hunga kaha; to koutou he kororia, to matou ia he honore-kore.

I. KORINITI 4, 5.

11 Tutuki tonu mai ki tenei wa nei ano to matou matenga i te kai, i te wai, kahore o matou kakahu; e kurua ana, kahore hoki o matou kāinga tumau;

12 E mauui ana matou, ko o matou ringa hei mahi: e taunutia ana, manaaki tonu matou; e whakatoia ana, whakaririka kau ana matou:

13 Ka korerotia kinotia, ka whakamarie atu matou: kua meinga matou kia rite ki te paru tahinga o te ao, ki te para o nga mea katoa, taea noatia tenei ra.

14 ¶ Kihai ahau i tuhituhi i enei mea kia whakama ai koutou, engari he whakatu-pato tenei naku i a koutou, ara i aku tamariki aroha.

15 No te mea ahakoa ka te-kau mano o koutou kai whakaako i roto i a te Karaiti, heoi kahore e tokomaha nga mātua; he whanau hoki koutou naku, i roto i a Karaiti Ihu i runga i te rongo pai.

16 Koia ahau ka tohe nei ki a koutou, kia rite ta koutou ki taku.

17 Koia ka tonoa nei e au ki a koutou a Timoti, taku tama aroha, *tama* pono i roto i te Ariki, māna koutou e whakamahara ki oku ara i roto i a te Karaiti, ki taku e whakaako nei i nga wahi katoa i roto i nga hahi katoa.

18 Na e whakapehapeha ana etahi, e mea ana, e kore au e haere ki a koutou.

19 Otira meake au haere ki a koutou, ki te pai te Ariki;

a ehara i te kupu, engari ko te kaha o te hunga e whakapehapeha ana, taku e titiro ai.

20 No te mea ehara te rangatiratanga o te Atua i te kupu, engari he kaha.

21 Ko tehea ta koutou e pai ai? kia haere ahau ki a koutou me te whiu, me te aroha ranei, me te wairua māhaki?

UPOKO 5.

Te tangata moe he, 5 peia.

7 Te he, peratia me te re-wena. 9 Kia tapatahi.

KUA pakū noa atu te rongo, he puremu kei roto i a koutou, he puremu ano ia kahore nei e whakahuatia i roto i nga tauwi, ara kua riro i tetahi te wahine a tona pāpā.

2 A e whakapehapeha ana koutou, tē pouri koutou, tē mea kia tangohia i roto i a koutou te tangata nana tenei mahi.

3 Ko ahau ia, ahakoa kei tawhiti toku tinana, kei kona ano toku wairua, a kua whakahē noa ake i te kai mahi o tenei mea, me te mea kei kona ano ahau;

4 Me huihui koutou me toku wairua ano, i runga i te ingoa o to tatou Ariki, o Ihu Karaiti, i runga i te kaha o to tatou Ariki, o Ihu Karaiti,

5 Ka tuku ai i taua tu tangata ki a Hatana, hei whakangaro mo te kikokiko, kia ora ai te wairua i te ra o te Ariki, o Ihu.

6 Kahore e pai ta koutou

I. KORINITI 5, 6.

whakapehapeha. Kahore koutou e mātau, he iti nei te re-wena, rewenatia ake te pura-nga katoa?

7 Na, tahia ki waho te re-wena tawhito, a hei puranga hou koutou, me koutou hoki e rewenā-kore na. Kua patua hoki mo tatou a te Karaiti, ta tatou kapenga:

8 Na kia kai tatou i te ha-kari, auaka te rewenā tawhito, auaka ano te rewenā o te mauāhara, o te kino, engari hei te rewenā-kore, ara, hei te tinihanga-kore, hei te pono.

9 ¶ I tuhituhi atu nei ahau ki a koutou i roto i te puka-puka, kia kaua e whakahoa ki nga tāngata puremu:

10 Ehara ia i te mea rawa mo te hunga puremu o tenei ao, mo te hunga apo, hao taonga, karakia whakapakoko; penei me haere atu koutou i roto i te ao.

11 Na ka tuhituhi atu nei ano ahau ki a koutou, kia kaua e whakahoa, ki te mea he tangata puremu tetahi e karangatia ana he teina, he apo ranei, e karakia ana ranei ki te whakapakoko, he taunu ranei, he whakahaurangi ranei i a ia, he hao taonga ranei; kaua rawa koutou ko taua tu tangata e kai tahi.

12 Hei aha ra maku te whakawa i era ano o waho? e kore koia koutou e whakawa i te hunga o roto?

13 Te hunga ia o waho ma te Atua ratou e whakawa. Na, motuhia atu taua tangata kino i roto i a koutou.

UPOKO 6.

Ta ratou mahi whakawa i nga hoa. 9 Kua rere ke nei hoki he mahi ma ratou inaianei. 12 Kia poke kore.

KI te mea he totohe ta tetahi o koutou ki tetahi, e whai ngakau ranei ia ki te whakawa ki te aroaro o te hunga hē, a kauaka ki te aroaro o te hunga tapu?

2 Kahore oti koutou i mātau ma te hunga tapu e whakawa te ao? a ki te riro ma koutou e whakawa te ao, e kore ranei koutou e tau hei whakarite i nga mea iti rawa?

3 Kahore koutou i mātau ko tatou hei whakarite whakawa mo nga anahera? a kauaka oti nga mea o tenei ao?

4 Ki te mea he whakawakanga a koutou ki nga mea o tenei ao, whakanohoia te hunga ingoa iti o te hahi hei whakarite.

5 Tenei korero aku he mea kia whakama ai koutou. Koia ranei, kahore rawa kia kotahi he tangata whakaaro i roto i a koutou, hei whakarite ina whakawa ona tēina i a raua?

6 Heoi kei te whakawa te tuakana i te teina, i te aroaro ano hoki o te hunga whakapono-kore?

7 Na, hē rawa ta koutou na, ara ta koutou whakawa i tetahi, i tetahi. He aha tē whakaririka kau ai ina ahatia koutou? he aha hoki tē tangohia noatia atu ai a koutou mea?

8 Heoi e mahi hē ana kou-

I. KORINITI 6, 7.

tou, e tango ana i ta tera, a he tuakana ano koutou he teina.

9 Kahore oti koutou e mātau, e kore te hunga whakahacre hē e whiwhi ki te rangatiratanga o te Atua. Kei tinihangatia koutou; e kore te hunga moepuku, e kore te hunga karakia whakapakoko, e kore te hunga puremu, e kore te hunga whakawahine te hunga ranei e mea ana i te tāne hei wahine,

10 E kore te hunga tahae, e kore te hunga apo, e kore te hunga whakahaurangi i a ratou, e kore te hunga taunu, e kore te hunga hao taonga, e whiwhi ki te rangatiratanga o te Atua.

11 He pera ano etahi o koutou i mua: otira kua horoia koutou, kua whakatapua, kua whakatikaia i runga i te ingoa o te Ariki, o Ihu, he meatanga hoki na te Wairua o to tatou Atua.

12 ¶ Tika tonu nga mea katoa maku, otira e kore e pai nga mea katoa: tika tonu nga mea katoa maku, otira e kore e waiho e au tetahi mea hei rangatira moku.

13 Ko nga kai ma te kopu, a ko te kopu mo nga kai: heoi ka ngaro tenei i te Atua me era ano hoki. Na ehara rawa te tinana hei mea mo te moepuku, engari ma te Ariki, a ko te Ariki, *hei Ariki* mo te tinana.

14 Na, na te Atua i ara ai te Ariki, waihoki māna tatou ka ara ai, ara ma tona kaha.

15 Kahore oti koutou i mātau, he wahi no te Karaiti o koutou tinana? kia tangohia koia e ahau nga wahi o te Karaiti, a waiho iho hei wahi mo te wahine puremu? Kahore rapea!

16 Kahore koutou i mātau, ki te honoa tetahi ki te wahine puremu, kotahi ano te tinana? e ki ana hoki ia, Hei kikokiko kotahi raua tokorua.

17 Otiia ki te honoa tetahi ki te Ariki, kotahi tonu te wairua.

18 Rere atu ra i te moepuku. No waho o te tinana nga hara katoa e hara ai te tangata; te tangata ia e puremu ana, e hara ana ia ki tona ake tinana.

19 Kahore koutou i mātau, he whare to koutou tinana no te Wairua Tapu i roto na i a koutou, i homai nei e te Atua, a ehara i te mea no koutou ake koutou?

20 Kua oti hoki koutou te hoko ki te utu: na, whakakororiatia te Atua ki o koutou tinana, ki o koutou wairua; na te Atua hoki ena.

UPOKO 7.

Mo te marena. 8 Mau o taua here. 17 Kati ano i tau na. 25 Mo te takau, mo te marena.

NA, nga mea i tuhituhi mai ra koutou ki a au: he mea pai ano mo te tangata kia kua e pa ki te wahine.

2 Otiia me whakaaro kei puremu, a kia rite ma te tāne ko tana wahine ake, ma te wahine ano ko tana tāne ake.

I. KORINITI 7.

3 Kia puta ta te tâne whakaaro pai ki te wahine, hei te mea e tika ana: ta te wahine ano ki te tâne.

4 Ehara te wahine i te rangatira o tona tinana ake, engari te tâne: me te tâne ano, ehara ia i te rangatira o tona ake tinana, engari te wahine.

5 Kaua e kaiponuhia ta tetahi, ta tetahi; ki te kore e rite te whakaae a tetahi, a tetahi, mo tetahi wa, kia atea ai korua ki te noho puku, ki te inoi; ka hoki mai ai ano ki a korua, kei ai to korua hiahia taikaha hei whakawainga ma Hatana i a korua.

6 Otira he mea whakaae noa tenei korero aku, ehara i te tikanga whakatakoto.

7 Taku hoki i pai ai, kia penei nga tangata katoa me ahau nei. Otira e hoatu ana e te Atua ki ia tangata, ki ia tangata, te mea mona ake, ki tetahi ko tenei, ki tetahi ko tera.

8 ¶ Na, ko taku kupu tenei ki nga takakau, ki nga wahine pouaru, He mea pai mo ratou kia kati tonu me au nei.

9 Otira ki te kore e taea te whakamanawanui, me marena: he pai hoki te marena, he kino ia te ka o te ngakau.

10 Ko taku whakahau ia tenei ki te hunga whai hoa, ehara i a au, engari na te Ariki, Aua te wahine e mawehe i tana tâne:

11 A, ki te mawehe ia, me noho hoa-kore, me hohou ranei te rongo ki tana tâne:

kaua ano te tâne e whakarere i tana wahine.

12 Na, ki era atu naku tenei kupu, ehara i te Ariki: Ki te mea he wahine whakaponokore ta tetahi o nga tēina, a ka whakaae taua wahine kia noho tahi raua, kaua ia e whakarerea.

13 Ki te mea hoki he tâne whakaponokore ta tetahi wahine, a ka whakaae kia noho tahi raua, kaua ia e whakarerea.

14 No te mea e whakatapua ana te tâne whakaponokore e te wahine, e whakatapua ana hoki te wahine whakaponokore e te tâne: me he kahore, he poke a korua tamariki; tena ko tenei he tapu.

15 Ki te mawehe ia te whakaponokore, māna e mawehe. E kore tetahi tēina, tuahine ranei, e mau i nga mea penei: otira kua karangatia tatou e te Atua ki te rangimarie.

16 I mohiotia hoki e koe ki te aha, e tai, e kore e ora i a koe tau tâne? i mohiotia hoki e koe ki te aha, e te tâne, e kore e ora i a koe tau wahine?

17 Heoi kia rite te haere ki ta te Atua i tuwha ai ki tetahi, ki tetahi, ki ta te Ariki karangatanga i tetahi, i tetahi. Ko taku hoki tenei e whakatakoto nei i roto i nga hahi katoa.

18 He mea kokoti tetahi i tona karangatanga ai? kaua e whakakahoretia tona kotinga. He mea kokoti-kore te-

I. KORINITI 7.

tahi i tona karangatanga ai? kua ia e kotia.

19 He mea kore noa iho te kotinga, he mea kore noa iho ano te kotinga-kore, engari te pupuri i a te Atua ture.

20 Te mahi a tetahi, a tetahi, i tona karangatanga ai, kia mau tonu ia ki tena.

21 He pononga koe i tou karangatanga ai? kua e manukanuka: otira ki te watea he haerenga noatanga atu mou, tena ra.

22 He pononga tetahi i tona karangatanga ai i roto i te Ariki, he tangata tuku noa ia na te Ariki: a ki te mea ehara i te pononga i tona karangatanga ai, he pononga ano ia na te Karaiti.

23 Kua oti koutou te hoko ki te utu; aua e meinga hei pononga ma te tangata.

24 E *oku* tēina, te *mahi* a tenei, a tenei, i tona karangatanga ai, kia mau ia ki tena, me te whakaaro ano ki te Atua.

25 ¶ Na, nga wahina, kahore a te Ariki tikanga ki a au; tenei ia toku whakaaro, ara to te tangata i a ia nei ta te Ariki atawhai, i pono ai.

26 Ki toku whakaaro hoki, he pai tenei mo te whakararu o tenei wa, ara e pai ana kia kati tonu te tangata.

27 Kua herea koe ki te wahine? kua e whai kia wete-kia. Ka oti koe te wewete mai i te wahine? kua e whaia he wahine.

28 Otiia ki te marena ano koe, kahore ou hara; ki te

marena ano hoki te wahina, kahore ona hara. Otiia e pa mai te whakararu i te kiko-kiko ki taua hunga pena: heoi me ata hanga ahau ki a koutou.

29 Tenei ia taku korero, e *oku* tēina, e tutata ana te wa: heoi inaianei kia rite te hunga whai wahine ki te hunga kahore nei a ratou;

30 Me te hunga e tangi ana, ki te hunga kahore nei e tangi; me te hunga e hari ana, ki te hunga kahore nei e hari; me te hunga e hoko ana, ki te hunga rawakore;

31 Me te hunga i a ratou tenei ao, ki te hunga kahore nei e he ta ratou *ki te ao*: e memeha haere ana hoki te ahua o tenei ao.

32 Na e mea ana tenei au kia kua koutou e manukanuka. Ta te takakau e manukanuka ai, ko nga mea a te Ariki, me pehea tana whakamanawareka ki te Ariki:

33 He tangata whai hoa, ko nga mea o te ao tana e manukanuka ai, me pehea tana whakamanawareka ki tana wahine.

34 Takoto kē ana ta te wahine whai hoa, takoto kē ana ta te wahina. He wahine takakau, tana e manukanuka ai, ko nga mea a te Ariki, kia tapu ai te tinana, te wairua: he wahine whai hoa, tana e manukanuka ai, ko nga mea o te ao, me pehea tana whakamanawareka ki tana tāne.

35 Tenei korero aku he mea kia hua ai he pai mo koutou ake; ehara i te mea kia ma-

I. KORINITI 7, 8.

hangatia ai koutou, engari kia ahua pai ai te mahi, kia u ai *koutou* ki te Ariki, kia kaua e kumea kētia.

36 Na, ki te mea tetahi e hē ana tana tikanga ki tana wahina, ki te pahika ke i tona kaumātuatanga, a kei tena te tikanga, māna e mea tana e pai ai, kahore ona hara: kia marenatia raua.

37 Ki te u tonu ia te ngakau o tetahi, a kahore he mea hei turaki i tana, a kei a ia ake ano te tikanga mo tana e pai ai, kua oti ano hoki tenei te whakatakoto e tona ngakau kia waiho tana hei wahina, e pai ana ano tana mahi.

38 Na e pai ana te mahi a te tangata e tuku ana kia marenatia; pai ake ia te mahi a te tangata kahore e tuku kia marenatia.

39 E mau ana te wahine i te ture i te oranga o tana tāne; ki te mate ia te tāne, kua atea; e marenatia ano ia ki tana e pai ai; otira i roto i te Ariki.

40 Ki toku whakaaro ia, nui atu tona koa ki te kāti tonu ia: na, ki taku ki, kei a au ano hoki te Wairua o te Atua.

UPOKO 8.

Nga kai i whakaherea ma te whakapakoko. 8 Kia whai whakaaro ki nga ngoikore.

11 Ahakoa kuare ratou, me aroha.

NA, nga mea e patua ana ma nga whakapakoko, e mohio ana tatou kei a tatou katoa te matauranga. Ta te matauranga he whakapupuhi;

ta te aroha ia ko te hanga i te whare.

2 Ki te mea tetahi e mātau ana ia ki tetahi mea, kahore tona matauranga ki tetahi mea kia rite noa ki te tikanga o te matauranga.

3 Ki te aroha ia tetahi ki te Atua, kua matauria tenei e ia.

4 Na, te kai i nga mea e patua ana ma nga whakapakoko, e mahara ana tatou he kore noa iho te whakapakoko i te ao, kahore hoki he Atua kē, kotahi anake.

5 Ahakoa hoki *he mea enei* e karangatia nei he atua, i te rangi ranei, i te whenua ranei, (he tini nei hoki nga atua, he tini nga ariki;)

6 Ki a tatou ia, kotahi ano Atua, ko te Matua, ko te take ia o nga mea katoa, a e ahu ana tatou ki a ia; kotahi hoki Ariki, ko Ihu Karaiti, nāna nei nga mea katoa, nāna hoki tatou.

7 Otira kahore o te katoa matauranga: ki ta etahi hoki, he mea i patua ma te whakapakoko ta ratou e kai nei, me te whakaaro ano ki te whakapakoko, a taea noatia tenei wa; a poke iho to ratou hine-ngaro i kaha-kore nei.

8 Ehara raia te kai i te mea e paingia ai tatou e te Atua: no te mea ahakoa kai tatou, e kore e kake to tatou pai; ahakoa kahore e kai, e kore e iti to tatou pai.

9 Engari kia tupato ki tenei wahi i tukua ki a koutou, kei ai hei whakahinga mo te hunga ngoikore.

10 Ki te mea hoki ka kite

I. KORINITI 8, 9.

tetahi i a koe, i te mea mohio, e noho ana ki te kai i roto i te temepara o te whakapakoko, e kore koia e neke ake tona hinengaro, ara, to te mea ngoikore, ki te kai i nga mea e patua ana ma te whakapakoko?

11 Na, ma tou matauranga ka ngaro ai te teina ngoikore, he whakaaro nei ki a ia i mate ai a te Karaiti.

12 Na, ki te penei to koutou hara ki nga teina, ta koutou patu i to ratou hinengaro ngoikore, e hara ana koutou ki a te Karaiti.

13 Mo konei, ki te hē toku teina i te kai, e kore rawa ahau e kai kikokiko ake tonu atu, kei hē i a au toku teina.

UPOKO 9.

Tana mahi utu kore, nana ake.

7 Kei te Rongo pai hoki he kai mate minita. 15 Tana ia he ata hanga ki a ratou; 24 he pehi hoki i ona hiahia.

HE teka ianei he apotoro ahau? he teka ianei kei a au ano nga tikanga moku? kihai ianei ahau i kite i a Ihu Karaiti, i to tatou Ariki? ehara oti koutou i taku mahi i roto i te Ariki?

2 Ahakoa ehara ahau i te apotoro ki era atu, he apotoro ano ia ahau ki a koutou: ko koutou hoki te hiri o toku apotorotanga i roto i te Ariki.

3 Ko taku utu tenei ki oku kai ui;

4 He teka ianei kei a matou te tikanga mo te kai, mo te inu?

5 He teka ianei kei a matou te tikanga mo te whakahaereere i te tuahine, ara, i te hoa wahine, mo te pera me era apotoro, me nga teina o te Ariki, ratou ko Kipa?

6 Ko maua anake ranei ko Panapa, kahore ranei i a maua te tikanga kia kaua e mahi?

7 Ko wai ka haere hei hoia, a nāna ake ano nga utu mona? ko wai e whakato ana i te māra waina, a kahore he hua o reira e kainga e ia? ko wai hoki e whangai ana i te kahui, a kahore e kai i te waiū o te kahui?

8 No te tikanga tangata ranei enei kupu aku? a ehara ranei i te ture enei korero?

9 Kua oti hoki te tuhituhi i roto i te ture a Mohi, Kaua e whakamōkātia te mangai o te kau patu witi. Ko nga kau koia ta te Atua i whakaaro ai?

10 Mo tatou ranei te tino tikanga o ana korero? He whakaaro ra ki a tatou i tuhi-tuhia ai: he tika hoki kia parau te kai parau i runga i te tumanako; a, te tangata e patu witi ana, hei runga ano i te tumanako ki tetahi wahi mana.

11 Kua ruia e matou nga mea wairua ma koutou, he mea nui ianei ki te kotia e matou a koutou mea o te kikokiko?

12 Kua uru nei etahi atu ki tenei tikanga a koutou, a kauaka ranei matou? Otiia kihai matou i mea ki tenei tikanga; engari e whakamanawanui ana ki nga mea katoa, kei ai ta matou hei

arai mo te rongo pai o te Karaiti.

13 Kahore oti koutou i mātau, na, te hunga e mahi ana i nga mea tapu, e kai ana i *nga mea* o te temepara? *me* nga kai tiaki o te āta, ma ratou ano tetahi wahi o to te āta?

14 Pera tonu ano ta te Ariki i whakarite ai mo nga kai kauwhau o te rongo pai, hei runga i te rongo pai he oranga mo ratou.

15 ¶ Na kihai ahau i mea ki tetahi o enei mea: kahore hoki ahau i tuhituhi i enei mea kia pena mai ano ki a au: ki a au hoki he pai te mate, engaritaku whakamanamana, kua tetahi e whakakahore i tena.

16 No te mea ahakoa kauwhau ahau i te rongo pai, kahore maku whakamanamana: kua takoto hoki tenei hei mahi maku; he aue ano maku ki te kore ahau e kauwhau i te rongo pai.

17 Ki te whai ngakau hoki ahau ki tenei mahi, he utu toku: a, ki te kore he ngakau, he mahi tuari *tenei* kua tukua ki a au.

18 Na, he aha koia te utu moku? ara ka meinga e ahau kia kore e utua te rongo pai o te Karaiti ina kauwhautia e ahau; kei hē i a au nga tikanga o te rongo pai kua tukua ki a au.

19 Ehara ahau i te pononga na tetahi, heoi kua waiho ahau e ahau ano hei pononga ma te katoa, kia tokomaha atu ai e riro mai i a au.

20 Na, whaka-Hurai ana ahau ki nga Hurai, kia riro ai i a au nga Hurai; me te mea i raro *ahau* i te ture ki te hunga i raro i te ture, kia riro ai i a au te hunga i raro i te ture;

21 Me he tangata ture-kore *ahau* ki te hunga ture-kore, (ehara i te mea he ture-kore ki te Atua, he ture nei hoki ta te Karaiti ki a au,) kia riro ai i a au te hunga ture-kore.

22 Me he ngoikore ahau ki te hunga ngoikore, kia riro ai i a au te hunga ngoikore; meinga ana ahau hei mea katoa ki te katoa, kia pau rawa ai taku hei whakaora i etahi.

23 I meinga ai tenei e ahau he whakaaro ki te rongo pai, kia whiwhi tahi ai tatou ki tona pai.

24 ¶ Kahore oti koutou i mātau ki te hunga e oma whakataetae ana, e oma katoa ana ratou, kotahi ano ia mona te utu whakahonore? Kia tika to koutou oma, kia whiwhi ai koutou.

25 A, nga tāngata katoa e whakataetae ana, e whakakomaki ana i nga hiahia katoa: ratou, kia whiwhi ai ki te karauna pirau; tatou ia, ki te mea e kore e pirau.

26 Ko ahau nei hoki, kahore i ngaro toku oma; e kuru ana ahau, kahore ia e rite ki te kai patu o te hau:

27 Engari e pēhia ana e ahau toku tinana, a meinga ana hei pononga maku; kei kauwhau pea ahau ki etahi atu, a ko au ka akiritia atu.

I. KORINITI 10.

UPOKO 10.

*Te kapua o mua, me te kama-
ka, hei tohu. 7 Me o ratou
whiunga ano. 14 Kei hui-
huia ta te Ariki ki ta nga
whakapokoko. 23 Kia whai
whakaaro ki nga teina
ngoikore.*

E OKU tēina, e kore ahau
e pai kia kuare koutou,
i raro i te kapua o matou mā-
tua katoa, i haere katoa ano
hoki ra roto i te moana;

2 A iriiria katoatia ana ratou
ki a Mohi, i roto i te kapua, i
roto hoki i te moana;

3 A, te kai i kainga e ratou
katoa, te mea wairua, kotahi
tonu;

4 Te wai ano hoki i inumia
e ratou katoa, te mea wairua,
kotahi tonu; i inu hoki ratou
i ta te mea wairua, ara i ta te
Toka i whai nei i a ratou: a,
taua Toka ra, ko te Karaiti.

5 Otiia kihai te Atua i ahua-
reka ki te nuinga o ratou; i
turakina iho hoki ratou i te
koraha.

6 Na hei tohu enei mea ki
a tatou, kia kaua e hiahia ki
nga mea kino, kei pera me
ratou i hiahia ra.

7 Kaua ano koutou e karakia
ki nga whakapakoko, kei pera
me etahi o ratou; kua oti na
hoki te tuhituhi, I nobo te
iwi ki te kai, ki te inu, a wha-
katika ana ki te takaro.

8 Kaua ano tatou e puremu,
kei pera me etahi o ratou i
puremu, a hinga ana e rua
tekau ma toru nga mano i te
ra kotahi.

9 Kaua ano tatou e whaka-

matautau i a te Karaiti, kei
pera me etahi o ratou i wha-
kamatautau ra, a ngaro ana i
nga nakahi.

10 Kaua hoki koutou e amu-
amu, kei pera me etahi o ra-
tou i amuamu, a ngaro ana i
te kai whakangaro.

11 Na i pa enei mea katoa
ki a ratou hei tohu: a kua
tuhituhia nei hei whakatupato
i a tatou, i te hunga ka tae
nei ki nga whakamutunga o
te ao.

12 Na, te tangata e mea ana
e tu ana ia, kia tupato ia kei
hinga.

13 Kahore ano kia pono ki a
koutou tetahi whakamatau-
tauranga e rere ke ana i to
te tangata: a e pono ana te
Atua, e kore nei e tuku kia
nui ake i to koutou kaha
te whakamatautauranga mo
koutou; a ki te whakamatau-
tauria koutou, ka meatia e ia
he putanga, kia u ake ai kou-
tou.

14 ¶ Na, e oku *hoa* aroha,
rere atu i te karakia whaka-
pakoko.

15 Taku korero nei, he mea
ki te hunga mahara; whaka-
aroa taku e mea nei.

16 Te kapa whakapainga e
whakapai nei tatou, ehara
koia i te inumanga tahitanga
i te toto o te Karaiti? te taro
e whatiwhatiia nei e tatou,
ehara ianei i te kainga tahi-
tanga i te tinana o te Ka-
raitī?

17 No te mea kotahi ano
taro, kotahi ano tinana tatou
tokomaha; kotahi tonu nei

I. KORINITI 10, 11.

hoki taua taro e kainga nei e tatou katoa.

18 Whakaaroa a Iharaira o te kikokiko: he teka ianei ko te hunga e kai ana i nga patu-nga tapu, e uru tahi ana ki to te āta?

19 Na, he pehea ra taku korero? he tikanga mea ranei te whakapakoko? he tikanga mea ranei te mea e patua ana ma te whakapakoko?

20 Na, nga mea e patua ana e nga tauwi, e patua ana ma nga rewera, he teka ma te Atua: a e kore ahau e pai kia uru tahi koutou ko nga rewera.

21 E kore koutou e ahei te inu i te kapa a te Ariki, me te kapa ano a nga rewera: e kore koutou e ahei te kai i to te Ariki tepu, i to nga rewera tepu hoki.

22 E mea ana ranei tatou kia hae mai te Ariki? e kaha koia tatou i a ia?

23 ¶ E tika ana nga mea katoa maku, otira e kore e pai katoa: e tika ana nga mea katoa maku, otira e kore te whare e hangā e nga mea katoa.

24 Kaua tetahi e rapu ki tana ake, engari *me rapu* katoa i ta tera, i ta tera.

25 Kainga nga mea katoa e hokoa ana i te makete, kaua e uiui, *kei hē* te hinengaro:

26 Na te Ariki hoki te whenua, me ona tini mea.

27 Na, ki te karangatia koutou e tetahi o te hunga whakaponono kore, a e pai ana kia haere; kainga nga mea katoa

e whakatakotoria ana ki to koutou aroaro, kaua e uiui, *kei hē* te hinengaro.

28 Ki te mea ia tetahi ki a koutou, I patua tenei ma te whakapakoko, aua e kai, me whakaaro ki te kai whakaatu, ki te hinengaro hoki: na te Ariki hoki te whenua, me ona tini mea:

29 I a au i mea nei, Ki te hinengaro, ehara i te mea nou, engari no tera: he aha hoki toku here-kore-tanga i whakahengia ai e to tera hinengaro?

30 Ki te mea hoki na te aroha noa ahau i kai ai, he aha ahau i korerotia kinotia ai mo te mea i whakawhetai ai ahau?

31 Na, ahakoa kai, ahakoa inu, aha ranei, meinga katoatia hei whakakororia mo te Atua.

32 Kei waiho koutou hei tūtukitanga waewae ki nga Hurai, ki nga Kariki, ki te hahi ranei a te Atua:

33 Kia penei me au e whakamanawareka nei i te katoa i nga mea katoa, i ahau kahore nei e rapu i te pai moku ake, engari i to te tokomaha, kia ora ai ratou.

UPOKO 11.

Mo te hipoki ina karakia.

17 *He o o ratou huihui, 21 i te mea e kai ana i te Hapa.*

23 *Ta te Karaiti mo te Hapa.*

KIA rite ta koutou ki taku, me taku nei ka rite ki ta te Karaiti.

I. KORINITI 11.

2 ¶ Na e whakamoemiti ana ahau ki a koutou, e *oku* tēina, mo koutou ka mahara ki a au i nga mea katoa, ka pupuri ano i nga whakarerenga iho, i aku i tuku atu ra ki a koutou.

3 E mea ana ahau kia mātau koutou, ko te Karaiti te upoko o nga tāne katoa; ko te tāne te upoko o te wahine; a ko te Atua te upoko o te Karaiti.

4 Te tangata e inoi ana, e poropiti ana ranei, me te hipoki ano te upoko, e whakaiti ana ia i tona upoko.

5 Me te wahine e inoi ana, e poropiti ana ranei, a kahore he hipoki o te upoko, e whakaiti ana ia i tona upoko: e rite ana hoki ki *te upoko* kua oti te heu.

6 Ki te kahore hoki te wahine e hipokina, kia waruhia hoki ia: ki te mea ia he mea whakama ki te wahine kia waruhia, kia heua ranei, me hipoki.

7 E kore hoki e tika mo te tāne kia hipokina tona upoko, ko te ahua hoki ia me te kororia o te Atua: ko te wahine ia te kororia o te tāne.

8 Ehara hoki i te mea no te wahine te tāne, engari no te tāne te wahine;

9 Kihai ano te tāne i hangā ma te wahine, engari ko te wahine ma te tāne.

10 Koia i tika ai hei runga i te upoko o te wahine *te tohu* o te mana, he mea mo nga anahera.

11 Ahakoa ra e kore te tāne e motuhia mai i te wahine, e kore ano te wahine e motuhia

mai i te tāne, i roto i te Ariki.

12 No roto hoki i te tāne te wahine, waihoki i na te wahine mai te tāne: na te Atua ano ia nga mea katoa.

13 Ma koutou ake ano e whakaaro: he mea tika ranei kia inoi hipoki-kore te wahine ki te Atua?

14 E kore ranei te whakaaro maori nei ano e ako i a koutou, ki te mea he makawe roroa o te tāne, he mea whakatūtūā ia mona?

15 Tena ki te mea he makawe roroa o te wahine, hei whakakororia ia mona: ina hoki kua hoatu ki a ia te makawe hei hipoki.

16 Otira ki te mea he ahua tohe to tetahi, kahore o matou ritenga pera, kahore hoki o nga hahi a te Atua.

17 ¶ Na, i a au e korero nei i tenei, kahore aku whakamoemiti, kahore hoki koutou e whakamine mo te pai, engari mo te kino.

18 Te tuatahi, i a koutou ka whakamine ki roto ki te hahi, ka rongo ahau he wehewehenga kei roto i a koutou; a e whakaponohia ana e ahau tetahi wahi.

19 Kua takoto hoki kia whai titorehanga koutou, kia kitea ai te hunga e paingia ana i roto i a koutou.

20 Na ka huihui koutou ki te wahi kotahi, ehara i te mea ki te kai i te hapa a te Ariki.

21 I te mea hoki e kai ana, ko tana ake hapa ta tetahi, ta

I. KORINITI 11, 12.

tetahi e tango wawe ai: a e hiakai ana tetahi, e haurangi ana tetahi.

22 Kahore koia o koutou whare e kai ai, e inu ai koutou? e whakahawea ana ranei koutou ki te hahi a te Atua, a e mea ana kia whakama te hunga kahore nei a ratou mea? Kia pehea atu taku kupu ki a koutou? kia whakamoemiti ahau ki a koutou mo tenei mea? e kore ra ahau e whakamoemiti.

23 Kua riro mai hoki i a au ta te Ariki, taku i tuku atu ra ki a koutou, ara, I tangohia te taro e te Ariki, e Ihu, i taua po i tukua ai ia:

24 A ka mutu te whakawhetai, ka whatiia e ia, na ka mea ia, Tangohia, kainga; ko toku tinana tenei ka whatiwhatiia nei mo koutou: meinga tenei hei whakamaharatanga ki a au.

25 Me te kapa ano i te mutunga o te hapa, me tana mea ano, Ko tenei kapa te kawenata hou i runga i oku toto: meinga tenei i nga inumanga katoatanga hei whakamaharatanga ki a au.

26 Inga wa katoa hoki e kai ai koutou i tenei taro, e inu ai i tenei kapa, e whakakitea ana e koutou te matenga o te Ariki, kia tae mai ra ano ia.

27 Mo reira ki te kai hē tetahi i tenei taro, ki te inu hē i te kapa a te Ariki, ka whai hara ia i te tinana, i nga toto o te Ariki.

28 Engari kia uiui te tangata ki a ia ano, ka kai ai i

taua taro, ka inu ai i taua kapa.

29 No te mea ki te kai hē, ki te inu hē tetahi, e kai ana, e inu ana i te whakawakanga mona, tē whakaaro ko te tinana o te Ariki.

30 Na konei hoki he tokomaha i roto i a koutou e ngoikore ana, e mate ana, a he tokomaha ano kua moe.

31 Me i whakawa hoki tatou i a tatou ano, kihai i whakatau te hē ki a tatou.

32 Na, ka whakawakia, he mea whakaako tatou na te Ariki, kei tukua ngatahitia tatou me te ao ki te hē.

33 Heoi, e oku tēina, ka huihui koutou ki te kai, me tatari tetahi ki tetahi

34 A ki te hiakai tetahi, hei roto i tona whare kai ai; kei ai to koutou huihuinga hei take whakawa. Era atu mea hoki, maku e whakatika ina tae atu ahau.

UPOKO 12.

Ahakoia maha nga mahinga, kotahi tonu te tinana, a me whai whakaaro ratou tetahi ki tetahi.

NA kahore ahau e pai, e oku tēina, kia kuare koutou ki nga mea wairua.

2 E mātau ana koutou he tauwi koutou i mua, he mea kahaki ki nga whakapakoko reo kore, me koutou i kaha-kina ra.

3 Koia ahau ka whakakite nei ki a koutou, e kore tetahi tangata, na te Wairua nei o te Atua ana korero, e ki, he mea kanga a Ihu: e kore ano

I. KORINITI 12.

e taea e tetahi te mea ko Ihu te Ariki, ki te kahore te Wairua Tapu.

4 ¶ Na, poka ke nga mea e homai ana, kotahi ano ia Wairua.

5 A poka ke nga minitanga, kotahi ano ia Ariki.

6 Poka ke ano nga mahi; kotahi ano ia Atua hei mahi i nga mea katoa i roto i te katoa.

7 Otira e homai ana ki tetahi, ki tetahi te whakakitenga a te Wairua hei pai.

8 E homai ana hoki ki tetahi e te Wairua te kupu whakaaro; ki tetahi atu te kupu mātau, he mea na taua Wairua ano;

9 A ki tetahi ko te whakapono, na taua Wairua ra ano; ki tetahi atu ko nga mana whakaora, na taua Wairua ano;

10 Ki tetahi atu ko nga mahi merekara; ki tetahi atu ko te mahi poropiti; ki tetahi atu ko te matauranga ki nga wairua; ki tetahi atu ko nga reo ke; ki tetahi atu ko te whakamaoritanga i nga reo:

11 Na, enei mea katoa he mea mahi na taua Wairua kotahi ra ano, ko ia hei tuwha i tana e pai ai ki tetahi, ki tetahi.

12 ¶ Kotahi hoki te tinana, a he tini ona wahi, a nga wahi katoa o taua tinana kotahi, ahakoa tini, kotahi ano tinana; he penei hoki a te Karaiti.

13 Kotahi nei hoki te Wairua i iriiria ai tatou katoa ki roto

ki te tinana kotahi, nga Hurai, nga Kariki, nga herehere, nga rangatira; kotahi tonu te Wairua i whakainumia mai mo tatou katoa.

14 Ehara hoki te tinana i te wahi kotahi, engari he tini.

15 Ki te mea te waewae, He teka no te tinana ahau, ehara hoki ahau i te ringa; ma kona oti ka whakakahoretia ai hei wahi mo te tinana?

16 Ki te mea te taringa, He teka no te tinana ahau, ehara hoki ahau i te kanohi; he teka koia no te tinana ia?

17 Me he mea he kanohi te tinana katoa, kei hea te wahi hei whakarongo? Me he mea he whakarongo ta te katoa, kei hea te wahi hei hongī?

18 Ko tenei, kua oti i te Atua te whakanoho tenei wahi, tenei wahi ki roto ki te tinana, āna hoki i pai ai.

19 A me he mea kotahi ano wahi ratou katoa, kei hea te tinana?

20 Ko tenei, he tini nga wahi, kotahi ano ia tinana.

21 A e kore te kanohi e ahei te mea ki te ringa, Kahore aku mahi māu: te mahunga ranei ki nga waewae, Kahore aku mahi ma korua.

22 Engari, nga wahi o te tinana e kiia ana he ngoikore, nui rawa te mahi ma era:

23 A, nga wahi o te tinana e kiia ana e tatou he iti te honore, nui atu te honore e meatia iho ana e tatou ki era; a nui atu te ataahua ki o tatou wahi ataahua-kore.

24 O tatou wahi ataahua hoki kahore he aha e meatia ai;

I. KORINITI 12, 13.

heoi he mea huihui marire na te Atua *nga wahi* o te tinana, he mea whakarite marie, nui atu hoki te honore i hoatu e ia ki te *wahi* i hapa:

25 Kei wehewehea te tinana; engari kia kotahi tonu te whakaaro o nga wahi mo tetahi, mo tetahi.

26 Ki te mamae tetahi wahi, mamae tahi ana nga wahi katoa; a ka whakahonoretia tetahi wahi, hari tahi ana nga wahi katoa.

27 Na, ko koutou te tinana o te Karaiti, he wahi ano nona tenei, tenei.

28 Kua whakanohoia ano e te Atua etahi i roto i te hahi; nga apotoro ki mua; tuarua ko nga poropiti; tuatoru ko nga kai whakaako; muri iho ko nga merekara; me i reira ko nga mana whakaora, ko nga hoa mahi, ko nga kai whakahaere tikanga, ko nga reo ke.

29 He apotoro oti katoa? he poropiti oti katoa? he kai whakaako oti katoa? he *kai mahi* merekara oti katoa?

30 Kei te katoa oti nga mana whakaora? he reo ke oti o te katoa hei korero? he kai whakamaori oti katoa?

31 Na whaia nga homaitanga papai rawa: tenei ano te ara tino pai rawa te whakaturia nei e ahau ki a koutou.

UPOKO 13.

Nui ake te aroha i te katoa.

4 *Tikanga o te aroha.* 8
Tona mau.

AHAKOA korero noa ahau i nga reo o nga tangata,

o nga anahera, ki te kahore oku aroha, ka rite ahau ki te parahi tangi, ki te himipora tatangi.

2 Ahakoa kei a au te mahi poropiti, a kitea ana e ahau nga mea ngaro katoa, me te matauranga katoa, a ahakoa kei a au katoa te whakapono, e taea ai te whakaneke i nga maunga, ki te kahore oku aroha, ehara rawa ahau.

3 Ahakoa ka hoatu e ahau oku taonga katoa hei whangai i te *hunga rawakore*, ahakoa ka tukua e ahau toku tinana kia tahuna, ki te kahore oku aroha, kahore rawa he pai ki a au.

4 E manawanui ana te aroha, eatawhai ana; e kore te aroha e hae; e kore te aroha e whakaii, e kore e whakapehapeha,

5 Kahore ona tikanga whanoke, e kore e whai ki ana ake, e kore e riri wawe, e kore e whakairi kino;

6 E kore e hari ki te hē, engari ka hari tahi me te pono;

7 E whakamanawanui ana ki nga mea katoa, e whakapono ana ki nga mea katoa, e whakaaro pai ana ki nga mea katoa, e whakaririka kau ana ki nga mea katoa.

8 E kore rawa te aroha e taka: na ahakoa mahi poropiti, e memeha; ahakoa reo ke, e mutu; ahakoa matauranga, e memeha.

9 E mātau ana hoki tatou ko tetahi wahi *anake*, e poropiti ana tatou ko tetahi wahi *anake*;

10 Otira ka tae mai te tino

I. KORINITI 13, 14.

mea, ko reira memeha ai taua wahi.

11 I toku tamarikitanga, i rite aku korero ki ā te tamariki, i rite toku ngakau ki to te tamariki, i rite oku whakaaro ki o te tamariki; toku kaumātuatanga, whakarerea ake e ahau nga mea tamariki.

12 Inaianei hoki he titiro pouriuri to tatou i roto i te whakaata; ko reira ia he kanohi, he kanohi: inaianei e mātau ana ahau ko tetahi wahi *anake*; ko reira ia ahau mohio ai me ahau e mohiotia nei.

13 Na, tenei te mau nei te whakapono, te tumanako, te aroha, enei e toru; te mea nui rawa ia o enei, ko te aroha.

UPOKO 14.

Te poropiti, nui atu i te reo ke. 12 *Ko te hahi ia kia whai pai te tino mea nui.* 26 *He mea hē hoki te whakararuraru.* 34 *Kaua nga wahine e korero i roto i te hahi.*

WHAIHA te aroha; mate-nuitia nga mea wairua, te mea nui rawa ia, kia poropiti koutou.

2 Ki te mea he reo *ke* te korero a tetahi, ehara tana i te korero ki nga tāngata, engari ki te Atua: e kore hoki tetahi e rongu; heoi e korero ana ia, ara te wairua, i nga mea ngaro.

3 Na, te tangata e poropiti ana, tana korero ki nga tā-

ngata hei hanga i te pai, hei whakahauhau, hei whakamarie.

4 He tangata korero reo *ke*, nona ake te pai e hangā ana e ia; ki te poropiti ia tetahi, ko te hahi tana e hanga ai.

5 He pai ki a au me i korero koutou katoa i nga reo *ke*, erangi ia kia poropiti koutou: nui atu hoki te poropiti i te kai korero i nga reo *ke*, ki te kore ia e whakamaori, hei hanga mo te whare, ara, mo te hahi.

6 Na, e *oku* tēina, ki te haere atu ahau ki a koutou me te korero i nga reo *ke*, ma te aha ka whai pai ai koutou i a au, ki te mea ehara taku korero ki a koutou i te whakakite, i te matauranga, i te mahi poropiti, i te whakaako?

7 Me nga mea whakatangi ano kahore nei he ora, ahakoa putorino, ahakoa hāpa, ki te kore e puta ke te tangi, me pehea ka mohiotia ai te rangi o te putorino, o te hāpa ranei?

8 Ki te kahore hoki e mārama te tangi o te tetere, ko wai e takatu ki te whawhai?

9 Waihoki ko koutou, ki te kahore o koutou arero e korero i te kupu mārama, me pehea ka mohiotia ai te mea i korerotia? e korero hoki koutou ki te hau.

10 Tenei pea kei te ao aua reo maha, heoi kahore he reo tikanga-kore.

11 Na, ki te kore e kitea e ahau te tikanga o te reo, hei tau tangata ahau ki te tangata e korero ana; a hei tau ta-

I KORINITI 14.

ngata ki a au taua tangata e korero ana.

12 Me koutou ano, ka mate-nui na ki nga *mea* wairua, me whai kia hira to koutou pai hei hanga i te whare, ara i te hahi.

13 Na, te tangata e korero ana i te reo *ke*, me inoi kia taea e ia te whakamaori.

14 Ki te mea hoki he reo *ke* toku ina inoi, ko toku wairua te inoi ana; ko toku mahara ia e hua kore ana.

15 Me pehea ra? Ka inoi ahau i runga i te wairua, ka inoi ano i runga i te mahara: ka waiata ahau i runga i te wairua, ka waiata ano i runga i te mahara.

16 Me pehea oti te tangata e noho ana i te wahi o te kuare ka mea ai, Amine, ki tau whakawhetainga, ina whakapai atu koe i runga i te wairua? e kore hoki ia e mohio ki tau e korero ai.

17 E pai ana ano tau whakawhetai, otiia e kore to tera pai e hangā.

18 He whakawhetai taku ki toku Atua, no te mea maha atu oku reo e korero ai i o koutou katoa:

19 Ki taku ia, na, taku korero i nga kupu e rima i roto i te hahi i runga i toku mahara, hei ako mo era atu, pai atu i nga kupu kotahi tekau mano o te reo *ke*.

20 ¶ E *oku* tēina, aua o koutou mahara e whakatupu tamariki: he mauāhara ia, me whakatupu tamariki, engari

ko nga mahara me whakatupu kaumātua.

21 Ka oti te tuhituhi i roto i te ture, He tangata reo ke, he ngutu ke hei kai korero maku ki tenei iwi; heoi e kore ratou e rongu ki a au, e ai ta te Ariki.

22 Hei tohu hoki nga reo *ke*, he teka ki te hunga whakapono, engari ki te hunga whakapono-kore: ko te mahi poropiti ia, ehara i te mea ki te hunga whakapono-kore, engari ki te hunga whakapono.

23 Na, ki te huihui te hahi katoa ki te wahi kotahi, a ko te katoa kei te korero i nga reo, na kua tapoko mai te hunga kuare, te hunga whakapono-kore ranei, e kore ranei ratou e mea e haurangi ana koutou?

24 Tena ko tenei ka poropiti katoa, a ka tapoko mai tetahi whakapono-kore, kuare ranei, ka mau tona hē i te katoa, ka whakawakia e te katoa:

25 Ka whakakitea hoki nga mea ngaro o tona ngakau; na ka takoto tapapa ia, ka koropiko ki te Atua, me tana ki ake ano, He pono kei roto i a koutou te Atua.

26 ¶ A e pehea ana tena, e *oku* tēina? Ka huihui koutou, he waiata ta tetahi o koutou, he whakaako ta tetahi, he reo to tetahi, he whakakitenga ta tetahi, he whakamaoritanga ta tetahi. Kia meinga nga mea katoa hei hanga mo te whare.

27 Ki te korero tetahi i te

I. KORINITI 14, 15.

reo *ke*, kia tokorua, kei neke ake i te tokotoru, kia takikotahi ia *ki te korero*; a kia kotahi hei whakamaori.

28 A, ki te kahore he kai whakamaori, kua ia e korero i roto i te hahi; engari me korero ki a ia ake ano, ki te Atua ano hoki.

29 Kia tokorua, kia tokotoru nga poropiti hei korero, a ma etahi e hurihuri.

30 Ki te whakakitea mai ia *tetahi mea* ki tetahi e noho noa ana, kia mutu te korero a to mua.

31 E ahei ano koutou katoa te poropiti takitahi, kia ako ai te katoa, kia whakamarietia ai te katoa.

32 E ngohengohe ana hoki ki nga poropiti nga wairua o nga poropiti.

33 E hara hoki ia i te Atua o te whakararuraru, engari no te rangimarie; e pera ana hoki i roto i nga hahi katoa o te hunga tapu.

34 ¶ Kua a koutou wahine e korero i roto i nga hahi: e kore hoki ratou e tukua kia korero; engari me whakarongo marie, ko ta te ture hoki tena e mea nei.

35 Ki te hiahia hoki ratou ki te ako i tetahi mea, me ui ki o ratou tahu i roto i te whare: he mea whakama hoki kia korero nga wahine i roto i te hahi.

36 I puta mai koia te kupu a te Atua i a koutou? i tae atu ranei ki a koutou anake?

37 ¶ Ki te mea tetahi he poropiti ia, he tangata ranei

i te Wairua, mana e whakaae ki aku e tuhituhi atu nei ki a koutou, he ture na te Ariki.

38 Otira ki te kuare tetahi, kia kuare ano ia.

39 ¶ Na, e *oku* teina, matenuitia te mahi poropiti, kua hoki e riria te korero i nga reo *ke*.

40 Kia ahua pai, kia tika te meatanga o nga mea katoa.

UPOKO 15.

Kua ara a te Karaiti; 12 ka ara ano tatou. 23 Ko ia nei te matamua. 35 Te tinana, ina ara. 50 Te hunga e rokohina oratia ki te ao.

NA, me whakaatu e ahau ki a koutou, e *oku* teina, te rongo pai i kauwhautia e ahau ki a koutou, ta koutou hoki i whakaae na, ta koutou hoki e tu na:

2 Te mea hoki e ora na koutou, ki te u koutou ki te kupu i kauwhau ai ahau ki a koutou, ki te mea ehara to koutou i te whakapono noa.

3 I hoatu na hoki e ahau ki a koutou i te tuatahi te mea i riro mai i a au, ara i mate a te Karaiti mo o tatou hara, i pera me ta nga karaipiture;

4 A i tanumia, i ara ake ano i te toru o nga ra, i pera me ta nga karaipiture.

5 Na ka kitea e Kipa, muri iho e te tekau ma rua:

6 Muri iho ka kitea e etahi hoa, he tokomaha ake i nga rau e rima i te kitenga kotahi; tenei ano kei te ora te

I. KORINITI 15.

ninga o ratou, ko etahi kua moe.

7 Muri iho, ka kitea e Hemi; muri iho, e nga apotoro katoa.

8 A muri rawa iho, ka kitea e ahau ano hoki, ano he tamaiti kokoti tau.

9 Ko te iti rawa hoki ahau o nga apotoro, kahore e tau kia karangatia he apotoro, moku i whakatoi i te hahi a te Atua.

10 Heoi na te aroha noa o te Atua tenei ahua oku: kihai ano tona aroha noa ki a au i maumauria; heoi nui atu taku mahi i ta ratou katoa: ehara ia i te mea naku, engari na te aroha noa o te Atua i mahi tahi me ahau.

11 Na, ahakoa naku, ahakoa na ratou, ko ta matou kauwhau tenei, ko ta koutou ano tenei i whakapono ai.

12 ¶ Na, e kauwhautia nei a te Karaiti, tona aranga ake i te hunga mate, he pehea te kupu a etahi o koutou, kahore he aranga ake o te hunga mate?

13 Ki te kahore hoki he aranga o te hunga mate, kihai ano a te Karaiti i ara.

14 A ki te kahore a te Karaiti i ara, maumau noa ta matou kauwhau, maumau noa to koutou whakapono.

15 A e kitea ano matou he kai whakaatu teka i ta te Atua; no te mea ka whakaturia nei e matou te Atua, tana whakaaranga ake i a te Karaiti: kihai nei i whakaarahia e ia, ki te kahore te hunga mate e ara.

16 Ki te kahore hoki te hunga mate e whakaarahia, kihai ano a te Karaiti i whakaarahia:

17 A ki te kahore a te Karaiti i ara, he mea hanga noa to koutou whakapono; kei roto tonu koutou i o koutou hara.

18 Me te hunga hoki kua moe i roto i a te Karaiti, kua ngaro ratou.

19 Ki te mea kei tenei ao anake he tumanakotanga ma tatou ki a te Karaiti, nui atu te pouri mo tatou i o nga tangata katoa.

20 ¶ Ko tenei kua ara a te Karaiti i te hunga mate, kua waiho hei matāmua mo te hunga kua moe.

21 Na te tangata nei hoki te mate, waihoki na te tangata te aranga o te hunga mate.

22 I roto hoki i a Arama ka mate katoa nga tangata, waihoki i roto i a te Karaiti ka whakaorangia katoatia.

23 Otia tenei, tenei, i tona ake turanga; ko te Karaiti te matāmua; muri iho ko te hunga o te Karaiti a tona haerenga mai.

24 Ko reira te mutunga, ina oti te rangatiratanga te hoatu e ia ki te Atua, ara ki te Matua; ina memeha i a ia nga kawanatanga katoa, nga mana katoa, me te kaha.

25 Kua takoto hoki te tika nga kia kingi ia, kia meinga katoatia ra ano e ia nga hoariri ki raro ki ona waewae.

26 Te hoa-riri whakamutu-

I. KORINITI 15.

nga e whakakahoretia, ko te mate.

27 Ka oti hoki nga mea katoa te pēhi e ia ki raro ki ona waewae. Otira i te kiangane, Ka oti nga mea katoa te pēhi ki raro i a ia; e marama ana tenei *kua waiho* i waho te kai pēhi o nga mea katoa ki raro i a ia.

28 A ka oti nga mea katoa te pēhi e ia ki raro i a ia, ko reira ano te Tama riro ai ki raro i te kai pēhi o nga mea katoa ki raro i a ia, kia katoa ai te Atua i roto i te katoa.

29 ¶ Penei ka aha te hunga e iriiria ana hei whakakapi mo te hunga mate, ki te kore rawa te hunga mate e ara? he aha hoki ratou ka iriiria ai hei whakakapi mo te hunga mate?

30 He aha ano tatou ka tu wehi ai i nga wa katoa?

31 Na, taku oati, ko taku whakamanamana mo koutou i roto i a Karaiti Ihu, i to tatou Ariki, ina mo te mate ahau i tenei ra, i tenei ra.

32 Ha, whawhai ana ahau ki te kararehe i Epeha, pera ana me te tangata, he aha te pai ki ahau, ki te kahore te hunga mate e ara? Kia kai tatou, kia inu, ko apopo hoki tatou mate ai.

33 Kei whakapohēhētia koutou: ki te kino nga hoa, ka heke ki te kino nga tikanga pai.

34 Oho ake ki te tika, kaua hoki e hara; kahore hoki o etahi matauranga ki te Atua:

i korero ai ahau kia whakama ai koutou.

35 ¶ Otira tera tetahi e ki mai, E peheatia te whakaarahanga o te hunga mate? a he tinana aha to ratou ina haere mai?

36 Kuare! tāu e whakato na e kore e puta ki te ora, ki te kahore e mate:

37 A tāu e whakato na, ehara i te tinana e puta ake a mua tāu e whakato na, engari he kakano kau no te witi ranei, no tetahi atu mea ranei:

38 E hoatu ana hoki e te Atua ki taua *kakano* he tinana, tana i pai ai, a ki tenei kakano, ki tenei kakano, tona ake tinana.

39 Ehara i te kikokiko kotahi nga kikokiko katoa: engari rere ke to te tangata kikokiko, rere ke to te kararehe kikokiko, rere ke to te ika, rere ke to te manu.

40 Etahi tinana, no te rangi, etahi tinana, no te whenua: otiia rere ke te kororia o nga mea o te rangi, rere ke to nga mea o te whenua.

41 He kororia ke to te ra, he kororia ke to te marama, he kororia ke to nga whetu: poka ke hoki te kororia o tetahi whetu, o tetahi whetu.

42 He pera ano te aranga o te hunga mate. E whakatokia pirautia ana; e whakaarahia pirau koretia ana:

43 E whakatokia honore koretia ana; e whakaarahia kororiatia ana; e whakatokia ngoikoretia ana; e whakaarahia kahatia ana:

I. KORINITI 15, 16.

44 E whakatokia ana he tinana maori; e whakaarahia ana he tinana wairua. Te mea maori he tinana ano, te mea wairua he tinana ano.

45 He penei hoki te mea i tuhituhia, Te tangata tuatahi, a Arama, i meinga hei tangata ora; te Arama whakamutunga hei wairua whakaora.

46 He ahakoa ra ehara te mea wairua i te tuatahi, engari te mea maori; no muri ko te mea wairua.

47 Te tangata tuatahi no te whenua, he mea oneone: te tangata tuarua ko te Ariki, no te rangi.

48 Nga mea oneone rite tonu ki te mea oneone: nga mea o te rangi rite tonu ki te mea o te rangi.

49 Na, kua mau nei ki a tatou te ahua o to te oneone, waihoki ka mau ano ki a tatou te ahua o to te rangi.

50 ¶ E oku tēina, ko taku korero tenei, e kore e tau kia riro te rangatiratanga o te Atua i te kikokiko, i te toto; e kore ano te pirau-kore e riro i te pirau.

51 Na, he mea ngaro tenei e korerotia atu nei e ahau ki a koutou: E kore tatou katoa e moe, engari e whakaahuatia ketia tatou katoa;

52 E kore e aha, kimo kau te kanohi, i te tetere whakamutunga: e tangi hoki te tetere, a e whakaarahia nga tupāpaku, he mea pirau-kore, na ka whakaahuatia ketia tatou.

53 Kua takoto hoki te tika-

nga kia kakahuria te pirau-kore e tenei pirau, kia kakahuria hoki te mate-kore e tenei hanga matemate nei.

54 Heoi ka oti tenei pirau te whakakakahu ki te pirau-kore, me tenei hanga matemate nei te whakakakahu ki te mate-kore, ko reira rite ai te korero i tuhituhia, Horomia ake te mate e te wikitoria.

55 E te mate, kei hea tou wero? E te reinga, kei hea tou wikitoria?

56 Ko te hara to te mate wero; a na te ture i kaha ai te hara.

57 Na, ki te Atua te whakawhetai, nāna nei i homai te wikitoria ki a tatou, he mea-tanga na to tatou Ariki, na Ihu Karaiti.

58 Heoi, e oku tēina aroha, kia u, kei taea te whakakorikori, kia hira te mahi ki te Ariki i nga wa katoa, e mātau ana hoki koutou, ehara i te maumau to koutou mauuitanga i roto i te Ariki.

UPOKO 16.

Mo nga teina rawakore i Hiruharama. 10 Timoti. 12 Aporo. 13 He ako. 19 He mihi.

NA, te kohikohi mo te huinga tapu, peratia me taku i whakarite ai ki nga hahi o Karatia.

2 Hei te ra tuatahi o te wiki, whakatakotoria, rongoa-tia ake e tenei, e tenei o koutou ki a ia ano, a te Atua manaakitanga i a ia, kei

I. KORINITI 16.

waiho nga kohikohi mo te wa e haere atu ai ahau.

3 A ka tae ahau, maku e tono te hunga e whakapai-ngia ana e a koutou puka-puka, hei mau i to koutou aroha noa ki Hiruharama.

4 A ki te tika kia haere atu ano hoki ahau, ko matou tahi e haere.

5 Na ka haere ahau ki a koutou, ina tika ahau ra Makeronia: e tika ana hoki ahau ra Makeronia.

6 A tera pea ahau e noho roa ki a koutou, taka noa pea te hotoke, kia ai koutou hei arahi i ahau ki te wahi e haere atu ai ahau.

7 E kore hoki ahau e pai kia titiro haere ahau i a koutou aiane; e mea ana hoki ahau kia roaroa iho toku noho ki a koutou, ki te tukua e te Ariki.

8 Ka noho raia ahau ki Epeha taea noatia te Petekoha.

9 He kuwaha rahi hoki, he mea mahi nui, kua puare nei ki a au, a he tokomaha nga kai tautohetohe.

10 ¶ Na, ki te haere atu a Timoti, kia mahara kia kaua ia e whai maku i roto i a koutou: e mahi ana hoki ia i te mahi a te Ariki, e penei ana me ahau nei.

11 Kei whakahawea ano te tahi ki a ia: engari arahina mai ia i runga i te rangimarie, kia haere mai ai ki ahau: e tatari ana hoki ahau ki a ia ratou ko nga teina.

12 Na, to tatou teina, a A-

poro, nui atu taku tohe ki a ia kia haere atu ratou ko nga teina ki a koutou: otiia kihai rawa ia i pai kia haere i tenei wa; heoi e haere ano ia a te wa e watea ai.

13 ¶ Kia mataara, e tu i runga i te whakaponu, whakatane, kia kaha.

14 Kia meatia a koutou mea katoa i runga i te aroha.

15 ¶ He tohe tenei naku ki a koutou, e oku teina, (e mohio ana koutou ki nga tangata o te whare o Tepana, ko te matamua ratou o Akaia, a kua tuku ano i a ratou hei kai mahi mo te hunga tapu.)

16 Kia ngohengohe ki nga tangata pera, ki te hunga katoa ano e mahi tahi ana, e uaua ana.

17 Hari tonu ahau ki te haerenga mai o Tepana, ratou ko Porotunatu, ko Akaiku: na ratou hoki i rite ai nga mea i kore i a koutou.

18 I ora hoki i a ratou toku wairua, o koutou hoki: na kia mohio koutou ki te hunga pera.

19 ¶ Tenei nga hahi o Ahia te oha atu nei ki a koutou. He maha nei nga ohatanga atu a Akaira raua ko Pirihihi ki a koutou i roto i te Ariki, a te hahi ano i to raua whare.

20 Tenei nga teina katoa te oha atu nei ki a koutou. Oha atu ki a koutou ano, hei te kahi tapu.

21 Ko te ohatanga tenei a Paora, he mea na toku ringa ake.

II. KORINITI 1.

22 Ki te kore tetahi e aroha ki te Ariki, ki a Ihu Karaiti, kia waiho ia hei Anatema Maranata.

23 *Kia tau* te aroha noa o te

Ariki, o Ihu Karaiti, ki a koutou.

24 Hei a koutou katoa toku aroha i roto i a Karaiti Ihu. Amine.

KO TE PUKAPUKA TUARUA A PAORA APOTORO

KI TE

HUNGA O KORINITI.

UPOKO 1.

Tana whakamarie. 12 *Tikanga o tana kauwhau.* 15 *Take i kore ai ia e hohoro atu ki a ratou.*

NA Paora, i paingia e te Atua hei apotoro ma Ihu Karaiti, na te teina hoki, na Timoti, ki te hahi a te Atua i Koriniti, ratou ko te hunga tapu katoa i Akaia katoa:

2 *Kia tau* ki a koutou te aroha noa me te rangimarie, he mea na te Atua, na to tatou Matua, na te Ariki hoki, na Ihu Karaiti.

3 ¶ Kia whakapaingia te Atua, te Matua o to tatou Ariki, o Ihu Karaiti, te Matua o nga mahi tohu, te Atua o te whakamarietanga katoa;

4 Ko ia nei te kai whakamarie i a matou i o matou

paweratanga katoa, e taea ai e matou te whakamarie te hunga e pēhia ana e te aha ranei, e te aha ranei, ara te whakamarie ki ta te Atua whakamarietanga i a matou.

5 I te mea hoki ka hira tonu nei nga mamae o te Karaiti i roto i a matou, ka meinga ano hoki e te Karaiti kia hira ake to matou whakamarietanga.

6 Na ki te tukinotia matou, he mea ia e whakamarietia ai, e whakaorangia ai koutou, koia tena e mahi na, i a koutou ka whakaririka kau na ki aua mamae nei ano e mamae nei matou: ki te whakamarietia matou, he mea ano ia e whakamarietia ai, e whakaorangia ai koutou.

7 A e u ana to matou whakaaro ki a koutou, e mātau ana hoki, na, kua uru na kou-

II. KORINITI 1.

tou ki nga mamae, *ka uru* ano hoki ki te whakamarie-tanga.

8 Kahore hoki matou e pai kia ngaro i a koutou, e *oku* tēina, i pawera matou ki Ahia, nui atu te pehi i a matou, kihai hoki matou i kaha, a poroporoaki ana matou ki te ora:

9 I roto ano i a matou te kupu mo te mate, kia kore ai e u o matou whakaaro ki a matou ano, engari ki te Atua, ki te kai whakaara i te hunga mate:

10 Nāna nei matou i whakaora i taua mate nui, a e whakaora nei ano: e u ana ano o matou whakaaro ki a ia, tera ano ia e whakaora;

11 I a koutou ka mahi tahi na mo matou, ara ka inoi, a ka tokomaha nei i riro mai ai tenei arohatanga noatanga i a matou, kia tokomaha ano hei whakawhetai mo *te mea-tanga ki a matou*.

12 ¶ Ko ta matou hoki tenei e whakamanamana nei, ko te whakaaenga ake o to matou hinengaro, kei runga i te tapatahi, i te hianga kore o te Atua, ehara i te mea kei runga i to te kikokiko mohio-tanga, engari kei runga i to te Atua aroha noa, to matou whakahaere i te ao, ki a koutou rawa ano ia.

13 Ehara hoki ta matou e tuhituhi nei ki a koutou i te mea ke i ta koutou e korero na i te pukapuka, e whakaae na; a e u ana ano toku whakaaro, e whakaae

ano koutou taea noatia te mutunga;

14 Me koutou na hoki i whakaae mai, ko tetahi wahi ki a matou, ko matou ta koutou e whakamanamana ai, pera hoki me koutou ta matou, i te ra o te Ariki, o Ihu.

15 ¶ Na, i toku whakaaro e u ana ki tenei, i mea ahau kia haere ki a koutou ki mua, kia tuaruatia ai te pai e riro i a koutou;

16 Kia tika ano ma kona ki Makeronia, kia hoki ano i Makeronia ki a koutou, a kia arahina e koutou ki Huria.

17 Na, i a au e whakaaro ana i tenei, he ngakau māmā ranei toku? he whakaaro ranei no te kikokiko oku whakaaro, e mea ai ahau, Ae, ae, kahore, kahore?

18 Otira pono tonu ta te Atua, ehara ta matou kupu ki a koutou i te ae, i te kahore.

19 Ko te Tama hoki a te Atua, ko Ihu Karaiti, i kauwhautia nei e matou i roto i a koutou, ara e ahau, e Hirawanu, e Timoti, ehara ia i te ae, i te kahore, engari he ae i roto i a ia.

20 He ae hoki nga kupu homai katoa a te Atua i roto i a ia, he amine ano i roto i a ia, hei kororia mo te Atua i runga i ta tatou nei mahi.

21 Na, te kai whakau i a matou, i a koutou i roto i a te Karaiti, te kai whakawahi i a tatou, ko te Atua;

22 Nāna nei tatou i hiri, a homai ana e ia te wahi tua-

II. KORINITI 1, 2.

tahi, ara te Wairua, ki roto ki o tatou ngakau.

23 ¶ Na, he karanga tenei naku ki te Atua hei kai titiro mo toku wairua, he tohu naku i a koutou tē tae wawe ai ahau ki Koriniti.

24 Ehara hoki i te mea hei rangatira matou mo to koutou whakapono, engari he hoa mahi matou i te hari mo koutou: na te whakapono hoki koutou i tu ai.

UPOKO 2.

*Mo te tangata i he ra. 12
Take i kore ai ia e noho ki
Toroa. 14 Whakawhetai.*

KUA takoto hoki tenei i roto i a au, kia kua toku hokinga atu ki a koutou e waiho i runga i te pouri.

2 Ki te whakapouri hoki ahau i a koutou, ko wai hei whakaora i toku ngakau? ko ia anake e whakapouritia nei e ahau.

3 A i tuhituhi ano ahau i taua mea nei ano ki a koutou, kei whai pouri ahau ina tae atu i te hunga māna nei ahau e whakahari; e u ana hoki toku whakaaro ki a koutou katoa, kei a koutou katoa toku hari.

4 He nui te mamae, te pawera o te ngakau, he maha nga roimata, i taku tuhituhinga ki a koutou; ehara ia i te mea kia whakapouritia ai koutou, engari kia mātau ai koutou ki toku aroha e hira rawa nei ki a koutou.

5 ¶ Na, ki te mea kua wha-

kapouri tetahi, kahore ia i whakapouri i a au, ko tetahi wahi anake; kei taimaha rawa taku ki a koutou katoa.

6 Heoi ano mo taua tu tangata, ko tenei riringa hara a te tokomaha.

7 Ko tenei, engari me whakarere noa iho *tana* e koutou, me whakamarie, kei horomia ia e te pouri ka hira rawa nei.

8 Koia ahau ka whakahau nei i a koutou, whakaukia te aroha ki a ia.

9 Na konei ano ahau i tuhi-tuhi ai, kia mohio ai ahau ki nga tohu o koutou, e ngohengohe ana ranei i nga mea katoa.

10 Na, ki te whakarere noa koutou i ta tetahi, ka pena ano ahau: ki te whakarerea noatia ano hoki ta tetahi e ahau, he whakaaro ki a koutou i whakarerea noatia ai e ahau, i te aroaro o te Karaiti;

11 Kei tinihangatia hoki tatou e Hatana: ehara hoki tatou i te kuare ki ana whakaaro.

12 ¶ Na, i toku taenga ki Toroa ki te *kauwhau* i te rongo pai o te Karaiti, a ka puare ki a au tetahi kuwaha he mea na te Ariki,

13 Kihai toku wairua i whai okiokinga, noku tē kite i toku teina, i a Taituha: heoi poroporoaki ana ahau ki a ratou, a haere mai ana ki Makeronia.

14 Na, me whakawhetai ki te Atua, e mea tonu nei i a

II. KORINITI 2, 3

matou kia whakamanamana i roto i a te Karaiti, a e mea nei i a matou hei whakaatu i te kakara o tona matauranga i nga wahi katoa.

15 No te mea hoki he kakara pai matou no te Karaiti ki te Atua, i runga i te hunga e whakaorangia ana, i runga ano i te hunga e whakangaromia ana:

16 Ki etahi he kakara matou no te mate ki te mate; a ki etahi he kakara no te ora ki te ora. A ko wai e tau ki enei mea?

17 Kahore hoki matou e rite ki te tokomaha e whakaranu nei i te kupu a te Atua: engari e rite ana ki ta te tinihangakore, e rite ana ki ta te Atua, ta matou e korero nei i te aroaro o te Atua, i roto i a te Karaiti.

UPOKO 3.

Ko ratou nei ano hei pukapuka whakaatu mona. 6 Ta te Rongo pai, nui ake i ta Mohi.

E TIMATA ana ano ranei matou te whakapai i a matou? e mea ana ranei matou, e pera ana me etahi atu, ki nga pukapuka whakapai ki a koutou, *kia homai* ranei etahi pukapuka whakapai e koutou?

2 Ko koutou ta matou pukapuka, he mea tuhituhi ki o matou ngakau, e kitea ana, e korerotia ana e nga tangata katoa:

3 Kua marama rawa na hoki koutou he pukapuka na te Karaiti, he mea minita na

matou, ehara i te mea tuhituhi ki te mangumangu, engari ki te Wairua o te Atua ora; he teka ki nga papa kohatu, engari ki runga ki nga papa kikokiko o te ngakau.

4 Tenei tu whakaaro o matou, u tonu ki ta te Atua, he mea na te Karaiti:

5 He teka kei a matou ake te tikanga mo te whakaaro ki tetahi aha, me te mea no matou ake ano; engari na te Atua matou i whai tikanga ai;

6 Nāna hoki matou i tau ai hei minita mo te kawenata hou; he teka no te reta, engari no te wairua: he whakamate hoki ta te reta, he whakaora ia ta te wairua.

7 Na, i whai kororia nei te minitatanga o te mate, he reta i whaoa nei ki nga kohatu, a kihai i taea e nga tama a Iharaira te titiro matatau atu ki te mata o Mohi, i te kororia hoki o tona mata; he kororia ano e whakakahoretia ana:

8 A e kore ianei e nui noa atu te kororia o te minitatanga o te Wairua?

9 Na, te minitatanga o te whakatau-he, he kororia; waihoki hira rawa te kororia o te minitatanga o te tika.

10 Kihai hoki te mea i whakakororiatia i whai kororia i tenei wahi, na te kororia hoki e nui rawa nei.

11 I na runga mai nei hoki i te kororia te mea e whakakahoretia ana, waihoki ka nui noa te kororia o te mea pumau.

II. KORINITI 3, 4.

12 ¶ Na, i a matou ka tu-
manako nei ki tenei, nui atu
to matou maia ki te korero :

13 Kahore ano e pera me
Mohi i maka nei i te hipoki
ki tona mata, kei titiro mata-
tau atu nga tama a Ihairaira
ki te tukunga iho o te mea
ka whakakahoretia nei :

14 Otira i whakapakeketia o
ratou hinengaro : e mau tonu
ana hoki taua hipoki ra ano
i te korerotanga o te kawē-
nata tawhito taea noatia te-
nei ra, kahore ano i hurahia ;
i roto ia i a te Karaiti ka
whakakahoretia.

15 Heoi i te mea e korerotia
ana a Mohi, e takoto ana te
hipoki ki to ratou ngakau
taea noatia tenei ra.

16 Na, ka tahuri ki te Ariki,
ka tangohia te hipoki.

17 Na, te Ariki nei, ko te
Wairua : a, te wahi i noho ai
te Wairua o te Ariki, kei reira
te tikanga here-kore.

18 Na, tatou katoa, kahore
he hipoki mo te mata i a tatou
e titiro nei ki te kororia o te
Ariki, me te mea i roto i te
whakaata, a e whakaputaina
ketia ana kia rite ki taua ahua
ano, he kororia hono iho ki
te kororia, i runga i ta te
Wairua o te Ariki.

UPOKO 4.

*Pau o tona ngakau ki tana
mahi. 7 Ona raruraru ka
puta ke hei kororia mo te
Atua, 12 Hei pai ano mo
ratou, 16 mona.*

NA konei, i te mea kei a
matou nei tenei mahi
minita, a ka tohungia nei

matou, kahore matou e nga-
kau-kore.

2 Engari whakakahoretia
ana e matou nga mea huna o
te whakama, kore ake to ma-
tou haere i runga i te tini-
hanga, kahore hoki he ma-
minga ki te kupu a te Atua ;
engari ka waiho i runga i te
whakapuakanga o te pono ta
matou whakaatu i to matou
pai ki nga hinengaro katoa o
nga tângata i te aroaro o te
Atua.

3 Na, ki te mea he mea hi-
poki ta matou rongo pai, he
mea hipoki ki te hunga e
whakangaromia ana :

4 I roto nei i a ratou te atua
o tenei ao e whakamatapo
ana i nga whakaaro o te hu-
nga whakapono-kore, kei whi-
tingia ratou e te māmāmatanga
o te rongo pai o to te Karaiti
kororia, ko ia nei te ahua o
te Atua.

5 He teka hoki ko matou
te kauwhautia nei e matou,
engari ko Karaiti Ihu hei
Ariki ; a ko matou nei hei
pononga ma koutou, he wha-
kaaro hoki ki a Ihu.

6 Ko te Atua hoki nāna nei
i ki te māmāmatanga kia whiti
i roto i te pouri, kua whiti ki
roto ki o matou ngakau, hei
homai i te māmāmatanga, ara
i te matauranga o te kororia
o te Atua i te mata o Ihu
Karaiti.

7 ¶ Na, tenei taonga o ma-
tou, kei roto i te oko oneone,
kia *kia* ai te kaha e hira tonu
nei, no te Atua, ehara hoki i
a matou.

II. KORINITI 4, 5.

8 E tukinotia ana matou i nga *taha* katoa, heoi kahore e pau te whakaaro; e raru-raru ana, heoi kahore e taea te raru.

9 E whakatoia ana matou, heoi kahore i whakarerea; e turakina ana ki raro, heoi kahore i whakangaromia;

10 E mau tonu ana te matenga o te Ariki, o Ihu, ki o matou tinana, i a matou e haereere nei; kia mārama ai to Ihu ora i roto i o matou tinana.

11 Ko matou hoki e ora nei, e tukua tonutia ana ki te mate mo te whakaaro ki a Ihu, kia mārama ai hoki to Ihu ora i roto i o matou kiko-kiko matemate.

12 Na, ko te mate te mahi ana i roto i a matou, ko te ora ia i roto i a koutou.

13 Na, kei a matou nei taua wairua ra ano o te whakapono, tera hoki i tuhituhia, I whakapono ahau, koia ahau i korero ai; whakapono ana ano matou, koia hoki matou ka korero nei;

14 E mātau ana hoki matou, tera te kai whakaara o te Ariki, o Ihu, e whakaara ano hoki i a matou, he mea na Ihu, e whakatu ngatahi ano i a matou, i a koutou.

15 Hei pai hoki mo koutou nga mea katoa, kia hira rawa ai te kororia o te Atua, i te aroha noa ka nui nei, i te tokomaha *ano hoki* e whakawhetai ana.

16 ¶ Koia hoki tatou tē ngakau-kore ai; heoi ahakoa haere

iho tatou ki te pirau, ara, to waho tangata, e whakahoutia ana ano to roto i tenei ra, i tenei ra.

17 Ko to tatou mamae hoki, he mea māmā, he mea nonaiane nei, hei whakawhiwhi i a tatou ki te kororia, tona nui whakaharahara o te taimaha, he mea mau tonu;

18 I a tatou kahore nei e titiro ki nga mea e kitea ana, engari ki nga mea kahore e kitea: he mea nonaiane nei hoki nga mea e kitea ana; he mea mau tonu ia nga mea kahore e kitea.

UPOKO 5.

Tona hiahia. 4 Tana i whai ai. 11 Nga take i pena ai.

E MĀTAU ana hoki tatou, na, ki te wahia to tatou whare wharau, te mea whenua nei, he whare ano to tatou, he mea hanga na te Atua, ehara i te whare hanga e te ringa, he mea mau tonu i nga rangi.

2 I tenei hoki he aue ta tatou, e hiahia ana ki to tatou whare o te rangi hei kakahu mo tatou:

3 Ki te whai kakahu hoki tatou, e kore tatou e rokohanga mai e *noho* tahanga ana.

4 Kei te aue hoki tatou, te hunga i *tenei* whare wharau, i te taimaha: ehara i te mea e hiahia ana kia unuhia o *tatou* nei, engari kia kakahuria iho, kia horomia ai te mea matemate e te ora.

5 Na, te kai hanga i a tatou mo taua mea nei ano, ko te

II. KORINITI 5.

Atua, nāna nei hoki i homai ki a tatou te wahi tuatahi, ara te Wairua.

6 Koia hoki tatou ka maia tonu ai, e mātau ana hoki, i a tatou e noho nei i te tinana, he mea motu ke mai i te Ariki to tatou noho:

7 To tatou haere nei hoki, kei runga i te whakapono, a kahore i runga i te titiro;

8 E maia ana ano tatou, ā, ta tatou e tino pai ai, kia noho motu ke i te tinana, kia noho ai ki te Ariki.

9 Koia hoki tatou ka whai nei, ahakoa i konei e noho ana, ahakoa e noho ke ana, kia ahua rekaina mai tatou e ia.

10 Kua takoto hoki te tika-nga, kia kitea katoatia tatou ki mua i te nohoanga whakawa o te Karaiti; kia riro mai ai i tenei, i tenei, nga meatanga a te tinana, kia rite hoki ki tana i mahi ai, ahakoa pai, ahakoa kino.

11 ¶ Na, ka mātau nei matou ki te wehi o te Ariki, ka kume matou i nga tāngata; kua kitea ano ia matou e te Atua; e u ana ano toku whakaaro kua kitea ano matou e o koutou hinengaro.

12 Ehara hoki i te mea e whakapai ana ano matou i a matou ki a koutou, engari e hoatu ana i te take ki a koutou e whakamanamana ai koutou ki a matou, kia whai kupu ai koutou ki te hunga e whakamanamana nei ki to te kanohi, a kahore ki to te ngakau.

13 Ahakoa porangi matou, *hei mea ia* mo te Atua: ki te tika nga mahara, *hei mea ano* mo koutou.

14 E akiakina ana hoki matou e te aroha o te Karaiti; i a matou e whakaaro ana i tenei, i te matenga o te kotahi mo te katoa, he hunga mate ano te katoa:

15 A i mate ai ia mo te katoa, kia kua ai te hunga e ora ana e ora mo ratou ake a muri ake nei, engari mo tenei i mate nei mo ratou, a i ara ake ano.

16 Na, i te wa e takoto ake nei, kahore o matou matauranga ki tetahi, ara ki tona kikokiko, a e ra, ahakoa mātau matou ki a te Karaiti, ara ki tona kikokiko, kahore o matou matauranga *ki a ia* i nga wa e takoto ake nei.

17 Na, ki te mea kei roto i a te Karaiti tetahi, he mahinga hou ia: kua pahemo nga mea tawhito; na kua hou nga mea katoa.

18 A, te putake o nga mea katoa, ko te Atua, i hohou nei i ta tatou rongo ki a ia i runga i a Ihu Karaiti, a homai ana e ia ki a matou te minitanga o te houhanga rongo;

19 Ara, i roto te Atua i a te Karaiti e hohou ana i ta te ao rongo ki a ia, kore ake e whakairia ki a ratou o ratou hē; a kua tukua mai ki a matou te kupu mo te houhanga rongo.

20 ¶ Na, he karere matou na te Karaiti, me te mea ano ko te Atua tenei kei roto i a

II. KORINITI 5, 6.

matou e karanga ana: ko matou hei whakakapi mo te Karaiti ki te tohe atu, kia houhia ta koutou rongo ki te Atua.

21 Tera hoki kihai nei i mātau ki te hara, meinga ana ia hei hara mo tatou; kia meinga ai tatou ko te tika o te Atua i roto i a ia.

UPOKO 6.

He-kore o tana mahi. 4 Ona mate; 11 Ngakau nui ki a ratou. 14 Na, kua e tata ki nga mahi whakapakoko.

NA, tenei matou, *ona* hoa mahi, te whakahau nei i a koutou, kia kua e hua-kore te rironga o te aroha noa o te Atua i a koutou.

2 (E mea ana hoki ia, No te wa manakohanga atu i whakarongo ai ahau ki a koe, a awhinatia ana koe e ahau i te ra o te whakaoranga: nana, tenei te wa manakohanga mai; nana, tenei te ra o te whakaoranga.)

3 E kore ano e hoatu e matou tetahi take whakahe, ahakoa he aha, he aha, kei whakahengia te mahi minitā:

4 Engari i nga mea katoa e whakakite ana i a matou he minitā na te Atua, i runga i te hua o te manawanui, i nga tukinotanga, i nga aitūā, i nga rarunga,

5 I nga whiunga, i nga whare herehere, i nga ngangaretanga, i nga mauuitanga, i nga mataaratanga, i nga nohoa-nga pukutanga;

6 I runga i te kino kore, i te matauranga, i te manawanui, i te ngakau ngawari, i te Wairua Tapu, i te aroha tinihanga-kore,

7 I runga i te kupu o te pono, i te kaha o te Atua, i nga mea whawhai o te tika ki matau, ki mau,

8 I runga i te kororia, i te honore kore, i te kupu kino, i te kupu pai; me te mea he hunga tinihanga, a he hunga pono ano;

9 Me te mea kahore e mohiotia, a e mohiotia nuitia ana; me te mea ka mate, heoi tenei ano te ora nei; me te mea e pakia ana, heoi kahore e whakamatea;

10 Me te mea e pouri ana, heoi e hari tonu ana; me te mea e rawakore ana, heoi e mea ana i te tokomaha kia whai taonga; me te mea kahore o matou rawa, a kei a matou nei nga mea katoa.

11 ¶ Tuwhera tonu o matou mangai ki a koutou, e nga Koriniti, kua nui to matou ngakau.

12 Ehara i te mea no matou te kuiti i a koutou, engari no o koutou ngakau te kuiti.

13 Na, hei utu e rite ana, (he kupu tenei naku ki *aku* tamariki,) kia whakanuia ano hoki koutou.

14 ¶ Kei iokatia kētia koutou ki te hunga whakapono kore: no hea hoki te whaka-
hoatanga o te tika raua ko te tutū? no hea hoki te huihui-
nga tahitanga o te mārama, o te pouri?

II. KORINITI 6, 7.

15 Ko ehea korero a te Ka-
raiti i huihuia ki ā Periarā?
a na tehea wahi i *huānga ai*
te tangata whakapono ki te
tangata whakapono-kore?

16 Kei hea he tatanga mo te
whare o te Atua ki nga wha-
kapakoko? ko koutou hoki te
whare o te Atua ora; ko ta
te Atua tena i mea ai, Ka
noho ahau i roto i a ratou, ka
haereere ahau i roto i a ratou;
a ko ahau hei Atua mo ratou,
ko ratou hoki hei iwi maku.

17 Mo konei puta mai i roto
i a ratou, kia motu ke, e ai ta
te Ariki. Kaua hoki e pa ki
te mea poke; a ka riro mai
koutou i a au;

18 Ko ahau ano hoki hei
Matua mo koutou, a ko kou-
tou hei tama hei tamāhine ki
a au, e ai ta te Ariki Kaha
rawa.

UPOKO 7.

*Kia he-kore. 2 Kia tahuri ki
tana. 3 Tona ngakau nui
ki a ratou. 5 Koa ki ta
Taituha mo te pai o ta ra-
tou.*

NA, i a tatou ka whiwhi
nei ki enei kupu wha-
kaari, e oku *hoa aroha*, kia
horoi tatou i a tatou ano, ara
i nga mea poke katoa o te
kikokiko, o te wairua, me te
whai ano ki te tino tapu i
runga i te wehi o te Atua.

2 ¶ Manako mai ki a matou;
kahore a matou whakahaere
hē ki tetahi, kahore matou i
kukume i tetahi ki te kino,
kahore a matou whakapati i
nga taonga o tetahi.

3 Taku kupu nei, ehara i te
whakatau-hē: kua mea atu
na hoki ahau, kei o matou
ngakau koutou mo te mate
tahi, mo te ora tahi.

4 Nui atu toku maia ki te ko-
rero ki a koutou, nui atu taku
whakamanamana mo koutou:
ki tonu ahau i te whakamarie-
tanga, hira ake toku koa i o
matou matenga katoa.

5 ¶ I to matou taenga mai
hoki ki Makeronia, kihai i
whai okiokinga to matou ki-
kokiko, heoi mate ana matou
i nga *taha* katoa; i waho ko
nga whawhai, i roto ko nga
matakū.

6 Otira na te Atua, na te
kai whakamarie o te hunga e
whakaititia ana, nāna matou
i whakamarie, i a Taituha ka
tae mai nei;

7 He teka ano i tona taenga
mai anake, engari na te wha-
kamarietanga ano hoki i wha-
kamarietia ai ia e koutou, i
tana korerotanga mai ki a
matou i to koutou hiahia
nui, i to koutou tangi, i to
koutou ngakau nui ki a au;
a koa rawa ahau.

8 No te mea, ahakoa i wha-
kapouritia koutou e ahau ki
te pukapuka, kahore e puta
ke toku whakaaro; i puta ke
ano ia toku whakaaro i mua:
ka kite nei hoki ahau kua
pouri koutou i taua pukapuka,
ara *pouri* potopoto nei.

9 E hari ana tenei ahau, he
teka no te mea i whakapou-
ritia koutou, engari no te mea
i whakapouritia koutou, a ri-
peneta iho: to koutou pouri

II. KORINITI 7, 8.

hoki no ta te Atua, a kahore noa iho koutou i whai hē i a matou.

10 No ta te Atua hoki te pouri, ka mahia he ripeneta, e ora ai, e kore e ripenetatia: ta te pouri ia o te ao e mahi ai, he mate.

11 Titiro hoki, taua mea nei ano, to koutou pouri he mea Atua, tana mahinga i roto i a koutou, te nui o te takare, nga kupu whakatikatika, te riri, te wehi, te hiahia, te ngakau nui, te whakapakanga riri! I nga mea katoa kua whakakite nui koutou, kahore o koutou hara i tenei mea.

12 Na, ahakoa i tuhituhi ahau ki a koutou, ehara i te mea mo te tangata nāna te hē, mo te tangata ranei ki a ia nei te hē, engari kia whakakitea ai ki a koutou te nui o to matou matapopore ki a koutou i te aroaro o te Atua.

13 Koia matou i whai marietanga ai i to koutou whakamarietanga: a hira noa ake to matou koa i te koa hoki o Taituha, no te mea i ora ake tona wairua i a koutou katoa.

14 I a au hoki i whakamana mana nei ki a ia ki tetahi mea a koutou, kahore ahau i meinga kia whakama; engari na, i runga nei i te pono a matou korero katoa ki a koutou, wai-hoki kua whai pono ta matou whakamanamana i te aroaro o Taituha.

15 Hira ake ano hoki tona ngakau aroha ki a koutou, i a ia e mahara ana ki te ngohe-ngohe o koutou katoa, ki te

wehi, ki te wiri, i manako ai koutou ki a ia.

16 Na, ka hari nei ahau no te mea ka mārama nei toku whakaaro ki a koutou i nga mea katoa.

UPOKO 8.

Kohikohi mo nga rawakore i Hiruharama, 16 e mahia ana e Taituha-ma.

NA, he whakakite atu tenei na matou ki a koutou, e oku tēina, i te aroha noa o te Atua kua homai nei ki nga hahi o Makeronia;

2 Ahakoa he nui te whakamatautauranga, ara nga matenga, hira rawa to ratou koa, a i te mea e rawakore noa iho ana ratou, hira rawa to ratou taonga, ara te oha-oha.

3 Me whakaatu ano e ahau, hihiko tonu ratou ki nga mea i taea e ratou, ki nga mea ano kihai i taea e ratou;

4 Nui atu ta ratou tohe ki a matou, kia manako matou ki te arohatanga noatanga, kia uru hoki ki te mahi ki te hunga tapu.

5 Kihai hoki ratou i pera me ta matou i whakaaro ai, engari i te tuatahi tukua ana ratou e ratou ano ki te Ariki, ki a matou ano hoki i runga i ta te Atua i pai ai.

6 I whakahau ai matou i a Taituha, nāna hoki tena mahi aroha noa i timata, kia whakaotia ano e ia ki roto ki a koutou.

7 Na, e hua na ki a koutou nga mea katoa, te whakapono, te kupu, te matauranga, nui

II. KORINITI 8.

atu hoki te kakama, me to koutou aroha ano ki a matou, kia hua ano tenei mahi aroha noa a koutou.

8 Ehara taku i te korero ā ture, engari no te mea e kakama ana era atu, hei whakamatautau ano i te pono o to koutou aroha.

9 E mātau ana hoki koutou ki te aroha noa o to tatou Ariki, o Ihu Karaiti; i a ia e whai taonga ana, whakawakoretia iho ana ia, he whakaaro ki a koutou, kia whai taonga ai koutou i tona rawakoretanga.

10 A ka hoatu nei ahau i toku whakaaro mo tenei: he mea pai hoki tenei mo koutou, kua timata noa ake hoki ta koutou i tera tau, ehara i te mea ko te mahi anake, ko te hiahia ano hoki.

11 Ko tenei hoki whakaotia te mahi; i hihiko na hoki i mua te hiahia, waihoki *inaiane* nei kia whai otinga i roto i nga mea i a koutou na.

12 Na, ki te mea kua takoto te ngakau hihiko, ka manakohia; ko nga mea i te tangata e whakaaroa, hāunga nga mea kahore i a ia.

13 He teka ia ko etahi kia māmā, ko koutou kia taimaha:

14 Engari kia rite; ko nga mea o koutou i hira i tenei wa hei mea ma ratou kua hapa nei, a ko nga mea a ratou i hira hei mea ma koutou ina hapa; kia rite ai:

15 Kia pera ai me te mea i tūhituhia, Te tangata i te mea nui, kihai i nui ake tana; a, te

tangata i te mea nohinohi, kihai i iti iho tana.

16 ¶ Me whakawhetai atu ia ki te Atua, nāna i homai ki roto ki te ngakau o Taituha taua kakamatanga ki ā koutou mea.

17 I tahuri mai hoki ia ki te whakahau; he kakama rawa nona i hihiko ai ia ki te haere ki a koutou.

18 Kua tonoa atu na ano e matou hei hoa mona te teina, kei nga hahi katoa nei te whakamoemiti ki a ia i roto i te rongo pai;

19 Ehara hoki i te mea ko tera anake, i whiriwhiria ano hoki ia e nga hahi hei hoa haere mo matou ki te kawe i tenei arohatanga noatanga e mahia nei e matou, hei whakakororia mo te Ariki, hei whakakite ano i to koutou hihikotanga:

20 E tupato ana hoki matou ki tenei, kei whaikupua matou e tetahi mo enei mea maha e mahia nei e matou:

21 E whakaaro wawe ana hoki matou ki nga mea pai, ki te aroaro o te Ariki, ki te aroaro ano o nga tāngata.

22 Kua tonoa atu ano e matou hei hoa mo raua to matou teina, ka maha nei o matou kitenga i tona uaua i nga mea maha, heoi nui atu ano tona uaua inaianei, na te nui o te u o tona whakaaro ki a koutou.

23 Ki te mea tetahi ki a Taituha, ko toku hoa ia, he hoa mahi ano i ta koutou mea: ki te meatia mai o matou teina, he apotoro ratou na

II. KORINITI 8, 9.

nga hahi, he kororia no te Karaiti.

24 Na whakakitea ki a ratou, ki te aroaro ano o nga hahi, te tohu o to koutou aroha, o nga mea ano hoki i whakamanamanangia ai koutou e matou.

UPOKO 9.

Te mea i tonoa wawetia ai a Taituha ki a ratou. 6 Te atawhai rawakore he mea whai hua; 10 hei kororia ano hoki mo te Atua.

NA, te minitanga ki te hunga tapu, he mea noa ake taku tuhituhi ki a koutou:

2 E mohio ana hoki ahau ki to koutou ngakau hihiko, i whakamanamanangia ai koutou e ahau ki nga Makeroni, ara ko ta Akaia kua rite noa ake i tera tau ra ano; a he tokomaha i oho i to koutou ngakau-nui-tanga.

3 Heoi kua tonoa nei e ahau nga tēina, kei whakakahoretia tenei wahi o taku whakamanamananga ki ta koutou mahi; kia rite ai ta koutou, kia pera ai me taku i mea ai:

4 Kei haere etahi o nga Makeroni hei hoa moku, a ka rokohanga atu kahore ano kia rite noa ta koutou, na, ko te whakama mo matou, (tē mea matou, mo koutou,) i tenei whakamanamana e kaha nei.

5 Koia ahau i mea ai, ko te tikanga tenei kia whakahaua nga tēina, kia haere ko ratou i mua ki a koutou, kia rite wawe ai i a ratou tenei mana-

akitanga a koutou, i korerotia nei i mua, ko tenei kia rite, kia tu ā manaakitanga ai, kei rite ki te mea e manawapatia ana.

6 ¶ Ko taku ia tenei, He torutoru a tetahi i rui ai, he torutoru ano āna e kokoti ai; a he maha nga mea i ruia e tetahi, he maha ano āna e kokoti ai.

7 Kia rite ano ki ta tenei, ki ta tenei i whakaaro ai i roto i tona ngakau; kua e tu ā pouri, kua e tu ā whakauaua: ko ta te Atua hoki e aroha ai, he tangata e hoatu ana i runga i te ngakau mārama.

8 E taea ana hoki e te Atua te mea kia hira nga aroha noa katoa ki a koutou; a ka ranea rawa na o koutou taonga, ara nga mea katoa, inga wakatoa, kia hira ano a koutou mahi pai katoa:

9 (Kia rite ai ki te mea i tuhituhia, Kua titaritaria; kua hoatu e ia ki te hunga rawakore: e pumau tonu ana tona tika ake ake.)

10 ¶ Na, ma te kai homai i te purapura ki te kai whakato, i te taro ano hei kai, e homai, e whakamaha ta koutou e whakato ai, e whakanui ano nga hua o to koutou tika;)

11 Me te hua rawa o koutou taonga i nga mea katoa, ara nga mahi ohaoha katoa, eputa ai i a matou he whakawhetai ki te Atua.

12 Na tenei mahi hoki e minitatia nei i whiwhi ai te hunga tapu ki nga mea i kore i a ratou; na tenei ano i maha noa

II. KORINITI 9, 10.

atu ai nga whakawhetai ki te Atua;

13 I tenei mahi ka tirohia nei e ratou, a ka whakakororia ratou i te Atua mo koutou kua whakaae nei, kua ngohengohe ki te rongo pai o te Karaiti, mo to koutou ohaoha ki te tuwha mea mo ratou, mo te katoa:

14 I a ratou ano e inoi ana mo koutou, me te hiahia ano ratou ki a koutou, he whakaaaro hoki ki te aroha noa o te Atua ka nui rawa nei ki a koutou.

15 Me whakawhetai ki te Atua mo tana mea homai noa e kore nei e taea te korero.

UPOKO 10.

Ahakoia iti ia, he nui te mana i homai e te Atua. 12 Kahore ia e pera me era atu; 14 engari e haere ana ki nga whenua hou kauwhau ai.

NA, naku ake, na Paora tenei tohe ki a koutou, whakaaaroa te tikanga māhaki, te ngakau ngawari o te Karaiti, he mea iti nei hoki ahau i ahau i kona, i roto i a koutou, i tawhiti ia e maia ana ki a koutou:

2 Na ko taku tenei e tohe nei, kia kua au e maia ina tae atu; kei mārō, kei pera me taku e mea nei kia maia ki etahi e mea nei ki a matou, no te kikokiko ta matou whakahaere.

3 No te mea ahakoia haereere matou i roto i te kikokiko, ehara i te mea no te kikokiko ta matou whawhai:

4 (Ehara hoki nga mea whawhai o ta matou pakanga i te mea no te kikokiko, heoi e kaha ana i roto i te Atua hei whakahoro i nga pa kaha:)

5 Horo ana i a matou nga whakaaaroaronga, me nga mea ikeike katoa e whakakake ana ki te matauranga ki te Atua, a riro pārau mai ana i a matou nga whakaaaro katoa, ka meinga kia ngohengohe ki a te Karaiti;

6 Kua rite noa ake ano i a matou te whakapakanga riri mo nga mahi tutū katoa, ina tino ngohengohe rawa koutou.

7 Ko te ahua o waho ta koutou e titiro ai? Ki te u te whakaaaro o tetahi no te Karaiti ia, māna ake ano e mahara ki tenei mea ano hoki, no te Karaiti ia, me matou ano no te Karaiti.

8 Ahakoia hira ake taku whakamanamana ki nga tikanga i a matou kua homai nei ki a matou e te Ariki hei hanga i te whare, ehara i te mea hei wahi i a koutou, e kore ahau e whakama:

9 Kei kiia mai au e whakawehi ana i a koutou ki nga pukapuka.

10 Ko ana pukapuka hoki, e ai ki ta ratou, e nunui ana e kaha ana; ko tona tinana ia i a ia i konei e ngoikore ana, ko tana korero he korekore noa iho.

11 Kia mahara taua tu tangata ki tenei, na, te tikanga o matou e ngaro mai nei, ara o a matou kupu pukapuka, ka

II. KORINITI 10, 11.

pera tonu hoki te mahi ina tae atu.

12 ¶ E kore hoki matou e maia ki te whakauru atu, ki te whakariterite ranei i a matou ki etahi e whakapai ana ki a ratou ano: na, i a ratou e mehua nei i a ratou ki a ratou ano, a e whakariterite nei i a ratou ki a ratou ano, kahore o ratou matauranga.

13 Ta matou whakamana- mana ia, e kore e neke ake i te mehua, engari ka rite ki te mehua o te ruri i wehea mai mo matou e te Atua, he mehua e tae atu ai ki a koutou.

14 Kahore hoki o matou to- toro pokanoa atu, e *kiia ai* kahore he taenga atu mo matou ki a koutou: kua tae noa atu hoki matou ki a kou- tou *kauwhau ai* i te rongo pai o te Karaiti:

15 E kore hoki matou e neke ake i te mehua, e whakama- namana ki nga mahi a era atu; engari e u ana to matou whakaaro, ka tupu to koutou whakapono, ka ai koutou hei whakanui i a matou, e tino rite rawa ai ki to matou ruri;

16 Kia kauwhautia te rongo pai ki nga *wahi* i ko atu i a koutou, a kia kua e whaka- manamana i runga i to te tangata ke ruri ki nga mea kua rite noa ake.

17 Ki te whakamanamana ia tetahi, me whakamana- mana ki te Ariki.

18 He teka hoki ko te tangata e whakapai ana ki a ia ano, ko ia e tikangatia, engari ko ta te Ariki e whakapai ai.

UPOKO 11.

Na ta ratou a i whakanui ai i a ia ano. 16 *Kahore ia i hoki iho i auakai whakaako tinihanga.* 23 *Nui atu tana i ta ratou mo te Karaiti.*

TAKU e hiahia nei, kia ata hanga mai koutou ki a au, kia iti nei, i a au e wairangi nei: ae ra, kia ata hanga mai ano ki a au.

2 Nui atu hoki toku ngakau ki a koutou he ngakau no te Atua: kua oti hoki koutou te taumau e ahau ma te tane ko- tahi, kia tapaea atu hei wahina hē-kore ki a te Karaiti.

3 E wehi ana ia ahau, kei pera me Iwi i whakawaia e te tinihanga o te nakahi, kei heke atu o koutou whakaaro ki te hē, kei mahue te tapata- hitanga o te ngakau ki a te Karaiti.

4 Ki te tae atu te tangata, me te kauwhau i tetahi Ihu e rere ke ana i ta matou i kau- whau ai, ki te whiwhi ranēi koutou ki tetahi wairua ke atu i ta koutou i whiwhi na, ki tetahi rongo pai ranei e rere ke ana i ta koutou i wha- kaae ai, e tika ano kia ata hanga koutou *ki a ia*.

5 Ki a au hoki kahore rawa ahau i hoki iho i nga tino apotoro.

6 Na, ahakoa tangata ware ahau ki te korero, kahore ia ki te matauranga; heoi i nga mea katoa kua tino kitea ma- tou i roto i a koutou.

7 I hara oti ahau i a au i whakaiti ra i a au kia kake ai koutou, i kauwhau utu-kore

II. KORINITHI 11.

ra i te rongō pai o te Atua ki a koutou ?

8 I pahuatia e ahau era atu hahi, i tango utu ahau i a ratou, kia minita ai ahau ki a koutou.

9 A, i a au ano i kona i a koutou, a i kore *tetahi mea* maku, kahore ahau i taimaha ki tetahi: na nga tēina hoki i haere atu i Makeronia i whakawhiwhi ahau ki nga mea i kore i a au: i nga mea katoa hoki i pupuri ahau i a au kei taimaha iho ki a koutou; ina, ka pupuri ano ahau.

10 Kei ahau te pono o te Karaiti, e kore tenei whakamanamana aku e araia e *tetahi* i nga wahi o Akaia.

11 Na te aha? na te mea koia kahore oku aroha ki a koutou? e mātau ana te Atua.

12 Na, taku e mea nei, e meinga ano e ahau, kia motuhia atu ai e ahau te take a te hunga e hiahia ana ki te take; kia kitea ai ratou, i runga i ta ratou e whakamanamana nei, e rite tahi ana ano ki a matou nei.

13 He apotoro teka hoki nga pera, he kai mahi tinihanga, e whakaahua ke ana i a ratou kia rite ki nga apotoro a te Karaiti.

14 Ehara ano hoki *tenei* i te mea whakamiharo; e whakaahua ke ana hoki a Hatana i a ia kia rite ki te anahera o te maramatanga.

15 A ehara i te mea nui ki te whakaahua ke ano āna minita i a ratou kia rite ki nga minita o te tika; na, to

ratou whakamutunga, e rite ki a ratou mahi.

16 ¶ Me ki atu ano e ahau, Kua tetahi e mea he wairangi ahau; a, ahakoa pena, heoi tahuri mai ki a au, ki te wairangi, kia whakamanamana ai ano ahau, he mea iti nei.

17 Taku e korero nei, ehara i te korero i runga i ta te Ariki, engari me te mea i runga i te wairangi, i tenei whakamanamana ka kaha nei.

18 Na, he tokomaha e whakamanamana nei i runga i to te kikokiko, ka whakamanamana ano ahau.

19 Pai tonu hoki koutou, te hunga whakaaro, te ata hanga ki te hunga wairangi.

20 Ka ata hanga hoki koutou ki te whakataurekareka tetahi i a koutou, ki te pau a koutou mea i tetahi, ki te tangohia ta koutou e tetahi, ki te whakakake tetahi, ki te pahiatia to koutou mata e tetahi.

21 Taku korero, he tu ā whakaiti, ara ko matou he ngoi-kore. Na, ki te maia tetahi ki tetahi mea (he kupu wairangi nei taku), ka maia ano ahau.

22 He Hiperu ratou? ahau ano hoki. No Ihairaira ratou? ahau ano hoki. He whanau ratou na Aperahama? ahau ano hoki.

23 He minita ratou na te Karaiti? (He korero porangi taku nei,) tera atu ano toku; hira atu oku mau iuita-

II. KORINITI 11, 12.

nga, nui noa atu oku whiunga, maha noa atu oku mea-tanga ki roto ki nga whare herehere, maha atu oku mate.

24 E rima nga wa i whiua ai ahau e nga Hurai; i te wa kotahi, kotahi pānga o te whiu i mahue o te wha tekau;

25 E toru oku whiunga ki te rakau, kotahi toku akinga ki te kohatu, e toru oku tahuritanga i te kaupuke, kotahi oku po, kotahi oku ra i te rire;

26 Nga haereerenga, maha tonu; nga oranga noatanga i nga awa, nga oranga noatanga i nga kai pahua, nga oranga noatanga i oku whanaunga, nga oranga noatanga i nga tauwi, nga oranga noatanga i te pa, nga oranga noatanga i te koraha, nga oranga noatanga i te moana, nga oranga noatanga i nga teina teka;

27 Mauiui ana, ngenge ana, he maha nga mataaratanga, nga matekaitanga, nga matewaitanga, he maha nga wa i noho puku ai, i matao ai, i kore ai he kakahu.

28 Hei tapiri mo nga mea o waho, ko te mea e whakaeke nei i a au i tenei ra, i tenei ra, ko te manukanuka ki nga hahi katoa.

29 Ko wai te ngoikore ana, a kahore ahau e ngoikore? ko wai kua tūtuki te waewae, a kahore ahau e pawerawera?

30 Ki te mea ka takoto te tikanga kia whakamanamana, me whakamanamana ahau ki toku ngoikoretanga.

31 E mātau ana te Atua, te Matua o to tatou Ariki, o Ihu Karaiti, ko ia nei te whakapaingia ana ake tonu atu, kahore aku teka.

32 I Ramahiku e tiakina ana e ta kingi Areta kawana te pa o nga tāngata o Ramahiku, he mea kia hopukina ai ahau:

33 Heoi tukua iho ana ahau i roto i te kete, ra te matapihi, ra te taiepa kohatu, a mawhiti ana i roto i ona ringa.

UPOKO 12.

Paora i te rangi. 7 Te whakaiti mona. 9 Te kaha mona, 11 Na ratou ana korero mo ana mahi. 14 Ka tae ano ia ki a ratou. 19 Koratou tana i mate-nui ai.

EHARA hoki i te pai kia whakamanamana ahau. Na, me neke atu ahau ki nga putanga, ki nga whakakite-nga mai a te Ariki.

2 E mātau ana ahau ki tetahi tangata i roto i a te Karaiti, ka tekau ma wha enei tau, (i roto ranei i te tinana, kahore ahau e mātau; i waho ranei o te tinana, kahore ahau e mātau: ko te Atua te mātau ana;) kaha-kina atu ana taua tangata taea noatia te tuatoru o nga rangi.

3 Heoi mātau tonu ahau ki taua tangata, (i roto i te tinana ranei, i waho ranei o te tinana, kahore ahau e mātau: ko te Atua te mātau ana;)

4 Kahakina ana ia ki parairiha, a rongo ana i nga mea e kore e taea te korero, e kore

II. KORINITI 12.

ano e tika kia korerotia e te tangata.

5 Ka whakamanamana ahau ki taua tangata: otiia e kore ahau e whakamanamana ki a au ake, engari ki oku ngoikoretanga.

6 Na, ahakoa mea noa ahau kia whakamanamana, kahore oku wairangi; he korero pono hoki taku: heoi me whakamutu, kei nui atu ta tetahi e whakaaro ai ki a au i tana e kite nei i a au, i tana ranei e rongong ai moku.

7 ¶ Na kua homai ki a au he koikoi i te kikokiko, kei kake rawa ake ahau i te nui rawa o nga whakakitenga mai, he anahera na Hatana hei kuru i a au, kei kake rawa ahau.

8 E toru aku inoinga ki te Ariki mo tenei kia neke atu i a au.

9 A ka mea ia ki a au, E ranea ana toku atawhai hei mea mou: mana tonu hoki toku kaha i runga i te ngoikore. Na, engari te whakamanamana ki oku ngoikoretanga pai tonu ki a au, kia ai te kaha o te Karaiti hei tau-poki moku.

10 Mo reira ahua-reka tonu ahau ki nga ngoikoretanga, ki nga whakatupukinotanga, ki nga aitua, ki nga whakatoinga, ki nga rarunga, mo te Karaiti; i a au hoki e ngoikore ana, ko reira ahau kaha ai.

11 Kua wairangi nei ahau i a au e whakamanamana nei; he kaha no ta koutou ki a au: i tika hoki kia whakapaingia

ahau e koutou: kahore hoki ahau i hoki iho i nga tino apotoro i te aha, i te aha; ahakoa ra he kahore noa iho ahau nei.

12 Kua mahia na hoki i roto i a koutou nga tohu o te apotoro, pau rawa ano hoki te manawanui, i runga i nga tohu, i nga mea whakamiharo, i nga merekara.

13 He aha koia te mea i iti iho ai koutou i era atu hahi, ko tenei anake, ko toku korenga e taimaha ki a koutou? whakarereā noatia iho tenei hē oku.

14 ¶ Na, ko te toru tenei o nga wa ka takatū nei ahau ki te haere atu ki a koutou; e kore ano koutou e pehia e ahau *ki tetahi mea maku*: ehara hoki i te mea ko ta koutou taku e rapu nei, engari ko koutou: ehara hoki i te tikanga ko nga tamariki kia kahi taonga mo nga matua, engari ko nga matua mo nga tamariki.

15 Heoi pai tonu ahau ki te whakapau i aku, kia whakapau ano hoki ahau i nga meatanga ki o koutou wairua; otiia i toku aroha ka hira rawa nei ki a koutou, e hoki iho ana te aroha ki a au.

16 Ae ra, kihai ahau i taimaha ki a koutou: heoi, *ki taratou*, he tangata hangareka ahau, a hopukina ana koutou e ahau, he mea tinihanga.

17 I meinga ranei e ahau tetahi o te hunga i tonoa atu e ahau ki a koutou hei whakapati i o koutou taonga maku?

II. KORINITI 12, 13.

18 I whakahaua atu e ahau a Taituha, i tonoa ano hoki tetahi teina hei hoa mona. I whakapati ranei a Taituha i ā koutou taonga māna? he teka ianei i runga i te wairua kotahi to maua haere? he teka ianei ko aua tapuāe ra ano?

19 ¶ Tenei ano tetahi, ki ta koutou, he whakatikatika mo matou ta matou ki a koutou? kei te aroaro o te Atua matou i roto i a te Karaiti e korero ana: ko enei mea katoa, e oku hoa aroha, hei pai mo koutou, hei hanga mo te whare.

20 E wehi ana hoki ahau, kei rokohanga atu koutou e ahau, ina tae atu, kahore e rite ki taku e pai nei, a kei kitea ahau e koutou, kahore e rite ki ta koutou e pai ai: kei rokohanga atu he wha-whai, he hae, he riri, he to-tohe, he ngautuara, he ko-whetewhete, he whakaputa, he tutū:

21 Kei whakaititia ano pea ahau e toku Atua i roto i a koutou, ina tae atu ano ahau, a he tokomaha e tangihia e ahau o te hunga i hara i mua, a kahore ano i ripeneta mo te poke, mo te puremu, mo te hiahia taikaha, i mahia nei e ratou.

UPOKO 13.

E kore e tohungia e ia te hunga hara. 5 Kia ata tirohia iho o ratou ngakau. 7 Kia hoki ki te pai. 11 Mihi.

KO te toru tenei o oku haerenga atu ki a koutou. Ma te mangai o nga kai whakaatu tokorua, tokotoru ranei, ka u ainga kupu katoa.

2 I korero wawe ahau i mua, a ka korero wawe nei ano, me te mea ko te rua tenei o oku wa i kona; heoi i a au ano e ngaro mai nei, ka tuhi-tuhi atu nei ahau inaianei ki te hunga i hara i mua, ki era katoa ano hoki, na, ki te tae atu ano ahau, e kore e tohungia e ahau:

3 E rapu tohu na hoki koutou o te Karaiti e korero ana i roto i a au; kahore nei ia e ngoikore ki a koutou, engari e kaha ana i roto i a koutou.

4 Ahakoa hoki i ripekatia ia i te mea e ngoikore ana, kei te ora ano ia, he mea na to te Atua kaha. He ngoikore nei matou i roto i a ia, heoi ka ora tahi ano me ia, he mea-tanga na to te Atua kaha ki a koutou.

5 Whakamatauria iho koutou, kei roto ranei koutou i te whakapono; tirohia iho o koutou tohu e koutou ano. Kahore oti koutou i mātau ki a koutou, kei roto i a koutou a Ihu Karaiti, ki te mea ehara koutou i te mea akiri? *Rap*

6 Otira e u ana toku whakaaro, e mātau ano koutou ehara matou i te mea akiri.

7 Na ko taku inoi tenei ki te Atua, kia kaua koutou e mea i tetahi kino; ehara i te mea mo matou kia kitea e paingia ana, engari mo koutou kia mahi i te pai, a ko matou hei mea akiri. *Proph*

KARATIA 1.

8 E kore hoki e taea e matou tetahi mea e hē ai te pono, engari te mea e u ai te pono.

9 E hari ana hoki matou ina ngoikore matou, a ko koutou e kaha ana: ko ta matou hoki tenei e inoi nei, ko koutou kia tino tika.

10 Koia ahau ka tuhituhi atu nei i enei mea, i a au e ngaro mai nei, kei tae atu ahau ki kona, a ka koi taku i runga i te mana kua tukua mai nei e te Ariki ki a au hei hanga mo te whare, ehara i te mea hei wahi.

11 ¶ Heoi ra, e oku tēina,

kia koa, kia tino tika, kia marie te ngakau, kia kotahi te whakaaro, kia mau te rongo; a tera te Atua o te aroha, o te maunga rongo, e noho ki a koutou.

12 Oha atu tetahi ki tetahi, hei te kihi tapu ano.

13 ¶ Tenei te hunga tapu katoa te oha atu nei ki a koutou.

14 ¶ *Kia tau* ki a koutou katoa te atawhai o te Ariki, o Ihu Karaiti, me te aroha o te Atua, me te whiwhinga tahi-tanga ki te Wairua Tapu. Amine.

KO TE PUKAPUKA A PAORA APOTORO

KI TE

HUNGA O KARATIA.

UPOKO 1.

Mo ratou i tahuri atu ki etahi kai whakaako ke. 8

Kanga mo nga pera. 11

Na te Atua tana Rongo pai.

14 I mua i he tana mahi.

15 Inaianei kua rere ke.

NA Paora, na te apotoro, (kihai nei i tonoa e te tangata, kihai ano hoki i meinga e te tangata; engari e Ihu Karaiti, e te Atua Matua

ano hoki, nāna nei ia i whakaara i te hunga mate;)

2 Na nga tēina katoa hoki i a au nei, ki nga hahi o Karatia:

3 *Kia tau* ki a koutou te aroha noa me te rangimarie, he mea na te Atua Matua, na to tatou Ariki hoki, na Ihu Karaiti,

4 I tuku nei i a ia ano mo o tatou hara, kia whakaorangia ai tatou e ia i tenei ao kino, i

KARATIA 1.

runga i ta te Atua, i ta to ta-tou Matua i pai ai:

5 *Waiho atu i a ia te kororia ake ake ake. Amine.*

6 ¶ Miharo tonu ahau ki te hohoro o to koutou nekehanga atu i te kai karanga o koutou i runga i te aroha noa o te Karaiti; *na*, kei tetahi rongo pai ke na *koutou*:

7 Ehara nei ia i te mea ke; engari he hunga tena e whakararuraru ana i a koutou, e mea ana kia whakaputaia ketia te rongo pai o te Karaiti.

8 Na, ahakoa ko matou, ko tetahi anahera ranei o te rangi, ki te kauwhau i te rongo pai ki a koutou puta ke i ta matou i kauwhau ai ki a koutou, kia kangā ia.

9 Kia rite ki ta matou i ki ai i mua, a ka kiia nei ano e ahau inaianei, ki te puta ke te kauwhau a tetahi ki a koutou i tera kua riro i a koutou, kia kangā ia.

10 He tangata ranei, ko te Atua ranei, taku e kukume nei? he tangata ranei aku e whai nei kia whakamanawarekatia? me he mea kei runga nei au i te whakamanawareka tangata, ehara ahau i te pononga na te Karaiti.

11 ¶ Na kia mohio mai koutou, e *oku* tēina, te rongo pai i kauwhautia e ahau, ehara i te tangata.

12 He teka hoki na te tangata i riro mai ai i a au, nāna ranei i whakaako ki a au, engari na te whakakitenga mai a Ihū Karaiti.

13 Kua rongo na hoki koutou ki taku whakahaere i mua, i runga i ta nga Hurai tikanga, nui atu taku whakatoi, taku whakangarongaro i te hahi a te Atua:

14 A i ta nga Hurai tikanga i pahika noa atu ahau ki mua atu i te tokomaha o *oku* hoa o toku iwi, hira noa atu toku ngakau ki nga whakarerenga iho a *oku* mātua.

15 Otira i te mea ka pai te Atua, nāna nei ahau i motu mai i roto tonu i te kōpū o toku whaea, i karanga hoki, he meatanga na tona aroha noa,

16 Ki te whakakite i tana Tama i roto i a au, kia kauwhautia ai ia e ahau ki nga tau iwi; i reira tonu iho kihai ahau i kororerero ki te kikokiko, ki te toto:

17 Kihai ano ahau i haere atu ki Hiruharama ki te hunga i apotorotia i mua i a au; heoi haere ana ahau ki Arapia, a hoki ana ki Ramahiku.

18 ¶ A, muri iho i te takanga o nga tau e toru, ka haere atu ahau ki Hiruharama kia kite i a Pita, a tekau ma rima nga ra i noho ai ahau ki a ia.

19 Kihai ano ahau i kite i tetahi atu o nga apotoro, ko Hemi anake, ko te teina o te Ariki.

20 Na, nga mea e tuhituhia atu nei e ahau ki a koutou, nana, kei te aroaro tenei o te Atua, kahore aku teka.

21 Muri iho ka haere ahau ki nga wahi o Hiria, o Kirikia;

22 Kihai ano toku mata i

KARATIA 1, 2.

mohiotia e nga hahi o Huria i roto i a te Karaiti :

23 I rongo kau ratou, Te kai whakato i o matou i mua, e kauwhautia ana e ia inaianei te whakapono i whakangaromia e ia i mua.

24 A whakakororia ana ratou i te Atua mo tana ki a au.

UPOKO 2.

Tona hokinga ki Hiruharama.

3 *Taituha kihai i kotia.*

11 *Whakaheanga ki ta Pita.*

15 *Kei te whakapono ki a Ihu he tika mo te Hurai, mo te Kariki.* 20 *E kore nga tangata pera e mahi i te he.*

MURI iho, ka tekau ma wha nga tau, ka haere ano maua ko Panapa ki Hiruharama, me te kawe ano ahau i a Taituha hei hoa moku.

2 A na te whakakitenga mai ahau i haere ai, a whakapukina ana e ahau ki a ratou te rongo pai e kauwhautia nei e ahau ki nga tauwi; otiia i meatia pukutia ki te hunga whai ingoa, kei maumau kau toku oma onaianei, o mua ranei.

3 Na, kihai a Taituha toku hoa, he Kariki hoki ia, i meinga kia kotia :

4 Mo nga teina teka hoki i whakaurua pukutia mai, i haere puku mai nei ki te tiroiro i to matou here-koretanga i roto i a Karaiti Ihu, kia whakataurekareka ai ratou i a matou.

5 Kihai ano matou i whakangawari iho, i rongo ki a ratou, ahakoa kotahi haora; he

mea kia mau ai te pono o te rongo pai ki a koutou.

6 Na, te hunga whai ingoa, (ahakoa he aha ranei ratou, hei aha maku? kahore a te Atua whakapai ki te kanohi tangata :) kihai hoki te hunga whai ingoa i whakaatu mea ki a au :

7 Engari to ratou kitenga kua tukua ki a au te rongo pai ki te kotinga kore, pera hoki me tera ki te kotinga kua tukua ki a Pita ;

8 (Te kai mahi hoki i roto i a Pita hei apotoro ki te kotinga, mahi ana ano ia i roto i a au kinga tauwi :))

9 Heoi ka matau a Hemi, a Kipa, a Hoani, i meinga nei hei pou, ki te aroha noa kua homai ki a au, ka homai e ratou nga ringa matau hei whakahoatanga ki a maua ko Panapa, mo maua kia haere ki nga tauwi, ko ratou ia ki te kotinga :

10 Otiia me mahara maua ki te hunga rawakore; he mea ano tena i hihiko noa ai ahau.

11 ¶ A, ka tae a Pita ki Anatioka, ka whakatika atu ahau ki a ia, he kanohi, he kanohi, no te mea kua tika kia whakahengia ia.

12 I mua hoki o te taenga mai o etahi i a Hemi, e kai tahi ana ia me nga tauwi: na, to ratou taenga mai, neke atu ana ia, momotu ke ana i a ia; i matakau hoki i te hunga o te kotinga.

13 A i uru ano era atu Hurai ki tana tinihanga; heoi

KARATIA 2, 3.

riro pu a Panapa i to ratou tinihanga.

14 Etoi toku kitenga kihai ratou i haere tika i runga i te pono o te rongo pai, ka mea ahau ki a Pita i te aroaro o te katoa, Ki te mea ko koe, he Hurai, ka whakatauiwi, a kahore e whakahurai, he aha koe ka mea ai i nga tauwi kia whakahurai?

15 Tatou, nga Hurai tupu nei, ehara nei i te hunga hara no nga tauwi,

16 A kua mohio nei, ehara nga mahi o te ture i te mea e tika ai te tangata, engari na te whakapono ki a Ihu Karaiti, na, kua whakapono nei tatou ki a Ihu Karaiti, kia ai te whakapono ki a te Karaiti hei tika mo tatou, he teka ia nga mahi o te ture: no te mea hoki kahore rawa he kikokiko e tika i nga mahi o te ture.

17 Na, i a tatou e whai nei kia whakatikaia i roto i a te Karaiti, ki te mau ko tatou nei he hunga hara, ko ta te Karaiti ranei e minita ai he hara? Kahore rapea.

18 Ki te mea hoki ka hanga ano e ahau nga mea i wahia e ahau, e whakakite ana ahau i a au ano, he tangata hara.

19 Na te ture hoki ahau i tupapaku ai ki te ture, kia ora ai ahau ki te Atua.

20 Kua ripekatia tahitia ahau me te Karaiti: a e ora nei, ehara i te mea ko ahau, engari ko te Karaiti e ora ana i roto i a au: a e ora nei ahau i roto i te kikokiko, he oranga na te whakapono ki te Tama a te

Atua, i aroha nei ki a au, i tuku nei i a ia moku.

21 Kahore aku whakakahore i te aroha noa o te Atua: me he mea hoki i na runga mai te tika i te ture, maumau mate noa a te Karaiti.

UPOKO 3.

Kahore he tika i nga mahi a te ture. 6 Kei te whakapono o Aperahama te manaakitanga, 15 kahore i te ture.

ENGA Karatia whakaaro-kore, na wai koutou i whaiwhaiā i kore ai e rongo ki te pono; i whakakitea nuitia na a Ihu Karaiti i roto i a koutou, ki o koutou kanohi, he mea ripeka?

2 Ko tenei anake taku e mea nei kia whakaakona mai e koutou, Na nga mahi ranei o te ture te rironga mai o te Wairua i a koutou, na te mea ranei ka rongo ki te whakapono?

3 Ha, kia pena koutou te whakaaro-kore? i runga i te Wairua ta koutou timatanga, a me whakaoti ranei e koutou i runga i te kikokiko?

4 He hua kore noa iho ranei o koutou matenga maha? ki te mea ra he mea hua kore.

5 Na, te kai whakawhiwhi i a koutou ki te Wairua, e mahi nei hoki i nga merekara i roto i a koutou, no nga mahi ranei o te ture *tana*, no te rongo ranei ki te whakapono?

6 Ka rite hoki ki a Aperahama i whakapono ki te Atua, a whakairia ana ki a ia hei tika.

7 Na kia mātau koutou, te

KARATIA 3.

hunga o te whakapono, he tamariki enei na Aperahama.

8 A, te kitenga o te karaipiture i mua, he whakapono ta te Atua hei whakatika mo nga tauwi, ka kauwhautia wawetia te rongo pai ki a Aperahama, Māu ka manaakitia ai nga tauwi katoa.

9 Ina, te hunga o te whakapono, e manaakitia ngatahitia ana me Aperahama i whakapono ra.

10 Te hunga katoa hoki o nga mahi o te ture, kei raro ratou i te kanga: kua oti hoki te tuhituhi, Ka kangā nga tāngata katoa kahore e mau ki nga mea katoa kua oti te tuhituhi ki te pukapuka o te ture, hei mahi *ma ratou*.

11 He hanga mārāma ano tenei, e kore e tika i te ture tetahi tangata i te aroaro o te Atua: Ma te whakapono hoki e ora ai te tangata tika.

12 He teka hoki no te whakapono te ture: engari, Ki te mahia aua mea e te tangata, ma aua mea ia e ora ai.

13 Kua hokona tatou e te Karaiti i roto i te kanga a te ture, i a ia nei i meinga hei kanga mo tatou: kua oti hoki te tuhituhi, He mea kanga nga tāngata katoa e whakairia ki runga ki te rakau:

14 Kia tae ai i runga i a Karaiti Ihu ki nga tauwi te manaakitanga o Aperahama; kia riro mai ai i a tatou te kupu homai o te Wairua, he mea na te whakapono.

15 ¶ E *oku* tēina, he kupu tangata taku nei; Ahakoa he

kawenata na te tangata, ki te mea ka oti te whakau, kahore he tangata hei turaki, hei tapiri mai ranei.

16 Na, i korerotia nga kupu whakaari ki a Aperahama, ki tana whanau ano hoki. Kihai ia i mea, Ki nga whanau, me te mea he tokomaha; engari me te mea he kotahi, Ki tau whanau hoki, ko te Karaiti hoki ia.

17 Na, ko taku kupu tenei, I whakaukia te kawenata i mua e te Atua he whakaaro ki a te Karaiti, a ka wha rau ka toru tekau tau i muri mai, ko te ture; na e kore tenei e tau hei turaki i te *kawenata*, hei whakakahore i te kupu whakaari.

18 Me he mea hoki na te ture i *riro mai ai* te kāinga, ehara i te mea na te kupu whakaari; otira i na runga mai i te kupu whakaari ta te Atua homaitanga ki a Aperahama.

19 Hei aha ra te ture? I tapiritia mo nga pokanga ketanga, kia tae mai ra ano te whanau mona nei te kupu whakaari; he mahinga na nga anahera, i roto i te ringa o te takawaenga.

20 Na, he teka mo te kotahi te takawaenga; kotahi ia te Atua.

21 He turaki ranei ta te ture i a te Atua kupu whakaari? Kahore rapea: me i homai hoki he ture e kaha ana ki te whakaora, ina kua puta ake te tika i te ture.

22 Heoi kua kopania nga mea katoa e te karaipiture ki

KARATIA 3, 4.

raro o te hara, kia homai ai ki te hunga e whakapono ana, te mea i whakaaria mai i runga i te whakapono ki a Ihu Karaiti.

23 ¶ Na, i mua o te taenga mai o te whakapono, e puritia ana tatou i raro i te ture, he mea kopani iho, kia taea ra ano te whakapono e whakapuakina nei i muri.

24 Na kua meinga nei te ture hei kai whakaako mo tatou, *hei arahi* ki a te Karaiti, kia tika ai tatou i te whakapono.

25 A ka tae mai nei te whakapono, mutu ake to tatou meatanga mai e te kai whakaako.

26 He tamariki katoa hoki koutou na te Atua, he mea na te whakapono ki a Karaiti Ihu.

27 Te hunga katoa hoki o koutou kua iriiria ki roto ki a te Karaiti, kua kakahuria e koutou a te Karaiti.

28 Kahore he Hurai, kahore he Kariki, kahore he pononga, kahore he rangatira, kahore he tāne, wahine ranei: kotahi tonu hoki koutou katoa i roto i a Karaiti Ihu.

29 A ki te mea na te Karaiti koutou, he whanau na Ape-rahama, mo koutou hoki te kāinga i runga i te kupu whakaari.

UPOKO 4.

He tamariki tatou i mua e tiakina ana e te ture. 5 Inaianei he tamariki na te Atua i roto i a te Karaiti.

12 *I mua e mate nui ana ratou ki a ia ki a Paora. 21 He tamariki rangatira tatou.*

NA, ko taku kupu tenei, I te mea he tamariki nei ano te tangata mona te kāinga, kahore ia e rere ke i te pononga, ahakoa ko te rangatira ia o nga mea katoa;

2 Engari e meatia ana e nga kai tohutohu, e nga kai titiro, kia taea ra ano te wa i whakaritea e te pāpā.

3 Waihoki ko tatou, i te mea he tamariki, he pononga tatou na nga mea timatanga o te ao:

4 Na, ka tutuki te taima, ka tonoa mai e te Atua tana Tama, he whanau na te wahine, hei mahi i ta te ture,

5 Hei hoko i te hunga i raro i te ture, kia whiwhi ai tatou ki te whakatamarikitanga.

6 A no te mea he tamariki koutou, kua tonoa mai e te Atua te Wairua o tana Tama ki roto ki o koutou ngakau, e karanga ana, E Apa, e Pa.

7 Na mutu ake tou ponongatanga, engari he tama koe; a ki te mea he tama, mou ano nga mea a te Atua i roto i a te Karaiti.

8 ¶ Heoi i reira, i te mea kihai koutou i mātau ki te Atua, he pononga koutou na nga mea ehara nei i te atua tupu.

9 Inaianei ia i te mea ka mātau ki te Atua, engari ano ka matauria e te Atua, he aha koutou ka tahuri ai ano ki aua mea ngoikore, rawa-

KARATIA 4.

kore, ki nga mea timatanga, e hokia na e to koutou hiahia kia waiho koutou hei pononga ma aua mea?

10 E mau ana koutou ki nga ra, ki nga marama, ki nga wa, ki nga tau.

11 E manawapa ana ahau ki a koutou, kei kore he hua mo taku i mahi ai i roto i a koutou.

12 ¶ E oku tēina, ko taku tohe tenei ki a koutou, kia rite ki a au; e rite ana hoki ahau ki a koutou: kahore a koutou mahi hē ki a au.

13 E mātau ana koutou he mea na te ngoikore o toku kikokiko taku kauwhau i te rongo pai ki a koutou i mua.

14 Heoi kihai koutou i whakahawea, i whakakino ki toku whakamatautauranga i toku kikokiko: na tahuri mai ana koutou ki a au, ano he anahera na te Atua, me te mea ano ko Ihu Karaiti.

15 He haringa pehea ra tera o koutou? He kai whakaatu hoki ahau mo ta koutou, me i taea kua hikarohia e koutou o koutou kanohi, kua homai ki a au.

16 Koia, kua hoariritia ranei ahau ki a koutou, moku i korero i te pono ki a koutou?

17 To ratou matenui ki a koutou, ehara i te pai: engari e mea ana ratou kia tutakina mai koutou, kia matenui ai koutou ki a ratou.

18 He mea pai ia kia matenuitia i runga i te pai i nga

wa katoa, kauaka ano hoki i toku nohoanga anake ki a koutou.

19 E aku tamariki, ka rua nei oku mamaetanga mo koutou, *ano he wahine* e whanau ana, kia whai ahua ra ano a te Karaiti i roto i a koutou.

20 He hiahia toku kia tae atu ki a koutou aianei, kia puta ke ano toku reo; no te mea e ruarua ana ahau ki a koutou.

21 ¶ Ki mai ki a au, e te hunga e hiahia ana kia noho i raro i te ture, kahore ianei koutou e rongo ki ta te ture?

22 Kua oti hoki te tuhituhi, tokorua nga tamariki a Ape-rahama, kotahi na te pononga, kotahi na te wahine rangatira.

23 Ta te pononga, no te kikokiko tona whanautanga; a, ta te wahine rangatira he mea korero mai i mua.

24 Na, he mea whakarite aua mea: ko nga kawenata e rua hoki enei; kotahi no maunga Hinai, whanau ake āna hei taurekareka, ko Hakara tenei.

25 Ko tenei Hakara hoki ko maunga Hinai i Arapia, a e rite ana ki Hiruharama onai-ianei, he pononga nei hoki ia ratou ko ana tamariki.

26 Tena ko Hiruharama i runga he mea here-kore, ko te whaea ia o tatou katoa.

27 Kua oti hoki te tuhituhi, Kia hari, e te pākoko kahore nei e whanau; hamama, karanga, e te mea kahore nei kia whakamamae; he tini

KARATIA 4, 5.

hoki nga tamariki a te mea mabue i ā te mea whai tāne.

28 ¶ Na, tatou nei, e *oku* tēina, e rite ana ki a Ihaka, he tamariki na te kupu whakaari.

29 A e rite ana ano ki to mua, tera no te kikokiko nei tona whanautanga, whakatoia ana e ia te *tama* no te Wairua nei tona; e pera ana ano inaianei.

30 Heoi e pehea ana ta te karaipiture? Peia atu te wahine pononga raua ko tana tama: e kore hoki te tama a te wahine pononga raua ko te tama a te wahine rangatira e whiwhi tahi ki te taonga.

31 Na ehara tatou, e *oku* tēina, i te tamariki na te wahine pononga, engari na te wahine rangatira.

UPOKO 5.

Kia u. 2 Kei kotia. 13 Te upoko nui. 19 Nga mahi a te ngakau maori; 22 a te Wairua.

E TU ra koutou i runga i te tikanga here-kore, i ta te Karaiti i wewete nei i a tatou; kei mau hoki ki roto ki te ioka pononga.

2 ¶ Na, tenei ahau, a Paora, te mea nei ki a koutou, Ki te kotia koutou, e kore koutou e whai pai i a te Karaiti.

3 He whakaatu tuarua tenei naku ki nga tāngata katoa e kotia ana, kua mau ratou i te ture kia mahia katoatia.

4 Kua mawheto koutou i a te Karaiti, e te hunga e

whakatikaia ana e te ture, kua taka iho koutou i runga i te aroha noa.

5 Ko tatou hoki, na te Wairua to tatou tatari ki te tika e tumanakohia nei, e ahu mai nei i te whakapono:

6 I roto hoki i a Karaiti Ihu kahore o te kotinga wahi, kahore ano o te kotinga-kore; engari ko te whakapono e mahi ana i runga i te aroha.

7 I pai ta koutou oma; na wai koutou i whakaware, i kore ai koutou e rongu ki te pono?

8 Ehara *tenei* whakaaro i te mea na te kai karanga i a koutou.

9 He iti te rewena, rewena-tia ake te puranga katoa.

10 E u ana *oku* whakaaro ki a koutou i roto i te Ariki, e kore e rere ke o koutou whakaaro: na, te kai whakararu i a koutou, ahakoa ko wai ranei, māna ano tona whakawakanga e pikau.

11 Me au ano, e *oku* tēina, ki te mea he kauwhau tonu nei taku i te kotinga, he aha ahau ka whakatoia tonutia ai? penei kua kore to te ripeka tūtukitanga waewae.

12 Pai kau ki a au me i motuhia atu te hunga e whakararu na i a koutou.

13 ¶ Kua karangatia nei hoki koutou, e *oku* tēina, ki te tikanga here-kore; kua ia to koutou tikanga here-kore e *waiho* hei whakaoho i te kikokiko, engari me mahi koutou tetahi ki tetahi i runga i te aroha.

KARATIA 5, 6.

14 E takoto topu ana hoki te ture katoa i roto i te kupu kotahi, ara, Kia aroha koe ki tou hoa tata, ano ko koe.

15 Ki te ngau ia koutou, ki te kai tetahi i tetahi, kia tupato kei pareho tetahi i tetahi.

16 ¶ Na ko taku kupu tenei, Haere i roto i te Wairua, a e kore e whakaritea e koutou te hiahia o te kikokiko.

17 E hiahia ana hoki te kikokiko tika ke i te Wairua, me te Wairua tika ke i te kikokiko: a e whawhai ana enei tetahi ki tetahi: tē taea nga mea i hiahia ai koutou.

18 Na, ki te arahina koutou e te Wairua, kahore koutou i raro i te ture.

19 A e kitea ana nga mahi a te kikokiko, ara te puremu, te moe tahae, te poke, te hiahia taikaha,

20 Te karakia whakapakoko, te makutu, te mauāhara, te whawhai, te tauwhāinga, te riri, te totohe, te wehewehe-nga, te titorehanga,

21 Te hae, te kohuru, te haurangi, te kakai, me nga mea e rite ana ki enei: me korero wawe e ahau enei mea ki a koutou, me pera me taku i korero ai i mua, te hunga e mahi ana i nga mea penei, e kore e whiwhi ki te rangatiratanga o te Atua.

22 Ko nga hua ia o te Wairua, he aroha, he hari, he rangimarie, he manawanui, he ngawari, he ngakau pai, he whakapono,

23 He ngakau māhaki, he ngakau kua taea te pēhi: ka-

hore he ture e riria ai enei mea.

24 Te hunga ia o te Karaiti, kua ripekatia e ratou te kiko-kiko, me ona hihiritanga, me ona hiahia.

25 ¶ Ki te mea e ora ana tatou i roto i te Wairua, kia haere ano tatou i roto i te Wairua.

26 Kei whaia e tatou te kororia hua kore, te whakapataritari tetahi ki tetahi, te hae tetahi ki tetahi.

UPOKO 6.

Te teina kua he; 2 kia ata hanga ki a ia. 6 Kia oha-oha. 9 Kaha ki te pai. 11 Ta aua kai whakaako he. 14 Tana i whakanui ai ko te Karaiti i ripekatia.

E OKU tēina, ki te haukotia te tangata e tetahi hē, ma koutou, ma te hunga i te Wairua, e whakaara ake taua tangata pera, kia māhaki hoki te wairua; me te titiro iho ano ki a koe, kei whakama- tautauria ano koe.

2 Pikaua e tetahi nga whakataimaha o tetahi, hei whakarite i ta te Karaiti ture.

3 Ki te ki hoki tetahi ki a ia ano he mea nui ia, i te mea he kore noa iho ia, e nuka ana ia ki a ia ano.

4 Engari kia whakamatauria tana mahi ake e tetahi, e tetahi, katahi ka ai he whakamanamananga mana ki tana anake, e kore ano e ahu ki ta tetahi.

5 Ko tana ake pikaunga

KARATIA 6.

hoki hei kawenga ma tetahi, ma tetahi.

6 ¶ Te tangata e whakaa-kona ana ki te kupu, me whakawhiwhi e ia *tona* kai whakaako ki nga mea pai katoa.

7 Kei whakapohēhētia koutou; kahore te Atua e tinihangatia: ko ta te tangata hoki e rui ai, ko tenei tana e kototi ai.

8 Na, te tangata e rui ana, he whakaaro ki tona kikokiko, tana o te kikokiko e kokoti ai he pirau; te tangata e rui ana, he whakaaro ki te Wairua, tana o te Wairua e kokoti ai he oranga tonutanga.

9 I a tatou e mea ana i te pai, kua tatou engakau-kore: a te wa hoki e rite ai ka kokoti tatou, ki te kahore tatou e ngoikore.

10 Na, i te mea e whai takywa ana tatou, kia mahi tatou i te pai ki nga tāngata katoa, tera noa ake ia ki te hunga o te whare o te whakaponu.

11 ¶ Titiro ki te nui o nga reta e tuhituhi nei toku ringa ake ki a koutou.

12 Te hunga e hiahia ana ko te ahua o te kikokiko kia pai, ko ratou hei mea i a koutou

kia kotia; he mea kau kei whakatoia ratou mo te ripeka o te Karaiti.

13 Kahore hoki taua hunga na ano i kotia e mau ki te ture; engari e hiahia ana kia kotia koutou, kia whakamanamana ai ratou ki to koutou kikokiko.

14 Ki a au ia kua rawa he whakamanamana, ko te ripeka anake o to tatou Ariki, o Ihu Karaiti, i ripekatia ai te ao ki a au, me ahau hoki ki te ao.

15 I roto hoki i a Karaiti Ihu kahore he aha o te kotinga, kahore hoki o te kotinga kore, engari ko te mea hanga hou.

16 Na, te hunga e haere ana i runga i tenei ruri, *kia tau* te rangimarie me te mahi tohu ki a ratou, ki te Iharaira hoki a te Atua.

17 ¶ A muri ake nei kua tetahi e whakararuraru i a au: e mau ana hoki ki toku tinana nga tohu a te Ariki, a Ihu.

18 ¶ E oku tēina, *kia tau* te aroha noa o to tatou Ariki, o Ihu Karaiti ki o koutou wairua. Amine.

KO TE PUKAPUKA A PAORA APOTORO

KI TE

HUNGA O EPEHA.

UPOKO 1.

Mihi. 3 Whakawhetai. 4 To tatou whiriwhiringa i roto i a Ihu, 11 nana ake. 15 Inoi mo ratou.

NA Paora, i paingia e te Atua hei apotoro ma Ihu Karaiti, ki te hunga tapu e noho ana i Epeha, ara, ki te hunga whakapono i roto i a Karaiti Ihu:

2 *Kia tau* ki a koutou te aroha noa, me te rangimarie, he mea na te Atua, na to tatou Matua, na te Ariki hoki, na Ihu Karaiti.

3 ¶ *Kia whakapaingia* te Atua, te Matua o to tatou Ariki, o Ihu Karaiti, nana nei tatou i manaaki ki nga manakitanga katoa o te wairua, ki nga mea o te rangi, i roto i a te Karaiti:

4 I runga i te tikanga i whiriwhiria ai tatou e ia i roto i a ia i mua i te orokohanga o te ao hei hunga tapu, koha-kore i tona aroaro, i runga i te aroha.

5 He mea whakarite hoki tatou nāna i mua, hei tama-

riki māna, i roto i a Ihu Karaiti, ta tona whakaaro hoki i pai ai,

6 Hei whakamoemititanga mo te kororia o tona aroha noa, i atawhaitia ai tatou i roto i tana i aroha ai.

7 Kei roto nei i a ia to tatou whakaoranga i runga i ona toto, ara te murunga o nga hē; he hua hoki no tona aroha noa,

8 I hira rawa nei ki a tatou i runga i nga whakaaro nui, i nga whakaaro mohio katoa;

9 A whakakitea mai ana e ia ki a tatou tana pai i ngaro ra, tana hoki i ahua-reka ai, tana i whakatakoto ai i mua i roto i a ia,

10 Mo te tikanga, ina rite nga wa, kia huihuia nga mea katoa i roto i a te Karaiti, nga mea i te rangi, me nga mea i te whenua, i roto ano i a ia:

11 I whakawhiwhia nei matou i roto i a ia, he mea whakarite i mua i runga i tana i whakatakoto ai, e mahia ana hoki e ia nga mea katoa i runga i ta tona whakaaro i pai ai:

EPEHA 1, 2.

12 Kia ai matou hei whakamoemititanga mo tona kororia, *ara* matou te hunga kua tumanako wawe ki a te Karaiti.

13 Me koutou hoki *tumanako ana ano* koutou ki a ia, i to koutou rongonga ai ki te kupu o te pono, ki te rongo pai o to koutou oranga: a, to koutou whakaponotanga ki a ia, na, hiritia ana koutou e te Wairua Tapu i korerotia mai i mua:

14 Ko ia nei te wahi tuatahi o nga taonga mo tatou, kia whakaorangia ra ano te mea i hokona, hei whakamoemititanga mo tona kororia.

15 ¶ Na konei ahau, i toku rongonga ai ki to koutou whakapono ki te Ariki, ki a Ihu, ki te aroha ano hoki ki te hunga tapu katoa,

16 Kahore e mutu taku whakawhetai mo koutou, i a au e mahara nei ki a koutou i aku inoinga;

17 Kia homai ki a koutou e te Atua o to tatou Ariki, o Ihu Karaiti, e te Matua o te kororia, te wairua o te whakaaro nui, o te whakakitenga i runga i te mohiotanga ki a ia:

18 Kia whakamaramatia nga kanohi o to koutou hinengaro; kia mātau ai koutou ki te mea o tana karanga e tumanakohia atu nei, ki te kororia nui hoki o tona taonga i roto i te hunga tapu,

19 Ki te nui whakaharahara hoki o tona kaha ki a tatou, ki te hunga e whakapono nei,

ara te mahinga a te mana o tona kaha,

20 I mahi ai ia i roto i a te Karaiti i tana whakaarahanga i a ia i te hunga mate, a whakanohoia ana ia ki tona matau, ki nga wahi i te rangi,

21 Ki runga ake i nga kawanatanga katoa, i te mana, i te kaha, i te rangatiratanga, i nga ingoa katoa hoki e karangatia ana, ehara i te mea ko o tenei ao anake, ko o tera ao ano hoki:

22 A tukua ana e ia nga mea katoa ki raro ki ona waewae, a meinga ana ia hei upoko i runga i nga mea katoa mo te hahi,

23 Ara mo tona tinana, e kī tonu nei i a ia, i te kai whakaki o nga mea katoa i roto i te katoa.

UPOKO 2.

Kua ara ratou i te mate, 8 he mea na tona aroha; 10 hei mahi i te mahi a te tama rangatira. 11 Kei rite ki nga tauivi.

ME koutou ano, i te mea he tupāpaku i nga hē, i nga hara;

2 I haereerea ra e koutou i mua i runga i to tenei ao tikanga, i to te rangatira o te kaha o nga kapua, o te wairua e mahi nei inaianei i roto i nga tamariki a te tutū,

3 Ara i era hoa o tatou katoa i mua, i a tatou e noho ana i runga i nga hiahia o to tatou kikokiko, e mahi ana i nga mea e paingia ana e te kikokiko, e nga whakaaro; a i te maoritanga he tamariki

na te riri, he pera me era atu.

4 Ko ta te Atua ia *tenei*, ranea rawa hoki tana mahi tohu, nui atu tona aroha i arohaina mai ai tatou e ia,

5 Na, i te mea he tupāpaku tatou i nga hē, whakaorangia ngatahitia ana tatou e ia me te Karaiti, (he aroha noa i whakaorangia ai koutou);

6 A whakaarahia ngatahitia ana e ia, whakanohoia ngatahitia ana ki nga *wahi* o te rangi i roto i a Karaiti Ihu:

7 Kia whakakitea ai e ia i nga wa e haere ake nei te hira o te taonga o tona aroha noa, i a ia ka ngawari mai nei ki a tatou i roto i a Karaiti Ihu.

8 Na te aroha noa hoki koutou i whakaorangia ai i runga i te whakapono; ehara ano hoki tenei i te mea no koutou: he mea homai noa na te Atua:

9 Ehara i nga mahi, kei whakamanamana te tangata.

10 He mahinga hoki tatou nāna, he mea hanga i roto i a Karaiti Ihu mo nga mahi pai i whakaritea e te Atua i mua hei haereerenga mo tatou.

11 ¶ Na kia mahara he tau-iwi koutou i mua no te wahi ki te kikokiko, a e kiia ana, ko te kotinga-kore e tenei e kiia nei, ko te kotinga, ara to te kikokiko, he mea na te ringaringa;

12 I taua wa he mea motu ke atu koutou i a te Karaiti, ehara i te tangata whenua no

Iharaira, he tangata ke ki nga kawenata o te mea i whakaaria mai i mua, kahore he tumanakotanga atu, he hunga Atua-kore i te ao:

13 Tena ko tenei i roto i a Karaiti Ihu ko koutou, ko te hunga i tawhiti i mua, kua meinga e nga toto o te Karaiti kia tata.

14 Ko ia hoki to tatou mau-nga rongo, nāna hoki i mea nga mea e rua kia kotahi, a whakahorua iho e ia te pātu e arai ana i waenga;

15 Whakakahoretia ana hoki e ia ki tona kikokiko te mauāhara, ara, te ture i nga kupu ako, i nga tikanga; kia hangā ai i roto i a ia te tokorua hei kotahi, hei tangata hou, a mau ake te rongo i a ia;

16 Kia houhia ai ano hoki e ia te rongo a te tokorua ki te Atua i roto i te tinana kotahi, he meatanga na te ripeka, ko tana mea hoki ia hei whakamate mo te mauāhara:

17 A haere mai ana ia, kau-whau ana i te maunga rongo ki a koutou i tawhiti, ki a *matou* hoki e tata ana.

18 Nāna hoki tatou, te tokorua nei, i whai tatanga ai i roto i te Wairua kotahi ki te Matua.

19 Na, i muri nei, ehara koutou i te tangata ke, i te manene; engari he tangata whenua koutou tahi ko te hunga tapu, no te whare ano hoki o te Atua;

20 He mea hanga ki runga ki te turanga o nga apotoro ratou ko nga poropiti, ko Ihu

Karaiti ano hei tino *kamaka* mo te kokonga;

21 Kei roto nei i a ia te whare katoa, he mea ata hono marie, e neke ake ana hei whare tapu i roto i te Ariki:

22 Me koutou ano e hangā tahitia ana i roto i a ia, hei nohoanga mo te Atua, he mea na te Wairua.

UPOKO 3.

Te kupu mo nga tauwi ka ora kua tukua nei ki a ia.

14 *Ana inoi.*

NA konei taku, ta Paora, he herehere nei au na Karaiti Ihu, hei mahi ki a koutou, ki nga tauwi;

2 Kua rongo pea koutou ki te mahi tuari i te aroha noa o te Atua kua homai nei ki a au, hei mea ki a koutou:

3 Ara tana whakakitenga, tana whakaaturanga i te mea ngaro ki a au; (he pera hoki me *ena kupu* torotoru i tuhi-tuhia na e au i mua;

4 A ka oti i a koutou tena te korero, ka mohio koutou ki toku matauranga ki te mea ngaro a te Karaiti),

5 Kihai nei i whakakitea i era atu whakatupuranga ki nga tama a te tangata, *kihai* i penei me te whakakitenga inaianei e te Wairua ki ana apotoro tapu ratou ko nga poropiti;

6 Ara mo nga tauwi kia uru tahi ki nga taonga, kia tinana kotahi, kia whiwhi ngatahi ki ana mea i whakaaria i mua i roto i a te Karaiti, he meata-nga na te rongo pai:

7 Mo reira ahau i meinga nei

hei minita, i runga i ta te aroha noa o te Atua, i homai noa nei ki a au, he mahinga na tona kaha.

8 I homai ano tenei aroha noa ki a au, ki te iti rawa o te hunga tapu katoa, kia kau-whautia e *ahau* i roto i nga tauwi te taonga o te Karaiti e kore nei e taea te rapu atu;

9 Kia whakakitea ano hoki e *ahau* ki nga tāngata katoa te whiwhinga tahitanga ki te mea ngaro, ki te mea i hunā nei i era wa noa atu i roto i te Atua, nāna nei ta te Karaiti hanganga i nga mea katoa:

10 Kia ai te hahi inaianei hei whakaatu ki nga rangatiratanga, ki nga mana, i nga *wahi* o te rangi, i te maha o nga whakaaro nui o te Atua;

11 I runga i tana i whakatakoto ai i mua noa atu, he mea mahi nāna i roto i to tatou Ariki, i a Karaiti Ihu:

12 Kei roto nei i a ia to tatou maiatanga me to tatou whakatatanga atu i te mea e u nei te whakaaro, he meata-nga na te whakapono ki a ia.

13 Koia ahau ka mea nei kia kaua *koutou* e ngakau-kore i oku tukinotanga mo koutou; ko to koutou kororia hoki tenei.

14 ¶ Na konei i tuturu ai oku turi ki te Matua o to tatou Ariki, o Ihu Karaiti,

15 Nona nei te ingoa e hua-ina ana ki nga hapu katoa i te rangi i te whenua,

16 Kia rite *tana* ki tona kororia e nui rawa nei, kia homai e ia ki a koutou kia

meinga to roto tangata e tona Wairua kia marohirohi i te kaha;

17 Kia noho a te Karaiti ki roto ki o koutou ngakau he mea whakapono; me te whai pakiaka, me te whai turanga ano koutou i roto i te aroha,

18 Kia uru ai koutou ki ta te hunga tapu katoa, ara kia taea ai e te whakaaro te whanui, te roa, te hohonu, te tiketike;

19 Kia mohio ai ano hoki ki te aroha o te Karaiti e kore nei e taea te mohio; kia tino ki rawa ai koutou i te Atua.

20 ¶ Na, e kaha nei ia ki te mea i nga mea nui whakaharahara, nui noa atu i nga mea katoa e inoi ai, e whakaaro ai tatou, he penei ano me te kaha e mahi nei i roto i a tatou,

21 *Waiho atu i a ia te kororia i roto i te hahi i runga i a Karaiti Ihu, a, nga whakapaparanga katoa, ake ake ake. Amine.*

UPOKO 4.

Kia kotahi. 7 Nga tini mahi ma ratou. 8 Kia neke ake ai te hahi. 17 Kei rite ki nga tauwiwi. 24 Kia hou. 25 Kei teka, 26 mauahara, aha aha.

KOIA ahanu, ta te Ariki herehere, ka whakahau nei i a koutou kia rite to koutou haere ki te karangatanga i karangatia ai koutou,

2 Kia pāpaku rawa te ngakau, kia māhaki, kia mana-

wanui, kia ata hanga tetahi ki tetahi i runga i te aroha;

3 Me whai kia mau te kotahitanga o te Wairua, he mea paihere na te rangimarie.

4 Kotahi tonu te tinana, kotahi te Wairua, pera hoki me to koutou karangatanga, kotahi tonu te mea o to koutou karangatanga hei tumanakotanga atu;

5 Kotahi Ariki, kotahi whakapono, kotahi iriiringa,

6 Kotahi Atua, ko te Matua o nga mea katoa, kei runga nei ia i nga mea katoa, puta noa ia i nga mea katoa, kei roto hoki i a koutou katoa.

7 Na kua oti te aroha noa te homai ki tenei, ki tenei o tatou, i runga i te mehua o ta te Karaiti homaitanga.

8 Na reira hoki ia i mea ai, Tona kakenga ki runga, whakaraua ana e ia nga whakarau, a homai mea ana ia ma nga tāngata.

9 (Na, tona kakenga ki runga ra, he aha to tena ki te kahore ia i mātua heke ki nga wahi o raro rawa o te whenua?)

10 Tera i heke ra, ko ia ano i kake nei ki runga ake i nga rangi katoa, kia ki ai nga mea katoa i a ia.)

11 A homai ana e ia ko etahi, hei apotoro; ko etahi, hei poropiti; ko etahi, hei kai kauwhau i te rongo pai; ko etahi, hei hepara, hei kai whakaako;

12 Kia tino rite ai te hunga tapu, he mea mo te mahi minita, hei hanga i te whare, ara i te tinana o te Karaiti:

13 Kia tae katoa ra ano

tatou ki te kotahitanga o te whakapono, o te matauranga hoki ki te Tama a te Atua, ki te tino tangata, ki te mehua o te tino kaumatuatanga e tutuki ai ki to te Karaiti:

14 Kia mutu ai to tatou tamarikitanga, kei akina, kei kahakihakina e nga hau katoa o te whakaako, he maminanga na te tangata, he tinihanga e mahia ai te whakapohēhē;

15 Kia korero pono ai i runga i te aroha, kia neke ake ai tatou ki roto ki a ia i nga mea katoa, ko te upoko nei ia, ko te Karaiti:

16 Nona nei te tinana katoa, he mea whakapiri marie, he mea ata hono e nga meatanga a nga hononga katoa, whakarite rawa ki te nui o te mahinga a ia wahi, a ia wahi, e mea ana i te tinana kia neke ake, hei whare e hanga ana i a ia i runga i te aroha.

17 ¶ Na ko taku tenei e ki nei, e whakaatu nei i roto i te Ariki, kia kāti to koutou haere pera me era atu tauwi, e haere nei i roto i te tekanga noatanga o to ratou hinegaro,

18 Kua oti nei te whakapouri oratou whakaaro, kua tangata-ke-tia ki to te Atua oranga, he kuaretanga no roto i a ratou, he pakeke hoki no o ratou ngakau:

19 Kahore o ratou ohooonga, a tukua ana ratou e ratou ano ki te hiahia taikaha; riro pu ratou ki te mahi i nga mea poke katoa.

20 Ko koutou ia, kihai i pera ta koutou ako i a te Karaiti;

21 Ki te mea kua rongo koutou ki a ia, a kua whakaakona e ia ki nga mea e rite ana ki te pono i roto i a Ihu:

22 Mo te tangata tawhito i to mua whakahaere kia whakarerea e koutou; he mea pirau nei hoki ia i runga i nga hiahia tinihanga;

23 Kia whakahoutia hoki koutou, ara te wairua o to koutou hinengaro;

24 Kia kakahuria iho hoki ki a koutou te tangata hou, no ta te Atua nei te hanganga i runga i te tika, i te tapu o te pono.

25 ¶ Na whakarerea atu te teka; kia pono te korero ki tona hoa, ki tona hoa: he wahi hoki tatou tetahi no tetahi.

26 Kia riri, a kua e hara: kei toene te ra ki to koutou riri:

27 Kua hoki tetahi wahi e tukua ki te rewera.

28 Te tangata tahae, me whakamutu tana tahae: engari me mahi, ko ona ringa ano hei mahi i te mea pai, kia whai rawa ai ia hei hoatutanga mana ki te rawakore.

29 Kei puta tetahi kupu kino i o koutou mangai, engari hei te mea e pai ana hei hanga i te whare, kia whiwhi ai ki te pai nga tangata e rongo ana.

30 Kua hoki e whakapouri-tia te Wairua Tapu o te Atua, nana nei koutou i hiri mo te ra o te whakaoranga.

31 Kia wehea rawatia atu i roto i a koutou te nanakia, te

riri, te aritarita, te ngangau, te korero kino, me te mau-ahara katoa:

32 Kia ngawari to koutou tikanga tetahi ki tetahi, kia pai te ngakau, me te hohou noa iho i te rongo tetahi ki tetahi, kia pera ano me te Atua i hohou nei i te rongo ki a koutou i roto i a te Karaiti.

UPOKO 5.

3 *Kei moe puku, apo, aha, aha.*

15 *Kia tupato.* 22 *Mahi ma nga wahine; ma nga tane.*

NA kia rite ta koutou ki ta te Atua, kia pera me ta nga tamariki e arohaina ana;

2 Haere hoki i runga i te aroha, kia pera me te Karaiti i aroha ki a tatou, a homai ana i a ia ano mo tatou hei whakahere, hei patunga tapu ki te Atua, hei kakara pai.

3 Te puremu ia, me nga mahi poke katoa, me te apo, kaua ena e whakahuatia i roto i a koutou, kia rite ki ta te hunga tapu tikanga;

4 *Kaua* hoki te mea whakama, te korero wairangi, te korero maminga, kahore nei i tika, erangi ia te whakahetai.

5 E mātau ana hoki koutou ki tenei, e kore tetahi tangata puremu, poke ranei, apo ranei, he kai karakia nei hoki ia ki te whakapakoko, e whai wahi ki te rangatiratanga o te Karaiti, ara o te Atua.

6 Kei tinihangatia koutou e te tangata ki nga kupu teka-

teka noa: na enei mea hoki te riri o te Atua e puta nei ki nga tamariki a te tutū.

7 Na kaua koutou e uru ki ta ratou.

8 He pouri hoki koutou i mua, tena ko tenei he mārama i roto i te Ariki: kia rite to koutou haere ki to nga tamariki o te mārama:

9 Kei runga hoki te hua o te Wairua, i te pai katoa, i te tika, i te pono.

10 Me whakamatau ano e koutou ta te Ariki e pai ai.

11 Kei uru ano ki nga mahi hua kore o te pouri, engari whakahengia.

12 He mea whakama hoki te whakahua kau i nga mea ngaro e meinga nei e ratou.

13 Na, nga mea katoa e whakahengia ana, ma te mārama e whakakite: he mārama hoki nga mea katoa e whakakite ana.

14 Koia hoki tana kupu nei, Maranga, e tenei e moe nei, ara ake i roto i te hunga mate, a ma te Karaiti koe e whakamarama.

15 ¶ Na kia mahara ki to koutou haere kia tupato, kei rite ki ta nga whakaaro-kore, engari ki ta nga whakaaronui;

16 Hokona te taima mo koutou, he kino hoki nga ra.

17 Mokonei ra kei whakaaro-kore koutou, engari kia mātau ki ta te Ariki e pai ai.

18 Kaua hoki e haurangi i te waina, he toreretanga hoki tena ki te hē; engari kia kī i te Wairua;

19 Ta koutou korero ki a koutou ano, hei te waiata tapu, hei te himene, hei te waiata wairua; waiata, himene atu, i roto i o koutou ngakau ki te Ariki;

20 Me te whakawhetai ki te Atua, ara, ki te Matua, i nga wa katoa, mo nga mea katoa, i runga i te ingoa o to tatou Ariki, o Ihu Karaiti;

21 Kia ngohengohe tetahi ki tetahi i runga i te wehi ki te Atua.

22 ¶ E nga wāhine, kia ngohengohe ki a koutou tāne ake, hei mea ki te Ariki.

23 No te mea ko te tāne te upoko o te wahine, e rite ana hoki ki a te Karaiti, ko te upoko ia o te hahi: ko te kai whakaora ano ia o te tinana.

24 Na, e ngohengohe ana te hahi ki ta te Karaiti, kia pera ano nga wahine ki a ratou tāne ake i nga mea katoa.

25 E nga tāne, arohaina a koutou wāhine, kia pera hoki me te Karaiti i aroha nei ki te hahi, a hoatu ana i a ia ano mo taua *hahi*;

26 Hei whakatapunga mana, mā rawa i a ia i te horoinga ki te wai, i runga i te kupu,

27 Hei hahi e tapaea e ia ki a ia ano, kororia rawa, tē whai ira, korukoru, tetahi atu mea pera ranei, engari kia tapu, kia koha-kore.

28 Me aroha e nga tāne a ratou wāhine me te mea ko o ratou tinana ake ano. Te tangata e aroha ana ki tana wahine ake, e aroha ana ki a ia ake ano.

29 Kahore hoki tetahi kia kinonoa ki tona kikokiko ake; engari e atawhai ana, e whakaahuru ana, e pera tonu ana me ta te Ariki ki te hahi:

30 He wahi hoki tatou no tona tinana, ara no tona kikokiko, no ona wheua.

31 Mo konei ra ka whakareera ai e te tangata tona pāpā, tona whaea, a ka piri ki tana wahine, a ko raua tokorua hei kikokiko kotahi.

32 He nui tenei mea ngaro; otia mo te Karaiti raua ko te hahi taku korero.

33 Na kia rite *ki tona aroha* ki a ia ake ano to koutou aroha to tenei, to tenei, ki tana wahine, kit ana wahine; me te wahine ano, kia hopohopo ia ki tana tāne.

UPOKO 6.

Mahi ma nga tamariki; 5 pononga. 10 Ta tatou wha-whai, me nga patu. 21 Ma Tikiku e korero ona aha-tanga.

E NGA tamariki, kia ngohengohe ki o koutou mātua i roto i te Ariki: ko te mea tika hoki tenei.

2 Whakahonoretia tou pāpā me tou whaea; ko te ture tuatahi tenei i runga i te kupu whakaari;

3 Kia hua ai te pai ki a koe, kia roa ai hoki tou noho i te whenua.

4 Me nga mātua hoki, kei whakapataritari i a koutou tamariki kia riri: engari whakatupuria ake ratou i runga i te whakaakoranga, i te whakatupatoranga a te Ariki.

EPEHA 6.

5 ¶ E nga pononga, kia ngohengohe ki o koutourangatira o te wahi ki te kikokiko, me te mea ko te Karaiti, me te matakau, me te wiri ano koutou, kia tapatahi ano te ngakau ;

6 Kauga hei ta te kanohi mahi, ko ta te whakamana-wareka tangata hoki ia ; engari hei ta nga pononga a te Karaiti, e mahi a ngakau ana i ta te Atua i pai ai ;

7 Kia pai te whakaaro ina mahi, *hei mea* ki te Ariki, ehara i te mea ki te tangata :

8 Kia matau hoki, na, te pai e mea ai te tangata, ka whakawhiwhia ano ia ki tenei e te Ariki, ahakoapononga, ahakoa rangatira.

9 E nga rangatira, kia pera ano hoki ta koutou ki a ratou ; kati te whakawehi : kia matau hoki he Ariki ano to koutou kei te rangi ; kahore ano hoki ana whakapai kanohi.

10 ¶ Heoi, e oku teina, kia whai kaha koutou i roto i te Ariki, i te mana ano hoki o tona kaha.

11 Kakahuria iho nga mea whawhai katoa a te Atua, kia taea ai e koutou nga mahi tinihanga a te rewera te tu ki te riri.

12 Ehara hoki ta tatou i te pakanga ki nga toto, ki te kikokiko, engari ki nga rangatiratanga, ki nga mana, ki nga ariki o te pouri o tenei ao, ki nga wairua kino o nga *wahi* i te rangi.

13 Mo konei kia mau ki nga mea whawhai katoa a te Atua,

kia taea ai e koutou te tu atu ki te riri i te ra kino, a, ka poto i a koutou nga mea katoa te mahi, kia tu.

14 E tu ra, he mea whitiki o koutou hope ki te pono, kakahuria iho ano hoki ko te tika hei pukupuku ;

15 Herea iho te rongo pai o te rangimarie hei hu mo nga waewae, kia takatu ai ;

16 Mo waho i *enei* mea katoa e mau ki te whakapono hei whakangungu rakau, e taea ai e koutou te tinei nga matia muramura katoa a te *wairua* kino.

17 E mau hoki ki te ora hei potae, ki te hoari hoki a te Wairua, ara ki te kupu a te Atua :

18 Kia pau te inoi me te tohe, me inoi i nga wa katoa i roto i te Wairua, kia mataara hoki koutou ki tenei mea nei ano, me te u tonu ki te tohe mo te hunga tapu katoa ;

19 Moku ano hoki, kia homai he kupu ki a au, kia maia te puaki o toku mangai ki te whakaatu i te mea ngaro, ara i te rongo pai ;

20 Ko tona karere nei au, he mea mekameka ; ara, kia maia ahau ki taua *korero*, kia rite taku korero ki te mea i tika.

21 ¶ Na, kia matau ai hoki koutou ki aku mea, ki aku mahi, ma Tikiku e whakaatu nga mea katoa ki a koutou, he teina aroha nei ia, he minita pono i roto i te Ariki :

22 Kua tonoa atu na ia e ahau ki a koutou mo tenei

PIRIPAI 1.

mea nei ano, kia mātau ai koutou ki ā matou mea, kia whakamarie ai ano hoki ia i o koutou ngakau.

23 ¶ *Kia tau* ki nga tēina te rangimarie, te aroha, me te

whakapono, he mea na te Atua Matua, na te Ariki hoki, na Ihu Karaiti.

24 *Kia tau* te aroha noa ki te hunga katoa e hē-kore ana te aroha ki to tatou Ariki, ki a Ihu Karaiti. Amine.

KO TE PUKAPUKA A PAORA APOTORO

KI TE

HUNGA O PIRIPAI.

UPOKO 1.

Tona koa ki to ratou aroha.

9 *Tana inoi.* 12 *Te rongo pai i Roma.* 21 *Tana i mate nui ai.* 27 *Kia kotahi.* 28 *Kia u.*

NA Paora, raua ko Timoti, na nga pononga a Ihu Karaiti, ki te hunga tapu katoa i roto i a Karaiti Ihu e noho ana i Piripai, ratou ko nga pihopa, ko nga rikona:

2 *Kia tau* ki a koutou te aroha noa, me te rangimarie, he mea na te Atua, na to tatou Matua, na te Ariki hoki, na Ihu Karaiti.

3 ¶ Whakawhetai tonu ahau ki toku Atua i nga maharanga katoatanga ki a koutou.

4 I aku inoinga katoa e puta

ana taku inoi mo koutou katoa i nga wa katoa i runga i te hari,

5 Mo koutou i uru ki te rongo pai, o te ra tuatahi ano a moroki noa nei;

6 Pumau tonu toku whakaaaro ki tenei mea nei ano, tera te kai timata o te mahi pai i roto i a koutou e whakaoti, taea noatia te ra o Ihu Karaiti;

7 He tika nei hoki kia penei oku whakaaaro ki a koutou katoa, no te mea kei roto koutou i toku ngakau; ara, koutou katoa i uru tahi me ahau ki te aroha noa, i a au nei i te here, i a au e korero whakatikatika nei, e whakau nei i te rongo pai,

8 Ko te Atua hoki hei kai whakaaatu moku, mo te nui o toku koingo ki a koutou ka-

PIRIPAI 1.

toa, i runga i te ngakau aroha o Ihu Karaiti.

9 Ko taku inoi ano tenei, kia nui haere tonu to koutou aroha i runga i te mataura-nga, i nga mahara mohio katoa;

10 Kia kitea ai e koutou nga mea e rere ke ana; kia tinihanga-kore ai koutou, kia he kore ai, taea noatia te ra o te Karaiti;

11 Kia ki ano hoki i nga hua o te tika, e puta ana i a Ihu Karaiti, hei kororia, hei whakamoemititanga mo te Atua.

12 ¶ Na e mea ana ahau kia mātau koutou, e oku tēina, ki te tukunga iho o nga mea i pa ki a au, pai tonu hei whakaneke ake i te rongo pai;

13 Kua kitea hoki oku meka-meka mo ta te Karaiti, puta noa i te kāinga o te kingi, i era atu *wahi* katoa ano hoki;

14 A kua ngakau-nui te tokomaha o nga tēina i roto i te Ariki, i oku mekameka nei, hira rawa ano hoki to ratou maia ki te korero i te kupu, kahore he matakū.

15 Etahi na te hae, na te totohe, etahi na te whakaahua-reka, i kauwhau ai i a te Karaiti;

16 Etahi na te totohe ta ratou kauwhau i a te Karaiti, ehara i te mea he hē-kore no te whakaaro, e mea ana kia tapiritia oku mekameka ki te mamae;

17 Etahi na te aroha, e mahara ana kua waiho ahau hei

korero whakatikatika mo te rongo pai.

18 A, pehea iho? ahakoa he aha, he aha, he tinihanga, he pono, e kauwhautia ana a te Karaiti; a e hari ana ahau ki tenei, ae ra, ka hari ano ahau.

19 E mātau ana hoki ahau ka ai tenei hei whakaora mo-ku, i a koutou na ka inoi, i te Wairua ano hoki o Ihu Karaiti ka homai;

20 Ko taku hoki tenei e whakamau tonu nei, e tumanako nei, e kore ahau e whakama i tetahi mea, engari ka tino maia ahau, a ka pera me to nga wa katoa, ka whakanuia ano a te Karaiti aianeī e toku tinana, ahakoa i te ora, ahakoa i te mate.

21 Ki a au hoki to te ora ko te Karaiti, to te mate he taonga.

22 Ki te ora ia ahau i te kikokiko, ko te hua tenei o taku mahi: a kahore ahau e mohio ki taku e whiriwhiri ai.

23 E karapitia ana hoki ahau e nga mea e rua, he hiahia nei toku ki te haere, kia noho ai ahau ki a te Karaiti; ko te mea tino pai rawa hoki ia:

24 Ko te noho ia i te kikokiko, engari tena he pai mo koutou.

25 A, ka u nei toku whakaaro ki tenei, e mātau ana ahau tera ahau e noho, noho tonu iho ano hoki ki a koutou katoa, hei whakaneke ake, hei whakahari i a koutou i runga i te whakapono;

26 Kia hira rawa ai to kou-

PIRIPAI 1, 2.

tou whakamanamana i roto i a Karaiti Ihu ki a au, moku ka tae atu ano ki a koutou.

27 Kia tika ia ta koutou whakahaere, kia rite ki ta te rongo pai o te Karaiti: a ki te haere atu ahau kia kite i a koutou, ki te ngaro mai ranei, kia rongo ahau ki o koutou mea, e tu ana koutou i runga i te wairua kotahi, i te ngakau kotahi, me te tohe tahi ano ki te whakapono o te rongo pai;

28 Kahore hoki he wehi ki tetahi mea a o koutou hoariri: he tohu hoki tenei ki a ratou mo te whakangaromanga, ki a koutou ia mo te ora, a ko tenei ano na te Atua.

29 Kua hoatu nei hoki tenei ki a koutou hei meatanga ma koutou ki a te Karaiti, ehara i te mea ko te whakapono anake ki a ia, engari ko te mate ano hoki mo te whakaaaro ki a ia;

30 Kei a koutou hoki taua pakanga i kite ra koutou ki a au, a ka rongo nei inaianei kei a au.

UPOKO 2.

Kei whakakake. Kei wehe-wehe. 12 Whaia te ora i runga i te wehi. 13 Kei te Atua hoki te hiahia, aha, aha. 19 Ka tonoa atu a Timoti. 25 Kua riro atu a Epaporitu.

NA, ki te mea he whakamarietanga kei roto i a te Karaiti, ki te mea he pehi mamae to te aroha, ki te mea

he whiwhinga tahitanga ki te Wairua, ki te mea he ngakau aroha, he mahi tohu,

2 Kia rite toku hari i a koutou, kia kotahi te whakaaaro, kia kotahi te aroha, huihuia nga ngakau i runga i te whakaaaro kotahi.

3 Kei meinga tetahi mea i runga i te totohe, i te whakapehapeha; engari kia papaku te ngakau, ko era atu, kia whakanuia e te whakaaaro.

4 Kua tona ake e tirohia e tetahi e tetahi, engari ko nga mea o era atu hei tirohanga ma tetahi ma tetahi.

5 Ko tenei hei whakaaaro mo koutou, ko tera i a Karaiti Ihu:

6 I te ahua nei ia o te Atua, kihai i mea he taonga tango te rite ki te Atua;

7 Heoi whakaititia ana ia e ia ano, kua mau ki te ahua o te pononga, kua meinga kia rite ki te tangata:

8 A, ka kitea tona ahua e rite ana ki to te tangata, ka whakapapaku iho i a ia ano, kua meinga kia ngohengohe, taea rawatia te mate, te mate nei o te ripeka.

9 Na konei whakateiteitia ake ana ia e te Atua, a hoatu ana ki a ia he ingoa e nui atu ana i nga ingoa katoa;

10 Kia tuturi ai ki te ingoa o Ihu nga turi katoa, o nga mea i te rangi, o nga mea i te whenua, o nga mea i raro i te whenua;

11 Kia whakaae ano nga arero katoa ko Ihu Karaiti te Ariki, hei whakakororiatanga mo te Atua Matua.

PIRIPAI 2.

12 ¶ Na, e oku tēina aroha, i ngohengohe tonu ra koutou *ki a au* i mua, he teka i nga wa anake oku i kona, engari rawa ano ia inaianei i a au kahore i kona, whakaotia to koutou whakaoranga i runga i te wehi, i te wiri:

13 Ko te Atua hoki te kai mahi i roto i a koutou o te hiahia, o te mahi, hei mea i tana i pai ai.

14 I nga mea katoa e mea ai koutou, whakakahoretia te amuamu, te tautohetohe;

15 Kia kore ai koutou e whaikupuria, kia tapatahi ai, he tamariki koha-kore na te Atua, i waenganui o te whakatupuranga tutū, parori ke, kei roto nei koutou i a ratou e tiaho ana hei māramatanga i te ao;

16 Kia mau pu ki te kupu o te ora, kia hari ai ahau a te ra o te Karaiti, ki a au kihai nei i oma noa, kihai i mahi noa.

17 Na, ki te ringihia ahau ki runga ki te patunga tapu, ki nga mahi a to koutou whakapono, ka hari ahau, ina ka hari tahi me koutou katoa.

18 Waihoki ko koutou, ka hari, hari tahi me ahau.

19 ¶ Na e mea ana ahau i roto i te Ariki, i a Ihu, tera a Timoti e tonoa wawetia e ahau ki a koutou, kia ora ai hoki toku ngakau, ina mohio ahau ki o koutou mea.

20 Kahore hoki oku tangata e rite ana te ngakau ki tona, hei mahara pono ki o koutou mea.

21 Ko ta te katoa hoki e rapu nei, ko to ratou ake, kahore hoki nga mea o Karaiti Ihu.

22 E mātau ana ia koutou ki ona tohu, he pera tana me ta te tamaiti ki te matua, ko toku hoa ia ki nga mahi o te rongo pai.

23 Ko ia taku e mea nei kia tonoa wawetia atu, ina kite ahau i te tukunga iho ki a au.

24 Otia e u ana toku whakaaro i roto i te Ariki, ka hohoro toku tae atu.

25 I mea ano ia ahau me tonu atu ki a koutou a Epa-poritu, *toku teina, toku hoa mahi, toku hoa hoia*, na koutou ia karere, he kai mahi ano hoki i nga mea i matea e ahau.

26 Koingo tonu hoki ia ki a koutou katoa, konohi rawa, no te mea i rongo koutou he turoro ia.

27 He turoro ra hoki ia, tata pu ki te mate: otira i tohungia ia e te Atua; ehara ano i te mea ko ia anake, ko ahau ano hoki, kei tapiritia he pouri ki toku pouri.

28 Koia i nui rawa ai toku ngakau ki te tonu atu i a ia, kia kite ai ano koutou i a ia, kia hari ai, kia taharahara iho ai hoki toku pouri.

29 Kia nui te hari i runga i te Ariki, ina tae atu ia; whakahonoretia ano hoki nga pera:

30 No te mea na te mahi ki a te Karaiti i tata ai ia ki te mate, tē ihupuku ki te ora, kia rite ai i a ia nga mahi ki

ahau, kihai nei i rite i a koutou.

UPOKO 3.

Kei tahuri ki nga kai whakaako he. 4 Ona ake mea nui whakarereā e ia. 15 Kia pera ano ratou.

HEOI, e oku tēina, kia hari i roto i te Ariki. Ki ahau kahore he hōhātanga o te tuhituhi atu i aua mea nei ano ki a koutou; ki a koutou ia hei mea e u ai.

2 Kia tupato ki nga kuri, kia tupato ki nga kai mahi i te kino, kia tupato ki te tapahanga.

3 Ko tatou hoki te kotinga, e mahi nei ki te Atua i runga i te wairua, e whakamana mana nei ki a Karaiti Ihu, a kahore e u te whakaaro ki te kikokiko:

4 Tenei ano ia kei a au he take e u ai te whakaaro ki te kikokiko. Ki te mea tetahi atu he mea tona e u ai tona whakaaro ki te kikokiko, tera atu ano toku:

5 Ko te kotinga i te ra tuawaru, no te whanau a Ihairaira, no te hapu o Peniamine, he Hiperu no nga Hiperu; ki to te ture he Parihi;

6 To te ngakau nui ki te Atua, i whakatoi ahau i te hahi; to te tika, ara to tera i te ture, kahore he kupu moku.

7 Heoi, nga mea i waiho e ahau hei taonga, kiia ake enei e ahau hei rukenga, i te mea ka whakaaro nei ki a te Karaiti.

8 Ae ra kiia iho e ahau nga mea katoa hei rukenga, i te mea ka whakaaro nei ki te pai whakaharahara o te matauranga ki a Karaiti Ihu, ki toku Ariki: he whakaaro nei ki a ia i roto ai ena mea katoa oku ki te kore, ae ra kiia iho e ahau hei paru, kia whiwhi ai ahau ki a te Karaiti;

9 Kia kitea ai hoki i roto i a ia, kahore he tika oku ake, ara tera i te ture, engari ko tera e na runga mai ana i te whakapono ki a te Karaiti, te tika a te Atua, tera i te whakapono:

10 Kia mātau ai ahau ki a ia, ki te kaha hoki o tona aranga mai, ki te urunga tahitanga hoki ki ona maeae, he mea whakaahua kia rite ki tona matenga;

11 Me kore ahau e tutuki ki te aranga mai i roto i te hunga mate.

12 Ehara i te mea kua mau ano i a au, kua tino rite ranei ahau: engari e whaia atu ana e ahau, me kore e mau i a au te mea i mau ai ahau i a Karaiti Ihu.

13 E oku tēina, kahore aku kianga ake kua mau i a au: kotahi ia taku, wareware ake i a au nga mea i muri, tauto-rotoro tonu ahau ki nga mea i mua,

14 Whai tonu atu ki te tohu, ki te utu whakahonore o to runga karangatanga a te Atua, i roto i a Karaiti Ihu.

15 Na, te hunga o tatou kua tino rite, kia penei a tatou whakaaro: a ki te rere ke o koutou whakaaro ki tetahi

PIRIPAI 3, 4.

mea, ma te Atua ano tenei e whakakite ki a koutou.

16 Ahakoa kua taea e tatou te aha, te aha, kia kotahi ano te ruri mo to tatou whaka-haere, kia kotahi tonu te mea hei whakaaronga ma tatou.

17 ¶ Kia rite ta koutou ki taku, e oku tēina, tirohia hoki te hunga e rite ana te haere ki to matou kua waiho nei hei tauira mo koutou.

18 (He tokomaha hoki kei te haere, ka maha nei nga wa i korerotia ai ratou e ahau ki a koutou, a ka korerotia nei inaianei me te tangi ano ahau, he hoa whawhai ratou ki te ripeka o te Karaiti;

19 Te tukunga iho ki a ratou he whakangaromanga, to ratou atua ko te kopu, to ratou kororia hoki kei runga i to ratou whakama, ko nga mea o te whenua ta ratou e whakaaro ai.)

20 Ko te rangi ia te wahi i tangata whenua ai tatou; kei reira hoki te Kai whakaora e taria atu nei e tatou, te Ariki, a Ihu Karaiti:

21 Māna nei e whakaahua ke to tatou tinana tūtūā nei, kia rite ki tona tinana kororia, i runga i te mahinga a tona kaha e taea ai e ia te pēhi nga mea katoa ki raro ki a ia.

UPOKO 4.

Whakahau. 10 Koa ki to ratou.

NA, e oku tēina aroha e hiahiatia atu nei, e toku

haringa, e toku karauna, tena ra, e tu i runga i te Ariki, e oku hoa aroha.

2 ¶ He kupu tenei naku ki a Uoria, he kupu ano tenei ki a Hinatiki, kia kotahi to raua whakaaro i roto i te Ariki.

3 Na he tohe tenei naku ki a koe, e toku hoa pono ki te mahi, ko koe hei whakamāmā i ta raua, he hunga raua i uru tahi ki taku tohe ki nga mea o te rongo pai, ratou tahi ko Keremeneta, ko era atu hoki o oku hoa mahi, kei roto nei i te pukapuka o te ora o ratou ingoa.

4 ¶ Kia hari tonu i roto i te Ariki: ko taku kupu ano tenei, Kia hari.

5 Kia mohiotia o koutou ngakau ngawari e nga tāngata katoa. Kua tata te Ariki.

6 Kaua e manukanuka ki tetahi mea; engari i nga mea katoa me karakia, me inoi, me whakawhetai, i a koutou e whakaatu ana i ā koutou inoi ki te Atua:

7 A ma te marie o te Atua, e kore nei e taea te whakaaro, e tiaki o koutou ngakau, o koutou hinengaro i roto i a Karaiti Ihu.

8 ¶ Heoi, e oku tēina, ko nga mea e pono ana, ko nga mea e whakaaroa ana, ko nga mea e tika ana, ko nga mea e kino-kore ana, ko nga mea e ataahua ana, ko nga mea e korerotia paitia ana; ki te mea he pai, ki te mea

PIRIPAI 4.

he whakamoemiti; whakaroa enei mea.

9 A, nga mea i whakaakona ki a koutou, i riro i a koutou, i rongo ai, i kite ai ki a au, mahia enei: a ka noho te Atua o te rangimarie ki a koutou.

10 ¶ Na, nui atu toku hari i roto i te Ariki, mo te koutou whakaaro ki a au ka tahi nei ka pihi ake ano; he mea ano ia i whakaaroa e koutou i mua, otiia kihai i whai mea-tanga.

11 Ehara i te rawakore-tanga taku e korero nei: kua ako hoki ahau, kia tatū toku ngakau i oku aha katoa.

12 Te whakahoki i a au ki raro, mātau tonu i a au; te whai rawa, mātau tonu i a au: i nga wahi katoa, i nga mea katoa, ka oti ahau te whakaako, kia makona, kia mate i te kai, kia whai rawa, kia rawakore ranei.

13 Ka taea e ahau nga mea katoa, he mea na te Karaiti e whakakaha nei i a au.

14 He ahakoa ra, he pai ta koutou mahi, i a koutou i uru nei ki toku mate.

15 Na, e mātau ana ano ra koutou, e nga Piripai, i te orokomeatanga o te rongo pai, i toku haerenga atu i Makeronia, kahore he hahi i uru ki taku, ara ki te tikanga mo tetahi mea kia homai,

kia riro atu ranei, ko koutou anake.

16 I Teharonika ano hoki kotahi, e rua a koutou *homai-tanga* i nga mea i matea e ahau, kia kawea mai *maku*.

17 Ehara i te mea e whai ana ahau i tetahi mea kia homai; engari e whai ana ahau kia maha nga hua hei mea mo koutou.

18 Otiia kei a au nei nga mea katoa, hira noa ake hoki aku: kua ki ahau, tenei kei a au a koutou mea i a Epaporitu, he kakara reka, he patunga tapu e manakohia ana, ta te Atua e ahua-reka mai ai.

19 A ma toku Atua e mea kia hua nga mea katoa e matea ana e koutou, kia rite ki te nui o tona kororia, i roto i a Karaiti Ihu.

20 Na, *waiho* i te Atua, ara i to tatou Matua, te kororia, ake ake ake. Amine.

21 ¶ Oha atu ki te hunga tapu katoa i roto i a Karaiti Ihu. He ohatanga atu tenei ki a koutou na nga tēina i a au nei.

22 He ohatanga atu tenei ki a koutou na te hunga tapu katoa, tenei rawa ia ta te hunga o te whare o Hiha.

23 ¶ *Kia tau* te aroha noa o to tatou Ariki, o Ihu Karaiti, ki a koutou katoa. Amine.

KO TE PUKAPUKA A PAORA APOTORO

KI TE

HUNGA O KOROHE.

UPOKO 1.

3 *Whakawhetai mo ta ratou.*

7 *Epapara.* 9 *Inoi mo ratou.* 12 *Kia whakawhetai mo ta te Karaiti i mea ai.* 15 *Nui o te Karaiti. Kia u ki a ia.*

NA Paora, i paingia e te Atua hei apotoro ma Ihu Karaiti, na te teina, na Timoti,

2 Ki te hunga tapu i Korohe, ki nga tēina whakapono hoki i roto i a te Karaiti: *Kia tau* ki a koutou te aroha noa, me te rangimarie, he mea na te Atua, na to tatou Matua, na te Ariki hoki, na Ihu Karaiti.

3 ¶ Tenei matou te whakawhetai atu nei ki te Atua, ara ki te Matua o to tatou Ariki, o Ihu Karaiti, me te inoi tonu ano matou mo koutou,

4 No matou ka rongo nei ki to koutou whakapono ki a Karaiti Ihu, ki to koutou aroha hoki ki te hunga tapu katoa;

5 Mo te mea e taria atu nei,

e takoto mai nei mo koutou i te rangi, ta koutou i rongo ai i mua ki te kupu o te pono o te rongo pai:

6 Kua tae atu na ki a koutou, kua pera me *tona pakūtanga* ki te ao katoa: a e whai hua ana, he pera hoki me ena i a koutou, no te ra ano i rongo ai, i mātau pono ai koutou ki te aroha noa o te Atua.

7 I whakaakona atu na hoki koutou ki tena e Epapara, e to matou hoa pononga e arohaina nei; he minita pono nei ia na te Karaiti ki a koutou:

8 Nāna hoki i whakakite mai ki a matou to koutou aroha i runga i te Wairua.

9 ¶ No konei hoki matou i te ra ano i rongo ai matou, kahore e mutu ta matou karakia mo koutou; e inoi ana kia whakakiia koutou ki te mohiotanga ki tana e pai ai, i runga i nga whakaaro nui katoa, i te mahara wairua ano hoki;

10 Kia tika ai to koutou haere, kia rite ai ki te Ariki, ahua-reka rawa, hua rawa i runga

KOROHE 1.

i nga mahi pai katoa, tupu tonu i runga i te mohiotanga ki te Atua;

11 Kia whakanuia mai te kaha hei whakakaha mo koutou, kia rite ki ta te mana o tona kororia, e u tonu ai, e whakamanawanui ai i runga i te hari;

12 Me te whakawhetai ano ki te Matua, nāna nei tatou i whai tikanga ai ki te tahi wahi o te kāinga o te hunga tapu i roto i te mārāma:

13 Nāna nei tatou i whakaora mai i te kaha o te pouri, a whakawhitia ake tatou e ia ki te rangatiratanga o tana Tama aroha:

14 Kei roto nei i a ia to tatou whakaoranga i runga i ona toto, ara te murunga o nga hara:

15 Ko ia nei te ahua o te Atua e kore nei e kitea atu, te whanau mātāmua o nga mea hanga katoa:

16 Nāna hoki nga mea katoa i hanga, nga mea i te rangi, me nga mea i te whenua, nga mea e kitea ana, me nga mea kahore e kitea, nga torona, nga kawanatanga, nga rangatiratanga, nga mana: nāna, māna, te hanganga o nga mea katoa:

17 No mua ano hoki ia i nga mea katoa, nāna ano hoki nga mea katoa i mau ai;

18 Ko ia ano te upoko o te tinana, ara o te hahi: ko ia te timatanga, te whanau mātāmua i roto i te hunga mate; kia waiho ai ia hei tuatahi i roto i nga mea katoa.

19 I pai hoki te Matua kia noho te hua noa iho o nga mea katoa ki roto ki a ia:

20 Kia ai ia hei houhanga rongo mo nga mea katoa ki a ia, i te mea ka mau nei i a ia te rongo i nga toto o tona ripeka; hei runga ano i a ia, ahakoa he mea no te whenua, ahakoa he mea no te rangi.

21 Me koutou hoki he tangata ke i mua, he hoa riri nga hinengaro i nga mahi kino, na kua meinga nei e ia kia houhia ta koutou rongo

22 I runga i te tinana o tona kikokiko, he mea na te mate-nga; mo koutou ano kia tapaea atu ki tona aroaro, he hunga tapu kahore nei he koha, kahore he hē;

23 Ki te pumau koutou ki te whakapono, u tonu, mau tonu, tē taea te whakaneke atu i runga i te tumanakotanga ki ta te rongo pai i rongo ai koutou, kua kauwhautia atu nei ki nga mea hanga katoa i raro o te rangi: mo reira nei ahau, a Paora i meinga hei minita.

24 ¶ Tenei ahau te hari nei ki oku mamae mo koutou, ka kapi hoki i oku kikokiko nga mate o te Karaiti kahore ano i rite noa, hei mea mo tona tinana, ara mo te hahi;

25 Mo reira nei ahau i meinga hei minita, rite tonu ki ta te Atua tikanga ki a koutou i homai nei ki a au, kia whakapaua te kauwhau o te kupu a te Atua;

26 O te mea ngaro i hunā i era wa noa atu, i era wha-

KOROHE 1, 2.

katupuranga, a kua whakakitea inaianei ki tana hunga tapu:

27 He meatanga hoki na te Atua, kia whakaaturia ki a ratou te taonga nui o te kororia o tenei mea ngaro ki roto ki nga tauwi, ara a te Karaiti i roto i a koutou, e tumanako atu ai ki te kororia:

28 Ko ta matou hoki tenei e kauwhau nei, i a matou ka whakatupato nei i nga tangata katoa, ka whakaako nei i nga tangata katoa i runga i nga whakaaro mohio katoa, he mea kia tapaea atu ai e matou nga tangata katoa, he mea tino tika i roto i a Karaiti Ihu:

29 Ko taku tenei e uaua nei, e tohe nei i runga i tana mahinga e kaha nei te mahi i roto i a au.

UPOKO 2.

He kupu mo ratou kia u ki te upoko. 8 Kei riro i nga karakia pokanoa, 20 i nga mea o te ture kua kore nei i a te Karaiti.

NA e mea ana ahau kia mohio koutou ki te nui o toku uaua mo koutou, mo te hunga ano hoki o Raorikia, mo te hunga katoa ano hoki kahore nei i kite noa i toku mata i te kikokiko;

2 Kia whakamarietia o ratou ngakau, kia honohonoa i runga i te aroha, kia taea ai nga taonga katoa o te ngakau mahara ina u, kia whakaae ai ki te mea ngaro a te Atua, ara

a te Matua, a te Karaiti ano hoki;

3 Kei roto i a ia nga taonga katoa o te mahara, o te matauranga e hunā ana.

4 Na, i korero ai ahau i tenei, kei kumea ketia koutou e ta te tangata kupu whakawai.

5 No te mea ahakoa kei ta-whiti toku kikokiko, kei a koutou na toku wairua, e hari ana, e titiro ana ki to koutou ritenga tika, ki te u ano hoki o to koutou whakapono ki a te Karaiti.

6 ¶ Na, kua riro na te Ariki, a Karaiti Ihu i a koutou, kia pena ano to koutou haere i roto i a ia;

7 He mea whai pakiaka, he whare e neke ake ana i runga i a ia, whakapumau rawa ki runga ki te whakapono; kia pera me koutou i whakaakona ra, kia hira rawa ta koutou ki tera me te whakawhetai ano.

8 ¶ Kia tupato kei riro pārau koutou i ta te tangata whakaaro mohio, i te tinihanga hua kore, e rite nei ki te whakarerenga iho a te tangata, ki nga mea timatanga o te ao, a kahore ki a te Karaiti:

9 Kei roto katoa hoki i a ia te tino o te Atua e noho a tinana ana.

10 A kua tino tangata ano koutou i roto i a ia, ko te upoko nei ia o nga rangatiratanga, o nga mana katoa;

11 He mea kokoti koutou i roto i a ia, he kotinga kihai i

KOROHE 2, 3.

meatia e te ringaringa, i te unuhanga atu o te tinana o nga hara o te kikokiko, i ta te Karaiti kotinga;

12 He mea tanu tahi koutou me ia i te iriiringa, he mea whakaara ngatahi ano hoki me ia i reira, no te mea ka whakaponu nei ki te mahi a te Atua, nāna nei ia i whakaara ake i te hunga mate.

13 He tupāpaku na hoki koutou i nga hē, i te kotinga-kore hoki o to koutou kikokiko, na, whakaorangia ngatahitia ana koutou me ia, he mea whakarere noa atu nāna o koutou hē katoa;

14 Murua ake e ia nga tika-nga i tuhituhia e te ringaringa, to tatou hoa riri i pehi nei i a tatou, tangohia ake e ia i waenganui, he mea titi nāna ki te ripeka;

15 Pahuatia iho e ia nga rangatiratanga, nga mana, whakakitea nuitia ana e ia, waiho iho e ia taua ripeka hei mea whakataka māna i a ratou.

16 ¶ Na kua tetahi e whakawa i a koutou mo te kai, mo te wai, mo nga meatanga ki te hakari, ki te kowhiritanga marama, ki nga hapati;

17 He atarangi enei no nga mea i kiia e puta mai ana i muri; no te Karaiti ia te tinana.

18 Kei mamingatia koutou e te tangata e mea ana ki te whakaiti i a ia, ki te karakia ki nga anahera, e pokanoa ana ki nga mea kahore nei ia i kite, e whakapehapeha noa

ana, he mea na tona ngakau kikokiko;

19 A kahore e mau ki te Upoko, māna nei te tinana katoa, he mea atawhai, he mea tuhonohono e nga hononga, e nga here, ka tupu ai, he tupu na te Atua.

20 ¶ Na, ki te mea kua whakatupāpaku ngatahi koutou ko te Karaiti ki nga mea timatanga o te ao, he aha koutou ka ahua ora ai ki te ao, ka pupuri tikanga ai,

21 Kei pa ringaringa; kei pa kai; kei rahurahu;

22 (Aua mea katoa hoki, i te meatanga iho ano ka pirau;) he whakahaunga, he akoranga na te tangata?

23 Te ahua nei o aua mea kei to te whakaaro nui, he karakia pokanoa, he whakaiti i a ia ake, he atawhai-kore i te tinana; a kahore o te kikokiko honore e makona ai.

UPOKO 3.

Whaia nga mea a Ihu. 5 Pehia te hiahia. 10 Kia hou. 12 Mo te aroha, aha, aha.

NA, ki te mea kua ara tahi koutou me te Karaiti, rapua nga mea o runga, o te wahi e noho mai nei a te Karaiti i te ringa matau o te Atua.

2 Whakaaroa nga mea o runga, kauaka o te whenua.

3 Kua mate hoki koutou, a kua oti to koutou oranga te huna ki a te Karaiti i roto i te Atua.

4 I te whakakitenga mai o

KOROHE 3.

te Karaiti, o te tatou oranga, ko reira hoki koutou whakakitea tahitia ai me ia i runga i te kororia.

5 ¶ Na whakamatea o koutou wahi i runga i te whenua; te moe tahae, te poke, te minamina ki te hē, te hiahia kino, me te apo, he karakia whakapakoko hoki ia:

6 He mea hoki enei e puta ai te riri a te Atua ki nga tamariki a te tutū:

7 I roto hoki i enei mea koutou e haere ana i mua, i a koutou e noho ana i roto i a ratou.

8 Tena ko tenei whakarerea enei mea katoa; te aritarita, te riri, te mauāhara, te korero kino, te korero whakarihariha, i roto i o koutou mangai.

9 Kaua e teka tetahi ki tetahi, kua unuhia atu hoki te tangata tawhito me ana hanga;

10 A kua kakahuria nei te tangata hou, e whakahoutia nei i runga i te matauranga kia rite ki te ahua o tona kai hanga:

11 Kahore o tena Kariki, Hurai ranei, kotinga, kotinga-kore ranei, tau tangata, Haitiana, pononga, rangatira ranei: engari ko te Karaiti te katoa, i roto ano i te katoa.

12 ¶ Na kia rite ki te hunga whiriwhiri a te Atua, ki te hunga e tapu ana, e arohaina ana, a kakahuria iho te ngakau tohu tangata, te ngawari, te ngakau pāpaku, te ngakau māhaki, te manawanui;

13 Kia ata hanga koutou

tetahi ki tetahi, me te hohou i te rongo tetahi ki tetahi, ki te mea kei tetahi he take riri ki tetahi: kia rite ki ta te Karaiti i hohou nei i te rongo ki a koutou, kia pera ano hoki koutou.

14 A hei waho i enei katoa ko te aroha, ko te tauhere tika rawa ia.

15 A waiho ma te rangimarie a te Atua te whakahaere tika nga i roto i o koutou ngakau: i karangatia hoki koutou ki tenei i roto i te tinana kotahi; kia whakawhetai hoki koutou.

16 Kia noho nui te kupu a te Karaiti i roto i a koutou i runga i nga matauranga katoa; me whakaako, me whakatupato tetahi e tetahi ki nga waiata tapu, ki nga himene, ki nga waiata wairua, me te waiata ano ki te Ariki i runga i te aroha noa, i roto i o koutou ngakau.

17 A, nga mea katoa e mea ai koutou, nga kupu, nga mahi ranei, *kia meinga* katoatia i runga i te ingoa o te Ariki, o Ihu, me te whakawhetai ano ki te Atua, ara ki te Matua, i roto i a ia.

18 ¶ E nga wāhine, kia ngohengohe ki a koutou tāne ake, kia rite ta te Ariki tika nga.

19 E nga tāne, arohaina a koutou wāhine, kei kaha hoki te riri ki a ratou.

20 E nga tamariki, kia ngohengohe ki o koutou mātua i nga mea katoa: he mea pai hoki tenei ki te Ariki.

21 E nga mātua, kaua e wha-

KOROHE 3, 4.

ka takariritia a koutou tama-riki, kei ngakau-kore ratou.

22 E nga pononga, kia ngohengohe ki nga rangatira o te wahi ki te kikokiko i nga mea katoa: kua hei ta te kanohi mahi, he whakamana-wareka tangata hoki tera; engari hei runga i te ngakau tapatahi, me te wehi ano ki te Atua:

23 A, nga mea katoa e mea ai koutou, mahia ngakautia, hei mea ki te Ariki, a ehara i te mea ki nga tāngata;

24 E mātau ana hoki, ka riro i a koutou ta te Ariki utu, te kāinga a mua: he pononga hoki koutou na te Ariki, na te Karaiti.

25 Na, te tangata e hē ana te mahi, ka whakawhiwhia ano ia ki tana hē i mahi ai: kahore hoki he whakapai kanohi.

UPOKO 4.

2 *Kia kaha ki te inoi.* 5 *Te hunga o waho.* 7 *Ma Tikiku raua ko Onehimu nga korero mona.* 10 *Mihi.*

E NGA rangatira, hoatu ki nga pononga te mea e tika ana, te mea e rite ana; e mohio ana hoki koutou he Rangatira to koutou kei te rangi.

2 ¶ Kia u ki te inoi, kia mataara tonu ki taua mea i runga i te whakawhetai;

3 Me te inoi ano mo matou, kia whakapuaretia e te Atua ki a matou he kuwaha korero, hei korerotanga i te mea

ngaro a te Karaiti, i hereherea nei ahau:

4 Kia whakakitea atu ai e au, kia rite ai taku korero ki te mea i tika.

5 Hei runga i te whakaaro mohio to koutou whakahaere ki te hunga o waho. Hokona te taima.

6 Hei runga i te aroha noa ta koutou korero i nga wa katoa, he mea kinaki ki te tote, kia mātau ai koutou ki te tikanga mo te whakahoki kupu ki tenei tangata, ki tenei tangata.

7 ¶ Ma Tikiku e whakakite oku mea katoa ki a koutou; he teina aroha ia, he minita pono, he hoa pononga i roto i te Ariki:

8 Ko te mea pu ano tenei i tonoa atu ai ia e ahau ki a koutou, kia mātau ai ia ki o koutou mea, hei whakamarie ano i o koutou ngakau;

9 Tona hoa, ko Onehimu, he teina pono e arohaina ana, no koutou ano hoki. Ma raua e whakakite ki a koutou nga mea katoa o konei.

10 ¶ He oha atu tenei ki a koutou na Aritaku, na toku hoa herehere, raua ko Maka iramutu o Panapa; (kua tae atu na hoki nga tikanga mona ki a koutou; ki te tae atu ia ki a koutou, kei a koutou he tukunga atu mona);

11 Me Ihu ano hoki, tetahi ingoa ona ko Hutuha; no te kotunga ratou. Ko enei anake oku hoa mahi ki te rangatiranga o te Atua, he orange ngakau ano ratou ki a au.

I. TEHARONIKA 1.

12 Tenei te oha atu nei ki a koutou a Epapara ; no koutou ia, he pononga na te Karaiti. Tohe tonu ia ki te inoi mo koutou, kia tu, he hunga tino tika, ki tonu i ta te Atua katoa i pai ai.

13 Whakaae tonu atu au ki te nui o tona ngakau mo koutou, mo te hunga hoki i Raorikia, mo te hunga hoki i Hierapori.

14 Tenei te oha atu nei ki a koutou a Ruka, te rata aroha, raua ko Rimaha.

15 Oha atu ki nga tēina i Raorikia, ki a Naimapa hoki, ki te hahi ano hoki i tona whare.

16 A ka korerotia tenei pukapuka ki a koutou, meinga kia korerotia ano hoki i roto i te hahi o nga Raorikia ; korerotia ano hoki e koutou to Raorikia.

17 Mea atu hoki ki a Arakipu, Kia mahara ki te mahi minita kua riro na i a koe i roto i te Ariki, kia ata mahia marietia.

18 ¶ Te ohatanga nei a Paora, na toku ringaringa ake. Kia mahara ki oku mekameka. *Kia tau* te aroha noa ki a koutou. Amine.

KO TE PUKAPUKA TUATAHI A PAORA APOTORO

KI TE

HUNGA O TEHARONIKA

UPOKO 1.

2 *Tona mahara ki a ratou e u tonu nei ki te whakapono.*

NA Paora, ratou ko Hirawanu, ko Timoti, ki te hahi o te hunga o Teharonika i roto i te Atua Matua, i te Ariki hoki, i a Ihu Karaiti : *Kia tau* te aroha noa ki a koutou, me te rangimarie, he mea na te Atua, na to tatou Matua, na te Ariki hoki, na Ihu Karaiti.

2 ¶ Whakawhetai tonu matou ki te Atua mo koutou katoa, maharahara tonu ki a koutou i a matou inoinga ;

3 Mau tonu to matou mahara ki ta koutou mahi whakapono, ki te uaua o to koutou aroha, ki te u o te tumanako ki to tatou Ariki, ki a Ihu Karaiti, i te aroaro o te Atua, ara o to tatou Matua ;

4 E mohio ana hoki matou, e nga tēina e arohaina ana e

I. TEHARONIKA 1, 2.

te Atua, ki to koutou whiri-whiringa.

5 Kihai hoki ta matou rongo pai i tae atu ki a koutou i runga i te kupu anake, engari i te kaha, i te Wairua Tapu hoki, nui atu hoki te u o te ngakau; e mātau ana hoki koutou ki to matou peheatanga i roto i a koutou, he whakaaro ki a koutou.

6 I rite ano hoki ta koutou ki ta matou, ki ta te Ariki ano hoki, he nui hoki te raru i te rironga o te kupu i a koutou, me te whakahari ano ia a te Wairua Tapu:

7 No ka waiho koutou hei tauira ki te hunga whakapono katoa o Makeronia, o Akaia.

8 I pakū haere na hoki i roto i a koutou te kupu a te Ariki, ehara i te mea i Makeronia, i Akaia anake, i puta atu ano hoki to koutou whakapono ki te Atua ki nga wahi katoa; a kahore he rawa e puaki ai tetahi kupu a matou.

9 Ko ratou nei hoki kei te korero mo matou, mo to matou taenga atu ki a koutou, mo to koutou tahuritanga mai hoki i nga whakapakoko ki te Atua, ki te mahi ki te Atua ora, ki te Atua pono;

10 Ki te tatari ano hoki ki tana Tama i te rangi, i whakaarahia ake nei e ia i te hunga mate, ki a Ihu, e whakara nei i a tatou i te riri meake nei puta.

UPOKO 2.

Nga raruraru me ana tikanga i tana kauwhautanga ma-

taati ki a ratou. 17 Te mea i roa ai ia. 19 Tona matenui ki a ratou.

E MĀTAU nei ano koutou, e oku tēina, ki to matou haerenga atu ki a koutou, ehara i te mea noa iho:

2 Heoi mate ana matou, tukinotia ana i Piripai, kua mohio na koutou, na ka maia ano matou i roto i to tatou Atua ki te korero i te rongo pai a te Atua ki a koutou, puta ana te uaua.

3 Ta matou whakahauhau na hoki, ehara i te mea na te tinihanga, na te poke ranei, ehara ano hoki i te mea hangareka:

4 Engari ka tikangatia nei matou e te Atua kia tukua ki a matou te rongo pai, penei tonu ta matou korero; ehara i te mea kia whakamanawarekatia te tāngata, engari te Atua, e whakamatautau nei i o tatou ngakau.

5 Kahore hoki matou kia anga ki te kupu whakapati, e mātau na ano hoki koutou, ki te ahua kau ranei hei mea taonga; ko te Atua te kai titiro mai:

6 Kihai ano matou i rapu kororia i te tāngata, i a koutou ranei, i era atu ranei, i te mea e tika ana kia taimaha iho matou, no te mea he apotoro na te Karaiti;

7 Engari i ngawari matou i waenganui i a koutou, i rite ki te kai hiki e whakaahurn ana i ana tamariki ake:

8 Pera tonu to matou matenui ki a koutou, a ehara i te mea ko te rongo pai anake a

I. TEHARONIKA 2, 3.

te Atua ta matou i pai ai kia hoatu ki a koutou, engari ko o matou ake wairua, no te mea e arohaina ana koutou e matou.

9 E mahara ana hoki koutou, e *oku* tēina, ki ta matou mahi, ki *to matou* mauui: mahi ana matou i te po, i te ao, kei tai-maha ki tetahi o koutou, a kauwhautia ana e matou te rongo pai a te Atua ki a koutou.

10 Ko koutou nga kai titiro, ko te Atua hoki, ki te tapu, ki te tika, ki te hē kore o to matou whakahaere ki a koutou e whakapono na:

11 E mātau ana ano koutou ki ta matou whakahau, whakamarie, kauwhau ki tetahi, ki tetahi o koutou, rite tonu ki ta te matua ki ana tamariiki;

12 Mo to koutou haere kia rite ki to te Atua, nāna nei koutou i karanga ki tona rangatiratanga, ki *tona* kororia.

13 ¶ Mo konei matou ka whakawhetai tonu nei ki te Atua, no te mea i to koutou tahuritanga ki te kupu a te Atua i rongo ra koutou ki a matou, ehara i te mea he tahuritanga no koutou ki te kupu tangata, engari ki te kupu a te Atua, ko ia pu na hoki ia, e mahi na ano i roto i a koutou, i te hunga e whakapono na.

14 Kua rite na hoki ta koutou, e *oku* tēina, ki ta nga hahi a te Atua i Huria i roto i a Karaiti Ihu: o koutou matenga na hoki i nga tā-

ngata o to koutou iwi ake, kua rite ki o era i nga Hurai;

15 Na ratou nei hoki i whakamate te Ariki, a Ihu, me o ratou ake poropiti, whakatoi ana ratou ki a matou; kahore hoki a ratou whakamanawareka ki te Atua, he hoa riri hoki ratou no nga tāngata katoa;

16 E arai ana i a matou kei korero ki nga tauwiwi kia ora ai, he mea tenei e tutuki ai o ratou hara i nga wa katoa; na ka whakapaua rawatia te riri ki a ratou.

17 ¶ Ko matou ia, e *oku* tēina, he iti nei te wahi kua wehea mai nei matou i a koutou, ko te kanohi, kahore te ngakau, hira rawa to matou takare kia kite i to koutou kanohi, nui atu te hiahia.

18 No reira te tuatahi, te tuarua o a matou meatanga kia haere atu ki a koutou, ara oku nei, o Paora, heoi na Hatana matou i whakaware.

19 He aha hoki ta matou e tumanako ai, e hari ai, *he aha oti* te karauna e whakamanamana ai matou? He teka ianei ko koutou i te aroaro o to tatou Ariki, o Ihu Karaiti, a tona taenga mai?

20 Ko koutou hoki to matou kororia, *to matou* whakaharanga.

UPOKO 3.

Tana tononga i a Timoti ki a ratou. 6 Koa ki ana korero. 7 Ngakau nui ki a ratou.

I. TEHARONIKA 3, 4.

NA, tē taca te ngakau te pēhi tonu, i pai matou kia mahue ko matou anake ki Atene:

2 A tonoa ana e matou a Timoti, to matou teina, he minita na te Atua, he hoa mahi no matou ki te rongo pai o te Karaiti, hei whakau i a koutou, hei korero whakamarie ki a koutou mo nga mea o to koutou whakapono;

3 Kei whakangauetia tetahi e enei tukinotanga: e mātau ana ano hoki koutou he mea momotu tatou mo tenei mea.

4 I a matou hoki e noho ana i a koutou, i korero wawe ano matou ki a koutou, tera tatou e tukinotia; ko ia ano tenei, ka mātau nei koutou.

5 Na, tē taea toku ngakau te pēhi tonu, ka tono tangata atu ahau kia mohio ai ahau ki to koutou whakapono, kei whakawaia pea koutou e te kai whakawai, a maumau kau ta matou mahi.

6 Tena ko tenei ka tae mai nei a Timoti ki a matou i a koutou, a ka pai tana korero ki a matou mo to koutou whakapono, mo to koutou aroha, a e whai mahara pai ana koutou ki a matou i nga wa katoa, e hiahia ana kia kite i a matou, he pera ano me to matou ki a koutou;

7 Na, kua whai whakamarietanga matou i a koutou, e *oku* tēina, i o matou tukinotanga katoa, i o matou matenga, he mea na to koutou whakapono:

8 Ko to matou orange nei

hoki tenei, ara, kia tu tonu koutou i runga i te Ariki.

9 Kei te aha hoki he whakawhetai ma matou ki te Atua mo koutou, mo nga hari-nga katoatanga e hari nei matou ki a koutou, i te aroaro o to tatou Atua?

10 Nui atu ta matou inoi i te po, i te ao, kia kite i o koutou kanohi, kia whakaotia ano hoki e matou nga wahi o to koutou whakapono i mahue.

11 ¶ Na, ma te Atua ake ano, ara ma to tatou Matua, ma to tatou Ariki hoki, ma Ihu Karaiti, e whakatika to matou ara ki a koutou.

12 Ma te Ariki ano hoki e mea kia nui, kia hira to koutou aroha tetahi ki tetahi, ki nga tangata katoa hoki, kia penei ano me to matou ki a koutou:

13 Kia whakaukia ai o koutou ngakau he mea hē-kore i runga i te tapu i te aroaro o te Atua, ara o to tatou Matua, a te taenga mai o to tatou Ariki, o Ihu Karaiti, ratou ko tona hunga tapu katoa.

UPOKO 4.

Ana whakahau. 13 Kupu mo nga tupapaku; 15 aranga; hokinga mai o Ihu.

HEOI, e *oku* tēina, he mea tenei na matou, he whakahau ki a koutou i roto i te Ariki, i a Ihu, kua riro atu na hoki ta matou i a koutou, ara te tikanga mo to koutou haere mo ta koutou whakamana-wareka atu ki te Atua, na,

I. TEHARONIKA 4.

kia tino hira rawa *tera* a koutou.

2 E mātau ana hoki koutou ki nga tikanga i whakatakororia atu e matou ki a koutou i roto i te Ariki, i a Ihu.

3 Ko ta te Atua hoki tenei e pai ai, ko to koutou whakata-punga, kia mawehe koutou i te puremu:

4 Kia mātau koutou katoa ki tona tinana, ki tona tinana, kia mau i runga i te tapu, i te honore:

5 Kaua i runga i te toronga o te hiahia, kei rite ki nga tauwi kahore nei e mātau ki te Atua:

6 Kia kaua tetahi e tiniha-nga e whakapati i te mea a tona teina; no te mea ko te Ariki te kai rapu utu mo era *mahi* katoa; ko ta matou hoki ia i korero ai i mua, i whakaatu ai ki a koutou.

7 Kihai hoki tatou i karangatia e te Atua ki te poke, engari ki te tapu.

8 Na, te tangata e whakorekore ana, ehara tana i te whakorekore ki te tangata, engari ki te Atua, nāna nei i homai tona Wairua Tapu ki a tatou.

9 ¶ Na, te aroha ki nga tēina, kahore a koutou mea e tuhi-tuhi ai ahau ki a koutou; he mea whakaako hoki koutou na ano e te Atua ki te aroha tetahi ki tetahi.

10 Ko ta koutou na hoki ia e mea na ki nga tēina katoa a puta noa i Makeronia: heoi he whakahau ano tenei na matou ki a koutou e *oku*

tēina, kia hira rawa *tena* a koutou:

11 Me whai ano hoki kia ata noho, kia mahia ta koutou *mahi* ake e tera, e tera: ko o koutou ringaringa ake ano hei mahi, kia rite ki ta matou i ako ai ki a koutou;

12 Kia ataahua ai to koutou haere ki te hunga o waho, a kia kaua ai e matea tetahi mea.

13 ¶ Na e kore ahau e pai, e *oku* tēina, kia kuare koutou ki te hunga kua moe, kei koingo koutou, kei pera me era atu kahore nei o ratou tumanakotanga atu.

14 Ki te whakapono hoki tatou kua mate a Ihu, kua ara ake ano, waihoki ko te hunga e moe ana i roto i a Ihu, ka arahina tahitia mai ratou me ia e te Atua.

15 Ko ta matou korero hoki tenei ki a koutou, he mea ki mai na te Ariki, ko tatou, ko te hunga kua mahue ki te ora, ki te taenga mai o te Ariki, e kore e pahika atu ki mua o te hunga kua moe.

16 No te mea ko te Ariki pu ano e heke iho i te rangi me te karanga ano, me te reo o te tino anahera, me te tētere a te Atua: a ko te hunga kua mate i roto i a te Karaiti e ara ki mua:

17 Ko reira tatou te hunga kua mahue ki te ora, ka kaha-kina ngatahitia ai me ratou i runga i nga kapua, ki te whakatau ki te Ariki i te rangi: na ka noho tonu tatou ki te Ariki.

I. TEHARONIKA 4, 5.

18 Na, he kupu enei hei whakamarie ma koutou tetahi i tetahi.

UPOKO 5.

Kia mataara. 14 Tikanga mo nga mahi.

KO nga wa ia me nga tai-ma, e *oku* tēina, kahore he rawa e tuhituhi atu ai ahau ki a koutou.

2 E mātau pu ana hoki koutou, tera e haere mai te ra o te Ariki ano he tahae i te po.

3 I a ratou hoki e ki ana, He whenua rangatira, he orange; ko reira te whakanga-romanga huaki tata ai ki a ratou, pera ai me te mamae ki te wahine hapū, a e kore ratou e mawhiti.

4 Ko koutou ia, e *oku* tēina, kahore he pouritanga i a koutou, e rite ai ki ta te tahae te hopu a taua ra i a koutou.

5 He tamariki koutou katoa no te maramatanga, he tamariki no te ra: ehara tatou i te po, ehara i te pouritanga.

6 Na, aua tatou e moe, kei pera me era atu; engari kia mataara tatou, kia whai whakaaro.

7 Te hunga hoki e moe ana, e moe ana i te po; a, te hunga e haurangi ana, e haurangi ana i te po.

8 Ko tatou ia, ko te hunga o te ra, kia whai whakaaro, kia kakahuria iho te whakapono me te aroha hei pukupuku; a hei potae, ko te tumanako ki te ora.

9 Kihai hoki tatou i waiho e te Atua mo te riri, engari kia

meinga kia whiwhi ki te orange he mea na to tatou Ariki, na Ihu Karaiti;

10 I mate mo tatou, mo tatou ahakoa mataara, moe ranei, kia ora tahi me ia.

11 Na, whakamarie koutou tetahi i tetahi, hangā hoki te pai o tetahi e tetahi, peratia ano me ta koutou e mea na.

12 ¶ Na, he mea tenei na matou ki a koutou, e *oku* tēina, kia mātau ki te hunga e mahi ana i roto i a koutou, e tohutohu ana i a koutou i roto i te Ariki, e whakatupato ana i a koutou;

13 Kia nui whakaharahara ano o koutou whakaaro ki a ratou i runga i te aroha, me whakaaro ki ta ratou mahi. Kia mau ta koutou rongo ki a koutou ano.

14 Na ko ta matou whakahau tenei ki a koutou, e *oku* tēina, whakatupatoria te hunga whakakeke, whakamarie-tia te hunga ngakau rahirahi, tautokona ake te hunga ngoi-kore, kia manawanui ki nga tāngata katoa.

15 Kia tupato kei hoatu he kino mo te kino e tetahi ki tetahi; engari i nga wa katoa whaia he pai mo tetahi, mo tetahi, mo nga tāngata katoa ano hoki.

16 Kia hari i nga wa katoa.

17 Kei whakamutua te inoi.

18 I nga meatanga katoa-tanga me whakawhetai atu; ko ta te Atua hoki tenei e pai ai i roto i a Karaiti Ihu hei mahi ma koutou.

19 Kei tineia te Wairua.

II. TEHARONIKA 1.

20 Kaua e whakahawea atu ki nga poropititanga.

21 Whakamatamatauria nga mea katoa; kia u ki te pai.

22 Mawehe atu i nga ahua katoa o te kino.

23 ¶ A ma te Atua pu ano o te rangimarie e tino whakatapu rawa koutou: kia tia-kina hoki o koutou wairua, o koutou ngakau, o koutou tinana, kia toitū, kia hē-kore, a te taenga mai o to tatou Ariki, o Ihu Karaiti.

24 E pono ana te kai karanga i a koutou māna ano hoki e whakaoti.

25 ¶ E *oku* tēina, inoi mo matou.

26 ¶ Oha atu ki nga tēina katoa, hei te kihi tapu ano.

27 Na, he whakahua tenei naku i te Ariki ki a koutou, korerotia tenei pukapuka ki nga tēina tapu katoa.

28 ¶ *Kia tau* ki a koutou te aroha noa o to tatou Ariki, o Ihu Karaiti. Amine.

KO TE PUKAPUKA TUARUA A PAORA APOTORO

KI TE

HUNGA O TEHARONIKA.

UPOKO 1.

3 *Mo to ratou whakapono, aroha, manawanui.* 5 *Ana kupu whakamarie.*

NA Paora, ratou ko Hirawanu, ko Timoti, ki te hahi o te hunga o Teharonika i roto i te Atua, i to tatou Matua, i te Ariki hoki, i a Ihu Karaiti:

2 *Kia tau* ki a koutou te aroha noa, me te rangimarie, he mea na te Atua, na to tatou Matua, na te Ariki hoki, na Ihu Karaiti.

3 ¶ Tika rawa kia whaka-

whetai matou ki te Atua i nga wa katoa mo koutou, e *oku* tēina, he mea pai ra hoki ia, no te mea e neke ake ana to koutou whakapono, a he nui rawa te aroha o koutou katoa o tetahi ki tetahi:

4 I whakamanamana ai matou ki a koutou i roto i nga hahi a te Atua, ki to koutou u, ki to koutou whakapono i o koutou whakatoinga katoa, i nga tukinotanga hoki e whakaririka kau na koutou;

5 He tohu tenei mo te tika o ta te Atua whakarite whakawa, e whakatikangatia ai koutou mo te rangatiratanga

II. TEHARONIKA 1, 2.

o te Atua, he whakaaro nei hoki ki tera i mate ai koutou:

6 He mea tika nei hoki ki te Atua kia utua ki te tukinotanga te hunga e tukino ana i a koutou;

7 A ki a koutou e tukinotia na, kia okioki tahi me matou, a te whakakitenga mai o te Ariki, o Ihu, i runga i te rangi me nga anahera o tona kaha,

8 I roto i te mura ahi e rapu utu ana i te hunga kahore e mātau ki te Atua, kahore nei hoki e ngohengohe ki te rongo pai o to tatou Ariki, o Ihu Karaiti.

9 Te utu hoki e whakapanhia ki a ratou he whakangaromanga, he mea mutunga-kore i te aroaro ano o te Ariki, i te kororia ano hoki o tona kaha;

10 Ina haere mai ia kia whakakororiatia i roto i tana hunga tapu, kia whakamomititia i roto i te hunga whakapono katoa, a taua ra; i whakapono na hoki koutou ki ta matou whakaaturanga i roto i a koutou.

11 Koia nei hoki matou ka inoi tonu nei mo koutou, kia whakatikangatia koutou e to tatou Atua mo tenei karangatanga, kia whakaotia ano hoki e ia i runga i te kaha nga mea katoa i ahuaireka ai tona pai, me te mahi ano hoki o te whakapono,

12 Kia whakakororiatia ai te ingoa o to tatou Ariki, o Ihu Karaiti i roto i a koutou, me koutou hoki i roto i a ia, kia rite ai ki ta te aroha noa o to

tatou Atua, o te Ariki, hoki o Ihu Karaiti.

UPOKO 2.

Kia u. 3 Kia puta ra ano te poropiti teka ka puta mai ai a te Karaiti. 15 Na, kia u.

NA, he mea tenei na matou ki a koutou, e oku tēina, mo te taenga mai o to tatou Ariki, o Ihu Karaiti, mo to tatou huihuinga atu ano ki a ia;

2 Kei whakaoioia wawetia o koutou hinengaro, kei ohore i ta te wairua ranei, i ta te kupu ranei, i ta te pukapuka ranei e kiia ana na matou i tuhituhi, kei mea ka tata te ra o te Karaiti.

3 Kei tinihangatia koutou i tetahi mea e te tangata: e kore hoki e tae wawe mai, kia mātua tae mai te takanga atu, kia whakakitea mai ano hoki te tangata o te hara, te tama a te whakangaromanga:

4 He hoa riri nei ia, e whakakake ana i a ia ki runga ake i nga mea katoa e karangatia ana he Atua, e karakiatia ana ranei, a ko ia ano hei Atua e noho ana i te whare o te Atua, e whakakite ana i a ia, ko ia te Atua.

5 Kahore ranei koutou e mahara, i a au ano i a koutou, i korerotia e ahau enei mea ki a koutou?

6 A e mātau ana koutou inaianei ki te mea e arai nei, kia whakakitea mai ra ano ia i tona taima ano.

7 Kei te mahi nei hoki inaianei te kino ngaro: otiia kei

II. TEHARONIKA 2, 3.

te arai tetahi inaianei, a kia hipa atu ra ano ia i waenganui.

8 Ko reira whakakitea ai taua tangata kino, e whakanngaromia e te Ariki ki te ha o tona mangai, e whakahoretia ki te putanga nui o tona taenga mai.

9 To tera taenga mai rite tonu ki te mahinga a Hatana, i runga i nga mahi kaha katoa, i nga tohu, i nga merekara teka,

10 I nga mahi tinihanga katoa ano o te hē, i roto i te hunga e whakangaromia ana; no te mea kihai i riro i a ratou te aroha o te pono, kia ora ai ratou.

11 Mo konei hoki ka tonoa e te Atua ki a ratou he pohēhē e mahi ana, e whakapono ai ratou ki te teka:

12 Kia tukua ai ki te hē te hunga katoa kahore i whakapono ki te pono, a e ahuareka ana ki te hē.

13 ¶ Tika tonu ia kia whakawhetai matou ki te Atua mo koutou i nga wa katoa, e oku tēina e arohaina nei e te Ariki, he mea whiriwhiri na hoki koutou na te Atua no te timatanga ra ano mo te ora, i runga i te whakatapunga a te Wairua, i runga ano i te whakapono ki te pono;

14 Ko te mea tena i karangatia ai koutou e ia, he mea na to matou rongo pai, ara kia whiwhi ki te kororia o to tatou Ariki, o Ihu Karaiti.

15 Na, e oku tēina, e tu kou-

tu: kia mau ki nga whakarerenga iho i whakaakona ai koutou e te kupu, e ta matou pukapuka ranei.

16 ¶ Na, ma to tatou Ariki, ma Ihu Karaiti pu ano, ma te Atua, ara ma to tatou Matua, i aroha mai nei ki a tatou, a homai ana i te whakamarietanga mutunga kore, me te mea pai e tumanakohia nei, he meatanga na te aroha noa,

17 Māna e whakamarie o koutou ngakau, māna koutou e whakau ki runga ki nga kupu me nga mahi pai katoa.

UPOKO 3.

Kia inoi ratou mona. 3 Tana mo ratou. 6 Ana ako. Kei mangere; kua e huihuia ki nga kai mahi kino.

HEOI, e oku tēina, inoi mo matou, ara mo te kupu a te Ariki kia rere, kia whai kororia, kia pena ano me tena i a koutou:

2 Kia whakaorangia hoki matou i nga tāngata poauau, i nga tāngata kino: kahore hoki he whakapono i te katoa.

3 Otiia e pono ana te Ariki, a māna koutou e whakau, e tiaki kei riro i te kino.

4 Na e u ana to matou whakaaro i roto i te Ariki ki a koutou, kei te mahi koutou, a ka mahi ano i ā matou e whakaako nei ki a koutou.

5 Ma te Ariki ano e whakatika o koutou ngakau ki te aroha o te Atua, ki te tatari

II. TEHARONIKA 3.

marie atu ano hoki ki a te Karaiti.

6 ¶ Na ko ta matou ako atu tenei ki a koutou, e *oku* tēina, i runga i te ingoa o to tatou Ariki, o Ihu Karaiti, mawehe atu i nga tēina katoa e hē ana te whakahaere, a kahore e rite ki ā matou whakarerenga iho i riro i a ratou.

7 E mātau na hoki koutou ki nga mea e tika ai to koutou whakarite ki a matou: kihai hoki i hē to matou whakahaere i roto i a koutou;

8 Kihai ano hoki matou i kai noa i ta tetahi taro; engari i mahi, i uaua, i mauui, i te po, i te ao, kei taimaha ki tetahi o koutou:

9 Ehara ra i te mea kahore he mana i a matou; engari kia waiho ai matou hei tauira mo koutou, kia rite ai ta koutou ki ta matou.

10 I a matou hoki e nōho ana i a koutou, ko ta matou ako tenei ki a koutou, ki te kore tetahi e pai ki te mahi, kei kai ia.

11 Ka rongo hoki matou tera etahi e hē ana te whakahaere i roto i a koutou, kahore e

mahi, heoi e pokanoa ana ki ta tera.

12 Na ko ta matou ako, ko ta matou whakahau tenei ki aua tangata pera, me whakaa-ro ki to tatou Ariki, ki a Ihu Karaiti, me mahi marie ratou, ka kai ai i ta ratou taro ake.

13 Ko koutou ia, e *oku* tēina, kei ngakau-kore ki te mahi pai.

14 Na, ki te kore tetahi e ngohengohe ki ta matou kupu i tenei pukapuka, whaitohungia iho ia, kei huihui hoki ki a ia, kia whakama ai ia.

15 Otiia kua e mea he hoariri ia, engari whakatupatoria, ano he teina.

16 ¶ Na, ma te Ariki pu o te ranginarie e hoatu te rangimarie ki a koutou i nga wa katoa, i nga mea katoa. *Kia noho* te Ariki ki a koutou katoa.

17 ¶ Te ohatanga nei a Paora, na toku ringaringa ake, ko te tohu ia i nga pukapuka katoa; he penei taku tuhituhi.

18 *Kia tau* te aroha noa o to tatou Ariki, o Ihu Karaiti ki a koutou katoa. Amine.

KO TE PUKAPUKA TUATAHI A PAORA APOTORO

KI A

TIMOTI.

UPOKO 1.

3 *Nga mahi māna ki Epeha.*
5 *Te ture.* 12 *Tona karangatanga hei apotoro.* 18 *Himenu-ma.*

NA Paora, na te apotoro a Ihu Karaiti, he mea whakarite e te Atua, e to tatou Kai whakaora, e te Ariki hoki, e Ihu Karaiti, ko ia ta tatou e tumanako nei,

2 Kia Timoti, ki *taku* tamaiti pono i roto i te whakapono: *kia tau* te aroha noa, te mahi tohu, te rangimarie, he mea na te Atua, na to tatou Matua, na Karaiti Ihu hoki, na to tatou Ariki.

3 ¶ Kia rite *tau* ki *taku* i whakahau atu ai ki a koe, i a au e haere ana ki Makeronia, ara kia noho koe ki Epeha, ako ai i etahi kia kaua e rere ke te whakaako,

4 Kia kaua e whakarongo ki nga korero tito noa, ki nga whakapapa tupuna kahore nei e whai mutunga; nga putanga ake o ena, he tau-tohetohe, kahore he whaka-

tupu mo te tikanga a te Atua i runga i te whakapono.

5 Na, te tukunga iho mo te akoranga, ko te aroha, no roto i te ngakau ma, i te hinengaro pai, i te whakapono tinihanga-kore.

6 Kapea ake enei e etahi, kotiti ke ana ki nga korero teka noa;

7 Ki ta ratou he kai whakaako ratou i te ture; heoi kahore e mātau ki ta ratou e korero nei, ki nga mea ranei e kauwhautia nei e ratou.

8 Na e mātau ana tatou he mea pai te ture, ki te rite te meatanga e te tangata ki ta te ture tikanga;

9 E mātau ana hoki ki tenei, kihai te ture i whakatakotoria mo te tangata tika, engari mo te hunga ture-kore, tutū, karakia-kore, hara, tapu-kore, whakarihariha, mo nga kai patu i nga pāpā, mo nga kai patu i nga whaea, mo nga kai kohuru tangata,

10 Mo te hunga puremu, moe tāne, tahae tangata, korero teka, oati teka, a ki te mea tera atu tetahi mea

I. TIMOTI 1, 2.

kahore nei e rite ki te whakaako tika.

11 Rite tonu tenei ki te rongo pai, ki te mea kororia a te Atua koa, ki te mea kua tukua mai nei ki a au.

12 ¶ A e whakawhetai atu nei ahau ki a Karaiti Ihu, ki to tatou Ariki, nāna nei au i whakakaha; i whakaaro hoki ia he tangata pono ahau, a meinga ana ahau hei minita;

13 Ahau nei, te tangata kohukohu i mua, te kai whakatōi, whakatupu kino: heoi i tohungia ahau, no te mea i meinga kuaretia e ahau i runga i te whakapono kore:

14 Heoi tino nui rawa te aroha noa o to tatou Ariki, hui tahi ki te whakapono, ki te aroha i roto i a Karaiti Ihu.

15 He pono te korero, a e pai ana kia tangohia rawatia, i haere mai a Karaiti Ihu ki te ao ki te whakaora i te hunga hara; te tino tangata o ratou ko ahau.

16 Heoi na konei ahau i tohungia ai, kia ai ko ahau ki mua hei whakaaturanga ma Ihu Karaiti i nga manawanuitanga maha, hei tohu ki te hunga e whakapono ana ki a ia i muri, kia ora tonu ai ratou.

17 Na, te Kingi ora tonu, e kore nei e pirau, e kore nei e kitea, ko ia nei anake te Atua mātau, waiho atu i a ia te honore me te kororia, ake ake ake. Amine.

18 ¶ Ka tukua atu nei e

ahau tenei kupu ako ki a koe, e taku tamaiti, e Timoti, ko te poropititanga ano tenei i puta i mua mou, hei mea i a koe kia whawhai i te whawhai pai;

19 Kia whai whakapono, me te hinengaro pai, he mea akiri tenei na etahi, a, to ratou whakapono, koia ano kei te kaupuke pakaru:

20 No ratou a Himeniu raua ko Arehanera, kua tukua nei e ahau ki a Hatana, kia whakaakona ai kia kaua e kohuhohu.

UPOKO 2.

Me inoi mo nga tangata katoa. 9 Whakapaipai mo nga wahine. 12 Kaua ratou e whai kupu i roto i te hahi.

NA ko taku whakahau tenei i te tuatahi o nga mea katoa, kia puta nga inoi, nga karakia, nga inoi wawao, nga whakawhetai, mo nga tāngata katoa;

2 Mo nga kingi, mo te hunga whai mana katoa hoki: kia ata noho marie ai tatou i runga i nga whakaaro karakia i nga tikanga mahara katoa.

3 He mea pai hoki tenei, he mea e manakohia ana i te aroaro o te Atua, o to tatou Kai whakaora;

4 Ko tana nei e pai ai ko nga tāngata katoa kia ora, kia haere mai hoki ki te matauranga ki te pono.

5 Kotahi hoki te Atua, kotahi te takawaenga o te Atua

I. TIMOTI 2, 3.

o nga tāngata, ko te tangata, ko Karaiti Ihu;

6 I hoatu nei i a ia hei utu mo te katoa, he mea whakarite i ona wa ake.

7 A meinga ana ahau hei karere, hei apotoro mo taua mea, (he pono taku korero i roto i a te Karaiti, kahore aku teka); he kai whakaako mo nga tauwi i runga i te whakapono, i te pono.

8 ¶ Na, taku e pai ai, ko nga tāne kia inoi i nga wahi katoa, kia tapu nga ringa ina ara, kua he riri, he tautohe-tohe.

9 Nga wāhine ano hoki, te whakapaipai mo ratou hei te kakahu ataahua, hei te ahua e whakama ana, e whai whakaaro ana; kauaka te makawe whiri, te koura, te peara, te kakahu utu nui;

10 Engari te mea e pai ana mo nga wāhine e whakaae ana ki te karakia, ara nga mahi pai.

11 Me ako marie te wahine, kia nui te ngohengohe.

12 E kore hoki e tukua e ahau te wahine kia whakaako, kia neke ake ranei tona tika-nga i to te tāne, engari me ata noho.

13 Ko Arama hoki kua hangā ki mua, muri iho ko Iwi.

14 Kihai ano hoki a Arama i tinihangatia, ko te wahine ia i tinihangatia, a takahi ana i te ture:

15 Otira ka ora ano i te whanautanga tamariki, ki te mau tonu to ratou whakapono, aroha, tapu, whakaaro.

UPOKO 3.

Mo nga pihopa. 8 Rikona, 11 me a ratou wahine. 14 Mo te hahi. 16 Mo Ihu.

HE pono te korero, Ki te hiahia tetahi ki te mahi pihopa, e hiahia ana ia ki te mahi pai.

2 Na, ko te tikanga tenei, kia kua te pihopa e ekengia e te kupu, he tahu no te wahine kotahi, kia whai mahara, kia whai whakaaro, kia ataahua ona tikanga, kia atawhai ki nga manuhiri, kia whai ngakan ki te whakaako:

3 Kia kua e kakai waina, kia kua e patu, kia kua e whaia e ia nga taonga hē; engari kia ngakau ngawari, kia kua e whawhai, kia kua e matenui ki te moni;

4 Kia pai tana tohutohu i tona whare; e mea ana i ana tamariki kia ngohengohe *ki a ia*, kia nui te mahara:

5 (Ki te kore hoki tetahi tangata e mātau ki te tohutohu i tona whare ake, me pehea ka tiaki ai ia i te hahi a te Atua?)

6 Ko te tauhou kauaka, kei whakakake, a ka tau to te rewera hē ki a ia.

7 Kia pai ano hoki te korero mona a te hunga o waho; kei taka ia ki te whakahawea, ki ta te rewera mahanga ano hoki.

8 ¶ Me nga rikona ano kia ahua kaumatua, kua e korero rua, kua e matenui ki te waina, kua e whaia te taonga hē;

9 Kia ma ano te hinengaro

I. TIMOTI 3, 4.

e mau ai i a ratou to te whakapono mea ngaro.

10 Kia mātua whakamātau-
tauria ano hoki enei; ko reira
ratou meinga ai hei rikona, i
te mea kahore nei he wha-
kahe mo ratou.

11 Me nga wāhine hoki kia
ahua kaumātua, kaua e ngau-
tuara, kia whai mahara, kia
pono i nga mea katoa.

12 Nga rikona, kia kotahi te
hoa wahine; kia pai te tohu-
tohu i a ratou tamariki, i o
ratou whare ake ano hoki.

13 Ki te pai hoki ta ratou
mahi rikona, ka whiwhi ratou
ki te turanga pai mo ratou,
ka nui hoki to ratou maia i
runga i te whakapono ki a
Karaiti Ihu.

14 ¶ He tuhituhi atu tenei
naku i enei mea ki a koe, e
mea ana hoki tera ahau e
haere wawe atu ki a koe:

15 Ki te roa ia ahau, kia
mātau ai koe ki te tikanga
mo to mahi, i roto i te whare
o te Atua, ko te hahi nei ia o
te Atua ora, ko te pou me te
turanga o te pono.

16 Na, takoto rawa te wha-
kae ki te nui o te mea ngaro
e karakiatia nei: Te Atua i
whakakitea mai i roto i te
kikokiko, he mea whakatika
mai na te Wairua, i kitea e
nga anahera, kua kauwhautia
nei i roto i nga tauwi, kua
whakaponohia nei e te ao, a
tangohia atu ana ki te kororia.

UPOKO 4.

*Tenei ake ka ngau ke te wha-
kapono. 6 Mahi ma Timoti.*

NA, he korero mārāma ra-
wa ta te Wairua, ko a
nga wa whakamutunga etahi
kotiti ke atu ai i te whakapono,
tahuri ai ki nga wairua tini-
hanga, ki nga whakaakoranga
rewera;

2 He mea na te hianga o te
hunga korero teka; o ratou
hinengaro, ano he mea tahu
ki te rino wera;

3 E riri ana kia kaua e ma-
rena, kia kaua e pa ki nga kai i
hangā e te Atua hei mea ma
te hunga e whakapono ana, e
mātau ana hoki ki te pono; me
te whakawhetai ano ratou.

4 He pai hoki nga mea
katoa i hangā e te Atua,
ehara hoki i te mea hei ruke-
nga, ki te mea e tangohia ana
i runga i te whakawhetai:

5 E tapu ana hoki, he mea na
te kupu a te Atua, na te inoi.

6 ¶ Ki te whakamahara koe
i nga tēina ki enei mea, he
minita pai koe na Ihu Ka-
raitī, he mea whakatupu ake
i runga i nga kupu o te wha-
kapono, o te whakaakoranga
pai kua whaia nei e koe.

7 Na, nga korero tito noa,
nga mea whakarihariha a te
ruruhi, whakarerea, a, te
mahi māu, ko nga mea o te
ngakau karakia.

8 Te whakamahinga hoki i
te tinana, he iti te pai: ko te
ngakau karakia ia, pai tonu
mo nga mea katoa, kei reira
hoki nga korero mo te oranga
inaianeī, mo tera hoki a mua.

9 He pono tenei korero, e
pai ana hoki kia tangohia ra-
watia.

I. TIMOTI 4, 5.

10 Koia hoki matou ka mahi ai, ka tawaia ai, no te mea ka u to matou whakaaro ki te Atua ora, ko ia nei te Kai whakaora o nga tāngata katoa, tera noa ake ia o te hunga whakapono.

11 Me kauwhau enei mea e koe, me whakaako.

12 Kei whakahaweā tetahi ki tou taitamarikitanga; engari hei tauira koe ki te hunga whakapono, to kupu, tou whakahaere, tou aroha, tou wairua, tou whakapono, tou ngakau ma.

13 Kia pumau koe ki te korero pukapuka, ki te whakahau, ki te whakaako, kia tae atu ra ano ahau.

14 Kei takoto noa te mea homai noa i roto na i a koe, i homai ra ki a koe he mea poropiti, i nga ringaringa ano o nga kaumātua i whakapangia na.

15 Whakaaroa enei mea; anga nui ki enei mea; kia kitea ai tou nekehanga ake i nga mea katoa.

16 Kia mahara ki a koe ano, ki te whakaakoranga hoki: kia u ki enei mea: ki te mea hoki koe i tenei, ka whakaora koe i a koe ano, i te hunga ano hoki e whakarongo ana ki a koe.

UPOKO 5.

Mo te kupu ki te kaumatua, ina he; ki nga taitamariki: 2 ki nga wahine. 3 Mo nga pouaru. 17 Ata-whai mo nga kaumatua pai. 22 Tangata hei minita.

KAUA e whakatupehupehu ki te kaumātua; engari ata korerotia atu, ano he matua; nga taitamariki hoki, ano he teina;

2 Nga ruruhi, ano he whaea; nga wāhine taitamariki, ano he tuahine, i runga i nga whakaaro ma katoa.

3 Whakahonoretia nga pouaru, ara nga tino pouaru.

4 Ki te mea ia he tamariki, he mokopuna ranei a tetahi pouaru, kia whakaakona ratou i te tuatahi kia whakaaro tika ki to ratou whare ake, kia utua hoki ta nga mātua, he mea pai hoki tenei, he mea e manakohia ana i te aroaro o te Atua.

5 Na, te tino pouaru, te mea mokemoke, e tumanako ana ia ki te Atua, mau tonu ki nga inoi, ki nga karakia i te po, i te ao.

6 A ki te whai tetahi ki ā te tinana whakaahuareka, aha-koa ora, he tupāpaku.

7 Akona atu enei mea, kei ekengia ratou e te kupu.

8 Na, ki te kore tetahi e whakaaro ki ona ake, ki te hunga rawa ano ia o tona whare, kua whakakahoretia e ia te whakapono, kino atu tana i ta te tangata whakapono-kore.

9 Kua te pouaru e tango-hia ki roto, i te mea kahore ano i ono tekau noa ona tau, hei te wahine i tūturu ki te tāne kotahi,

10 Hei te mea e whakaaetia ana āna mahi pai; ki te mea i whakatupu tamariki, ki te mea i atawhai manuhiri, ki

I. TIMOTI 5, 6.

te mea i horoi i nga waewae o te hunga tapu, ki te mea i atawhai i te hunga e tuki-notia ana, ki te mea i whaia e ia nga mahi pai katoa.

11 Nga pouaru taitamariki ia me whakarere: ki te ngau ke hoki to ratou ngakau tika i ta te Karaiti, ka hiahia ki te marena;

12 Ka tau hoki te he ki a ratou, no te mea kua whakarerea e ratou to ratou whakapono tuatahi.

13 Ka ako ano hoki ratou ki te *noho* mangere, ki te haereere noa ki nga whare: a ehara i te mea ko te mangere kau, he mate korerorero ano ia to ratou, he pokanoa ki ta tera, ki ta tera; ta ratou e korero ai ko nga mea e kore e tika.

14 Koia ahau ka mea ai kia marena nga *pouaru* taitamariki, kia whanau tamariki, kia tohutohu i nga mea o te whare, kia kua e hoatu ki te hoa riri tetahi take tawai.

15 Kua tahuri ke nei hoki etahi ki te whai i a Hatana.

16 Ki te mea he pouaru a tetahi tangata whakapono, a *tetahi* wahine whakapono ranei, māna ano ratou e atawhai, kua hoki te hahi e whakataimahatia; ko ana hoki e atawhai ai, ko nga tino pouaru.

17 ¶ Kia nui ake te honore mo nga kaumātua e tohutohu pai ana; engari rawa ia mo te hunga ko ta ratou nei mahi ko te kupu, ko te whakaako.

18 E mea ana hoki te karaiti-piture, Kaua e whakamōkātia *te mangai* o te kau patu witi: Me tenei hoki, Ka tika te utu mo te kai mahi.

19 Kaua e whakarongo ki te whakawa mo te kaumātua, engari hei te aroaro o nga kai whakaatu tokorua, tokotoru ranei.

20 Te hunga hara, riria i te aroaro o te katoa, kia matakua ai era atu hoki.

21 Ko taku kupu nui tenei *ki a koe* i te aroaro o te Atua, o te Ariki hoki, o Ihu Karaiti, o nga anahera whiriwhiri ano hoki, puritia enei mea, kua e pokaia he tikanga, kua e whakahipahipaia.

22 Kei whakapakia wawetia nga ringaringa ki tetahi tangata, kua ano e uru ki nga hara o te tangata ke: kia mau tou harakore.

23 Kāti tou inu wai; engari hei te waina māu kia iti, hei mea mo tou puku, mo ou mate e honohono na.

24 Nga hara o etahi tāngata, mārāma noa ake, e tae wawe ana ki te whakawakanga: o etahi ia e whai ana i muri i a ratou.

25 Waihoki ko nga mahi pai e mārāma noa ake ana; a, nga mea e rere ke ana e kore e taea te huna.

UPOKO 6.

Mo nga pononga. 3 *Te ako ngau ke.* 6 *Te taonga nui.* 11 *Tana e oma ai; tana e whai ai.* 17 *Era atu mahi mana.*

I. TIMOTI 6.

NGA pononga whai ranga-tira katoa, kia kiia iho e ratou nga honore katoa he mea tika mo o ratou ranga-tira ake, kei korerotia kinoa te ingoa o te Atua me tana whakaakoranga.

2 Kua era i nga ranga-tira whakapono e whakahawea *ki a ratou*, no te mea he teina ratou; engari kia nui rawa te mahi, no te mea e whakapono ana ratou, e arohaina ana, e uru ngatahi ana ki te mahi pai. Me whakaako enei mea e koe, me whakahau.

3 ¶ Ki te whakaako ke tetahi, a kaore e tahuri ki nga kupu ora, ki ā to tatou Ariki, ki a Ihu Karaiti, ki te whakaakoranga ano hoki e rite ai te karakia pai,

4 E whakakake ana ia, kahore ona matauranga ki tetahi mea, heoi e hawata ana ki nga uiuinga, ki nga tautohetohenga, no reira nei te hae, te whawhai, nga korero kino, nga whakaaro kino,

5 Nga whakahokihoki kupu a nga tāngata ngakau kino, kahore nei he pono i a ratou, e mea nei hei taonga te karakia pai: mawehe atu koe i era.

6 He taonga nui ano ia te karakia pai hui tahi ki te ngakau tatū.

7 Kahore hoki he mea i mauria mai e tatou ki te ao, marama tonu *ano tenei*, e kore hoki e ahei te mau atu e tatou tetahi mea.

8 Na, ki te mea he kai ta

tatou, he hipoki, kati ano ko enei ma tatou.

9 Na, te hunga e hiahia ana kia whai taonga, ka taka ratou ki te whakamatautau-ranga, ki te mahanga, ki te tini o nga hiahia kuare e raru ai, e totohu ai nga tāngata ki te whakangaromanga, a hunā iho.

10 He putake hoki no nga kino katoa te aroha ki te moni; he minamina ki tenei i kotiti ke ai etahi i te whakapono, a werohia putia iho ratou e nga mamae maha.

11 ¶ Ko koe ia, e ta te Atua tangata, oma atu i enei; a whaia te tika, te karakia pai, te whakapono, te aroha, te manawanui, te ngakau māhaki.

12 Whawhaitia te whawhai pai o te whakapono, hopukia te orange tonutanga, ko te mea hoki ia i karangatia ai koe, a whakaaetia ana e koe te whakaaetanga pai i te aroaro o nga kai titiro tokomaha.

13 Ko taku ako atu tenei ki a koe i te aroaro o te Atua, nāna nei nga mea katoa i whai ora ai, o Ihu Karaiti ano hoki, nāna nei i whakapuaki te whakaaetanga pai i te aroaro o Ponotio Pirato;

14 Puritia tenei ture, kei whai koha, kei whai hē, taea noatia te putanga mai o to tatou Ariki, o Ihu Karaiti:

15 Tana e whakakite ai a ona ake wa, ko ia anake nei hoki te Mea kaha, te Mea

II. TIMOTI 1.

koa, te Kingi o nga kingi, te Ariki o nga ariki;

16 Nona anake te mate-kore, e noho ana ia i te marama e kore e taea atu e tetahi; kahore ia e kitea e tetahi tangata, kahore ano hoki e ahei kia kitea: *waiho atu i a ia te honore me te kaha, ake ake ake. Amine.*

17 ¶ Akona te hunga i nga taonga o tenei ao kia kaua e whakakake te ngakau, kia kaua e whakawhirinaki ki nga taonga pahuhu noa, engari ki te Atua ora, ko ia hoki hei homai nui i nga mea pai katoa hei mea ma tatou;

18 Kia pai a ratou hanga,

kia hua a ratou mahi pai, kia hihiko ki te ohaoaha, ki te whakawhiwhi i etahi;

19 Ko te turanga pai mo a mua ta ratou taonga e rongoa ai, kia mau ai i a ratou te oranga tonutanga.

20 ¶ E Timoti, tiakina te mea kua tukua na *ki a koe*; tahuri atu i nga korero whakarihariha, i nga kupu teka noa, i nga whakaputanga kētanga a te mea e tekaia nei he matauranġa:

21 Kua wail o nei hei tika nga ma etahi, a hē ake ratou ki te whakapono. *Kia tau te aroha noa ki a koe. Amine.*

KO TE PUKAPUKA TUARUA A PAORA APOTORO

KI A

TIMOTI.

UPOKO 1.

Mo ratou ko tona whaea, ko tona tupuna. 6 Kia kaha; kia u. 13 Kia mau ki nga kupu. 15 Kua he a Ahia. 16 Engari a Onehipora.

NA Paora, i paingia e te Atua hei apotoro ma Ihu Karaiti, mo te oranga i whakaaria mai i roto i a Karaiti Ihu,

2 Ki a Timoti, ki taku tamaiti aroha: *kia tau te aroha noa, te mahi tohu, te rangi-marie, he mea na te Atua Matua, na Karaiti Ihu hoki, na to tatou Ariki.*

3 ¶ Whakawhetai tonu ahau ki te Atua, e mahi atu nei ahau ki a ia, he mea no oku tūpuna iho i runga i te hinegaro ma, no te mea kahore

II. TIMOTI 1.

e mutu toku mahara ki a koe i aku inoinga i te po, i te ao;

4 Nui atu toku hiahia kia kite i a koe, i ahau e mahara ana ki ou roimata, kia ki ai ahau i te hari;

5 I te mea ka hoki ake nei toku mahara ki te whakapono tinihanga-kore i roto i a koe, ki tera hoki i noho i mua i tou tupuna wahine i a Roihi, i tou whaea hoki i a Uniki, a e u ana toku whakaaro kei roto ano i a koe.

6 Koia ahau ka whakamahara nei i a koe, kia whakaungia te ahi, ara ta te Atua mea i homai na, tera i roto i a koe, he mea na te whakapanga atu o oku ringaringa.

7 Kahore hoki i homai e te Atua ki a tatou te wairua o te wehi; engari to te kaha, to te aroha, to te ngakau mahara.

8 Na kei whakama koe ki te whakaaturanga i to tatou Ariki, ki a au ranei, ki tana herehere: engari kia uru koe ki nga mate o te rongo pai, kia rite ki ta te Atua whakakahanga;

9 Nāna nei tatou i whakaora, nāna hoki tatou i karanga, tapu tonu te karangatanga; kihai i rite ki ā tatou mahi, engari ki tana ake tika nga i whakatakoto ai i mua, ki te aroha noa hoki i homai nei ki a tatou i roto i a Karaiti Ihu i mua atu o te timatanga o te ao;

10 A kua whakakitea mai nei inaianei i te putanga nui

mai o to tatou Kai whakaora, o Ihu Karaiti, i whakakahore nei i te mate, a whakakitea mai ana e ia te ora me te matenga-kore, he mea na te rongo pai:

11 A meinga iho ahau hei kai kauwhau mo tenei, hei apotoro, hei kai whakaako i nga tauwi.

12 Ko te mea hoki tenei i pangia ai ahau e enei mate: he ahakoa ra kahore ahau e whakama: e mātau ana hoki ahau ki taku i whakapono ai, a e u ana toku whakaaro e taea ano e ia te tiaki taku i toku atu ai *ki a ia*, taea noatia taua ra.

13 Kia mau ki te tauira o nga kupu ora i rongo ra koe ki a au, puritia i runga i te whakapono, i te aroha i roto i a Karaiti Ihu.

14 Te mea pai i tukua *ki a koe*, me tiaki e koe, ara, e te Wairua Tapu e noho ana i roto i a tatou.

15 ¶ E mātau ana koe ki tenei, kua tahuri ke i a au te hunga katoa i Ahia; no ratou a Paikeru raua ko Heremokeni.

16 Kia tohungia e te Ariki *nga tāngata* o te whare o Onehipora; he maha hoki oku orange ngakau i a ia, kihai hoki ia i whakama ki toku mekameka.

17 I a ia ano hoki i Roma, i rapua marietia ahau, a kitea noatia iho.

18 Ma te Ariki e toku ki a ia kia kite i te mahi tohu a te Ariki a taua ra: na, ana ma-

II. TIMOTI 1, 2.

hinga mea maku i Epeha,
erangi koe e mohio ana.

UPOKO 2.

*Kia u hei hoia pai. 17 He o
Haimeniu-ma. 19 U tonu
ia ta te Atua. 22 Tana e
tupato ai; tana e whai ai.
24 Te mahi tika mana.*

NA ko koe, e taku ta-
maiti, kia kaha i runga
i te aroha noa i roto i a
Karaiti Ihu.

2 A, nga mea i rongo ra koe
ki a au i nga kai whakaatu
tokomaha, tukua ena ki etahi
tāngata pono, e pai ana hei
whakaako ki era atu hoki.

3 Na tukua mai nga mamae
ki a koe, kia rite ki te hoia
pai a Ihu Karaiti.

4 Ki te whakahoia tetahi ta-
ngata, e kore ia e whakara-
rururua e nga mea o te ao;
kia ahua reka ai ki a ia te kai
whakatu i a ia hei hoia.

5 Ki te whakataetae ano
tetahi, e kore ia e karaunatia,
ki te kore e rite ki te tikanga
tana whakataetae.

6 Ko te tikanga tenei kia
mātua mahi te kai mahi, ka
kai ai i nga hua.

7 Whakaaroa aku e korero
nei; a ma te Ariki e homai ki
a koe he ngakau mahara i
nga mea katoa.

8 Kia mahara ki a Ihu Ka-
raiti, i whakaarahia nei i te
hunga mate, he uri no Ra-
wiri, ko ta taku rongo pai
hoki tenei:

9 Ko te mea ano ia i pāngia
ai ahau e nga mamae, a here-
herea noatia iho, ano he ta-

ngata mahi kino; otira e
kore ta te Atua kupu e herea.

10 Koia hoki ahau i wha-
karirika kau ai ki nga mea
katoa he mea mo te hunga
whiriwhiri; kia whiwhi ai
hoki ratou ki te oranga i roto
i a Karaiti Ihu, ki te kororia
mutunga kore ano hoki.

11 He pono te korero; ki te
mate tahi hoki tatou, ka ora
tahi ano hoki tatou me ia.

12 Ki te mamae tatou, ka
whakakingitia ngatahitia me
ia: ki te whakakahore tatou,
ka whakakahoretia hoki ta-
tou e ia:

13 Ki te kore tatou e wha-
kapono, e mau ana ano tona
pono: e kore e ahei kia wha-
kahore ia i a ia ano.

14 ¶ Whakamaharatia ra-
tou ki enei mea. Me kau-
whau i te aroaro o te Ariki,
kia kaua e tautohetohe ki nga
mea hua kore, ki nga mea
whakaputa ke i nga kai wha-
karongo.

15 Kia puta to tohe mou kia
tu ki te aroaro o te Atua, he
mea e manakohia ana, he kai
mahi e kore e whakama, e
wehewehe tika ana i te kupu
pono.

16 Mawehe mai i nga korero
whakariharia, i nga korero
teka noa: ka neke ake hoki,
a nui noa te karakia kore:

17 A e kai ano ta ratou kupu,
ano he mea kua kikohunga-
tia: no ratou a Himeniu raua
ko Piretu;

18 Kua hē nei ki te pono, e
mea ana, Kua pahemo ke te
aranga mai; a whakaputaia

II. TIMOTI 2, 3.

ketia ake e ratou te whakaponono o etahi.

19 E u ana ia te mau o ta te Atua turanga, ko tona hiri hoki tenei, E mātau ana te Ariki ki āna ake: me tenei hoki, Kia mawehe i te hē nga tāngata katoa e whakahua ana i te ingoa o te Karaiti.

20 Otiia i te whare nui ehara i te mea he koura, he hiriwa kau nga oko, tera ano etahi he mea rakau, he mea one-one; etahi hei mea honore, etahi hei mea honore-kore.

21 Na, ki te mea te tangata i a ia kia ma i ena mea, hei oko ia mo te honore, kua oti te whakatapu, te whakapai mo nga mea o te rangatira, rite rawa mo nga mahi pai katoa.

22 Oma atu i nga hiahia taimariki: whaia te tika, te whakaponono, te aroha, te rangimarie, e koutou tahi ko te hunga e karanga ana ki te Ariki i roto i te ngakau ma.

23 Whakarerea atu ano nga uiuinga wairangi, kuare, kia mahara hoki ko aua mea hei whakatupu whawhai.

24 Na e kore e pai kia whawhai te pononga a te Ariki; engari kia ngawari ki nga tāngata katoa, kia whai ngakau ki te whakaako, kia manawanui;

25 Me whakaako marie te hunga e totohe ana; me kore e homai e te Atua ki a ratou he ripeneta e whakaae ai ki te pono;

26 Kia ara ake ai hoki i roto i te mahanga a te rewera te

hunga i hopukia oratia e ia hei mahi i tana i pai ai.

UPOKO 3.

Nga he i muri. 6 Hoa riri o te pono. 10 Kia rite ki tana. 16 Nga karaipiture.

KIA mātau koe ki tenei, ko a nga ra o te whakamutunga puta ai nga wa o te hē.

2 E aroha hoki nga tāngata ki a ratou ano, e aroha ki te moni, e whakapehapeha, e whakakake, e kohukohu, e tutū ki nga mātua, kahore he whakawhetai, kahore he tapu,

3 Kahore he aroha, he hunga takahi kawenata, ngautuara, e kore e pēhi i te ngakau, he hunga nanakia, e kino ana ki nga tāngata pai,

4 He hunga tuku tangata, he hunga hikaka, whakakake, to ratou aroha ki nga mahi takaro nui atu i to ratou aroha ki te Atua;

5 Ko te ahua o te karakia kei a ratou, tona kaha ia whakakahoretia iho: tahuri atu koe i nga tāngata pera.

6 No ratou hoki te hunga e tomo nei ki nga whare, a riro pārau ana i a ratou nga wāhine kuare, kua ikeike noa ake nei nga hara, he mea arahi na nga hiahia maha,

7 E ako tonu ana, heoi kahore rawa kia tae atu ki te matauranga ki te pono.

8 E rite ana ki a Hani raua ko Hamapiri i totohe ki a Mohi; waihoki ko enei tā-

II. TIMOTI 3, 4.

ngata e totohe ana ki te pono: he hunga kua kino ke te hinengaro, he rukenga atu i roto i te whakapono.

9 Heoi e kore ratou e kake haere: ka kitea hoki to ratou kuaretanga e te katoa, ka pera hoki me to raua.

10 Na kua mau na i a koe taku whakaako, toku whaka-haere, toku whakaaro wha-katakoto, toku whakapono, toku puhoi ki te riri, toku aroha, toku manawanui,

11 Oku whakatoinga, oku matenga i mate ai ahau i Anatioka, i Ikoniuma, i Rai-hitara; nga whakatoinga i whakatoia ai ahau: heoi wha-kaorangia ake ahau e te Ariki i roto i te katoa.

12 A e whakatoia ano te hunga katoa e hiahia ana kia noho i runga i te karakia i roto i a Karaiti Ihu.

13 Na e kake haere ki te kino nga tångata kino, me te hunga maminga, e tinihanga ana, e tinihangatia ana.

14 Ko koe ia kia mau ki nga mea i ako ra koe, i whakaae-tia ra e koe, e mātau na hoki koe ki to kai whakaako *ki ena mea*;

15 Ki a koe ano i mohio o tou tamarikitanga ake, ki nga karaipiture tapu, ko nga mea era e whai matauranga ai koe, a ora ake i runga i te whakapono ki a Karaiti Ihu.

16 Na te ha o te Atua nga karaipiture katoa, a e pai ana hei whakaako, hei hopu i te hē, hei whakatikatika, hei whakaako ki te tika;

17 Kia tino rite ai te ta-

ngata a te Atua, rite rawa mo nga mahi pai katoa.

UPOKO 4.

Whakahau. 6 Kua tata ki tona karauna. 9 Haere mai korua ko Maka, me aku mea anō i Toroa. 14 Ta Arehanera. 16 Tona wha-kawakanga i Roma.

KO taku kupu tenei i te aroaro o te Atua, rana ko te Ariki, ko Ihu Karaiti, māna nei e whakawa te hunga ora me te hunga mate a tona pu-tanga mai, i tona rangatira-tanga;

2 Kauwhautia te kupu; to-hea i nga wa pai, i nga wa kino; hopukia te hē, riria iho, whakahaua, whakapaua te manawanui, te whakaako.

3 Tenei ake hoki ko te wa e kore ai ratou e whakarongo ki te whakaakoranga tika; heoi ka riro i o ratou hiahia ake, ka apohia e ratou he kai whakaako, he taringa minamina hoki no ratou;

4 A ka tahuri ke o ratou ta-ringa i te pono, ka anga atu ki nga korero tito noa.

5 Na kia mataara koe i nga mea katoa; tukua mai nga mamae ki a koe; mahia te mahi a te kai kauwhau i te rongopai; whakapaua to ma-hi minita.

6 Ka tata nei hoki ahau te ringitia, kua rite ano te wa hei haerenga moku.

7 Kua whawhaitia e ahau te whawhai pai, kua omakia toku omanga, kua rite i a au te whakapono:

II. TIMOTI 4.

8 Kei te takoto mai moku i nga wa o muri nei te karauna o te tika, e homai ki ahau a taua ra e te Ariki, e te kai whakarite tika o te whakawa: a he teka ki ahau anake, ki te hunga katoa ano hoki e hiahia ana ki tona putanga mai.

9 ¶ Kia puta tou uaua ki te haere wawe mai ki a au:

10 Kua whakarerea ahau e Rimaha, he aroha nona ki tenei ao, a haere ana ia ki Teharonika *kua riro atu* a Kerekeha ki Karatia, a Taituha ki Raramatia.

11 Ko Ruka anake kei a au. Tena a Maka arahina mai hei hoa mou; e pai ana hoki ia mo taku mahi minita.

12 Kua tonoa e ahau a Tiki-ku ki Epeha.

13 Ka haere mai koe, mauria mai te koroka i mahue i a au ki Toroa, ki a Karapu, me nga pukapuka; tena rawa ia nga hiako.

14 He maha nga kino i meatia mai e Arehanera, e te kai mahi parahi ki a au: ma te Ariki e hoatu ki a ia he utu e rite ana ki ana mahi:

15 Kia tupato hoki koe ki a ia; he rahi hoki tana totohe ki a matou kupu.

16 I taku korerotanga tua-

tahi kahore he tangata hei tuara moku, heoi whakarerea ake ahau e te katoa. Kua tenei, *e te Atua*, e whakairia ki a ratou.

17 I tu ia te Ariki ki toku taha, nana hoki ahau i whakakaha; i whakapauarawatia ai e ahau te kauwhau, i rongo katoa ai nga tauwi: a toia mai ana ahau i roto i te mangai o te raiona.

18 A tera ahau e toia mai e te Ariki i roto i nga mahi kino katoa, e whakaorangia hoki tae noa ki tona rangatiratanga i te rangi: *waiho atu* i a ia te kororia, ake ake ake. Amine.

19 ¶ Oha atu ki a Pirihira raua ko Akuira, ki *te hunga* ano hoki o te whare o Onehipora.

20 Kua noho a Eratu ki Koriniti: i mahue i ahau a Topimu ki Miretu, i te mate ia.

21 Kia puta tou uaua ki te haere mai i mua o te hotoke. Tenei te oha atu nei ki a koe a Upuru, a Purena, a Rinuha, a Karauria, me nga teina katoa.

22 ¶ *Kia noho* te Ariki, a Ihu Karaiti ki tou wairua. *Kia tau* te aroha noa ki a koutou. Amine.

KO TE PUKAPUKA A PAORA APOTORO

KI A

TAITUHA.

UPOKO 1.

5 *Mahi mana ki Kariti.* 6
Te minita pai. 10 *Kai*
whakaako he.

NA Paora, na te pononga
a te Atua, na te apotoro
a Ihu Karaiti, i runga i te
whakapono o te hunga whiri-
whiri a te Atua, i te whakaae-
tanga atu ano hoki ki ta te
pono e rite ai te karakia;

2 I runga ano i te tumanako
ki te ora tonu i whakaaria
mai nei i mua atu o te ao e te
Atua e kore nei e teka;

3 Nana nei ano i whakakite
mai tana kupu i ona wa ake
ano, i te kauwhautanga nei, i
tukua mai ki ahau, he mea
whakarite mai na te Atua, na
to tatou Kai whakaora;

4 Ki a Taituha, ki taku ta-
maiti pono i runga i to tatou
whakapono tahi: *Kia tau te*
aroha noa, te mahi tohu, te
rangimarie, he mea na te
Atua Matua, na te Ariki hoki,
na Ihu Karaiti, na to tatou
Kai whakaora.

5 ¶ Ko te mea tenei i waiho

ai koe e ahau ki Kariti, kia
whakatikaia ai e koe nga mea
i mahue, kia whakaritea ai
ano hoki he kaumatua ki ia
pa, ki ia pa, kia pera ai me
taku i whakatakoto atu ai ki
a koe:

6 Ki te mea he tangata ka-
hore e ekengia e te korero,
he tahu no te wahine kotahi,
he tamariki whakapono ana,
kahore e korerotia to ratou
toreretanga ki te kino, kahore
e tutū.

7 Te tikanga hoki mo te pi-
hopa kia kaua e ekengia e te
kupu, kia rite ki ta te Atua
tuari; ehara i te mea tohe ki
tana ake, kahore ona aritari-
ta, kahore ana kakai waina,
kahore ana papatu, kahore e
whai i te taonga hē;

8 Engari e atawhai ana i te
manuhiri, e aroha ana ki nga
tāngata pai, e whai whakaaro
ana, e tika ana, e tapu ana, e
pēhi ana i ona hiahia;

9 E u ana te pupuri i te kupu
pono i whakaakona atu na,
kia taea ai e ia, i te mea ka
tika nei tana whakaako, te
whakahauhau, te turaki ano
i ta te hunga e totohe mai ana.

TAITUHA 1, 2.

10 ¶ He tokomaha hoki te hunga tutū, korero teka noa, tinihanga; nui atu ia to te hunga o te kotinga:

11 Me kukuti o ratou waha; riro pu hoki etahi whare te whakaputa ke e ratou, e whakaako ana i nga mea e kore e tika, he whakaaro hoki ki te taonga hē.

12 I mea tetahi o ratou, he poropiti no ratou ake, He teka tonu nga Kariti, he kararehe kino, he kopu mangere.

13 He pono tenei korero. Na, kia koi to kupu riri ki a ratou; kia ora ai to ratou whakapono;

14 Kei tahuri hoki ratou ki nga kupu tito a nga Hurai, ki nga ture a nga tāngata e whakaputa ke ana i te pono.

15 He ma nga mea katoa ki te hunga ma: tena ki te hunga poke, kahore nei o ratou whakapono, kahore he mea ma; heoi he mea poke o ratou whakaaro, o ratou hine-ngaro.

16 Ki ta ratou ki, kua mātau ratou ki te Atua; heoi ko a ratou mahi hei whakakahore ki a ia, he hunga whakarihariha ratou, he hunga tutū, e kore ano e tikangatia mo tetahi pai.

UPOKO 2.

Whakahau ki a Taituha. 9 Mo nga pononga. 11 Ta te Atua ako i runga i tana atawhai.

KO koe ia, korerotia nga mea e rite ana ki to te whakaakoranga ora:

2 Nga kaumātua kia mahara, kia ahua kaumātua, kia whai whakaaro, kia ora te whakapono, te aroha, te manawanui.

3 Me nga wāhine kaumātua ano hoki, kia rite nga tikanga ki a te hunga e whakaaro ana ki te tapu, kia kaua e ngautuara, kia kaua e riro hei pononga ma te waina nui, kia whakaako i nga mea pai;

4 Kia meinga e ratou nga wāhine taitamariki kia whai whakaaro, kia aroha ki a ratou tāne, kia aroha ki nga tamariki,

5 Kia whai whakaaro, kia hē-kore, kia noho ki o ratou whare, kia pai, kia ngohe-ngohe ki a ratou tāne, kei korerotia kinotia te kupu a te Atua

6 Me whakahau hoki nga taitamariki kia whai whakaaro:

7 I nga mea katoa kia kitea koe he tauira mo nga mahi pai; *tou* hē-kore ki te whakaako, *tou* ahua kaumātua, *tou* kino kore,

8 *Kia* ora te kupu, kei taea te whakahe; kia whakama ai te tangata tikanga ke, tē ai he kino e korerotia kinotia ai koutou e ia.

9 Ko nga pononga kia ngo-hengohe ki o ratou rangatira, kia whakamanawarekatia ratou i nga mea katoa; kaua e whakahoki kupu;

10 Kaua e kaia, engari kia kitea he pai, he nui to ratou pono; kia ai ratou i nga mea katoa hei whakapaipai i te whakaakoranga a te Atua, a to tatou Kai whakaora.

TAITUHA 2, 3.

11 Kua puta mai hoki te aroha noa o te Atua, e ora ai nga tângata katoa,

12 Hei whakaako i a tatou kia whakakahoretia e tatou te karakia kore me nga hiahia o te ao, kia noho whakaro tatou, i runga ano i te tika, i te karakia pai, i tenei ao;

13 Me te tatari ano ki te mea whakahari e tumana-kohia nei, ki te putanga hoki o te kororia, o te Atua nui, o to tatou Kai whakaora ano hoki, o Ihu Karaiti;

14 I hoatu nei i a ia mo tatou, hei hoko i a tatou i roto i nga kino katoa, hei horoi hoki i a tatou hei iwi mona ake, e ngakau nui ana ki nga mahi pai.

15 ¶ Korerotia enei mea, whakahaua; kia nui tou maia ki te riri i te hē. Kei whakahawea tetahi ki a koe.

UPOKO 3.

Te ako mana. 10 Mo nga whakapono he. 12 Haere mai.

WHAKAMAHARATIA ratou kia ngohengohe ki nga rangatiratanga ki nga mana, kia rongo ki nga rangatira, kia takatu ki nga mahi pai katoa;

2 Kia kaua e korerotia kinitia tetahi tangata, kia kaua e whawhai, kia ngakau ngawari, kia nui te māhaki o te ngakau e whakaputaina ki nga tângata katoa.

3 He whakaaro kore hoki

tatou i mua, he tutū, e tini-hangatia ana, he pononga na nga hiahia, na nga whakaahuareka maha, e noho ana i runga i te nanakia, i te hae, he hunga whakarihariha, e mauāhara ana tetahi ki tetahi.

4 Otira i te mea ka puta mai nei te tikanga ngawari me te aroha o te Atua, o to tatou Kai whakaora, ki nga tângata,

5 Ehara i te mea na nga mahi tika i mahia e tatou, engari na tana mahi tohu i whakaorangia ai tatou e ia, he meatanga ki te horoinga o te whanautanga houtanga, ki te whakahoutanga a te Wairua Tapu;

6 I ringihia nuitia mai nei e ia ki runga ki a tatou, he mea na Ihu Karaiti, na to tatou Kai whakaora;

7 Kia whakatikaia ai tatou e tona aroha noa, kia whiwhi ai ki te taonga, ara ki te oranga tonutanga e tumana-kohia nei.

8 He korero pono *tenei*; a e mea ana ahau kia kaha to kauwhau i enei mea; kia mahara te hunga kua whakapono ki te Atua ki te mahi i nga mahi pai. Ko nga mea enei e ataahua ana, e whai pai ana mo nga tângata.

9 Ko nga uiuinga kuare ia, me nga whakapapa tupuna, whakarerea atu, me nga totohe, me nga whawhai ki nga mea o te ture, kahore hoki he pai o *aua mea*, he mea hanga noa.

10 He tangata whakapono

PIRIMONA

he, ka kotahi, ka rua nga whakatupatotanga, whakare-rea atu;

11 E mātau ana hoki koe kua whakaputaia ketia taua tangata pera, kei te hara ano hoki, kua mau tona he i a ia ano.

12 ¶ Ka tonoa atu e ahau ki a koe a Aratema, a Tikiku ranei, kia puta tou uaua ki te haere mai ki a au, ki Niko-pori: kua takoto hoki taku tikanga kia noho ki reira i te hotoke.

13 Kia puta tou whakaaro kia kawea mai a Hina kai ako i te ture, raua ko Aporo: kei kore tetahi mea mo raua.

14 Me ako hoki o tatou ki te mahi i nga mahi pai mo nga wa o te rawakore, kei hua kore ratou.

15 ¶ Tenei te oha atu nei ki a koe oku hoa katoa. Oha atu ki te hunga e aroha ana ki a matou i runga i te whakapono. *Kia tau* te aroha noa ki a koutou katoa. Amine.

KO TE PUKAPUKA A PAORA APOTORO

KI A

PIRIMONA.

Tona whakapono, aroha. 9
Kaua e riri ki tana pono-
nga i tahuti.

NA Paora, na te herehere a Karaiti Ihu, na te teina hoki, na Timoti, ki ta maua e aroha nei, ki to maua hoa mahi, ki a Pirimona,

2 Ki a Apia hoki, ki te *wahine* e arohaina ana, ki to maua hoa hoia, ki a Arakipu, ki te hahi hoki i tou whare:

3 *Kia tau* te aroha noa ki a koutou, me te rangimarie, he

mea na te Atua, na to tatou Matua, na te Ariki hoki, na Ihu Karaiti.

4 ¶ Tenei ahau te whakawhetai atu nei ki toku Atua, mau tonu toku mahara ki a koe i aku karakiatanga:

5 He rongo noku ki tou aroha, ki tou whakapono, ki tou na ki te Ariki, ki a Ihu, e hua na ki te hunga tapu katoa;

6 Mo te whakahoatanga mai o tou whakapono, kia whai mana, i runga i te matauranga ki nga pai katoa i roto i

PIRIMONA

a koutou, he mea ki a Karaiti Ihu.

7 He nui hoki to matou koa, marie ana hoki te ngakau i tou aroha, no te mea e ora ana nga ngakau o te hunga tapu i a koe, e *toku* teina.

8 ¶ No reira, *ahakoa* he nui toku maia ki te whakatakoto atu i te mea tika ki a koe,

9 Ko te aroha ke taku hei whakahau, ara taku nei, ta te koroheke, ta Paora, inaianei ra he herehere na Ihu Karaiti;

10 He kupu tena naku ki a koe mo taku tamaiti, mo Onehimu, he mea whanau naku i ahau nei i te herehere:

11 I mua kahore tetahi mea pai āna ki a koe; inaianei ia kua whai pai koe i a ia, ahau ano hoki.

12 Kua whakahokia atu nei ia e ahau: manako mai ki a ia, ara ki toku ngakau ake.

13 I mea ano ahau kia puritia ia ki ahau, hei whakakapi mou ki te mahi ki a au i roto i nga mekameka o te rongo pai:

14 Otira kahore nei he kupu au, kihai ahau i pai kia meatia tetahi mea; kei riro whakauaua mai tou pai; engari i roto ano i te ngakau.

15 Ko te mea ano pea tenei i motuhia mai ai ia mo tetahi wa, kia mau pu ai ia i a koe, ake ake ake;

16 Ehara i te mea hei pononga ia i enei wa, engari tera atu i te pononga, he teina i

nui rawa ai toku aroha, nui rawa atu ia tou, i te kikokiko, i te Ariki ano hoki.

17 Na, ki te mea kua waiho ahau hei hoa mou, manako mai ki a ia me te mea ko ahau,

18 Na, ki te mea kua hē ia ki tetahi mea au, kei a ia ranei tetahi mea *au*, waiho mai maku tena e whakaaro;

19 He tuhituhi tena naku, na Paora, na toku ringaringa ake, maku e whakautu; na kahore aku meatanga atu ki a koe, tera ano taku taonga kei a koe, ko koe ano.

20 Ae ra, e *toku* teina, kia whai pai ahau i a koe i roto i te Ariki: kia ora toku ngakau i roto i te Ariki.

21 He u no toku whakaaro ki a koe ka ngohengohe, i tuhituhi atu ai ahau ki a koe, e mohio ana hoki tera e nui atu tau e mea ai i taku e korero atu nei.

22 Tenei ano hoki, kia rite mai i a koe tetahi whare moku: e mea ana hoki ahau tera e mana a koutou inoi, a ka tukua atu ahau ki a koutou.

23 ¶ Tenei te oha atu nei ki a koe a Epapara, toku hoa herehere i roto i a Karaiti Ihu;

24 Ratou ko Maka, ko Aritaku, ko Rimaha, ko Ruka, oku hoa mahi.

25 ¶ *Kia tau* te aroha noa o to tatou Ariki, o Ihu Karaiti ki o koutou wairua, Amine.

KO TE PUKAPUKA A PAORA APOTORO

KI NGĀ

HIPERU.

UPOKO 1.

Ta te Atua karere nui. 4
Nui atu i nga anahera.

HE maha nga wahi, he maha nga huarahi i korero ai te Atua i mua, ara nga poropiti, ki nga mātua,

2 I enei ra whakamutunga na tana Tama ana korero ki a tatou, ko tana hoki ia i mea ai māna nga mea katoa, ko tana kai hanga hoki ia o nga ao;

3 Ko ia te kanapatanga o tona kororia, te tino ahua o tona pumautanga, e whakanui i nga mea katoa ki te kupu o tona kaha, ka oti nei i a ia ake ano te horoi o tatou hara, na noho ana ia. i te ringa matau o te Nui i runga rawa;

4 A meinga ana ia kia pai ake i nga anahera, kia pera me te ingoa i riro i a ia he nui atu i to ratou.

5 Ki a wai hoki o nga anahera tana meatanga i mua, Ko koe taku Tama, nonaianei koe i whakatupuria ai e ahau? Me tenei ano, Ko ahau hei

Matua ki a ia, ko ia hei Tama ki a au?

6 ¶ I tana kawenga mai ano hoki i te whanau mātāmua ki te ao, ka mea ia, A kia koropiko nga anahera katoa a te Atua ki a ia.

7 Tana kupu ia mo nga anahera, Meinga ana e ia ana anahera hei wairua, ana kai mahi hei mura ahi.

8 Tana ia ki te Tama, Pumautonu tou torona, e te Atua, ake ake: he hepeta tika te hepeta o tou kingitanga:

9 ¶ I arohaina e koe te tika, i kinongia e koe te hara; no reira nui atu i to ou hoa te whakawahinga a te Atua, a tou Atua, i a koe ki te hinu o te hari.

10 Me tenei ano, Nāu, e te Ariki, i te timatanga i whakatakoto te whenua; a he mahi nga rangi na ou ringa:

11 Ko era e hemo atu, ko koe ia e mau tonu: ka tawhi-totia katoatia hoki era me he kakahu;

12 Ka whakakopakopaia e koe, ano he koheka, ka whakaputaia ketia: ko koe tonu

NGA HIPERU 1, 2.

ano ia koe, kahore hoki he mutunga o ou tau.

13 Ki a wai hoki o nga anahera tana meatanga i mua, Hei toku ringa matau koe noho ai, kia meinga ra ano e ahau ou hoa riri hei turanga waewae mou?

14 He teka ianei he wairua kai mahi ratou katoa, he mea tono mai hei minita, he whakaaro ki te hunga mo ratou nei te whakaoranga?

UPOKO 2.

Kei paopao ki a ia. 5 No tatou nei hoki ia. 14 A hei tuakana ia ki a tatou.

NA, ko te tikanga rawatanga tenei, kia whakaaro tatou ki nga mea kua rangona, kei pahuhu atu i a tatou.

2 Na, i u nei te kupu i whakapuakina e nga anahera, tika tonu hoki te utu i whakahokia mo nga pokanga ketanga katoa, mo nga mahi tutu;

3 Me pehea ka mawhiti ai tatou ki te paopao tatou ki tenei oranga nui; i timataia nei te korero e te Ariki, a kua whakaukia mai ki a tatou e te hunga i rangona ai;

4 Me te whakaatu ano te Atua ki ta ratou, i runga i nga tohu, i nga mea whakamiharo, i tona tini o nga merakara, i nga tuwhanga mai ano hoki o te Wairua Tapu, he pera ano me tana i pai ai?

5 ¶ Kahore hoki i waiho e ia ki raro ki nga anahera te ao meake nei puta, ta matou e korero nei.

6 Heoi i whakaaturia mai e

tetahi i tetahi wahi, i mea mai ia, He aha te tangata, i mahara ai koe ki a ia? te tama ranei a te tangata, i tirohia ai ia e koe?

7 Nohinohi nei te wahi i whakaititia iho ai ia e koe i nga anahera; kua karaunatia ia e koe ki te kororia ki te honore, kua waiho ano ia e koe hei rangatira mo nga mahi a ou ringa:

8 Kua waiho nei e koe nga mea katoa ki raro ki ona waewae. Na, i nga mea katoa ka waiho nei ki raro ki a ia, kahore i mahue tetahi mea kihai nei i waihoki raro ki a ia. Otira kahore ano tatou kia kite noa i nga mea katoa kua oti te waiho i raro i a ia.

9 Ka kite raia tatou i a Ihu, he nohinohi nei te wahi i whakaititia iho ai ia i nga anahera, ka oti nei te karauna ki te kororia, ki te honore; i muri nei i tona ngaunga e te mate, he meatanga na to te Atua aroha noa kia pangia ia e te mate mo nga tangata katoa.

10 Ko tana tikanga tika hoki ia, mana nei nga mea katoa, nana ano hoki nga mea katoa, i a ia e arahi ana i nga tama tokomaha ki te kororia, kia waiho nga mamae hei mea e tino rite ai te Take o to ratou whakaoranga.

11 Na, te kai whakatapu ratou ko te hunga e whakatapua ana, no te pu kotahi ratou katoa: koia ia te whakama ai kia karangatia ratou he teina;

12 E mea nei ia, Maku e korero tou ingoa ki oku teina;

NGA HIPERU 2, 3.

ka himene atu ahau ki a koe i waenganui o te hahi.

13 Me *tenei* ano hoki, Ka u pu ahau ki a ia. Me *tenei* ano, Nana, ahau nei, me nga tamariki i homai e te Atua ki ahau.

14 Na, kei nga tamariki he kikokiko, he toto, koia hoki ia i whakawhiwhia ai ano hoki ki aua mea; kia ai tona mate-nga hei whakakahore mo te rangatira o te mate, ara mo te rewera;

15 Kia whakaputaina mai ai hoki e ia ki waho te hunga i meinga e te wehi o te mate hei taurekareka i nga wa katoa i ora ai ratou.

16 Kihai hoki ia i mau ki nga anahera; engari i mau ia ki te whanau a Aperahama.

17 Na konei i tika ai kia whakaritea ia ki ona tēina i nga mea katoa, kia waiho ai ia hei tohunga nui e atawhai ana, e pono ana i nga meata-nga ki te Atua, hei mea whakamarietanga mo nga hara o te iwi.

18 I te mea hoki ka whakamatautauria ia, a mamae iho, e taea e ia te awhina te hunga e whakamatautauria ana.

UPOKO 3.

Nui atu ia i a Mohi. 7 Na, kei tutu; nui atu hoki i to nga Hurai te whiu.

NA, e oku tēina tapu, e te hunga kua uru nei ki to te rangi karangatanga, whakaaroa a Ihu Karaiti, te Apotoro, te Tohunga nui o te tikanga kua whakaaetia nei e tatou;

2 I pono nei ki tona kai whakarite mai, i pera ano me Mohi i tona whare katoa.

3 I tika hoki kia nui ake te kororia mo tenei tangata i to Mohi, no te mea nui ake i to te whare te honore o te kai hanga.

4 He mea hanga hoki na tetahi nga whare katoa; ko te Atua ia te kai hanga o nga mea katoa.

5 A i pono ano a Mohi i roto i tona whare katoa, i pera me te pononga, hei kai whakaatua mo nga mea ka korerotia i *muri*;

6 Ko te Karaiti ia i rite ki te tama i tona whare ano; ko tona whare tonu hoki tatou, ki te u, a taea noatia te mutunga, to tatou maia me te whakamanamana ki te mea e tumanakohia nei.

7 ¶ Na kia rite ki ta te Wai-rua Tapu i mea ai, Ki te rongo koutou ki tona reo aiane,

8 Kaua e whakapakeketia o koutou ngakau, kei pera me o te whakatoinga, i te ra o te whakamatautauranga i te koraha;

9 I a au i whakamatautauria e o koutou mātua, i a au i ata mohiotia, a e wha tekau nga tau i kite ai ratou i aku mahi.

10 Na ka hoha ahau ki taua whakatupuranga, ka mea, Kotiti ke tonu o ratou ngakau; kahore ratou e mohio ki oku ara.

11 Na reira i riri ai ahau, i oati ai hoki, E kore ratou e tomo ki taku okiokinga.

12 Kia tupato, e oku tēina,

kei noho te ngakau kino, whakapono kore, i roto i tetahi o koutou; kei whakarerea te Atua ora.

13 Engari me whakahau koutou tetahi e tetahi i tenei ra, i tenei ra, i te mea e karangatia ana ko tenei ra, kei whakapakeketia tetahi o koutou e te tinihanga o te hara.

14 Ka uru hoki tatou ki ta te Karaiti, ki te mea ka mau i a tatou te timatanga o te whakaaro pumau taea noatia te mutunga;

15 I te mea hoki e korerotia ana, Ki te rongo koutou ki tona reo aianeī, kua e whakapakeketia o koutou ngakau, kei pera me o te whakatoinga.

16 Ko wai hoki i whakatoi i to ratou rongonga ai? he teka ianeī ko te hunga katoa i haere mai i Ihipa, ā Mohi i arahi ra?

17 A i riri ia ki a wai i nga tau e wha tekau? he teka ianeī ki te hunga i hara, i hinga ra o ratou tinana ki te koraha?

18 A i oati ia ki a wai, e kore ratou e tae ki tana okiokinga? he teka ianeī ki te hunga kihai nei i whakapono?

19 Na ka kite nei tatou kihai ratou i ahei te tomo i te kore o te whakapono.

UPOKO 4.

Te tino hapati. 11 Whaia.

14 To tatou tino tohunga, hore rawa ona koha. 16 Na, haere maia atu ki te Atua.

NA kia matakū tatou, i te mea ka tukua iho nei he korero pai *mo tatou* kia tomo ki tana okiokinga, kei tirohia mai tetahi o koutou kua mahue ki muri.

2 He mea kauwhau hoki te rongo pai ki a tatou, he pera ano me tera i a ratou: heoi kihai te kupu i rangona i whai pai ki a ratou no te mea kihai i whakananua ki te whakapono i roto i te hunga i rangona ai.

3 Ka tomo hoki ki te okiokinga tatou kua whakapono nei; ka rite ki tana i ki ra, Na reira i riri ai ahau, i oati ai hoki, e kore ratou e tomo ki taku okiokinga: kua oti ra hoki nga mahi i te timatanga ra ano o te ao.

4 Ko tana kupu hoki tenei i tetahi wahi mo te *ra* whitu. A ka okioki te Atua i te ra whitu i ana mahi katoa.

5 I tenei *wahi* ano hoki, E kore ratou e tomo ki taku okiokinga.

6 Na, tera atu ano he tomo-kanga mo etahi ki reira; kihai hoki te hunga i kauwhautia ai te rongo pai ki a ratou i mua i tomo, no te mea kahore o ratou whakapono:

7 He wahi ano ka motuhia e ia tetahi ra, i a ia i mea ra i ta Rawiri, Hei aianeī, i muri i taua wa roa ra; ko te kupu hoki tenei, Hei aianeī ki te rongo koutou ki tona reo, kua e whakapakeketia o koutou ngakau.

8 Me he mea hoki i whai okiokinga ratou i a Hohua, e kore e korerotia e ia tetahi atu ra i muri iho.

NGA HIPERU 4, 5.

9 Ina, tera atu ano he okiokinga mo te iwi o te Atua.

10 Ki te tomo hoki te tangata ki tana okiokinga, ka okioki ano ia i ana mahi ake, ka pera me te Atua i okioki i ana mahi ake.

11 Na, kia puta to tatou uaua ki te tomo ki taua okiokinga, kei pera te whakaponokore o tetahi, a ka hinga.

12 Ora tonu hoki te kupu a te Atua, mana tonu, koi rawa atu i nga hoari matarua katoa, ngoto tonu, a wehea noatia te ngakau me te wai-rua, nga ponapona me te hinu wheua, e wawae ana ano i nga whakaaro me nga hihiritanga o te ngakau.

13 Kahore hoki he mea hanga i ngaro ki tona aroaro: heoi e takoto kau ana, e tuwhera ana nga mea katoa ki ona kanohi kei a ia nei he kupu mo tatou.

14 ¶ Na, he tino tohunga nui to tatou, kua tomo ki nga rangi, a Ihu, te Tama a te Atua, kia mau pu tatou ki te tikanga i whakaaetia e tatou.

15 Ehara hoki to tatou i te tohunga nui e kore e ahei kia mamae tahi me tatou e ngoikore nei; i whakamatautauria nei hoki ia i nga mea katoa, i peneitia me tatou, kahore ia he hara.

16 Na kia haere maia tatou ki te torona o te aroha noa, kia puta mai ai ki a tatou te mahi tohu, kia kitea ai e tatou ta te aroha noa hei

awhina mai mo nga wa e pai ai.

UPOKO 5.

*Nui o to tatou tohunga. 11
Kaha-kore o taua hahi.*

NGA tohunga nui katoa hoki e tangohia nei i roto i nga tangata, he mea whakatu ratou mo nga mea a nga tangata ki te Atua, hei tapae i nga whakahere i nga patunga tapu mo nga hara:

2 E taea e ia te ata hanga ki te hunga e kuare ana, e kotiti ke ana; no te mea e muia ana ano ia e te ngoikore.

3 Na konei ano i tika ai, kia rite ki tana mo te iwi tana e tapae ai mona ake, hei whakahere mo nga hara.

4 E kore ano hoki tetahi e tango i tenei honore ki a ia ano, engari te tangata e karangatia ana e te Atua, e peratia ana me Arona.

5 Waihoki ko te Karaiti, kahore ana whakanui i a ia hei tohunga nui; na tera ke ia i ki mai ra ki a ia, Ko koe taku Tama, nonaianei koe i whakatupuria ai e ahau.

6 Pera hoki me tana i ki ai i tetahi atu wahi, Hei tohunga koe ake ake i runga i te ritenga o Merekihereke.

7 I nga ra hoki o tona kiko-kiko, i tukua e ia he inoi, he karakia, i runga i te karangaranga kaha, i te roimata, ki te Mea kaha ki te whakaora i a ia i te mate, a whakarangona mai ana ia i a ia i wehi ra;

8 Ahakoa he Tama ia, i wha-

NGA HIPERU 5, 6.

kaakona ia ki te ngohengohe e ona mamae:

9 A ka meinga nei ia kia tino rite, ka waiho ia hei take mo te oranga tonutanga ki te hunga katoa e ngohe-ngohe ana ki a ia;

10 He mea karanga na te Atua hei tohunga nui i runga i te ritenga o Merekihereke.

11 ¶ He maha nei a matou korero mo tenei, he pakeke ina korerotia, he puhoi hoki no koutou ki te whakarongo.

12 I te mea nei hoki ka tika kia waiho koutou hei kai whakaako no te mea ka roa nei, na, me tuarua te whakaako i a koutou ki nga timatanga rawatanga o nga kupu a te Atua; a, me waiu he kai ma koutou, kauaka te kai pakeke.

13 Nga tāngata katoa hoki e kai ana i te waiu, e kuare ana ratou ki te kupu o te tika, he kohungahunga hoki.

14 Ma te hunga tino tika ia te kai pakeke, kua taungatia nei o ratou hinengaro e nga meatanga maha, e wehe ai i te pai, i te kino.

UPOKO 6.

Kei hoki ki muri. 9 Kia u, kia kaha. 13 Mau tonu hoki ta te Atua.

NA kia mahue ki muri nga timatanga o ta te Karaiti akoranga, hoake tatou ki te tino tikanga; kua e tuarua-tia te whakatakoto i te turanga, ara, i te ripeneta ki nga mahi mate, i te whakapono hoki ki te Atua,

2 I te whakaakoranga ki nga iriiringa, i te whakapanga o nga ringaringa, i te aranga o nga tāngata mate, i te whakawakanga mutunga kore.

3 A ka meatia ano tenei e tatou ki te tukua e te Atua.

4 Te hunga hoki kua oti te whakamarama, kua pa ki te mea i homai i runga i te rangi, kua whiwhi ano ki te Wairua Tapu,

5 A kua kite i te pai o ta te Atua kupu, me nga mea kaha o te ao meake nei puta;

6 Ki te taka atu ratou, e kore ratou e taea te whakahou ake ki te ripeneta; ka ripekatia houtia hoki te Tama a te Atua e ratou nei ano, a ka meinga kia tawaiia nui-tia.

7 Te whenua hoki e inu nei i te ua e honohono nei te heke ki runga ki a ia, a e mea ana i te otaota pai kia tupu ake ma te hunga i mahia ai, ka whiwhi ki ta te Atua manaakitanga:

8 Tena ko te whenua i tupu ai nga tataramoa, nga tumatakuru, ka whakakinoa, ka tata ki te kanganga; tona whakanutunga he tahunga.

9 ¶ Na, ahakoa penei noa ta matou korero, e u ana ano ta matou whakaaro, e okuhoa aroha, ki nga mea i a koutou he pai ke atu, he mea ano hoki mo te ora.

10 E kore hoki te Atua e hē, e wareware ki ta koutou mahi, ki te uaua o to koutou aroha, i whakakitea nei e koutou ki tona ingoa, i a kou-

NGA HIPERU 6, 7.

tou i atawhai i te hunga tapu, a ka atawhai nei ano.

11 Otiia e hiahia ana matou kia whakakitea taua uaua na ano e tenei, e tenei o koutou, kia taea ra ano te unga rawatanga o te whakaaro i tumanako ai koutou, ā, te mutu-nga ra ano:

12 Kia kua e puhoi, engari kia rite ki ta te hunga i whakapono, i whakamanawanui, a riro mai ana i a ratou nga mea i whakaaria mai.

13 ¶ I te Atua hoki e whakaari mea ana ki a Aperahama, a kahore ana mea nui atu hei oaitanga, ka oaitia a ia ake ano,

14 I mea ia, Ina, ka manaakitia rawatia koe e ahau, ka whakanuia rawatia ano hoki koe.

15 Na, whakamanawanui ana ia, a riro ana i a ia te kupu whakaari.

16 Ko te mea nui ake hoki ta nga tangata e waiho ai hei oati: a ki a ratou hei mutunga mo nga whakahoki-hoki kupu katoa te oati whakaū.

17 Na reira hoki, i te Atua e tino pai rawa ana kia whakakitea ki te hunga mo ratou nei aua mea i korerotia ra te mau o tana whakaaro, whakaurua mai ana e ia he oati;

18 Na ka rua nga mea pu-mau, he mea hoki e kore ai e ahei kia teka te Atua, a *maenei* ka kaha ai he whakamarietanga mo tatou, mo te hunga kua rere ki te pupuri i te mea e takoto mai nei i te

aroaro, e tumanakohia atu nei:

19 Hei punga ano tenei ma tatou mo te wairua, he mea mau tonu, u tonu, tae tonu atu ano hoki ki roto ki te arai;

20 Ki te wahi kua tapoko atu nei a Ihu ki reira, hei mātāmua mo tatou, i a ia i meinga hei tohunga nui mo a mua tonu atu, i runga i to Merekihereke ritenga.

UPOKO 7.

No Merekihereke to Ihu tohungatanga. 11 Nui atu i to Arona.

KO tenei Merekihereke hoki, kingi o Harema, tohunga o te Atua i runga rawa, i tutaki nei ki a Aperahama i a ia e hoki ana i te patunga i nga kingi, i manaaki nei i a ia;

2 A hoatu ana e Aperahama ki a ia nga whakatekau o nga mea katoa; te whakamaoritanga nei o tona ingoa i te tuatahi ko te Kingi o te tika, a i to muri ko te Kingi o Harema, ara ko te Kingi o te rangimarie;

3 He mea matua-kore, whaea-kore, kahore nei ona whakapapa tupuna, kahore he timatanga o ona ra, kahore he mutunga o tona orange; he tangata kua whakaritea ki te Tama a te Atua, mau tonu ana ia hei tohunga.

4 ¶ Na whakaaroa te nui o tenei tangata, i hoatu nei ki a ia e te tupuna nui, e Aperahama.

NGA HIPERU 7.

hama nga whakatekan o nga taonga parakete.

5 Nga tama hoki a Riwai, ara nga mea kua riro nei i a ratou te mahi tohunga, he ture kei a ratou kia tangohia ta te ture i whakarite ai, nga whakatekau a te iwi, he mea na o ratou tuākana, tēina, i puta mai nei ano i te hope o Aperahama:

6 Ko tenei tangata ia ehara nei i te mea no to ratou kawai, riro ana i a ia nga whakatekau a Aperahama, a manaakitia ana e ia te tangata i a ia nei nga kupu whakaari.

7 Na e kore rawa tenei e taea te whakateka, ara ko te mea iti te manaakitia ana e te mea nui.

8 I konei hoki e riro ana nga whakatekau i nga tangata matemate nei; i reira ia i riro i tera e korerotia nei, kei te ora ia.

9 Me penei ano te ki, ko Riwai e tango whakatekau nei, hoatu ana e ia he whakatekau i ta Aperahama meatanga ra.

10 I roto hoki ia i te hope o tona pāpā i te tutakitanga o Merekihereke ki a ia.

11 ¶ Na, ki te mea na ta te Riwaiti mahi tohunga i tino rite ai, (i na runga hoki i tera te rironga mai o te ture i te iwi,) he aha atu te mea e whakatika ai tetahi atu tohunga i runga i to Merekihereke ritenga; tē karangatia ra i runga i to Arona ritenga?

12 Ka whakaputaia ketia

hoki te mahi tohunga, ina, kua puta ke ano hoki te ture.

13 Te tangata hoki mona enei korero, he hapu ke tona, kahore nei tetahi o ratou i whakatata ki te āta.

14 He mea takoto mārāma hoki tenei, i puta ake to tatou Ariki i roto i a Hura: a hore rawa ā Mohi kupu mo te mahi tohunga a taua iwi.

15 Tenei ano hoki tetahi mea e tino mārāma rawa ana: kua whakatika hoki tetahi atu tohunga i runga i te ritenga o Merekihereke;

16 A, tona whakatohungatanga, ehara i te mea no runga i te ture o nga tikanga o te kikokiko, engari no runga i te kaha o te orange e kore e mutu.

17 Kua whakaaturia mai nei hoki e ia, Hei tohunga koe ake ake i runga i te ritenga o Merekihereke.

18 Kua whakakahoretia hoki te ture i whakatakotoria i mua, no te mea kahore ona kaha, kahore ona hua,

19 (Kahore hoki tetahi mea i tino tika i ta te ture:) a kua kawea mai te mea pai rawa e tumanakohia atu nei; na tenei hoki tatou ka whakatata atu nei ki te Atua.

20 Na kihai nei i mahue te oati:

21 (Ko era hoki kahore he oati i to ratou whakatohungatanga; he oati ia i to tenei, na tera i ki mai ra ki a ia, Kua oati te Ariki a e kore e puta ke tona whakaaro, Hei tohunga koe ake ake i runga i te ritenga o Merekihereke:)

NGA HIPERU 7, 8.

22 Koia i nui ke ai te pai o te kawenata ko Ihu nei tona kai whakamau.

23 He tohunga tokomaha hoki ratou kihai hoki i tukua e te mate kia tu tonu :

24 Ko tenei ia, e mau tonu ana ake ake, a e kore e puta ke tana mahi tohunga.

25 Na, e taea ano e ia te tino whakaora te hunga e na runga ana i a ia ki te Atua ; e ora tonu ana hoki ia hei inoi mo ratou.

26 ¶ Pai rawa hoki tenei tu tohunga nui mo tatou, te tapu, te kino-kore, te poke-kore, he mea motu ke i te hunga hara, kua whakanekehia ake ano hoki ki runga ake i nga rangi ;

27 Kahore ana mea e pera ai ia me nga tohunga nui, e whakaeke patunga tapu ai ia, i ia ra, i ia ra, mo ona hara ake i te tuatahi, muri iho mo o te iwi ; kotahi tonu hoki tana meatanga i tenei, i tana whakaekenga atu i a ia.

28 Nga tohunga nui hoki e whakaturia ana e te ture, he tangata e pehia ana e te ngoi-kore ; ta te kupu ia o te oati i muri nei i te ture, ko te Tama kua oti nei te mea kia tino tika, a ake ake.

UPOKO 8.

To Ihu tohungatanga nui atu, mau tonu. 13 Kua kore to Arona.

NA, ko te tino tenei o enei korero : He tohunga pera to tatou, kua noho ki matau o te torona o te Nui i nga rangi ;

2 He minita mo nga mea tapu, mo te tapenakara pono, tona kai whakaara nei ko te Ariki, ehara i te tangata.

3 Nga tohunga nui katoa hoki, he mea whakarite hei tapae i nga whakahere i nga patunga tapu : na konei hoki i tika ai kia whai mea ano tenei hei tapaenga atu māna.

4 Me i runga hoki ia i te whenua, kahore ona tohungatanga ; tenei hoki nga tohunga hei tapae i nga whakahere i runga i ta te ture.

5 Ta ratou mahi he ritenga, he atarangi no nga mea i te rangi, he pera ano me te mea i tohutohungia ki a Mohi, i a ia meāke hanga i te tapenakara : i mea hoki ia, Kia mahara kia hangā e koe nga mea katoa kia rite ki te tauira i whakakitea ki a koe i runga i te maunga.

6 Tena ko tenei he nui ke te mahi minita kua riro nei i a ia, he pai rawa hoki te kawenata ko tona takawaenga nei ko ia, he pai rawa ano hoki nga kupu whakaari, i whakatakotoria ai *taua kawenata*.

7 Me he mea hoki kihai i whai hē taua *kawenata* o mua, e kore e rapua he wahi mo te tuarua.

8 I a ia hoki e whakahe ana, i mea ia ki a ratou, Nana, tenei ake ko nga ra, e ai ta te Ariki, e whakaritea ai e ahau he kawenata hou ki te whare o Iharaira, ki te whare ano hoki o Hura :

9 E kore e rite ki te kawē-

NGA HIPERU 8, 9.

nata i whakaritea e ahau ki o ratou mātua, i te ra i mau ai ahau ki o ratou ringaringa, i arahi mai ai i a ratou i te whenua o Ihipa; kihai nei hoki ratou i u ki taku kawenata, a kore ake oku whakaaro ki a ratou, e ai ta te Ariki.

10 Ko te kawenata hoki tenei e whakarite ai ahau ki te whare o Ihairaira i muri iho i aua ra, e ai ta te Ariki; ka hoatu e ahau aku ture ki o ratou hinengaro, ka tuhi-tuhia ano hoki ki o ratou ngakau: a ko ahau hei Atua mo ratou, ko ratou hoki hei iwi maku:

11 E kore ano hoki ratou e whakaako i tona hoa, i tona hoa, i tona teina, i tona tuakana, e mea, Kia mātau koe ki te Ariki: e mātau katoa hoki ratou ki ahau, te nohi-nohi o ratou, te nui ano hoki o ratou.

12 Ka mahi tohu hoki ahan ki o ratou hē, e kore ano hoki e maharatia e ahau o ratou hara, a ratou kino a muri ake nei.

13 I a ia i mea, He kawenata hou, kua whakatawhitotia e ia te tuatahi. Na, te mea kua tawhitotia, kua korohekietia, ka tata te memeha.

UPOKO 9.

Nga patunga tapu o te ture.

11 *Nui o ta Ihu.*

NA, te kawenata tuatahi he tikanga karakia ano ona, me tetahi wahi tapu, he mea maori.

2 I hangā hoki tetahi tape-

nakara, te tuatahi, i reira te turanga rama, me te tepu, me te taro aroaro; tona ingoa, ko te wahi tapu.

3 A i tua atu o te rua o nga arai, ko te tapenakara, e hua-ina ana ko te wahi tino tapu;

4 He tahu kakara koura i reira me te āka o te kawenata he mea whakakikorua nga wahi katoa ki te koura, i roto ano i taua mea ko te oko kou-ra i te mana, me te tokotoko o Arona i pihi ra, me nga papa o te kawenata:

5 A i runga atu i tenei ko nga Kerupima o te kororia, e whakamarumarua ana i te whakamarietanga: e kore aua mea e taea te ata korero aia-nei.

6 Heoi ka ata rite nei enei mea, kā haereere nga tohunga i nga wa katoa ki te tapenakara tuatahi, i a ratou e mahi ana i nga mahi minita.

7 Ki te tuarua ia kotahi ano te haerenga atu i te tau, ko te tohunga nui anake, kihai ano i mahue nga toto; i tapaea atu hoki mona, mo nga hē ano o te iwi:

8 Ko ta te Wairua Tapu hoki tenei i whakaatu ai, kiano te huarahi ki te wahi tino tapu i whakakitea mai, i te mea e tu ana ano te tapenakara tuatahi:

9 He ahua tenei i taua wa ra, i tapaea ai nga whakahere me nga patunga tapu, kihai i tau hei mea i te tangata nāna tera mahi kia tino tika te hinengaro;

10 Heoi ano o era, he kainga, he inumanga, he hōroinga

NGA HIPERU 9.

maha, he tikanga na te kiko-kiko, he mea whakarite mai a taea noatia te wa whakati-katika.

11 ¶ Heoi, te taenga mai o te Karaiti hei tohunga nui mo nga mea pai e whai mai ana i muri, he nui atu ano hoki, he tino tika te tapenakara, ehara i te mea hanga na te ringa-ringa, ara ehara i te mea no tenei hanganga:

12 Ehara ano hoki i te mea no nga koati nga toto, no nga kuao kau ranei, engari nona ake nga toto i haere ai ia, kotahi tonu te haerenga, ki roto ki te wahi tino tapu, i te mea ka whiwhi ki tana mea hei hoko mo tatou a ake tonu atu.

13 Ki te mea hoki ma nga toto o nga puru, o nga koati, ma nga pungarehu ranei o te kuao kau, he mea tāuhiuhi ki te hunga kua poke, ka tapu ai, ka ma ai te kiko-kiko;

14 Tera atu to nga toto o te Karaiti, nāna nei ia i tapae ki te Atua, i runga i ta te Wairua ora tonu, kahore hoki ona koha; ma era e ma ai o koutou hinengaro i nga mahi mate, e mahi ai koutou ki te Atua ora.

15 Mo konei ano ia i meinga ai hei Takawaenga mo te kawenata hou, kia mate ai ia hei utu mo nga hē i raro i te kawenata tuatahi, kia riro ai i te hunga e karangatia ana te wahi tūturu i korerotia i mua.

16 He oha-kī hoki, te mea e

whai tikanga ai, ko te mate-nga o te tangata nāna i whakatakoto.

17 Kia mate hoki te tangata, katahi ka whai mana te oha-kī: kahore hoki e u i te mea e ora ana te tangata nāna i whakatakoto.

18 Koia hoki tē mahue ai te toto i te whakatapunga o te kawenata tuatahi.

19 I te mutunga hoki o ta Mohi korero i nga tikanga katoa ki te iwi katoa, hei whakaritenga mo ta te ture, ka mau ia ki nga toto o nga kuao kau, o nga koati, ki te wai, ki te huruhuru whero, ki te hihopa, a tāuhiuhia ana e ia te pukapuka, me te iwi katoa;

20 Me tana ki ano, Ko nga toto enei o te kawenata kua akona mai nei e te Atua ki a koutou.

21 I tāuhiuhia ano hoki e ia ki nga toto te tapenakara, me nga oko katoa mo te mahi minita.

22 I runga hoki i te ture he torutoru nga mea i mahue te pure ki te toto; ki te kahore hoki he ringihanga toto, kahore he murunga hara.

23 ¶ Koia i tika ai kia purea ki enei nga ritenga o nga mea i te rangi; ko nga tino mea ia o te rangi ki nga patunga tapu e pai rawa atu ana i enei.

24 Ehara hoki i te mea kua tomo a te Karaiti ki nga wahi tapu i hangā e te ringa-ringa, ki nga ahua o nga tino wahi; engari ki te tino rangi

NGA HIPERU 9, 10.

pu ano, puta ai ki te aroaro o te Atua mo tatou :

25 Ehara ano i te mea kia maha ana tapaenga i a ia, kia pera me te tohunga nui e haere nei ki roto ki te wahi tino tapu i tenei tau, i tenei tau, no etahi atu ano hoki nga toto ;

26 Penei kia maha he ma-maetanga mona, he mea ti-mata i te hanganga ra ano o te ao : tena ko tenei kotahi tonu tona whakakitenga mai i te mutunga o te ao, hei whakakahore i nga hara, i a ia ka meinga hei patunga tapu.

27 Na kua takoto nei te tikanga mo nga tāngata kia kotahi tonu te matenga, a muri iho i tenei ko te whakaritenga whakawa ;

28 Waihoki ko te Karaiti, kotahi tonu tona tapaenga atu hei pikau i nga hara o te tini, a tenei ake ko te rua o ona whakakitenga mai, kahore ano he hara, hei whakaora i te hunga e tatari ana ki a ia.

UPOKO 10.

He ahua kau nga whakahere o mua. 10 *To Ihu kotahi tonu ;* 14 *ea ake nga hara.* 19 *Na kia mau.*

TO te ture hoki he atarangi no nga pai e puta mai ana i muri, ehara hoki i te ahua pu o aua mea, e kore ano e whai mana, i aua patunga tapu e whakaekea tonutia ana e ratou i tenei tau, i tenei tau, e tino tika ai te hunga e whakatata ana.

2 Penei e kore ranei e mutu te whakaeke ? me i oti hoki te hunga nāna taua karakia te mea kia ma, kua kore o ratou maharatanga ki nga hara.

3 I aua *patunga tapu* ia e hokihoki ana te mahara ki nga hara i ia tau, i ia tau.

4 E kore hoki e tau ma nga toto o nga puru, o nga koati, e whakakahore nga hara.

5 Na reira, i a ia e haere mai ana ki te ao, ka mea ia, Kihai i matenuitia e koe te patunga tapu me te whakahere, kua rite mai i a koe he tinana moku.

6 Kihai koe i ahua-reka ki nga tahunga tinana, ki nga *whakahere* hara :

7 Katahi ahau ka mea atu, Tenei au te haere atu nei, (kei roto i te upoko o te pukapuka te tuhituhinga moku,) ki te mea i tāu i pai ai, e te Atua.

8 I tana meatanga i mua ake, Kihai koe i matenui ki te patunga tapu, ki te whakahere, ki nga tahunga tinana me nga *whakahere* hara, kahore ano hoki ou ahua-reka-tanga mai, he mea nei e tapaea ana i runga i te ture ;

9 Katahi ia ka mea, Tenei ahau te haere nei ki te mea i tāu i pai ai, e te Atua. E tangohia ana e ia te tuatahi, kia whakaturia ai e ia te tuarua.

10 Na taua pai nei i oti ai tatou te whakatapu, he mea-tanga na te tapaenga kotahi o te tinana o Ihu Kara-iti.

NGA HIPERU 10.

11 Na, nga tohunga katoa, e tu ana ratou, e minita ana i tenei ra, i tenei ra, he maha ano hoki a ratou whakaeke-nga atu i aua patunga tapu ra ano, e kore rawa nei e tau hei tango i nga hara :

12 Ko tenei ia, kotahi nei tana patunga tapu i whakaeke ai mo nga hara, na, noho tonu ana i te ringa matau o te Atua;

13 I muri nei he tatari tona kia waiho ra ano ona hoa riri hei takahanga mo ona waewae.

14 Kotahi nei hoki tana whakahere, a tika tonu i a ia ake ake te hunga ka oti te whakatapu.

15 Hei kai whakaatu ano te Wairua Tapu *mo tenei ki a tatou* : i muri nei hoki i tana kianga mai,

16 Ko te kawenata tenei e whakaritea e ahau ki a ratou i muri i aua ra, e ki ana te Ariki, Ka hoatu e ahau aku ture ki o ratou ngakau, ka tuhituhia ano e ahau ki o ratou hinengaro;

17 E kore ano hoki e maharatia e ahau o ratou hara, a ratou kino, a muri ake nei.

18 Na, ki te murua enei, kahore he whakahere mo nga hara i muri iho.

19 ¶ Na, ka ai nei nga toto o Ihu hei take e maia ai tatou te tomo ki te tino wahi tapu,

20 Hei ara hou mo tatou, ara ora, he mea whakatapu nāna, e tika atu ana na te arai, ara na tona kikokiko,

21 A he nui ano hoki to tatou tohunga mo te whare o te Atua,

22 Kia whakatata atu tatou, i runga i te ngakau pono, i te whakapono e tino u ana, he mea tāuhiuhi te ngakau *kia* kore ai te hinengaro kino, he mea horoi ano hoki te tinana ki te wai mārama.

23 Kia mau ta tatou whakaae ki te mea e tumanakohia nei, kei ngaueue; (he pono hoki ta te Kai whakaari mai;)

24 Kia whai whakaaro ano tatou tetahi ki tetahi, kia whakaohokia te aroha me nga mahi pai:

25 Kei mahue te huihui i a tatou ano, kei pera me te hanga a etahi; engari me whakahauhau tetahi e tetahi: kia nui rawa ano hoki i te mea ka kite koutou ka tata te ra.

26 ¶ Ki te hara hoki tatou me te whakaae ano te ngakau i muri i a tatou kua whiwhi ki te matauranga ki te pono, kahore atu he patunga tapu i mahue mo nga hara;

27 Engari he tatari ahua matakū nei ki te whakawakanga, ki te riri tu-a-ahi nei e pareho ai nga hoa riri.

28 Te tangata i whakorekore ki te ture a Mohi, kihai i tohungia; tokorua, tokotoru nga kai whakaatu ka mate ia :

29 Ki ta koutou whakaaro, e kore ranei e tika kia rahi ake te whiu mo te tangata i takahia ai te Tama a te Atua,

NGA HIPERU 10, 11.

i meinga ai hei mea noa nga toto o te kawenata i whakapua ai ia, a whakaiti ana i te Wairua o te aroha noa?

30 E mātau ana hoki tatou na wai tenei kupu, Maku te rapu utu; maku te hoatu utu, e ai ta te Ariki: me tenei ano, E whakarite whakawa te Ariki mo tana iwi.

31 He mea matakū te taka ki roto ki nga ringaringa o te Atua ora.

32 ¶ Engari kia mahara ki nga ra o mua, i a koutou i whakamaramatia ra, a nui noa te totohetanga mai o nga mate, i whakaririka kau ra koutou;

33 Tetahi wahi, i a koutou i meinga e nga tawainga, e nga tukinotanga hei mea e matakitakina ana; tetahi wahi, i a koutou i meinga hei hoa mo te hunga i peratia.

34 I mamae tahi hoki koutou me au, i a au i te herehere, i hari hoki ki te pahuatanga o o koutou taonga, i mahara hoki tera atu he taonga mo koutou, he mea pai ake, e mau tonu ana i te rangi.

35 Na kua e whakarerea to koutou maia, he rahi hoki tona utu.

36 Te mea hoki hei mate-nuitanga ma koutou he manawanui; kia mahia ai e koutou ta te Atua i pai ai, a riro tonu mai i a koutou nga mea i whakaaria mai ra.

37 Potopoto kau ake hoki, a ka tae mai tenei e haere mai nei, e kore ano e whakaroa.

38 Na, ma te whakapono e ora ai te tangata tika: a ki te hoki *tetahi* ki muri, e kore toku wairua e ahuareka ki a ia.

39 Na ehara tatou i te *hunga* e hoki ana ki muri, ki te whakangaromanga, engari no te *hunga* e whakapono ana, a ora ana te wairua.

UPOKO 11.

Ta te whakapono mahi. 7
Ona hua.

NA, te whakapono, he whakapumautanga i nga mea e tumanakohia atu ana, he whakakitenga i nga mea kahore nei e kitea.

2 Na konei hoki nga kaumātua i korerotia paitia ai.

3 Na te whakapono i mātau ai tatou he mea hanga nga ao e te kupu a te Atua, a, nga mea e tirohia atu nei, kihai i puta ake i roto i nga mea e kitea ana.

4 Na te whakapono i pai ake ai i ta Kaina te patunga tapu i tapaea e Aperā ki te Atua, na reira hoki i whakaatu tona tika, i whakaatu hoki te Atua ki ana whakahere: na reira ano ia i whai kupu ai, ahakoa mate.

5 Na te whakapono a Enoka i kawea ketia ai, tē kite i te mate; na, kahore ia i kitea, no te mea kua kawea ketia ia e te Atua: i mua hoki i tona kawenga ketanga i whakaturia mai ia, e ahuareka ana te Atua ki a ia.

6 Na, ki te kahore he whakapono, e kore e taea he mea

NGA HIPERU 11.

e ahuaireka mai ai ia : ki te haere hoki tetahi ki te Atua, me whakapono ko ia ano tenei, ko te Atua, a e homai ana ano e ia he utu ki te hunga e ata rapu ana i a ia.

7 ¶ Na te whakapono a Noa, i tona whakamaharatanga e te Atua ki nga mea kahore i kitea noatia, i oho ai, a hangā ana e ia te āka hei whakaora mo tona whare; he whakataunga tera nana i te he ki te ao, a uru ana ki te tika o te whakapono.

8 Na te whakapono a Aperahama i ngohengohe ai, i tona karangatanga kia haere ki te wahi meāke riro i a ia hei kāinga; a haere ana ia, tē mātau ki te wahi e haere ai ia.

9 Na te whakapono ia i noho manene ai ki te whenua i whakaaria mai, he whenua tangata-ke ano ki a ia, a noho teneti ana ia, ratou ko Ihaka, ko Hakopa, ona hoa kua uru tahi nei ratou ki taua mea i whakaaria mai ra :

10 I tatari hoki ia ki te pa whai turanga, ko te Atua nei te kai hanga, te kai mahi.

11 Me Hera ano hoki, na te whakapono ia i whai kaha ai, i hapū ai, a whanau ana tana tama i te mea kua taka ke onatau; i mahara hoki ia he pono ta te kai whakaari mai.

12 Na, whanau ake i te kotahi, a he tangata ano hoki ia kua whakatupāpakutia ki enei mea, me te mea ko nga whetū o te rangi te tini, koia ano kei te onepu i te taha o

te moana e kore nei e taea te tatau.

13 ¶ I mate katoa enei i runga i te whakapono, kihai i whiwhi ki nga mea i whakaaria mai ra, engari he mea kite atu na ratou i tawhiti, a whakaponohia ana e ratou, awhitia ana, whakaae ana ratou he manene ratou, he noho noa iho i runga i te whenua.

14 Te hunga hoki he penei a ratou korero, e whakakite pu ana ratou, he whenua tupu ta ratou e rapu nei.

15 Me i mahara hoki ratou ki taua kāinga i haere mai nei ratou i reira, penei kua atea he hokinga atu mo ratou :

16 Tena ko tenei e hiahia ana ratou ki tetahi kāinga pai ake, ki tera i te rangi : koia te Atua tē whakama ai ki a ratou, kia karangatia ko to ratou Atua; kua rite hoki i a ia tetahi pa mo ratou.

17 ¶ Na te whakapono a Aperahama i tapae ai i a Ihaka, i tona whakamatautauranga; na, te tangata i a ia nei nga kupu whakaari, tapaea ana e ia tana hua-tahi,

18 Mona nei te kupu, Kei a Ihaka he karangatanga mo tau whanau :

19 I whakaaro hoki ia, aha-koa i roto nei ano i te hunga mate, e taea ano ia e te Atua te whakaara ake; a riro mai ana ia i reira, he mea ahua.

20 Na te whakapono ta Ihaka kupu manaaki mo Hakopa

NGA HIPERU 11.

raua ko Ehau; he meatanga ki nga mea o muri nei.

21 Na te whakapono a Hakopa, i a ia ka tata te mate, i manaaki ai i nga tamariki tokorua a Hohepa; a koropiko ana i runga i tona tokotoko.

22 Na te whakapono a Hohepa, i a ia e whakahemohemo ana, i whakahua ai i te haerenga mai o nga tamariki a Iharaira; i whakatakoto tikangai ano mo ona wheua.

23 Na te whakapono a Mohi, i tona whanautanga, i hunā ai e ona mātua e toru nga marama, i kite hoki raua he tamaiti ataahua ia; kihai hoki raua i matakū i te ture a te kingi.

24 Na te whakapono a Mohi, i tona kaumātuatanga, kihai i pai kia karangatia he tama na te tamahine a Parao;

25 Ki tana hoki, ko te mamae tahi me to te Atua iwi, he mea pai ke atu i nga ahua reka o te hara kia riro mai mo tetahi wa;

26 Ki tona whakaaro, ko te tawainga mo te Karaiti, he taonga nui ke atu i nga taonga o Ihipa: i titiro hoki ia ki te utu ka homai.

27 Na te whakapono ia i haere mai ai i Ihipa, kihai hoki i matakū i te riri o te kingi: i u tonu hoki ia, he titiro nana ki te Atua e kore nei e kitea.

28 Na te whakapono ia i whakarite ai i te kapenga, me te ringihanga toto, kei pa ki a ratou te kai whakamate i nga whanau mātāmua.

29 Na te whakapono ratou i haere ai ra te Moana whero me te mea e na runga ana i te *whenua* maroke; a, te whakamatauranga nga Ihipiana, horomia ake ratou.

30 Na te whakapono nga taiapa o Heriko i whenuku ai, i te mea e whitu nga ra e taiawhiotia ana.

31 Na te whakapono a Rahapa, te wahine puremu, kihai i whakangaromia ngatahitia me te hunga whakapono-kore, mona i whakamanuhiri i nga tutei i runga i te rangimarie.

32 Kia pehea ake ano hoki aku korero? e kore hoki e ranea te taima hei korerotangamaku i nga mea a Kireono, a Paraka, a Hamahona, a Iepeta, a Rawiri, a Hamuera, a nga poropiti;

33 Na te whakapono nei i hinga ai i a ratou nga rangatiratanga, i mahia ai e ratou te tika, i whiwhi ai ratou ki nga mea i whakaaria mai i mua, i tutakina ai e ratou nga waha o nga raiona,

34 I tineia ai e ratou te kaha o te ahi, i mawhiti ai i te mata o te hoari, i whai kaha ai i runga i te ngoikore, i meinga ai kia kaha i te wha-whaitanga, whatiana i a ratou nga taua a nga tau iwi.

35 Riro mai ana i nga wāhine a ratou tupāpaku he mea whakaara ake: ko etahi i whakamamaetia, kihai ano i whakaae kia whakaorangia; kia whiwhi ai ratou ki te whakaarahanga e pai ke atu ana:

36 Ko etahi i whakamatau i

NGA HIPERU 11, 12.

nga tawainga, i nga whiunga, i nga mekameka ano hoki, i te whare herehere.

37 I akina ratou ki te kohatu, i kania, i whakawaia, i mate i te patunga a te hoari: i haereere ratou he hiako hipi te kakahu, he hiako koati; he hunga rawakore ratou, e tuki-notia ana, e whakatupuria kinotia ana;

38 (Kihai nei te ao i pai mo ratou:) atiutiu noa ana ratou i waenga tahora, i nga mau-nga, i nga ana, i nga poka o te whenua.

39 Na, *pai tonu* te korero mo enei katoa, he mea na te whakapono, heoi kihai ratou i whiwhi ki te mea i whakaaria mai:

40 Kua whakaaroa wawetia hoki e te Atua tetahi mea pai atu mo tatou, kei tino tika ratou i te mea kahore nei tatou.

UPOKO 12.

Whakahau. 22 Te Kawenata hou, nui atu i to mua.

NA, i tenei kapua nui o nga kai whakaatu e karapotu nei i a tatou, kia whakarerea e tatou nga whakataimaha katoa, me te hara whakaeke tata, a kia manawanui tatou ki te oma i te omanga e takoto nei i to tatou aroaro;

2 Me te titiro pu ano ki a Ihu, ki te kai timata, ki te kai whakaoti i te whakapono; i whakaaro hoki ia ki te hari i tona aroaro, a whakamamawanui ana ki te ripeka, whakahawea ana ki te whakama,

na kua noho ki matau o te torona o te Atua.

3 Whakaaroa hoki ia i whakamamawanui nei ki taua to-tohe nui a te hunga hara ki a ia, kei hōhā o koutou ngakau, a ka ngakau-kore koutou.

4 Ta koutou pakanga, kahore ano kia tae noa ki te toto i a koutou e whawhai na ki te hara.

5 Kua wareware ano koutou ki te whakahau e korero nei ki a koutou, me te mea he tamariki *tupu* koutou, E taku tama, kua e whakahawea ki ta te Ariki papaki; kei ngakau-kore hoki ina riria e ia:

6 E papaki ana hoki te Ariki ki tana e aroha ai, e whiua ana hoki e ia nga tamariki katoa e whakatamarikitia ana ki a ia.

7 Ki te manawanui koutou ina pakia, e rite ana ta te Atua meatanga ki a koutou *ki tana* ki nga tama *tupu*; ko wai hoki te tama e kore e pakia e te pāpā?

8 Ki te kahore ia o koutou pakinga, te mea e whakawhiwhia ana ki te katoa, he poriro koutou, ehara i te tamariki.

9 He mātua ano o tatou no te wahi ki te kikokiko, he mea papaki *tatou* na ratou; i hopo-hopo ano tatou *ki a ratou*: kua ianei e nui noa atu to tatou ngohengohe ki te Matua o nga wairua, kia ora ai?

10 Ta ratou papaki hoki, he torutoru nei nga ra, he mea ano na ta ratou ake i wha-

NGA HIPERU 12.

kaaro ai; ta tenei ia mo te pai, kia whiwhi ai tatou ki tona tapu.

11 Na, nga pakinga katoa e kore e kiia inaianei hei whakahari, engari hei whakapouri: muri iho ia ka puta mai te hua rangimarie o te tika ki te hunga e whakamahia ana ki taua mea.

12 Na kia ara nga ringaringa kua tukua iho, me nga turi ngoikore:

13 Hangā hoki etahi huarahi tika mo o koutou waewae, kei whakapeaua ketia te kopa; engari kia ora ake i te mate.

14 ¶ Whaia te rongo kia mau ki te katoa, me te tapu hoki, ki te kahore nei hoki tenei e kore tetahi tangata e kite i te Ariki.

15 Me titiro marie kei hapa tetahi i to te Atua aroha noa; kei pihi ake tetahi pakiaka o te kawa hei whakararuraru, a he tokomaha e poke;

16 Kei puremu tetahi, kei ahua whakarihariha, kei pera me Ehau: ta tenei hoki, kotahi ano te kainga i hokona ai e ia tona mātamuatanga.

17 E mātau ana hoki koutou ki tona hiahia i muri kia riro i a ia te manaakitanga, a kapea ana ia: kihai hoki i kitea he wahi mo te whakaputanga ketanga, ahakoa i rapua marietia e ia me te heke ano nga roimata.

18 ¶ Ehara hoki i te mea kua tae koutou ki te maunga e taea te whakapa atu, ki te ahi e ka ana, ki te pango

kerekere, ki te pouri, ki te tupuhi,

19 Ki te tangi o te tētere, ki te reo e korero ana; i inoi ra te hunga i rangona ai kia kua he kupu ki a ratou i muri iho:

20 (Kihai hoki ratou i kaha ake ki te mea i whakaritea mai, Na, ahakoa he kararehe i pa ki te maunga, me aki ki te kohatu, me wero ranei ki te matia.

21 Koia ano te matakū o te mea i puta mai ra, i mea ai a Mohi, Matakū rawa ahau, wiri rawa:)

22 Engari kua tae nei koutou ki Maunga Hiona, ki te pa o te Atua ora, ki Hiruharama i te rangi, ki nga mano tini o nga anahera,

23 Ki te huihuinga nui, ki te hahi o nga mātamua, kua oti te tuhituhi ki te rangi, ki te Atua hoki, ki te kai whakariite whakawa o nga tāngata katoa, ki nga wairua ano o te hunga tika kua oti te mea kia tino tika,

24 Ki a Ihu ano hoki, ki te takawaenga o te kawenata hou, ki nga toto o te tāuhiuhinga, he pai ake nei nga korero i o Aperā.

25 Kia mahara kei whakarekere koutou i tenei e korero mai nei. Ki te mea hoki kihai i mawhiti te hunga i paopao ki tera i korero ra i runga i te whenua, ina e kore rawa ano tatou, ki te tahuri ke i tenei kua korero mai nei i te rangi.

26 Ngāueue ana te whenua i tona reo i reira: inaianei ia

kua puaki tana kupu whakaari, kua mea ia, Kia kotahi ano meatanga, a ehara i te mea ko te whenua anake, ko te rangi ano hoki taku e whakangaueue ai.

27 Na, taua kupu nei, Kia kotahi meatanga, hei whakakite i te putanga ketanga o nga mea e whakangaueuetia ra, he mea hanga hoki; a mau tonu iho nga mea e kore nei e whakangaueuetia.

28 Na, ka riro nei i a tatou he kingitanga e kore e taea te whakangaueue, kia whiwhi tatou ki te aroha noa, kia manakohia mai ai ta tatou e mahi nei ki te Atua i runga i te hopohopo, i te wehi:

29 He ahi hoki e kai ana to tatou Atua.

UPOKO 13.

Etahi atu whakahan.

KIA mau tonu te aroha ki nga tēina.

2 Kei wareware ki te atawhai manuhiri: na tenei hoki i whakamanuhiri anahera ai etahi, kihai ano i mātau atu.

3 Maharatia nga herehere, no koutou tahi hoki te hereherenga; me te hunga hoki e whakatupuria kinotia ana, kei te tinana na hoki koutou.

4 He mea honore te marena mo te katoa, kahore hoki he poke o te moenga: te hunga moe puku ia, me te hunga puremu, e whakataua e te Atua te hē ki a ratou.

5 Whakakahoretia atu te mahi apo taonga; a kāti ano

nga mea ma koutou ko nga mea i a koutou na: kua mea mai hoki ia, E kore ahau e whakarere i a koe, e kore ano hoki e mawehe i a koe.

6 Na ka maia tatou ki te kake, Kei toku taha te Ariki, e kore ahau e matakau ki ta te tangata e mea ai ki a au.

7 ¶ Kia mahara ki te hunga e tohutou ana i a koutou, kua korero nei i te kupu a te Atua ki a koutou: tirohia te tukunga iho o to ratou whakahaere, kia rite to koutou ki to ratou whakapono.

8 Tūturu tonu a Ihu Karaiti inanahi, inaianei, a ake ake ake.

9 Kei kahakihakina koutou e nga whakaakoranga maha, e nga mea poka hou ake: he mea pai hoki kia whakaukia te ngakau ki te aroha noa, kauaka ki nga kai, kahore hoki he pai o ena mea mo te hunga na ratou nei tera mahi.

10 He āta ano ta tatou, e kore nei e tika kia kainga to tenei e te hunga e mahi ana ki te tapenakara.

11 Na, nga kararehe no ratou nei nga toto e mauria ana e te tohunga nui mo te hara ki roto ki te wahi tino tapu, e tahuna ana nga tinana o era ki waho o te puni.

12 Na reira hoki a Ihu, i tana whakatapunga i te iwi ki ona toto ake ano, i mamae ai ki waho o te kuwaha.

13 Na kia haere atu tatou ki a ia, ki waho o te puni, me

te mau ano tatou i tona tawai-
nga:

14 Kahore hoki he pa tumau
mo tatou i konei, engari e
rapu ana tatou i tetahi i roto
i nga wa a muri nei.

15 Na kia tapaea atu e ta-
tou i runga i a ia i nga wa
katoa te whakamoemiti ki te
Atua hei whakahere, ara te
hua o nga ngutu e whaka-
whetai ana ki tona ingoa.

16 Kei wareware hoki ki te
mahi pai, ki te atawhai: e
manakohia ana hoki e te
Atua nga patunga tapu
pera.

17 Kia ngohengohe ki o kou-
tou kai tohutohu, whakanuia
ta ratou kupu; e mataara
ana hoki ratou ki o koutou
wairua, a me korero ano e
ratou a mua te tikanga o a
ratou mahi: kia hari ai ratou
ina mea i tenei, kia kaua hoki
e pouri: kahore hoki he pai o
tenei mo koutou.

18 ¶ Inoi mo matou: u tonu
hoki to matou whakaaro ki
to matou hinengaro, he pai, e
hiahia ana hoki matou kia
tika to matou whakahaere i
nga mea katoa.

19 I hira rawa ai taku wha-
kahau kia meatia tenei, he
mea kia wawe ai ahau te
whakahokia ki a koutou.

20 ¶ Na, ma te Atua o te
rangimarie, nāna nei i wha-
kahoki mai i roto i te hunga
mate to tatou Ariki, a Ihu,
taua Hepara nui o nga hipi,
he meatanga na nga toto o
te kawenata mutunga-kore,

21 Māna koutou e mea kia
tino tika i runga i nga mahi
pai katoa, kia mahia ano e
koutou tana i pai ai; māna e
mahi i roto i a koutou te mea
e ahua-reka ana ki tana ti-
tiro, i roto ano i a Ihu Ka-
raiti; *waiho atu i a ia te ko-
roria*, ake ake ake. Amine.

22 ¶ He kupu ano tenei
naku ki a koutou, e *oku*
tēina, ata whakarangona mai
te kupu whakahau: he toru-
toru nei hoki *nga kupu* kua
tuhituhia atu nei e ahau ki a
koutou.

23 Kia mātau koutou kua
tukua ki waho te teina, a
Timoti. Ki te haere wawe
mai ia, ko maua tahi e kite
i a koutou.

24 ¶ Oha atu ki te hunga
katoa e tohutohu ana i a
koutou, ki te hunga tapu
katoa ano hoki. Tenei te
oha atu nei ki a koutou te
hunga o Itari.

25 ¶ *Kia tau* te aroha noa
ki a koutou katoa. Amine.

KO TE PUKAPUKA

A HEMI

APOTORO KI NGĀ TĀNGATA KATOĀ.

UPOKO 1.

2 *Kia u, i runga i te inoi.*

13 *Kaua e whakapaea atu he he ki te Atua. 19 Engari kia mau ki tana kupu.*

NA Hemi, na te pononga a te Atua, a te Ariki hoki, a Ihu Karaiti, ki ngā hapu kotahi tekau mā rua e noho marara ana; Tena koutou.

2 ¶ Kiia iho, e oku tēina, he mea hari nui ina taka koutou ki ngā whakamatautauranga maha;

3 E mātau ana hoki koutou, ko te whakamatautauranga o to koutou whakapono hei mahi i te manawanui.

4 Na kia puta rawa te mahi a te manawanui, kia tino tika ai koutou, kia toitu ai, tē hapa i te aha, i te aha.

5 ¶ Ki te hapa tetahi o koutou i te matauranga, me inoi ia ki te Atua e homai nui nei ki te katoa, kahore hoki ana tawai mai; a ka homai ki a ia.

6 Otira me inoi whakapono ia, kaua e ruarua. Te tangata ruarua hoki, tona rite

kei te ngaru o te moana e puhia ana e te hau, e akina ana.

7 Kaua hoki taua tangata e mea, e whiwhi ia ki tetahi mea i te Ariki.

8 E kore te tangata ngakaurua e u i ana hanga katoa.

9 ¶ Te teina iti, kia whakamanamana ia i te mea ka whakanekehia ake ia:

10 Me te tangata taonga ano, i te mea ka whakaititia: ka memeha atu hoki ia, ano he puawai tarutaru.

11 Te putanga mai hoki o te ra me te werawera ano, na kua maroke te tarutaru, kua ngahoro tona puawai, a ngaro iho te ataahua o tona ahua: ka pera ano te tangata taonga, ka memeha atu i ona haereerenga.

12 ¶ Ka hari te tangata e u ake ana i te whakamatautauranga: no te mea hoki, ka oti ia te whakamatautau, ka whiwhi ia ki te karauna o te ora kua whakaaria mai nei e te Ariki mo te hunga e aroha ana ki a ia.

13 Kaua tetahi e mea ina

HEMI 1, 2.

whakamatautauria, E whakamatautauria ana ahau e te Atua : e kore hoki te Atua e taea te whakamatautau e te kino, e kore ano hoki ia e whakamatautau i tetahi :

14 Engari he mea whakamatautau te tangata i a ia e kumea ana, e poaina ana e tona hiahia ake ano.

15 Na, te hapunga o te hiahia, ka whanau ko te hara ; a, te otinga o te hara, ka whanau ko te mate.

16 Kei whakapohēhētia koutou, e oku tēina aroha.

17 No runga nga homaitanga papai katoa, nga mea katoa e tino tika ana, he mea heke iho no te Matua o nga whakamarama, kahore nei ona putanga ketanga, kahore hoki he atarangi o te tahuri.

18 Na tona hiahia ake ano tatou i whanau ai, he meatanga ki te kupu o te pono, kia meinga ai tatou hei mātāmua mo ana mea i hanga ai.

19 ¶ Na, e oku hoa aroha, kia hohoro nga tāngata katoa ki te whakarongo, *kia* puhoi ki te korero, *kia* puhoi ki te riri :

20 E kore hoki ta te Atua tika e mahia e to te tangata riri.

21 Na me whakarere katoa atu nga tikanga poke, me te hara e hua tonu nei, me tahuri marire ki te kupu kua oti te whakato iho ; e taea hoki e tenei te whakaora o koutou wairua.

22 A hei kai mahi ano koutou i te kupu, kua hei kai

whakarongo anake, kei tinihangatia koutou e koutou ano.

23 Ki te mea hoki he kai whakarongo tetahi ki te kupu, a ehara i te kai mahi, e rite ana ia ki te tangata e matakiki ana ki tona kanohi maori i roto i te whakaata :

24 Tana matakikinga hoki ki a ia ano, haere ana, wareware tonu ake he ahua pehea ranei tona.

25 Tena ko te tangata e ata titiro iho ana ki te ture tino tika, ki te mea here kore, a kua tonu, he kai whakarongo ano ia e kore e wareware, engari e mahi ana i te mahi, e hari ano tenei i tana mahi.

26 Ki te mea he ahua karakia to tetahi i roto i a koutou, a kahore e parairetia e ia tona arero, he tinihanga hoki nona ki tona ngakau, he maumau karakia tana.

27 Te karakia pono, te mea poke-kore, ki te aroaro o te Atua Matua, ko ia tenei, Ko te tiroiro i nga pani, i nga pouaru, i o ratou matenga, ko te tiaki i a ia ake kei poke i te ao.

UPOKO 2.

Kaua e whakahipahipaia te tangata. 13 Engari *kia puta te aroha.* 14 Ehara hoki te whakapono i te kupu kau ; engari he mea kaha ki te mahi.

E OKU teina, kaua e waiho i runga i te whakapai kanohi, te whakapono ki to tatou Ariki kororia, ki a Ihu Karaiti.

2 Ki te tomo hoki tetahi tangata ki to koutou whare karakia, he mowhiti koura nei tona, he kakahu pai; a ka tomo ano he rawakore, he kakahu paru nei tona;

3 A ka titiro koutou ki te tangata i te kakahu pai, ka mea ki a ia, E noho koe ki konei, ki te wahi pai; a ka mea ki te rawakore, E tu koe ki kona, E noho ranei ki konei, ki raro i toku turanga wae-wae:

4 He teka ianei he tikanga tahatahi ta koutou, a kua hē nga whakaaro o koutou, o nga kai whakarite whakawa?

5 Whakarongo, e oku tēina aroha, Kahore ano koia te Atua i whiriwhiri i nga rawakore o tenei ao, kia whiwhi ki te taonga, ara ki te whakapono, kia riro mai hoki i a ratou te rangatiratanga kua whakaaria mai e ia mo te hunga e aroha ana ki a ia?

6 Heoi e whakakino na koutou ki te rawakore. He teka ianei ko nga tangata taonga hei whakatupu rangatira ki a koutou, hei tōtō i a koutou ki nga whakawakangana?

7 He teka ianei he hunga kohukohu ratou i te ingoa pai kua karangatia na ki a koutou?

8 Na, ki te rite i a koutou te ture kingi, to te karaipiture, Me aroha e koe tou hoa ano ko koe, ka pai ta koutou hanga:

9 Tena ki te whakapai kanohi koutou, e mahi ana kou-

tou i te hara, ka mau hoki i te ture, he hunga hē.

10 Ki te mau hoki te ture katoa i tetahi tangata, a ka kotahi ano te mea e tapepa ai ia, kua hē ia ki te katoa.

11 I tana kiana mai hoki, Kua e puremu, i ki mai ano ia, Kua e patu tangata. Na, ahakoa kahore koe e puremu, ki te patu tangata koe, kua takahia e koe te ture.

12 Kia rite ta koutou korero, ta koutou mahi, ki ta te hunga e whakawakia a mua i runga i nga tikanga o te ture here-kore.

13 Te tangata hoki kahore ona ngakau tohu, e kore e tohungia ina whakawakia; ka whakapehepeha ia te ngakau tohu ki te whakawa.

14 ¶ He aha te pai, e oku tēina, ki te mea tetahi he whakapono tona, a kahore ana mahi? E taea ranei ia te whakaora e taua whakapono?

15 Na, ki te mea e noho tahanga ana tetahi teina, tuahine ranei, *ki te mea* ranei kua kore he kai māna mo tenei ra, mo tenei ra,

16 A ka mea tetahi o koutou ki a ratou, Haere marie, kia mahana kia makona; a kahore e hoatu e koutou ki a ratou nga mea e matea ana e te tinana; he aha te pai?

17 Waihoki ko te whakapono, ki te kahore ana mahi, he mea mate, ko ia anake hoki.

18 Na, he ki tenei ma tetahi,

He whakapono tou, he mahi aku: whakakitea mai ki a au tou whakapono motu ke i au mahi, a maku, ara ma aku mahi e whakakite atu toku whakapono ki a koe.

19 E whakapono ana koe kotahi tonu te Atua; e pai ana tau meatanga: e whakapono ana hoki nga rewera, me te wiri ano ratou.

20 Heoi e pai ana ranei koe kia mātau, e te kuare, he mea mate te whakapono ki te kahore he mahi?

21 Kihai ianei a Aperahama, to tatou matua, i tika i nga mahi, i a ia i whakaeke atu i tana tama, i a Ihaka, ki runga ki te āta?

22 Ka kite ranei koe i mahi tahi te whakapono me ana mahi, a na nga mahi i tino rite ai te whakapono?

23 A i rite ano ta te karai-piture e mea nei, I whakapono a Aperahama ki te Atua, a ka whakairia ki a ia hei tika: ka karangatia ano hoki ia he hoa aroha no te Atua.

24 Heoi ka kite koutou kei nga mahi he tika mo te tangata, a ehara i te mea kei te whakapono anake.

25 Waihoki ko Rahapa, te wahine puremu, kihai ianei ia i whakatikaia e nga mahi, i a ia i whakamanuhiri i nga karere, a tukua ana raua e ia ra tetahi ara ke?

26 Ka rite hoki ki te tinana ka mate nei ki te kahore te manawa, waihoki ko te whakapono, ki te kahore he mahi, he mea mate.

UPOKO 3.

Kei he te arero. 13 Ahua o te tangata pai.

KEI tokomaha koutou ki te whakaako, e oku tēina, e mātau ana hoki koutou rahi ake te he e tau ki a tatou.

2 He maha hoki nga mea e tapepa ai tatou katoa. Ki te kore tetahi e tapepa i te kupu, he tino tika tenei tangata, e taea ano e ia te paraire te tinana katoa.

3 Na, ka pangā nei e tatou nga paraire ki nga mangai o nga hoiho, kia rongo ai ratou ki a tatou; a pareparea ana e tatou to ratou tinana katoa.

4 Whakaaroa nga kaipuke, nga mea nui rawa nei, he mea aki nei e nga hau kaha, heoi e pareparea ana e te urungi nohinohi rawa, ki te wahi e hiahia ai te hinengaro o te kai urungi:

5 Waihoki ko te arero, he wahi nohinohi ia, nui atu hoki tona whakapehapeha. Nana, te nui o te wahie e whakaungia ana e te ahi nohinohi!

6 He kapura ano hoki te arero, ko te ao maori o te kino: pera tonu te arero i roto i o tatou wahi, poke iho i a ia te tinana katoa, ngiha ana i a ia nga mea katoa a te tangata; a he mea whakau ano ia na Kehena.

7 Nga tini tu kararehe hoki, nga manu, nga mea ngokingingoki, nga mea i te moana, e whakararatatia ana, i whakararatatia ano hoki i mua e te tangata:

HEMI 3, 4.

8 Ko te arero ia, e kore tena e taea e tetahi tangata te whakararata; he kino ia e kore e taea te pēhi, ki tonu i te wai whakamate.

9 Ko ta tatou mea ia hei whakapai i te Atua, i te Matua; ko ta tatou mea ano ia hei kanga i nga tāngata, i hangā kia rite ki te Atua.

10 Kotahi tonu te mangai puta ake ana i roto ko te manaki, ko te kanga. Ehara i te pai, e oku tēina, kia penei enei mea.

11 E pupū ake ana ranei i te puna ko te reka, ko te kawa, i roto i te poka kotahi?

12 E hua ranei he oriwa ma te piki, e oku tēina, he piki ranei ma te waina? e kore ano hoki e pupū ake i roto i te puna kotahi te wai tai me te wai reka.

13 ¶ Ko wai te tangata whakaaro nui, tangata mātau i roto i a koutou? ma tana whakahaere pai e whakaatu ana mahi, kei runga i te māhaki o te whakaaro nui.

14 Tena ko tenei he hae nanakia to koutou, he totohe i roto i o koutou ngakau, kua e whakamanamana, kua hoki e teka ki te pono.

15 Ehara tenei matauranga i te mea e heke iho ana i runga; no te whenua ia, no te ngakau maori, no te reuera.

16 I te wahi hoki e noho ai te hae me te totohe, ko reira ano te noho kino me nga mahi hē katoa.

17 Te matauranga ia o runga,

he mea kino kore i te tautahi, muri iho he rangimarie, he ngawari, he hohoro ki te whakarongo, ki tonu i te mahi tohu, i nga hua pai, kahore ana whiriwhiringa i te tangata, kahore ona tinihanga.

18 A e ruia ana nga hua o te tika i roto i te rangimarie ma te hunga hohou rongu.

UPOKO 4.

Nga hiahia taikaha. Te hae, aha, aha. 13 He tariko ahiahi tatou; kia tupato.

NO hea nga pakanga me nga ngangaretanga i roto i a koutou? he teka ianei no tenei, no o koutou hiahia e whawhai ana i roto i o koutou wahi?

2 E hiahia ana koutou, heoi kahore e whai rawa; e patu ana koutou, e minamina ana, a kahore e whiwhi: e ngangare ana, e whawhai ana, heoi kahore e whai rawa, no te mea kahore koutou e inoi.

3 E inoi ana koutou, a kahore e riro mai i a koutou, no te mea e inoi hē ana koutou, kia whakapaua ai ki o koutou hiahia.

4 E nga tāngata puremu, e nga wāhine puremu, kahore ianei koutou e mātau ko te arohakite ao, he hoariritanga ki te Atua? na, te tangata e hiahia ana kia meinga hei hoa aroha mo te ao, ka meinga ia hei hoa riri ki te Atua.

5 Ki ta koutou whakaaro he korero noa ranei ta te karai-piture? ara, Te hiahia o te wairua e noho nei i roto i a

HEMI 4, 5.

tatou, tona tukunga iho, he hae.

6 Nui atu ia tana homaitanga i te aroha noa: koia tana e mea nei, Ka pakeke te Atua ki te hunga whakapehapeha, na, ka homai e ia he aroha noa ki te hunga ngakau pāpaku.

7 Na, kia ngohengohe koutou ki ta te Atua. Turia atu te rewera, a ka oma ia i a koutou.

8 Whakatata atu ki te Atua, a ka whakatata mai ia ki a koutou. Horoia o koutou ringaringa, e te hunga hara: meinga o koutou ngakau kia hēkore, e te hunga ngakau-rua.

9 Kia pouri koutou, kia puta te aue, te tangi: kia puta ke to koutou kata hei aue, to koutou hari hei ahua whakapoururu.

10 Whakapāpaku koutou ki te aroaro o te Ariki, a māna koutou e whakateitei ake.

11 ¶ Kāti te ngautuara tetahi ki tetahi, e oku teina. Te tangata e ngautuara ana ki tona teina, e whakahe ana hoki i tona teina, e ngautuara ana ia ki te ture, e whakahe ana i te ture: a ki te whakahe koe i te ture, ehara koe i te kai mahi i te ture, engari he kai whakawa.

12 Kotahi tonu te kai whakatakoto ture, kei a ia te kaha hei whakaora, hei whakangaro: ko wai ra koe e whakahe na i tera atu?

13 ¶ Tena, e te hunga e mea nei, Hei aianei, hei apopo ka haere matou ki te pa ra, a ka

noho ki reira, kia kotahi tau, ka hohoko, ka whiwhi ki te taonga:

14 Kahore na hoki koutou e mātau ki nga mea o apopo. He aha hoki to koutou oranga? He kohu ra, he iti nei te wa e puta mai ai, na kua memeha atu.

15 Tē mea ra koutou, Ki te pai te Ariki, a ka ora matou, ka mea itenei mea, i tera mea ranei.

16 Tena ia koutou te whakamanamana na ki ā koutou kupu whakaputa: e kino ana taua whakamanamana katoa.

17 Na, te tangata e mātau ana ki te mea i te pai, a kahore e meatia e ia, he hara tera nona.

UPOKO 5.

Ki nga tangata taonga. 7 Kia manawanui. 12 Oati. 13 Mahi, ina pouri, ina hari. 16 Whaki he. 17 Nui o te inoi.

TENA, e te hunga taonga, e tangi koutou, e aue ki o koutou mate meāke nei puta mai.

2 Kua pirau o koutou taonga, kua kainga o koutou kakahu e te huhu.

3 Kua waikuratia to koutou koura me to koutou hiriwa; a ko te waikura o aua mea hei whakaatu i to koutou hē, hei kai hoki i o koutou kiko-kiko, ano he kapura. Kua pae na i a koutou he taonga mo nga ra whakamutunga.

4 Na, kei te karanga te utu i kaiponuhia e koutou ma nga kai mahi nāna i kokoti a kou-

tou māra, kua tae atu ano hoki nga karanga a nga kai kokoti ki nga taringa o te Ariki o nga mano tini.

5 Kua kai koutou i nga kai papai i runga i te whenua, whaia ana e koutou a te tinana whakaahuareka; atahaitia ana e koutou o koutou ngakau, me te mea ano, ko te ra okanga *tenei*.

6 Whakatakā ana e koutou ki te hē, patua iho te mea tika, kihai ano ia i pēhi atu i ta koutou.

7 ¶ Na, tatari marie koutou, e *oku* tēina, ki te haerenga mai o te Ariki. Na, tumanako tonu te kai ngaki ki nga hua utu nui o te whenua, he mea tatari marie atu nāna, kia tae mai ra ano to mua me to muri ua.

8 Tatari marie ano hoki koutou; kia u o koutou ngakau: kua tata hoki te haerenga mai o te Ariki.

9 Kaua e amuamu tetahi ki tetahi, e *oku* tēina; kei whakatakā koutou ki te hē: na, kei nga tatau te kai whakawa e tu ana.

10 Nga poropiti i korero nei i runga i te ingoa o te Ariki, waiho ratou, e *oku* tēina, hei tauira mo te whakamanawanui ki nga kino, mo te tatari marie.

11 Na, ki ta tatou e hari ana te hunga e whakamanawanui ana. Kua rongo koutou ki te manawanui o Hopa, kua kite hoki i ta te Ariki whakamutunga, i te nui o to te Ariki aroha, i tana mahi tohu.

12 ¶ Na, te tuatahi o nga mea katoa, e *oku* tēina, kaua te rangi, kaua te whenua, kaua tetahi atu oati e oatitia e koutou: engari me ae ta koutou ae, me kahore ta koutou kahore; kei taka koutou ki te whakahenga.

13 ¶ Ki te pāngia tetahi o koutou e te mamae, me inoi. Ki te koa te ngakau o tetahi, me waiata.

14 Ki te turorotia tetahi i roto i a koutou, me karanga e ia nga kaumātua o te hahi; a ma ratou e inoi ki runga ki a ia, me te whakawahi ano i a ia ki te hinu i runga i te ingoa o te Ariki:

15 A e ora te turoro i te inoi whakapono, ma te Ariki ano ia e whakaara ake; a ki te mea kua mahi hara ia, ka murua tona *hara*.

16 Whakina o koutou hē tetahi ki tetahi, me inoi ano koutou tetahi mo tetahi, kia ora ai o koutou mate. Nui atu te mana o te inoi kaha a te tangata tika.

17 He tangata a Iraia i rite tahi te ngakau ki o tatou, heoi, ka kaha nei tana inoi kia kaua e ua, kore ake he ua ki runga ki te whenua, a e toru nga tau, e ono nga mararama.

18 Inoi ana ano ia, a ka homai ano te ua e te rangi, na hua ana nga hua o te whenua.

19 ¶ E *oku* tēina, ki te kotiti atu tetahi o koutou i te pono, a ka meinga e tetahi kia tahuri mai ano,

I. PITA 1.

20 Kia mātau ia, na, te tangata i a ia he wairua kei mate, a he tini nga hara ka hipokina hara i te hē o tona ara, e ora e ia.

KO TE PUKAPUKA TUATAHI

A PITA

APOTORO KI NGĀ TĀNGATA KATOĀ.

UPOKO 1.

He whakapai. 10 He mea poropiti a Ihu no mua. 13 Na, kia u ki te pai; he mea hoko hoki koutou.

NA Pita, na te Apotoro a Ihu Karaiti, ki nga konene e noho manene ana ki Ponoto, ki Karatia, ki Kaparokia, ki Ahia, ki Pitinia,

2 He hunga kua oti te whiriwhiri, te pera ano me ta te Atua Matua i mātau ai i mua, i runga i te whakatapunga a te Wairua, kia ngohengohe, kia tauhiuhia ki nga toto o Ihu Karaiti: Kia whakanuia ki a koutou te aroha noa, me te rangimarie.

3 ¶ Kia whakapaingia te Atua, te Matua o to tatou Ariki, o Ihu Karaiti, nāna nei, na tana mahi tohu e nui nei, tatou i whanau hou ai ki te tumanakotanga ora, i a Ihu Karaiti ka ara ake nei i te hunga mate,

4 Ki te kāinga kahore ona pirau, kahore ona poke, e kore ano hoki e memeha, e puritia mai nei i te rangi mo koutou,

5 Mo te hunga e tiakina nei e te kaha o te Atua i runga i te whakapono, kia taea ra ano te whakaoranga kua rite noa ake nei, a ka whakakitea i te wa whakamutunga.

6 Nui atu to koutou koa ki tenei, ahakoa pouri, (ki te ai he pouri) i nga whakamatautauranga maha, he wa iti nei,

7 Mo te whakamatautauranga o to koutou whakapono, nui atu nei tona pai i to te koura e memeha nei, ae ra i te mea kua oti te whakamatautau ki te kapura, kia kitea tona tukunga iho, he whakamoemiti, he honore, he kororia, i te whakakitenga mai o Ihu Karaiti,

8 Kahore nei ia e kitea e koutou, heoi e arohaina ana e koutou; ahakoa kahore koutou e kite inaianei, heoi

I. PITA 1.

i a koutou ka whakapono nei ki a ia, nui atu te koa, he koa kororia, e kore e taea te korero :

9 I te mea ka whiwhi ki te tukunga iho o to koutou whakapono, ki te whakaoranga o nga wairua.

10 Taua whakaoranga, he mea ata rapu, he mea whakataki iho na nga poropiti i poropititia ai te aroha noa, ara tenei i a koutou nei :

11 I a ratou i rapu ko tehea wa, he wa pehea hoki, ta te Wairua o te Karaiti i roto i a ratou i whakapuaki ai, i a ia e whakaatu ana i mua i nga mamae o te Karaiti, i te kororia ano hoki o muri iho.

12 I whakakitea mai nei ano ki a ratou, ehara i te mea mo ratou ake, engari mo tatou, nga mea i minitatia ra e ratou, kua korerotia nei hoki ki a koutou inaianei e te hunga i kauwhautia ai te rongo pai ki a koutou, he meatanga na te Wairua Tapu i tonoa mai nei i te rangi. Hiahia tonu nga anahera ki te matakitaki ki aua mea.

13 ¶ Na whitikiria nga hope o o koutou hinengaro, kia mataara, tumanako atu, a taea noatia te mutunga, ki te aroha noa e kawea mai ki a koutou a te whakakitenga mai o Ihu Karaiti.

14 Kia rite ki nga tamariki ngohengohe ; kei rite te ahua ki nga hiabia o mua, i a koutou e kuare ana :

15 Engari kia rite ki te kai karanga i a koutou, e tapu

ana hoki ia, kia tapu ano hoki to koutou whakahaere katoa ;

16 Kua tuhituhia na hoki, Kia tapu koutou ; e tapu ana hoki ahau.

17 Na, i a koutou e karanga nei ki te Matua, ko ia nei hei whakawa mo te mahi a tenei, a tenei, kahore ano hoki āna whakapai kanohi, e noho i runga i te matakau i a koutou e noho manene nei :

18 Kia mahara, ehara nga mea pirau, te hiriwa, te koura, i te utu mo koutou, i puta mai ai i ā koutou ritenga tekateka i whakarereama engamātua ;

19 Engari he toto utu nui, me te mea no te reme kohakore, poke-kore, ara no te Karaiti.

20 I whakaritea nei i mua o te orokohanganga o te ao, a kua whakakitea mai nei i nga wa whakamutunga, he whakaaro hoki ki a koutou

21 Kua meinga nei e ia kia whakapono ki te Atua nāna nei ia i whakaara ake i te mate, a hoatu ana ki a ia he kororia ; kia whai whakapono ai koutou, kia whai tumana-kotanga ai ki te Atua.

22 Ka hē-kore nei i a koutou o koutou wairua, i a koutou ka meinga nei e te Wairua kia ngohengohe ki te pono, a kore iho he tinihanga o te aroha ki nga tēina, na kia nui te aroha o tetahi ki tetahi, kia ma ano hoki te ngakau :

23 He mea whanau hou hoki koutou, ehara i te mea no te purapura pirau, engari no te mea pirau kore, he mea-

I. PITA 1, 2.

tanga ki te kupu a te Atua, e ora nei, e u tonu nei, ake ake ake.

24 ¶ Rite tonu hoki ki te tarutaru nga kikokiko katoa; te kororia katoa ano hoki o te tangata, ano he puawai tarutaru. E maroke te tarutaru, e ngahoro tona puawai:

25 Ko te kupu ia a te Ariki, mau tonu ake ake. A ko te kupu ano tenei e kauwhautia nei ki a koutou.

UPOKO 2.

Pehia te ngakau maori; hiahiatia te kupu. 4 He whare ratou no te Karaiti. 11 Nga hiahia maori. 13 Kia ata noho. 18 Ki nga pononga, 20 ki te hunga e tukinotia ana.

NA whakarerea atu nga mauāhara katoa, nga hianga katoa, nga tinihanga, nga hae, me nga kupu ngautuara katoa,

2 Kia rite ki nga tamariki whanau hou, hiahiatia te waiu tinihanga-kore o te kupu, ko te mea hoki ia e tupu ai koutou:

3 Ki te mea kua whakama-
tautau koutou he tikanga ngawari to te Ariki.

4 To koutou haerenga mai ki a ia, ki te kohatu ora, i whakakahoretia nei e nga tāngata, he mea whiriwhiri ia na te Atua, he mea utu nui;

5 Ka hangā hoki koutou, ano he kohatu ora, hei whare, ara hei mea wairua, hei tohunga tapu, hei tapae atu i nga patunga tapu, ara i nga

mea wairua, he mea e manakohia ana e te Atua i runga i a Ihu Karaiti.

6 Mo reira tera wahi o te karaipiture, Na ka whakata-
kotoria e ahau ki Hiona te tino kamaka o te kokonga, he mea whiriwhiri, he mea utu nui, a, te tangata e whakapono ana ki a ia, e kore e whakama.

7 Ki a koutou e whakapono na he mea utu nui ia: ki te hunga whakapono-kore ia, te kamaka i kapea e nga kai hanga, kua meinga tenei hei upoko mo te kokonga,

8 Hei kamaka tūtukitanga waewae ia, hei toka whakahinga ki te hunga e tūtuki ana ki te kupu, ki te hunga whakapono-kore; i whakari-tea mai hoki ratou hei penei.

9 Ko koutou ia he whakapupuranga whiriwhiri, he tohunga, he kingi, he iwi tapu, he iwi kua riro pu mai; hei whakapuaki i nga pai o te kai karanga i a koutou i roto i te pouri ki tana māmama whakamiharo:

10 I mua chara i te iwi, inaianei ia he iwi na te Atua: kihai nei i tohungia i mua, inaianei ia kua tohungia.

11 ¶ E oku hoa aroha, ko taku whakahau atu tenei, he hunga noho noa, he konene hoki koutou, mawehe i nga hiahia kikokiko e whawhai nei ki te wairua;

12 Kia pai to koutou whaka-haere i roto i nga tauwiwi, mo ta ratou whakapae ki a koutou, he kai mahi koutou i te

I. PITA 2, 3.

kino, na kia whakakororia ratou i te Atua i te ra o te tirohanga mai, ina kite i ā koutou mahi pai.

13 ¶ Na kia ngohengohe koutou ki nga tikanga katoa a te tangata, he whakaaro ki te Ariki: ahakoa na te kingi, na te mea nui rawa;

14 Na nga kawana ranei, na te hunga i tonoa mai e ia hei whiu i nga kai mahi i te kino, hei whakamoemiti ia mo te hunga e mahi ana i te pai.

15 Ko ta te Atua hoki tenei i pai ai, kia ai a koutou mahi pai hei puru mo nga mangai kuare o nga tāngata whakaaro-kore:

16 He hunga ehara nei i te herehere, otiia e kore e waiho to koutou herekoretanga hei hipoki mo te mauāhara, engari kia rite ki nga pononga a te Atua.

17 Whakahonoretia nga tāngata katoa. Arohaina nga tēina nga tuākana. E wehi ki te Atua. Whakahonoretia te kingi.

18 ¶ E nga pononga, kia ngohengohe ki o koutou rangatira, kia nui te wehi; he teka ki te hunga pai, ki te hunga ngawari anake, ki te hunga whanoke ano hoki.

19 He mea whai whakapai-nga hoki tenei, ki te mea na te maharatanga ki te Atua ka whakamanawanui ai tetahi ki nga mea whakapouri, i a ia ano hoki e whakamaetia hētia ana.

20 He aha hoki te kororia, ki te mea ka whakamanawa-

nui i te mea kua hara koutou a ka motokia? tena ka whakamanawanui i te mea ka mahi pai a ka whakamamaetia, he mea whai whakapainga tenei ki te Atua.

21 I karangatia hoki koutou ki tenei: i whakamamaetia hoki a te Karaiti mo tatou, a waiho iho e ia hei taurira mo tatou, kia aru ai koutou i ona tapuae:

22 Kihai nei ia i mea i te hara, kahore ano hoki i kitea te tinihanga i tona mangai:

23 Ka taunutia, kihai ia i taunu atu; ka whakamamaetia, kihai ia i whakatuma; engari i tuku atu i a ia ki te kai whakarite tika o te whakawa:

24 Nāna ake i waha o tatou hara, na tona tinana ake, i runga i te rakau, kia whakapupaku ai tatou ki te hara, kia ora ai ki te tika: na ona karawarawa i ora ai o koutou mate.

25 I rite hoki koutou ki te hipi kua kotiti ke; heoi kua hoki tenei koutou ki te Hēpara, ki te Pihopa o o koutou wairua.

UPOKO 3.

Ki nga wahine. 7 Kinga tane.

8 *Kia kotahi. 13 Manawanui i runga i te pai. 19 Pai o ta Ihu ki nga tangata o mua.*

NGA wāhine, kia ngohe-ngohe ki a koutou tāne ake; a, ki te turi etahi ki te kupu, na, i kore i te kupu, ko te whakahaere o nga wāhine hei mea e riro mai ai ratou;

I. PITA 3.

2 I a ratou e titiro ana ki te hē-kore o to koutou whakahaere, ki te hopohopo.

3 Te whakapaipai mo koutou, kauaka hei to waho, *kauaka* hei te makawe i whiria, kauaka hei te whakapiritanga mai o nga mea koura, kauaka hei te whakakakahuranga o nga kakahu;

4 Engari hei te tangata ngaro o te ngakau, hei te *kakahu* e kore e pirau, ara hei te wairua māhaki, hei te *wairua* rangimarie, he mea utu nui hoki tenei i te aroaro o te Atua.

5 He penei hoki i mua ta nga wāhine tapu whakapaipai mo ratou, ta te hunga i whakaaro ki te Atua, ngohe-ngohe tonu ratou ki a ratou tāne ake;

6 Me Hera hoki i ngohe-ngohe ki a Aperahama, ko te ariki hoki tana ingoa mona: nāna hoki koutou tamariki, i a koutou e mahi pai ana, a kahore e matakū i tetahi whakapawera.

7 ¶ Me nga tāne ano hoki, kia rite ki to koutou matauranga to koutou noho ki a ratou, whakawhiwhia te wāhine ki te honore, ko te mea kaha-kore hoki ia, ka uru tahi nei ano hoki korua ki te oranga ka homai noa nei; he mea kei araia a korua inoi.

8 ¶ Na, te whakamutunga nei o *taku*, kia kotahi te whakaaro o te katoa, kia kotahi te ngakau, kia rite te aroha ki to te tuakana, ki to te

teina, kia pai te ngakau, kia ngawari:

9 Kaua e utua he kino ki te kino, he taunu ki te taunu: engari me manaaki; me te mahara ano kua karangatia koutou ki tenei, ara kia whiwhi koutou ki te manaakitanga.

10 Ki te mea hoki tetahi kia aroha ki te ora, kia kite i nga ra pai, me pēhi e ia tona arero kei kino, ona ngutu hoki kei korero tinihanga;

11 Me peka ke atu i te kino, me mahi pai; ko te rangimarie hei rapunga māna, hei whaingā atu māna.

12 No te mea hoki kei runga i te hunga tika nga kanohi o te Ariki, me ona taringa hoki ina inoi ratou: e hē mai ana ia te mata o te Ariki ki te hunga e mahi ana i te kino.

13 ¶ Ko wai hoki hei homai i te hē ki a koutou, ki te aru koutou i te pai?

14 Otiia, ki te mea na te whakaaro ki te tika i whakamamaetia ai koutou, ka hari koutou: aua ra e matakū ki ta ratou whakamatakū, aua e pawera;

15 Engari whakatapua te Ariki, te Atua, i roto i o koutou ngakau: a kia rite tonu te kupu i a koutou i nga wa katoa, hei whakahokinga ma koutou ki nga tāngata katoa e ui ana ki a koutou ki te mea e tumanakohia nei e koutou; kia māhaki ano ia te ngakau, kia wehi:

16 Kia pai o koutou hine- ngaro; mo ta ratou ngau-

I. PITA 3, 4.

tuara ki a koutou, he kai mahi koutou i te kino, kia whakama taua hunga e whakapae teka na ki to koutou whakahaere pai i roto i a te Karaiti.

17 Ki te mea hoki, i a tatou e mahi ana i te pai, ka takoto i te Atua he mamae mo tatou, erangi tera i te mamae i a tatou e mahi ana i te kino.

18 Kotahi hoki whakama-mactanga o te Karaiti mo nga hara, te tika mo te hē, kia arahina ai tatou e ia ki te Atua; i whakamatea ko te kikokiko, i whakaorangia ia ko te Wairua:

19 Ko tona ano tena i tona haerenga ki te kauwhau ki nga wairua i te whare herehere:

20 I turi ra i mua, i te mea e tatari ana te manawanui o te Atua i nga ra i a Noa, i te mea e hangā ana te āka, te mea i ora ai etahi wairua torutoru nei, ara tokowaru, he meatanga ki te wai.

21 He mea whakarite ki tenei te mea e whakaora nei i a tatou inaianei, ara te iriiri, (ehara i te whakarenga atu i te poke o te kikokiko, engari he whakaae-nga ake na te hinengaro pai ki te Atua,) he meatanga ki te aranga mai o Ihu Karaiti,

22 Kua riro nei ki te rangi, a kei te ringa matau ia o te Atua; kei raro ano i a ia nga anahera, nga rangatiratanga, nga kaha.

UPOKO 4.

Whakarerea nga mahi o mua.
12 *Whakamarie mo te tuki-notanga.*

NA kua mamae nei o te Karaiti kikokiko mo tatou, e mau koutou ki nga mea whawhai, ara ki taua whakaaro pu na ano: te tangata hoki kua mamae te kikokiko kua mutu te hara;

2 Mo te wa e toe nei o te noho ki te kikokiko, kia kua i runga i nga hiahia o te tāngata, engari i ta te Atua i pai ai.

3 Kāti hoki mo tatou ko te wahi o to tatou orange kua pahemo nei, hei mahinga ma tatou i ta nga tauwi i pai ai, i a tatou i haere i runga i nga hiahia taikaha, i nga minaminatanga, i nga haurangitanga waina, i nga kakainga, i nga inumanga, i nga kara-kia whakarihariha ki nga whakapakoko:

4 He hanga hou tenei ki a ratou, ara to koutou kore e rere tahi, e torere ki taua kino: a kino iho a ratou korero:

5 Me korero e ratou a ratou mahi ki te Kai whakawa mo te hunga ora, mo te hunga mate, kua rite noa ake hoki tāna.

6 Mo konei ra i kauwhautia ai te rongo pai ki te hunga ano hoki kua mate, hei whakaheanga hoki ratou, ara te kikokiko ma te tangata, kia ora ia ratou, ara te wairua i runga i ta te Atua.

I. PITA 4, 5.

7 ¶ Heoi, kua tata te whakamutunga o nga mea katoa: na, kia whai whakaaro koutou, kia mataara, kia inoi.

8 Na, i te tuatahi o nga mea katoa, arohaina putia koutou e koutou ano: he tini hoki nga hara ka hipokina e te aroha.

9 Whakamanuhiritia tetahi e tetahi; kua e amuamu.

10 Te mea kua riro noa mai i tetahi, i tetahi, meatia atu ano e koutou ma tetahi, ma tetahi, kia rite ki ta nga tuari pai o nga homaitanga maha a te Atua.

11 Ki te korero tetahi, kia rite ki ta nga kupu a te Atua; ki te minita tetahi, hei to te kaha e homai ana e te Atua: kia whai kororia ai te Atua i nga mea katoa i roto i a Ihu Karaiti; kei a ia te kororia me te mana, ake ake ake. Amine.

12 ¶ E oku hoa aroha, kua e kiia he hanga hou te tahu-nga i roto i a koutou, hei whakamatautau i a koutou; kei ki he mea hou tenei kua pa ki a koutou:

13 Engari ka uru nei koutou ki nga mamae o te Karaiti, kia hari koutou; he mea hoki e hari ai koutou, whakamana-mana rawa, i te whakakitenga mai o tona kororia.

14 Ki te tawaia koutou mo te ingoa o te Karaiti, ka hari koutou; no te mea e tau ana te Wairua o te kororia, ara to te Atua, ki runga ki a koutou: ta ratou mona he korero kino,

ta koutou mona he whakakororia.

15 Kaua ia tetahi o koutou e whakamamaetia mo te mahi patu tangata, mo te tahae, mo te mahinga i te kino, mo te pokanoa ki ta tera meatanga.

16 Ki te whakamamaetia ia tetahi mo te ki he Karaitiana ia, kaua ia e whakama; engari hei mea tenei e whakakororia ai ia i te Atua.

17 Ko te wa hoki tenei e timata ai te whakarite whakawa ki te whare o te Atua: a, ki te mea kei a tatou te tuatahi, he pehea ra te whakamutunga ki te hunga e kore e tahuri ki te rongo pai o te Atua?

18 A ki te mea ka ora noa te tangata tika, kei hea he putanga mo te tangata karakia-kore, mo te tangata hara?

19 Na, te hunga kua pai nei te Atua kia whakamamaetia ratou, me tuku e ratou o ratou wairua ki a ia, ara ki te Kai hanga pono, me te mahi ano ia i te pai.

UPOKO 5.

Ki nga kaumatua. 5 Ki nga taitamariki. 8 Hei hoia ratou. 12 Mihi.

HE whakahau tenei naku ki nga kaumatua i roto i a koutou, he hoa kaumatua hoki ahau, he kai whakaatu mo nga mamae o te Karaiti, a kua whiwhi tahi nei ki te kororia e whakakitea mai i muri:

2 Whangainga te kahui a te Atua i roto i a koutou; kua e ngakau-kore ina tirotiro,

I. PITA 5.

engari kia hihiko; kaua e waiho i runga i te taonga hē, engari i te ngakau nui;

3 Kaua ano hoki e whakapupu rangatira ki *ta te Atua* wahi, engari hei tauira koutou ki te kahui.

4 A ka puta mai te tino Hepara, ka whiwhi koutou ki te karauna kororia e kore e pirau.

5 ¶ Me koutou ano hoki, e nga taitamariki, kia ngohengohe ki nga kaumatua, Kia ngohe-ngohe ano hoki koutou katoa tetahi ki tetahi, ko te ngakau pāpaku ano hei kakahu mo koutou: no te mea hoki e pakeke ana te Atua ki te hunga whakapehapeha, a ka homai e ia he aroha noa ki te hunga pāpaku.

6 Na, whakapāpaku iho koutou i raro i te ringaringa kaha o te Atua, kia whakateiteitia ake ai koutou e ia a te wa e pai ai:

7 Makā atu o koutou manukanuka katoa ki runga ki a ia; e whakaaro ana hoki ia ki a koutou.

8 Kia mataara, kia matapopore; kei te haereere hoki to koutou hoa-whawhai, te rewera, ano he raiona e nge-ngere ana, e rapu ana i te tangata hei horomanga māna:

9 Kia u ki te whakapono, ka tu atu ai ki a ia; me te mahara ano ka rite aua mamae nei ano i o koutou tēina i te ao.

10 Na, ma te Atua o nga mahi aroha noa katoa, i karangatia ai tatou ki tona kororia mutunga kore i roto i a Karaiti Ihu, kia oti koutou te whakamamae i *tenei* wa iti nei, māna koutou e mea kia tino rite, māna e whakau, māna e whakakaha, māna e whakapumau.

11 *Waiho* atu i a ia te kororia me te kaha, ake ake ake. Amine.

12 ¶ Kua tuhituhia atu nei e ahau *etahi kupu* torutoru, hei maunga ma Hirawanu; he teina pono ia no koutou, ki toku whakaaro: he whakahau atu tenei, he whakaatu naku, ko te tino aroha noa tenei o te Atua e tu nei koutou.

13 Tenei te oha atu nei ki a koutou *te hahi* i Papurona, i whiriwhiria ngatahitia nei koutou; me taku tamaiti ano hoki, me Maka.

14 Oha atu tetahi ki tetahi, hei te kihi aroha ano. *Kia tau* te rangimarie ki a koutou katoa i roto i a Karaiti Ihu. Amine.

KO TE PUKAPUKA TUARUA

A PITA

APOTORO KI NGĀ TĀNGATA KATOĀ.

UPOKO 1.

5 *Me whai kia tino u ki te ora.* 12 *Ka tata ia te mate.*
16 *Kahore e ruarua tana whakaaro ki a Ihu.*

NĀ Haimona Pita, na te pononga, na te apotoro a Ihu Karaiti, ki te hunga kua whiwhi tahi nei tatou ki te whakapono utu nui, i runga i te tika o to tatou Atua, o Ihu Karaiti, o te Kai whakaora.

2 Kia whakanuia te aroha noa me te rangimarie ki a koutou, i runga i te matauranga ki te Atua, ki a Ihu hoki, ki to tatou Ariki.

3 Kua homai nei hoki e tona kaha Atua ki a tatou nga mea katoa mo te ora, mo te karakia pai, i te mea ka mātau nei ki te Kai karanga i a tatou i runga i te kororia, i te pai:

4 Na enei hoki i riro mai ai i a tatou nga kupu whakaari, he mea nui whakaharahara, he mea utu nui; ma enei hoki koutou ka whiwhi ai ki te ahua Atua, i a koutou ka mawhiti mai nei i te pirau i te ao, ara i to te hiahia.

5 Mo reira nei hoki, me whakapau rawa o koutou uaua, a honoa iho te pai ki runga ki to koutou whakapono; ki runga hoki ki te pai ko te matauranga;

6 Ki runga ki te matauranga ko te pēhi i te hiahia; a ki runga ki te pēhi i te hiahia ko te manawanui; ki runga ki te manawanui ko te karakia pai;

7 Ki runga ki te karakia pai ko te atawhai ki nga tēina; ki runga ki te atawhai ki nga tēina ko te aroha.

8 Ki te mea hoki kei a koutou enei mea, a e nui ana, ka meinga koutou kia kaua e mangere, kia kaua e hua-kore i runga i te matauranga ki to tatou Ariki, ki a Ihu Karaiti.

9 Te tangata hoki kahore nei i a ia enei mea, he matapo, he atarua, kua wareware ki te horoinga o ona hara o mua.

10 Mo konei, e oku tēina, kia puta o koutou uaua ki te whakapumau i to koutou karangatangā, i to koutou whiriwhiringa: ki te penei hoki ta

II. PITA 1, 2.

koutou mahi e kore rawa koutou e tapepa:

11 Penei hoki ka whiwhi nui koutou ki te tapokoranga ki te rangatiratanga mutunga-kore o to tatou Ariki, ara o te Kai whakaora, o Ihu Karaiti.

12 ¶ Mo reira ano e kore ahau e mangere ki te whakamahara tonu i a koutou ki enei mea, e mātau ana raia koutou, kua oti ano te whakau ki runga ki tenei mea pono.

13 Ki toku whakaaro hoki, i a au e noho ana i tenei tapenakara, he mea tika ano kia whakaoho ahau i a koutou, kia whakamahara;

14 E mohio ana hoki ahau, e kore e wheau ka mahue *tenei* tapenakara oku, ka pera ano me ta to tatou Ariki, me ta Ihu Karaiti i whakakite mai ai ki a au.

15 Ka puta ano hoki toku uaua kia mau tonu to koutou mahara ki enei mea i muri i toku haerenga atu.

16 Ehara hoki i te mea he whai ta matou i nga kupu i titoa e te whakaaro tinihanga, i te whakapuakanga o te kaha me te haerenga mai o to tatou Ariki, o Ihu Karaiti ki a koutou; engari he kai titiro ano matou ki tona nui.

17 I riro hoki he honore, he kororia i a ia, he mea na te Atua Matua, i te putanga mai o taua reo ki a ia i roto i te kororia nui rawa, Ko taku Tama tenei i aroha ai, ko taku i ahuaireka ai.

18 I rongo ano matou ki

tenei reo e puta mai ana i te rangi, i a matou i tona taha i runga i te maunga tapu.

19 Te kupu poropiti ano hoki, nui atu te u ki a tatou inaianei; pai tonu ki te anga ta koutou whakaaro ki reira, he rama hoki e tiaho ana i te wahi pouri, kia puao ra ano te ra, kia ara ra ano te whetu o te ata i roto i o koutou ngakau:

20 Ko tenei ta koutou e mohio ai i te tuatahi, kahore he poropititanga o te karaipiture nona ake *ona* tikanga.

21 Ehara hoki i te mea na te tangata i pai ake i puta mai ai te poropititanga i mua, engari he mea whakamahara na te Wairua Tapu i korero ai nga tāngata tapu a te Atua.

UPOKO 2.

Nga kai whakaako he, 7 Ka rite ki era i a Noa, i a Rota.

10 To ratou ahua.

NA, he poropiti teka ano i mua i roto i te iwi, he pera ano me nga kai whakaako teka e puta ake a mua i roto i a koutou; ma enei e mau puku mai nga titorehanga whakangaro, he whakakahore na ratou i te Ariki i hokona ai ratou, a he mea hohoro tonu te whakangaromanga e takina iho e ratou ki a ratou ano.

2 He tokomaha ano hoki e aru i ta ratou tikanga taikaha; ma enei ano te ara o te pono ka korerotia kinotia ai.

3 He apo moni hoki e tito kupu ai ratou kia whai taonga ai ratou i a koutou: nonama-

II. PITA 2.

ta te tukunga mo ratou ki te hē, e kore ano e whakaroa; kahore hoki he moe o to ratou whakangaromanga.

4 Na, kihai nei i tohungia e te Atua nga anahera i hara, engari i peia *ratou* e ia ki te po, he mea herehere i te pouri, he mea tiaki mo te whakawakanga;

5 A kihai i tohungia te ao tawhito, he mea tiaki ia nāna a Noa, te tokowaru, te kai kauwhau i te tika, i tana kawenga mai i te waipuke ki te ao o te hunga karakia-kore;

6 Nga pa ano hoki, a Horoma, a Komora, pungarehu rawa i a ia, tana whakatau-nga hē he hurihanga, waiho iho hei tohu ki te hunga e noho karakia-kore i nga wa i muri;

7 Ko Rota ia, ko te tangata tika, whakaorangia ake e ia, i a ia e whakapouritia ana e te ritenga taikaha o te hunga kino;

8 I taua tangata tika e noho ana i roto i a ratou, mamae ana tona ngakau tika i a *ratou* mahi kino, i tana i kite ai, i tana i rongo ai, i tenei ra, i tenei ra:

9 Mātau tonu te Ariki ki te whakaora i te hunga karakia i roto i te whakamatautauranga, kia waiho ano hoki te hunga hē mo a te ra whakawa whiua ai:

10 Tera rawa ia tana mo te hunga e whai ana i ta te kīkōkiko, e haere ana i runga i te hiahia poke, e whakaha-wea ana ki te rangatiratanga: he hunga hikaka, e whai ana

i ta ratou ake; kahore hoki e wehi ki te korero kino ki nga tāngata nunui.

11 Na, nga anahera, he nui rawa nei te kaha, te mana, kahore e puaki i enei he kupu kino mo ratou i te aroaro o te Ariki ina whakawa.

12 Ko era ia, rite tonu ratou ki te kararehe kahore nei he whakaaro, he mea maori ana-ke, i hangā nei hei hopukanga, hei whakangaromanga, korero kino ana ratou ki nga mea kahore nei e mohiotia e ratou; a ka ngaro i runga i to ratou tikanga pirau;

13 Ka whiwhi ki te utu o te hē i a ratou e ahua-reka nei ki te kakai awatea. He ira *ratou*, he whakaheanga mai, e kai ana i nga mea papai i runga i a ratou mahi tinihanga, i a ratou e hakari tabi ana me koutou;

14 O ratou kanohi, kī tonu i te puremu; kahore hoki e mutu to ratou hara; e poaina ana e ratou nga hinengaro kahore i u: he ngakau to ratou kua oti te whakamahi ki te apo; he tamariki kua oti te kanga:

15 Mahue ake i a ratou te ara tika, kotiti ke ana ratou, whai tonu ai i te ara o Parāama *tama* a Pohora, i whakapai nei ki te utu o te hē;

16 Otira i riria ano ia mo tona hē: i korero te kararehe reo-kore, no te tangata ano te reo, a pēhia ana e ia te wairangi o te poropiti.

17 He puna wai-kore enei tāngata, he kapua e akina ana e te tūpuhi; pouri kere-

II. PITA 2, 3.

kere te wahi kua rite mo ratou, mo ake tonu atu.

18 Tetera rawa hoki, he mea teka noa a ratou korero, e poaina ana e ratou ki nga hiahia o te kikokiko, ki nga hiahia taikaha, te hunga kua mawhiti rawa i roto i te hunga e noho ana i te hē.

19 He here-kore ta ratou e whakaari nei ki a ratou, *heoi* he pononga ratou na te pirau : ki te taea hoki te tangata e te *hoa-riri*, hei pononga ia mana.

20 Ka mawhiti mai ratou i nga poke o te ao, i a ratou ka mātau nei ki te Ariki, ara ki te Kai whakaora, ki a Ihu Karaiti, na, ki te mau ratou, a hinga rawa i aua mea, kino noa atu to ratou whakamutunga i te timatanga.

21 Erangi hoki te kore e mātau ki te ara o te tika ; he kino rawa ia te mātau, me te tahuri ke atu ano i te ture tapu kua tukua nei ki a ratou.

22 Heoi te tukunga iho ki a ratou, rite tonu ki ta te whakatauki pono, Kua hoki te kuri ki tona ruaki ; me tenei, Te poaka i horoia, ki tona tita-katakanga i te paru.

UPOKO 3.

Ahako roa, e tae mai ano a Ihu. 8 Manawanui o te Atua inaianei. 10 Mutunga o te ao. 14 To te ariki manawanui hei whakaoranga.

KO te rua tena o aku pukapuka, e oku *hoa* aroha, ka tuhituhia atu na ki a koutou ; hei whakaoho i o koutou

hinengaro tinihanga-kore kia mahara :

2 Kia mahara ai koutou ki nga kupu i korerotia i mua e nga poropiti tapu, ki ta matou hoki, ki ta nga apotoro a te Ariki, a te Kai whakaora :

3 Ko tenei ta koutou e mātau ai i te tuatahi, tera e puta mai etahi kai whakamanu-manu a nga ra whakamutunga, e haere ana i runga i nga ritenga o o ratou hiahia ake,

4 E mea ana, Kei hea te korero o tona haerenga mai ? mau tonu hoki nga mea katoa no te moenga ra ano o nga mātua, pera tonu me to te orokohanganga.

5 E pai ana hoki ratou kia kuare ki tenei, na te kupu a te Atua nga rangi i mua, me te whenua ano, totoka tonu i roto i te wai, na te wai ano hoki.

6 Na enei i ngaro ai te ao o tera wa, he hurihanga e te wai.

7 Ko nga rangi onaianei ia me te whenua, he mea rongoa na taua kupu ra ano, he mea waiho marire mo te ahi, ina taea te ra e whakaritea ai te whakawa, e whakangaromia ai nga tāngata karakia kore.

8 ¶ Na kei kuare koutou, e oku *hoa* aroha, ki tenei mea kotahi, ki ta te Ariki he ra kotahi, rite tonu ki nga tau kotahi mano, a, nga tau kotahi mano, rite tonu ki te ra kotahi.

9 Kahore he whakaroa o te Ariki ki tana kupu whakaari, e kore e rite ki ta etahi e ki

II. PITA 3.

nei he whakaroa; engari e manawanui ana ki a tatou, kahore ana whakaaro mo te tangata kia ngaro; engari kia tae katoa ki te ripe-neta.

10 E puta hoki te ra o te Ariki, ano he tahae i te po; ko reira pahemo atu ai nga rangi, tona nui hoki o te tangi; na ka ngiha nga mea timatanga i te ahi, ka rewa; a pau ake i te ahi te whenua me ana mahi.

11 Na, mo te rewa nei enei mea katoa, kia pehea ra he tikanga mo koutou i runga i te whakahaere tapu, i te kara-kia;

12 Me te tumanako atu, me te takare atu ano koutou ki te taenga mai o te ra o te Atua, e rewa ai nga rangi i te ahi, e ngiha ai nga mea timatanga, e memeha ai?

13 Heoi kei te tumanako atu tatou ki nga rangi hou, ki te whenua hou, ki tana i whakaari mai ai, kei reira te tika e noho ana.

14 ¶ Mo konei ra, e *oku hoa* aroha, i a koutou ka tumanako na ki enei mea, kia

puta o koutou uaua kia roko-hina e ia i runga i te rangi-marie, tē whai ira, tē whai koha.

15 Kia mahara ano ki te manawanui o to tatou Ariki, he whakaora; ko te mea hoki ia i tuhituhia ki a koutou e to tatou teina aroha, e Paora, he mea i rite tonu ki te matauranga kua homai nei ki a ia;

16 I pera ano i ana puka-puka katoa, i korerotia hoki enei mea ki reira; kei reira ano hoki etahi mea e pakeke ana ki te whakaaro, whakawiria ketia ake e te hunga kuare, e te hunga kahore ano i u; ko ta ratou hanga ano ia ki era atu karaipiture, a ngaro iho ratou.

17 Na, e *oku hoa* aroha, ka mātau wawe nei koutou, kia tupato kei kahakina atu koutou e te hē o te hunga kino, kei taka atu, kei kore e u.

18 Engari kia neke ake i runga i te aroha noa, i te matauranga ki to tatou Ariki, ara ki te Kai whakaora, ki a Ihu Karaiti. *Waiho atu i a ia te kororia aianei a ake tonu atu. Amine.*

KO TE PUKAPUKA TUATAHI

A HOANI

APOTORO KI NGĀ TĀNGATA KATOĀ.

UPOKO 1.

A ratou korero mo Ihu, ehara i te mea i rangona ki te tangata. 3 Ka whakahoatia nei ki a ia, 5 kia pai. 8 Kia kitea te pono o ta tatou.

TE mea o te timatanga, ta matou i rongo ai, ta o matou kanohi i kite ai, ta matou i titiro atu ai, ta o matou ringaringa i whāwhā atu ai, nga mea o te Kupu o te ora;

2 (I whakakitea mai hoki te ora, a kite ana matou, na ka whakaatu nei, ka kauwhau nei ki a koutou i te ora tonu, i tera i te Matua i mua, a kua whakakitea mai nei ki a matou;)

3 Ko ta matou ra i kite ai, i rongo ai, e kauwhautia atu nei e matou ki a koutou, kia whakahoatia ai koutou ki a matou: na, to tatou whakahoatanga kei te Matua, kei tana Tama hoki, kei a Ihu Karaiti.

4 Na ka tuhituhia atu nei enei mea e matou ki a koutou, kia tino nui ai to koutou hari.

5 ¶ Ko te korero ano tenei i rongo ai matou ki a ia, a ka korerotia atu e matou nei ki a koutou, na, he māramatanga te Atua, kahore rawa hoki he pouri i a ia.

6 Ki te mea tatou e whakahoā ana tatou ki a ia, me te haere ano tatou i te pouri, e korero teka ana tatou, ehara hoki i te pono ta tatou e mahi nei:

7 Ki te haere ia tatou i te mārama, me ia hoki e noho nei i te mārama, na, ka whakahoā tatou tetahi ki tetahi, a e horoia ana o tatou hara katoa e nga toto o Ihu Karaiti, o tana Tama.

8 Ki te mea tatou kahore o tatou hara, e whakapohēhē ana tatou i a tatou ano, a kahore te pono i roto i a tatou.

9 Ki te whaki tatou i o tatou hara, e pono ana ia, e tika ana, a ka murua e ia o tatou hara, ka horoia hoki o tatou hē katoa.

10 Ki te mea tatou kahore tatou i hara, ka meinga ia he kai korero teka, a kahore tana kupu i roto i a tatou.

I. HOANI 2.

UPOKO 2.

Te whakamarietanga ina he.

3 *Tohu e mohiotia ai te whakaponotika.* 7 *Tatatau e aroha ai.* 18 *Kei tinihangatia.* 20 *Te mea e u ai.*

E AKU tamariki nonohi, ka tuhituhi atu nei ahau i enei mea ki a koutou, kia kua ai koutou e hara. A ki te hara tetahi, he kai korero mo tatou kei te Matua, ko Ihu Karaiti, ko te tika:

2 Ko ia ano te whakamarietanga mo o tatou hara: ehara i te mea mo o tatou anake, mo te ao katoa ano hoki.

3 Ma konei hoki tatou ka mātau ai kua mātau tatou ki a ia, ki te puritia e tatou ana ture.

4 Ki te mea tetahi, Kua mātau ahau ki a ia, a kahore e pupuri i ana ture, he tangata teka ia, a kahore te pono i roto i a ia.

5 Te tangata e pupuri ana i tana kupu, kua tino rite pu i a ia te aroha o te Atua: ma konei tatou ka mātau ai kei roto tatou i a ia.

6 Te tangata e mea ana e noho ana ia i roto i a ia, ko te tikanga tenei mona, ko tona haere kia rite ki to tera haere.

7 ¶ E oku teina, ehara taku i te ture hou ka tuhituhia atu nei e ahau ki a koutou, engari ko te ture tawhito, ko tera i a koutou o te timatanga iho ra ano. Te ture tawhito, ko

te kupu i rongo ai koutou no te timatanga iho ra ano.

8 *Tenei* ano he ture hou e tuhituhia atu nei e ahau ki a koutou; he mea pono i tana, i ta koutou, e pahemo ana hoki te pouritanga, a ko te mārama pono tenei te whiti nei.

9 Te tangata e mea ana kei te mārama ia, a e mauāhara ana ki tona teina, kei roto ano ia i te pouri a taea noatia tenei ra.

10 Te tangata e aroha ana ki tona teina, e noho ana ia i roto i te mārama, kahore hoki he tūtukitanga waewae i roto i a ia.

11 Te tangata ia e mauāhara ana ki tona teina, kei te pouri ia, e haere ana ia i roto i te pouri, kahore hoki ona matauranga e haere ana ranei ia ki hea, no te mea kua matapotia ona kanohi e te pouri.

12 ¶ Ka tuhituhi atu nei ahau ki a koutou, e nga tamariki nonohi, no te mea kua murua o koutou hara, he whakaaro hoki ki tona ingoa.

13 Ka tuhituhi atu nei ahau ki a koutou, e nga mātua, no te mea kua mātau koutou ki a ia, ara, ki to te timatanga. Ka tuhituhi atu nei ahau ki a koutou, e nga taitamariki, no te mea kua hinga i a koutou te wairua kino. Ka tuhituhi atu nei ahau ki a koutou, e nga tamariki nonohi, no te mea kua mātau koutou ki te Matua.

14 I tuhituhi atu ai ahau ki a koutou, e nga mātua, no te

I. HOANI 2.

mea kua mātau koutou ki a ia, ara ki to te timatanga. I tuhituhi atu ai ahau ki a koutou, e nga taitamariki, no te mea e kaha ana koutou, a e mau ana te kupu a te Atua i roto i a koutou, kua hihga ano hoki i a koutou te *wai-rua* kino.

15 Kua e aroha ki te ao, kua ano hoki ki nga mea o te ao. Ki te aroha tetahi ki te ao, kahore te aroha o te Matua i roto i a ia.

16 Na, nga mea katoa i te ao, te hiahia o te kikokiko, te hiahia o nga kanohi, me te whakapehapeha ki nga rawa, ehara i te Matua, engari no te ao.

17 Ka pahemo atu ano te ao, me tona hiahia: tena ko te tangata e mea ana i ta te Atua e pai ai, e noho tonu ana ia a ake ake.

18 ¶ E nga tamariki nonohi, ko te taima whakamutunga tenei: a ka rite ki ta koutou i rongo ai e haere mai ana te anatikaraiti; na, kua tokomaha nei nga anatikaraiti; ma konei tatou ka mātau ai ko te taima whakamutunga tenei.

19 I haere atu ratou i roto i a tatou, ehara ia i te mea no tatou ratou; mehemea hoki no tatou ratou, kua noho tonu ki a tatou: otiia *he mea tenei* kia whakakitea ai ratou katoa, ehara i a tatou.

20 Na, he whakawahinga ano to koutou na te Mea Tapu; e mātau ana ano hoki koutou ki nga mea katoa.

21 Ehara i te mea i tuhituhi atu ai ahau ki a koutou no te mea kahore koutou e mātau ki te pono, engari no te mea e mātau ana koutou, no te mea hoki kahore he teka i puta ake i te pono.

22 Ko wai koia te tangata teka? he teka ianei ko te tangata e mea ana, Ehara a Ihu i a te Karaiti? Ko te anatikaraiti tenei, ko te tangata e whakakahore ana ki te Matua, ki te Tama.

23 Nga tangata katoa e whakakahore ana ki te Tama, kahore te Matua i a ratou: te tangata e whakaae ana ki te Tama, kei a ia ano hoki te Matua.

24 Na kia mau ki roto ki a koutou ta koutou i rongo ai no te timatanga ra ano. Ki te mea ka mau i roto i a koutou ta koutou i rongo ai no te timatanga ra ano, e mau ano koutou i roto i te Tama, i roto ano hoki i te Matua.

25 Ko te mea ano hoki tenei i whakaaria mai nei e ia ki a tatou, ko te oranga tonutanga.

26 I tuhituhia atu e ahau enei mea ki a koutou, mo te hunga e whakapohehe ana i a koutou.

27 Otiia e mau ana ano i roto i a koutou tana whakawahinga kua riro mai na i a koutou: kahore hoki o koutou mea e whakaakona ai koutou e tetahi: na, te whakawahinga e whakaako na i a koutou ki nga mea katoa, pono tonu, kahore hoki he teka, kia rite ra ki tana i

I. HOANI 2, 3.

whakaako ai i a koutou to koutou mau ki roto ki a ia.

28 Na, inaianei, e nga tamariki nonohi, kia mau ki roto ki a ia; kia whai maiatanga ai tatou ina puta mai ia, kei whakama hoki ki a ia ina tae mai ia.

29 Ki te mātau koutou e tika ana ia, ka mātau koutou he whanau nāna nga tāngata katoa e mea ana i te tika.

UPOKO 3.

To te Atua aroha ki a tatou.

3 *Na, kia mau ki ana ture;*

11 *Ki te aroha ano hoki.*

KIA kite koutou i te tika-nga o te aroha i homai nei e te Matua ki a tatou, ara kia karangatia tatou ko nga tamariki a te Atua! koia te ao tē mātau ai ki a tatou, kahore hoki i mātau ki a ia.

2 E nga *hoa* aroha, he tamariki tatou na te Atua inaianei; a kahore ano i kitea noatia he aha ranei tatou a mua: otira e mohio ana tatou, ka puta mai ia, ka rite tatou ki a ia; ka kite hoki tatou i a ia, a ia ake ano.

3 Na, ki te mea kei tetahi tenei tumanako ki a ia, ka tahia atu e ia ona hē, kia rite ai ki a ia e hē-kore nei.

4 Te tangata e mea ana i te hara, he takahi tāna i te ture: he takahi hoki te hara i te ture.

5 E mātau ana ano koutou i whakakitea mai ia hei whakakahore i o tatou hara; ka-

hore ano hoki he hara i roto i a ia.

6 Te tangata e mau ana i roto i a ia, e kore e hara: nga tāngata katoa e hara ana, kahore i kite i a ia, kahore ano hoki ratou i mātau ki a ia.

7 E nga tamariki nonohi, kei whakapohēhētia koutou e tetahi: te tangata e mea ana i te tika, he tika ano ia, pera hoki me tera e tika ana.

8 Te tangata e mea ana i te hara, no te rewera ia; he hara hoki to te rewera no te timatanga ra ano. Mo konei te Tama a te Atua i whakakitea mai ai, kia whakakahoretia ai e ia nga mahi a te rewera.

9 Te tangata kua whanau i te Atua e kore e mea i te hara; no te mea e mau ana tana purapura i roto i a ia: a e kore e ahei i a ia te hara, no te mea kua whanau ia i te Atua.

10 Ma konei ka kitea ai nga tamariki a te Atua, me nga tamariki a te rewera: te tangata e kore e mahi i te tika, ehara ia i te Atua, me ia ano hoki e kore e aroha ki tona teina.

11 Ko te korero hoki tenei i rongo ai koutou i te timatanga, kia aroha tatou tetahi ki tetahi.

12 Kaua ra e pera me Kaina; no te *wairua* kino nei ia, a kohurutia ana e ia tona teina. A na te aha ia i kohuru ai i a ia? Na te mea i kino ana mahi, a ko a tona teina i tika.

13 ¶ Kaua e miharo, e oku

I. HOANI 3, 4.

tēina, ki te kino te ao ki a koutou.

14 E mātau ana tatou kua whiti tatou i te mate ki te ora, no te mea e aroha ana tatou ki nga tēina. Te tangata kahore e aroha ki te teina, e noho ana ia i roto i te mate.

15 Te tangata e mauāhara ana ki tona teina, he kai patu tangata ia: a ka mātau koutou, na, te kai patu tangata kahore he orange tonutanga e mau ana i roto i a ia.

16 Na konei tatou i mātau ai ki te aroha, i tuku hoki ia i a ia kia mate mo tatou: a e tika ana kia tukua tatou e tatou ano ki te mate mo nga tēina.

17 Na, te tangata i a ia nei nga orange o tenei ao, a ka kite e matea ana tetahi mea e tona teina, na, ka tutakina iho e ia tona ngakau aroha ki a ia, e mau pehea ana te aroha o te Atua i roto i a ia?

18 E aku tamariki nonohi, kua e waiho ma te kupu, ma te arero, te aroha; engari ma te mahi, ma te pono.

19 Ma konei hoki tatou ka mātau ai no te pono tatou, ka whakau ai hoki i o tatou ngakau i tona aroaro.

20 Na, ki te mea ka whakahē mai o tatou ngakau ki a tatou, nui atu te Atua i o tatou ngakau; e mātau ana ano ia ki nga mea katoa.

21 E nga *hoa* aroha, ki te kore o tatou ngakau e whakahē ake ki a tatou, ka maia tatou ki te Atua.

22 A, te mea e inoia ana e

tatou, ka homai e ia ki a tatou, no te mea e pupuri ana tatou i ana ture, e mea ana hoki i nga mea e ahua reka ana ki tana titiro.

23 Ko tana ture ano tenei, Kia whakapono tatou ki te ingoa o tana Tama, o Ihu Karaiti, kia aroha ano tetahi ki tetahi, kia rite ano ki te ture i homai e ia ki a tatou.

24 Na, te tangata e pupuri ana i ana ture, e mau ana i roto i a ia me ia ano i roto i a ia. Na konei ano tatou i mātau ai e mau ana ia i roto i a tatou, na te Wairua kua homai nei e ia ki a tatou.

UPOKO 4.

Tohu e mohiotia ai nga kai whaakaako he. 7 Kia mau ki te aroha.

E NGA *hoa* aroha, kua e whakapono ki nga wairua katoa, engari me whakamatau nga wairua no te Atua ranei; he tokomaha hoki nga poropiti teka kua haere mai ki te ao.

2 Ma konei koutou ka mātau ai ki te Wairua o te Atua: nga wairua katoa e whakaae ana i haere mai a Ihu Karaiti i te kikokiko, no te Atua era:

3 A, nga wairua katoa kahore e whakaae i haere mai a Ihu Karaiti i te kikokiko, ehara i te mea no te Atua: ko to te anataraiti *wairua* ano tenei, i rongo nei koutou e haere mai ana; a tenei ano kei te ao nei inaianei.

4 No te Atua koutou, e nga tamariki nonohi, kua kaha ano koutou i a ratou: no te

I. HOANI 4.

mea nui atu ia i roto i a koutou, i tera i roto i te ao.

5 No te ao ratou: na reira no te ao nei ano a ratou korero, a e whakarongo ana te ao ki a ratou.

6 No te Atua tatou: te tangata e mātau ana ki te Atua, e whakarongo ana ia ki a tatou; te tangata ehara nei i te Atua, e kore ia e whakarongo ki a tatou. Ma konei tatou ka mātau ai ki te wairua o te pono, ki te wairua o te hē.

7 ¶ E nga *hoa* aroha, kia aroha tatou tetahi ki tetahi: no te Atua hoki te aroha; a, te hunga katoa e aroha ana, kua whanau i te Atua, a e mātau ana ki te Atua.

8 Te tangata kahore e aroha, kahore ia e mātau ki te Atua; he aroha hoki te Atua.

9 Na konei i kitea ai te aroha o te Atua ki a tatou, na te mea kua tonoa mai e te Atua tana Tama kotahi ki te ao, kia ora ai tatou i a ia.

10 Ko to te aroha tenei, ehara i te mea ko tatou kua aroha ki te Atua, engari ko ia kua aroha ki a tatou, a tonoa mai ana e ia tana Tama hei whakamarietanga mo o tatou hara.

11 E nga *hoa* aroha, ki te mea i penei te aroha o te Atua ki a tatou, e tika ana hoki kia aroha tatou tetahi ki tetahi.

12 Kahore he wa i kite ai tetahi i te Atua. Ki te aroha tatou tetahi ki tetahi, e noho ana te Atua i roto i a tatou,

a kua rite pu tona aroha i roto i a tatou.

13 Na konei tatou i mātau ai e noho ana tatou i roto i a ia, me ia i roto i a tatou, na te mea kua homai e ia ta tona Wairua ki a tatou.

14 A kua kite ano matou, ka whakaatu nei ano hoki, i tonoa te Tama e te Matua hei Kai whakaora mo te ao.

15 Te tangata e whakaae ana ko Ihu te Tama a te Atua, e noho ana te Atua i roto i a ia, me ia ano hoki i roto i te Atua.

16 Kua mātau nei ano hoki tatou, kua whakaponu ki te aroha o te Atua ki a tatou. He aroha te Atua; a, te tangata e noho ana i runga i te aroha e noho ana i roto i te Atua, me te Atua ano hoki i roto i a ia.

17 Na konei te aroha i roto i a tatou i rite pu ai, a ka whai maiatanga ano tatou a te ra whakawa: na te mea e rite ana ki a ia tatou e noho nei i tenei ao.

18 Kahore he matakū i roto i te aroha; engari ka makā te matakū ki waho e te aroha ina tino rite; no te mea he mamae to te matakū. Na, te tangata e matakū ana, kahore ia kia tino rite i roto i te aroha.

19 E aroha ana tatou ki a ia, no te mea ko ia kua aroha ki a tatou i te tuatahi.

20 Ki te mea tetahi, E aroha ana ahau ki te Atua, a e mau-āhara ana ki tona teina, he tangata teka ia: te tangata hoki kahore e aroha ki tona

I. HOANI 4, 5.

teina kua kitea nei e ia, me pehea ka aroha ai ia ki te Atua kahore nei kia kitea e ia?

21 Kei a tatou ano hoki tenei ture, he mea nāna, Te tangata e aroha ana ki te Atua, kia aroha hoki ki tona teina?

UPOKO 5.

Na te Atua te whakapono; na reira ano te aroha. To te aroha ahua. 10 Kai whakaatu pai. 11 Te kupu whakahari. 14 Inoi.

NGA tāngata katoa e whakapono ana ko Ihu te Karaiti, kua whanau i te Atua: nga tāngata katoa ano hoki e aroha ana ki te Pāpā, e aroha ana ano ki tana whanau.

2 Ma konei tatou ka mātau ai e aroha ana tatou ki nga tamariki a te Atua, ma te mea ka aroha tatou ki te Atua, a ka pupuri i ana ture.

3 Ko te aroha hoki tenei ki te Atua, kia pupuri tatou i ana ture: ehara hoki ana ture i te mea taimaha.

4 Nga mea katoa hoki kua whanau i te Atua e kaha ana i te ao: a ko te wikitoria tenei e taea ai te ao, ko to tatou whakapono.

5 Ko wai i kaha i te ao? ehara ianei te tangata e whakapono ana ko Ihu te Tama a te Atua?

6 Ko ia tenei i haere mai nei i runga i te wai, i te toto, ko Ihu, ko te Karaiti; ehara i te mea i runga i te wai anake, engari i runga i te wai, i te toto. Ko te Wairua heki te

kai whakaatu, ko te pono hoki te Wairua.

7 Tokotoru hoki nga kai whakaatu i te rangi, ko te Matua, ko te Kupu, ko te Wairua Tapu: a kotahi ano enei tokotoru.

8 A tokotoru nga kai whakaatu i te whenua, ko te Wairua, ko te wai, ko te toto: a kotahi ano ta ratou tokotoru.

9 Ki te whakaae tatou ki ta nga tāngata whakaatu, he nui ke ta te Atua whakaatu: ko ta te Atua whakaatu hoki tenei, i whakaaturia e ia mo tana Tama.

10 Te tangata e whakapono ana ki te Tama a te Atua, he whakaatu tana kei roto ano i a ia: te tangata kahore e whakapono ki te Atua, he whakateka tana ki a ia; no te mea kahore ia i whakapono ki te whakaatu i whakaaturia mai nei e te Atua mo tana Tama.

11 A ko te whakaatu tenei, ara kua homai e te Atua ki a tatou te oranga tonutanga; kei roto ano i tana Tama tenei oranga.

12 Te tangata kei a ia te Tama, kei a ia ano te oranga; te tangata kahore nei i a ia te Tama a te Atua, kahore i a ia te oranga.

13 ¶ I tuhituhia atu ai e ahau enei mea ki a koutou e whakapono nei ki te ingoa o te Tama a te Atua, kia mātau ai koutou kei a koutou te oranga tonutanga, kia whakapono ai hoki koutou ki

II. HOANI.

te ingoa o te Tama a te Atua.

14 Ko to tatou maia ano tenei ki a ia, na, ki te inoia e tatou tetahi mea i a ia, tana i pai ai, ka whakarongo mai ia ki a tatou:

15 A ki te mea ka mātau tatou e whakarongo ana ia ki tā tatou e inoi ai, ka mātau kei a tatou nga mea i inoia e tatou i a ia.

16 Ki te mea ka kite tetahi i tona teina e hara ana, hāunga te hara e mate ai ia, me inoi ia, a e homai he oranga ki a ia mo te hunga ehara nei to ratou i te hara e mate ai. Tera ano te hara e mate ai: e kore ahau e mea kia inoi ia mo tera.

17 He hara nga hē katoa: tenei ano tetahi hara ehara nei i te mea e mate ai.

18 ¶ E mātau ana tatou, na, nga tāngata katoa kua whanau i te Atua kahore e hara; engari ka tiaki te tangata kua whanau i te Atua i a ia ano, e kore hoki te *wairua* kino e pa ki a ia.

19 Ka mātau nei tatou no te Atua tatou, a kei te takoto te ao katoa i roto i te kino.

20 Na, e mātau ana ano tatou kua tae mai te Tama a te Atua, a kua homai e ia ki a tatou he matauranga, kia mohio ai tatou *ki a ia*, ki te Mea Pono; kei roto ano hoki tatou i a ia, i te Mea Pono, *ara* i tana Tama, i a Ihu Karaiti. Ko te Atua pono tenei, ko te oranga tonutanga.

21 E *aku* tamariki nonohi, kia tupato koutou ki nga whakapakoko. Amine.

KO TE PUKAPUKA TUARUA

A HOANI APOTORO.

Mo te u. 10 Kei tahuri ki nga kai whakaako he.

NA te kaumātua ki te wahine rangatira kua oti te whiriwhiri, ki ana tamariki hoki, e arohaina ponotia nei e ahau; a ehara i te mea e ahau anake, e nga tangata

katoa ano hoki kua mātau ki te pono;

2 He whakaaro hoki ki te pono e mau nei i roto i a tatou, a e mau ano ki a tatou, ake ake ake:

3 Kia tau ki a koutou te aroha noa, te mahi tohu me te rangimarie, he mea na te

III. HOANI.

Atua Matua, na te Ariki hoki, na Ihu Karaiti, na te Tama a te Matua, i runga ano i te pono, i te aroha.

4 ¶ Hari pu ahau noku i kite i etahi o o tamariki e haere ana i runga i te pono, e whakarite ana i te ture kua homai ki a tatou e te Matua.

5 Na, tenei ano taku kupu ki a koe, e tai, ehara i te ture hou taku e tuhituhi atu nei ki a koe, engari ko tera i a tatou no te timatanga, kia aroha tatou tetahi ki tetahi.

6 A ko te aroha tenei, kia haere tatou i runga i ana ture. Ko te ture ano tenei, kia rite ki ta koutou i rongo ai i te timatanga, hei runga i tera he haerenga mo koutou.

7 He tokomaha hoki te hunga whakapohēhē kua tae mai ki te ao, kahore nei e whakaae i haere mai a Ihu Karaiti i te kikokiko. Ko te kai whakapohēhē tenei, ko te anatikaraiti.

8 Kia whai whakaaro ki a koutou ano, kei maumauria

a tatou mahi, engari kia tino nui te utu e riro i a tatou.

9 Te tangata e poka ke ana, a kahore e mau ki te whakaakoranga a te Karaiti, kahore te Atua i a ia: te tangata e mau ana ki te whakaakoranga a te Karaiti, kei tenei te Matua me te Tama.

10 Ki te tae atu tetahi ki a koutou, a ehara tenei i te whakaakoranga e kawea atu e ia, kua ia e puritia ki te whare, kua ano hoki e oha ki a ia:

11 Ki te oha hoki tetahi ki a ia, ka uru ia ki ana mahi kino.

12 ¶ He maha nga mea hei tuhituhinga atu maku ki a koutou, heoi kihai ahau i pai ki te pepa, ki te mangumangu: engari e mea ana ahau tera ahau e haere atu ki a koutou, a ka korero atu he mangai, he mangai, kia tino nui ai to tatou hari.

13 Tenei te oha atu nei ki a koe nga tamariki a tou teina whiriwhiri. Amine.

KO TE PUKAPUKA TUATORU A HOANI APOTORO.

Mo te mahi atawhai a Kaiu.
9 *He o Rioterepi.* 11 *Pai o Rimitiriu.*

NA te kaumātua ki a Kain, ki te *hoa* aroha, ki taku e aroha atu nei i runga i te pono.

2 ¶ E te *hoa* aroha, nui atu i nga mea katoa taku inoi kia kake koe ki te pai, kia ora, kia pera ano me tou wairua kua kake ki te pai.

3 Hari pu hoki ahau ki nga teina i haere mai nei, i wha-

HURA.

kaatu i te pono i roto i a koe, ara tou haere i runga i te pono.

4 Kahore oku hari e nui atu ana i enei, ara kia rongo ahau e haere ana aku ta-mariki i runga i te pono.

5 ¶ E te *hoa* aroha, pono tonu tau mahi e mea na koe mo nga tēina, mo nga tāngata iwi ke ano hoki;

6 E whakaatu na i tou aroha ki te aroaro o te hahi: na, kia rite ki ta te Atua tau kawenga i a ratou, a ka pai to mahi:

7 He whakaaro hoki ki *tona* ingoa i haere atu ai ratou, kihai ano i riro i a ratou tetahi mea a nga tau iwi.

8 Koia i tika ai kia whakamanuhiri tatou i nga tāngata penei, kia ai hoki tatou hei *hoa* mahi mo te pono.

9 ¶ I tuhituhi atu ahau ki te hahi, otira kahore matou e manakohia mai e Rioterepi; tana hoki e pai ai ko ia kia meinga hei tuatahi mo ratou.

10 Mo konei ki te haere atu ahau, ka mahara ahau ki ana mahi e mea nei ia, ki te kino

o ana kupu i a ia e hāmeme-meme mai nei mo matou; kahore hoki tana i mutu i konei, kahore ia e manako ki nga tēina, a ki te pai etahi, e riria ana e ia, e peia ana i roto i te hahi.

11 ¶ E te *hoa* aroha, kaua e arumia te kino, engari te pai. Te tangata e mahi pai ana, no te Atua ia: tena ko te kai mahi i te kino, kahore ia kia kite i te Atua.

12 E korerotia *paitia* ana a Rimitiriu e te katoa, e te pono ano hoki: hei kai whakaatu ano hoki matou; e mohio ana ano koutou he pono ta matou whakaatu.

13 ¶ He maha nga mea hei tuhituhinga atu maku, otira e kore ahau e pai kia tuhituhi atu ki a koe ki te mangumangu, ki te pene:

14 E mea ana hoki ahau tera ahau e kite wawe i a koe, a e korero taua he mangai, he mangai. *Kia tau* te rangimarie ki a koe. Tenei nga *hoa* aroha te oha atu nei ki a koe. Oha atu ki nga *hoa* aroha me te whakahua ano i te ingoa o *tera*, o *tera*.

KO TE PUKAPUKA A HURA.

Kia u. 4 *Kai whakaako he.* 20 *Kia neke ake te whakapono, inoi i roto i te Wairua, kia u ai, kia tupu ai, kia mau ai.* 22 *Tikanga ki o waho.*

NA Hura, na te pononga a Ihu Karaiti, na te teina o Hemi, ki te hunga kua oti te whakatapu e te Atua Matua, he mea tiaki i roto i a Ihu Karaiti, he hunga karanga:

2 Kia whakanuia ki a koutou te mahi tohu, te rangi-marie, me te aroha.

3 ¶ E nga *hoa* aroha, i a au e tākare tonu ana ki te tuhi-tuhi ki a koutou mo to tatou oranga tahi, i mea ahau me tuhituhi ki a koutou, me whakahau kia kaha te tohe ki te whakapono kua oti nei te tuku mai ki te hunga tapu.

4 Kua tomo puku mai hoki etahi tāngata, i tuhituhia i mua mo tenei whakataunga-hē, he hunga karakia kore, whakaputaina ketia ake e ratou te aroha noa o to tatou Atua hei mea mo nga hiahia taikaha, a whakakahore ana ratou ki te Atua, ko ia anake nei te rangatira, ki to tatou Ariki hoki, ki a Ihu Karaiti.

5 ¶ Na e mea ana ahau kia whakamaharatia koutou, kua mātau noa ake ano hoki koutou ki tenei, i whakaorangia mai e te Ariki te iwi i te whenua o Ihipa, muri iho whakangaromia ana e ia te hunga kihai nei i whakapono.

6 Na, nga anahera kihai nei i mau to ratou o te timatanga, heoi whakarerea ake e ratou to ratou nohoanga ake, kua waiho e ia i raro i te pouri, mau tonu *te here* ki nga meka-meka, mo te whakawakanga o te ra nui.

7 Ka rite ki Horoma raua ko Komora, me nga pa i tata ki a raua, i pera nei me enei te puremu, te whai i nga kiko-kiko ke; kua waiho ratou hei tohu, pangia ana ratou e te

whiu, *ara* e te ahi e ka tonu ana.

8 Ko ta tenei hunga moe-moea ano hoki tena; e whakapoke ana i te kikokiko, e whakahawea ana ki te kawa-natanga, e korero kino ana ki nga rangatira.

9 Na, Mikaera, te tino anahera, i ta raua ngangautanga ko te rewera, i a ia e tohe ana ki te tinana o Mohi, kihai i tae tona aro ki te kupu kanga i te whakawakanga; i mea *kau* ia, Ma te Ariki koe e riri.

10 Ko enei ia, e korerotia kinotia ana e ratou nga mea kahore nei ratou i mātau: na, nga mea e matauria noatia ake nei e ratou tahi ko nga kararehe whakaaro-kore, hē iho ratou i aua mea.

11 Aue, te mate mo ratou! kua haere nei hoki ratou i te ara o Kaina, kua torere rawa hoki ki te hē, ara, ki to Pararama utu, na, ko to Koraha totohe hei whakangaromanga mo ratou.

12 He toka moana ratou i roto i a koutou hakari aroha, i a ratou e hakari tahi ana me *koutou*, e whangai ana i a ratou ano, kahore hoki e mataku: he kapua wai-kore e akina ana e nga hau; he rakau kua pirau nei nga rau, he mea hua-kore, ka rua nei nga matenga, he mea kua unuhia ake i nga pakiaka;

13 He ngaru pua no te moana; te huka, ko to ratou whakama; he whetū atiutiu noa, pouri kerekere te wahi kua rite mo ratou mo ake tonu atu.

WHAKAKITENGA 1.

14 I poropititia ano hoki enei e Enoka, e te tokowhitu i muri i a Arama, i a ia i mea, Na, kei te haere mai te Ariki me nga mano tini o tana hunga tapu,

15 Kia whakaritea he whakawa mo nga tângata katoa, kia riria hoki te hunga karakia-kore katoa o ratou mo a ratou mahi karakia-kore katoa, i hē ai ratou ki te karakia, mo nga kupu pakeke katoa i korerotia e te hunga hara, e te hunga karakia-kore mona.

16 He hunga amuamu ratou, he kowhetewhete, e haere ana i runga i o ratou hiahia ake, tetere rawa ano hoki nga kupu e korero nei o ratou mangai, he hunga miharo kanohi ratou, he mea kia riro ai he mea i a ratou.

17 ¶ E nga hoa aroha, kia mahara koutou ki nga kupu i korerotia i mua e nga apotero a to tatou Ariki, a Ihu Karaiti;

18 I mea hoki ratou ki a koutou, tera e puta mai te hunga whakamanumanu i te wa whakamutunga, e haere ana i runga i o ratou hiahia karakia-kore.

19 He hunga tenei e momotu ke ana i a ratou, he hunga ngakau maori, kahore nei i a ratou te Wairua.

20 Ko koutou ia, e nga hoa aroha, hangā ake koutou hei whare ki runga ki to koutou whakapono tapu rawa, me te inoi ano i roto i te Wairua Tapu,

21 Me te tiaki ano i a koutou i runga i te aroha o te Atua, me te tatari ano ki te mahi tohu a to tatou Ariki, a Ihu Karaiti, a, te oranga tonutanga ra ano.

22 Ko etahi ano tohungia, he mea kowae marie.

23 Ko etahi me whakaora i runga i te matakū, me tō mai i roto i te kapura; te kakahu nei ano kua poke i te kiko-kiko, whakariharihangia.

24 ¶ Na, te Mea kaha ki te tiaki i a koutou kei hinga, ki te whakatu hoki i a koutou ki te aroaro o tona kororia he mea koha-kore i runga i te hari whakaharahara,

25 Ko ia anake nei te Atua, te Mea mātau, to tatou Kai whakaora, waiho atu i a ia te kororia me te nui, te kaha me te mana, aianeia ake ake ake. Amine.

KO TE

WHAKAKITENGA A HOANI.

UPOKO 1.

4 Ki nga hahi e whitu. 7 Te haerenga mai o Ihu. 9 Tona nui.

TE whakakitenga a Ihu Karaiti, i homai e te Atua ki a ia, kia whakapuakina ki ana pononga nga mea meāke

WHAKAKITENGA 1.

nei rite ; na whakaaturia mai ana e ia, ara e tana anahera i tonoa mai e ia, ki tana pononga, ki a Hoani,

2 Ki te kai whakaatu i te kupu a te Atua, i te whakaatu hoki i a Ihu Karaiti, i tana hoki i kite ai.

3 Ka hari te tangata e titiro ana i te pukapuka, me te hunga ano hoki e whakarongo ana ki nga kupu o te poropititanga, a e pupuri ana i nga mea kua oti te tuhituhi ki reira : kua tata hoki te taima.

4 ¶ Na Hoani ki nga hahi e whitu i Ahia : *Kia tau* ki a koutou te aroha noa me te rangimarie, he mea na Tenei e ora nei ia, i mua ano ia, a kei te haere mai ano ; he mea ano na nga Wairua e whitu i mua i tona torona ;

5 He mea anona Ihu Karaiti, na te kai whakaatu pono, ko ia nei te putanga mātāmua o te hunga mate, te rangatira o nga kingi o te whenua. I arohaina nei tatou e ia, i horoia ano hoki o tatou hara ki ona toto,

6 A meinga ana tatou e ia hei kingi, hei tohunga ki te Atua, ara ki tona Matua ; *waiho atu* i a ia te kororia me te kaha, ake tonu atu. Amine.

7 Tenei ia te haere mai nei me nga kapua, a e kite i a ia ngakanohi katoa, me te hunga hoki i wero i a ia : ka aue ano hoki nga hapū katoa o te whenua ki a ia. Ae, Amine.

8 ¶ Ko ahau te Arepa me te Omeka, te timatanga me te whakamutunga, e ai ta te

Ariki, e ora nei, i mua ano ia, a kei te haere mai ano, ko te Kaha rawa nei ia.

9 ¶ Ko ahau tenei, ko Hoani, ko to koutou tuakana, kua uru tahi nei ki te tukinotanga, ki te rangatiratanga ano hoki me te manawanui o Ihu Karaiti, i te motu ahau e karangatia nei ko Patamo, he mea hoki mo te kupu a te Atua, mo te whakaatu hoki i a Ihu Karaiti.

10 I te Wairua ahau i te ra o te Ariki, a ka rongo ahau i te reo nui i muri i a au, me te mea no te tētere,

11 E mea ana, Ko ahau te Arepa me te Omeka, ko te tuatahi me te whakamutunga. Tuhituhia ki te pukapuka tau e kite nei, tukua atu hoki ki nga hahi e whitu i Ahia ; ki Epeha, ki Hamurana, ki Perikamu, ki Taiataira, ki Hara-riha, ki Pirarerepia, ki Raorikia.

12 Na, ko toku tahuritanga ake kia kite i te reo i korero nei ki ahau. Tahuri rawa ake, ka kite ahau i nga turanga rama koura e whitu ;

13 A i waengapu o nga turanga rama e whitu *ko tetahi* e rite ana ki te Tama a te tangata, tatū noa ki nga waewae tona kakahu, he mea whitiki hoki te uma ki te whitiki koura ;

14 Ko tona mātenga me nga makawe he ma, anō he huruhuru ma no te hipi, anō he hukarere ; ko ona kanohi, anō he mura abi ;

15 Ona waewae ano hoki rite

WHAKAKITENGA 1, 2.

tonu ki te parahi pai, anō e ka ana i roto i te oumu; tona reo, ano ko te haruru o nga wai maha.

16 E whitu ano nga whetū i tona ringaringa matau: i puta ano hoki he hoari i roto i tona mangai, he mea e rua nei ona mata, he mea koi: tona kanohi hoki, ano ko te ra ina kaha te whiti mai.

17 A, toku kitenga i a ia, hinga ana ahau ki ona wae-wae, anō he tangata kua mate. Na ka whakapangia mai e ia tona ringaringa matau ki a au, ka mea mai ki a au, Kaua e matakū; ko ahau te tuatahi me te whakamutunga:

18 Ko ahau ano tenei e ora nei, i mate ano hoki ahau i mua; na, kei te ora tenei ahau, a ake tonu atu, Amine; kei a au ano nga ki o te po raua ko te mate.

19 Tuhituhia nga mea kua kite nei koe, nga mea onaianei, me nga mea meake nei puta i muri iho i enei;

20 Te mea ngaro nei, nga whetū e whitu i kitea e koe i toku matau, me nga turanga rama koura e whitu. Nga whetu e whitu, ko nga anahera o nga hahi e whitu: a, nga turanga rama e whitu i kite na koe, ko nga hahi e whitu.

UPOKO 2.

Kupu ki nga anahera, ara, ki nga minita o nga hahi. To ratou pai. Nga mea i koha.

TUHITUHIA atu ki te anahera o te hahi i Epeha; Ko nga kupu enei a te kai

pupuri i nga whetū e whitu i tona matau, a e haereere ana i waenganui o nga turanga rama koura e whitu;

2 Ka mātau ahau ki āu mahi, ki tou uaua, ki tou manawanui, a e kore koe e ata hanga ki te hunga kino: kua whakamatautauria hoki e koe te hunga e mea nei he apotoro ratou, a ehara, kua mau ano hoki i a koe he hunga teka ratou:

3 I pēhia koe, heoi whakamanawanui tonu, mahi ana koe, he whakaaro ki toku ingoa, kahore hoki i hōhā.

4 Otira he mea ano taku ki a koe, no te mea kua whakarerere e koe tou aroha tuatahi.

5 Na, kia mahara ki te wahi i taka iho ai koe, ripeneta, mahia hoki nga mahi o mua; ki te kahore, ka hohoro toku haere atu ki a koe, ka nekehia atu e ahau tou turanga rama i tona wahi, ki te kore koe e ripeneta.

6 Ko tenei ia tau na, e kino ana koe ki nga hanga a nga Nikoraiti, e kinongia nei e ahau.

7 Te tangata he taringa tona, kia rongo ia ki ta te Wairua e mea nei ki nga hahi; Te tangata i a ia te wikitoria, ka hoatu e ahau māna e kai to te rakau o te ora e tu nei i waenganui o te pararaiha o te Atua.

8 ¶ Tuhituhia ano hoki ki te anahera o te hahi i Hamurana; Ko nga kupu enei a te tuatahi, a te whakamutunga, i mate nei a kua ora;

WHAKAKITENGA 2.

9 Ka mātau ahau ki āu mahi, ki tou tukinotanga, ki tou rawakoretanga, (heoi e whai taonga ana ano koe,) e mātau ana ano ahau ki te korero kino a te hunga e mea nei he Hurai ratou, a ehara, engari ko te whakamenenga ratou o Hatana.

10 Kaua e wehi ki nga mameae meake nei pa ki a koe, na, tera e makā etahi o koutou e te rewera ki te whare herehere, kia whakamatautauria ai koutou; a ka whakamaetia koutou kotahi tekau nga ra: kia pono koe a mate noa, a maku e hoatu ki a koe te karauna o te ora.

11 Te tangata he taringa tona, kia rongo ia ki ta te Wairua e mea nei ki nga hahi; Te tangata i a ia te wikitoria, e kore ia e he i te matenga tuarua.

12 ¶ Tuhituhia ano hoki ki te anahera o te hahi i Perekamū; Ko nga kupu enei a te kai mau i te hoari koi e rua nei nga mata;

13 Ka mātau ahau ki āu mahi, ki te wahi hoki e noho na koe, ko te wahi ia i te torona o Hatana: a e mau ana koe ki toku ingoa, kahore hoki koe i whakakahore ki toku whakapono, i nga ra hoki i a Anatipa, i taku kai whakaatu pono, i whakamatea nei i roto i a koutou i te wahi e noho na a Hatana.

14 Tenei ia etahi mea aku ki a koe, no te mea kei a koe te hunga e mau ana ki te whakaakoranga a Paraama, nāna

nei i whakaako a Paraka ki te maka tūtukitanga-waewae ki te aroaro o nga tamariki a Iharaira, e kai ai ratou i nga mea i patua ma te whakapakoko, e puremu ai hoki.

15 Kei a koe ano hoki te hunga e mau ana ki te whakaakoranga a nga Nikoraiti, ki taku e whakarihariha atu nei.

16 Ripeneta; na, ki te kahore, ka hohoro toku haere atu ki a koe, a ka whawhaitia ratou e ahau ki te hoari o toku mangai.

17 Te tangata he taringa tona, kia rongo ia ki ta te Wairua e mea nei ki nga hahi; Te tangata i a ia te wikitoria, ka hoatu e ahau te mana huna, ka hoatu ano e ahau ki a ia he kohatu ma, me te ingoa hou, he mea tuhituhi ki te kohatu, e kore nei e matauria e tetahi, e te tangata anake kua whiwhi.

18 ¶ Na tuhituhia atu ki te anahera o te hahi i Taia-taira; Ko nga kupu enei a te Tama a te Atua, ona kanohi me te mea he mura ahi, ona waewae ano hoki rite tonu ki te parahi pai;

19 E mātau ana ahau ki āu mahi, ki tou aroha, ki to mahi minita, ki tou whakapono, ki tou manawanui, ki āu mahi; nga mea ano hoki o muri nui atu i o mua.

20 Tenei ano ia etahi mea aku ki a koe, no te mea e tukua ana e koe taua wahine, a Ietepere, e mea nei he poropiti ia, ki te whakaako, ki te ku-

WHAKAKITENGA 2, 3.

kume i aku pononga kia moe tahae, kia kai ano hoki i nga mea e patua ana ma nga whakapakoko.

21 I hoatu ano e ahau ki a ia he taima e ripeneta ai ia ki tona moe tahae; a kihai ia i ripeneta.

22 Na ka makā ia e ahau ki tetahi moenga, me te hunga ano hoki e puremu ana ki a ia, ki roto ki te tukinotanga nui, ki te kore ratou e ripeneta ki a ratou mahi.

23 Ka whakamatea ano hoki e ahau ana tamariki kia mate rawa; a ka mātau nga hahi katoa ko ahau te kai rapu i ta nga whatumanawa, i ta nga ngakau: ka rite hoki ki a koutou mahi taku e hoatu ai ki tenei, ki tenei o koutou.

24 Ko taku kupu ia tenei ki a koutou, ki era atu hoki i Taiataira, ki te hunga kahore nei i a ratou tenei whakaa-koranga, a kahore ano kia mātau ki nga mea hohonu a Hatana, ki ta ratou e korero nei; E kore e whakawahā e ahau tetahi atu mea taimaha ki a koutou.

25 Ko tera ia i a koutou, puritia kia tae atu ra ano ahau.

26 Na, te tangata i a ia te wikitoria, a e puritia ana e ia aku mahi taea noatia te mutunga, maku e hoatu ki a ia he mana rangatira ki nga tauwi:

27 A he rino te tokotoko e whakahaere tikanga ai ia mo ratou; ka pākaria ratou, ano he oko na te kai pokepoke paru: ka rite ki ta toku Matua i homai ai ki a au.

28 Ka hoatu ano e ahau ki a ia te whetū o te ata.

29 Te tangata he taringa tona, kia rongo ia ki ta te Wairua e mea nei ki nga hahi.

UPOKO 3.

*To Harariha. 8 To Pirare-
repia. 14 To Raorikia. 20
Kei te tatau a Ihu e patuki
ana.*

NA tuhituhia atu ki te anahera o te hahi i Harariha; Ko nga kupu enei a te Ariki, kei a ia nei nga Wairua e whitu o te Atua, me nga whetū e whitu; Ka mātau ahau ki āu mahi, he ingoa na tou, e ora ana koe, heoi he tupāpaku ano koe.

2 Kia mataara, whakankia nga mea e toe nei, ka tata nei te mate: kahore hoki ahau i kite i au mahi kia tino rite ki te aroaro o te Atua.

3 Kia mahara ra ki te riro-nga o nga mea i a koe, ki āu i rongo ai hoki, a puritia, ripeneta hoki. Na, ki te kore koe e mataara, ka tae atu ahau ki a koe ano he tahae; e kore hoki koe e mātau ki te haora e tae atu ai ahau ki a koe.

4 Tera kei a koe etahi ingoa, he torutoru na, i Harariha, kahore nei i poke o ratou kakahu; e haereere tahi ana ratou me ahau, he ma hoki nga kakahu; no te mea e pai ana ratou.

5 Te tangata i a ia te wikitoria, e whakakakahuria ia ki te kakahu ma; e kore ano hoki e murua e ahau tona ingoa i te pukapuka o te ora,

WHAKAKITENGA 3.

e whakaaetia ano e ahau tona ingoa ki te aroaro o toku Matua, ki te aroaro ano hoki o ana anahera.

6 Te tangata he taringa tona, kia rongo ia ki ta te Wairua e mea nei ki nga hahi.

7 ¶ Na tuhituhia atu ki te anahera o te hahi i Pirarepia; Ko nga kupu enei a te tapu, a te pono, kei a ia nei te ki o Rawiri, ko ia hei whakapuare a kahore tetahi hei tutaki; māna hoki e tutaki a kahore tetahi hei whakapuare;

8 E mātau ana ahau ki āu mahi: na kua hoatu e ahau ki tou aroaro he kuwaha puare, e kore nei e taea te tutaki e tetahi: he kaha hoki tou, he mea iti nei, a kua puritia ano e koe taku kupu, kahore ano hoki koe i whakakahore ki toku ingoa.

9 Na, maku e mea te hunga o te whakamenenga o Hatanā, e mea nei he Hurai ratou, a ehara, he teka hoki na ratou; na, maku ratou e mea kia haere mai, kia koropiko ki mua i ou waewae, a e mātau ratou kua arohaina koe e ahau.

10 Kua puritia na e koe te kupu o toku manawanui, wai-hoki ka puritia koe e ahau i te wa o te whakamatautauranga meāke nei puta ki te ao katoa hei whakamatautau i te hunga e noho ana i te whenua.

11 Na ka hohoro toku haere atu: puritia tau, kei tangohia tou karauna e tetahi.

12 Te tangata i a ia te wiki-toria, maku ia e mea hei pou i roto i te whare o toku Atua; e kore ano ia e haere atu ki waho i nga wa i muri: maku hoki e tuhituhi ki runga ki a ia te ingoa o toku Atua, te ingoa hoki o te pa o toku Atua, o Hiruharama hou ka heke iho nei i te rangi i toku Atua; me toku ingoa hou ano hoki.

13 Te tangata he taringa tona, kia rongo ia ki ta te Wairua e mea nei ki nga hahi.

14 ¶ Tuhihi atu ki te anahera o te hahi o nga Raorikia; Ko nga kupu enei a te Amine, a te kai whakaatu pono, tika, a te timatanga o ta te Atua hanganga;

15 Ka mātau ahau ki āu mahi, ehara koe i te matao, ehara koe i te werawera: e pai ahau me i matao koe, me i werawera ranei.

16 Na, he mea mahanahana kau koe, ehara i te matao, ehara i te werawera, ka ruakina atu koe e ahau i roto i toku mangai.

17 Na, e ki na koe, Kua whai taonga ahau, kua tini oku rawa, kahore hoki tetahi mea e matea ana e ahau; a kahore e mātau he waikoro-huhu noa iho koe, he hē noa iho, he rawakore, he matapo, he mea kakahu-kore:

18 Ko taku kupu tenei ki a koe, kia hokona ki a au he koura mou kua oti te tahu ki te ahi, kia whai rawa ai koe; he kakahu ma hoki, hei ka-

WHAKAKITENGA 3, 4.

kahu ki a koe, kia kaua ai hoki e kitea te whakama o tou tūnga kautanga; pania hoki ou kanohi ki te rongoa, kia kite ai koe.

19 Aku e aroha nei, ka riria e ahau, ka whiua: na kia ngakau nui koe, ripeneta hoki.

20 Tenei ahau te tu nei ki te tatau, te patōtō nei: ki te whakarongo tetahi ki toku reo, a ka uaki i te tatau, e tomo atu ahau ki a ia, a hei hoa ahau mona ki te kai, hei hoa ano ia moku ki te kai.

21 Te tangata i a ia te wikitoria, ka hoatu e ahau ki a ia kia noho ki toku taha ki runga ki toku torona, me ahau hoki, i a au nei te wikitoria, a kua noho ki te taha o toku Matua ki runga ki tona torona.

22 Te tangata he taringa tona, kia rongoa ia ki ta te Wairua e mea nei ki nga hahi.

UPOKO 4.

Te torona. 4 Nga kaumatua.

6 Mea ora. 10 Ta nga kaumatua mo te kingi.

MURI iho i enei mea ka kite ahau, na, he kuwaha kua oti te whakapuare i te rangi: a, ko te reo tuatahi i rongoa ai ahau, me te mea no tetahi tētere, e ki mai ana ki a au, e mea ana, Haere mai ki runga nei, a e whakakitea e ahau ki a koe nga mea kua takoto mo muri i enei.

2 I reira pu ano kua nohoia ahau e te Wairua: na, he torona kua tu ki te rangi, a i

runga i te torona *ko tetahi* e noho ana.

3 A, te ahua o tera i noho ra, rite tonu ki te kamaka hahapa, ki te hararina: he aniwaniwa ano i nga taha katoa o te torona, te ahua kei to te emerara.

4 A i nga taha katoa o te torona etahi torona e rua tekau ma wha: i kitea ano e ahau i runga i nga torona e rua tekau ma wha nga kaumatua e noho ana, he mea whakakakahu ki te kakahu ma; a he karauna koura ano o ratou i runga i o ratou matenga.

5 Me te puta mai ano i roto i te torona he uira, he wha-titiri, he reo: e whitu ano hoki nga rama ahi e ka ana i mua i te torona; ko nga Wairua e whitu enei o te Atua.

6 I mua ano o te torona he moana karahi, te rite kei te haupapa: a i waenganui o te torona, i nga taha katoa o te torona, ko nga mea ora e wha, kapi tonu a mua, a muri o ratou, i te kanohi.

7 Te tuatahi o nga mea ora i rite ki te raiona, te tuarua o nga mea ora i rite ki te kuao kau, te mata o te tuatoru o nga mea ora i rite ki to te tangata, a, te wha o nga mea ora i rite ki te ekara e rere ana.

8 Na, aua mea ora e wha, e ono nga parirau o tetahi, o tetahi, i nga taha katoa; ki tonu ano hoki a roto o ratou i te kanohi: a kahore e mutu ta ratou i te ao, i te po, he mea tonu ta ratou, Tapu, tapu,

tapu, te Ariki, te Atua Kaha rawa, i mua nei ia, tenei ano inaianei, a e haere mai ana ano a mua.

9 A i te mea ka hoatu e nga mea ora te kororia, te honore, me te whakawhetai, ki tera e noho ana i runga i te torona, e ora ana ake ake ake,

10 Ka hinga iho nga kaumātua e rua tekau ma wha ki te aroaro o tera e noho ana i runga i te torona, a ka koropiko ki a ia e ora tonu nei ake ake ake, ka panga hoki i o ratou karauna ki mua o te torona, ka mea,

11 Tika tonu, e te Ariki, kia riro i a koe te kororia te honore te kaha: i hangā hoki e koe nga mea katoa, nau ano i pai ake i takoto ai aua mea, *na reira ano hoki i hangā ai.*

UPOKO 5.

Te pukapuka; 5 Ma te Reme anake e whakatuwhera. 9 Te waiata hou ki a ia.

A I kitea ano e ahau ki matau o tera e noho ana i runga i te torona, he pukapuka kua oti te tuhituhi a roto, a tua hoki, he mea hiri ki nga hiri e whitu.

2 I kite ano ahau i tetahi anahera kaha e karanga ana, he nui te reo, Ko wai e tikangatia hei whakatuwhera i te pukapuka, hei wawahi i ona hiri?

3 A kihai i taea e tetahi i te rangi, i te whenua, i raro i te whenua, te whewhera i te pukapuka, te titiro ki reira.

4 Na, nui atu toku tangi, no

te mea kihai i kitea tetahi i tikangatia hei whewhera, hei korero i te pukapuka, te titiro iho ranei ki reira.

5 Na ka mea mai tetahi o nga kaumātua ki a au, Kaua e tangi, na, kua riro te wiktoria i te Raiona o te hapu o Hura, i te Putake o Rawiri, māna e whakatuwhera te pukapuka, e wawahi ona hiri e whitu.

6 A i kite ano ahau, na, i waenganui o te torona, o nga mea ora hoki e wha, i waenganui ano hoki o nga kaumātua, he Reme e tu ana, te ahua kei to te mea i whakamatea, e whitu ona haona, e whitu nga kanohi; ko nga Wairua e whitu enei o te Atua, kua tonoa nei puta noa i te ao.

7 Na ka haere ia, ka tango i te pukapuka i roto i te matau o tera e noho ana i runga i te torona.

8 Ano ka tango ia i te pukapuka, ka hinga iho nga mea ora e wha, me nga kaumātua e rua tekau ma wha, ki te aroaro o te Reme, he hāpa ano hoki i tetahi, i tetahi o ratou, me nga oko koura ki tonu i nga mea kakara, ko nga inoi ia a te hunga tapu.

9 Na ka waiata ratou i te waiata hou, ka mea, Pai tonu koe hei tango i te pukapuka, hei wahi i ona hiri: i whakamatea hoki koe, a hokona ana matou e koe, *hei hunga mo te Atua*, ki ou toto i roto i nga hapu, i nga reo, i nga huihuinga tangata, i nga iwi katoa;

10 A meinga ana matou e koe hei kingi, hei tohunga ki to matou Atua: ka kingi ano matou ki runga ki te whenua.

11 A i kite ano ahau, i rangona hoki e ahau he reo no nga anahera tokomaha, i nga taha katoa o te torona, no nga mea ora hoki, no nga kaumātua ano hoki: na, te tokomaha o ratou ko nga mano tekau mano tekau, me nga mano mano;

12 Nui atu to ratou reo ki te mea mai, Pai tonu te Reme i whakamatea hei tangi i te kaha, i te taonga, i te matauranga, i te mana, i te honore, i te kororia, i te whakapai.

13 A i rongo ano ahau ki nga mea hanga katoa o te rangi, o te whenua, i raro ano hoki i te whenua, ki era hoki i te moana, me nga mea katoa o reira, e mea ana, *Waiho atu i tenei e noho nei i runga i te torona, i te Reme hoki, te whakapai, te honore, te kororia, te kaha, a ake ake ake.*

14 Na, ka mea nga mea ora e wha, Amine. A i hinga iho ano nga kaumātua e rua tekau ma wha, koropiko ana ratou ki tera e ora tonu ana a ake ake ake.

UPOKO 6.

Nga hiri ka wahia. Te poropititanga.

A I kite ahau i te wāhanga o tetahi o nga hiri e te Reme, i rongo hoki i tetahi o nga mea ora e wha e mea

ana, ano he reo whatitiri, Haere mai kia kite.

2 I kite ano ahau, na, he hoiho ma: he kopere ta te kai noho i runga; a i hoatu ano he karauna ki a ia: a haere atu ana ia i runga i te wikitoria ki te wikitoria.

3 ¶ A, i tana wāhanga i te rua o nga hiri, ka rongo ahau i te rua o nga mea ora e mea ana, Haere mai kia kite.

4 Na ko te haerenga atu o tetahi hoiho, he mea whero: i hoatu ano ki te kai noho i runga kia tangohia atu e ia te rangimarie i runga i te whenua, kia patu ai ratou tetahi i tetahi: i hoatu ano hoki he hoari nui ki a ia.

5 ¶ A, i tana wāhanga i te toru o nga hiri, ka rongo ahau i te toru o nga mea ora e mea ana, Haere mai kia kite. A, toku tirohanga atu, na, he hoiho mangu; a, te kai noho i runga, he pauna taimaha tana kei tona ringaringa.

6 A rongo ana ahau i te reo i waenganui o nga mea ora e wha e mea ana, He kuata witi mo te pene, e toru kuata parei mo te pene; kei kino hoki to mahi ki te hinu me te waina.

7 ¶ A, i tana wāhanga i te wha o nga hiri, ka rongo ahau i te reo o te wha o nga mea ora e mea ana, Haere mai kia kite.

8 A, toku tirohanga atu, na, he hoiho ahua ma: me te kai

noho i runga, tona ingoa ko te Mate, me te aru ano te Reinga i a ia. A i hoatu ano ki a raua nga tikanga ki te tuawha o nga wahi o te whenua, kia whakamatea ki te hoari, ki te mate kai, ki te mate turoro, ki nga kararehe hoki o te whenua.

9 ¶ A, i tana wāhanga i te rima o nga hiri, ka kitea e ahau i raro i te āta nga wairua o te hunga i whakamatea mo te kupu a te Atua, mo ta ratou whakaaturanga hoki :

10 Nui atu to ratou reo ki te karanga, i mea ratou, Kia pehea te roa, e te Ariki, he tapu, he pono nei koe, kahore nei koe e whakawa, e rapu utu mo o matou toto i te hunga e noho ana i runga i te whenua ?

11 A i hoatu ano he kakahu ma ki tenei, ki tenei o ratou ; ka kiia hoki ratou kia okioki, he wa iti nei, kia rite ra ano o ratou hoa pononga me o ratou tēina, e patua nei i nga wa i muri, e peratia me ratou nei.

12 ¶ A ka kite ahau i tana wāhanga i te ono o nga hiri, na, he ru nui ; kua mangu te ra ano he kakahu taratara, mea huruhuru nei, kua rite ano te marama ki te toto ;

13 A taka iho ana nga whetū o te rangi ki te whenua, pera ana me te piki e whakanga-horo nei i ona hua mātāmua, ina whakaoioia e te hau nui.

14 Kua riro ke hoki te rangi, ano he pukapuka e whakakopakopaiā ana ; i nekehia atu

ano hoki nga maunga katoa me nga motu i o ratou tura-nga.

15 Na, nga kingi o te whenua, nga tāngata nunui, nga tāngata taonga, nga rangatira mano, nga tāngata kaha, nga pononga katoa, me nga rangatira katoa, piri ana ratou ki roto ki nga ana, ki nga toka o nga maunga ;

16 Me te ki ake ano ratou ki nga maunga, ki nga toka, E hinga ki runga ki a matou, hei huna i a matou i te kanohi o tera e noho ana i runga i te torona, i te riri hoki o te Reme :

17 Kua taea hoki te ra nui o tona riri ; a ko wai e tu ?

UPOKO 7.

Nga pononga a te Atua ka hiritia. 9 Te huihui ki te aroaro o te Reme. 14 Marawa o ratou kakahu.

A, MURI iho i enei mea, ka kite ahau, tokowha nga anahera, e tu ana i nga pito e wha o te whenua, e pupuri ana i nga hau e wha o te whenua kia kaua e pupuhi te hau ki runga ki te whenua, kia kaua ki te moana, kia kaua ki nga rakau katoa.

2 A i kite ano ahau i tetahi atu anahera e haere ake ana i te rawhiti, kei a ia te hiri a te Atua ora : nui atu tona reo ki te karanga ki nga anahera tokowha, i tukua nei ki a ratou kia meatia he kino ki te whenua, ki te moana,

3 E mea ana, Kaua e meatia

WHAKAKITENGA 7.

he kino ki te whenua, kaua hoki ki te moana, kaua hoki ki nga rakau; kia hiritia ra ano e matou nga rae o nga pononga a to tatou Atua.

4 A i rongo ahau ki te tokomaha o te hunga i hiritia: kotahi rau e wha tekau ma wha nga mano i hiritia, no nga pu katoa o nga tamariki a Iharaira.

5 O te pu o Hura kotahi tekau ma rua nga mano i hiritia. O te pu o Reupena kotahi tekau ma rua nga mano i hiritia. O te pu o Kara kotahi tekau ma rua nga mano i hiritia.

6 O te pu o Ahera kotahi tekau ma rua nga mano i hiritia. O te pu o Nepetari-ma kotahi tekau ma rua nga mano i hiritia. O te pu o Manahe kotahi tekau ma rua nga mano i hiritia.

7 O te pu o Himiona kotahi tekau ma rua nga mano i hiritia. O te pu o Riwai kotahi tekau ma rua nga mano i hiritia. O te pu o Ihakara kotahi tekau ma rua nga mano i hiritia.

8 O te pu o Hapurona kotahi tekau ma rua nga mano i hiritia. O te pu o Hohepa kotahi tekau ma rua nga mano i hiritia. O te pu o Peniamine kotahi tekau ma rua nga mano i hiritia.

9 ¶ Muri iho i enei mea ka kite ahau, na, he mano tini e kore nei e taea e tetahi te tatau, no nga iwi katoa, no nga hapu, no nga huihuinga tāngata, no nga reo, e tu ana

i mua i te torona, i mua hoki i te Reme, he mea whakakakahu ki te kakahu ma, he nikau ano hoki kei o ratou ringaringa;

10 Nui atu to ratou reo ki te karanga, i mea ratou, Te whakaoranga, na to tatou Atua e noho nei i runga i te torona, na te Reme hoki.

11 Me te tu ano hoki nga anahera katoa i nga taha katoa o te torona, o nga kaumātua, o nga mea ora e wha, takoto tapapa ana hoki ratou ki mua i te torona, koropiko ana ki te Atua,

12 Me te ki ake ano Amine: Te whakapai, te kororia, te matauranga, te whakawhetai, te honore, te mana, te kaha, kei to tatou Atua, ake ake ake. Amine.

13 A ka oho mai tetahi o nga kaumātua, ka mea mai ki a au, Enei kua oti nei te whakakakahu ki nga kakahu ma, ko wai ra? i haere mai hoki ratou i hea?

14 Ano ra ko ahau ki a ia, E kara, e mātau ana koe. Ka mea mai ano ia ki a au, Ko te hunga tenei i haere mai i te tukinotanga nui, o ratou kakahuano hoki, he mea horoi, he mea whakama na ratou ki nga toto o te Reme.

15 Koia ratou e noho nei ki mua i te torona o te Atua, e mahi nei ki a ia i te ao, i te po, i roto i tona whare: a, tera e noho ra i runga i te torona, ka noho ano ia i roto i a ratou.

16 Kore ake o ratou matekai, kore ake o ratou matewai; e kore ano hoki te ra e

WHAKAKITENGA 7, 8.

pa iho ki a ratou, tetahi werawera ranei.

17 Ko te Reme hoki i wae-nganui o te torona hei whangai i a ratou, māna ratou e arahi ki nga puna wai ora: a ma te Atua e muru atu nga roimata katoa o o ratou kanohi.

UPOKO 8.

Te whitu o nga hiri, me nga anahera e whitu.

A, I tana wāhanga i te whitu o nga hiri, kahore he aha i rangona i te rangi me te mea he hāwhe haora.

2 I kite ano ahau i nga anahera tokowhitu i tu ra i te aroaro o te Atua; a e whitu nga tētere i hoatu ki a ratou.

3 ¶ A ka haere mai tetahi atu anahera, ka tu ki te āta, he tahu whakakakara tana, he mea koura; a he maha nga whakakakara i hoatu ki a ia, hei tapiritanga māna ki nga inoi a te hunga tapukatoa ki runga ki te āta koura i mua i te torona.

4 A, te paoa o nga whakakakara, me nga inoi a te hunga tapu, kake ana i roto i te ringaringa o te anahera i te aroaro o te Atua.

5 A ka mau te anahera ki te tahu whakakakara, whakakiia ana e ia ki te kapura o te āta, pangā ana e ia ki te whenua: na ko te putanga mai o nga reo, o nga whatitiri, o nga uira, me te ru.

6 Na kua takatu nga anahera tokowhitu i nga tētere e

whitu, ka mea ki te whakatangī.

7 ¶ Whakatangi ana te anahera tuatahi, na, he whatu tera, he kapura, he toto ano hoki i roto, ka pangā ki te whenua: na, kua pau i te ahi te wahi tuatoru o nga rakau, pau ake hoki nga tarutaru matomato katoa.

8 ¶ Te whakatangihanga a te rua o nga anahera, na, me te mea he maunga nui tera kua makā ki te moana, e ka ana i te ahi: a ka meinga te wahi tuatoru o te moana hei toto;

9 A mate iho te wahi tuatoru o nga mea hanga i roto i te moana, o nga mea whai ora; te wahi tuatoru hoki o nga kaipuke, ngaro iho.

10 ¶ A, te whakatangihanga a te toru o nga anahera, na kua taka iho i te rangi he whetū nui e kā ana, ano he rama, a taka ana ki te wahi tuatoru o nga awa, ki nga puna wai hoki;

11 Te ingoa hoki o te whetū ko Womawori: a ka meinga te wahi tuatoru o nga wai hei womawori; he tokomaha ano hoki nga tāngata i mate i nga wai, no te mea kua kawa.

12 ¶ A, te whakatangihanga a te whā o nga anahera, na kua patua te wahi tuatoru o te ra, me te wahi tuatoru o te marama, me te wahi tuatoru o nga whetū; na kua pouri te wahi tuatoru o aua mea, kihai hoki i mārama te wahi

tuatoru o te awatea, o te po ano hoki.

13 A i titiro ano ahau, a ka rangona tetahi anahera e rere ana i waenganui o te rangi, he nui tona reo ki te mea mai, Aue, aue, aue, te mate mo te hunga e noho ana i runga i te whenua, i era reo o te tētere a nga anahera to-kotoru meāke nei tangi !

UPOKO 9.

Te whetu, me te ki o te poka.

2 *Ka uakina te poka.* 12

Te aue tuatahi. 13 *nga anahera e wha.*

A TE whakatangihanga a , te rima o nga anahera, ka kite ahau i tetahi whetū kua taka iho i te rangi ki te whenua: a ka hoatu ki a ia te ki o te poka torere;

2 A uakina ana e ia te poka torere; a ka kake he paoa i roto i te poka, ano he paoa no te kapura nui; a pouri iho te ra me te rangi i te paoa o te poka.

3 A ka puta mai i te paoa he mawhitiwhiti ki runga ki te whenua: i hoatu ano ki a ratou he kaha, he pera me te kaha o nga kopiona o te whenua.

4 I korerotia ano hoki ki a ratou kia kua e kino i a ratou te tarutaru o te whenua, tetahi mea matomato ranei, tetahi rakau ranei; ko nga tāngata anake kahore nei te hiri a te Atua i o ratou rae.

5 I tukua ano hoki ki a ratou kia kua e whakamate i era, engari me whakamamae kia

rima ra ano nga marama: na, to ratou whakamamae, ano ko te whakamamaetanga a te kopiona, ina wero i te tangata.

6 A e rapu ano nga tāngata i te mate i aua ra, e kore ano e kitea; e hiahia ano ratou kia mate, heoi ka oma te mate i a ratou.

7 Na, nga ahua o nga mawhitiwhiti rite tonu ki nga hoiho kua oti te whakanoho mo te tatauranga; a i runga i o ratou mātenga he mea e rite ana ki nga karauna koura, o ratou kanohi hoki, ano he kanohi tangata.

8 He makawe ano to ratou, ano he makawe wahine, o ratou niho ano hoki, me te mea no te raiona.

9 He pukupuku ano o ratou, ano he pukupuku rino; te haruru o o ratou pakau, ano ko te haruru o nga hariata o nga hoiho maha e oma ana ki te tatauranga.

10 He hiku ano o ratou koia ano kei to te kopiona, he wero ano hoki i roto i o ratou hiku: na, he kaha to ratou hei tukino i nga tāngata, e rima nga marama.

11 He kingi ano to ratou, ko te anahera o te poka torere, tona ingoa i te reo Hiperu ko Aparona, tona ingoa i te reo Kariki ko Aporiona.

12 ¶ Kua pahemo te tuatahi o nga aue; na, e rua ake nga aue e haere mai nei i muri i enei mea.

13 ¶ Na, ka whakatangi te ono o nga anahera, a ka rongo

WHAKAKITENGA 9, 10.

ahau ki tetahi reo, e *ahu* mai ana i nga haona e wha o te āta koura i te aroaro o te Atua,

14 E mea ana ki te ono o nga anahera, kei a ia nei te tētere, Wetekina nga anahera tokowha kua oti te herehere ki te awa nui, ki Uparati.

15 Na ka wetekina nga anahera tokowha, kua rite noa ake nei, kia taka ra ano te haora, te ra, te marama, te tau, hei whakamate i te wahi tuatoru o nga tāngata.

16 A, te tokomaha o te taua o nga hoia hoiho, e rua rau nga miriona: i rongo hoki ahau ki to ratou tokomaha.

17 Ko taku tenei i kite ai i a au e titiro matakite ana, ko nga hoiho me nga kai noho i runga, he pukupuku o ratou, he mea ahi, he hakiniti, he whanariki: na, nga upoko o nga hoiho, ano he upoko rai-ona; a e puta mai ana i o ratou mangai he kapura, he paoa, he whanariki.

18 Mate ake te wahi tuatoru o nga tāngata i enei e toru, i te kapura, i te paoa, i te whanariki i puta mai i o ratou mangai.

19 Ko te kaha hoki o nga hoiho kei o ratou mangai, kei o ratou waero: o ratou waero koia ano kei te nakahi, e whai upoko ana ano, ko a ratou mea tukino enei.

20 Na, era atu tāngata kihai nei i whakamatea e enei mate, kihai ratou i ripeneta ki nga mahi a o ratou ringaringa, kihai i mutu to ratou koropiko ki nga rewera, ki nga

whakapakoko koura, hiriwa, parahi, kohatu, rakau, ki nga mea kahore nei e titiro, kahore e rongo, kahore e hae-reere:

21 Kihai ano hoki i ripeneta ki a ratou kohuru, ki a ratou mahi makutu, ki a ratou puremu, ki a ratou tahae.

UPOKO 10.

*Anahera me te pukapuka. 6
Tana oati. 8 Me kai te
pukapuka.*

A KA kite ahau i tetahi atu anahera kaha e heke iho ana i te rangi, he kapua nei te kakahu: he aniwaniwa ano i runga i tona mātenga, tona kanohi, rite tonu ki te ra, ona waewae, ki te pou kapura:

2 Kei tona ringaringa ano hoki tetahi pukapuka nohi-nohi e tuwhera ana: a e takahi ana tona waewae matau ki te moana, tona mauī ki te whenua:

3 He nui ano tona reo ki te karanga, ano he raiona e tangi ana: a ka karanga ia, ka puaki nga reo o nga whatitiri e whitu.

4 Ano ka puaki nga reo o nga whatitiri e whitu, ka mea ahau ki te tuhituhi: na ka rangona e ahau he reo i te rangi e mea mai ana ki a au, Hiritia nga mea kua whakapuakina nei e nga whatitiri e whitu, kua hoki enei e tuhi-tuhia.

5 Na, te anahera i kitea e ahau e tu ana i runga i te moana, i runga ano i te

WHAKAKITENGA 10, 11.

whenua, ara ana i a ia tona ringaringa ki te rangi,

6 A oaititia ana e ia te Mea e ora tonu ana ake ake ake, nāna nei i hanga te rangi me ona mea, te whenua me ona mea, te moana me ona mea, *i mea ia*, Na, kahore ake he taima :

7 Engari i nga ra o te reo o te whitu o nga anahera, ina mea ia ki te whakatangi, ka whakaotia te mea ngaro a te Atua, tana i kauwhau ai ki ana pononga, ki nga poropiti.

8 ¶ A ka korero ano ki a au te reo i rongo ai ahau i te rangi, ka mea, Tikina atu te pukapuka nohinohi e tuwhera ra i te ringaringa o te anahera e tu ra i runga i te moana, i runga ano i te whenua.

9 Na ka haere ahau ki te anahera, ka mea ki a ia, Homai ki a au te pukapuka nohinohi na. Ka mea mai ia ki a au, Tangohia kainga ; a ka kawa tou kopu, ka reka ia ki tou mangai, ano he honi.

10 Na ka tango ahau i te pukapuka nohinohi i te ringaringa o te anahera, kainga ana e ahau ; a i reka ano ki toku mangai, ano he honi : kainga iho e au, kua kawa toku kopu.

11 A ka mea mai ano ia ki a au, Me poropiti ano koe ki nga huihuinga tokomaha o nga tāngata, ki nga iwi, ki nga reo, ki nga kingi.

UPOKO 11.

Ruritanga o te temepara. 3

Nga kai whakaatu tokorua,

7 ka whakamatea : 11 ka

ara ano. 14 *Aue tuarua.*

15 *Whitu o nga tetere.*

NA kua homai ki a au he kakaho e rite ana ki te tokotoko : a ka tu te anahera, ka mea mai, E ara, whangangā te whare o te Atua, me te āta, me te hunga e koropiko ana i roto.

2 Me whakarere ia ki waho te marae i te taha ki waho o te whare tapu, kua ia e whangangā ; kua hoatu hoki ki nga tauwiwi : a e takatakahia e ratou te pa tapu, e wha tekau ma rua nga marama.

3 A maku e hoatu *he tika-nga* ki aku kai whakaatu tokorua, a e poropiti raua, kotahi mano e rua rau e ono tekau nga ra, he taratara ano te kakahu.

4 Ko nga oriwa e rua enei, me nga turanga rama e rua e tu nei i te aroaro o te Atua o te whenua.

5 A ki te mea tetahi ki te tukino i a raua, ka puta mai he kapura i o raua mangai, e pau ai o raua hoa riri : ki te mea hoki tetahi ki te tukino i a raua, ko te whakamate-nga tenei mona.

6 Kei a raua te tikanga mo te kopani i te rangi, kia kua e ua te ua i nga ra o ta raua poropititanga : kei a raua ano te tikanga mo te whakaputa ke i nga wai hei toto, mo te patu ano i te whenua ki nga patunga katoa, i nga wa katoa e pai ai raua.

7 Ano ka mutu ta raua whakaatu, ka whawhai ki a raua te kararehe e haere ake ana i roto i te poka torere, a e

WHAKAKITENGA 11, 12.

taea raua e ia, e whakamatea raua.

8 *Ka takoto* ano o raua tinana ki te huarahi o te pa nui, e karangatia wairuatia nei ko Horoma, ko Ihipa, ki te wahi hoki i ripekatia ai to tatou Ariki.

9 A e toru nga ra me te hāwhe e tirohia ai o raua tinana e nga huihuinga tāngata, e nga hapu, e nga reo, e nga iwi, e kore ano hoki e tukua o raua tinana kia hoatu ki te urupa.

10 A e koa ki a raua te hunga e noho ana i te whenua, e hari, e hoatu ano he mea hoatu noa e tetahi ki tetahi; no te mea i whakamamae enei poropiti tokorua i te hunga e noho ana i te whenua.

11 A, muri iho i nga ra e toru me te hāwhe, ka tapoko te manawa ora ki a raua, he mea na te Atua, a ka tu o raua waewae ki runga; nui atu hoki te wehi i pa ki te hunga e titiro ana ki a raua.

12 A ka rongo raua i te reo nui no te rangi, e mea ana ki a raua, Haere ake korua ki konei. Na haere atu ana raua ki te rangi i roto i te kapua; me te titiro ano o raua hoariri ki a raua.

13 I taua haora ano nui atu te ru, a ka hinga te wahi whakatekau o te pa, a e whitu mano tāngata i mate i taua ru: na ka matakū era atu, a hoatu ana e ratou he kororia ki te Atua o te rangi.

14 Kua pahemo te rua o nga aue; na ka hohoro te

toru o nga aue te haere mai.

15 ¶ *Ka whakatangi* ano te whitu o nga anahera; na, he nui nga reo i te rangi, e mea ana, Kua riro nga rangatiratanga o te ao i to tatou Ariki, i tana Karaiti hoki; a ko ia hei kingi ake ake ake.

16 Na, nga kaumātua e rua tekau ma wha, e noho ana i te aroaro o te Atua i runga i o ratou torona, ka takoto ratou, ko o ratou kanohi ki raro, ka koropiko ki te Atua,

17 Ka mea, Ko ta matou whakawhetai atu tenei ki a koe, e te Ariki, e te Atua Kaha rawa; tenei koe inaianei, i mua ano koe, a kei te haere mai ano; no te mea kua riro i a koe tou mana nui, a e kingi ano koe.

18 I riri hoki nga iwi, kua tae mai hoki tou riri, me te wamō nga tupāpaku e whakawakia ai, e hoatu ai hoki e koe he utu ki o pononga, ki nga poropiti, ki te hunga tapu ano hoki, ki te hunga ano e wehi ana i tou ingoa, ki te hunga nonohi, ki te hunga nunui; e whakangaromia ai hoki te hunga e whakangaro nei i te whenua.

19 ¶ A i whakapuaretia ano te whare o te Atua i roto i te rangi, a ka kitea te āka o tana kawenata i roto i tona whare: na, he uira tera, me nga reo, me nga whatitiri, me te ru, me te whatu nui.

UPOKO 12.

Wahine me tona kakahu. 3
Te tarakona. 5 Ka whanau.

WHAKAKITENGA 12.

6 *Karere.* 7 *Te whawhaita-
nga ki te tarakona.* 13 *Ta
te tarakona ki te wahine.*

NA ka kitea he tohu nui i te rangi; he wahine, ko te ra tona kakahu, ko te mara-rama kei raro i ona waewae, a i runga i tona mātenga ko nga whetū kotahi tekau ma rua hei karauna:

2 Kua hapū hoki ia, na karan-nga ana, oke ana, he mamae whanautanga.

3 A ka kitea tetahi atu tohu i te rangi, na, he tarakona nui, he mea whero, e whitu ona mahunga, tekau ona haona, a e whitu ano nga karauna i runga i ona mahunga.

4 A e kumea ana e tona hiku te wahi tuatoru o nga whetū o te rangi, makā ana e ia ki te whenua: a ka tu te tarakona i te aroaro o te wahine i mea nei ki te whanau, hei kai i tana tamaiti ina whanau.

5 Na ka whanau he tamaiti tāne, māna nei e whakahaere tikanga mo nga iwi katoa ki te tokotoko rino: na kua kahakina atu tana tamaiti ki te Atua, ki tona torona hoki.

6 A ka oma te wahine ki te koraha, kua rite noa ake hoki i te Atua he kāinga mona ki reira, ki reira whangainga ai ia kia taka ra ano nga ra kotahi mano e rua rau e ono tekau.

7 ¶ Na, he whawhai tera kei te rangi: ko Mikaera ratou ko ana anahera e whawhai ana ki te tarakona; whawhai

ana hoki te tarakona ratou ko ana anahera.

8 A kihai ratou i toa; kihai ano hoki to ratou wahi i kitea i te rangi i muri iho.

9 Na ka makā te tarakona nui, te nakahi onamata, e karangatia nei ko te Rewera, ko Hatana hoki, e whakapohēhē nei i te ao katoa: ka makā ia ki te whenua, ko ia ratou tahi ko ana anahera i makā atu.

10 A ka rongo ahau i te reo nui i te rangi e ki ana, Tenei kua tae mai te whakaoranga, te kaha, me te rangatiratanga o to tatou Atua, me te mana hoki o tana Karaiti: no te mea kua whakatakā te kai whakapa hē ki o tatou tēina, e whakapa hē nei ki a ratou i te ao, i te po, i te aroaro o to tatou Atua.

11 Hinga ana ia i a ratou, he meatanga hoki na nga toto o te Reme, na te kupu hoki o ta ratou whakaaturanga: kihai ratou i aroha ki te ora mo ratou, a mate noa.

12 Kia hari koutou ki tenei, e nga rangi, e te hunga hoki e noho ana i reira. Aue, te mate mo te hunga e noho ana i te whenua, i te moana hoki! kua heke atu hoki ki a koutou te rewera, nui atu hoki tona riri, no te mea kua mātau ia he poto tona wa.

13 ¶ Ano ka kite te tarakona kua makā ia ki te whenua, ka whakatoia e ia te wahine nāna te tamaiti tāne i whanau nei.

14 Na, e rua nga pakau o te

ekara nui kua hoatu ki te wahine, kia rere ai ia ki te koraha, ki tona kāinga, ki reira whangainga ai a taka noa he taima, etahi taima, me te hāwhe taima, kei kitea mai e te nakahi.

15 Na ka ruakina mai he wai, ano he awa, e te nakahi, i tona mangai i muri i te wahine, kia kahakina atu ai ia e te awa.

16 A ka awhinatia mai te wahine e te whenua, ka hāmama te mangai o te whenua, inumia ake te awa i ruakina mai nei e te tarakona i roto i tona mangai.

17 Heoi riri ana te tarakona ki te wahine; haere ana ia ki te whawhai ki era atu o tana whanau, ki te hunga e pupuri ana i nga ture a te Atua, kei a ratou nei te whakaaturanga o Ihu Karaiti.

UPOKO 13.

Te kararehe i te moana. 11

Tetahi atu kararehe. 14

Ana tikanga.

NA, i te tu ahau i te one o te moana, a ka kite ahau i tetahi kararehe e haere ake ana i te moana, e whitu ona mahunga, tekau nga haona, kotahi hoki tekau nga karauna i runga i ona haona, a i runga i ona mahunga ko te ingoa kohukohu.

2 A rite tonu te kararehe i kite ai ahau ki te reparo; ona waewae, kei o te pea; tona mangai, kei te mangai o te raiona; a ka hoatu e te tarakona tona kaha ki a ia, tona torona, he nui ano te mana.

3 A i kite ano ahau i tetahi o ona mātenga me te mea kua marū, he mea e mate rawa ai; heoi kua ora ia i tona patunga e mate ai ia: na kei te miharo te ao katoa i muri te kararehe.

4 Na koropiko ana ratou ki te tarakona nāna nei i hoatu te mana ki te kararehe: koropiko ana hoki ki te kararehe: i mea ratou, Ko wai te rite ana ki te kararehe? Ko wai te kaha ana ki te whawhai ki a ia?

5 A i hoatu ano ki a ia he mangai, *he kore*ro nui, he korero kohukohu nei tana korero; i hoatu ano hoki ki a ia he kaha e mahi ai ia, a taka noa nga marama e wha tekau ma rua.

6 A ka puaki i tona mangai he kohukohu ki te Atua, he kohukohu ki tona ingoa, ki tona nohoanga, ki te hunga hoki e noho ana i te rangi.

7 I tukua ano ki a ia kia whawhai ki te hunga tapu, kia taea hoki ratou e ia: i hoatu ano ki a ia he mana ki nga hapu katoa, ki nga reo, ki nga iwi.

8 Ka koropiko ano hoki ki a ia te hunga katoa e noho ana i te whenua, kahore nei o ratou ingoa i tuhituhia ki te pukapuka o te ora a te Reme no te timatanga iho ra ano o te ao nei tona whakamatenga.

9 Ki te mea he taringa to tetahi, kia rongo ia.

10 Te tangata hopu taurekareka, ka riro ia hei taurekareka: he tangata e patu ana ki te hoari, ka patua ano ia

ki te hoari. Tenei te manawanui me te whakapono o te hunga tapu.

11 ¶ I kite ano ahau i tetahi atu kararehe e haere ake ana i roto i te whenua; e rua ona haona, rite tonu ki o te Reme, a i rite ki ta te tarakona tana korero.

12 Kei a ia ano nga mana katoa o te kararehe tuatahi hei mahi ki tona aroaro, e mea ana hoki ia i te whenua me te hunga hoki e noho ana i reira kia koropiko ki te kararehe tuatahi, kua ora nei tona patunga e mate ai ia.

13 He nui hoki nga tohu e meatia ana e ia, e mea ana ia i te kapura kia heke iho i te rangi, ki te whenua, i te aroaro o nga tāngata.

14 E whakapohēhē ana ano ia i te hunga e noho ana i te whenua, ki nga tohu ka hoatu nei ki a ia kia mahia ki te aroaro o te kararehe; e mea ana ia ki te hunga e noho ana ki te whenua, kia hangā he whakapakoko mo te kararehe i patua nei ki te hoari, a kua ora ano.

15 I hoatu ano ki a ia kia hoatu he wairua ki te whakapakoko o te kararehe, e korero ai te whakapakoko o te kararehe, e mea ai hoki i te hunga e kore e koropiko ki te whakapakoko o te kararehe kia whakamatea.

16 I mea ano hoki ia i te hunga katoa, i te iti, i te rahi, i te hunga whai taonga, i te hunga rawakore, i nga ranga-

tira, i nga pononga, kia meatia ki a ratou he tohu ki o ratou ringaringa matau, ki o ratou rae ranei:

17 Kia kaua hoki tetahi e hoko mai e hoko atu ranei, ko te tangata anake kei a ia nei te tohu, te ingoa ranei o te kararehe; te whika ranei o tona ingoa.

18 Tenei te matauranga. Ma te tangata whai whakaaro e tatau te whika o te kararehe: he whika tangata hoki. Na, tona whika, E ono rau e ono tekau ma ono.

UPOKO 14.

Te Reme i Maunga Hiona.

-6 Anahera e karuwhau ana.

8 Horonga o Papurona. 14

Kotinga witi. 17 Riri o te Atua.

I KITE ano ahau, na, he Reme e tu ana i Maunga Hiona, kotahi rau e wha tekau ma wha mano ona hoa, me te ingoa o tona Matua, he mea tuhituhi ki o ratou rae.

2 Na ka rongo ahau i te reo no te rangi, tona rite kei te haruru o nga wai maha, kei te haruru ano o te whatitiri nui: i rongo ano ahau i te reo o nga kai whakatangi hāpa e whakatangi ana i a ratou hāpa:

3 A ta ratou waiata me te mea he waiata hou i mua i te torona, i mua hoki i nga mea ora e wha, i nga kaumātua ano hoki: e kore hoki e taea e tetahi te ako taua waiata, ko nga mano anake kotahi rau e wha tekau ma wha, kua oti

WHAKAKITENGA 14.

nei te hoko i runga i te whenua.

4 Ko te hunga tenei kahore nei i poke i te wahine; he wahina hoki ratou. Ko te hunga tenei e aru ana i te Reme ki nga wahi e haere ai ia. He mea hoko enei i roto i te tangata, he mātāmua ki te Atua, ki te Reme hoki.

5 Kahore hoki he tinihanga i mau i o ratou mangai: he koha-kore hoki ratou i mua i te torona o te Atua.

6 ¶ A i kite ano ahau i tetahi atu anahera e rere ana i wae-nganui o te rangi, kei a ia te rongo pai mau tonu hei kau-whau māna ki te hunga e noho ana i te whenua, ki nga iwi katoa, ki nga hapu, ki nga reo, ki nga huihuinga tangata.

7 He nui tona reo ki te mea mai, Kia wehi koutou ki te Atua, hoatu ki a ia he kororia; kua tae mai hoki te haora e whakarite whakawa ai ia: koropiko hoki ki te Kai hanga o te rangi, o te whenua, o te moana, me nga puna wai.

8 ¶ A i aru mai ano tetahi atu anahera, i mea, Kua horo, kua horo a Papurona, te pa nui, i whakainu nei i nga tauwi katoa ki te waina o te riri o tona puremu.

9 ¶ A i aru mai ano te toru o nga anahera i a raua, nui atu tona reo ki te mea mai, Ki te koropiko tetahi ki te kararehe, ki tona whakapakoko hoki, a ka tango i te

tohu ki tona rae, ki tona ringaringa ranei,

10 E inu ano ia i te waina o te riri o te Atua, e ringitia nei, he mea whakananu-kore, ki roto ki te kapa o tona riri; e whakamamaetia hoki ia i roto i te kapura, i te whanariki i te aroaro o nga anahera tapu, i te aroaro hoki o te Reme:

11 A kake ana te paoa o to ratou whakamamaetanga, ake ake: kahore hoki he okiokinga i te ao, i te po, mo te hunga e koropiko ana ki te kararehe, ki tona whakapakoko hoki, mo te tangata hoki e tango ana i te tohu o tona ingoa.

12 Tenei te manawanui o te hunga tapu: tenei te hunga e pupuri ana i nga ture a te Atua, i te whakapono hoki o Ihu.

13 ¶ A ka rongo ahau i tetahi reo i te rangi e mea mai ana ki a au, Tuhituhia, Ka hari nga tupāpaku e mate nei i roto i te Ariki i nga wa i muri nei: Ae ra, e ai ta te Wairua, kia okioki ai ratou i a ratou mahi; e aru tahi hoki a ratou mahi i a ratou.

14 ¶ I titiro ano ahau, na, he kapua ma, a i runga i te kapua tetahi e noho ana, tona rite kei te Tama a te tangata, a i runga i tona mahunga he karauna koura, i roto ano i tona ringaringa he toronaihi koi.

15 Na ko te putanga mai o tetahi atu anahera i roto i te whare tapu, he nui tona reo

ki te karanga ki tera e noho ra i runga i te kapua, Akina iho to toronaihi, kotia: kua taea hoki te wa e kokoti ai koe; kua maroke hoki te koti-nga o te ao:

16 Katahi tera e noho ra i runga i te kapua ka aki iho i tana toronaihi ki te whenua, a ka kotia te whenua.

17 ¶ A ka puta mai ano he anahera i roto i te whare tapu i te rangi, he toronaihi koi ano hoki tana.

18 Na ka puta mai ano tetahi atu anahera i roto i te āta, kei a ia he mana ki te kapura; he nui tona reo ki te karanga ki tera i te toronaihi koi, i mea ia, Akina iho to toronaihi koi, whakiiia nga tautau o te waina o te whenua; kua maoa hoki ona karepe.

19 Na akina iho ana tana toronaihi e te anahera ki te whenua, whakiiia ana e ia te waina o te whenua, pangā ana e ia ki te takahanga nui o te riri o te Atua.

20 Na ka takahia te takahanga waina i waho o te pa, a puta ake ana he toto i roto i te takahanga, tae noa ake ki nga paraire o nga hoiho, a taea noatia nga paronga kotahi mano e ono rau.

UPOKO 15.

Nga anahera e whitu me nga whiu e whitu. 2 Waiata a nga toa. 5 Nga oko e whitu e ki ana i te riri.

A I kite ano ahau i tetahi atu tohu i te rangi, he mea nui, he mea whakami-

haro, tokowhitu nga anahera kei a ratou nga whiu whakamutunga e whitu; ko te whakaotinga hoki enei o to te Atua riri.

2 ¶ A ka kitea e ahau *he mea* e rite ana ki te moana karahi, he mea whakananu ki te kapura: a, te hunga i kaha i te kararehe, i tona whakapakoko, i tana tohu, i te whika *ano hoki* o tona ingoa, e tu ana i runga i te moana karahi, kei a ratou ano nga hāpa a te Atua.

3 A kei te waiata ratou i te waiata a Mohi, pononga a te Atua, i te waiata ano a te Reme; i mea ratou, He nui au mahi, e miharotia ana, e te Ariki, e te Atua Kaha rawa; tika tonu ou ara, pono tonu, e te Kingi o te hunga tapu.

4 Ko wai e kore e matakuri a koe, e whakakororia hoki i tou ingoa, e te Ariki? *ko koe* anake hoki te Mea tapu: e tae mai hoki nga tauwi katoa, e koropiko ki tou aroaro; kua whakakitea hoki o tikanga.

5 ¶ A muri iho i enei mea ka kite ahau, na kua puare te whare tapu o te tapenakara o te whakaaturanga i te rangi:

6 Na ka puta mai i roto i te whare tapu nga anahera e whitu, i a ratou nei nga whiu e whitu, o ratou kakahu he rinena ma, he mea kanapa, he mea whitiki o ratou uma ki te whitiki koura.

7 A ka hoatu e tetahi o nga

WHAKAKITENGA 15, 16.

mea ora e wha ki nga ana-hera e whitu etahi oko koura e whitu, ki tonu i te riri o te Atua e ora nei, a ake ake ake.

8 Na kua ki te whare tapu i te paa, he mea na te kororia o te Atua, na tona kaha hoki: kihai hoki tetahi tangata i ahei te tomo ki te whare tapu, kia mutu ra ano nga whiu e whitu a nga anahera e whitu.

UPOKO 16.

2 *Ka ringihia nga oko.* 8 *Nga whiu.* 15 *Haerenga mai o te Karaiti.*

A KA rongo ahau i te reo nui, he mea no roto i te whare tapu, e mea ana ki nga anahera e whitu, Haere koutou, ringihia nga oko o te riri o te Atua ki te whenua.

2 ¶ Na haere ana te tuatahi, ringihia ana e ia tana oko ki te whenua; a kua pa he mariaio kino, whakarihariha, ki nga tangata kei a ratou nei te tohu a te kararehe, ki te hunga hoki e koropiko ana ki tona whakapakoko.

3 ¶ Na ka ringihia e te tuarua o nga anahera tana oko ki te moana; a ka meinga hei toto, ano no te tupāpaku: a ka mate nga wairua ora katoa i roto i te moana.

4 ¶ Na ka ringihia e te tuatoru o nga anahera tana oko ki nga awa, ki nga puna wai; a ka meinga hei toto.

5 I rongo ano ahau i te ana-

hera o nga wai e mea ana, Tika tonu koe, e te Ariki, tenei koe inaianei, i mua ano koe, ko te Mea Tapu hoki koe, nau hoki enei whakarite whakawa.

6 I ringihia hoki e ratou nga toto o te hunga tapu, o nga poropiti, a hoatu ana e koe he toto ki a ratou kia inumia; he mea tika hoki ma ratou.

7 I rongo ano ahau i tetahi atu i roto i te āta e mea ana, Ae ra, e te Ariki, e te Atua Kaha rawa, pono tonu, tika tonu āu whakaritenga whakawa.

8 ¶ Na ka ringihia e te tuawha o nga anahera tana oko ki te ra; a ka hoatu ki a ia kia tunua nga tangata ki te ahi.

9 Na, he nui te tununga i tunua ai nga tangata, a kohukohua ana e ratou te ingoa o te Atua, kei a ia nei te tika nga mo enei whiu: kihai hoki ratou i ripeneta, i hoatu i te kororia ki a ia.

10 ¶ Na ka ringihia e te tuarima o nga anahera tana oko ki te torona o te kararehe; a ka whakapouritia tona rangatiratanga; a ngaua ana e nga tangata o ratou arero i te mamae,

11 Kohukohua ana hoki e ratou te Atua o te rangi mo o ratou mamae, mo o ratou mariaio, kihai ano ratou i ripeneta ki a ratou mahi.

12 ¶ Na ka ringihia e te tuaono o nga anahera tana oko ki te awa nui, ki Uparati;

WHAKAKITENGA 16, 17.

a mimiti ake tona wai, he mea kia rite ai te huarahi o nga kingi o te rawhiti.

13 A i kite ano ahau i nga wairua poke e toru, te rite kei te poroka, *e puta mai ana* i te mangai o te tarakona, i te mangai hoki o te kararehe, i te mangai ano hoki o te poropiti teka.

14 Ko nga wairua hoki ratou o nga rewera, e mahi ana i nga tohu, e haere atu ana ki nga kingi o te whenua o te ao katoa, ki te huihui i a ratou ki te whawhai i taua ra nui o te Atua Kaha rawa.

15 Nana, ka haere atu ahau, anō he tahae. Ka hari te tangata e mataara ana, e tiaki ana i ona kakahu, kei haere tahanga ia, kei kitea tona whakama.

16 Na ka huihuia ratou e ia ki tetahi wahi e karangatia nei i te reo Hiperu ko Ara-makerona.

17 ¶ Na ka ringihia e te anahera tuawhitu tana oko ki te takiwa o te rangi: a ka puta mai he reo nui i te whare tapu o te rangi, i te torona, e mea ana, Kua mutu.

18 A ka puta he reo, he wha-titiri, he uira, me te ru nui; kahore he ru i pera te nui no te oroko-nohoanga ra ano o nga tângata ki te whenua.

19 Na ka wehea te pa nui, e toru nga wahi, a ka horo nga pa o nga tauwi: a ka maharatia Papurona nui i te aroaro o te Atua, hoatu ana ki a ia te kapa o te waina o te aritarita o tona riri.

20 A oma ana nga motu katoa, kihai ano i kitea nga maunga.

21 I heke iho ano hoki he whatu nui ki nga tângata i te rangi, kei to te taranata te taimaha: a kohukohua ana te Atua e nga tângata mo te whiu a te whatu; he nui rawa hoki tana whiu.

UPOKO 17.

Te wahine, 5 ara a Papurona. 9 Ona mahunga e whitu; ona haona kotahi tekau. 14 Kei te Reme te papa. 16 Whiu mo te wahine puremu.

NA ka haere mai tetahi o nga anahera e whitu kei a ratou nei nga oko e whitu, a ka korero mai ki a au, ka mea mai ki a au, Haere mai; maku e whakakite ki a koe te whakawakanga o te wahine puremu, o te mea nui e noho ana i runga i nga wai maha:

2 Kua puremutia nei e nga kingi o te whenua, a haurangi iho te hunga e noho ana i te whenua i te waina o tona puremu.

3 Na ka arahina wairuatia ahau e ia ki te koraha: a ka kite ahau i tetahi wahine e noho ana i runga i tetahi kararehe whero, kapi tonu i te ingoa kohukohu, e whitu ona mahunga, tekau nga hao-na.

4 Na, te kakahu o te wahine ra he mea papura, he mea whero, he mea whakapaipai ki te koura, ki te kohatu utu nui, ki te peara, he kapa koura ano kei tona ringa, ki

WHAKAKITENGA 17.

tonu i te mea whakarihariha, i te poke hoki o tona puremu :

5 I tona rae ano hoki tetahi ingoa, tuhituhi rawa, KO TE MEA NGARO, KO PAPURONANUI, KO TE WHAEA ONGAWAHINE PUREMU, O NGA MEA WHAKARIHARIHA HOKI O TE AO.

6 I kite ano ahau i taua wahine nei e haurangi ana i nga toto o te hunga tapu, i nga toto hoki o nga kai whakaatu i a Ihu: a, toku kitenga i a ia, nui atu te miharotanga i miharo ai ahau.

7 A ka mea mai te anahera ki a au, He aha koe i miharo ai? maku e korero ki a koe taua mea ngaro, te wahine, me te kararehe hoki e waha ra i a ia, nona nei nga mātenga e whitu me nga haona kotahi tekau.

8 Te kararehe i kite ra koe, i mua ia, kahore hoki inaianei; ka puta ake ano hoki ia a mua i roto i te poka torere, a ka riro atu ki te whakangaromanga: na, te hunga e noho ana i te whenua, kahore nei o ratou ingoa i tuhituhia ki te pukapuka o te ora o te oroko-hanganga ra ano o te ao, ka miharo ratou ina kite i te kararehe i ora i mua, a kahore nei inaianei, a, tenei ake ka puta.

9 Tenei te hinengaro whai mahara. Nga mātenga e whitu, e whitu era maunga, kei reira te wahine e noho ana i runga i era.

10 Na, e whitu era kingi: tokorima kua hinga, kotahi tenei, ko tetahi kahore ano i

tae noa mai; a ka tae mai ia, me noho ia, he wa iti nei.

11 Na, te kararehe, te mea i mua ra, a kahore nei inaianei, ko te tuawaru ano ia, no nga tokowhitu ano hoki, e riro ano ia ki te whakangaromanga.

12 Na, nga haona kotahi tekau i kite ra koe, kotahi tekau era kingi, kahore ano kia whiwhi noa ki tetahi rangatiratanga; heoi kotahi te haora e whiwhi tahi ai ratou ko te kararehe ki te mana, me te mea he kingi,

13 Kotahi tonu te whakaaro nui o enei, e hoatu ano e ratou to ratou kaha, to ratou mana ki te kararehe.

14 E whawhai ano enei ki te Reme, a e taea ano ratou e te Reme: no te mea ko te Ariki ia o nga ariki, ko te Kingi o nga kingi: na, ona hoa ano hoki he hunga karanga, he hunga whiriwhiri, he hunga pono.

15 I mea mai ano ia ki a au, Nga wai i kitea e koe i te nohoanga o te wahine puremu ra, ko nga huihuinga tangata ratou, ko nga mano, ko nga iwi, me nga reo.

16 Na, nga haona kotahi tekau i kitea e koe i runga i te kararehe, e kino ano enei ki te wahine puremu, ka meinga ia e ratou kia mōti rawa ilho, kia noho tahanga, e kai ano ratou i ona kikokiko, e tahu hoki i a ia ki te ahi.

17 Kua hoatu hoki e te Atua ki o ratou ngakau kia whakarite i tana i pai ai, kia kotahi ano hoki o ratou wha-

kaaro, kia hoatu hoki e ratou to ratou rangatiratanga ki te kararehe, kia rite ra ano nga kupu a te Atua.

18 Na, te wahine i kite na koe, ko te pa nui ia, kei a ia nei te kingitanga ki nga kingi o te ao.

UPOKO 18.

Papurona ka horo. 4 Kei noho ki reira. 9 Tangi o nga tangata nunui ki a ia. 20 Hari o te hunga tapu.

A MURIho i enei mea, ka kite ahau i tetahi atu anahera e heke iho ana i te rangi, he mana nui tona; mārama tonu hoki te ao i tona kororia.

2 He nui ano tona reo, he kaha tana karanga, i mea ia, Kua horo, kua horo a Papurona nui, kua meinga hei kaimana rewera, hei whare herehere hoki mo nga wairua poke katoa, hei whare herehere mo nga manu poke katoa, mo nga manu whakarihariha.

3 Kua inu hoki nga tauiwi katoa i te waina o te riri o tona puremu, i puremu hoki nga kingi o te whenua ki a ia, kua whai taonga hoki nga kai hoko o te ao i te nui o ana mea papai.

4 ¶ I rongo ano ahau i tetahi atu reo i te rangi, e mea ana, Puta mai koutou i roto i a ia, e toku iwi, kei uru tahi koutou ki ona hara, kei pāngia koutou e ona whiu.

5 Kua tutuki hoki ona hara ki te rangi, a kua mahara te Atua ki ana mahi hē.

6 Hoatu ki a ia tana i hoatu ai ki a koutou, takiruatia nga mea mona, kia rite ki ana mahi: te kapa i whakakiiia e ia, kia rua a koutou whakakiiinga mona.

7 Na, i whakanui ia i a ia, i torere ki ana mea whakahuareka, kia pera ano te mamae me te pouri e hoatu e koutou ki a ia: e mea ana hoki ia i tona ngakau, E noho ana ahau hei kuini, ehara hoki ahau i te pouaru, e kore ano hoki ahau e kite i te pouri.

8 Mo konei ano ka tae mai ona whiu i te ra kotahi, te mate, te pouri, te mate kai; a ka tahuna ia ki te ahi: e kaha ana hoki te Ariki, te Atua e whakawa nei i a ia.

9 A e tangi ki a ia, e aue ki a ia nga kingi o te ao i puremu nei ki a ia, i torere ngatahi nei ki ana mea whakahuareka, ina kite ratou i te paoa o tona tahunga;

10 Ka tu mai ratou i tawhiti i te wehi ki tona whakamaetanga, ka mea, Aue, aue, te pa nui, a Papurona, te pa kaha! kua tae mai hoki tou whakawakanga i te haora kotahi.

11 Ka tangi ano hoki nga kai hoko o te whenua, ka aue ki a ia; no te mea kahore atu he tangata hei hoko i ta ratou utanga mai:

12 I te utanga mai o te koura, o te hiriwa, o te kohatu utu nui, o te peara, o te rinena pai, o te papura, o te hirika, o te kahu whero, me nga rakau taini katoa, me

WHAKAKITENGA 18.

nga tini oko rei, me nga tini oko rakau utu nui whaka-
harahara, *oko* parahi, rino,
mapere,

13 Me te hinamona, me nga
mea kakara, me te hinu ka-
kara, me te parakihe, me te
waina, me te hinu, me te
paraoa pai, me te witi, me
nga kararehe, me nga hipi,
menga hoiho, menga hariata,
me nga pononga, me nga wai-
rua tangata.

14 Heoi kua mahue koe i
nga hua i hiahitia e tou nga-
kau, kua mahue hoki koe i
nga mea ngako katoa, i nga
mea papai, heoi ano kitenga
o aua mea e koe.

15 Nga kai hoko o enei mea,
kua whai taonga nei i a ia,
tu ana ratou i tawhiti i te
wehi ki tona whakamamae-
tanga, me te tangi, me te aue
ano ratou,

16 Me te ki ano ratou, Aue,
aue, te pa nui, i kakahuria ki
te rinena pai, ki te papura,
ki te whero, i whakapaia ki
te koura, ki te kohatu utu
nui, ki nga peara!

17 Kotahi tonu hoki te haora
a mōti rawa iho taua taonga
nui. Na, nga rangatira kai-
puke katoa, me te hunga
katoa e huihui ana ki runga
ki nga kaipuke, me nga kai
whakaterē kaipuke, me te
hunga katoa kei te moana
a ratou mahi, tu mai ana
ratou i tawhiti,

18 Me te karanga ano ratou
i to ratou kitenga i te paoa o
tona tahunga, me te ki ano
ratou, Ko tehea *pa* i rite ki
tenei pa nui?

19 Opehia ana hoki e ratou
he oneone ki o ratou mahu-
nga, kei te karanga ratou, he
tangi, he aue, kei te mea,
Aue, aue, te pa nui, i whai
taonga ai i ona utu nui te
hunga katoa he kaipuke o
ratou i te moana! kotahi tonu
nei hoki te haora a mōti rawa
iho.

20 Kia hari ki a ia, e te ra-
ngi, e nga apotoro tapu ano
hoki, e nga poropiti; kua
whakaritea nei hoki e te Atua
ta koutou whakawa i a ia.

21 ¶ Katahi ka hapainga ake
e tetahi anahera kaha he ka-
maka i rite nei ki tetahi
kamaka rahi no te mira, a
makā ana e ia ki te moana,
me te ki ano ia, Ka peneitia
a Papurona, te pa nui, ka
makā whakareretia atu, e kore
ano hoki e kitea a muri nei.

22 Na, heoi ano rongonga i
roto i a koe ki te reo o nga
kai whakatangi hāpa, o nga
kai whakatakoto rangi waiata,
o nga kai whakatangi i nga
putorino, i nga tētere; e kore
ano hoki e kitea i nga wa i
muri nei tetahi kai mahi o
nga tini mahi i roto i a koe;
e kore ano hoki e rangona
i nga wa i muri nei te haruru
o te kohatu mira i roto i a koe;

23 E kore ano hoki e kitea i
nga wa i muri nei te māra-
ma o te rama i roto i a
koe; e kore ano hoki e ra-
ngona i nga wa i muri nei te
reo o te tāne marena hou, o
te wahine marena hou, i roto
i a koe: ou kai hokohoko
hoki ko nga tāngata nunui o

WHAKAKITENGA 18, 19.

te ao; na o mahi makutu ano hoki i pohēhē ai nga iwi katoa.

24 I kitea ano hoki i roto i a ia nga toto o nga poropiti, o te hunga tapu, o te hunga katoa hoki i whakamatea ki runga ki te whenua.

UPOKO 19.

Whakamoemiti ki te Atua.

7 *Marenatanga o te Reme.*

10 *Ka pehia to Hoani koropiko e te anahera.* 11 *Parekura.*

NA, muri iho i enei mea ka rangona e ahau he reo nui me te mea no te mano tini i te rangi, e mea ana, Areruia; Te whakaoranga, te kororia, te honore, te kaha, kei te Ariki, kei to tatou Atua:

2 He pono hoki, he tika ana whakaritenga whakawa: kua whakaritea hoki e ia te whakawa mo te wahine puremu, mo te mea nui i hē ai te whenua i tona puremu, kua rapua ano e ia he utu i a ia mo nga toto o ana pononga.

3 Na ka tuaruatia ano ta ratou meatanga, Areruia. Heoi kake ake ana te paoa o taua pa, ake ake ake.

4 A takoto ana nga kaumātua e rua tekau ma wha me nga mea ora e wha, koropiko ana ki te Atua e noho ana i runga i te torona, mea ana, Amine; Areruia.

5 A ka puta mai he reo i te torona, e mea ana, Whakamoemiti atu ki to tatou Atua, e ana pononga katoa, e te

hunga hoki e wehi ana i a ia, e te hunga iti, e te hunga nunui.

6 Na ka rangona ano he reo e ahau me te mea no te mano tini, me te mea he haruru no nga wai maha, me te mea he haruru no nga whatitiri kaha, e mea ana, Areruia: ka kingi hoki te Ariki, te Atua Kaha rawa.

7 Kia hari tatou, kia koa, kia hoatu he kororia ki a ia: kua taea hoki te marenatanga o te Reme, kua oti ano te whakapai a tana wahine i a ia ano.

8 A i tukua ki a ia kia whakakaburia ki te rinena ma, ki te rinena kanapa: na, te rinena ra, ko te tika o te hunga tapu.

9 I mea mai ano ia ki a au. Tuhituhia, Ka hari te hunga kua karangatia ki te hapa o te marenatanga o te Reme. Ka mea mai ano ia ki a au, Ko nga kupu pono enei a te Atua.

10 Na ka takoto ahau ki mua i ona waewae, ka mea kia koropiko ki a ia. A, ka mea mai ia ki a au, Kauaka: ko tou hoa pononga ano ahau, no ou tuākana hoki kei a ratou nei te whakaaturanga i a Ihu: me koropiko ki te Atua: ko te whakaaturanga hoki i a Ihu ta te wairua o te poropititanga.

11 ¶ A ka kite ahau i te rangi e tuwhera ana, na, he hoiho ma; a, te ingoa o tona kai noho ko te Pono, ko te Tika, kei runga i te tika tana

WHAKAKITENGA 19, 20.

whakarite whakawa, tana whawhai.

12 Ona kanohi, ano he mura ahi, i runga ano i tona mātenga nga karauna maha; he ingoa tona kua oti te tuhi-tuhi, e kore nei tetahi e mātau, ko ia anake.

13 Te kakahu i kakahuria e ia he mea tuku ki te toto: te ingoa i karangatia ai ia, ko te Kupu a te Atua.

14 E haere ana hoki i muri i a ia nga taua, era i te rangi, o ratou hoiho ano he ma, he mea whakakakahu ano ratou ki te rinena ma, ki te mea paru-kore.

15 E puta mai ana hoki i roto i tona mangai he hoari koi, hei patu māna i nga tauwi: he rino ano hoki te tokotoko e tohutohu ai ia i a ratou: e takahi ana hoki ia i te takahanga waina o te aritarita o te riri o te Atua Kaha rawa.

16 He ingoa ano tona, tuhi-tuhi rawa ki tona kakahu, ki tona huha, KO TE KINGI O NGA KINGI, KO TE ARIKI O NGA ARIKI.

17 ¶ I kite ano ahau i tetahi anahera e tu ana i te ra; a he nui tona reo ki te karanga, i mea ia ki nga manu katoa e rere ana i waenganui o te rangi, Haere mai, me huihui mai ki te hapa a te Atua nui;

18 Ki te kai i nga kikokiko o nga kingi, i nga kikokiko o nga rangatira mano, i nga kikokiko o te hunga kaha, i nga kikokiko o nga hoiho, o

o ratou kai noho hoki, i nga kikokiko o nga tāngata katoa, o nga mea ehara nei i te pononga, o nga pononga ano hoki, o te hunga nonohi, o te hunga nunui.

19 ¶ A ka kite ahau i te kararehe, me nga kingi o te whenua, me a ratou taua, kua huihuia ki te whawhai ki tera e noho ana i runga i te hoiho, ki tana taua hoki.

20 Na ka hopukina te kararehe raua tahi ko te poropiti teka i mahi ra i nga tohu ki tona aroaro, i pohēhē aite hunga i tango i te tohu o te kararehe, i koropiko hoki ki tona whakapakoko. Na pangā oratia ana raua tokorua ki te roto kapura e kā ana i te whanariki.

21 Na, te hunga i toe, i whakamatea ratou e tera e noho ra i runga i te hoiho ki te hoari e puta ra i roto i tona mangai: a makona ana nga manu katoa i o ratou kikokiko.

UPOKO 20.

Herenga o Hatana. 4 Aranga tuatahi. 7 Hatana ka wetekia. 8 Koka raua ko Makoka. 10 Te rewera ki te roto kapura. 11 Aranga nui.

I KITE ano ahau i tetahi anahera e heke iho ana i te rangi, kei a ia te ki o te poka torere, me tetahi mekameka nui i tona ringaringa.

2 Na ka mau ia ki te tarakona, ki te nakahi onamata, ko te Rewera nei ia, ko Ha-

tana hoki, ka herehere i a ia kotahi mano nga tau;

3 Ka makā ia e ia ki te poka torere, uakina atu ana, whakapiri rawa te hiri ki runga ki a ia, kei whakapohēhē ia i nga tauwi i muri iho, kia taka ra ano nga tau kotahi mano: a, muri iho i enei mea, me wewete ia he taima roto.

4 ¶ I kite ano ahau i nga torona, a e noho ana ratou i runga, i hoatu ano hoki te whakarite whakawa ki a ratou: i nga wairua hoki o te hunga i poutoa mo te whakaaturanga i a Ihu, mo te kupu hoki a te Atua, *te hunga* kahore i koropiko ki te kararehe, ki tona whakapakoko ranei, kihai hoki i meatia te tohu ki o ratou rae, ki o ratou ringaringa; na, ka ora ratou, ka kingi tahi me te Karaiti, kotahi mano tau.

5 A kihai i ora ake te toenga o nga tupāpaku, a taka noa nga tau kotahi mano. Ko te aranga tuatahi tenei.

6 Hari tonu, tapu tonu te tangata he wahi nei tona i te aranga tuatahi: e kore te matenga tuarua e whai mana ki a ratou; engari hei tohunga ratou ma te Atua, ma te Karaiti hoki, a kotahi mano nga tau e kingi tahi ai ratou me ia.

7 ¶ Ano ka pahemo nga tau kotahi mano, ka wetekina a Hatana i roto i tona whare herehere,

8 A ka haere ia ki te whakapohēhē i nga tauwi i nga

pito e wha o te whenua, i a Koka raua ko Makoka, e huihui i ratou ki te taua: te tokomaha o ratou rite tonu ki te onepu o te moana.

9 Na haere ana ratou ki te whanui o te whenua, karapotia ana e ratou te nohoanga o te hunga tapu, me te pa e arohaina ana: na ko te heketanga iho o te kapura i te Atua, i te rangi, pau ake ratou.

10 Na, te Rewera i whakapohēhē nei i a ratou, pangā ana ia ki te roto kapura whanariki, ki te wahi kei reira nei te kararehe me te poropiti teka, a ka whakamaetia ratou i te ao, i te po, ake ake ake.

11 ¶ A i kite ano ahau i tetahi torona nui, he mea ma, i tetahi hoki e noho ana i runga, rere ana te whenua me te rangi i tona kanohi; kahore hoki i kitea he wahi mo raua.

12 I kite ano ahau i te hunga mate, i te hunga ririki, i te hunga nunui, e tu ana i te aroaro o te Atua; na, kua whakatuwheratia nga pukapuka: kua whakatuwheratia ano hoki tetahi atu pukapuka, ara to te orange: a kei nga mea i tuhituhia ki aua pukapuka he whakarite nga whakawa mo te hunga mate, he mea whakarite tonu ki a ratou mahi.

13 I tukua mai ano e te moana te hunga mate i roto i a ia; i tukua mai ano e te mate, e te po te hunga mate i

roto i a raua: na ka whakaritea te whakawa mo tetahi, mo tetahi, he mea whakarite ki a ratou mahi.

14 Na ka pangā te mate me te po ki te roto ahi. Ko te tuarua tenei o nga mate.

15 A, te tangata kihai i kitea kua oti te tuhituhi ki te puka-puka o te ora, i pangā ia ki te roto ahi.

UPOKO 21.

Rangi hou, whenua hou. 9

Hiruharama i te rangi. 23

Tona ra ko te Atua. 24

Hakari a nga kingi.

I KITE ano ahau i te rangi hou, i te whenua hou: kua pahemo hoki te rangi tuatahi, me te whenua tuatahi; a kahore atu he moana.

2 I kitea ano e ahau, e Hoani, te pa tapu, a Hiruharama hou, e heke iho ana i te Atua, i te rangi, rite rawa ano he wahine marena hou kua oti te whakapaipai mo tana tāne.

3 I rongo ano ahau i te reo nui i te rangi e mea ana, Na, kei nga tāngata te tapenakara o te Atua, a e noho ia ki a ratou, ko ratou hoki hei iwi mana, ko te Atua nei ano hoki hei hoa mo ratou, hei Atua ano mo ratou.

4 Ka murua hoki e te Atua nga roimata katoa i o ratou kanohi; a kore ake he mate, kahore he aue, kahore he tangi, kahore he mamae i nga wa i muri nei: kua pahemo hoki nga mea o mua.

5 A ka korero tera e noho ra i runga i te torona, Na

ka hangā houtia e ahau nga mea katoa. I mea mai ano ia ki a au, Tuhituhia: no te mea he pono, he tika enei kupu.

6 I mea mai ano ia ki a au, Kua oti. Ko ahau te Arepa me te Omeka, te timatanga me te whakamutunga. Ka hoatu noa e ahau ki te tangata mate wai he wai no te puna o te ora.

7 Te tangata i a ia te wiktoria, e whiwhi ia ki nga mea katoa; ko ahau ano hei Atua mona, a ko ia hei tama maku.

8 Na, te hunga wehi, te hunga whakateka, te hunga whakarihariha, nga kai kohuru, te hunga puremu, te hunga makutu, te hunga karakia ki te whakapakoko, te hunga teka katoa, te wahi mo ratou kei te roto e kā ana i te ahi, i te whanariki: ko te matenga tuarua tenei.

9 ¶ Na ka haere mai ki a au tetahi o nga anahera e whitu, kei a ratou nei nga oko e whitu e ki ana i nga whiu whakamutunga e whitu; ka ki mai ki a au, ka mea, Haere mai, maku e whakakite ki a koe te wahine marena hou, te wahine a te Reme.

10 Na kawea wairuatia ana ahau e ia ki tetahi maunga, he nui, he tiketike, a ka whakakitea mai ki a au te pa nui, a Hiruharama tapu, e heke iho ana i te rangi, i te Atua;

11 Kei taua pa ano te ko-

WHAKAKITENGA 21.

roria o te Atua: rite tonu tona mārama ki to te kohatu he nui whakaharahara nei ona utu, rite tonu ki te kohatu hahapa, e mārama nei me he karahi;

12 He taiepa *kohatu* ano tona, he mea nui, he mea tiketike, tekau ma rua nga tatau, kotahi tekau ma rua ano nga anahera i nga tatau, tuhituhi rawa ki te ingoa, ara ki o nga hapu kotahi tekau ma rua o nga tama a Iharaira:

13 I te rawhiti e toru nga tatau; i te hauraro e toru nga tatau; i te tonga e toru nga tatau; i te hauauru e toru nga tatau.

14 Te taiepa ano hoki o te pa, kotahi tekau ma rua ona turanga, kei aua *turanga* ano nga ingoa o a te Reme, apototo kotahi tekau ma rua.

15 Na, tera i korero ra ki a au, he kakaho koura tana hei whanganga māna i te pa, i ona tatau, i tona taiepa *kohatu*.

16 Na, te takoto o te pa, e whangapoti, tonaroa rite tonu ki tona whanui: na ka whangangā e ia te pa ki te kakaho, kotahi tekau ma rua mano nga paronga. Tona roa, te whanui, me te ikeike, rite tonu.

17 Na, ka whangangā ano e ia tona taiepa *kohatu*, kotahi rau e wha tekau ma wha nga whatianga, he ruri no te tangata, ara no te anahera.

18 Na, te mea i hangā ai tona taiepa *kohatu*, he hahapa: he koura para-kore ano

hoki te pa, rite tonu ki te karahi mārama.

19 He mea whakapaipai ano ki nga kohatu utu nui katoa nga turanga o te taiepa *kohatu* o te pa. Te turanga tuatahi, he hahapa; te tuarua, he hapaira; te tuatoru, he karakeroni; te tuawha, he emerara;

20 Te tuarima, he hararonika; te tuaono, he harariu; te tuawhitu, he karihorita; te tuawaru, he perira; te tua-iwa, he topaha; te ngahuru, he karihoparaha; te tekau ma tahi, he hakiniti; te tekau ma rua, he ametihita.

21 Na, nga tatau kotahi tekau ma rua, kotahi tekau ma rua peara: tenei tatau, tenei tatau, kotahi tonu peara: a, te huarahi o te pa, he koura para-kore, ko ia ano kei te karahi piata.

22 Na kihai ahau i kite i tetahi whare tapu i reira: ko te Ariki hoki, ko te Atua Kaha rawa raua ko te Reme te whare tapu o reira.

23 Na, kahore taua pa i mea ki te ra mona, ki te marama ranei, hei whiti ki roto: e whakamāramatia ana hoki a reira e te kororia o te Atua, ko te Reme hoki tona mārama.

24 A e haere i tona mārama nga iwi o te hunga e whakaorangia ana: e kawea mai ano hoki e nga kingi o te ao to ratou kororia me to ratou honore ki reira.

25 E kore ano ona tatau e tutakina i te awatea: kore ake hoki o reira po.

WHAKAKITENGA 21, 22.

26 E kawea mai ano te kororia me te honore o nga tauuiwi ki reira.

27 E kore ano e tomo ki reira tetahi mea whakanoa, e mahi ana ranei i te mea whakarihariha, i te teka ranei: ko te hunga anake kua oti te tuhituhi ki ta te Reme puka-puka o te ora.

UPOKO 22.

Awa wai ora. 2 Rakau o te ora. 5 Te whakamarama mo te pa. 8 Kaua e koropiko ki te anahera. 18 Kei tapiritia mai he kupu ki ta te Atua; kei tangohia atu.

NA ka whakakitea mai e ia ki a au he awa ora, e piata ana me te karahi, e puta mai ana i te torona o te Atua raua ko te Reme.

2 I waenganui o tona huarahi, o te awa ano hoki, i tetahi taha, i tetahi taha, te rakau o te ora, kotahi tekau ma rua ona hua, e hua ana ona hua i tetahi marama, i tetahi marama: a ko nga rau o te rakau hei whakaoranga mo nga tauuiwi.

3 A kore ake he kanga i muri nei: ko reira ano hoki te torona o te Atua raua ko te Reme; a ka mahi ana pononga ki a ia:

4 E kite hoki ratou i tona kanohi; ka mau hoki tona ingoa ki o ratou rae.

5 Kore ake hoki o reira po; kore ake o ratou meatanga ki te rama, ki te marama hoki o te ra; e marama hoki ratou i te Ariki, i te

Atua: a e kingi ratou, ake ake ake.

6 ¶ I mea mai ano ia ki a au, He pono, he tika enei kupu: a kua tonoa e te Ariki, e te Atua o nga poropiti tapu, tana anahera hei whakakite mai ki ana pononga i nga mea ka hohoro nei te meinga.

7 Na ka hohoro toku haere atu: ka hari te tangata e whakarite ana i nga kupu o te poropititanga o tenei puka-puka.

8 ¶ A i kite ano ahau, a Hoani, i rongo ki enei mea. A toku rongonga, toku kitenga, ka hinga ahau ki raro, ka mea kia koropiko ki mua i nga waewae o te anahera i whakakitea mai ai enei mea ki a au.

9 Na ko tana meatanga mai ki a au, Kauaka: he hoa pononga hoki ahau nou, no ou tuākana hoki, no nga poropiti, no te hunga ano e pupuri ana i nga kupu o tenei puka-puka: me koropiko ki te Atua.

10 ¶ Ka mea mai ano ia ki a au, Kaua e hiritia nga kupu o te poropititanga o tenei pukapuka: e tata ana hoki te tauma.

11 Te tangata e hē ana te whakahaere, kia hē ano te whakahaere: te tangata e poke ana, kia poke ano ia: te tangata e tika ana, kia tika ano ia: te tangata e tapu ana, kia tapu ano ia.

12 Na ka hohoro toku haere atu; kei a au ano taku utu, a ka rite ki ana mahi ake

WHAKAKITENGA 22.

nga mea e hoatu ki tetahi, ki tetahi.

13 Ko ahau te Arepa me te Omeka, te timatanga me te whakamutunga, te tuatahi me te whakaotinga.

14 Ka hari te hunga e mahi ana i ana ture, ka taunga hoki ratou ki te rakau o te ora, ka tomo ano ki te pa ra nga tatau.

15 Kei waho nga kuri, me te hunga makutu, me te hunga puremu, me nga kai kohuru, me te hunga karakia ki te whakapakoko, me te hunga katoa e pai ana ki te teka, e mahi ana hoki.

16 ¶ Kua tonoa e ahau, e Ihu, taku anahera hei whakaatu i enei mea ki a koutou i roto i nga hahi. Ko ahau te pakiaka me te uri o Rawiri, te whetū mārama o te ata.

17 ¶ E mea ana hoki te Wairua me te wahine marena hou, Haere mai. Me ki ake ano e te tangata e rongo ana, Haere mai. Kia haere mai

hoki te tangata e hiainu ana: kia tangohia noatia ano te wai ora e te tangata e hiahia ana.

18 ¶ He whakaatu hoki naku tenei ki te hunga katoa e rongo ana ki nga kupu o te poropititanga o tenei pukapuka, Ki te tapiritia e tetahi ki enei mea, ka tapiritia ano e te Atua mona nga whiu kua oti te tuhituhi ki tenei pukapuka:

19 A ki te tangohia atu e tetahi he kupu i te pukapuka o tenei poropititanga, ka tangohia e te Atua tona wahi i roto i te pukapuka o te ora, i te pa tapu hoki, i nga mea hoki kua oti te tuhituhi ki tenei pukapuka.

20 ¶ Tenei te ki nei te kai whakaatu o enei mea, Na ka hohoro ano toku haere atu. Amine. Ae ra, haere mai, e te Ariki, e Ihu.

21 ¶ Kia tau ki a koutou katoa te atawhai o to tatou Ariki, o Ihu Karaiti. Amine.

TE MUTUNGA.

HE

HIMENE

MO

TE KARAKIA KI TE ATUA

[HYMNS IN THE MAORI LANGUAGE]

AUCKLAND SUNDAY SCHOOL UNION
MACKY LOGAN'S BUILDINGS
DARBY STREET, AUCKLAND

1916

NGA MEA O ROTO O TENEI PUKAPUKA.

HIMENE.

MO TE ATA	1 — 4
MO TE AHIAHI	5 — 13
MO TE RATAPU	14 — 21
MO TE HAERENGA MAI	22 — 26
MO TE WHANAUTANGA O TE KARAITI .	27 — 30
MO TE TIMATANGA O TE TAU	31, 32
MO TE WHAKAATURANGA	33, 34
MO RENETI	35 — 38
MO TE MATENGA O TE KARAITI	39 — 48
MO TE ARANGA	49 — 52, 173
MO TE KAKENGA	53, 54
MO TE PETEKOHA	55, 56
MO NGA WA KATOA	57 — 157, 174 — 186
MO TE HAPA A TE ARIKI	158 — 162. 187
MO TE IRIHRI	163, 164
MA TE TAMARIKI	165 — 170
HE INOI	171, 172
TAPIRI	173 187

NGA RANGI O NGA HIMENE.

Ko te nuinga o nga Rangi o nga Himene e tohutohungia nei i te timatanga o ia Himene, o ia Himene, no roto i te pukapuka e kiia nei te ingoa, ko "Hymns Ancient and Modern." Te whika i te taha o te ingoa o te Rangi, ko te whika o taua Rangi i roto i taua pukapuka. E iwa nga Rangi kahore i roto i taua pukapuka. E wha o enei, ko to te 70 o nga Himene, ko to te 130, ko to te 168, ko to te 174, no roto i te pukapuka e kiia nei ko te "Hymnal Companion." Ko to te 132 no te "Bristol Tune Book." Ko to te 166 no te pukapuka e kiia nei ko "Sacred Songs and Solos." Ko to te 137, ko to te 173, me to te 176, kahore i roto i tetahi o enei pukapuka.

HE HIMENE MO ETAHI WA.

Ko etahi o nga Himene, he mea tuturu mo tona wa, mo tona wa. Tenei ano ia etahi o nga "Himene mo nga wa katoa" e tau ano mo etahi o aua wa i motuhia nei he Himene mo reira, mo etahi mahi ano hoki a te Hahi.

1. Mo te timatanga o te tau, 146.
2. Mo te Whakaunga, 88, 102, 103, 113, 114, 141, 142, 143, 144, 148, 180, 181, 182.
3. Mo te Motuhanga Minita, 113, 114, 143, 144, 155, 182.
4. Mo te Kawe i te Rongopai ki nga Tauwiwi, 115, 156, 176.
5. Mo te Tanu Tupapaku, 129, 149, 150, 151, 152.
6. Mo te Ohaoha, 157.

HE WHAKAATU

I NGA RARANGI TIMATANGA.



Aetia ki a Ihu	179
Ahau e inoi atu nei	150
Ahau e whakarangia nei	147
Ao ana mai ano te ra	21
Arahina, e Ihowa	100
Aroha mai, e te Atua	58
Au, e Ihu, tirohia	94
E Ihu, akona matou	98
E Ihu, e te Kingi nui	156
E Ihu, homai ra e koe	99
E Ihu, kei mamao ra koe	9
E Ihu, kiia mai e koe	90
E Ihu, kua rongo matou	123
E Ihu, Reme a t' Atua	181
E Ihu, tenei au	125
E Ihu, toku oranga	92
E Ihu, whakaaro mai koe	132
E Ihu, whakarongo mai	83
E kino koe te Ingoa nei	76
E koe e noho nei	141
E koe, i na tou reo	115
E koe, te Kingi atawhai	155
E koutou, e nga tangata	74
E koutou e tiaho nei	33
E koutou katoa, kia oho rapea	71
E koutou, whakatata mai	47
E koutou whakatata mai	158
E oho, e te wairua	1
E rahi koe, e te Atua	68
E tama ma, kia rongo mai	163
E te Ariki atawhai	79
E te Atua, e ngaro nei	160
E te Atua, ko koe nei ra	146
E te Atua, kua ruia nei	116
E te Atua, titiro mai	2
E te kahui iti nei	105
E te Matua aroha	162
E te Matua, nou na te aroha	187
E te Toka ingoa nui	95
E te Wairua Kai-hanga	113
E tini koe nga mahi he	110
E toku nei Atua pai	5

HE WHAKAATU

Haere mai ra koutou	30
Ha! ka puta mai a Ihu	22
Ha! nei te reo, tau ana mai te oro	128
Ha! whakarongo! nei te reo	25
He aha ra i nana ai	101
He ahuareka pu ki a au	75
He ara tini nga mamae	145
He aroha nou e Ihu	8
He hari to te tangata	108
He hari to te tangata	109
Hei tohu mou kia tika ai	164
He mahi huna ta t' Atua	149
He mano, mano tini	136
He mano nga tamariki	169
He pono koia e t' Atua	161
He pouri noku mo te he	87
He rongo pai te oranga	70
Hiruharama, toku pa	138
Hoia o te Hahi	174
Homai, e Ihu, he ngakau	96
Hono tonu i ia ra	66
Hou tonu i nga ra katoa	4
I mate moku koe	180
I puta mai t' Atua i mua	55
I whakamaroa a Ihu	44
Ka haere mai a Ihu	170
Kahore noa kia to te ra	13
Kahore ra i konei	131
Kai-whakaora atawhai	178
Ka mahue Ihipa	130
Ka paingia ra te tangata	107
Ka puao mai ano te ra	17
Karanga ana mai te reo	35
Karangatia ra e katoa	139
Ka tae te okiokinga	14
Ka taka mai ano te ra	15
Ka taka mai te Hapati	16
Ka tirohia te ripeka	43
Ka whakahari te Atua	124
Ka whakapai i runga ra	72
Kei riri tonu mai	122
Kia hari, e te ao katoa	61
Ki ana mai te wairangi	121
Ki ana mai to Ihu reo	86
Kia oho rapea tatou	19
Kia rangona enei kupu	77
Kia rongo mai koutou	97
Koe, Karaitiana nei	103
Ko Ihowa te Atua	65

HE WHAKAATU

Ko Ihowa te Atua	82
Ko Ihu nana tenei ki	143
Ko Ihu ra, e kingi ia	140
Ko Ihu toku Hepara	81
Ko koe, e Ihu, tena	88
Ko koe, e te Atua	62
Ko koe te Ara, mau ahau	185
Kororia nui, e te Atua	3
Kororia nui, e te Atua	6
Ko tatou, iti nei ano	167
Koutou, hoia pono nei	142
Koutou katoa ra, mea iti nei	166
Koutou, te hunga i nga he	91
Kua ae ahan, e Ihu	186
Kua ara t' Ariki	49
Kua kake atu koe	53
Kua whakatarea a Ihu	42
Mahue rawa tenei ao	133
Ma Ihu ra e whakawa	120
Mamao mai nei ahau	127
Marama pai, ahau e kimi nei	84
Maranga tatou e	73
Mate koe i te mauui	85
Ma te marie a t' Atua	171
Me mau koe i tou ripeka	144
Me tito taku waiata	40
Na a tatou hanga kino	41
Na wai i whakamatea ai	45
Nei ra ka puta mai	26
Nei te wa e pouri ai	168
Nei tonu ia te tino ra	36
Nei touu ko te ra	18
No hea tenei ope nui	135
Nui mai te panga o te hau	154
Nga mano iwi o te ao	63
Nga pai katoa e ranea nei	157
Nga wahi ra e mine ai	112
Ora nei ko t' Ariki	52
Oti kia whakama ahau	104
Oti ko tatou e mate	119
Pahure marie ana ra	31
Pa mai nga hau pukeri nui	93
Pannitia ki nga tauwi, nei te Kingi nui	176
Piko nei te matenga	152
Piriniha tapu	78
Pumau ki te Atua	129
Ra hari nui i kiia ai	67
Rangi tapu, rangi koa	51

HE WHAKAATU

Rangona te himene	27
Ta Ihu poroaki mai	182
Takoto iwikore nei	126
Tiku nei e koa ai au	175
Tama ngakau marie	80
Tangi ana mai te oro	24
Tango iho t' Ariki	151
Tapu, Tapu, Tapu, Ihowa Kaha rawa	57
Tau mai te pouritanga nui	153
Tau te pouri, nui nga mate	184
Te Ariki, hei a au koe noho ai	10
Te Ariki, tenei au	38
Te Ariki tino pai	32
Te Ariki tohu	117
Te Atua, nau nei i hanga	12
Te hunga noho pouri nei	34
Te Karaiti, t' Ariki	50
Tena ka waiata	64
Tena kia waiata tatou	60
Tenei ahau ka waiata	54
Tenei matou ka tuohu	7
Tenei te Ariki	173
Tenei te atawhai	159
Tera ia te hoa aroha	165
Te ra nei ka toene	11
Tera te ao marama nui	134
Tera te maunga rongo nui	39
Tera te wahi pai	137
Te take o te Hahi	102
Te Wairua pono, atawhai	56
Te Wairua Tapu, atawhai	114
Tini mate, raru nui	148
Tino o nga ra katoa	20
Tino wha tekau nga ra	37
Titiro mai, e te Atua	111
To Ihu tino atawhai	172
Tokotoru Tapu, Nui	59
Toku wairua, oho mai	89
Tu ana mai a Hoani	23
Tu ana mai nga wahine	48
Tu mai te temepara pai	177
Tupono mai nga Hepara	29
Wairua Tapu, atawhai	183
Whakaaroa mai, e te Atua	106
Whakahuatia mai he waiata hou	69
Whakarongo, e mea ma	118
Whakarongo ki te kupu	46
Whakarongo ki te reo	28

HIMENE.

MO TE ATA.

1 *Ka ara wawe ano ahau.*—Wai. lvii. 8.

L. M.

Rangi, **Intercession.** 456.

1 **E** OHO, e te Wairua,
E E ara i te moenga !
Maranga tahi me te ra,
He mahi mau me timata.

2 Kei rite tenei ki nga ra
Kahore nei he huanga ;
Whaia i tenei ra te pai,
Ano hei tenei mutu ai.

3 O taranata tuku mai,
Me mahi kia hua ai ;
Maharatia taua ra,
Te Rangi o te Whakawa.

4 O mahi me o korero,
Me pono pu, me tupato :
Tou hinengaro kia ma ;
Ka kitea e te Atua.

MO TE ATA

- 5 Na, o te Rangi karere,
Te whakapai, te himene !
Te ngakau nei, maranga ra !
E uru ki nga waiata.

2 *I takoto iho ahau, i moe ; i ara ake ano ; na Ihowa
hoki ahau i whakamau ake.*—Wai. iii. 5.

C.M.

Rangi, **Clifton.** 433.

- 1st E TE Atua, titiro mai,
Tenei te hoa whawhai
Te tohe ake nei, te mea
Kia whakamatea au.
- 2 Oti ko koe, e te Atua,
Kia tata tonu mai,
Hei pa e ora ai ahau
I oku hoa whawhai.
- 3 I takoto ahau, i moe,
I ara mai ano ;
Nau hoki ra i tiaki,
Koia i ora ai.
- 4 He mahi tohu tenei nau,
He atawhai ki a au ;
Ma konei au ka ora ai,
Ua awhitia e koe.

3 *Ka ara wawe ano hoki ahau.*—Wai. cviii. 2.

L.M.

Rangi, **Commandments.** 3.

- 1 KORORIA nui, e te Atua,
Ki a koe i te ata nei ;
Nau tonu ra i atawhai
I pono ake ai ahau,

MO TE ATA

- 2 Tenei ahau ka whakahou
I aku kupu pono mou ;
Mau ia ahau e ako mai
Kia aru pono atu ai.
- 3 Te Wairua Tapu tukua mai
Hei whakakaha i ahau ;
Kia ruia ai ko oku he,
Kia whaia ai nga mahi pai.
- 4 Nga mea e mahia e ahau,
Whakaaro, kupu, aha noa,
Me tohutohu mai e koe,
Kia mahia tikatia e au.
- 5 Kia whakapaingia te Atua
I takea ai nga pai katoa ;
Matua, Tama, Wairua Tapu,
Kia whakapaingia tonutia.

4 *E kore ana mahi aroha e mutu : i tenei ata, i tenei ata, e hou tonu ana.*—Tangi iii. 22, 23.

L.M.

Rangi, **Melcombe.** 4.

- 1 Hou tonu i nga ra katoa
Nga mahi tohu a t' Atua ;
Au marie ana toku moe,
Me toku ara ora mai.
- 2 He atawhai, he tohu nui
Na tenei Kai-tiaki pai
I whakawhiwhia ai ahau
Ki enei painga ranea mai.
- 3 Me whakarite e ahau
Nga mea katoa e pai ai ia :
Me inoi ra kia tukua mai
Te Wairua whakakaha mai.

MO TE AHIAHI

- 4 Me ata mahi e ahau
Nga mahi o nga ra katoa ;
Me rapu ko te tikanga
E tata ai ki te Atua.

MO TE AHIAHI.

- 5 *Ka hari ahau ki te taumarumarutanga iho o ou pakau.*—Wai. lxiii. 7.

L.M.

Rangi, **Canon.** 23.

- 1 E toku nei Atua pai,
He tini ke au atawhai :
I tenei po me waiata
Au mahi tohu o te ra
- 2 He Kingi nui koe ra,
Ko to te ao nei Kawana ;
Tauawhitia iho au
Ki raro i ou parirau.
- 3 Murua oku heanga
I he ai au i tenei ra ;
Ko toku rongo kia mau,
Ka ata moe ai ahau.
- 4 Hei runga i tou atawhai
Ahau nei okioki ai ;
Ko koe toku taiepa
Kei tata mai a Hatana.
- 5 E raro nei, e runga ra !
Tena, he whakanuinga
Ki te Atua Tapu ra,
Matua, Tama, Wairua.

MO TE AHIAHI

6 *Ka hipokina koe e ia ki ona hou, a ka piri koe ki raro i ona pakau.*—Wai. xci. 4.

L.M.

Rangi, **Canon.** 23.

- 1 KORORIA nui e te Atua
Ki a koe ra i tenei po ;
Ahau nei awhitia e koe
Ki raro i ou parirau.
- 2 Murua e koe nga he katoa
I he ai au i tenei ra ;
Kia noho tika ai ahau
Ki a koe, ki te ao katoa.
- 3 Akona mai te noho pai,
Kia mate tika ai ahau ;
Akona mai te matenga
E whiwhi ora ai ahau.
- 4 Araia atu ra e koe
Nga panga mate kino mai ;
Kia whirinaki ai ahau
Ki runga ki tou atawhai.
- 5 Kia whakapaingia te Atua
I takea ai nga pai katoa ;
Matua, Tama, Wairua Tapu,
Kia whakapaingia tonutia.

7 *Ko koe anake, e Ihowa, hei mea kia au toku noho.*—
Wai. iv. 8.

8 7 8 7 7 7.

Rangi, **Irby.** 329

- 1 TENEI matou ka tuohu
Tuku nei i te whakapai,
Mo au tini mahi tohu,
Mo au tini atawhai.

MO TE AHIAHI

Nau, e Ihu, enei pai ;
Matou tiakina mai.

- 2 Mano tini au aroha
 O te ata mai ano ;
Hono tonu mai te oha,
 Taea iho nei te po.
 Nei te wa e moe ai ;
 Matou tiakina mai.
- 3 Maha nei a Whiro patu
 Tini ana whakawai ;
Mau ano e arai atu ;
 Mau e whakaora mai.
 Roto tenei ao whawhai,
 Matou tiakina mai.
- 4 Waiho mau e arataki
 Enei waewae puta ke,
Kei kotiti ki tahaki,
 Kei tapeka ki te he.
 E te Kai-tiaki pai,
 Matou tiakina mai.

8 *E kore tou Kai-tiaki e moe.*—Wai. cxxi. 3.

8 7 8 7 7 7.

Rangi, **Dretzel**. 25.

- 1 HE aroha nou, e Ihu,
 Tenei ra i kitea ai :
Tiakina hoki matou
 I te roa o tenei po.
 Atawhaitia mai e koe ;
 Mau ano ka ora ai.

MO TE AHIAHI

- 2 Tenei matou, he manene
Noho waenga i te he ;
Nei ra tiakina iho
I o matou hoa whawhai.
'Tino awhitia e koe
Ki ou ringa atawhai.

- 3 Ka pahure enei wahi
Me nga ra e ora ai ;
A ka tata ki te mate ;
Whakakahangia e koe.
'Tangohia ki te rangi
Okioki atu ai.

9

E noho ki a maua.—Ruka xxiv. 29.

L. M.

Rangi, **Hursley**. 24.

- 1 E IHU kei mamao ra koe,
Kia tata tonu ki ahau ;
Kei tu he kapua arai mai,
Te ata kitea atu koe.
- 2 E mahi au te ra roa nei,
Moe iho ranei i te po,
Taku e ohia atu ai,
Ko toku Kai-tiaki pai.
- 3 Kia tata koe te ao, te po,
Hei arataki i ahau :
Kia tata koe, tupono noa
Te ra e mate ai ahau.
- 4 I takahia i tenei ra
Tou reo aroha, atawhai ?
E Ihu, timataia mai
Te ako ki te mahi pai.

MO TE AHIAHI

5 Awhinatia nga turoro ;
Te rawakore tiakina ;
Te ngakau pouri tirohia ;
Manaakitia mai te katoa.

6 Kia tata koe hei whakapai
I a au ano e ora nei,
A tae noa ki te mutunga,
Te wa e okioki ai.

10 *E noho ki a maua, kua ahiahi hoki, kua titaha te*
ra.—Ruka xxiv. 29.

10 10 10 10.

Rangi, **Eventide.** 27.

1 TE Ariki, hei a au koe noho ai,
He ponga hoki tenei no te ra ;
Tupono noa nga mate o te ao,
Kia tata mai ; hei a au koe noho ai.

2 Nga ra e ora ai te tangata,
Ano he tai e timu atu nei :
E koe, te take o te oranga,
Kia tata mai ; hei a au koe noho ai.

3 Mau ano ra ka tino pono ai
He whainga tupu ki te hoa whawhai.
Mau ano au e ata arahi :
Kia tata mai ; hei a au koe noho ai.

4 E kore au e ohooho noa
I enei he e whakararu nei :
E karo au nga whakawai katoa ;
E toa ahau ; kia tata mai ia koe.

- 5 Whakaaria mai tou Ripeka ki a au ;
Tiaho mai ra roto i te po :
Ki kona au titiro atu ai :
Ora, mate, hei a au koe noho ai.

11 *Ko koe anake, e Ihowa, hei mea kia au toku noho.*
Wai. iv. 8.

7 6 7 6 8 8. Rangi, **St. Anatolius.** 21.

1 TE ra nei ka toene,
Tu ake ko te po,
Me ngakau hari ake
Ahau ki te Atua.
E Ihu, tiakina mai
Kei he ahau a tenei po.

2 Nei tonu ka pahure
Nga painga o te ra ;
Me hara-kore hoki
Ahau i tenei wa.
E Ihu, tiakina mai
Kei he ahau a tenei po.

3 Nei tonu ka tutuki
Nga mahi o te ra ;
Me himene te hari.
Te kupu whakapai.
E Ihu, tiakina mai
Kei he ahau a tenei po.

4 Ko koe hei Kai-tiaki
Kia pono ai ahau :
Ko koe te matau ana
Ki oku mate nui.
E Ihu, whakarongo mai ;
Ahau ra, tohungia e koe.

MO TE AHIAHI

12 *Ka korerotia iho koe e ia ki ana anahera.—Wai. xci. 11.*

8 4 8 4 8 8 8 4.

Rangi, **Nutfield.** 26.

- 1 Te Atua, nau nei i hanga
Te ao, te po ;
Tino atawhaitia matou
I tenei wa.
Kiia ma nga anahera
Matou e tiaki iho
Kei tupono mai he mate
Te po roa nei.
- 2 Mau ra matou e awhina
A mate noa ;
Mau ra matou e arahi
Kia ora ai.
Oha mai te reo karanga,
Te Atua, kei waiho matou ;
Ata whakaminea atu
Ki te rangi.

13 *Na i te ahiahi, i te toenetanga o te ra, ka mauria mai e ratou ki a ia nga turoro katoa, me te hunga e nohoia ana e nga rewerera.—Maka i. 32, 33.*

L. M.

Rangi, **Angelus.** 20.

- 1 KAHORE noa ki to te ra,
Ka hui, ka whakamine mai
Te hunga mate tinana,
E Ihu, nau i ora ai.
- 2 Kua ahiahi nei ano ;
Ko matou kei te mine mai :
Kahore nei tou tinana,
Ko koe ia, tenei tonu koe.

MO TE RATAPU

- 3 E Ihu, anga mai nei ra,
Aroha mai, manaaki mai ;
Tenei ano nga mate he,
Ngau whakaroto tonu nei.
 - 4 Kahore ra he tangata
Hei mahi pono i te pai ;
Tu ake he whakaaro mou,
Kei roto ko nga mahi he.
 - 5 Kei a koe ra te mana nui,
Te ora mo nga mate nei.
Ki mai tou reo, kia pono ai
Ko tenei ora mo katoa.
-

MO TE RATAPU.

14 *Tera atu ano he okiokinga mo te iwi a te Atua.—*
Hip. iv. 9.

8 8 8 8 8 8.

Rangi, **Preston.** 387.

- 1 KA tae te okiokinga,
Te ra e tino pai ana ;
Ka tangi nei te tetere
E mine ai nga tangata :
Kia rongu koutou ki te reo
No to Ihowa kainga nui.
- 2 Ka tae nei matou ki konei,
Nau, e Ihowa, tenei pai,
A koe kia whakakitea mai,
Kia hari ai o tangata :
Ko koe to matou Kingi nui,
Ta matou mea hei waiata.

MO TE RATAPU

- 3 Hohorotia te ra e koe,
E kitea ai tou kanohi ;
Ko reira mutu ai te he ;
Ka nohoia te kainga hou.
Ka okiohi matou ra,
I tenei mahi atawhai.

15 *Tomokia ona tataui i runga i te whakawhetai, ona marae i runga i te whakamoemiti.*—Wai. c. 4.

8 8 8 8 4 4 8.

Rangi, **St. Matthias.** 348.

- 1 KA taka mai ano te ra
I whakatapua e te Atua ;
Ka tae te okiokinga
Mo tana hunga pai katoa ;
Ko ana mea
Papai katoa,
Ma tatou ra e whakahua.
- 2 Ka whakamine aiane
Te Hahi Tapu a t' Atua,
Ka waiata, ka whakapai
I tona ingoa tapu nei.
Kia uru ra
Tatou katoa,
Ki tenei hapu whakapai.
- 3 Ka whakamine nei ano
Ki tau karanga, e t' Atua ;
Tou Wairua whakakitea mai ;
Tou atawhai tukua mai ;
Kia tika ai
Te whakahua
I enei kupu whakapai.

MO TE RATAPU

16 *Ko te ra tenei i hanga e Ihowa ; kia whakamana-
mana, kia koa tatou i tenei.*—Wai. cxviii. 24.

8 8 8 8 4 4 8. Rangi, **Christchurch**. 28, No. 1.

- 1 KA taka mai te hapati,
He hari mo te tangata :
Ka karangatia katoatia
Nga hapu o Nu Tirani :
Maranga ra,
Hohoro mai
Ki to t' Atua temepara.
- 2 Ko matou ra ka puta nei,
Ki tau karanga, e t' Atua ;
E heke iho nei rapea,
Kia pono ai te haringa ;
Me tuku mai
Te Wairua pai,
Ko reira matou hari ai.

17 *Te aranga ake o Ihu i te atatu, i te ra tuatahi o te
wiki.*—Maka xvi. 9.

C.M.

Rangi, **Nativity**. 299.

- 1 KA puao mai ano te ra
I whakatapua nei :
Te ra o te Ariki nui,
I ara ake ai.
- 2 E kiia ana mai e ia
Ki ana i te ao,
Ko ratou ra kia uru mai
Ki tona aranga.

Prayer is the Soul desire ²¹

MO TE RATAPU

- 3 Nei ra te tino taonga nui
Mo tatou, kino nei,
Kia whakawhiwhia mai e ia
Mo tatou tenei pai.
- 4 Te rangimarietanga nui,
Te okiokinga,
Te ora tonu ake nei,
Kua tukua mai e ia.
- 5 Me himene he whakapai
Ki tenei Kingi nui,
Mo tana mahi atawhai
I tuku iho ai.

18 *I te Wairua ahau i te ra o te Ariki.*—Whkite.
i. 10.

S.M.

Rangi, **Dominica.** 37.

- 1 NEI tonu ko te ra
I kiia mo te pai ;
E Ihu, take o te pai,
Tiaho iho koe.
- 2 Nei tonu ko te ra
E okioki ai ;
E Ihu, whakahekea mai
Te tomairangi pai.
- 3 Nei tonu ko te ra
E rangimarie ai ;
Araia atu ra e koe
Nga whakararu mai.

MO TE RATAPU

- 4 Nei tonu ko te ra
 E inoi ake ai ;
 Me ako mai nga ngakau nei
 Kia inoi pono ai.

- 5 Nei tonu ko te ra
 Tuatahi tonu mai ;
 Manaakitia nga ra katoa
 Kia mahia ai te pai.

19 *Kia kua e hua-kore te rironga o te aroha noa o te
 Atua i a koutou.*—2 Kori. vi. 1.

7 7 7 7.

Rangi, **Canterbury**. 182.

- 1 KIA oho rapea tatou,
 Kei parangia e te moe,
 Ko te ra tapu tenei,
 I ara ai a Ihu.

- 2 Mana ano e tahi
 Nga kino o te ngakau,
 Kia tomo marie mai ai
 Nga kupu o te ora.

- 3 Mana e whakangoto
 Aua korero ana ;
 Ko reira ano tatou
 Tino whakapono ai.

- 4 Kei maumau te aroha
 O te Atua atawhai,
 Kia uaua tonu ra
 Tatou ki te oranga.

20 *Ma to maramatanga ka kite ai matou e te maramatanga.*—Wai. xxxvi. 9.

7 7 7 7.

Rangi, **Innocents.** 33.

- 1 TINO o nga ra katoa,
Ra i whakatapua nei;
Ra i ara ake ai
Te Ariki atawhai.
- 2 Te Ariki mana nui,
I whawhaitia ai te he :
Tini hara o te ao,
Nana ra i whakaea.
- 3 Nana te marama nui
E tiaho iho nei ;
Mana ra ka pono ai
Tatou noho pouri nei.
- 4 Mana ra te kupu mai
Ki nga ngakau ruwha noa
Kia tatanga ake ai
Ki te mahi i te pai.
- 5 Take o nga pai katoa,
Piri mai ko koe hei hoa,
Kia manawareka ai
Matou ki nga mahi pai.

Welcome
Sabbath morning

21 *Ko te ra tenei i hanga e Ihowa.*—Wai. cxviii. 24.

L.M.

Rangi, **Church Triumphant.** 35.

- 1 Ao ana mai ano te ra
I whakaritea e t' Atua,
Te ra tuatahi tonu ia,
I ara nei t' Ariki nui,

MO TE HAERENGA MAI

- 2 I penei mai ta Ihu ki ;
Ko tana kahui tapu nei,
Ko ana i aroha ai,
E uru ki te oranga.
- 3 He taonga ko te taonga nei,
Kia tino whakawhiwhia mai ;
Ko tatou, hunga hara nui,
Kia whakaorangia e ia.
- 4 Kororia nui, torona pai,
He ora tonu tuku noa ;
He oha enei nana mai,
Mo tatou, mo te hunga he.
- 5 Na konei ra puoho noa
Nga waiata, nga whakapai
Ki a koe, e te Kingi nui,
Mo tou aroha ki te ao

MO TE HAERENGA MAI.

22 *Tenei ia te haere mai nei me nga kapua ; a e kite
i a ia nga kanohi katoa, me te hunga hoki i
wero i a ia.*—Whkite. i. 7.

8 7 8 7 4 7. *

Rangi, **St. Thomas.** 51.

- 1 HA ! ka puta mai a Ihu
Runga i te kapua ma ;
Mano tini hunga tapu
Ona hoa hei whakapai.
Hareruia !
Mona tenei hari hou.

*When shall we meet beyond
the river* ²⁵

MO TE HAERENGA MAI

- 2 Tenei ia ka ata kitea
E nga kanohi katoa ;
Ma te kai kohuru hoki
E titiro, wehi pu.
Tangi rawa
Mo ta ratou kinonga.
- 3 Ko te rangi, me te moana,
Me te ao e rere ke :
Koera pu te hunga kino
I te tangi o te reo,
“Haere mai ra,
Haere ki te whakawa.”
- 4 Ko konei ka tino rite
Tana pai, te oranga ;
Aianeī ka whakaminea
Ana tangata e ia.
Hareruia !
Mo te ra o te Atua.
- 5 E Ihowa, kia hohoro,
Nohoa te kainga hou ;
Ta te Hahi, ta te Wairua,
Whakaritea wawetia.
Ka karanga
Tenei ao e kino nei.
- 6 Ae, Amine, mou, e Ihu,
Mou katoa te whakapai ;
Tangohia tou kaha nui,
Meinga mou nga kainga nei.
Haere mai ra ;
Hareruia ! haere mai !

23 *He reo no tetahi i te koraha e karanga ana, whakapaia te huarahi o te Ariki, whakatikaia ona ara.*—Mat. iii. 3.

L. M.

Rangi, **Winchester New.** 50.

- 1 Tū ana mai a Hoani
Nga parenga o Horano;
Nona te reo karanga mai
I roto i te koraha.
- 2 Te ara whakapaingia mai
Mo Ihu, mo te Kingi nui;
Tawhiritia ra e katoa
Te manuhiri ki te ao.
- 3 Me whakaae te kupu nei,
E te Ariki atawhai;
Ko koe anake hoki ra
To matou take orange.
- 4 Totoro mai tou ringa pai,
Whakaarahia te hunga be;
Tiaho mai hei marama,
Kia kite ai te matapo.
- 5 Me whakanui te hari mou,
E Ihu, Tama a t' Atua:
He taenga mai nou ki te ao
I ora ai te tangata.

24 *Kua taka noa ake te wa e ara ai tatou i te moe.*—
Rom. xiii. 11.

8 7 8 7.

Rangi, **Merton.** 47.

- 1 TANGI ana mai te oro
O te reo karanga mai;
Ohooho mauri ana
Tona whakapuakanga.

MO TE HAERENGA MAI

- 2 Penei ana mai te kupu,
Kati koutou te momoe :
Ara ake, whakataua
Te Karaiti, t' Ariki.
- 3 Te Karaiti, mana hoki
Ana pai e taki mai ;
Marama tiaho tonu ;
Maunga-rongo ki te ao.
- 4 Te Karaiti, Reme tapu,
Koia ia e taria nei ;
Take o te tino taonga ;
Ora mo te tangata.
- 5 Kia tatanga ! whakatika !
Whaia ko te ora nei.
Tika marie i te ara
E tutuki atu ai.

25 *Kua tonoa mai ahau e ia ki te whakaora i te hu-
nga ngakau maru, ki te kauwhau ki nga here-
here kia haere noa.*—Ruka iv. 18.

C.M.

Rangi, **Bristol**. 53.

- 1 HA ! whakarongo, nei te reo,
Karanga ana mai ;
Ko Ihu ra ka puta nei :
Kia hari ra, kia koa.
- 2 Te mea i haere mai ai ia,
He kawē ora mai :
He tuku i ta Hatana
I herehere ai.

MO TE HAERENGA MAI

- 3 He haere mai kia kite ai
Te hunga matapo ;
He whakamama i te he
E pehi iho nei.
- 4 He kauwhau i te Rongo pai,
Te ora mo te ao ;
Te tau manakohanga mai
A te Ariki nui.
- 5 E Ihu, Piriniha pai,
Ko koe te Kingi nui :
Me tuku tonu atu mou
Nga rangi whakapai.

26 *Mea atu ki te tamahine Hiona, Na, tou Kingi e
haere mai na ki a koe. —Mat. xxi. 5.*

S.M.

Rangi, **Franconia.** 48.

- 1 NEI ra ka puta mai
To tatou Kingi nui ;
Me himene he waiata,
He rangi whakapai.
- 2 Te Tama tapu, nui,
Kua whakatangata ;
Ano he tutua noa nei,
Ko tona ahua ia.
- 3 Nei whakataua ra
Te ora mo te ao ;
Tamahine o Hiona,
Me whakatika koe.

MO TE WHANAUTANGA

- 4 A konei ake ia
 Te kitea atu ai,
 He ahua ke te putanga,
 Ko ia hei whakawa.
- 5 Kia penei ano ia
 Ka whakamatautau
 Te mahi i nga mahi pai,
 Kia tika ake ai.
- 6 Tupono rawa mai,
 Ko tenei whakawa,
 Kia ropu atu ai katoa
 Ki a ia noho ai.
-

MO TE WHANAUTANGA O TE KARAITI

27 *Kia whai kororia te Atua i runga rawa ; kia mau
 te rongo ki runga ki te whenua, me te whakaaro
 pai ki nga tangata.*—Ruka ii. 14.

7777 D.

Rangi, **Mendelssohn**. 60.

- 1 RANGONA te himene
 A o runga karere ;
 Whanau rawa i tenei ra
 Kingi whai kororia.
 Taunga iho no te pai
 Ki te ao nei haere ai :
 Mo a Whiro whakarau
 To Ihowa rongo mau.
 Whanau rawa i tenei ra
 Kingi whai Kororia.

O TE KARAITĪ

- 2 To nga rangi matakū,
Ta Ihōwa Tama pu,
Nei ka whakatangata,
Whanau i te Wahina.
Tena a te Karaiti,
Kei te pa o Rawiri.
Tena a Ihu, ko ia na
Te Atua tangata.

Whanau rawa, &c.

- 3 Kingi o te Marie !
Mou a matou himene.
Nou te oha, nou te pai,
Nou te tino atawhai.
Take o te marama !
Puna o te oranga !
Nau ano te ora hou,
Nau i tuku atu tou !

Whanau rawa, &c.

28 *Nonaiānei i whanau ai he Kai-whakaora mo koutou i te pa o Rawiri, ara a te Karaiti, te Ariki.*
—Ruka ii. 11.

7777 D.

Rangi, **Mendelssohn.** 60.

- 1 WHAKARONGO ki te reo
E karanga iho nei ;
Rongo pai ki te whenua,
Rongo mau ki te Atua !
Oho ake, e katoa,
Uru mai ki tenei ki ;
Te Karaiti, t' Ariki,
Tenei ra ka whanau nei.

Whakarongo ! nei te koa,
Mo te Kingi whanau hou.

Waiting for the response

- 2 Te Karaiti, t' Ariki,
Tama tahi a t' Atua :
Nei ra ia ka puta mai,
Momo o te Wahina !
Tango iho ana ia
I te ahua tangata :
Whanau tonu mai ano,
Noho ana i te ao.
Whakarongo ! nei te koa,
Mo te Kingi whanau hou.

- 3 Te Imanuera nui !
Piriniha rongo pai !
Take o te oranga,
Te Karaiti, haere mai !
Te maharatia e koe
Tou kororia tino nui ;
Tau i tumanako ai,
Ko te ora mo te ao.
Whakarongo ! nei te koa,
Mo te Kingi whanau hou.

29 *Nonaianei hoki i whanau ai he Kai-whakaora mo koutou i te pa o Rawiri, ara a te Karaiti, te Ariki.—Ruka ii. 11.*

C.M.

Rangi, **Winchester Old.** 62.

- 1 TUPONO mai nga Hepara
Tiaki hipi nei,
E noho ana i te po
I waenga koraha :
2 Karanga ana mai te reo,
He reo anahera,
“ Kei wehi ra, kei oho noa ;
Tenei te rongo pai.

O TE KARAITI

- 3 Kua whanau nei i tenei ra
He ora mo te ao,
Ko Ihu te Karaiti ia,
Te Tama a t' Atua.
- 4 He mea takai te kakahu
I hipokina ai ;
He tunga kai kararehe,
Ko tona moenga ia."
- 5 I taua wa ka puta mai
He ope tino nui,
Pa rekareka ana mai
Ta ratou waiata ;
- 6 "Kororia nui ki te Atua
O runga rawa nei ;
He rongo mau, he rongo pai,
Tenei ka timata."

30 *Tatou ka haere ki Peterehema.*—Ruka ii. 15.

6 6 10 D.

Rangi, **Adeste Fideles.** 59.

- 1 HAERE mai ra koutou,
Hunga whakapono,
Haere mai ra ki Peterehema :
Tenei tirohia,
Nei te tino Kingi,
Tino whakapaingia ia t' Ariki.
- 2 Ia, Atua nei ano,
Marama tiaho,
Kihai i kinongia te Wahina.
Ahakoa Atua,
Whanau ana mai ia ;
Tino whakapaingia ia t' Ariki.

C

33

Bringing in the sheaves

MO TE TIMATANGA O TE TAU

- 3 Koutou Anahera,
Rehua mai he rangi,
Tino hari ake koutou katoa.
Hamama te reo
Mona i runga nei:
Tino whakapaingia ia t' Ariki.
- 4 Koutou o te ao nei,
Uru mai ra koutou,
Tukua atu mona te kororia.
Nei ko te Atua,
Kua whakatangata:
Tino whakapaingia ia t' Ariki.
-

MO TE TIMATANGA O TE TAU.

31 *Na, he aha taku e tatari atu nei, e te Ariki? ko
koe taku e tumanako atu ai.*—Wai. xxxix. 7.

C.M.

Rangi, Tallis. 72.

- 1 PAHURE marie ana ra
Te tau kua mutu nei,
Me ona koa, me ona pai,
Me ona tini he.
- 2 Ko tenei ia, me whakapai
Te Ingoa o t' Atua,
I takea ai nga pai katoa
E whakawhiwhia nei.
- 3 Ko matou, ka tuohu nei
Ki a koe, e t' Atua,
Manaakitia mai ra e koe,
Te tau ka timata.

*Prayer is the Soul's sincere
desire*

MO TE TIMATANGA O TE TAU

- 4 Manaakitia te motu nei,
Nga tangata katoa :
Homai he ora tinana,
He rongo tino mau.
- 5 Nga hara kua pahure nei
Horoia mai e koe :
Homai he kaha ki katoa
Kia mahia ai te pai ;
- 6 Kia pehia ai nga mahi he,
Te roa o tenei tau :
Ka haere ai te Rongo pai
Nga takiwa katoa.

32 *Akona matou ki te tatau i o matou ra, kia anga ai
te ngakau ki te whakaaro.*—Wai. xc. 12.

7 7 7 7.

Rangi, **Culbach.** 73.

- 1 TE Ariki tino pai,
Ata whakarongo mai ;
Tenei au ka ngakau koa
Mo to mahi atawhai.
- 2 Roa te tau kua mutu nei,
Kawe tonu ano koe
Ki te tohu i ahau,
Ki te tuku atawhai.
- 3 Timata ko tenei tau,
Tenei kei te ora au ;
Tini aku mahi he,
Tohu tonu ano koe.

MO TE WHAKAATURANGA

- 4 Tenei au, whakaakona
Ki nga mahi pai katoa ;
Puritia mai ra e koe
Kei kotiti ki te he.
 - 5 Hiritia mai ra ahau
Hei tamaiti tupu mau :
Homai ko te ngakau toa,
Pono tonu, mate noa.
-

MO TE WHAKAATURANGA.

33 *Ko ahau te whetu marama o te ata.*—Whkt. xxii.
16.

L.M.

Rangi, **Ludborough.** 355.

- 1 E KOUTOU, e tiaho nei
I runga i te takiwa,
Nga whetu tini o te po,
E tirohia nei e katoa ;
- 2 Ahakoa koutou tata noa
Te wahi i a Ihu nei,
He iti ra to koutou pai ;
Ko tona ia, i kake mai.
- 3 Ta matou e whakaaro ai,
Ko tenei Whetu marama
Ko Ihu ra te take mai
O te aroha, o te pai.
- 4 Te Whetu e tiaho nei
I runga i te ao katoa,
Hei taki i te tangata
Kia tika ki te orange.

MO TE WHAKAATURANGA

- 5 Kia taea atu ra ano
Te wahi i te Whetu nei;
Ko reira tino kitea ai
Tona tiahotanga nui.

34 *Te hunga i haerere i te pouritanga, kua kite rātau
i te maramatanga nui.—Iha. ix. 2.*

C.M.

Rangi, **Dundee. 80.**

- 1 Te hunga noho pouri nei,
Kua kite marama;
He marama tiaho mai
I roto i te po.
- 2 Hui mai nga iwi o te ao
Hei kai-karanga mai;
Powhiritia te Kingi nui,
Te ora mo katoa.
- 3 Tamaiti ata-ahua ia,
Tamaiti whanau hou,
Kei a ia ra nga pai katoa,
Te tino mana nui.
- 4 Ko tona ingoa tonu nei
Te Piriniha pai,
Miharotanga ma katoa,
Te tino o t' Atua.
- 5 Ko tona kingitanga nui
E tau ki te katoa;
Kahore nei he mutunga,
A ake tonu ia.

MO RENETI

- 6 E Ihu, whakamana mai
Ko tenei kupu pai ;
Ko koe hei Kingi ake nei ;
Ko matou tonu mau.
-

MO RENETI.

35 *Haea ano hoki o koutou ngakau, harunga o koutou kakahu, a tahuri ki a Ihowa, ki to koutou Atua.—*
Hoere ii. 13.

C.M.

Rangi, **Martyrdom.** 238.

- 1 KARANGA ana mai te reo,
Nei tonu ko te wa
E pouri ai te tangata
Mo ana mahi he.
- 2 Me mahi pono ake ia,
Inoi a ngakau mai,
Kei waiho ko te mahi nei
Hei mahi ngutu kau.
- 3 Papaki uma, tangi nui,
Aumihi ranei koe ;
Kia na te ngakau ake ia
Ko kona pono ai.
- 4 Tahuri atu ki t' Atua,
Inoi a ngakau koe ;
Tera e whakarongo ia,
Aroha tonu mai.

MO RENETI

- 5 E te Atua, titiro mai,
Aroha iho ra ;
Tenei whakaakona e koe
Ka mahi pono ai.

36 *Nāna, tenei te wa manakohanga mai ; nana, tenei te ra o te whakaoranga.*—2 Kori. vi. 2.

L.M.

Rangi, **Weimar.** 68.

- 1 NEI tonu ia te tino ra
E rongō mai ai te Atua ;
Nei tonu ia te tino wa
E rapua ai te oranga.
- 2 Na te Atua te atawhai,
Aroha nui ki tenei ao :
Kahore hoki ana pai
Kia mate noa te tangata.
- 3 Nei ra tahuri pono mai,
Inoia ko te ngakau hou ;
Inoia ko a tatou he
Kia tino murua mai e ia ;
- 4 Kia homai ko te atawhai,
Te tohu o te Wairua pai,
Kia kaha ai ki te whawhai,
Te pehi i nga mahi he.
- 5 Te Tokotoru Tapu, Nui,
Atua kotahi tonu ia,
Aroha mai, manaakitia
Matou e inoi atu nei.

MO RENETI

37 *Na ka kawea ia e Wairua ki te koraha, a e wha tekau nga ra i whakamatautauria ai ia e te rewera, kihai ano hoki i kai i tetahi mea i ana ra.—Ruka iv. 1, 2.*

7777.

Rangi, **Heinlein.** 400.

- 1 TINO wha tekau nga ra,
Tino wha tekau nga po,
Me to nohopuku mai,
Me te tohea nuitia koe.
- 2 Tikaka mai ko te ra ;
Ngau te matao o te po ;
Noho tonu ano koe
Roto i te koraha.
- 3 Aua ianei e mihi
Mou i tohea nuitia nei ?
Nohopuku tahi ai,
Mamae tahi ai me koe ?
- 4 Tohea au e Hatana,
Whakararua mai e ia ;
Tenei whakakahangia,
Nau nei ia i raru ai.
- 5 Te Ariki atawhai,
Tenei arohaina mai ;
Aratakina ahau
Kei kotiti ki te he.

38 *Tenei matou te haere atu nei ki a koe.—Herem. iii.*
22.

777.

Rangi, **St. Philip.** 94.

- 1 Te Ariki, tenei au
Ka tahuri atu nei.
Inoi pono atu ai.

Beautiful Zion

Book of Ages

MO TE MATENGA O TE KARAITI

- 2 Homai ra he ngakau hou,
Ngakau kino ki te he,
Mahi i nga mahi pai.
- 3 Tenei ka tuohu nei,
Tukua mai te Wairua pai
Hei whakaako i ahau.
- 4 Nei ra whakarongo mai
Tino awhitia ahau
Hei tamaiti tupu mau.

Tirohia hoki 122-126.

MO TE MATENGA O TE KARAITI.

39 *I a tatou e hara ana ka mate a te Karaiti mo tatou.*—Roma v. 8.

C.M.

Rangi, **Horsley.** 332.

- 1 Tera te maunga rongo nui,
Ko Maunga Kawari,
Te wahi ra i mate ai
T' Ariki atawhai.
- 2 E taea ranei te tatau
Nga mamaetanga nui
I ngaua kinotia ai ia
I tona matenga?
- 3 I tare ia, i mate ia,
Te tika mo te he ;
Kia ma te toto, ma te wai
Nga hara e horoi.

MO TE MATENGA

- 4 Nana ano i whakaea
Te utu mo te he ;
Mana ano ka ora ai
Te hunga hara nei.
- 5 Nei tonu te aroha nui
Kua whakakitea mai :
Me kati ra te mahi he,
Me mahi ko te pai.

40 *Ki a au ia kua rawa he whakamanamana, ko te ripeka anake o to tatou Ariki, o Ihu Karaiti.—*
Kar. vi. 14.

L.M.

Rangi, **Breslau.** 200.

- 1 Me tito taku waiata
Mo Ihu i ripekatia ;
Te utu mo te hunga he,
I ora ai te tangata.
- 2 I kitea ki te ripeka
To te Atua aroha nui,
I whakahekea iho ai
Te ora me te atawhai.
- 3 Ma tenei ra ka tahia ai
Nga hara ranea tonu nei ;
Tau ana ko te marama,
Hei whakahari ngakau mai.
- 4 Ma tenei ra ka maia ai
Te hunga whawhai ki te he ;
Ma tenei ra ka ngaro ai
Te wehi o te urupa.

We shall meet

O TE KARAITI

- 5 Pa mai te wa e pouri ai,
Nei ra te ora mana mai ;
Te ora i nga he katoa,
Te hari ake tonu nei.

41 *He heparu pai, ka tuku i a ia ano kia mate mo
nga hipi.*—Hoani x. 11.

L.M.

Rangi, **Rivaulx**. 164.

- 1 NA a tatou hanga kino
Te Tama ra a te Atua
I kawe mai ki raro nei,
Kia iri ai ia, kia mate.
- 2 Ma reira ra ka kitea ai
He aroha whakahara ;
Koi rawa ki tona ngakau
O tatou whainga ki te he.
- 3 Engaro te aroha pu
Mo tenei mea te tangata,
E manawanui tatou nei
Kia wkakatuturi tonu ?
- 4 Kia oho koia pea tatou.
Kaua e whakaroaina,
Hoatu o tatou ngakau
Kia whakahoutia ai e ia.

42 *I werohia tona kaokao e tetahi o nga hoia ki te
matia, a puta tonu mai he toto, he wai.*—
Hoani xix. 34.

L.M.

Rangi, **Veni Creator**, No. 2. 157.

- 1 KUA whakatarea a Ihu
Ki runga ki te ripeka ;
Whakaaroa maretia rapea
Tona matenga ki reira.

MO TE MATENGA

- 2 Puta pu nga ringaringa
Me ona waewae i te whao ;
Werohia ana te kaokao,
Hoho ana ona toto.
- 3 Whakaaroa e tatou te mea
I mate ai ra a Ihu ;
He kawenga ora tenei
Mo te tangata o te ao.
- 4 Kua hara tatou ki a ia,
Na reira tona matenga ;
He tini a tatou kino,
Ko te Kai-whakaora ia.

43 *Nga mea i waiho e ahau hei taonga, kiiā ake
enei e ahau hei rukenga i te mea ka whakaaro
nei ki a te Karaiti.—Piripai iii. 7.*

L.M.

Rangi, **Rockingham.** 108.

- 1 KA tirohia te ripeka
I mate ai t' Ariki nui,
Ka iti haere taku pai
Ki enei taonga hemo noā.
- 2 He toto koa te rere mai
I ona ringa, ona wae ;
Tona aroha nei, te nui,
He tohu oranga ki a au.
- 3 Kaua ahau e puritia
Ki enei kino o te ao,
Ko taku e whakaaro ai,
Ko tona ripeka mamae.

O TE KARAITI

- 4 Ma tenei utu oku he
Ka tino hemo ai katoa ;
Ko toku ngakau wairangi
Ka aro atu ki t' Atua.

44 *I whakamatea hoki koe, a hokona ana matou e koe
hei hunga ma te Atua ki ou toto.—Whkt. v. 9.*

L.M.

Rangi, **Angels.** 8.

- 1 I WHAKAMAROA a Ihu
Ki runga ki te ripeka,
Kia rongo ki tana aue,
Mou ra, e toku wairua, mou.
- 2 Titiro pu ki nga toto
O ona ringa, ona wae,
Hoho tonu, rere tonu,
Kia ora ai te hunga he.
- 3 E ao te tino atawhai,
Ae ra, e Ihu, nau ki a au,
E rahi tau, kei hea taku ?
Ahau, e Ihu, me pehea ?
- 4 E hei ahau te whakaaro
Ki tenei aroha nui ou ?
Kia turi, kia pake tonu ;
Aua e rongo ki a koe ?
- 5 Tenei, e Ihu, haere mai
Ki tenei ngakau kuware,
Kia ki i tou Wairua Tapu
Kei atea noa mo te kino.

MO TE MATENGA

45

I werohia ia mo o tatou he.—Ihaia liii. 5.

L.M.

Rangi, **Leipsic.** 173.

- 1 NA wai i whakamatea ai
A Ihu, toku Kingi nui?
Hei utu koa mo oku he
Tona upoko i tukua.
- 2 Mo oku kino koia ia
I tare ki te ripeka?
Aue! te tino atawhai;
Nona ano t' aroha hou.
- 3 Koia te ra i pouri ai,
Kihai tiaho ki te ao;
I mate hoki te Atua
Hei utu mo te tangata.
- 4 Waihoki oku kanohi,
Ka ngaro i te whakama;
Ko toku ngakau konohi
E puta i te tangi nui.
- 5 Ka waiho ra hei tangi kau?
A hea t' aroha rite ai?
Ahau, e Ihu, tangohia;
Hanga e koe he ngakau hou.

46

*Ka mea ia, Kua oti. . . Na ka tuohu tona matenga
tukua atu ana te wairua.*—Hoani xix. 30.

8 7 8 7 4 7.

Rangi, **St. Thomas.** 51.

- 1 WHAKARONGO ki te kupu,
No ko mai, no Kawari;
Motu ke nga pukepuke,
Koara pu te ao katoa.
Oti rawa
Tana whakaoranga.

46

Sweet Sabbath Home

O TE KARAITI

- 2 Oti rawa ! Ae te hari
O te kupu ora nei ;
Tini aua pai a Ihu
Tenei ra te puta nei.
Oti rawa !
Tenei ki maharatia.
- 3 Mutu pu nga whakarite
O te ture tawhito ;
Rite pu i a Ihowa
Ana korero o mua.
Oti rawa !
Koia tenei haringa.
- 4 Tena, e nga Herapima,
Tatou nei ka waiata
Ki a Ihu, te Ariki
O te rangi, o te ao.
Hareruia !
Mona i kohurutia.

47 *Ripekatia ana ia e ratou.*—Hoani xix. 18.

L.M.

Rangi, **St. Cross.** 114.

- 1 E KOUTOU, whakatata mai,
Te taha o te Ripeka ;
Hei konei tatou mihi ai ;
Ko Ihu kua ripekatia.
- 2 Hei konei tatou tangi ai
Mona e taunutuia mai nei ;
E hanga-kinotia nei ia ;
Ko Ihu kua ripekatia.

- 3 U pu nga ringa me nga wae
Te titi ki te Ripeka ;
Tau ana te aroha nui
Mo Ihu i ripekatia.
- 4 Nga hara o te ao katoa,
Na enei ia i pehi nui,
Hei whakaea i enei he
Ia tonu i ripekatia.
- 5 E Ihu, homai ra e koe
He ngakau pouri mo te he,
Kia tangi pono atu ai
Mou tonu i ripekatia.

48 *I kite ano a Meri Makarini raua ko Meri whaea
o Hohi i te wahi i whakatakotoria ai ia.—
Maka xv. 47.*

8 8 8.

Rangi, **Holy Sepulchre.** 123.

- 1 Tū ana mai nga wahine
Te taha o te urupa
Titiro pouri atu ai ;
- 2 He mea kia ata matauria
Te tino wahi tuturu
I waiho ai t' Ariki nui.
- 3 Kua mutu tana mahi pai,
Kua ea te utu mo te ao,
Kua mate atu hoki ia.
- 4 Kua ngaro kei te urupa
T' Ariki o te ao katoa,
Te Take o te orange.

MO TE ARANGA

- 5 E koutou ra e pouri nei,
Te hunga ngakau mamae nui,
Hei konei okioki ai.
- 6 Homai o koutou he katoa,
Hei konei waiho iho ai ;
Tenei te hoa aroha nui.
-

MO TE ARANGA.

49 *Koia rawa ano! kua ara te Ariki.*—Ruka
xxiv. 34.

6 6 6 6 8 8.

Rangi, **Harewood.** 239.

- 1 KUA ara t' Ariki,
Kua oho i te moe,
Kia hari ra te ao
Mo tenei oranga ;
He pono hoki tenei ki,
Ko Ihu ra kua ara mai.
- 2 Ka whakamine mai
Nga karere katoa,
Ka waiata ano
I tenei rongo pai ;
Kia rongo, e te ao katoa,
Ko Ihu ra kua ara mai.
- 3 Ae, hopukia te reo,
E koutou o te ao
Kua hokoa nei e ia
Ki tona matenga ;
Karanga, me te hari nui,
Ko Ihu ra kua ara mai.

MO TE ARANGA

- 4 E Ihu, mou te pai,
Te hari o te ao,
Mo tenei oranga
Kua homai nei e koe ;
Ko koe te Reme a te Atua,
I mate, a kua ara mai.

50 *Na tona ringa matau, na tona ringa tapu i taea ai e ia te whakaora.*—Waiata xcviii. 1.

7 7 7 7 D.

Rangi, **St. George.** 131.

- 1 TE Karaiti, t' Ariki,
Tenei ra kua ara mai ;
Ia i whakamatea nei
Mo a tatou mahi he.
Whakarongo, e katoa ;
Nei te take mo te koa ;
Te Karaiti t' Ariki,
Tenei ra kua ara mai.
- 2 Ahakoa te kowhatu
Arai o te urupa ;
Ahakoa i hiritia,
Ahakoa mataaratia ;
Hore kau he ritenga
Ki to tatou Kingi nui :
Papa kau i tona reo,
Me te mea titari noa.
- 3 Ea ake te aroha,
Nana ia i kawe mai.
Mutu tonu te whawhai,
Kiia ana ia he toa.
Tenei ia ka ara mai ;
E te Mate, kei hea koe ?
Tenei ia ka ora nei ;
E te Po, kei hea tou toa ?

MO TE ARANGA

- 4 Ora tonu ake nei,
Te ai ano matenga :
Ea ana ko te utu
Mo nga hara o te ao.
Whakanuia ra te koa
Mo to tatou Kingi nui.
Tenei kei te Kingi ia ;
Areruia ! Amine.

51 *Ko tenei kua ara a te Karaiti i te hunga mate.—*
1 Kori. xv. 20.

7 4 7 4 7 4 7 4.

Rangi, **Easter Hymn.** 134.

- 1 RANGI tapu, rangi koa !
Hareruia !
Ko to Ihu Aranga ;
Hareruia !
Nona nei te Ripeka
Hareruia !
Taea ai te orange.
Hareruia !
- 2 Rewa koa te himene
Hareruia !
Ki to tatou Kai-hoko.
Hareruia !
Na tatou nga mahi he
Hareruia !
Heke ai ia ki te po.
Hareruia !
- 3 Ko te mate, kore kau
Hareruia !
I to Ihu matenga :
Hareruia !

MO TE ARANGA

Ko te ora, kua pumau
Hareruia !
I to Ihu orange.
Hareruia !

52 *Ko aharu ano tenei e ora nei, i mate hoki aharu i mua : na kei te ora tenei aharu, a ake tonu atu, Amine.*—Whkite. i. 18.

7 8 7 8 4.

Rangi, **St. Albinus.** 140.

1 ORA nei ko t' Ariki,
Mutu tonu mai te wehi ;
Ahakoa nga mate nui,
Nei ko Ihu kei te ora.
Aneruia !

2 Ora nei ko t' Ariki ;
Waiho iho ko te mate ;
Mana au ka tomo ai
Ki te wahi o te ora.
Aneruia !

3 Ora nei ko t' Ariki ;
E whai tera au e ora :
Mana au e arahi.
Mana au e whakakaha.
Aneruia !

4 Ora nei ko t' Ariki ;
Ko ia toku matauranga ;
Mona te aroha nui
Hore kau nei e mawehe.
Aneruia !

MO TE KAKENGA

- 5 Ora nei ko t' Ariki ;
Nona ra te tino mana ;
Mona te torona nui ;
Nei ko ia hei Kingi tonu.
Areruia !

Tirohia hoki 17, 19, 20, 173.

MO TE KAKENGA.

53 *Kua riro nei ia ki te rangi.*—1 Pita iii. 22.

S.M. D.

Rangi, **Old 25th.** 149.

- 1 KUA kake atu koe
Ki runga noho ai,
E hono na te puta mou
Te rangi whakapai.
E whakapouri nei
Te hara me te he ;
Tou Wairua Tapu tonoa mai
Hei whakamarama.
- 2 Ko koe i kake nei,
I heke mai i mua,
Kia ngaua ai e te mamae,
Ka kingi tonu ai.
He ara mamae nui
E haere nei matou ;
Mau tonu ia e arahi,
E tae ai ki a koe.
- 3 Ko koe i kake nei,
E hoki mai ano,
Me to te Rangi ope nui
Hei whakauru mou.

MO TE KAKENGA

E Ihu, mau e mea
Kia noho pai matou,
Kia kitea ai a taua ra
Ki tou ringa matau.

54 *Ka oti i a ia ake ano te horoi o tatou hara, noho
ana ia i te ringa matau o te Nui i runga rawa.*
—Hip. i. 3.

C.M. Rangi, **Metzler's Redhead No. 66.** 150.

- 1 TENEI ahau ka waiata
 Ki toku Kingi nui,
 Kai-whakaora i te ao
 I hanga nei e ia.
- 2 Te nui o tona atawhai
 I rapua mai ai au !
 I whakamatea nei ko ia
 Kia ora ai ahau.
- 3 Kua ea te utu mo te he,
 Kua kake ake ia ;
 Kei runga ra e noho nei,
 Kei te torona nui.
- 4 Ahau, e Ihu, tohungia
 I aku mahi he ;
 Kia tata atu ai ahau
 Ki tou torona nui.
- 5 Ko koe hei take haringa ;
 Nau nei te oranga ;
 Me ngakau koa, me hari nui
 Mo tenei mahi au.

MO TE PETEKOHA

- 6 Ki a koe te kororia nui,
E Ihu, Kingi nui;
Kua kake ake hoki koe
Nga wa i runga nei.

Tirohia hoki 130-139, 177, 182.

MO TE PETEKOHA.

55 *Na puta whakarere mai ana he harurutanga no te rangi, ano he hau whakaharahara e kerī ana.—*
Mahi ii. 2.

C.M.

Rangi, **Winchester Old.** 62.

- 1 I PUTA mai t' Atua i mua,
I puta riri mai;
He kapua po, he kapura,
Ko ona tohu ia.
- 2 Te putanga i muri nei,
He ahua ke ano,
He atawhai te tohu nui
I whakakitea mai.
- 3 He kapura mumura nei
Te tohu mai o mua;
He Wairua rangimarie ia
To muri tohu mai.
- 4 Ko tona taunga ki te ao,
Pa whakarere mai,
Ano he hau e kerī nei;
Ko tona rite ia.
- 5 I ki te Hahi a t' Atua,
I ki te ao katoa:
He ngakau whakakake ia
Te mea e kapea nei.

MO NGA WA KATOA

- 6 Aroha mai, e te Atua,
Homai he ngakau hou,
Aroha, e te Wairua pai,
Kei kapea ko ahau.

56 *Tata tonu ki te toru o nga mano nga wairua
i honoa mai i taua ra.*—Mahi ii. 41.

L.M.

Rangi, **Melcombe**. 155.

- 1 TE Wairua pono, atawhai,
Tou kaha whakawhiwhia mai ;
Nga mahi pai o tenei ra
Towhaina haeretia e koe.
- 2 Nga takiwa, nga reo katoa,
Me whakanui i te Atua ;
Hei whakarongo ma te ao,
Nga mahi pai i mahia nei.
- 3 E koe, te Kai-arahi pai,
To Hahi tapu awhitia ;
Manaakitia matou katoa,
E koe, te Wairua atawhai.

Tirohia hoki 113, 114, 182, 183.

MO NGA WA KATOA.

57 *He tapu, he tapu, he tapu a Ihowa o nga mano : ki
katoa te whenua i tona kororia.*—Ihaia vi. 3.

12 13 12 13.

Rangi, **Nicaea**. 160.

- 1 TAPU, Tapu, Tapu, Ihowa Kaha rawa ;
Hono tonu i ia ra ta matou whakapai ;
Tapu, Tapu, Tapu, Atua tino tohu,
Matua, Tama, Wairua, kotahi ia Atua.

MO NGA WA KATOA

- 2 Tapu, Tapu, Tapu, koropiko tonu
To te Rangi hunga tapu, mou te moemiti :
No tua iho koe, a ake tonu atu ;
Nau ano, hei ahua-reka mou nga mea katoa.
- 3 Tapu, Tapu, Tapu, hara nui no matou
Kore ai e kitea atu tou kororia nui :
Tapu nei ko koe, he rite mou i kore,
Tino Kaha, Kino-kore, tino Aroha.
- 4 Tapu, Tapu, Tapu, Ihowa Kaha rawa ;
Ma te Rangi, ma te whenua koe e whakapai ;
Tapu, Tapu, Tapu, Atua tino tohu,
Matua, Tama, Wairua, kotahi ia Atua.

58 *E nga mea katoa e whai-manawa ana, whakamoe-
mititia a Ihowa.*—Waiata cl. 6.

8 8 8. Rangi, **St. Aidan.** Bristol Tune Book, 225.

- 1 AROHA mai, e te Atua ;
Te rangi mou a te katoa
Manaakitia mai ra e koe.
- 2 Me aha koe, e te Matua ?
Me whakapai to mahinga,
I hanga ai e koe te ao.
- 3 E koe, te Tama a t' Atua ;
Me whakanui tou matenga,
I takea ai te oranga.
- 4 E koe, te Wairua atawhai,
E tohu nei, e ako nei ;
He whakapainga tenei mou.

MO NGA WA KATOA

- 5 Te Tokotoru Tapu, Nui ;
Kia tino whakanuia koe
E runga ra, e raro nei.

59 *Waiata atu ki a Ihowa ; whakapainga tona I-
ngoa.*—Waiata xvi. 2.

7 7 7 5.

Rangi, **Capetown.** 163.

- 1 Tokotoru Tapu, Nui,
Tahi tonu nei Atua,
Ata whakarangona
Tenei himene.
- 2 Marama tiaho mai,
Take o nga pai katoa,
Tou aroha atawhai
Whakahangia mai.
- 3 Puna o te oranga,
Tahia ra o matou he ;
Horahia mai ra e koe
Te marino nui.
- 4 Koropiko atu nei,
Pehi tonu mai te he ;
Ko a muri ake nei
Tino pono ai.
- 5 Tokotoru Tapu, Nui,
Tahi tonu nei Atua,
Matou ra manaakitia,
Arohaina mai.

MO NGA WA KATOA

60 *Tena kia waiata tatou ki a Ihowa : kia hari te hamama ki te kamaka o to tatou whakaoranga —*
Waiata xcv. 1.

L.M.

Rangi, **Old Hundredth.** 166.

- 1 TENA kia waiata tatou
Ki a Ihowa te Atua ;
Kia hari pu ki te kaha
O to tatou orange nui.
- 2 Kia rupeke, kia waiata,
Ki to t' Atua aroaro !
Na, kia kaha te waiata
I ta tatou whakapainga.
- 3 Ko Ihowa ano hoki,
He Atua nui, aroha pu ;
Ae ra, he Kingi rahi ia
I era atua ke katoa.
- 4 Tena kia karakia pono,
A kia koropiko tatou,
Ki te Atua o te rangi,
I hanga nei hoki tatou.

61 *Kia hari te hamama ki a Ihowa, e nga whenua katoa.—*Waiata c. 1.

L.M.

Rangi, **Old Hundredth.** 166.

- 1 KIA hari, e te ao katoa,
Ki a Ihowa te Atua :
E piko ki te Ingoa nui
Ona e noho iho nei.

MO NGA WA KATOA

- 2 Mahara ra, ko te Atua
Kei runga i nga mea katoa ;
Ko ia t' Atua i hanga ai
Nga mea katoa e kitea nei.
- 3 E tomo, e te tangata,
Ki tona whare hari ai ;
Kia whakapaingia ai e koe
Te Ingoa nui o te Atua.
- 4 Ko ia te take o te pai,
Nona ano te atawhai :
E pumau tonu tana ki,
E pono ki te ao katoa.

62 *E korerotia ana e nga rangi te kororia o te Atua ;
a e whakaaturia ana e te kikorangi te mahi a
ona ringa.—Waiata xix. 1.*

S.M.

Rangi, **Narenza.** 268.

- 1 Ko koe, e te Atua,
Te whakanuia nei,
Ua tirohia nga mahi nui
I mahia nei e koe.
- 2 E whakahua mai nei
Nga rangi i tou pai ;
Kei nga Karaipiture ia
Te tino kitea ai.
- 3 E whakakitea nei
Tou nuinga e nga ra ;
He kupu tapu ia te mea
Hei ako i ahau.

MO NGA WA KATOA

4 He ture tika au,
He kupu pono au,
Hei ako i te tangata
E noho kino nei.

5 Ko enei kupu ra
Te paingia nei e au :
Homai e koe te Wairua pai
Kia ngoto iho ai.

63 *Kia whakapar ano hoki nga kikokiko katoa ki to-
na ingoa tapu, ake, ake, ake. — Waiata cxlv. 21.*

L.M.

Rangi, **Winchester New.** 50.

- 1 NGA mano iwi o te ao,
Hapainga ra he whakapai
Mo te Kai-hanga nui ra,
Mo te Kai-hoko atawhai.
- 2 Me uru o te ao hapu
Ki tenei tino waiata ;
Me hapai taua ingoa,
Ka ora nei te tangata.
- 3 He oha, e Ihowa, nou
O tua iho, noho nei ;
Nga kupu au, he pono pu,
A pumanu tonu ake nei.
- 4 Me puta mou te waiata
I o te ao nei tini tai ;
Paku, paku, i raro nei ;
Me puta mou te whakapai.

*Praise to the man who⁶¹
communed with Jehova*

64 *Ko te Atua kua aroha ki a tatou, a tonoa mai ana e ia tana Tama hei whakamarietanga mo o tatou hara.*—1 Hoani iv. 10.

6 6 4 6 6 6 4.

Rangi, **Fiat Lux.** 360.

1 Tena ka waiata
Tatou i raro nei
Ki te Atua ;
Tona aroha nui,
I atawhaitia ai
Tatou te hunga he,
Korerotia.

3 Tena ka ora nei,
Rapua he tikanga
I te Atua.
Nona te pukenga
O nga whakaaro hou,
Nona te tikanga,
Nona te pai.

2 Nana i tuku mai
Tana Tamaiti pu
Hei whakaea ;
Koia ka haere noa
Te toa. a Hatana ;
Penei ka henumi
Tatou katoa.

4 A ko te orange
Mo nga tau tangata,
Korerotia.
Meinga ko Ihu ia
Hei whakamarire,
Waiho hei whakapai
Tona Ingoa.

65 *Ko Ihowa hei whakaara i te hunga kua whakapikoa iho ; e aroha ana a Ihowa ki te hunga tika.*
—Waiata cxlvi. 8.

7 7 7 7.

Rangi, **Vienna.** 38.

1 Ko Ihowa te Atua,
Nana tenei ora nui,
Koia tana atawhai
Mo te hunga o te pai.

2 Ko Ihowa te Atua,
Nana nei nga mea katoa ;
Kaua koe e wehi noa
Ki te riri o te ao.

- 3 Ka titiro tonu ia
Ki nga mate hono nei :
Tera e tahuri mai
Ki te tuku atawhai.
- 4 Ko Ihowa te Atua
Nana tenei kupu hou,
Kawea atu taku ki
Putā noa te ao katoa,
- 5 Abakoa ko Hatana
Tohe tonu ki te whai,
Kia mahara tatou nei,
Ko Ihowa te Atua.

66 *Ko ia te muru nei i ou kino katoa, te rongoa nei i
ou mate katoa.*—Waiata ciii. 3.

7777.

Rangi, **Lubeck.** 65.

- 1 HONO tonu i ia ra
Taku tino waiata ;
Mo te riri anga ke,
Koia taku himene.
- 2 Toku ngakau kua pai
No te wa i kitea ai
Aua toto heke ra
Runga i te Ripeka.
- 3 Waiho nei a Ihu pu,
Mana au e whakau ;
Toku ora, toku pa,
Toku take waiata.
- 4 Ma katoa e waiata
Taua tino Ingoa ;
Hira rawa tona pai,
Tini ana atawhai.

Sowing

- 5 Tena koia, hamama,
E nga mano iwi ra !
Tenei pu te oranga ;
Tou Atua, e Hiona !

67 *Ka hari ahau ki tau whakaoranga.*—Waiata ix.
14.

L.M.

Rangi, **Erfurt.** 57.

- 1 RA hari nui i kiia ai
Ko Ihu toku oranga !
He ngakau koa, purena noa,
Na konei au i hari ai.
- 2 Kua hiritia nei ko ahau
Ma toku Kingi atawhai ;
Me whakahua te hari nui ;
Me waiata, me whakapai.
- 3 Kua oti tana mahi pai ;
Kua kiia au na te Atua ;
I rongo au i tona reo,
Ko au ra tena, aru noa.
- 4 Ko tenei ia, kia pono koe,
E toku ngakau wairangi ;
Kia pumau koe ma te Atua ;
Kei aru koe nga mahi he.
- 5 Kia pono koe nga ra katoa
E ora ai i tenei ao,
Tutuki noa tou matenga ;
Ko kona koe tu hari ai.

*Let us speak kind words
to each other*

68 *E Ihowa, e to matou Ariki, ano te nui o tou ingoa i te whenua katoa!—Waiata viii. 1.*

L. M.

Rangi, **Intercession.** 456.

- 1 E RAHI koe, e te Atua ;
Te nui, te pai o tou Ingoa !
E koe, e whakanuia nei
I runga i te ao katoa !
- 2 He aha ra te tangata,
I arohaina ai e koe ?
I tukua ai t' Ariki nui
Hei utu mo o matou he ?
- 3 Me tuku te honore nui
Mona i whakamatea nei :
Me rite mai nga mea katoa
Te whakahua i tona pai.
- 4 E Ihu, toku orange,
Nou nei te Ingoa tino pai,
Kia whakanuia haeretia,
Taiawhio noa te ao katoa.

69 *Waiatatia ki a Ihowa he waiata hou, he mahi whakamiharo hoki ana.—Waiata xeviii. 1.*

10 10 11 11.

Rangi, **Hanover.** 431.

- 1 WHAKAHUATIA mai he waiata hou ;
Whakapaingia ra to tatou Atua ;
Kua oti nei hoki nga mahi nunui,
Hei miharotanga, hei putanga koa.
- 2 Kua taea e ia nga tikanga pai ;
Kua ea te utu mo tatou katoa ;
Kua kite nga pito katoa o te ao,
Na to tatou Atua te orange nui.

E

65.

The day dawn is breaking

MO NGA WA KATOA

- 3 E oho rapea, e koutou katoa,
Kia waiatatia te waiata nei ;
Hei tohu aroha, hei putanga koa,
Mo Ihu, te Kingi, te tino Atua.
- 4 Tenei ano ia te haere mai nei
Hei Kai-whakawa mo tatou katoa :
Te iti, te rahi, e whakaae mai,
He whakawa tika te whakawa nei.

70 *Pai tonu te Reme i whakamatea hei tango i te kaha,
i te taonga, i te matauranga, i te mana, i te
honore, i te kororia, i te whakapai.*—Whkite. v.
12.

8 6 8 6 8 8 8 7. Rāngi, **Salisbury**. Hym. Comp. 500.

- 1 HE rongo pai te oranga,
He hari mo te ao ;
Na Ihu ra i kawē mai
I tona matenga.
He kororia, he honore
Ki a Ihu te Ariki ;
Ko te Reme te oranga ;
Hareruia ki t' Atua.
- 2 Na Ihu ra i pono ai
To tatou oranga ;
I mate ia ki Kawari
Hei utu mo te ao.
He kororia, he honore
Ki a Ihu te Ariki ;
Ko te Reme te oranga ;
Hareruia ki t' Atua.
- 3 Kia rongo ra te ao katoa
I tona atawhai ;
Hei a ia nei te oranga
E tohu ana mai.

MO NGA WA KATOA

He kororia, he honore
 Ki a Ihu te Ariki ;
 Ko te Reme te oranga ;
 Hareruia ki t' Atua.

71 *Whakapaingia tona ingoa ; whakakitea tana whakaoranga i tenei ra, i tenei ra.*—Waiata xvi. 2.

10 10 11 11. Rangi, **Hanover.** 431.

- 1 E KOUTOU katoa, kia oho rapea,
 Whakahuatia mai he waiata hou ;
 Ko Ihu te Kingi kia kororiatia,
 Ko tona aroha kia waiatatia.
- 2 Kei a ia ano te oranga nui
 Kua takoto nei mo tatou katoa ;
 Kei a ia te kaha, te marietanga,
 Te aroha katoa, te hari, te pai.
- 3 Ko ahea rawa tino kitea ai,
 E paingia ana to tatou Atua ?
 E Ihu, tou kaha whakakitea mai,
 Whakahoutia e koe nga ngakau katoa.
- 4 Ko reira ano whakapaingia ai
 Tou ingoa tapu mo tou atawhai :
 Ko koe, ko te Kingi, e kororiatia ;
 Ko ou painga katoa e waiatatia.

How firm a Foundation

72 *Waiho atu i te Reme te whakapai, te honore, te kororia, te kaha, a ake ake ake.*—Whkite. v. 13.

C.M. Rangi, **St. Anne.** 165.

- 1 KA whakapai i runga ra
 Nga tini karere ;
 Kia uru tatou aiane
 Ki aua waiata.

MO NGA WA KATOA

- 2 Ka pai kia whakanuia nei
Te Reme a t' Atua ;
Ko tona matenga mamae
To tatou oranga.
- 3 Mo Ihu te honore nui,
Te mana o te ao ;
Nga pai katoa kia apitia
Mo tana mahinga.
- 4 Kia hui nga tini mea katoa,
Te rangi me te ao ;
Kia puta ke he whakapai
Mo tenei Kingi nui.

73 *Kei te waiata ratou i te waiata a Mohi, pononga a te Atua, me te waiata ano a te Reme.*—Whkite.
xv. 3.

S.M.

Rangi, **Dedication.** 395.

- 1 MARANGA tatou, e !
Ki tenei waiata ;
Ko ia ta Mohi himene
Me ta te Reme ra.
- 2 Katoa mai ano,
Me tuku whakapai,
Nga ngakau me nga arero,
Ki te Kai-atawhai.
- 3 Monā i mate ra ;
Monā i ara mai ;
Te noho mai i te rangi ra
Inoi tonu ai.

MO NGA WA KATOA

- 4 Waiata tonu, a
 Maiangi noa, e
 Te ngakau me te manawa
 I tenei himene.
- 5 Te hunga hara, e !
 Kaua hei wahangu ;
 Ka ea nei o koutou he,
 Na te Ariki pu.
- 6 Meake rangona
 Te poroaki mai ;
 “Me haere mai, e tama ma,
 Ki konei noho ai.”
- 7 Tena te waiata,
 Hei tino whakapai,
 A Mohi, a te Reme ra
 Te puta nui ai.

74 *E nga tama a te tangata, kia pehea te roa o to koutou arohatanga ki te horihori, o ta koutou whainga i te teka.*—Waiata iv. 2.

C.M.

Rangi, **Manchester New.** 354.

- 1 E KOUTOU, e nga tangata
 E noho kino nei,
 Ko ahea koutou mutu ai
 Te mahi i te he ?
- 2 Waiho nga mea o tenei ao ;
 Tahuri ki t' Atua ;
 Mahara ki te mahi nui
 A te Ariki pai.

MO NGA WA KATOA

- 3 Hoatu ra he whakapai
Ki tona Ingoa nui ;
Inoia ra he ngakau hou,
Kia tapu tonu ai.
- 4 Ko ta te ao e rapu ai,
Ko tona haringa.
Me rapu ia, me kimi ia,
E kore e kitea.
- 5 He kore tonu no te pai
E kitea i te ao :
Kei runga ra te haringa
E pumau tonu nei.

75 *Ki a koutou e whakapono na, he mea utu nui ia.—*
1 Pita ii. 7.

C.M.

Rangi, **St. James.** 388.

- 1 HE ahua reka pu ki a au
To Ihu Ingoa pai ;
Na reira nei te matakū
Mawehe rawa ai.
- 2 Ora te wairua i maru ;
Pouri, kua marama ;
Kua mama noa te taimaha ;
Hiakai, kua makona.
- 3 Te Toka e au iho ai ;
Kowhatu piringa ;
He kaha tuku tonu mai
I nga wa matenga.
- 4 He ngakau-kore tenei au
Te hoatu whakapai ;
Kia kite i tou kanohi,
Ko reira ngahau ai.

76 *Ki a koutou e whakapono na, he mea utu nui ia.—*
1 Pita ii. 7.

C.M.

Rangi, **St. Peter.** 176.

- 1 E KINO koe te Ingoa nei,
To Ihu Ingoa nui !
Pa rekareka ana mai
Te panga ki ahau.
- 2 Te Ingoa ra e ngaro ai
Nga he e pehi nei ;
He mana ia e ora ai
Te wairua hiakai.
- 3 Te Ingoa pai, te Toka nui
E piri ai ahau ;
Te puna e pupu mai ai
Nga atawhai katoa.
- 4 E Ihu, toku Hepara,
Ariki, Kingi nui ;
Tenei ka tukua atu mou
He rangi whakapai.
- 5 Hei kawē noa, hei tohe nui,
Matoke tonu ia ;
Kia kitea atu ra 'no koe,
Ko kona ngoto ai.
- 6 I tenei wa me whakahua
Ko tou aroha nui ;
Te wa e mate ai ahau,
Manaakitia e koe.

77 *Te aroha o Te Karaiti e kore nei e taea te mohio.—*
Epeha iii. 19.

L.M.

Rangi, **Wareham.** 63.

- 1 KIA rangona enei kupu,
No te aroha o Ihu ;
Ka karanga ki a tatou,
Kia tahuri, a ka ora.

MO NGA WA KATOA

- 2 He aha tona aroha?
I heke iho ia i mua
Ki te ao maori, hei utu
Mo o tatou tini hara;
- 3 A mate rawa ana ia,
Tanumia ana kia ngaro;
A no te po toru ra ia
I ara mai i te ana.
- 4 Ko tona aroha tenei,
Kia ngaro tonu iho ai
Te kaha o te rewera,
Kei hopukia tatou e ia.
- 5 Tena kia tahuri tatou
Ki a Ihu keiwha mate,
Kia arohaina ai tatou
E ia, kia ora tonu ai.

78 *Ki te whakairihia ake ahau ki runga i te whenua,
maku nga tangata katoa e kukume ki a au.—
Hoani xii. 32.*

6 6 6 6.

Rangi, **St. Martin.** 188.

- | | | | |
|---|--|---|---|
| 1 | PIRINIHA tapu,
Take o te ora,
Whakarongo iho
Ki nga mihi ake. | 4 | Nou nga toto tapu
Rewa ana mai nei;
Toto whakaheke
Mo te hunga hara. |
| 2 | Tare ana mai koe
Runga te ripeka,
Hei kukume atu
I te hunga hara. | 5 | Waiho mai i konei
Toku take ora;
Oku hara tini,
Mau e tahi atu. |
| 3 | Nei ra ia te tohu
Hei miharotanga,
Tenei te aroha
Whakahara rawa. | 6 | Te Ariki tapu,
Au nei arohaina;
Tenei arahina
Ki te ora tonu. |

79 *Kua whiriwhiria e Meri tena wahi pai e kore nei e tangohia i a ia.*—Ruka x. 42.

8 8 6 8 8 6.

Rangi, **Purleigh.** 195.

- 1 E TE Ariki atawhai,
Ko ahea ra tupono ai
Ahau e kimi nei,
E tohe nei, e kawe nei,
Kia matau atu ai ahau
Ki tou aroha nui?
- 2 He teka ia e mohiotia
Te pai o tenei taonga nui
I tukua iho nei :
Te nui, te roa, te hohonu,
E kore ra e matauria ;
He taonga ngaro ia.
- 3 E au, e noho kino nei !
Te whiwhi au ki tenei pai,
Ki tenei oranga !
Me mihi au, me kimi au,
Kia whakawhiwhia ra ano
Te taonga nei ki a au.
- 4 Kia pumau tonu ai ahau,
Me Meri ra i awhi nei
Nga wae o t' Ariki ;
Hei koa, hei tino painga ia
Te wa e rongoa ake ai
Ahau ki tona reo.

80 *Ahau, e te Ariki, whakaorangia.*—Matiu xiv. 30.

6 5 6 5.

Rangi, **St. Constantine.** 194.

- | | |
|---|--|
| 1 TAMA ngakau marie,
Tama a t' Atua,
Tenei tonu matou,
Arohaina mai. | 2 Murua ra nga hara :
Wetekina mai
Enei here kino,
Whakararu nei. |
|---|--|

- | | |
|--|---|
| 3 Takahia ki raro
Tau e kino ai;
Kei pa kaha tonu
Ko nga mahi he. | 5 Tenei arahina
A tutuki noa :
Putā i te pouri,
Whiwhi hari nui. |
| 4 Homai he aroha
Mou i mate nei.
Tenei ra, e Ihu,
Takina e koe ; | 6 Tama ngakau marie,
Tama a t' Atua,
Tenei tonu matou,
Arohaina mai. |

81 *Ko Ihowa toku hepara.*—Waiata xxiii. 1.

8 7 8 7. Rangi, **Dominus regit me.** 197.

- 1 Ko Ihu toku Heparā,
He kai-tiaki pono ;
Ko tana atawhai ki a au
He mahi tohu tonu.
- 2 E arahina au e ia
Te taha o nga awa ;
Kia inu iho ai ahau
Te puna o te ora.
- 3 Nga wahi matomato nui,
E tae ahau ki reira ;
Ko ana kai papai katoa,
Hei ora enei moku.
- 4 Kuware au, kotiti ke,
Aroha tonu mai ia ;
E rapua au, e kumea mai
Ki roto ki te kahui.
- 5 E pumau tona atawhai,
E kore ra e mutu ;
E arahina au e ia,
Tae atu ki te ora.

*See the mighty angel
living*

82 *Ko Ihowa toku hepara, e kore ahau e hapa.—*
Waiata xxiii. 1.

7777.

Rangi, **German Hymn.** 372.

- 1 Ko Ihowa te Atua
Toku Kai-tiaki pai;
Mana au e arahi
Ki nga wahi ora nui.
- 2 Mana ra ka ora ai
Toku wairua i te he;
Mana ra e ako mai
Ana ture ki ahau.
- 3 Ina haerea e ahau
To te mate takiwa,
Tera ia e tata mai;
Mana au ka ora ai.
- 4 Pumau tonu tona pai,
Tana atawhai ki a au;
Koia ka purena ai
Toku ngakau i te koa.

83 *Whakaukia oku hikoinga ki o ara, kei paheke aku*
takahanga.—Waiata xvii. 5.

C.M.

Rangi, **Abridge.** 282.

- 1 E IHU, whakarongo mai
Ki a au e inoi nei;
Mau ra ahau e arahi
Kei peka ki te he.
- 2 He mahi whakararu mai
Ta Hatana i a au;
Ahau ra whakaorangia
I ana tohe mai.

Beautiful words of love 75

MO NGA WA KATOA

3 E riro au te whakawai,
E taka ki te he,
Aroha mai ra, kumea au
Kia hoki ki te pai.

4 Whakaakona ahau e koe
Kia matau iho ai;
Kei a koe ra te kaha mai
E pono ai ahau.

84 *He mea arahi ratou e ia i te awatea ki te pou
kapua; i te roa hoki o te po ki te maramatanga
o te ahi.*—Waiata lxxviii. 14.

10 4 10 4 10 10.

Rangi, **Lux benigna.** 266.

1 MARAMA pai, ahau e kimi nei
Me arahi:
Tu mai te po e he ai hoki au,
Me arahi.
Te ara pai me tohutohu mai
Kia tika ai te hikoi oku wae.

2 No tenei wa ahau ka inoi ai,
Me arahi:
I era ra ko tenei ngakau he,
Kotiti ke:
He pai ki a au nga mahi he katoa;
Te ai he mea e hopohopo ai.

3 Tau mahi ia, he atawhai i a au,
He tohu mai;
Nei tonu ra me arahi e koe,
Tutuki noa.
Kia waiho ko te aonga o te ra
Hei takiwa e hari tonu ai.

85 *Haere mai ki ahau, te koutou katoa e mauui ana,
e taimaha ana, a maku koutou e whakaokioki.—*
Matiu xi. 28.

8 5 8 3.

Rangi, **Stephanos.** 254.

- 1 MATE koe i te mauui,
Tamia rawatia?
Nei kei a au te ata noho ;
Haere mai !
- 2 Matauria ai ki te tohu,
Whaia atu ai ?
Poka pu nga wae, nga ringa,
Te kaokao.
- 3 He karauna kingi ranei,
Mau ki tona rae ?
Koia tena, otira he
Taramoa.
- 4 Kite au, whai haere atu
Whiwhi ranei au ?
Nui te mahi, nui te raru,
Te mamae.
- 5 U tonu ahau ki a ia,
Aha ra te pai ?
Mahue raru, mutu mahi,
Nui te koa.
- 6 Whakatata au ki a ia,
Panaa ranei au ?
Rangi, whenua, kia pahure,
Kore noa.
- 7 Kitea, whaia, taea, tohea,
E manaaki mai ?
Ae katoa te hunga tapu ;
Ae ano !

86 *Ki te haere mai tetahi ki a au, e kore rawa ia e hiakai; ki te whakapono hoki tetahi ki a au, mutu ake tona mate wai.*—Hoani vi. 35.

C.M. D.

Rangi, **Vox Dilecti.** 257.

- 1 Ki ana mai to Ihu reo,
 “E koe, e ngenge nei,
 Hei konei okioki ai;
 Urunga mai ki a au.”
 Hohoro tonu atu au,
 Au, kino nei ano,
 A okioki ana au,
 Tae tonu mai te koa.
- 2 Ki ana mai to Ihu reo,
 “Nei ra te tino wai,
 Tuohu mai, kia inu koe.
 Hei ora tenei mou.”
 Ko au ra tena inu noa
 I taua awa pai:
 Na noa ko toku mate wai,
 A ora ana au.
- 3 Ki ana mai to Ihu reo,
 “Ko au te marama;
 Titiro mai, e ao tou ra
 Hei ra marama nui.”
 Titiro atu ana au,
 Marama tonu mai:
 Ko ia te Whetu, me te Ra
 Hei taki i ahau.

87 *Haere mai ki a au, e koutou katoa e mauiri ana, e taimaha ana.*—Matiu xi. 28.

L.M.

Rangi, **Angelus.** 20.

- 1 HE pouri noku mo te he
 E pehi kino nei i a au,

MO NGA WA KATOA

I rongo ake ai ahau,
He reo karanga, "Haere mai !

2 E pehia iho ana koe,
He mate tou, he manae nui ?
Me anga mai ra koe ki a au ;
Kei a au te ora ; haere mai !

3 Tenei te wahi pai kei a au ;
Hei konei okioki ai ;
Kei kinongia mai toku reo :
Kia maia ake ; haere mai !

4 Me tika mai nei koe ki a au ;
Kei anga, kei kotiti ke :
Titiro mai, kia mohio koe,
Ko au ra tenei ; haere mai ! "

5 Nei ra te reo aroha nui,
Te tohu o te atawhai.
E Ihu, ae, me haere au :
Karanga mai ra, "Haere mai ! "

88 *Tenei ahau te tu nei ki te tatau, te patuki nei.*—
Whkite. iii. 20.

7 6 7 6 D.

Rangi, **St. Catherine.** 198.

1 Ko koe, e Ihu, tena
E patoto mai nei ;
E whanga tonu ana,
Ko koe kia tomo mai ?
E ao ianei te kino,
Te hara tino nui ;
Ko au kia keke tonu
Ki tau i tonono ai ?

MO NGA WA KATOA

- 2 He puta kei ou ringa,
He nawe kei ou wae,
Karauna tohu mamae
Kei runga i tou rae.
Na oku hara ena
I rapa atu ai,
Nga hara whakakake
Ki tou aroha nui.
- 3 Ko koe, e Ihu, tena,
E ata ki mai nei,
“I mate au mo koutou
Te tukua atu au!”
Me kati au te turi;
E Ihu, tomo mai:
Me rahui toku ngakau
Hei wahi pumau mou.

89 *E aroha ana koe ki a au?—Hoani xxi. 16.*

7 7 7 7.

Rangi. **St. Bees.** 260.

- 1 TOKU wairua, oho mai,
Whakarongo ake ra,
Nei ta Ihu kupu mai,
“He aroha ranei tou?”
- 2 Naku koe i tango mai
I nga here whakarau;
• Naku koe i ora ai:
He aroha ranei tou?
- 3 Noku te aroha nui,
Pumau tonu ake nei,
Te ai tona rite mai:
He aroha ranei tou?

*Softly beames the sacred
dawnings*

4 Tera te torona mou,
Te kororia tino nui;
Ki mai koia ki ahau,
He aroha ranei tou? ”

5 Te Ariki, koia nei
Ko te mate i ahau :
Mau ahau e ako mai
E aroha pono ai.

90 *Me i maharatia e koe nga kino, e Ihowa ; ko wai,
e te Ariki, e tu ?—Waiata cxxx. 3.*

8 8 6 8 8 6.

Rangi, **Bridehead.** 297.

1 E IHU, kiia mai e koe,
A tou putanga mai a mua,
E ora ranei au ?
E pai mai ranei koe ki a au,
E tohu i te tangata
E hara tonu nei ?

2 Te wa e kohia ai e koe
Tou hunga ki tou kainga,
E riro ranei au ?
Ko au e keke tonu nei,
E hara tonu nei ano,
E ora koia au ?

3 E ao ianei te mate nui,
Ko toku ingoa kia kapea,
Ko au ra kia mahue !
E Ihu, arohaina mai,
Ahau ra whakaorangia
I tenei mate nui.

MO NGA WA KATOA

- 4 Tu ora ake ko ahau,
Ki a koe te kororia nui,
Te mana me te pai;
Me hui nga whakapainga mou,
Nou nei te tino atawhai
I ora ai ahau.

91 *E whiwhi koutou ki te okiokinga mo o koutou wairua.*—Matiu xi. 29.

C.M.

Rangi, **St. Agnes.** 178.

- 1 KOUTOU, te hunga i nga he
E pehi kino nei:
E ai ta Ihu, "Haere mai,
Maku ka mama ai."
- 2 Koutou, e tamia iho nei,
Tahuri tonu mai;
Hei konei okioki ai,
Tenei te atawhai.
- 3 Ma konei ra ka ora ai
Koutou e mate nei;
He rongo mau, he hari nui,
Tana e tuku ai.
- 4 Tahuri mai ra, tangohia
Te pai e kiia nei:
Kei paopaongia te oranga
Kua whakakitea mai.

92 *E te Ariki, kia mahara koe ki ahau.*—Ruka xxiii. 42.

C.M.

Rangi, **St. Mary Magdalene.** 459.

- 1 E IHU toku oranga
I oku tini he,
I runga i tou kainga,
Mahara mai ki a au.

MO NGA WA KATOA

- 2 I a au e pouri pu ana,
Kua rapua au e koe ;
I a au ano ka marama,
Mahara mai ki a au.
- 3 Ahau i tae ki tenei ra,
He mahi hoki nau ;
Waihoki tenei mahinga
Maharatia e koe.
- 4 Ka tohe nei a Hatana
Kia hoki atu au ;
E Ihu, kia uaua ra,
Mahara mai ki a au.
- 5 Ka whakatata pu ahau
Te haere i te ao,
Ko reira koe whakaaro ai,
Mahara ai ki a au.

93 *Kia manawanui ; ko ahau tenei ; aua e wehi.—*
Matiu xiv. 27.

8 8 8 6.

Rangi, **Misericordia.** 255.

- 1 PA mai nga hau pukeri nui,
Tu kino mai he ngaru pua,
Ra roto ana mai te reo,
Ko au ; kei wehi koe.
- 2 Ko au, ko tou Ariki nui ;
E arohaina iho koe ;
E taupuatia ra koe e au :
Ko au ; kei wehi koe.
- 3 Ko ena hau e kerī na,
Ko ena ngaru aki mai,
E rongo ra ki toku reo :
Ko au ; kei wehi koe.

MO NGA WA KATOA

- 4 Te kapa nei ra, inumia ;
E kawa mai, kei kinongia ;
Kua inumia ra e ahau :
Ko au ; kei wehi koe.
- 5 Ko au tou kai-tiaki pai,
Tou kai-arahi pono nei ;
Kei a au te tino taonga mou :
Ko au ; kei wehi koe.
- 6 Ka whakatata haere koe
Tou okiokitanga mai,
Tenei te reo powhiri mou,
Ko au ; kei wehi koe.

94 *Ka ai he tangata hei kuhunga atu ina pa te hau, hei piringa kei mate i te tupuhi.—Iha. xxxii. 2.*

7 7 7 7 D.

Rangi, **Hollingside.** 193.

- 1 AU, e Ihu, tirohia,
Arohaina iho ra ;
Whakaaetia ake au
Ki tou uma piri ai ;
I te wa e aki ai
Enei ngaru kino nei :
I te wa e keri ai
Enei awaha kaha mai.
- 2 Tiakina mai ahau
I te wa e rurea nei ;
Aratakina e koe
Roto te marino nui ;
Aua au e waiho noa ;
Awhitia mai ra e koe ;
Hipokina iho au
Raro i ou parirau.

- 3 Ranea tonu ana mai
Tou aroha atawhai ;
Kaha ana mai ko koe
Ki te muru i nga he :
Puna o te orange,
Whakahekea tenei wai,
Kia pupu i roto nei
Tae noa ki te mutunga.

95 *Taua toka ra, ko Te Karaiti.*—1 Kori. x. 4.

777777.

Rangi, **Redhead** 76. 184.

- 1 E TE Toka ingoa nui
Onamata iho ra,
Moku nei i wahia ai,
Hunaa iho au e koe ;
Tahia ake oku he
Ki te toto, ki te wai.
- 2 Hore kau e ea i a au
O te ture tikanga,
Ahakoa au oke nui
Tangi tonu ranei au ;
Mau anake hoki ra,
Mau ka ora ai ahau.
- 3 Tenei au te tu kau nei,
Hipokina iho ra ;
Tenei au te mate nei,
Whakaorangia e koe :
Oku kino, oku he,
Mau, e Ihu, e horoi.
- 4 I ahau e ora nei ;
A te wa e mate ai ;
Ina piki ake au
Ki te ao e ngaro nei ;
E te Toka ingoa nui,
Hunaa iho au e koe.

*Earth with her ten
thousands flowers* 85

96 *Kia mohio ano hoki ki te aroha o Te Karaiti.—*
Epeha iii. 19.

C.M.

Rangi, **Dundee**. 221.

- 1 HOMAI, e Ihu, he ngakau
Kia rongo atu ai
Ki tou tino aroha nui
I whakakitea mai.
- 2 Homai i tou Wairua rapea
Kia matau ai matou
Ki te nuinga o te kino
Ki roto nga ngakau.
- 3 He ngakau tinihanga ra
Kei a matou katoa ;
Homai rapea he ngakau hou,
Kia ki i te aroha.
- 4 Whakanuia rapea e koe
To matou aroha,
Mo matou nei tou matenga
Ki Maunga Kawari.

97 *Kua homai e te Atua ki a tatou te oranga tonu-
tanga ; kei roto ano i tana Tama tenei oranga.*
—1 Hoani v. 11.

6 6 6 6 8 8.

Rangi, **Harewood**. 293.

- 1 KIA rongo mai koutou
Ki enei tatau,
He tatau pono,
Na te Atua i mea ;
Tana Tamaiti i homai.
Ko ia hei utu mo tatou.

- 2 Kua e whakahoe
 Ki ana korero,
 Kua he hoki tatou
 I te hanga kino ;
 Tana Tamaiti i homai,
 Ko ia hei utu mo tatou.

- 3 He mea whakamarie
 Ona toto ano
 Mo o tatou hara
 Ki a Ihowa ra ;
 Tana Tamaiti i homai,
 Ko ia hei utu mo tatou.

- 4 E Ihowa, homai
 Tou Wairua, kia hei ai
 Matou te aroha
 Mo taua oranga ;
 Nau tau Tamaiti i homai,
 Ko ia hei utu mo matou.

98 *He aha taku e whakahoki atu ai ki a Ihowa mo ana
 atawhaitanga katoa i a au ? —Waiata cxvi. 12.*

L.M.

Rangi, **Commandments.** 201.

- 1 E IHU, akona matou,
 Te mahinga a tou ringa,
 Ki te waiata ki a koe,
 Ki te ho ake whakapai.

- 2 Marie koe hei arahi mai
 I a matou ki konei nei,
 I rangona ai he Atua,
 He mahi whakaora tau.

MO NGA WA KATOA

- 3 He aha hoki ta matou,
Hei whakahoki ki a koe,
Mo tou aroha nui rawa,
Ki te tohu i a matou ?
- 4 Hore rawa a matou mea,
He kino kau kei a matou :
Ko matou ra, meatia e koe,
Hei hunga mou i tenei ao.
- 5 Ko tou marama te homai,
Hei whiu i to matou pouri ;
Kia ata hari pono ai
Matou, e Ihu, ki a koe.

99 *Whakaakona ahau ki te mea i tau e pai ai, ko koe
hoki toku Atua.*—Waiata cxliii. 10.

C. M.

Rangi, **Bedford.** 279.

- 1 E IHU, homai ra e koe
He ngakau ngawari,
Kia rongo tonu ai ahau
Kia au whakaaro hou.
- 2 Me tuku mai i tenei ra
Tou Wairua whakapai,
Kia kitea ai e au te he
E noho nei i a au.
- 3 He tini aku mahi he,
Ko au e kino nei ;
Rukea ki waho aianeī,
Kia poto ai katoa.
- 4 Kia tupu ko te whakapai
Mo tou aroha nui,
Kia waiho ai te ngakau nei
Kia tapu tonu mou.

How great the wisdom and the

100 *Ko tenei Atua te Atua mo tatou ake-ake; ko ia hei kai-arahi i a tatou a mate noa.—Waiata xlviii. 14.*

878747.

Rangi, **Pilgrimage.** 196.

- 1 ARAHINA, e Ihowa,
To pononga i te ao;
Whakakitea mai tou kaha,
Puritia ra au e koe
A whangainga
Ki te kai e ora ai.

- 2 Whakahekea mai te puna
Hei horoi mo te hara;
Tukua ko te kapua mura
Hei arahi i ahau;
Tenei hoki
Whakakahangia e koe.

- 3 Whakamamakia e koe
To te mate takiwa;
Whakawhitia to pononga
I nga wai o Horano;
Whakauria
Ki te wa o Kenana.

Lord accept our true devotion

*Guide us O Lord
great Jehovah*

101 *Kua mea mai a Ihowa ki a au, Ko koe taku Tama, nonaianei koe i whakatupuria ai e ahau.—Wai. ii. 7.*

C.M.

Rangi, **Salisbury.** 377.

- 1 HE aha ra i nana ai
Nga iwi o te ao;
He aha i whakaaro ai
Kia mahi i te he?

Prayer is the Soul's sincere desire

MO NGA WA KATOA

- 2 I whakatika ake ai
Nga kingi o te ao ;
Kia whawhaitia ko te Atua,
Ko tana Tama pai.
- 3 Ahakoa ratou tohe mai,
Tera e mate noa ;
Nei hoki ra, kei Hiona,
Te tino Kingi nui.
- 4 I ki mai hoki te Atua,
Ko tana Tama ia,
Mana nga tauwi katoa,
Nga pito o te ao.
- 5 Kia mohio e te tangata,
E ako i te pai ;
Tahuri ki te oranga
Kua whakakitea mai.

102 *Ko ia ano te upoko o te tinana, ara o te Hahi.*
—Korohe i. 18.

7 6 7 6 D.

Rangi, **Aurelia.** 215.

- 1 TE take o te Hahi,
Ko Ihu Karaiti ;
He taonga tupu nana
I matea nuitia ai.
I runga i te rangi
Ka rapua mai e ia ;
Mo konei ona toto
I whakahekea ai.
- 2 Ka ata whiriwhiria
I roto i te ao
Nga iwi kia kotahi,
Hei Hahi ma t' Atua ;

Nei hoki te pepeha,
 Kotahi Ariki,
 Kotahi Whakapono,
 Kotahi Ingoa nui.

3 E taunutia te Hahi
 Ua pangia e te he ;
 E pehi ko nga kino
 E hono ake nei :
 He tutei tonu tana,
 He mataara tonu ;
 He mihi tonu ake,
 Te roa ! A hea ano ?

4 E ranea ko nga mahi,
 Pa ranei ko te he,
 Tuhono tonu ake
 Nga whakararu nui,
 Kahore he whakaaro
 Kia pouri tonu ia ;
 Kua tata nei te wahi
 E okioki ai.

5 Homai, e te Ariki,
 Te Wairua atawhai,
 Hei arataki ake,
 Hei ako i te pai :
 Kia whaia ko te hunga
 Kua okioki nei,
 Tutuki rawa atu
 Ki a koe noho ai.

103 *Kia mataara koutou, me te inoi.*—Matiu xxvi.
 41.

7773.

Rangi, **Vigilate.** 269.

1 KOE, Karaitiana nei,
 Ata whakarongo mai,
 Tenei, kia mataara koe,
 Kia inoi.

MO NGA WA KATOA

- 2 Aua koe e ruwaha noa,
Kei te nui he mahi mau ;
Ae ra, kia mataara koe,
Kia inoi.
- 3 Tohe mai te hoa whawhai :
Ranea ana whakawai ;
Tama, kia mataara koe,
Kia inoi.
- 4 Kei te whanga tonu ia
Mou kia taka ki te he ;
Oti kia mataara koe,
Kia inoi.
- 5 Whakarongo ake ra
Ki ta Ihu ako inai ;
Tama, kia mataara koe,
Kia inoi.
- 6 Kia mataara tonu koe,
Hono tonu te inoi ;
Ae ra, kia mataara koe,
Kia inoi.

104 *Kahore ahau e whakama ; e matau ana hoki ahau
ki taku i whakapono ai.*—2 Timoti i. 12.

L.M.

Rangi, **Melcombe.** 356.

- 1 OTI kia whakama ahau
Ki te Ariki o te ao,
Nana te ora i homai,
Nana ano te rongo pai ?
- 2 He tika tenei whakama
Mo aku kino ki a ia,
Mo toku ngakau matoke,
Me aku tini mahi he.

- 3 No Ihu ia te atawhai,
Mana ahau ka ora ai,
Kua ora nei te ao katoa
I tona tino matenga.
- 4 Homai rapea ki a matou
He ngakau whakapono pu,
Kia mate i te ngakau hou
O matou ngakau tawhito.

105 *Kaua e matakū, e te kahui nohinohi; kua pai hoki to koutou Matua ki te homai i te rangatiratanga ki a koutou.*—Ruka xii. 32.

7777.

Rangi, **Buckland.** 334.

- 1 E TE kahui iti nei,
Aua ra e wehi noa;
Nei ano te atawhai
O te kai-tiaki pai.
- 2 Ina karapotia mai
E nga kino o te ao,
Anga atu ki t' Atua
Aua e titiro ke.
- 3 Tena 'no te kainga hou,
Mana nei e tuku mai;
Nana hoki tenei pai,
Tenei mahi atawhai.
- 4 Kati ra te oho noa
Ki nga mate puta mai;
Ina hoki ko t' Atua,
He Matua aroha nui.

106 *I te ata ka whakatikaia atu e ahau taku inoi ki a koe, a ka titiro matatau atu.*—Waiata v. 3.

L.M.

Rangi, **St. Ambrose.** 144.

- 1 WHAKAAROA mai, e te Atua,
Ahau e mihi atu nei;
Kia rongo, e te Kingi nui,
Ka inoi atu hoki au.
- 2 E kore ra e awatea,
Ko toku reo kua rangona;
Ka anga ake hoki au,
Ka inoi atu ki t' Atua.
- 3 He kore hoki nou e pai
Kia mahia tonutia te he;
Ko tau e whakakino ai,
He ngutu kawē hianga.
- 4 Meinga mai au, e te Atua,
Kia tika i o ara pai.
Me arahi ahau e koe
Kei riro i te hoa whawhai.

107 *Ka hari te tangata kahore nei e haere i te whakaaaro o te tangata kino, kahore ano hoki e tu i te ara o te hunga hara.*—Waiata i. 1.

C.M.

Rangi, **St. Timothy.** 5.

- 1 KA painga ra te tangata
E kore e rite
Ki ta te tangata kino
Ana tini mahi.
- 2 Tena ko tana pai ano
Te ture a t' Atua,
Ko reira ona whakaaaro
I te ao, i te po.

NO NGA WA KATOA

- 3 Me te rakau tona rite,
E tupu pai ana,
Kei te tahataha awa,
Matomato tonu.
- 4 Ana mea katoa e pumau,
Kei a ia te Atua
Hei Matua atawhai mona,
Ko ia hei tamaiti.
- 5 Ka titiro a Ihowa
Ki ana tangata ;
Tena ko te hunga kino,
He mate to ratou.

108 *E rite ia ki te rakau i whakatokia ki te taha
o nga awa wai, e whai hua nei i te po e hua
ai.—Waiata i. 3.*

C.M.

Rangi, **St. Fulbert.** 189.

- 1 HE hari to te tangata
E kore nei e whai
Ki to te kino runanga,
Ki reira noho ai.
- 2 Kei ta Ihowa ture ke
Tana tumanako ;
Waiho hei mahi mo te ra,
Hei rapu mo te po.
- 3 E rite ki te rakau pai,
Whai hua nei ano,
I tupu ki te taha wai,
I pai te whakato.
- 4 E pahau tonu tona rau,
E matomato pu ;
Ko ana mahi e pumau,
E meinga kia u.

- 5 Ka waiho to Ihowa pai
I tona iwi pu ;
Apopo ngaro atu ai
Nga tangata tutu.

109 *E matau ana a Ihowa ki te huarahi o te hunga tika ; ko te huarahi ia o te hunga kino e ngaro.*—Waiata i. 6.

C.M.

Rangi, **Dundee**. 221.

- 1 HE hari to te tangata
E kore nei e pai,
E kore nei e whakaae
Kia mahi i te he.
- 2 He rakau tupu taha wai,
E ranea nei nga hua,
E kore nei e mate noa,
Ko tona rite ia.
- 3 Te penei ra te tangata
E whai nei i te he ;
He papapa titari noa,
Ua puhia e te hau.
- 4 Ka timata te whakawa,
E kore ia e tu :
Ka runanga te hunga pai,
Ka kapea atu ia.
- 5 Te ara o te hunga pai,
E matau te Atua ;
Ko to te hunga kino ia,
Ka heke ki te po.

110 *Kia inoi tonu ; kaua e ngoikore.*—Ruka xviii. 1.

L.M.

Rangi, **Breslau**. 246.

- 1 E TINI koe nga mahi he,
Nga mahi whakararu mai,
Te tika ai ko tenei mea,
Te inoi pono ki t' Atua.

- 2 He inoi nei te tino mea
E pono ai te tangata ;
E kakea ai te ara hou
I kitea nei e Hakopa.
- 3 He inoi ra te take mai
E tino maia ake ai,
E ngaro ai te kapua po,
E tau mai ai he marama.
- 4 Ma konei koe ka kaha ai
Te patu i te hoa whawhai ;
Ta Hatana e wehi ai,
He ngakau inoi pono nei.
- 5 Me inoi a ka whiwhi koe ;
Patoto, ka tuwhera mai :
Ko kona ra koe matau ai,
He inoi ia te mahi pai.

111 *Ma te Atua tatou e atawhai ; mana tatou e manaaki.*—Waiata lxvii. 1.

L.M.

Rangi, **Ely.** 75.

- 1 TITIRO mai, e te Atua,
Ki tenei whakaminenga,
Kia whakarongo iho koe
Ki tenei rangi whakapai.
- 2 Hei konei ra koe noho ai,
Hei waenga i a matou nei :
Manaakitia mai ra e koe
Te kahui o tou atawhai ;
- 3 Kia tika ai te waiata
Kia pono ai te karakia ;
He mea kia riro iho ai
Te taro o te orange.

MO NGA WA KATOA

- 4 Kia tau te oro whakapai
I roto i te whare nei ;
Hei konei oho ake ai
Nga Areruia hari nui.

112 *Te wahi e whakaminea ai te hunga tokorua,
tokotoru ranei, he whakaaro ki toku ingoa,
kei reira ahau, kei waenganui i a ratou.—
Matiu xviii. 20.*

C.M.

Rangi, **Whitwell.** 66.

- 1 NGA wahi ra e mine ai
Te hunga karakia,
He whakarite i te ki
A Ihu t' Ariki ;
- 2 "Ko reira ano hoki au,"
E ai ko tana ki,
"E ata whakarongo au,
E tino whakapai."
- 3 Nei tonu whakapaingia mai
Matou e mine nei ;
Homai e koe he ngakau hou
Kia inoi pono ai.

113 *Te Kai-whakamarire, te Wairua Tapu, e tonoa
mai e te Matua i runga i toku ingoa.—
Hoani xiv. 26.*

8787.

Rangi, **Batty.** 109.

- 1 E TE Wairua, Kai-hanga
O te ngakau tangata,
Heke iho, tou kaha
Homai ki au pononga.
- 2 Oha a te Rungarawa,
Hei Kai-whakamarire :
Ahi, Aroha, Wai ora,
Hinu whakawahinga.

Prayer is the Saviour
sincere desire

- 3 Takiwhitu au mea homai,
Ringa o te Atua :
Ta te Matua i ki mai,
Hei whakaako korero.
- 4 Mau te marama e homai,
Matapuna aroha :
Mana tonu tou kaha
Ki o matou tinana.
- 5 Mau e arai te hoa-riri ;
Mau e ata noho ai :
Matou ata arahina :
Kia atea ai i te he.
- 6 Homai au mea whakahari :
Me au tohu atawhai :
Whakangaromia te whainga
Runga i te Rongo-mau.
- 7 Meinga matou kia whakaae
Ki te Matua aroha,
Ki te Tama atawhai,
Ki to Rana Wairua.
- 8 A kia puaki he moemiti
Ki te Tokotoru pai.
Ko te Wairua whakahari,
Hei a matou noho ai.

114 *Te Kai-whakamarie, e tonoa mai nei e ahau ki
a koutou i te Matua, te Wairua o te pono, e
puta mai nei i te Matua.*—Hoani xv. 26.

L.M.

Rangi, **Veni Creator**, No. 2. 157.

- 1 TE Wairua Tapu, atawhai !
Tou kaha whakakitea mai :
Homai he tohu mo te pai
Ki roto ki nga ngakau nei.

- 2 He tohu whakahari ra
Te tohu o tou atawhai ;
He marama tiaho ia
I roto i te pouri nui.
- 3 Tohaina mai ra aianeī
Te mana o tou atawhai :
Hei whakawahi mo te pai,
Hei whakahari i katoa.
- 4 He rongō mau te tuku mai,
Kei tata ko te hoa whawhai ;
Kia tu ko koe hei arahi,
Ka pumau ko nga pai katoa.
- 5 He ngakau hou te hanga mai,
Kia whakapaingia ake ai
Te Tokotoru Tapu, Nui,
Kotahi tonu nei Atua

115

Kia marama.—Kenēhi i. 3.

6 6 4 6 6 6 4.

Rangi, **Moscow**. 360.

- | | |
|---|---|
| <p>1 E Koe, i na tou reo
I hanga ai i mua
Nga mea katoa ;
Whakaaroa mai e koe
Nga wahi pouri nui,
Ki mai ano tou reo,
Kia marama.</p> | <p>3 E koe, te Wairua pai,
E arataki nei,
Kia atawhai :
Nga mea kotiti ke,
Te ngakau kuware,
Me ako mai e koe
Kia marama.</p> |
| <p>2 E koe, i takea ai
Te ora mo te ao,
Aroha mai :
Te hunga matapo
Maharatia e koe,
Ki mai ra ki katoa,
Kia marama.</p> | <p>4 Te Tokotoru nui,
Atua kotahi nei,
Ki mai tou reo :
Nga wahi noho he,
Nga takiwa katoa,
Taiawhio noa te ao.
Kia marama.</p> |

116 *Te purapura, ko te kupu a te Atua.*—Ruka viii. 11.

C M

Rangi, **St. Magnus.** 301.

1 E TE Atua, kua ruia nei
O purapura pai :
Homai e koe he ngakau hou,
Kia tupu ake ai.

2 E Ihu, kua e tukua
Kia whakangaromia,
Me whakatupu ake ia,
Kia kitea ai nga hua.

3 A ma te Wairua Tapu ra
Matou e tiaki,
Kei hoki ki te mahi he
O matou ngakau hou.

*Prayer is the
Lord's choir*

117 *He rama to kupu ki oku waewae, he marama-
tanga ki toku ara.*—Waiata cxix. 105.

6 6 6 6.

Rangi, **Ravenshaw.** 243.

1 TE Ariki tohu,
Waiho ko to kupu
Mana au e taki
Ki te ara tika.

4 Ma wai ra e kimi,
Ma wai ra e whaki
O te Kupu tapu,
Ona tini painga?

2 Tata te hoa riri,
Nei te kupu pono :
Kupu whakahari
Mo te ngakau wehi.

5 Kupu whakahari
I te hunga ora ;
Kupu whakaora
Mo te hunga mate.

3 Tu te awa keri,
Mangu mai te rangi,
Tera ia e pono
Tana arataki.

6 Nei ra, kia whakaaro,
Puritia te Kupu ;
Mana nei e taki
Ki te ora tonu.

I need thee every hour

118 *Kia ora koutou i tenei whakatupuranga tutu.*
—Mahi ii. 40.

7 7 7 7.

Rangi, **Culbach.** 73.

- 1 WHAKARONGO, e mea ma,
Ki te aha e taria?
Titiro ra ki te ao,
E rere tonu ana.
- 2 Ma te turi ka aha ai?
Ma reira koe e huna?
Heoi ano rongonga,
Ki te kupu anga mai.
- 3 Tera ano a Ihu,
Kei te mea i te kainga
Mo ana tamariki,
E anga atu ana.
- 4 Mo tatou taua wahi?
Ae, kia hou ano hoki
Enei ngakau matoke.
Ua ngoto te aroha.
- 5 Kia hono te whakaaro,
Kei tau tona aroha,
Kei riri ki a tatou,
A mate tonu iho.

119 *He puna ora te wehi ki a Ihowa, e mahue ai nga
reti o te mate.*—Whakatauki xiv. 27.

L.M.

Rangi, **Commandments.** 201.

- 1 OTI ko tatou e mate?
He pono no te mea hoki
Kua poroki a Ihowa,
E mate te iwi hara.

- 2 A ka whakawakia tatou ?
Koia ra, a, a taua ra
Ka whakatangihia hoki
Te tetere a te Atua.
- 3 A ka ara ake tatou,
Ko te hunga whakapono
Ki te ora tonu hoki,
Ki a Ihu, ki te rangi.
- 4 Ko te hunga whakateka,
Ka turakina ki te po
E te riri o te Atua,
Hei parau ma te rewera.
- 5 Ka pehea ra nga whakaaro ?
Kia noho tatou i te he ?
Kahore, me oma tatou
Ki a Ihu, ki te ora.
- 6 Hapainga tatou ; kei taria,
E whanga nei a Hatana.
Na, whakatika koia pea,
Kei rokohina ra tatou.

120 *Ka whakarite whakawa ia mo te ao i runga i te tika, mo nga iwi hoki i runga i tona pono.—*
Waiata xvi. 13.

L.M.

Rangi, **Old Hundredth.** 166.

- 1 MA Ihu ra e whakawa
Nga iwi o te ao katoa :
Ko reira whakaritea ai
Nga mahi a te tangata.
- 2 Ko reira whakamatea ai
Te hunga hara tonu nei ;
E kore ra e tohungia
Ua tohe tonu ki te he.

- 3 Mahara, e te tangata,
E awhi ki te oranga,
Kei riri mai ko te Atua,
Ka mate tonu atu koe.

121 *E nga kuware, kia matau koutou ki te ngarahu
tupato; e nga wairangi, kia mohio te ngakau.*
—Whakatauki viii. 5.

L.M.

Rangi, **St. Bartholomew.** 374.

- 1 Ki ana mai te wairangi,
Kahore tonu, he Atua;
He mea kia tika haere ai
I tona huarahi he.
- 2 I tirohia e te Atua
Te ahua o te tangata,
Kua he katoa, kua tika ke,
Kihai kotahi mo te pai.
- 3 Aue! te mate mo te ao!
Ko hea te hara piri ai?
Ko hea te ngakau hianga
Ua pa te riri a t' Atua?
- 4 Titiro ra ki Kawari,
Te take o te oranga:
A whakapaingia tonutia
Te Kingi nui o Hiona.

122 *E Ihova, tohungia ahau; e ngoikore ana hoki
ahau.*—Waiata vi. 2.

S.M.

Rangi, **St. Michael.** 152.

- 1 KEI riri tonu mai.
E te Atua, ki a au;
Kia tohu koe, kia atawhai
Ki a au e pouri nei.

May speak no ill,

- 2 He ngakau mamae nui
Mo aku mahi he,
Koia ka tangi ai ahau,
Ka mihi atu ai.
- 3 Tenei a Hatana
Te tohe tonu nei ;
He mea kia hinga ai ahau
I ana whakawai.
- 4 Homai, e te Atua,
He kaha ki ahau,
Kia maia ai ahau te pei
I toku hoa whawhai.

123 *Kia ara ake ai hoki i roto i te mahanga a te re-
wera te hunga i hopukia oratia e ia hei mahi
i tana e pai ai.*—2 Timoti ii. 26.

L.M.

Rangi, **St. Gall.** 29.

- 1 E IHU, kua rongo matou
I te nui o tou aroha,
E kore hoki e ahei
Te whakamatau i au mea.
- 2 E puritia ana matou
E te rewera, mau tonu ;
Ngaro pu o matou ngakau
I te hara, i te pouri.
- 3 Titiro iho nei rapea,
A whakaorangia matou
I te kaha o Hatana,
Te ariki o te reinga.
- 4 Whakahangia ra tou Wairua
Ki a matou e pouri nei ;
Kia tara ai matou katoa,
A kia whakamaramatia.

- 5 A me nga tama a te Atua
Hei konei matou hari ai ;
A ua mate, ki te rangi
Ka noho tahi ai tatou.

124 *E Ihowa, e tukinotia ana ahau ; pikitia toku turanga.*—Ihaia xxxviii. 14.

L.M.

Rangi, **St. Gregory.** 83.

- 1 KA whakahari te Atua
I te hinengaro pouri ;
E Ihu, toku tirohia,
Tenei ranei te pouri nei ?
- 2 E rongo au, he rongo noa,
Tona rite kei te rino ;
E rongo au, he mamae kau,
Noku te matau ki au mea.
- 3 He mea ano ra ka hiahia
Kia arohatia koe e au ;
He ngakau ke ka puta mai,
A ko te pai ka henumi.
- 4 Takitahi nga wahi pai
E mea nei au kia ranea mai,
Ko te inoi mo te kaha
Ka whakangoikoretia.
- 5 Meinga e koe te ngakau nei,
Ko tona tu kia puta ke,
Mau ra e mea hei ngakau hou ;
Ko reira au ka hari ai.

125 *E te Atua, tohungia ahau, te tangata hara.*—Ruka xviii. 13.

S.M.

Rangi, **St. Michael.** 152.

- 1 E IHU tenei au,
He kino kau ano,
E tono ana ki a koe
Kia whakahou i a au.

*The happy day has
rolled on.*

- 2 E kore au e hei
Te tango i au mea,
E herea ana hoki au :
E Ihu, wetekia.
- 3 Kahore aku mea
E paingia ai ahau ;
Mou anake, e Ihu, mou,
Whakaorangia au,
- 4 Oku tini hara,
E Ihu, horoia ;
A homai ra he ngakau hou,
He pera ia me tou.

126 *E te Ariki, kia kite o maua kanohi.*—Matiu
xx. 33.

C.M.

Rangi, **St. Ethelreda**. 248.

- 1 TAKOTO iwikore nei
Te ngakau tangata,
Ko te maranga te ahei
I ona taumaha ;
- 2 Te hiahia kawē ke,
Te ngakau matapo,
Te tohe ki nga ara he,
Te kore mohio.
- 3 E Ihu, mau te matapo
E whakamarama :
Mau ra e whakamohio,
E homai tikanga.
- 4 Whakahauorangia mai
Te hunga hara nei ;
Ka haere me te whakapai.
Te ara oranga.

127 *E hiainu ana toku wairua ki a koe, e hiahia ana oku kikokiko ki a koe i te whenua maroke, hiainu, kahore nei he wai.*—Waiata lxiii. 1.

S.M.

Rangi, **Lyte.** 284.

- 1 MAMAO mai nei ahau
I a koe, e t' Atua,
I ngakau mihi ake ai
Kia tata atu au.
- 2 Kia piki ake au
Te wa i a koe na ;
Kia okioki iho ai,
Te pa i Hiona.
- 3 Roa mai te takiwa,
Pa mai he ngenge nui,
Ko taku ia e oke ai,
Kia ora ko ahau.
- 4 Kia tata tonu koe,
Hei taki i ahau,
Kia puta ora ake ai
I enei he katoa.

128 *Kua aua atu te po ; ka tata te ao.*—Roma xiii. 12.

11 10 11 10 9 11.

Rangi, **Pilgrims.** 223.

- 1 HA ! nei te reo ; tau ana mai te oro,
Taiawhio noa nga wahi o te ao,
He waiata te mea e rehua mai nei ;
Ki ana mai, e mutu ra te he.
Reo Anahera, waiata mai ;
Powhiritia ra ko nga manene nei.
- 2 Whanake ra, na Ihu te karanga,
Tahuri mai, e koutou ngenge nei.

He rongo pai, he maunga rongo tonu,
Nei, ra te rangi o te waiata.

Reo Anahera, waiata mai ;
Powhiritia ra ko nga manene nei.

3 Kei aua noa, ano he rangi reka,
Te reo o Ihu e karanga nei ;
Nga mano ra, nga iwi, whakarongo,
Hui mai katoa ki a ia noho ai.
Reo Anahera, waiata mai ;
Powhiritia ra ko nga manene nei.

4 E tae mai ra te okiokitanga ;
Tu mai te po, he aonga to te ra ;
Kei aha koa te roa noa ai te ara ?
He ora nei kei tona mutunga.
Reo Anahera, waiata mai ;
Powhiritia ra ko nga manene nei.

5 Waiata mai nga Anahera tapu ;
Waiatatia ta koutou rangi pai ;
Hei whakakoa, hei whakahari ngakau,
Ao noa te ra e okioki ai.
Reo Anahera, waiata mai ;
Powhiritia ra ko nga manene nei.

129 *Ka noho tonu tatou ki te Ariki.*—i Teh. iv. 17.

S.M. D.

Rangi, **Nearer Home.** 231.

1 PUMAU ki te Atua !
Amine, koia ia ;
Nei ra te tino kupu pai,
Te kupu whakakoa, .
Tautoko i ahau
E oke haere nei ;
He ra, he takiwa mahue,
Kua tata haere au.

MO NGA WA KATOA

2 Te pa kororia nui,
 E noho ai ahau,
 Ano ki te whakaaro mai,
 Kua kitea atu koe !
 Te pai o ia whenua,
 Marama ana mai
 Te pa o toku Kingi nui,
 Hiruharama hou.

3 Pumau ki te Atua !
 Ko tenei kupu pai,
 Hei aianeī, e te Matua,
 Ka whakamana mai.
 Kia tata tonu ra,
 Hei arahī i a au ;
 Tautokongia ahau e koe,
 Kia haere pono ai.

4 Tupono noa te ra
 E mate ai ahau,
 Kia waiho ia hei takiwa
 E tino ora ai,
 E whiwhi ai ahau
 Ki ena taonga nui,
 E rite ai te kupu nei,
 Pumau ki te Atua.

130 *Kahore hoki he pa tumuu mo tatou i konei ;
 engari e rapu ana tatou i tetahi i roto i nga
 wa a muri nei.*—Hiperu xiii. 14.

6 6 8 6 4 7. Rangi, **Egypt**. (Hymnal Comp. 324).

1 KA mahue Ihipa,
 Te kainga o te he,
 He kainga hou te rapua nei
 Hei okiokinga.
 Hareruia,
 Arabina ki t' Atua.

MO NGA WA KATOA

2 Ko reira mutu ai
Te whawhai, me te he ;
Ko reira noho marie ai
O tatou tinana.
Hareruia,
Arahina ki t' Atua.

3 Ha ! whakarongo ra !
Te waiata o ko,
Ka puta nei i Kenana,
Te kainga o t' Atua.
Hareruia,
Arahina ki t' Atua.

4 E hari ana mai
Nga mano i te pai ;
Ka whakapai katoa ano,
Ka kitea ra t' Atua.
Hareruia,
Arahina ki t' Atua.

5 Meake tatou tae,
Ki aua pai ano ;
Ka uru ki te waiata
O taua kainga hou.
Hareruia,
Arahina ki t' Atua.

131 *Kahore hoki he pa tumau mo tatou i konei ,
engari e rapu ana tatou i tetahi i roto i nga wa
a muri nei.*—Hiperu xiii. 14.

7 6 7 6. Rangi, **St. Alphege.** 225.

1 KAHORE ra i konei
He wahi pumau mou ;
Me rapu atu tera
E ngaro atu ra.

- 2 Te pa e kiia ana
Kua whakaritea mai
Hei okiokitanga
I enei mahi he.
- 3 He mahi whawhai tonu
To tenei takiwa ;
Erangi ia, he pono,
Ko reira mutu ai.
- 4 E puao mai te ata
Hei huna i te po ;
Te hunga whakapono,
Ko reira hari ai.
- 5 E kitea atu hoki
Te mata o t' Atua ;
Tuturu tonu atu
Ta ratou whakapai.
- 6 E whiwhi pumau hoki
Ki ena taonga nui,
Ua nohoia e ratou
Te pa o te Atua.

132 *Kei tou aroaro te haringa nui.*—Waiata xvi. 11.

8 8 8 8. Rangi, **Doncaster**. (Bristol Tune Book 231).

- 1 E IHU, whakaaro mai koe
Ki ahau ra e inoi nei,
Kia tae atu ai ko ahau
Ki tou wahi kororia nui.
- 2 Whakakitea mai ki ahau
Te pai o te Kenana hou,
Ki ahau ra e ohia nei
Ki tou wahi kororia nui.

- 3 Ko koe toku haringa nui,
Ko taku e pai atu ai,
Te kai-arataki i a au
Ki tou wahi kororia nui.
- 4 Ko koe ra e taria nei,
Kei roa tou putanga mai;
Hohoro tau tango i a au
Ki tou wahi kororia nui.

133 *E marama hoki ratou i te Ariki, i te Atua.—*
Whakakitenga xxii. 5.

C.M.

Rangi, **Beatitudo.** 438.

- 1 MAHUE rawa tenei ao,
Reia ko runga ra:
Kei aua atu, kei mamao,
Te ao e marama.
- 2 Hore o reira wahi he;
Hore te mate e tae;
Hore he tangi, he aue;
Hore he wa mamae.
- 3 Tera nga mano hunga ma
Ko reira hui ai;
Tahi ano te waiata,
Tahi te whakapai.
- 4 Hei aha tenei marama,
Hei aha tenei ra,
I to Ihowa torona
H-i whakamarama?

134 *Ina, tera atu ano he okiokinga mo te iwi a te*
Atua.—Hiperu iv. 9.

C.M.

Rangi, **York.** 237.

- 1 TERA te ao marama nui,
He wahi haringa,
E okioki tonu ai
Nga tama a t' Atua.

MO NGA WA KATOA

- 2 Kei runga ra te kainga nei
E anga ana mai ;
He mate kei te takiwa
E whiti atu ai.
- 3 I penei hoki Kenana
I kitea ai i mua ;
Kokoti pu i waenganui
Nga wai o Horano.
- 4 Tu wiriwiri atu nei
Te ngakau wehi noa ;
Titiro iho ko nga wai,
Te maia ki te kau.
- 5 Homai e te Atua ki a au
He whakapono nui.
Kia maia ai ahau te kau,
U noa ki Kenana.

135 *Ma te Atua e muru atu nga roimata katoa o o ratou kanohi.*—Whakakitenga vii. 17.

7 7 7 7.

Rangi, **Monkland.** 381.

- 1 No hea tenei ope nui,
Tenei iwi kahu ma,
Karapoti tonu nei
Te torona o t' Atua?
- 2 Nei katoa i puta mai
I nga mamaetanga nui ;
Hunga maia, tino toa,
Tae noa ki te mutunga ;
- 3 A ka okioki nei
I a ratou mahinga,
Hiri rawa e t' Atua
Tona ingoa ki nga rae.

Satiate thy feelings

- 4 Mutu pu te mate kai,
Mutu pu te mate wai,
Ngaro noa nga roimata
I nga kanohi katoa.
- 5 Ora tonu ake nei,
Koia ra ka whakapai
I te Reme a t' Atua,
Nana nei i ora ai.

136 *Ka murua hoki e te Atua nga roimata katoa i o ratou kanohi.*—Whakakitenga xxi. 4.

7 6 8 6 D.

Rangi, **Alford.** 222.

- 1 HE mano, mano tini
Nga iwi kahu ma,
Te hunga ra kua murua nei
A ratou mahi he.
Kua oti, mutu rawa,
Nga whawhai ki te ao ;
Tawhiritia kia tomo ai
Te hunga maia nei.
- 2 Nei ra nga Areruia,
Haruru ana mai :
Nga mano hapā rangi pai,
E whakatangi nei.
He whaki mo te hari
Puoho tonu mai,
Te ra e whakaeangia ai
Nga mate tini nei.
- 3 Te ra e tutaki ai,
Te ai he wehenga ;
Te ra e oho hari ai
Te hunga mine mai.
Nga pani, nga pouaru,
Whanaunga tini noa
Ko reira tutataki ai
I runga i te koa.

- 4 E koe, te Reme tapu,
I whakamatea nei,
Tutatangia mai ra e koe
Ko tenei hari nui.
Kai-whakaora pono,
Ko koe hei Kingi nui,
Te tohu o tou putanga
Hohorotia e koe.

137 *Kua rite hoki i a ia tetahi pa mo ratou.*—Hiperu
xi. 16.

6 6 5 6. Rangi, "**There is a city bright.**"

- | | | | |
|---|---|---|---|
| 1 | TERA te wahi pai,
Wahi marama nui ;
Te ai he hara
Hei whakakino noa. | 3 | Nei ra te haere nei,
E Ihu, tohungia ;
Aroha mai ra,
Horoia au kia ma. |
| 2 | E Ihu, meinga au
Kia pumau tonu mau :
Arahi rawa
Kei peka ki te he. | 4 | Kia whiwhi ra ko au
Te kahu tino ma,
Tu hari ake
Roto te kahui pai. |

138 *Te pa nui, a Hiruharama tapu*—Whkt.xxi.10.
C.M. Rangi, **Southwell.** 236.

- 1 HIRUHARAMA, toku pa,
Te wahi o te pai !
Ko a hea ra au tomo ai,
Ou painga kitea ai ?
- 2 Te ingoa nui, te kainga pai,
E arohaina nei !
Ko a hea ra koe kitea ai
E au e ohia nei ?
- 3 E koe, te pa o te Atua,
O toku Kingi nui,
Ko a hea ra au uru ai
Ki ena haringa ?

MO NGA WA KATOA

- 4 E kore ra e wehinga
Te panga mate mai,
Ua kitea atu e ahau
Te ao marama nei.
- 5 Kei reira ra e noho nei
A Ihu te Atua :
Mana ahau ka tomo ai
Ki roto ki te pa.

139 *Ko te Ariki ia o nga ariki ; ko te Kingi o nga kingi.*—Whakakitenga xvii. 14.

C.M.

Rangi, **Miles Lane.** 300.

- 1 KARANGATIA ra e katoa
To Ihu ingoa nui ;
Te tohu kingi kawea mai,
Karaunatia ko ia.
- 2 Nga ope i te Rangi nei,
Ia whakanuia mai ;
I runga i to koutou koa
Karaunatia ko ia.
- 3 Nga mano iwi o te ao
E whiriwhiria nei ;
Karangatia te Kingi nui ;
Karaunatia ko ia.
- 4 Nga uri nei o Rawiri,
Karangatia ra ia ;
Ia nei i whakatangata,
Karaunatia ko ia.
- 5 Koutou, te hunga i nga he
Kua murua atu nei,
Nana ianei i whakaea ;
Karaunatia ko ia.

MO NGA WA KATOA

- 6 Nga iwi, nga hapu katoa,
Tirohia iho ra ;
Kia rite te whakaaro mai,
Karaunatia ko ia.

140 *Kua riro nga rangatiratanga o te ao i to tatou
Ariki, i tana Karaiti hoki ; a ko ia hei Kingi
ake ake ake. —Whakakitenga xi. 15.*

L.M.

Rangi, **Galilee.** 220.

- 1 Ko Ihu ra, e kingi ia
Taiawhio noa i tenei ao ;
E tu nga takiwa katoa,
I tona kingitanga nui.
- 2 Nga iwi me nga reo katoa,
E whakaae ki tona nui ;
Tamariki nonohi nei,
E uru ki te whakapai.
- 3 Nga mea papai, nga taonga nui,
E ruia mai ma te katoa :
Te ora mo te hunga he,
Te okiokitanga pai.
- 4 Maranga ake, e katoa,
Karaunatia te Kingi nei ;
Ma runga ra nga whakapai,
Ma tatou te Amine nui.

141 *Kia mau ki nga mea whawhai katoa a te Atua.
—Epeha vi. 13.*

S.M.

Rangi, **St. Ethelwald.** 270.

- 1 E KOE, e noho nei,
Tu maia ake ra ;
Whitiki, kia tatanga mai ;
Tenei he mahi mau.

- 2 Te pono tangohia,
 Nei ra tou whitiki ;
 Kei te Ariki tonu ia
 Te mana tika mou.
- 3 Tu ake ra, kia toa,
 Kei ngakau wehi koe ;
 Nga kahu whawhai a t' Atua,
 Hei kahu enei mou.
- 4 Kia maia tonu ra,
 Te kino, whawhaitia ;
 Me tino takahi e koe
 Nga mahi he katoa,
- 5 Kia mutu mai ra 'no
 Ko enei mahi au,
 Ko kona ra koe whiwhi ai
 Ki te karauna pai.

142 *Te tangata i a ia te wikiporia, maku ia e mea
 hei pou i roto i te whare o toku Atua.—
 Whakakitenga iii. 12.*

7777. Rangi, **Redhead, No. 45.** 447.

- 1 KOUTOU, hoia pono nei,
 Kia tatanga tonu ra,
 Kei te nui te utu mai
 Mo te hunga mahi pai.
- 2 Ta te ao e whiwhi nei,
 Kore noa he tikanga ;
 Ta t' Atua e tuku ai,
 Ko te ora tonu ia.
- 3 Nei ano te wahi pai,
 Okiokitanga mai ;
 Wahi o te hari nui,
 Kei te rangi tonu ia.

- 4 Taonga tini ki te ao,
Tera e memeha noa ;
Whaia ko te taonga nui,
Ta t' Atua e tuku ai.
- 5 Te karauna tino pai,
Ora ake tonu nei,
Koia nei nga utu mai,
Mo te hunga mahi pai.

143 *Ki te mea tetahi kia hacre mai i muri i a au, me whakakahore ia e ia ano, me amo tona ripeka i nga ra katoa, ka aru ai i a au.*—Ruka ix. 23.

L.M.

Rangi, **Beccles.** 415.

- 1 Ko Ihu nana tenei ki ;
E whai mai koe hei akonga.
Me whakakahore ko koe,
Ka amo i tou ripeka.
- 2 E amo koe, kei wehi noa
Ua rongo i te taimaha ;
He kaha mou kua tukua mai,
Kei ngenge, kei he-manawa.
- 3 E amo koe, kei whakama
Ka whakarere iho ai ;
I mate ra tou Ariki,
Te mate mou kei tata mai.
- 4 E amo i tou ripeka ;
Ma Ihu koe ka kaha ai,
Ka kore ai e takahia,
Rupahu noa te hoa whawhai.
- 5 E aru i tou Ariki,
Hei mahi mau a mate noa ;
Ra runga i te ripeka
Te ara atu ki te koa.

144 *Ki te mea tetahi kia haere mai ki te whai i a au,
me whakakahore ia e ia ano, a me amo tona
ripeka, ka aru ai i a au.*—Matiu xvi. 24.

L.M.

Rangi, **Breslau.** 263.

- 1 ME mau koe i tou ripeka,
E ai ta Ihu kupu mai ;
Me kape ko nga he katoa,
Ka aru pono ai i a au.
- 2 Me mau koe i tou ripeka :
Taimaha mai, kei wehi koe ;
Kei a ia ra te kaha mou,
Kei hoha koe, kei ruwhia noa.
- 3 Me mau koe i tou ripeka ;
Tawaia koe, kei whakama,
Kei whakarongo iho koe
Nga nuka noa, nga ako he.
- 4 Me mau koe i tou ripeka ;
Kia maia, a tutuki noa ;
He kainga pai te kainga mou,
E okioki iho ai.
- 5 Me mau koe i tou ripeka ;
Kia pono koe a mate noa ;
Koe reira ra koe whiwhi ai
Ki te karauna tino pai.

145 *He kore noa iho nga mamae o tenei wa, ki te
whakaritea ki te kororia e whakakitea mai ki
runga ki a tatou a mua.*—Roma viii. 18.

L.M.

Rangi, **St. Petrox.** 410.

- 1 HE ara tini nga mamae
Te ara ki te oranga :
Ka taea atu ia te pa,
Ka ea ko enei matenga.

- 2 Hei aha hoki enei mea
E pa mai nei i tenei ao?
He mate mama noa ano
Ua tirohia te mutunga.
- 3 Ko enei mate iti nei
Hei mahi hoki i te pai,
Te pai kororia, tino nui,
E kore e memeha noa.

146 *E te Ariki, ko koe to matou nohounga i tera whakaturanga, i tera whakaturanga.—Wai. xc. 1.*

C.M.

Rangi, **St. Anne.** 165.

- 1 E TE Atua, ko koe nei ra
Te kai-awhina mai;
Te pa e ora ai ahau
I enei mate nui.
- 2 Ko koe te marumaru mai
E au ai toku moe.
Kia tata tonu mai ko koe,
Tera e ora au.
- 3 Kahore noa kia hanga mai
Nga maunga o te ao;
Kua Atua noa mai ano koe,
A ake tonu nei.
- 4 Ki a koe nei, nga mano tau,
He ra kotahi ia;
I rite ki te takiwa
Mataara o te po.
- 5 Pahure haere ana ra
Nga iwi o te ao;
Ano he taru tupu mai
E kotia atu nei.

- 6 E te Atua, kia tata koe
Hei kai-awhina mai ;
Mau ra ahau e arahi
I enei mate nui.

147 *Ka whakapaingia e ahau a Ihowa i nga wa katoa : he whakamoemiti tonu ta toku ngakau ki a ia. —Waiata xxxiv. 1.*

C.M.

Rangi, **Wiltshire.** 290.

- 1 AHAU e whakararua nei
E enei mate he ;
He whakapai ki te Atua,
Ko toku hari ia.
- 2 Nei whakapaingia ake ia,
Te ingoa tino nui ;
Ko ia te kai-tiaki pai,
Tutata tonu mai.
- 3 Ko ana e aroha ai
E tohungia e ia ;
Ko ia hei karo i nga he,
Hei tuku ora mai.
- 4 Nei koia whakamatauria
Te nui o tona pai ;
Ko kona whakaaetia ai
He tino pono ia.
- 5 Ko te Atua kia wehingia
Tau tonu mai te pai ;
Ko kona tatou whiwhi ai
Ki tona atawhai.

148 *Whawhaitia te whawhai pai o te whakapono,
hopukia atu te oranga tonutanga.*—1 Timoti
vi. 12.

7 7 7 7. Rangi, **University College.** 291.

- 1 TINI mate, raru nui
Haere maia ake ra ;
Kei awangawanga koe,
Oti kia manawanui.
- 2 Aua koe e pouri noa,
Wehi ranei i te roa ;
Tuku tata ake nei
Koe te hari tonu ai.
- 3 Miria mai ou roimata,
Haere hari ake ra,
Whawhaitia te whawhai pai
Me te maia ake koe.
- 4 Haere tonu ake ra,
Tangohia te ora mou ;
Mou te wikitoria nui,
Te karauna tino pai.
- 5 No ka tomo atu koe
Ki te rangi noho ai ;
Kati mau, he himene
I nga rangi whakapai.

149 *E kore koe e matau aianei ki taku e mea nei ;
otira e matau koe a mua ake nei.*—Hoani
xiii. 7.

C.M. Rangi, **London New.** 373.

- 1 HE mahi huna ta t' Atua
I ana mahi nui ;
He ara nona kei nga wai,
E haerea te awa.

- 2 Kei aua atu, kei mamao,
Nga rire ngaro nei ;
Kei reira ra te take mai
O ana mahi nui.
- 3 E koutou e matakū nei,
Kia maia ake ra ;
Pa mai he pouritanga nui,
Kei ohooho noa.
- 4 Kei kino koutou ki t' Atua
E mahi iho nei ;
Kei aha koa te pouri mai ?
Te mutunga he pai.
- 5 E hengia e te tangata
Nga mahi a t' Atua ;
Ko ia e matau ana mai,
Mana e whaki nui.

150 *Kauaka e waiho i taku e pai ai, engari i tau.—*
Ruka xxii. 42.

8 8 8 4.

Rangi, **Troyte, No. 1.** 264.

- 1 AHAU e inoi atu nei,
Akona mai, e te Atua,
Kia tino pono taku ki,
Kati i tau.
- 2 Ahakoa tau te pouri nui,
Kia hangu tonu ano au,
Ko tenei kau kia rangona,
Kati i tau.
- 3 E pai mai koe kia tangohia
Taku e tumanako nei,
Nau ano ra nga mea katoa ;
Kati i tau.

MO NGA WA KATOĀ

- 4 Ahakoa ngakau mihi au
Mo nga whanaunga ngaro noa,
Me penei ake taku ki,
Kati i tau.
- 5 E pa he mate tinana,
Akona iho ra e koe
Kia penei tonu taku ki,
Kati i tau.
- 6 Tahia e koe nga he katoa,
Homai he hinengaro hou,
Kia pumau tonu taku ki,
Kati i tau.

151 *Te wahi e noho ai ahau, ko reira ano hoki taku kai-mahi.*—Hoani xii. 26.

7777.

Rangi, **Glebe Field.** 153.

- 1 TANGO iho t' Ariki
Nei ko ana i te ao
Ki te wa i a ia nei
Pumau tonu atu ai.
- 2 Hono tonu ana mai
Te karanga, "Haere mai,
Tomo mai ki runga nei
Okioki iho ai."
- 3 Ka karangatia e ia
Hore ana patai mai,
Tera ranei e tukua
Tana i karanga ai.
- 4 Mei pataia iho pea,
Hoki ake ko te ki,
Waiho mai, e te Atua,
Tohungia to matou hoa.

Come ye children of the Lord

- 5 Otiia ko te Atua,
Hore ana mahi he ;
Kati ra, me whakaae
Tana nei i tono ai.

152. *Ehara to tatou i te tohunga nui e kore nei e ahei
te mamae tahi me tatou e ngoikore nei.—*
Hiperu iv. 15.

7777.

Rangi, **Redhead, No. 47.** 399.

- 1 PIKO nei te matenga,
Tau mai ko te pouri nui ;
E te Tama a t' Atua,
Tenei arohaina mai.
- 2 Ngaro nei o matou hoa,
Riro atu ki te po ;
Tangihia i muri nei,
Tenei arohaina mai.
- 3 Tena koe kua taunga noa
Ki nga mate o te ao ;
Nou te mate tino nui ;
Tenei arohaina mai.
- 4 Tena koe te mohio na
Ki nga panga mamae mai ;
Nou te mamaetanga nui ;
Tenei arohaina mai.
- 5 Mamae ko te ngakau he,
Pouri whakaroto ia,
Pehi kino iho nei ;
Tenei arohaina mai.
- 6 Whakapikau ana koe
I nga hara o te ao ;
Nau katoa i whakaea ;
Tenei arohaina mai.

153 *Ko te Atua to tatou piringa, to tatou kaha, he kai-awhina e tino tata ana i nga wa o te he.—Waiata xlv. 1.*

L.M.

Rangi, **St. Bartholomew.** 374.

- 1 TAU mai te pouritanga nui,
Ngau kino whakaroto nei,
Rarangi mai nga he katoa ;
E te Atua, aroha mai.
- 2 Ko koe te hoa aroha nui,
Te kai-tiaki pono nei ;
Me anga oti au ki hea ?
Ko koe nei toku oranga.
- 3 E kino oti ranei koe
Ki a au e tangi atu nei ?
E whakangaro ranei koe
Ua rapua atu koe e au ?
- 4 Kahore ; ina hoki ra
To kupu i ki mai ai koe,
Kei a koe te aroha nui ;
E kore koe e turi mai.

154 *Na ka ara ia, a riria iho e ia te hau, ka mea atu ki te moana, Kati, whakamutua.—Maka iv. 39.*

8 8 8 3.

Rangi, **St. Aelred.** 285.

- 1 NUI mai te panga o te hau,
Mataku noa nga akonga ;
Ko koe ia, te Ariki pai,
I te moe.
- 2 Ka mate tatou ; nei te ki
I oho whakarere mai ;
Ki tonu ake ai tou reo,
“Kati ra.”

Let us oft speak kind words
to each other

MO NGA WA KATOA

3 Te hau pukeri, mutu pu,
Tu mai ko te marino nui ;
I paki ai, i ora ai ;
Na tou reo.

4 Pa mai nga mate o te ao,
Nga mea e whakararu nei,
Ki mai ano ko taua reo,
“ Kati ra ! ”

155 *Ko tahi hei hepara, hei kai-whakaako, kia tino
rite ai te hunga tapu he mea mo te mahi
minita.—Epeha iv. 11, 12.*

L.M.

Rangi, **St. Lawrence.** 353.

- 1 E KOE, te Kingi atawhai,
I takea ai nga mahi pai ;
Tiaho mai tou marama,
Ko koe te rapua atu nei.
- 2 Manaakitia mai ra e koe
Te kahui o tou atawhai,
Kia pumau tonu iho ai
Hei Hahi tapu ma t' Atua.
- 3 Whakaakona au Minita,
Te ngakau inoi tonu nei,
Homai he matauranga nui,
Kia tika ai te ako mai.
- 4 A ratou e whakaako ai,
Me ata tohutohu mai,
Kia ngakau whakarongo ai,
Kia tohe ki te mahi pai.
- 5 Manaakitia nga hepara :
Manaakitia nga hipi nei ;
Kia tu mataara tahi ai,
Tutuki noa te mutunga.

MO NGA WA KATOA

156 *E whakanuia ahau i waenganui i nga tawiri,
e whakanuia ahau i te whenua.—Waiata xlv.
10.*

8 8 8 8 8 8.

Rangi, **St. Matthias.** 348.

- 1 E Ihu, e te Kingi nui,
Hohorotia e koe te ra
E tino whakapono ai
Te ao katoa ki tou Ingoa.
Ae ra, e Ihu, tangohia
Te ao katoa hei kainga mou.
- 2 Tukua e koe te rongopai
Kia rere haere i te ao,
A whakamatea rawatia
Nga mahi a te rewera.
Ae ra, e Ihu, tangohia
Te ao katoa hei kainga mou.
- 3 Tonoa e koe au karere,
Kei kauwhau i te oranga,
Kia whakapono ra ano
Nga pito o te ao katoa.
Ae ra, e Ihu, tangohia
Te ao katoa hei kainga mou.

157 *Ka riro noa nei i a koutou, me houtu noa e
koutou.—Matiu x. 8.*

8 8 8 4

Rangi, **Almsgiving.** 365.

- 1 NGA pai katoa e ranea nei,
I pono ai te tangata,
E te Atua, Ariki nui,
Nau ra katoa.
- 2 Te ra e whiti iho nei,
Nga mau katoa o te whenua,
Te ora mo te tinana,
Nau ra katoa.

Praise to the man who
commanded with
Jehovah

MO TE HAPA A TE ARIKI

- 3 Te tino o te atawhai,
Te matenga o Ihu nei,
Me ona painga ranea mai,
Nau ra katoa.
 - 4 Te Wairua Tapu tuku mai,
Me ana mahi atawhai,
E whakahari ngakau nei,
Nau ra katoa.
 - 5 Nga kauwhau o te Rongo pai,
Te maunga rongo ki te ao,
Te ora ake tonu nei,
Nau ra katoa.
 - 6 Kia kua oti maku mea
E tuku oha ai ahau ?
Nui nei nga atawhai ki a au,
Nau ra katoa.
 - 7 Me tuku taku rawa mau
I runga i te ngakau koa ;
Nau nei ahau i whiwhi ai ;
Nau ra katoa.
-

MO TE HAPA A TE ARIKI.

158 *Meinga tenci hei whakamahara ki ahau.—*
Ruka xxii. 19.

L.M.

Rangi, **Leipsic.** 173.

- 1 E KOUTOU, whakatata mai ;
Pa mai ra ki te Hapa nei ;
Kia whakaritea iho ai
Te kupu a te Kingi nui.

- 2 Te kupu ra i ki nei ia,
Kia whakaritea tenei mea,
Hei tohu, kia mahara ai
Tatou ki tona matenga.
- 3 Tenei te marietanga nui,
Te maunga rongo mo te ao ;
Tenei te mea e ngaro ai
Nga hara o te tangata.
- 4 Kua rite nei nga mea katoa ;
Kei noho atu ; haere mai,
Ka tango hari iho ai
I tenei tohu atawhai.

159

S.M.

Haere mai ; kua rite nei hoki nga mea katoa. —
Ruka xiv. 17.

Rangi, **Annunciation.** 409.

- 1 TENEI te atawhai
A te Ariki nui ;
I tukua tona tinana
Hei ora mo te ao.
- 2 Ka unga mai e ia
I tenei wa ano
Ki tona tepu noho ai
Ana tamariki.
- 3 E Ihu, tenei ra
Matou ka mine nei,
He tango i-te hakari
Kua taka nei e koe.
- 4 Me tuku tonu mai
Te Wairua o te pai
Hei ako i nga ngakau nei,
E tango tika ai.

MO TE HAPA A TE ARIKI

160 *He kai pono hoki oku kikokiko, he tino mea
oku toto hei inumanga.*—Hoani vi. 55.

C.M.

Rangi, **St. Flavian.** 320.

- 1 E TE Atua e ngaro nei,
Tutata tonu ia ;
Homai he painga mo katoa
E whanga atu nei.
- 2 Kia matauria ai ko te pai
O tou aroha nui,
E rere nei, ano he wai,
Hei whakamakuku.
- 3 Tenei te haere atu nei
He tono hoki nau,
He tango i te hakari
I taka nei e koe.
- 4 Te tinana o t' Ariki
I whakamatea nei ;
Nga toto tapu, rewa noa
I Maunga Kawari.
- 5 Na enei ra i takea ai
Te ora mo te ao ;
Ma enei ra ka pono ai
Nga mahi ki t' Atua.

161 *Haere mai ; kua rite nei hoki nga mea katoa.*—
Ruka xiv. 17.

L.M.

Rangi, **Rockingham.** 317.

- 1 HE pono koia, e t' Atua,
Kua horahia te hakari ?
Te kapa o tou atawhai,
Purena tonu ana mai ?
- 2 Te nui o tenei hakari,
Ta Ihu ra i taka ai ;
Kia kainga tona tinana !
Nga toto koa kia inumia !

How great the wisdom
and the love

MO TE HAPA A TE ARIKI

- 3 He aha ra ka kapea ai?
Te paingia mai ai e katoa?
Kotahi nei i tata mai;
Te tini kei te ngaro noa!
- 4 He teka oti tenei ki,
I mate ia mo te katoa?
I paopaongia ai hoki ra
Te kai ma nga tamariki.
- 5 Me tohe, me kukume mai,
Kia kapi ai te tepu nei;
Kia whiwhi ki te oranga
Te hunga whakatata mai.

162

*E arohaina ana e ahau te hunga e aroha ana ki
a au; te hunga hoki e rapu wawe ana i a au,
e kite ratou i a au.—Whakatauki viii. 17.*

7 6 7 6 D

Rangi, **Dies Dominica.** 321.

- 1 E TE Matua aroha,
Titiro iho koe;
Ta matou inoi tenei,
Kia whakawahia mai;
Kei tata ko nga hara
Hei whakararu noa;
Kia tika ai te panga
Ki tenei Hapa nui.
- 2 E Ihu, te Karaiti,
Me arahi e koe;
Ko koe te huarahi
E tika atu ai;
Ko koe te tino pono
Hei whakakaha mai;
Ko koe te taro ora
I tukua iho nei.

MO TE IRIIRI

- 3 E koe, te Wairua Tapu,
Titiro iho koe ;
Ko enei ngakau pouri,
Me whakahari mai.
Towhaina te aroha,
Manaakitia mai ra ;
Kia pono ai te tango
I tenei Hapa nui.
- 2 Te Tokotoru Tapu,
Atua kotahi nei !
Tou painga whakakitea ;
Tenei manaakitia :
Kahore nei he kaha
Hei mahi i te pai ;
Kei a koe ra te mana
E pono ake ai.
Tirohia hoki 187.

MO TE IRIIRI.

163

*Uru atu koc ki nga mate o te Rongo pai, kia rite
ki ta te Atua whakakahanga.—2 Timoti i. 8.*

C.M.

Rangi, **St. Leonard.** 278.

- 1 E TAMA ma, kia rongo mai,
Mo tatou tenei ki ;
Mo tatou e huaina nei
Te whanau a t' Atua.
- 2 Ka iriiria nei ano
Hei tohu mo te pai,
Kia mate ki te kinonga
O tatou ngakau he.
- 3 Waiho nga mea memeha noa
Hei taonga mo te ao,
Kei runga ia o tatou mea
E tohu ana mai.

MA TE TAMARIKI

- 4 E Ihu, tukua mai rapea
Tou kaha whakamau,
Kei tahaetia e Hatana
Au mea ka riro mai.

164 *Kei whakama koe ki te whakaaturanga i to
tatou Ariki.*—2 Timoti i. 8.

C.M.

Rangi, **St. Stephen.** 328.

- 1 HEI tohu mou, kia tika ai
To mahi ki t' Atua,
I tohungia ai ki tou rae
Te tohu Ripeka.
- 2 Hei tohu mou, kei whakama
Te whakahua e koe
Te Ingoa e rangona nei,
To Ihu Ingoa nui.
- 3 Kia haerea ai te ara hou
I haerea nei e ia ;
Mau iho ki tou ripeka
Ka aru atu ai.
- 4 Hei tohu mou, kia maia ai
Te whawhai ki te he ;
Kia hoia mahi pono koe,
U tonu, mate noa.
- 5 I peneitia te tohu mou,
I hiritia ai koe ;
Kia maia koe a muri nei,
Ko te karauna mou.

MA TE TAMARIKI.

165 *Ka mau ia ki tetahi tamaiti, a whakaturia
ana ki tona aroaro.*—Ruka ix. 47.

7 6 7 6 D.

Rangi, **In Memoriam.** 337.

- 1 TERA ia te hoa aroha
Mo nga tamariki ;

MA TE TAMARIKI

He hoa e pumau tonu,
 He hoa aroha nui,
 Nga hoa o tenei ao nei,
 Tera e ngaro noa ;
 Ko ia e pumau tonu
 Aroha tonu mai.

2 Tera ia te wahi pono
 Mo nga tamariki,
 Kei runga, kei te rangi,
 He wahi tino pai.
 Kahore ra he rite
 Kia kitea i te ao,
 Te wahi o te hari
 E pumau tonu ai.

3 Tera ia ko te karauna
 Mo nga tamariki,
 Tamariki a Ihu
 I whiriwhiri ai ;
 Karauna ataahua,
 Karauna tino pai,
 Mo ratou, mo te hunga
 E paingia nei e ia.

4 Tera ia te Rangi pai
 Mo nga tamariki ;
 Nga haapa tino reka
 E whakatangi ai ;
 Anake ra kei runga
 E tohu ana mai.
 E Ihu, kohia atu
 Ki a koe noho ai.

166 *Tukua mai nga tamariki nonohi, auā hoki e araia
 atu to ratou haere mai ki a au.*—Matiu xix. 14.

9 9 9 6 D. Rangi, **Come to the Saviour.**

1 KOUTOU katoa ra, mea iti nei,
 Haere mai koutou, kei whakaroa ;

MA TE TAMARIKI

Tenei a Ihu nana te ki,
 "Haere mai ra ki a au."
 Nei te hari, tino hari nui,
 A te wa e tutataki ai,
 Hui atu tatou, ropu katoa,
 Runga te rangi nei.

2 "Tukua mai ratou," nei tana ki,
 "Aku i pai ai, kei puritia ;
 Mine mai koutou, anga mai nei,
 Haere mai ra ki a au."
 Nei te hari, tino hari nui,
 A te wa e tutataki ai,
 Hui atu tatou, ropu katoa,
 Runga te rangi nei.

3 Nei ra whakaaro, tuturutia ;
 Tana e ki nei, me whakaae ;
 Nana te tonono, nana te ki,
 "Haere mai ra ki a au."
 Nei te hari, tino hari nui,
 A te wa e tutataki ai,
 Hui atu tatou, ropu katoa,
 Runga te rangi nei.

167 *U pu i a koe te mangai o nga kohungahunga, o nga mea ngote u.*—Waiata viii. 2.

L M

Rangi, **Alstone.** 331.

- 1 Ko tatou iti nei ano,
 Tamariki nonohi nei,
 Me aha ra ka taea ai
 Nga mahi pai e kiia nei?
- 2 Nga akoranga mai o mua,
 E whakaritea atu nei ;
 Ko ehea mahi oti ra
 Kia mahia tonutia ano?

MA TE TAMARIKI

- 3 Nga ra katoa e ora ai,
Nga mea nonohi, iti nei,
He mahi ra kua tukua mai
Kia mahia atu mo te pai.
- 4 Te ngakau whakakake noa,
Totohe, mahi whakatoi,
Ki riri ranei, mahi he,
Me pehi enei mea katoa.
- 5 Kia mahi pai, kia atawhai,
Kei kupu riri ki nga hoa,
Kia rangimarie, noho pai,
Hei mahi enei ma katoa.
- 6 Kahore he tamaiti nei,
I kore ai te rite mai
He mahi ataahua, pai,
Kia mahia atu ki t' Atua.

168 *Kua uru na koutou ki nga mamae, ka uru ano
hoki ki te whakamarietanga.*—2 Kori. i. 7.

7 7 6 6 6 6 7. Rangi, **Rejoicing.** Hym. Comp. 442.

- 1 NEI te wa e pouri ai,
Nei te wa e mamae ai,
E pehi ai te he.
Nei te tino hari,
Hari pumau tonu ;
Nei te tino hari,
Kei te Rangi tonu ia.
- 2 Ratou e aroha nei
Ki t' Atua i tenei ao,
Ko reira noho ai.
Nei te tino hari,
Hari pumau tonu ;
Nei te tino hari,
Kei te Rangi tonu ia.

MA TE TAMARIKI

- 3 Tamariki iti nei,
Inoi pono ki t' Atua,
Ko reira mine ai.
Nei te tino hari,
Hari pumau tonu ;
Nei te tino hari,
Kei te Rangi tonu ia.
- 4 Nui te hari, nui te koa,
Ina kitea t' Ariki,
Runga te torona.
Nei te tino hari,
Hari pumau tonu ;
Nei te tino hari
Kei te Rangi tonu ia.
- 5 Kiano ra i rangona,
Kore noa kia matauria
Nga pai kua taka nei.
Nei te tino hari,
Hari pumau tonu ;
Nei te tino hari,
Kei te Rangi tonu ia.
- 6 Kia mataara, kia inoi,
Whanga maretia te ra
E tomo atu ai.
Nei te tino hari,
Hari pumau tonu ;
Nei te tino hari,
Kei te Rangi tonu ia.

169 *He mea whakama na ratou o ratou kakahu ki nga toto o te Reme.—Whakakitenga vii. 14.*

C.M.

Rangi. **St. Peter.** 13.

- 1 HE mano nga tamariki
Kua kite i t' Atua,
Kua murua nei o ratou he,
He hapu tino pai.

MA TE TAMARIKI

- 2 I pehea ra i kitea ai
E ratou tenei pai?
I pehea ra i ora ai
Enei tamariki?
- 3 Na nga toto ra o Ihu
I whakahekea nei,
Na enei i horoi kia ma,
Koia i ora ai.
- 4 No tenei ao i rapua ai
To ratou orange;
Na konei ra i kitea ai
Te mata o t' Atua.

170 *Ko nga tamariki e karanga ana i te temepara, e mea ana, Ohana ki te Tama a Rawiri.—Matiu xxi. 15.*

7 6 7 6 D.

Rangi, **Ewing.** 228.

- 1 KA haere mai a Ihu
Ki Hiruharama,
Ka tu nga tamariki,
Ka waiata ake.
Kihai ra ia i riri
Ki taua mahi pai;
Ka whakarongo haere
Ki aua waiata.
- 2 Kua tae nei ki te rangi
A Ihu, kingi ai,
Te mutu te aroha
Ki ana i konei,
Me hui mai ra ki a ia
Karanga ake ai,
Ohana ki a Ihu,
To tatou Kingi nui.

HE INOI

- 3 Kia hangu ra ko tatou
Ki tenei waiata,
Tera e oho ake
Nga kowhatu katoa.
Me pehea he whakaaro?
Me mahi ngutu kau?
Kahore. Ko te ngakau
Me tuku ki t' Atua.

HE INOI.

171 *Ma te marie a te Atua, e kore nei e taea te whakaaro, e tiaki o koutou ngakau, o koutou hinegaro i roto i a Karaiti Ihu.—Piripai iv. 7.*

L.M.

Rangi, **Canon.** 23.

- 1 MA te marie a te Atua
Tatou katoa e tiaki;
Mana ano e whakau
O tatou ngakau ki te pai.
2 Ma te Atua Tamaiti ra,
Ma te Wairua Tapu hoki,
Ratou, Atua kotahi nei.
Tatou katoa e whakapai.

172 *Kia tau ki a koutou katoa te atawhai o te Ariki, o Ihu Karaiti, me te aroha o te Atua, me te whiwhinga tahitanga ki te Wairua Tapu; Amine.—2 Koriniti xiii. 14.*

L.M.

Rangi, **Wareham.** 63.

- 1 To Ihu tino atawhai,
To te Atua aroha nui,
Ko ta te Wairua Tapu pai,
Kia tau iho ki a tatou.
2 Ma konei ra ka tika ai
A tatou mahi ki t' Atua,
Ka whiwhi ki nga atawhai
E kore nei e tangohia.

TAPIRI.

MO TE .ARANGA.

173 *Koia rawa ano ! kua ara te Ariki.*—Ruka xxiv.
34.

6 6 8 6 6 4 7 7.

Rangi, **Deliverance.**

- 1 TENEI te Ariki
 Kua ora mai ano :
Takoto ke te kowhatu ;
 Tuwhera kau te rua ;
 Ko ia kua riro mai.
 Hareruia !
Nana nei i hinga ai,
Maru noa te hoa whawhai.
- 2 Ka ora tonu nei,
 Te ai he matenga,
Ka arataki tonu ia
 I ana akonga,
 Te Rangi ra ano,
 Hareruia !
To tatou Kai-arahi ;
Ora tonu ake nei.
- 3 Kua ara mai nei ia,
 To tatou Upoko,
Ko tatou, tona tinana,
 E whakaarahia
 A muri ake nei.
 Hareruia !
Ora tonu tatou nei,
Na to tatou Ariki.

MO NGA WA KATOA

- 4 Tena ! He whakanui
 Mo te Ariki pai :
Mo tatou ia i mate ai,
 I ara ai ano,
 A ora tonu nei.
 Hareruia !
Tona tino aroha,
Hore kau he mutunga.
-

MO NGA WA KATOA.

174 *Kia maia, kia toa : . . . Ko Ihowa hoki, ko ia
 te haere ana i tou aroaro.*—Tiu. xxxi. 6, 8.

6 5 6 5 D. Rangi, **St. Gertrude.** Hym. Comp. 322.

- 1 HOIA o te Hahi,
 Whakatika ra ;
 Haere maia ake ;
 Nei he mahi mau.
Te Ariki Tapu,
 Nana koe i ki,
 Haere ki te whawhai,
 Takahia te he.
 Hoia o te Hahi,
 Whakatika ra :
 Nei te tohu mana,
 Ko te Ripeka !
- 2 Ma te rongo maia
 Hatana e pei ;
 Haere i te whati
 Ia me tona nui.
Wehi mai te Reinga
 I te rongo toa :
Tena, e te iwi,
 Kia tatanga mai.
 Hoia o te Hahi, etc.

3 Me he ope taua,
Ko te ahua ia
O te Hahi tapu :
E, ka oho mai.
Haere ropu tonu ;
Haere maia ai.
Ma wai ia e wehe ?
Ma wai e whawhai ?
Hoia o te Hahi, etc.

4 Taonga ! e memeha.
Pai ! e ngaro noa :
Tena ko te Hahi,
Pumau tonu ia.
Ahakoa te Reinga
Whakatene mai ;
Kore noa e kaha,
Kore ia e toa.
Hoia o te Hahi, etc.

5 Tena, e te iwi,
Whakatika mai ;
Haere ropu tonu,
Haere a matua
Whakahua te hari
Mo te Kingi nui.
Whawhaitia te kino ;
Turia ko te pai.
Hoia o te Hahi, etc.

175 *Ano te ataahua o ou tapenakara, e Ihowa o nga
mano !—Waiata lxxxiv. 1.*

7777 D.

Rangi, **Maidstone.** 240.

1 TAKU nei e koa ai au,
Ko nga whare o t' Atua ;
Ataahua ana mai
Enei tohu o te pai.

Kei te ohia atu au
Ki tou mata e t' Atua :
Whakawhiwhia mai ahau
Ki au tohu atawhai.

2 Manu rere takiwa,
Roa te ra e koa ai ia :
Nei ra ia te tino koa,
No te ngakau whiwhi nei ;
Whiwhi painga, ora nui
Mo nga he e pehi nei ;
Okiokitanga mai
Ki te uma o t' Atua.

3 Nei ano i tenei ao,
Ngakau hari ana ia ;
Whiwhi ana ki nga pai,
Ranea tonu ana mai.
Roa te ara, kino mai,
Haere marie ana ia :
Tana e whakaaro ai,
Ko te okiokinga.

4 Te Ariki atawhai,
Tenei arohaina mai :
Aratakina ahau
Kei tapeka ki te he.
Tino akona e koe
I ahau e ora nei.
To pononga, aetia mai,
Ki tou taha noho ai.

176 *Mea atu i waenganui i nga tauiri, e kingi ana
a Ihowa.—Wai. xvi. 10.*

Rangi, **Epenetus.**

1 PANUITIA ki nga tauiri, nei te Kingi nui !
Panuitia ! Panuitia !

MO NGA WA KATOA

Panuitia ki te ao katoa, nei te hari nui !

Panuitia ! Panuitia !

Panuitia kia rangona, e kake tona nui ;

Tino Kingi tona ingoa, Kingi Rongo mau ;

Panuitia kia hari tonu, tenei hoki ia,

Kei te noho runga waipuke, to tatou kingi nui.

2 Panuitia ki nga tauwi, Kingi mana ia !

Panuitia ! Panuitia !

Panuitia ki te ao katoa, motuhia nga tau !

Panuitia !

Panuitia ki nga mea tangi, kei te ora ia ;

Panuitia ki nga mea ruwha kia manawanui ;

Panuitia ki nga mea hara, te utu kua ea ;

Panuitia ki nga mea hemo, i toa ia i te mate,

3 Panuitia ki nga tauwi kei te Rangi ia !

Panuitia ! Panuitia !

Panuitia ki te ao katoa tona aroha !

Panuitia ! Panuitia !

Panuitia ki nga huarahi, ki nga marae nui ;

Panuitia ki runga maunga, ki te akau roa ;

Kia pa kaha te karanga, hamama te reo,

Kia puho ai te oro, ki nga takiwa katoa.

177 *Ko ia hoki kei te inoi mo tatou.*—Rom. viii. 34.

L.M.

Rangi, **Commandments.** 201.

1 Tu mai te temepara pai,
Te tino whare o t' Atua,
Kei reira te Tohunga-nui,
Te Kai-tiaki o katoa.

2 Ia nei i mate mo te ao,
I whakaheke toto mai,
E mahi tonu ana ia,
To tatou hoa aroha nui.

MO NGA WA KATO A

- 3 Māmao mai i te Rangi ia,
Tau tonu te titiro mai ;
E mohio ana hoki ia
He hanga noa i te tangata.
- 4 O tatou mate hono nei
E arohaina ana mai ;
Mahara tonu ana ia,
Ki ona māmae i te ao.
- 5 Nga pouri, nga māmae katoa,
I pa ki a ia wero ai ;
Aumihi tonu ana ia
Ki ona hoa e pouri nei.
- 6 Te ngakau pouri, whakina
Ki te Torona atawhai ;
Inoia ra he kaha nui,
Kia mama ai nga mate nei.

178 *Ko Ihowa toku maramatanga.*—Wai. xxvii. 1.

8 8 8 8 8 8.

Rangi, **St. Matthias.** 28.

- 1 KAI-WHAKAORA atawhai,
Matou manaakitia mai ra :
To kupu whakangotoa mai,
Kia tupu ake ai he pai.
E ora nei, a mate noa,
Tiaho mai ra ki katoa.
- 2 Tiaho mai, kia pono ai
Te hiko ake o nga wae ;
Kia tika ai, kīa hono ai
Te mahi i au mahi pai.
E ora nei, a mate noa,
Tiaho mai ra ki katoa.

MO NGA WA KATOA

- 3 Nga mahi he e mahia nei,
Murua e koe kia ngaro ai.
Homai te tohu rongo mau,
Kia rangimarie tonu ai.
E ora nei, a mate noa,
Tiaho mai ra ki katoa.
- 4 Homai he ngakau hari nui,
He ngakau wehi i te he,
Kia tino whaia atu ai
Tou ahua hara-kore nei.
E ora nei, a mate noa,
Tiaho mai ra ki katoa.
- 5 A matou e aroha nei,
Manaakitia katoa e koe:
Kia tau mai ko tou atawhai
Hei 'whakahari ngakau mai.
E ora nei, a mate noa,
Tiaho mai ra ki katoa.

179 *He toto utu nui . . . no Te Karaiti.*—1 Pit. i. 19.
6 5 6 5.

Rangi, **Caswall.** 107.

- 1 AETIA ki a Ihu,
Te kororia nui ;
Nana ona toto
I riringi mai.
- 2 Take o te ora,
Kei nga toto nei ;
Nona te aroha
Pumau tonu mai.
- 3 Tau te rangimarie
I nga wa ka:oa
Mo nga toto tapu,
Utu hara nei.

MO NGA WA KATOA

- 4 Hono te karanga
A nga toto nei,
Murua mai nga hara
O te hunga he.
- 5 Uhia enei toto
Ki te ngakau he,
Wehi noa Hatana,
Oma ana ia.
- 6 Oho mai te hari,
Koanga o te ao :
Uru ana hoki
To te rangi koa.
- 7 Rite mai te hapai
I o koutou reo ;
Tino hari pono
Mo nga toto nei.

180 *He aha taku e whakahoki ai ki a Ihowa mo ana atawhainga katoa ki a au.*—Wai. cxvi. 12.

6 6 6 6 6 6.

Rangi, **I mate moku koe.** 259.

- 1 I MATE moku koe,
Moku i hemo ai ;
Ou toto rewa mai,
Moku kia ora ai.
I mate moku koe :
Kei hea ra taku mau ?
- 2 Tau tini moku koe
I noho mamae ai,
Kia kite ai ahau
I tou kororia nui.
Tau tini moku au ;
Kei hea ra taku mau ?

- 3 Te pa o tou Matua,
Me tou torona nui,
I waiho nei e koe
Kia haere pouri ai.
Moku i waiho ai ;
Kei hea ra taku mau ?
- 4 Nga mamae tini noa,
Nga pouritanga nui,
Te ai he kupu mai,
Hei ata whakahua.
Moku i pangia ai ;
Kei hea ra taku mau ?
- 5 Te tino oranga,
Te kupu rongō mau,
Me tou aroha nui,
Nau ra i taki mai.
E rahi tau ki a au ;
Kei hea ra taku mau ?
- 6 Te wa tu ake nei,
Nga tau e ora ai,
Me whakahaere mau
I runga i te koa.
I tukua moku koe ;
Ko au me tuku mau.

181 *Ki te haere mai tetahi ki a au, e kore rawa e pangaa e ahau ki waho.—Hoa. vi. 37.*

8 8 8 6.

Rangi, **Misericordia.** 225.

- 1 E IHU, Reme a t' Atua,
Moku nei koe i mate ai ;
He mea karanga tenei nau ;
Ahau manakohia.

- 2 Ahau e poke rawa nei,
Te ai he mea e paingia ai ;
E mana ia tau ki, "Kia ma !"
Ahau manakohia.
- 3 Ahau e rurerurea nei,
He tini no te hoa-whawhai,
He whakawehi tonu mai :
Ahau manakohia.
- 4 Ahau, te he, te matapo,
Te rawakore, tirohia :
Te ora moku kei a koe :
Ahau manakohia.
- 5 He kupu tau, e horoi koe,
E muru hara, atawhai ;
Ahau e whakapono nei,
Ahau manakohia.
- 6 Kua kore nei he arai mai,
He mahi na tou aroha :
Tena ahau hei mokai mau :
Ahau manakohia.
- 7 Kia matauria ai e ahau,
Ki konei, a ki runga na,
Te ranea o tou aroha ;
Ahau manakohia.

182 *Te Kai-whakamarie e tonoa mai e ahau ki a
koutou i te Matua.*—Hoa. xv. 26.

8 6 8 4.

Rangi, *St. Cuthbert.* 207.

- 1 TA Ihu poroaki mai
I tona haerenga,
He hoa pumau hei arahi,
Hei awhina.

MO NGA WA KATOA

- 2 He manuwihiri atawhai
Hei whakamarire,
Ua kite ngakau papaku
E uru ai.
- 3 Hamumu whakaroto nei
Tona reo ngawari,
He ako mo te poka ke,
He whakahau.
- 4 Te mahi e manakohia,
Te toa ki te whawhai,
Te hiahia whai i te Atua,
Nana katoa.
- 5 Te Wairua pono, atawhai !
Ko koe kia uru mai :
Tahia nga ngakau nei kia pai
Hei taunga mou.

183 *Te whakapono, te tumanako, te aroha ; te mea
nui rawa ia o enei, ko te aroha.*—1 Kori, xiii.
13.

7 7 7 5.

Rangi, **Charity.** 210.

- 1 WAIRUA Tapu, atawhai,
Tini nei ou koha mai ;
Ko te koha tino nui,
Ko te aroha.
- 2 He aroha ra te mea
Kore nei e ruwha noa,
Kake tonu ki te nui ;
Homai t' aroha.

- 3 Poropititanga mai,
E memeha atu ra:
He aroha ia te mea'
Pumau tonu nei.
- 4 Whakapono ra, e ea;
Tumanako ra, e koa;
Ko te mea tiaho mai,
Ko te aroha.
- 5 Enei mea e toru nei,
Haere tahi ana ra;
Oti ko te mea i nui,
Ko te aroha.
- 6 Horahia ou parirau.
Kia taumaruru iho ai
Tenei koha rahi au,
Te aroha nui.

184 *Kotahi tonu te mea o to koutou karangatanga hei tumanakotanga atu.*—Epeha iv. 4.

8 7 8 7.

Rangi, **St. Oswald.** 274.

- 1 TAU te pouri, nui nga mate,
Tini whakararu mai,
Haere hari tonu ana
Nga manene i te ao.
- 2 Ra! te tohu mo te ara,
Atarangi ana mai;
Tohu pai, hei arataki
I te wa e haere nei.
- 3 Tahi tonu tenei tohu,
Ta t' Atua i tuku ai:
Whakahari ngakau ana;
Marama tiaho mai.

- 4 Tahi tonu te whakaaro,
Ngakau whakapono nui;
He titiro tonu atu
Ki te wa e ora ai.
- 5 Tahi tonu mai te hari;
Me he reo kotahi ia:
Tahi tonu ra te haere
I te kaha o t' Atua.
- 6 Tahi hoki ra te hari
Runga i te rangi nei;
Wahi o te tino Kingi,
Te Matua aroha nui.
- 7 Nei ra, haere maia tonu;
Haere me te ngakau koa:
Ko te Ripeka hei taki,
Tae noa ki te mutunga.
- 8 Taro ake ka tutuki,
Ki te okiokinga;
Mutu ngenge, ngaro atu
Enei raru, enei he.

185 *Ka mea a Ihu ki a ia, Ko ahau te huarahi, te pono, me te ora.*—Hoani xiv. 6.

C.M.

Rangi, **St. James.** 199.

- 1 Ko koe te Ara, mau ahau
Ka haere tika ai.
E rapua ake te Matua,
Mau ra ka kitea ai.

MO NGA WA KATOA

2 Ko koe te Pono, mau ahau
E ako pono mai:
Mau ra ka whai-whakaaro ai,
Ka ngakau tika ai.

3 Ko koe te Ora, na tou toa
I whakapumau mai:
Te hunga awhi ki a koe,
E kore ra e he.

4 Koe te Ara, koe te Pono,
Koe te Ora tonu,
Akona mai ahau e koe
Kia whiwhi ora ai.

186 *Ki te mea telahi ko ia hei kai-mahi maku, me
aru ahau e ia: a, te wahi e noho ai ahau,
ko reira ano taku kai-mahi.*—Hoani xii. 26.

7 6 7 6 7 6 7 6.

Rangi, **Day of Rest.** 274.

1 KUA ae ahau, e Ihu,
Hei mokai puman mau;
Ko koe kia tata tonu,
Te Ariki, te Hoa.
E toa au ki te whawhai,
Kia tuara mai ko koe:
Mau tonu e arahi,
Ka kore ai e he.

2 Kia piri tonu mai koe:
E tata nei te ao,
Me ona ahua reka,
Me ana whakawai:

Kei roto te hoa-riri,
 Kei waho, taka noa ;
 Awhi mai koe, e Ihu,
 Kei hara ko ahau.

3 Mau au e tohutohu
 Ki tou reo ngawari,
 E pehi te rupahu,
 Te ngakau titi ke.
 Ua puhoi, whakahaua ;
 Ua kaika, pehia mai.
 Kia puaki kau tau kupu,
 Kia rongo tonu au.

4 Au pononga, e Ihu,
 E aru atu nei,
 Kua ki mai koe, He pono,
 Hei a koe noho ai.
 Kua ae nei au, e Ihu,
 Hei mokai pumau mau :
 Ko koe hei whakakaha,
 Te Ariki, te Hoa.

5 Akona mai tou ara
 Kia haerea e ahau :
 Mau e tautoko ake
 Ka haere tika ai.
 Kia riro au i a koe ;
 Tu tonu, mate noa :
 Tutuki ki te rangi,
 Ki a koe noho ai.

MO TE HAPA A TE ARIKI.

187 *Ka tukua he whakakakara ki toku ingoa i nga wahi katoa, me te whakahere poke-kore.—*
Maraki i. 11.

10 10 10 10 10 10. Rangi, **Unde et memores.** 322.

- 1 E TE Matua, nou na te aroha
Matou i ora ai ki Kawari :
E inoi tonu na te Kai-wawao,
Koia matou ka tapae atu nei
I taua tino whakahere pai,
I tau e ahua-reka tonu na.
- 2 Titiro koe, ko tona kanohi,
He wahi nona matou nei katoa :
Kapea e koe o matou hapanga,
Te whakapono iti, inoi he.
I mate ra to matou Ariki
Kia kua enei e maharatia.
- 3 Mana ano te inoi mana ai
Mo nga whanaunga, nga hoa aroha,
Kia awhitia e tou na atawhai :
O ratou wairua ata tiakina,
Kei tata mai nga mea e poke ai ;
Kia hinga tonu ko te hoa-whawhai.

MO TE HAPA A TE ARIKI

- 4 Tukua kia tata matou ki ou wae ;
 E pumau tonu nei tou aroha.
 Ma tenei taro ora, taro pai,
 Karo ai matou i nga he katoa.
 Kia hari matou hei pononga mau :
 Kia u ki a koe ake tonu nei.

RICHARD CLAY & SONS, LIMITED,
BRUNSWICK STREET, STAMFORD STREET, S.E.,
AND BUNGAY, SUFFOLK.

HE KUPU WHAKAMARAMA.

I runga i te hiahia nui o etahi o nga Kau matua, kua hoki atu i konei ki Hiona, kia mohio nga Hunga Tapu o nga motu nei ki nga himene e waiatatia e nga Hunga Tapu o Hiona, ka whakamaoritia enei himene. Tera, ka mahi ano etahi atu kia tino riro atu i a koutou te nuinga o nga himene o Hiona.

Kia kaha koutou ki te hapai ake i enei himene, kia mohio ai nga tangata katoa ki nga tikanga o te Rongo Pai mau tonu. Ina ngawari ratou ki nga himene katahi ka whakarongo pea ki nga kauwhautanga. Kati. Kia ora tonu koutou.

NA HEMI NITAMA RAMAPATA,

Te Kai Panui,

Hui Tau, Kaikohe, 1917.

Akaranā,

1917.

1

KEI RUNGA RAWA I TE MAUNGA

(High on the Mountain Top)

Kei runga te maunga
Kua tu ra te tohu,
Titiro e nga iwi
Powhiritia koutou.
Kei Hiona, he rangimarie;
Kei maunga Hiona e kitea ai

Kei te maharatia
Ta te Atua ki,
E whakakitea mai
Te tino Rongopai.
Ko tona marama ma reira kitea ai
E te ao katoa i enei ra.

Ka hanga whare ra
Ki Tona ingoa pai,
Kia tiro ra te iwi
Noho ki tawhiti.
Me haere ake tatou mahi Tana pai,
Ako ra te kupu, rite ai.

2

E TOKU MATUA.

(*O My Father*).

Toku Matua noho mai na
Runga i to kainga pai,
A whea hoki ai ahau
Ki tou uma piri ai ?
Roto i tou kainga tapu
Noho wairua ranei au,
He tika hoki i tou taha
Whakatipua ai ahau ?

He take tika he mahi nau
I noho ahau ki tenei ao,
Te tukua au kia mahara
Ki to mua whanautanga.
Anei te ki a te Wairua,
Ko au e noho manene nei
Mohio iho hoki ano,
No tou kainga tapu au.

Na te wairua au i ako
Ko koe toku Matua,
I ngaro ia te tikanga
Pewhea ra i matua ai.
E noho wehe ana ranei
Nga Matua i te rangi ?
Kore rawa, e ai te tika
He whaea ano toku na.

Ina mahue te ora mate
Takotoria nga kiko nei,
Tukua mai e oku Matua
Tutaki ake tatou na.
Ano e oti ai nga mahi
Tonoa ai ahau e Koe,
E nga Matua, tukua iho
Hei kona tatou noho ai.

3

TA HOHEPA METE INOI PUAKI TUATAHI.

(Joseph Smith's First Prayer).

Ano te pai o te rangi
Whiti pai te ra ano,
Tangi waiāta nga manu,
Ara nei nga mea katoa,
A ka haere rapu Hohepa
I t'Atua aroha
Haere ki ro' ngahere,
Rapu ai te Atua.

A ka inoi atu ia,
Timata te puaki,
Putā mai te wairua kino,
Whakapouri rawa ia;
Ahakoa ra, u tonu ia
Ki te inoi kaha nei,
Ahakoa, u tonu ia
Ki te Matua aroha.

Ano puta te marama
Karopoti tonu nei,
A ka kite kororia
Heke iho tonu mai,
He Karere i te Rangi,
Ko wai raua? Tiro mai!
Ko te Matua me te Tama
Tu mai nei ki a ia.

“Taku e aroha tenei
Whakarongo ki a ia!”
Nei te kupu ra i rongo,
Hei utu mo tana nei;
Hari nui tona ngakau
Kite ia i te Atua,
Whakarongo ano ia
Ki ta tona Ariki.

4

NAU MAI, NAU MAI TE HAPATI.
(Welcome, Welcome, Sabbath Morning).

Nau mai, nau mai te Hapati
 Okioki matou nei;
 Nau mai, e te ata
 Na te inoi i whakapai,
 Mihi mai nga kai-whakaako
 Kia matou e hui nei
 Mahi ratou kia whakaako
 Matou i te haere pai.

Chorus:

Nau mai, nau mai te Hapati
 Okioki matou nei;
 Nau mai, e te ata
 Na te inoi i whakapai.

Whakarongotia te tangi
 A nga Ratapu katoa.
 Me nga tai-tamariki
 E parekareka nei.
 Me te tohe mai nga reo,
 Haere mai, kaua e roa.
 Me te tangi a nga kupu,
 Kia tetere, haere mai.

Matou nei ka koropiko,
 He waiata ki te Atua;
 Huri nei te ngakau pono,
 Rapu Ana ara pai.
 I nga kupu whakakite,
 Ako matou, riki nei,
 Aro mai nei i te rangi
 Hei arahi ki te pai.

Nei ka kite i nga hoa,
Me nga Matua o te ao;
Kei te ngakau nui ia
Ki nga mahi a te Atua.
Ma nga kino ote ao
E whakau ki te pai,
Ka u tonu hoki matou,
Me aha, te ao tawai.

5

ANO TE NUI O TE MATAURANGA.

(How Great the Wisdom).

Ano te nui te aroha,
I roto te rangi,
I tukua mai a Ihu nei
Kia mate mo te ao.

Ko ona toto i heke ai,
Me te manawa ano;
He whakahere harakore
E ora ai te katoa.

Nana te ara takoto nei
Nana i tohe mai;
Te wahi te oranga nui
E noho nei te Atua.

Ano te pai o Tana mahi
Te whakaoranga nui;
Ka tutaki pono rawa ai
Te tika me te aroha.

E kainga ana te taro nei,
E inumia nei te wai;
He whakamaharatanga ra
Ko tatou ka pono ai.

6

E HIONA, TE ATA AHUA.

(Beautiful Zion).

E Hiona o runga ra,
Te nei pa e aroha nei au;
Atahua te urunga,
Wahi o Tana temepara;
Ma Ihu nei o Kawari,
Mana e powhiri mai ki a au.

Chorus:

E Hiona, E Hiono, E Hiona,
Pa ataahua o t'Atua.

Te Rangi tino marama,
Nga anahera kahu ma;
Waiata reka ki t'Atua,
Mea tatangi pai ano;
Kei reira tatou waiata,
Karakia ki te Ariki.

Karauna pai mo ia rae;
Ratou u noa te utu pai;
Kakahu ano e rite ai,
Ahua pai katoa e tae;
Hei reira ahu atu au
Hei reira okioki ai.

7

NGA KUPU ATAAHUA, NGA KUPU AROHA.

(Beautiful Words of Love).

Nga kupu tika aroha
Rangona ia ra,
Homai e Ihu i runga
Hei arahi matou.

Chorus:

Nga kupu aroha. Nga kupu mai
Na Ihu i homai. Na Ihu mai
He reka, pai, nga kupu mai
Nga kupu aroha.

Na nga apotoro pono
E arohaina nei,
E ako matou ia ra
I runga kupu pai.

Na nga poropiti ano
He mea na t'Atua,
He whakahe nga aro he
He whakatika pai.

He taonga nui nga kupu pai
Me rapu tonu ai,
E haere tika tonu ai
Nga kupu aroha.

8

KO TE ATUA TOKU MARAMA.

(The Lord is My Light).

Hei marama ora te Ariki oku,
E kore au e wehi e tata mai nei Ia.
Koia toku ora i pouri i te he;
Hei whakaatu pai na te wairua homai.

The Lord is my light,
He is my joy and my song,
By day and by night,
He leads, He leads me along.

Hei marama ora, te Ariki oku,
He aha ke te pouri, ka whakakitea mai
Noho mai nei Ia i runga kororia
Me aha au e noho i roto pouri nei ?

Hei marama ora te Ariki oku,
I runga Tona kaha e maia ai ahau :
Te ngoikoretanga e koretia e Ia,
I runga whakapono e atawhāitia au.

9

E TE ATUA, E TE MATUA ORA TONU.

(O God the Eternal Father).

E te Atua mau tonu
I roto te rangi;
I to Ihu ingoa
Me whakapai e koe,
Te hunga tika tango nei
Te taro me te wai,
He tohu e mahara
Tou kupu atawhai.

Te whakahere tapu
Tikanga nui nei,
Nga hara kia murua
E Tana atawhai.
He mea whaaatu
To Ihu mamae nui
Ma tona wairua pono
Nga ngakau hono ai.

Ihu i whiriwhiria,
I heke iho nei
He whakahere tapu,
E ora ai katoa.
Tona ahua rite
Ki to te tangata,
Kai whakaora tonu
Mo tatou, raro nei.

10

KO TE INOI, TE TINO HIAHIA O TE WAIRUA.

(Prayer is the Soul's Sincere Desire).

Kia inoi tatou aianeī
Ki to tatou Atua,
He whakawhetai atu ra
Mo ana pai katoa.

He mea ahua-reka nei
Te inoi whakapai
He tino hiahia ra
Na te wairua pai.

Ko te inoi he mea ra
E puta tonu mai,
He whakaara, he aha noa
E huri ki te Atua.

Ko ia te tino oranga
Te tino kaha nei,
E ora haere ake ra
Te hunga karakia.

Ka hui te hunga tapu nei
He whakahoā tahi
Kei roto i te Matua
Me te Tama ano.

Kia inoi tatou aianeī
Ki te Ariki pai,
Hei ako ano ma tatou
E inoi atu ai.

11

KIA TIKĀ TĀU MAHI.

(Do What is Right).

Me mahi tika, e puta mai ao nei,
Tohu mai marama herekore;
E kitea mai nei, a tatou mahi,
E nga anahera, mahi tika.

Chorus:

He mahi tika, hei aha ka puta,
Whaia te tika i nga wa katoa;
Kei ngakau kore, erangi titiro;
Ka tiakina koe, mahi tika.

Me mahi tika, e motu nga here—
Ka mutu nga meka piata nei,
Ka meinga mama nga taimahatanga
Ka mau te pono nei, mahi tika.

Me mahi tika, kia u, kia maia !
E tata ana te utu rite,
Ka mutu te heke nga roimata,
Whai manatia koe, mahi tika.

12

KIA PAI NGĀ KUPU KI TĒTAHI ATU.

(Let Us Oft Speak Kind Words to Each Other).

Kia korero tatou ngā kupu
E whakahari ngakau ai,
Kia pai hoki te whakarongo
Ka tipu te whakamarie.
Ka anga ra te ngakau pouri
Whai kaha i to runga ra,
Ka horo ngā taepa kino,
Ka tipu te rangimarie.

O the kind words we give, shall in memory
live,

And their sunshine forever impart,
Let us oft speak kind words to each other,
Kind words are sweet tones of the heart.

Kia korero tatou ngā kupu
E oho te wairua pai,
He tangi pai ki te taringa,
He whakatipu te aroha.
Kia maha ngā whakaaro penei
Nga whakahoutanga rongō,
Kia tae mai te wa e tuturu
Te tika me te atawhai.

HE AHA I KITEA I TE RANGI ?

(What was Witnessed in the Heavens ?)

Kitea aha i te rangi ?
 He anahera rere mai.
 I a ia ranei he mea mau mai ?
 Ae ra hoki, te rongopai.
 Kauwhautia : e ai tana,
 Runga i te mana e'
 Ki nga iwi, ki nga reo,
 Nohoia nei te ao.

Kore atu he rongopai nei ?
 Ae ra, a te tangata.
 Hei aha oti to muri mai na ?
 To mua puta mai ano,
 Kauwhautia ra e Pita,
 E Paora, e te Ariki;
 Ta te hunga tapu kauwhau
 Rite pu ki ta ratou.

Kiwhea oti ra i ngaro ?
 Kihai ia i pahemo ?
 Pewheatia ano nga iwi ?
 Ta te Atua, tika pu.
 Te rapu hua i wahi kau ra,
 Te ao ranei i te po ?
 Koia nei te ra e whiti,
 E kite tika ai tatou.

LOVE AT HOME.

(Translated by Arthur Elkington).

Marama tiaho mai,
Me he aroha,
Nui te koa kei waenga nei,
Me he aroha.
Tau mai te rangimarie,
Ahuareka ana mai,
Marie kei nga wa katoa,
Me he aroha.

Aroha, aroha,
Marie kei nga wa katoa,
Me he aroha.

Rangimarie kei konei,
Me he aroha.
Kore puta nga riri,
Me he aroha.
Pua noa nga pua papai
Roto i nga motu nei,
Tau mai ra nga pai katoa,
Me he aroha.

Aroha, aroha,
Tau mai ra nga pai katoa,
Me he aroha.

Koa mai to tatou Atua,
Ki te aroha.
Kii katoa te ao i te koa.
Me he aroha.

Rere marie nga awa
Marama mai te rangi
Tino koa mai te Atua,
Ki te aroha.

Aroha, aroha,
Tino koa mai te Atua
Ki te aroha.

15

HAERE MAI KI TE KAI WHAKAORA.

(Come to the Saviour).

Koutou katoa ra, mea iti nei,
Haere mai koutou, kei whakaroa;
Tenei a Ihu nana te ki,
 "Haere mai ra ki a au."
Nei te hari, tino hari nui,
A te wa e tutataki ai,
Hui atu tatou, ropu katoa,
 Runga te rangi nei.

"Tukua mai ratou," nei Tana ki,
"Aku i pai ai, kei puritia;
Mine mai koutou, anga mai nei,
 Haere mai ra ki a au."
Nei te hari, tino hari nui,
A te wa e tutataki ai,
Hui atu tatou, ropu katoa,
 Runga te rangi nei.

Nei ra whakaaro, tuturutia;
Tana e ki nei, me whakaae;
Nana te tonono, nana te ki,
 "Haere mai ra ki a au."
Nei te hari, tino hari nui,
A te wa e tutataki ai,
Hui atu tatou, ropu katoa,
 Runga te rangi nei.

HOIA O TE HAHĪ.

(Onward Christian Soldiers).

Hoia o te Hahi,
 Whakatika ra;
 Haere maia ake:
 Nei te mahi mau.
 Te Ariki Tapu,
 Nana koe i ki,
 Haere ki te whawhai,
 Takahia te he.

Chorus:

Hoia o te Hahi,
 Whakatika ra:
 Nei te tohu mana,
 Ko te Ripeka !

Ma te rongo maia
 Hatana e pei;
 Haere i te whati
 Ia me tona nui.
 Wehi mai te Reinga
 I te rongo toa:
 Tena, e te iwi,
 Kia tatanga mai.

Me he ope taua,
 Ko te ahua ia
 O te Hahi tapu:
 E, ko oho mai.
 Haere ropu tonu;
 Haere maia ai.
 Ma wai ia e wehe ?
 Ma wai e whawhai ?

Taonga ! e meheha.
Pai ! e ngarō noa :
Tena ko te Hahi,
Pumau tonu ia.
Ahakoa te Reinga
Whakatene mai ;
Kore noa e kaha.
Kore ia e toa.

Tena, e te iwi,
Whakatika mai ;
Haere ropu tonu,
Haere a matua
Whakahua te hari
Mo te Kingi nui.
Whawhaitia te kino ;
Turia ko te pai.

17

THE LAND OF LOVE: THE SOUTH SEA ISLE.

(By S. J. Ottley).

You've heard of love in hamlets,
In cities and in towns,
Where your friends will greet you with a
hearty hand ;
But I'll sing to you a song of love
That's never been surpassed
By any race of people in the land.

Whakaronga ki te tangi o nga Iwi tonga nei.
I runga i te aroha haere mai,
Talofa, Aloha, E tama haere mai
Ki nga motu o te moana tonga nei.

No matter where you came from,
No matter where you're bound,
You can get a warm "Kia ora" from them
there.

If there's trouble in your breast,
You can put your soul at rest
When you hear te iwi tangi "Haere mai."

"Nau mai E Tama, E Hoa haere mai
I runga i te aroha, haere mai.
Kia kaha ki te kai kia ora,
Kia pai te moe mahau,"
Ko te tangi o nga Iwi tonga nei.

You'll see a chieftain prancing
All dressed in war parade,
You may think his words are violent, full of
hate,
But step a little closer and understand those
strains
And you'll be surprised to hear him shout and
say:

"Nau mai E Tama, E Hoa haere mai,
I runga i te aroha, haere mai."
It's a greeting strange and queer,
But one you'll never hear
Save it's in the Land of Love—the South Sea
Isles.

18

HE INOI. (Doxology).

Ma te marie a te Atua,
Tatou katoa e tiaki;
Mana ano e whakau
O tatou ngakau ki te pai.

Ma te Atua Tamaiti ra,
Ma te Wairua Tapu hoki,
Ratou, Atua kotahi nei.
Tatou katoa e whakapai.





